


# LOINA HAUHAUNA



The New Testament in the Bunama language of Papua New Guinea

LOINA HAUHAUNA  
The New Testament in the Bunama language of Papua New Guinea  
Nupela Testamen long tokples Bunama long Niugini

copyright © 1991 Wycliffe Bible Translators, Inc.

Language: Bunama

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 4 Mar 2019 from source files dated 29 Nov 2017  
45dc0516-b235-59d5-bb1e-9b6a4ca7d904

## Contents

Loina Nuahuana . . . . .	1
Madiu . . . . .	2
Maki . . . . .	52
Luke . . . . .	85
Yoni . . . . .	140
Paihowa . . . . .	182
Loma . . . . .	230
1 Kolinita . . . . .	252
2 Kolinita . . . . .	272
Galetiya . . . . .	285
Epeso . . . . .	293
Pilipai . . . . .	300
Kolose . . . . .	305
1 Tesalonaika . . . . .	310
2 Tesalonaika . . . . .	314
1 Timoti . . . . .	317
2 Timoti . . . . .	323
Taito . . . . .	328
Pilimoni . . . . .	331
Ibeliu . . . . .	333
Yemesa . . . . .	349
1 Pita . . . . .	355
2 Pita . . . . .	362
1 Yoni . . . . .	366
2 Yoni . . . . .	372
3 Yoni . . . . .	373
Yude . . . . .	374
He'ita'ita . . . . .	376
. . . . .	399
. . . . .	411

# LOINA HAUHAUNA

The New Testament in the Bunama language of Papua New Guinea

Nupela Testamen long tokples Bunama long Niugini

[bdd]

Translation: © 1991, Wycliffe Bible Translators, Inc.

Print publisher, 1991 by The Bible Society of Papua New Guinea

Web version  
2015, Wycliffe Bible Translators, Inc.  
[www.Wycliffe.org](http://www.Wycliffe.org)

<http://pngscriptures.org>

[www.ScriptureEarth.org](http://www.ScriptureEarth.org)

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- Attribution. You must attribute the work to *Wycliffe Bible Translators, Inc.* (but not in any way that suggests that they endorse you or your use of the work).
- Noncommercial. You may not use this work for commercial purposes.
- No Derivative Works. You may not alter, transform, or build upon this work.
- In addition, you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem yu ken givim kopi long narepela manmeri. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. Yu mas givim nating. Na tu, yu no ken senisim Tok.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken askim mipela.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, plis askim mipela.

## MADIU

### Tetela bwebwe'ana Madiu 'ileleya

Yesu 'ana tomuliyao site tuwelo 'aigeda 'oidiyega sanina Madiu, ma sanina heluwena Libai. Tauna gwama Yudiya, ma hesi meLoma 'i'abi'abihetedi ma takesi meYudiya 'oidiyega 'ihehegonedi meLoma weyahidi. Bewa lamuna meYudiya Madiu sihe'ip-i'ipiyeya, ma hesi Yesu Madiu 'i'atemuyamuyaeya, ta 'ibwauweya, ta 'imuliyeya; ma muliyetega Yesu tetelina 'ileleya ma 'ihepwaileya 'abehega tauna tuwa Mesaiyaina. Mesaiya 'ana bui 'ena Gilisi 'oinega beno Keliso, ta 'ana nuwasabwalena beno To'abihetena. Tauna Mesaiyaina meYudiya siloloyamweya to tuta 'oina 'ilatuma ma 'i'abihetedi.

Yehoba 'ina lolina 'ana sanapu wete buki bewa 'alona 'imiyamiya.

*Yesu Keliso tubunao  
(Luke 3:23-38)*

<sup>1</sup> Lele bewa To'abihetena Yesu tubunao nugenugeta weyahidi. Yesu tubuna hauhauna Debida, ma tubuna nugenugeta Ebalahamo. <sup>2</sup> Weyahina bewa gide: Ebalahamoina natuna Aisake, ma Aisake natuna Yakobo, ma Yakobo natunao Yuda matasinao. <sup>3</sup> Yudaina natunao Pelesi ma Dela, sinadiu sanina Temali, Pelesi natuna Esiloni, ma Esiloni natuna Elama, <sup>4</sup> ma Elama natuna Aminadaba, ma Aminadaba natuna Nasoni, ma Nasoni natuna Salimoni, <sup>5</sup> ma Salimoni mwanena Leyabi ma natudiu Bwasa, ma Bwasa mwanena Ludi, ma Bwasa ma Ludi natudiu Obedi, ma Obedi natuna Yese.

<sup>6</sup> Yese natuna Debida tauna kini, ma Debidaina Ulaiya mwanena 'ihematabaleya ma 'ihaiya ta natudiu Solomoni. <sup>7</sup> Solomoni natuna Lehoabama, ma Lehoabama natuna Ebaya, ma Ebaya natuna Esa, <sup>8</sup> ma Esa natuna Yosepata, ma Yosepata natuna Yolama, ma Yolama natuna Usaya, <sup>9</sup> Usaya natuna Yotama, ma Yotama natuna Eyasi, ma Eyasi natuna Hesakaya. <sup>10</sup> Hesakaya natuna Manasa, ma Manasa natuna Amoni, ma Amoni natuna Yosaya. <sup>11</sup> Yosaya natunao Yekonaya matasinao, ma 'idi tutaina meBabiloni sinaoma ma meYudiya si'abiyahidiya ta sitausediya 'idi tupwa Babiloni 'oina.

<sup>12</sup> Tutaina Babiloni 'oina simiyamiya. Yekonaya natuna Siyalitiyeli, ma Siyalitiyeli natuna Selubabela. <sup>13</sup> Selubabela natuna Ebiyuda, ma Ebiyuda natuna Ilaiyakimi, ma Ilaiyakimi natuna Esoli. <sup>14</sup> Esoli natuna Sadoka, ma Sadoka natuna Ekimi, ma Ekimi natuna Eliyuda. <sup>15</sup> Eliyuda natuna Eliyesa, Eliyesa natuna Madani, ma Madani natuna Yakobo.

<sup>16</sup> Yakobo natuna Yosepa, tauna Meli mwanena, ma Meliina natuna Yesu. Yesu tauna sihesaniyeya To'abihetena.

<sup>17</sup> Yesu tubunaowedi sanidi 'adi baibaiwa potitu. Ceguma Ebalahamo 'oinega tahasili ma Debida 'oina, beno 'adi baibaiwa potini. Ma 'eguma Debida 'oinega tahasila ee tutaina meBabiloni meYudiya sitausediya Babiloni 'oina, beno 'adi baibaiwa potini. Ma 'idi tuta Babiloni 'oina 'oinega ma Yesu 'ina tuta 'oina 'adi baibaiwa wete potini.

*To'abihetena Yesu 'ina li'u  
(Luke 2:1-7)*

<sup>18</sup> Bewa gide To'abihetena Yesu 'ina li'u. Yesu sinana Meli silosonanya Yosepa ba'idana, ta 'abwa geya simiyaluwa ma Meli 'igamwa, ma 'ina gamwaina Yaluyaluwa Tabuna 'oinega. <sup>19</sup> Ma Yosepaina 'inu wagala Meli 'ina gamwa weyahina. Tauna loheya bwebwe'ana, ta geya nuwana ma Meli 'igihemwadine, ma 'inuwatuhu 'abehega 'ilogwahata gahuwe.

<sup>20</sup> Ma Yosepa 'ina nuwatuhu 'abwa 'ipaipaihowa, ta 'ina tuta 'enowa nihiyega Yehoba 'ina anelose 'aigeda 'ihewae, 'igwae, "Yosepa, 'owa Debida tubuna, sahena 'unuwanuwagala Meli 'ina gamwa weyahina, beno Yaluyaluwa Tabuna 'oinega, tuwa 'eguma 'utoe mwanu. <sup>21</sup> Ma 'abwa natuna meloheyana 'ihenatune, ma 'uhesaniyeya sanina Yesu, weyahina tauna 'ina tomotaiyao 'idi pui 'oidiyega 'abwa 'i'abihetedi."

<sup>22</sup> Ginauledi silatulatu weyahina mwalohene palopita 'aigeda 'ina gwae 'ihepwaila nugetediya ta Buki Tabu 'oina 'ilelediya 'igwae,

<sup>23</sup> “Gumalaulauna geya 'ilogwali ma 'igamwa ma natuna meloheyana 'ihenatune, ma sanina sida hesaniye Imanuweli.” (Ma saniina 'ana bui Yehoba ba'idada.)

<sup>24</sup> Ma Yosepa 'eno'enowega 'itoholowa ta aneloseina 'ina gwae 'ihematamataneya, ma Meli 'ihaiya, <sup>25</sup> ma geya 'wapina 'i'iabitoho ma 'ana siga 'ihenatuna, ma Yosepa gwamaina 'ihesaniyeya Yesu.

## 2

### *Tosonogao 'idi habo'ena gwama Yesu 'oina*

<sup>1</sup> Tutaina Yesu 'ili'uwa Bedeliyema 'oina, Helodi tauna 'iloiloina Yudiya 'alona. Ma tutaina 'oina tupwadi tosanasanapuwao tupwa bomatuwega sitauyama ma meYelusalema 'oidiya sihesilala, <sup>2</sup> sigwae, “To'eha meYudiya 'idi kini hauhaunaina? Casanapuya 'ili'u pwaiya, weyahina 'ina 'ipwala 'a'iteya tupwa bomatuwega 'isaehaneya, 'oinega 'atauyama sabi 'etuluha 'oina.”

<sup>3</sup> Cidi gwae bewa toloinaina Helodi 'ihesagoheya ma 'iateyohowa ma wete meYelusalema mabwaiyadi si'ateyohowa gwae bewa weyahina. <sup>4</sup> Ma Helodi meYudiya 'idi topwaoli madoudi ma lolina 'ana tohe'itao\* 'ibwau 'autedima ma 'oidiya 'ihesilala 'igwaeya, “To tupwa 'oina To'abihetenaina 'ina 'ebeli'u?”

<sup>5</sup> Ma sigwae, “Bedeliyema 'oina, beno Yudiya 'alona, gide palopita 'ina hepwaila Buki He'asisi 'alona 'igwaeya,

<sup>6</sup> ‘Bedeliyema 'alona 'igu boda Isileli 'idi toloina 'abwa 'ilatuma, ma 'i'itayahidi. Bewa weyahina Bedeliyema 'asa wasawasa ma sanina madouna Yudiya 'asainao mabwaiyana 'oidiyega.’”

<sup>7</sup> Coinega Helodi tosanasanapuwedi 'ibwau gahuwediya, ma 'oidiya 'ihesilaleya tutaina 'ipwalaina 'ilatu hohauwa. <sup>8</sup> Cihesilala ma 'idi hemaisa 'ihesagoheya ma 'iloinaediya, 'igwae, “Watauya Bedeliyema 'oina ma gwamaina wa'ebese bwaibwaini, ma 'eguma walobeya wahilama 'oiguwa ma wahepwaila, ma taugu wete yatauya ma ya'etuluha 'oina.”

<sup>9</sup> Nage 'oinega silatuwa ma sitauya, ma 'ipwalaina mwalo tupwa bomatu 'oina si'e'e-bubuya matadiya 'isaehaneya tauna simuliyeya ma tupwaina 'ipwalaina 'isaemasiya 'oina sitauya ta gwamaina silobeya, <sup>10</sup> ma 'ipwalaina weyahina siyaliyaya madou hedada. <sup>11</sup> Gwamaina silobeya ma siluhuwa hadai ma gwama sinana Meli ba'idana si'itediya, ma si'etuluha gwamaina 'oina. Wete helauwedi si'ewedima ma gwamaina 'oina silagudiya, beno goula ma 'inisenisi ma wete mulo.

<sup>12</sup> Ma muliyetega nihiyega Yehoba 'ihemataluwediya ma sahena Helodi 'oina sihilahila, 'oinega sitoholowa ma mali 'edega sitauya 'idi 'asa.

### *Yosepa ma gwamaina masinana sidena Itipita 'oina*

<sup>13</sup> Sitauya, ma hesi Yosepa 'oina anelose 'aigeda nihiyega 'ilatuwa ma 'ihewgwaeya, 'igwae, “Yosepa, 'utoholo ma gwama masinana 'utoedi ma wadena tupwa Itipita 'oina ma nobwa wamiyamiya ma 'ana siga yahemataluwego, ma walohihilama. Cimi dena bewa huhuna, weyahina Helodi nata beno gwamaina 'i'ebese ma 'abehega 'ilohe'amasidi.”

<sup>14</sup> Coinega nihuwanina 'oina Yosepa 'itoholowa ma gwama masinana 'itoediya ma sitauya Itipita. <sup>15</sup> Ma Itipita 'oina simiyamiya ma 'ana siga Helodi 'i'amasidi. Cidi miya taumanaina nage ma 'abehega Yehoba 'ina gwae 'ilatu, gwaeina 'aigeda palopita 'ihepwaila nugeteya 'igwae, “Itipita 'oinega natugu yabwauweyama.”

<sup>16</sup> Ma tutaina Helodi tosonogaedi 'iyamwa 'asaediya, weyahina geya sihilama, 'idi 'abo weyahina 'igamwasowala madouna, ma 'ina lolina 'ilaguya ta tolo'alehao 'ihewasaediya Bedeliyema 'asanao 'oidiya, ma 'abehega gwagwama loheloheyadi taudi 'adi bolime 'eluwa 'oinega 'isuluwa sida lohe'amasidi. Gwagwamaedi bewa gide 'adi lolina Helodi

'ilaguya, weyahina tosonogaedi 'idi gwae 'oinega 'isanapu pwaiya gwamaina 'ina li'u 'ana tuta.

<sup>17</sup> Coinega tutaina 'ilatuwa to'aha palopita Yelemaiya mwalo 'ihewwaila nugeteya, 'igwae,

<sup>18</sup> “Dougwaegwae 'asa Lama'a 'oinega tahesagohe. Nuwagala ma mataneu sidogwaegwae. Litiyeli ma'ina susuwao sidoudou, ma 'idi dou 'oinega sahena siyaliyaliyaya, natudiyao 'idi 'amasa weyahina.”

#### *Sihila Nasaleta 'oina*

<sup>19</sup> Itipita 'oina simiyamiya eeta 'ana siga Helodi 'i'amasa, ma Yehoba 'ina anelose 'ilatuwa Yosepa 'oina, ta nihiyega 'ihewwae, <sup>20</sup> 'igwae, “Yosepa, 'utoholo ma gwama masinana 'utoedi ma wahila Isileli 'oina, weyahina gwama 'ana 'aleha 'i'amasa pwaiya.”

<sup>21</sup> Ma Yosepa 'itoholowa, ma gwama masinana 'itoediya ma sihila Isileli.

<sup>22</sup> Sihilama ta Yosepa wasa 'ihesagoheya 'abehega Helodi natuna Alekeleo 'ihesuwaheyeya ma 'ihetoloina tupwa Yudiya 'oina, ma Yosepa 'imatata ta geya nuwana 'itauya Yudiya 'oina, ma nihiyega Yehoba sanapu 'i'ebwae, ma 'isakowasiya 'itauya tupwa Galili 'oina, <sup>23</sup> ma 'ilo'asa Nasaleta 'oina. Bewa 'oinega palopitao 'idi hepwaila nugeta 'ilatuwa sigwae,

“Tauna 'abwa sihesaniye gwama Nasaleta.”

### 3

#### *Yoni to'abihebabitaiso*

*(Maki 1:1-8; Luke 3:1-18; Yoni 1:19-28)*

<sup>1</sup> Tuta nage 'oina Yoni to'abihebabitaiso 'ilatuwa balabala 'awawa tupwa Yudiya 'alona ma 'ilolohatoto 'igwae, <sup>2</sup> “Cimi mumuga galana 'oidiyega wanuwabui, weyahina Yehoba nata 'oida 'ihetoloina.”

<sup>3</sup> Palopita Aiseya mwalohene bewa Yoniina weyahina 'igwae, “Tobwau 'aigeda tupwa balabala 'awawa 'enana madouna 'oinega 'ihewwaila latuwa ma 'igwae, 'Badaina 'ina 'eda wahunae ma wagihedumwalu.”

<sup>4</sup> Ma Yoni 'ana 'ale'o hebai kameli hunuhunuwana tuwa, ma 'ana gadiwana kameli 'wapina, ma 'ana 'e'ahai bilolo ma mwagagau tuwa.

<sup>5</sup> Ma Yoniina tupwa balabala 'awawa 'ilolohatoto ta meYelusalema ma Yudiya 'ana tomiyao ma we'aha Yolidani papalina 'ana tomiyao mabwaiyadi si'autama Yoni 'oina, <sup>6</sup> ma 'idi mumuga galana sihepwalediya, ma 'oinega 'i'abihe babisowedi we'aha Yolidani 'alona.

<sup>7</sup> Ma Palisiyao ma Sadusiya baibaiwadi wete sinaoma sabi babiso, ta Yoni 'i'itediya ma 'ihewwae, 'igwae, “To'abo 'omi gide mwata! Ma wanuwatuhuya 'abehega nata Yehoba 'ina gamwasowala 'oinega wadena, 'awa? <sup>8</sup> Coinega 'ilobwainegomiya ma 'imi nuwabui moisa wah'e'itaedi 'imi paihowa bwebwe'adi 'oidiyega. <sup>9</sup> Ma sahena wanuwawu hane 'abehega 'omi Ebalahamo tubunao ma 'oinega Yehoba 'i'atemuyemuyegomi. Hesi geya! Ma wa'ita Yehoba sawasawahina ma dimwa bewa 'oidiyega Ebalahamo tubunao 'ipaihowadi. <sup>10</sup> Ma 'eguma 'imi mumuga geya bwebwe'adi nata Yehoba 'ihewwae, gide 'aiwe 'eguma geya huwaina bwebwe'ana, tomota sigoha yahuledi ma 'aiwe 'ala'alata 'oina siuledi ma sigabudi.

<sup>11</sup> “Ceguma wanuwabui, taugu we'ahaga ya'abihe babisowegomi, ma hesi 'abwa 'aigeda loheya muliguwega 'inaonaoma, tauna 'imadou sinegauwa, ta geya 'ilobwainegau ma weyahina 'ana butu yalhasi. Ma loheyaina 'itauyama, ma Yaluyaluwa Tabuna, gide 'aiwe ninima, 'oinega nata 'i'abihe babiso. <sup>12</sup> Ma wete 'ina goliyega witi 'isapidi ma huwaidi sigubala ma muliyetega huwaina 'ausaladi 'ihedodo 'ina hada 'e'ahai, ma mohomohowedi 'igabudi 'aiwe ninima hatayaina 'oina.”

#### *Yoni Yesu 'i'abihe babiso*

*(Maki 1:9-11; Luke 3:21-22)*

<sup>13</sup> Tuta nage 'oina Yesu tupwa Galili 'i'ebesineya ma 'inaowa Yolidani, Yoni 'oina, sabi babitaiso. <sup>14</sup> Coinega Yoni nuwanuwana Yesu ba'idana sihesa'ugelasa, ma 'igwaeya, "Cilobwaineya ma 'owa 'u'abihe babitaisogau, ma togidega 'unaoma ma 'abehega taugu ya'abihe babitaisogo?"

<sup>15</sup> Ma Yesu Yoni 'ina gwae 'ihemaiseya, 'igwae, "Geya. Hesi bewa gide 'owa 'u'abihe babitaisogau. Weyahina bewa 'oinega loina mabwaiyadi 'ausaladi tamuliyedi."

<sup>16</sup> Coinega Yoni 'itagwala ma Yesu 'i'abihe babitaisoya. Ma 'oinega Yesu we'ahaga 'igayohanema, ma galewa 'i'eso'eya ma Yesu Yehoba Yaluyaluwana 'i'iteya 'ana 'ita gide gabubu 'isuluma ma 'oina 'itowa. <sup>17</sup> Ma hesi 'aigeda 'enana galewega 'igwaema 'igwae, "Beni natugu moisa. Tauna weyahina yayaliyaya madouna."

## 4

### *Yesu 'ana tohona Seitani 'oinega (Maki 1:12-13; Luke 4:1-13)*

<sup>1</sup> Bewa 'oinega Yehoba Yaluyaluwana Yesu 'itoeya ma 'itaueya tupwa balabala 'awawa ma 'abehega 'ana tohona Seitani 'oinega 'iloba. <sup>2</sup> Ma sabwelo poti 'alona geya 'i'ai, ma 'igomaleya madouna.

<sup>3</sup> Ma totohoina 'ilatuma ma 'igwaeya, "Ceguma 'owa Yehoba Natuna, dimwa bewa 'uloinaedi ma sihe'e'ahai."

<sup>4</sup> Ma Yesu 'igwaeya, "Buki He'asisi 'alona loina 'imiyamiya 'abehega, 'Tomota yawasidi geya 'e'ahaimo 'oinega, ma hesi Yehoba 'ina gwaeyao mabwaiyadi 'oidiyega.'"

<sup>5</sup> Coinega Seitani Yesu 'itoeya ma 'itaueya Yelusalema, ma Hada He'asisi\* tabwana moisa 'oina 'ihetoholoya, <sup>6</sup> ma 'ihewae, 'igwae, "Ceguma 'owa Yehoba Natuna, bewa 'oinega 'ulataheya, ma geya'abwa 'uhesihesilae. Weyahina Buki He'asisi 'igwae pwaiya 'igwae,

'Yehoba 'ina anelose 'iloinaedi ma si'itayahigo,'  
ma wete 'igwae,

'Nimadiyega si'ahaligo, ma 'oinega sahena 'uhesihesilae dimwa 'oidiya.'"

<sup>7</sup> Ma Yesu wete 'igwaeya, "Caigeda wete gwae Buki He'asisi 'oina 'imiyamiya, 'igwaeya, 'Sahena 'ino Bada Yehoba 'utohotoho.'"

<sup>8</sup> Ma Seitani Yesu 'itoeya 'oya madouna tabwanina, ta nage 'oina 'ebe loina wasawasa bale'uwa mabwaiyana Yesu 'oina 'ihe'itediya, <sup>9</sup> ma wete 'itohohileya, 'igwae, "Tupwa nage mabwaiyadi yada 'ebwaego, 'eguma 'ube'u sulu ma 'oiguwa 'utuluha, nata 'ebe loinaedi ya'ebwaego."

<sup>10</sup> Coinega 'iheliyeya 'igwae, "Seitani 'u'ebesinegau. Buki He'asisi 'alona loina 'imiyamiya 'abehega,

'Cino Bada Yehoba namo 'oina 'u'etuluha ma taunamo 'ina gwae 'uhematamatedi.'"

<sup>11</sup> Ma Seitani Yesu 'i'ebesineya, ma muliyega aneloseyao silatuwa ma silemeya.

### *Yesu 'ina paihowa 'ihegaineya tupwa Galili 'oina (Maki 1:14-15; Luke 4:14-15)*

<sup>12</sup> Ma muliyetega Yesu wasa 'ihesagoheya 'abehega Yoni deliya silaguluhuweya, 'oinega 'ihila ma Galili 'oina 'itaueya. <sup>13</sup> Coinega Nasaleta 'i'ebesineya ma 'ilo'asa Kapaneumi holai, beno susu Sebuloni ma Napitalai 'idi bale'uwa. <sup>14</sup> Ginaula bewa weyahina palopita Aiseya mwalohene 'ihewaila ta Buki He'asisi 'oina 'ileleya, 'igwae,

<sup>15</sup> "Sebuloni ma Napitalai, 'idi gogo beno hola ma we'aha Yolidani gamwagamwanidiya, taudi ganamuli 'idi tupwa, sanina Galili. <sup>16</sup> Taudi guguyou 'ina tupwa 'oina simiyamiya, ma hesi bewa tuwa maedana madouna si'ita pwaiya, weyahina mwalo 'amasa 'ina tupwa galana 'oina simiyana, ma bewa tuwa 'asilala 'oidiya 'isaehaneya."

<sup>17</sup> Tuta nage 'oina Yesu 'ina lohatoto 'ihegaina ta 'igwae, "Cimi paihowa galadi 'oidiyega wanuwabui, weyahina nata ma Yehoba 'ihetoloina 'oida."



*Togomana 'ehata Yesu 'ibwauwedima*  
(Maki 1:16-20; Luke 5:1-11)

<sup>18</sup> Coinega 'aigeda tuta Yesu Galili holai 'ihahasane, ta togomana siteluwa matasina 'i'itediya 'idi gomana siyahuyahuwe, 'aigeda Saimoni, tauna wete sihesaniyeya Pita, ma tasina sanina Andulu. <sup>19</sup> Coinega 'ibwauwediya, ta 'igwae, "Wamuliyegau ma tomota wa'onadi."

<sup>20</sup> Nage 'oina 'idi gomana si'ebesineya ma Yesu simuliyeya.

<sup>21</sup> Coinega wete 'ihahasane, ma togomana sitetoi wagai 'idi gomana sigibugibubudi 'i'ita lobediya, taudi Yemesa ma Yoni matamadiu, tauna sanina Sebedi. Eema Yesu Yemesaina ma tasina 'ibwauwedima, <sup>22</sup> ma sitoholowa, ma waga ta tamadiu si'ebesinediya, ta Yesu simuliyeya.

*Yesu tomota mabwaiyadi 'ilemediya*  
(Luke 6:17-19)

<sup>23</sup> Yesu Galili mabwaiyana 'isakowasiyeya, ma 'idi hada tapwalolo 'oidiya 'ilohatotowa, ma tetela bwebwe'ana Yehoba 'ina loina weyahina 'ihehepwaila, ma wete tomota 'adi lohalao 'oidiyega 'i'abi hebwebwe'enediya mabwaiyadi. <sup>24</sup> Coinega Yesu tetelina 'isaweyaneya Siliya gogonao mabwaiyadi 'oidiya, 'oinega tolohalao mabwaiyadi sitautauyedima 'oina, taudi silohala madouna ma wahidi simuyamuya, ma taudi hi'ahi'a\* si'abi hebwebwe'enediya, ma taudi 'adi lohala hebwasubwasumo ma wete tobelu, ma Yesu 'i'abi hebwebwe'enediya mabwaiyadi.

<sup>25</sup> Bewa weyahina boda madouna Yesu simuliyeya, Galiliyega ma Dikapoliyega ma Yelusalemega ma Yudiyege ma wete Yolidani hali tupwega.

## 5

*Yesu 'ina he'ita 'oyai*  
(Luke 6:20-23)

<sup>1</sup> Yesu boda madouna 'i'itediya, 'oinega 'i'ebesinediya ma 'ihaneya 'oyai ma 'imiyatoiya, 'oina, ma 'ina tomuliyao wete sihanema. <sup>2</sup> Coinega Yesu 'ihagaina ma 'ihe'ita 'oidiya, 'igwae:

<sup>3</sup> Comi ma'imi nuwadobi wayaliyaya, weyahina Yehoba nimana wamiyamiya.

<sup>4</sup> Comi todou wete wayaliyaya, 'abwa Yehoba 'iheyaliyayegomi.

<sup>5</sup> Comi 'imi mumuga nuhana, wayaliyaya weyahina 'abwa Yehoba bale'u mabwaiyana 'i'ebwaegomi.

<sup>6</sup> Ma 'eguma 'omi mumuga 'ausalana nuwanuwami madouna wayaliyaya, beno 'abwa mumuga bwebwe'ana 'atemiya 'imadou.

<sup>7</sup> Ma 'omi to'atemuyamuya wayaliyaya, weyahina Yehoba wete 'i'atemuyamuyaegomi.

<sup>8</sup> Comi 'atemi 'ausaladi wayaliyaya, weyahina 'abwa Yehoba wa'ita.

<sup>9</sup> Comi to'abi henuwadaumwala wayaliyaya, weyahina Yehoba 'i'ahwa natunegomi.

<sup>10</sup> Ceguma 'omi 'imi paihwa bwebwe'ana weyahina tomota si'alehegomi, beno wayaliyaya weyahina Yehoba nimana wamiyamiya. <sup>11</sup> Ma 'eguma weyahigu tomota siloloheliwegomi, si'ale'alehegomi, ma 'idi 'abowega si'ahwa galegalegomi, wayaliyaya tuwa. <sup>12</sup> Moisa 'ilobwainegomiya ma wayaliyaya madouna, weyahina 'abwa 'ami maisa bwebwe'ana galewa waloba. Ma 'omi gide Yehoba 'ina palopitao mwalo. Weyahina taudi wete 'idi miya mwau silobeya tomota 'oidiyega.

*Hola ma mayale weyahidi*  
(Maki 9:50; Luke 14:34-35)

<sup>13</sup> Comi gide hola me bale'u weyahidi. Ma hesi 'eguma hola 'ina waiwai 'igumwala, geya sawasawahina ma 'ibwebwe'ana hila, 'oinega talogwahate ma tasiwa yahule 'eda 'oina. <sup>14-15</sup> Ma wete 'omi gide mayale me bale'u weyahidi. Ceguma mayale tagabu, sahena walata 'oinega ta'ahu'ahu hetaluhi, ma hesi 'ebe lagu tabwanina talagu, ma hada mabwaiyana 'i'asilala. Wete gide 'eguma 'oya pwatana tahe'asa, geya sawasawahina

ma 'asaina tadahwa. <sup>16</sup> Comi wete gide, 'ilobwainegomiya ma 'imi 'asilala wa'abi he'asilala tomota 'oidiya, ma 'oinega 'imi paihowa bwebwe'ana si'ita ma Tamamiu galewa sihepwatuwe.

#### *Loina weyahina*

<sup>17</sup> Sahena wanuwatuwatu 'abehega taugu yanaoma ma Mosese 'ina loinao nuwana palopitao 'idi he'itao ya'ewayahuledi. Ma hesi yanaoma ma 'abehega loinaedi ya'abilatuhedi. <sup>18</sup> Ma yahegwaegomi 'abehega loinaedi silatu ma geya'abwa 'aigeda to'aha muhemuhena 'oidiyega 'isawala ma 'ana siga galewa ma bale'u sisawala. <sup>19</sup> Ma 'eguma taiya loinaedi 'aigeda 'oidiyega muhemuhena 'ilogwahate, ma tomota wete gide 'ihe'itaedi, tauna Yehoba 'ina 'ebeloina 'alona tauna toloduduna moisa, ma hesi 'eguma loinaedi 'uhematamatedi ma 'uhe'itaedi, beno sanu 'imadou Yehoba 'ina 'ebeloina 'alona.

<sup>20</sup> Wete yahegwaegomi 'abehega 'ilobwainegomiya ma mumugami taudi Palisiyao ma loina 'ana tohe'itao 'idi mumuga 'ida bwebwe'ana sinedi. Ma 'eguma geya, sahena Yehoba 'ina 'ebeloina 'oina waluhulu.

#### *Gamwasowala weyahina*

<sup>21</sup> Loina nugenugeta tubudao 'oidiya wasanapuya, 'igwae, "Sahena lohe'amasa, ma 'eguma taiya 'ilohe'amasa, loina 'iloba."

<sup>22</sup> Ma hesi taugu yaloinegomi 'abehega 'eguma taiya 'owa tasiu 'ugamwasowale, 'abwa loina 'uloba. Ma 'eguma tasiu 'u'ahwa galagalae loina 'uloba, toloinao 'oidiyega. Ma wete 'eguma tasiu 'ana gwae mwauna 'ulagu, 'abwa 'ulu'asa 'ala'alatana\* 'oina.

<sup>23</sup> Coinega 'eguma 'ino pwaoli 'u'ewe'eweyama ma 'abehega 'upwaoli Yehoba 'oina, ma 'eguma 'ebwa 'unuweya 'abehega tasiuina 'inu wagala 'owa 'ino mumuga weyahina, <sup>24</sup> 'ilobwainegowa ma 'ino pwaoli 'ulagu 'ebe pwaoli deina, ma 'uhila tasiu 'oina ma 'utoho ma ba'idau walabina hila, ma muliyetega 'uhilama ma Yehoba 'oina 'upwaoli.

<sup>25</sup> Ma 'eguma 'aigeda loheya 'itoego ma 'itauyego sabi heyatalaego, 'ilobwainegowa ma nugeta puiina 'ugihedumwalu mwayamwayauwe ma'iyau. Ma 'eguma geya, 'a tohe'ewaina 'ida tauyego toloina 'oina ma 'a loina 'uloba, beno silagugo deliya, <sup>26</sup> ma hesi geya'abwa 'ulatulatu ma 'ana laba 'a buki mabwaiyana 'uhemaisa hegumwalidi.

#### *Nuwatuhu dahwana weyahina*

<sup>27</sup> Loina nugenugeta wasanapu pwaiya, 'igwae, "Sahena logwali,"

<sup>28</sup> ma hesi taugu yaloinegomi 'abehega 'eguma to loheya wahine 'oina 'inuwatuhu dahwana, tauna 'atena 'ipui pwaiya.

<sup>29</sup> Ceguma mata 'ebeulauina 'ebubunega 'i'abihebe'ugo 'ilobwaineya 'ubwai yahule. Muya geya madouna 'eguma wahi 'aigeda tuwa 'uloyahule, ma hesi muya madouna 'eguma matau weyahina Yehoba wahi mabwaiyana 'iule suluhe 'asa 'ala'alatana\* 'oina.

<sup>30</sup> Gide wete 'eguma nima 'ebeulauina 'ina paihowega 'i'abihebe'ugo 'ilobwaineya ma 'u'upwa yahule. Muya geya madouna 'eguma wahi 'aigeda tuwa 'uloyahule, ma hesi muya madouna 'eguma nimau weyahina Yehoba wahi mabwaiyana 'iulesuluhe 'asa 'ala'alatana 'oina.

#### *Sa'ila weyahina*

(Madiu 19:9; Maki 10:11-12; Luke 16:18)

<sup>31</sup> Loina nugenugeta 'igwaeya, "Ceguma loheya 'aigeda nuwanuwana ma mwanena 'isa'ile 'ina leta loheyaina 'ida lele ma mwanena 'i'ebwae ma 'oinega 'isa'ila."

<sup>32</sup> Ma hesi taugu yahegwaegomi 'abehega, 'eguma loheya mwanena geya 'ipui ma tuwa 'isa'ila ma 'ihaibala hali wahine 'oina, loheyaina beno mwanena nugenugeta 'i'abihepuiya, 'eguma wahineina 'ihaibala hali loheya 'oina. Ma loheyaina 'eguma 'ihai wahine sa'isa'ilina 'oina beno loheyaina wete topui.

*Gwae hane weyahina*

<sup>33</sup> Wete lolina nugenugeta wasanapuya 'igwaeya,  
 “Ceguma wagwaehane, sahena 'imi gwaeyedi wale'wale'wadi, ma hesi Yehoba weyahina wapaihowedi.”

<sup>34</sup> Ma hesi taugu 'imi gwae hane mabwaiyadi ya'ausidi. Geya'abwa galewa weyahina wagwaegwae hane nuwana wa'e'eta'wata'walulu, weyahina galewa Yehoba 'ina 'ebe-miya. <sup>35</sup> Sahena bale'u weyahina wa'e'eta'wata'walulu, weyahina 'ahena 'ana 'ebelagu, wete sahena Yelusalema weyahina wa'e'eta'wata'walulu, weyahina toloina madouna 'ina 'asa. <sup>36</sup> Wete sahena debau weyahina 'u'eta'wata'walulu, weyahina geya sawasawahiu ma debau 'aigeda 'uloine ma 'iwa'e'e, nuwana 'iduba, 'awa? <sup>37</sup> Ma hesi 'eguma gwae moisa, 'ugwae, “Moisa.” Ma 'eguma geya, 'ugwae “Geya.” Weyahina 'eguma gwae 'ulohepoi, beno Seitani 'oinega.

*Sahena galana wahehemaise**(Luke 6:29-30)*

<sup>38</sup> Lolina nugenugeta wasanapu pwaiya, 'igwae,  
 “Mata 'aigeda 'ana henimahila mata 'aigeda, ma sala 'ana henimahila sala 'aigeda.”

<sup>39</sup> Ma taugu yahegwagomi 'abehega sahena wahrenimahila, ma hesi 'eguma taiya 'ase'aseu 'ebeulanega 'isapi, sahena 'uhehenima hile, ma hesi 'ase'ase 'adigeyageyau wete 'utagwale ma 'isapi.

<sup>40</sup> Ma 'eguma taiya heyatala 'oinega 'a 'ale'o 'i'ewa, 'ino sita wete 'u'ebwae.

<sup>41</sup> Ma wete 'eguma taiya 'ihewagomi ma 'ina tobwatobwa 'u'ahala gogo 'aigeda 'oinega ma gogo 'aigeda 'oina, 'ilobwainegowa ma 'upasima ma gogo heluwena wete 'oina 'utauya.

<sup>42</sup> Ma wete 'eguma taiya 'i'ahwa'ahwanoi 'oiuwa ginaula 'aigeda weyahina, ginaulaina 'u'ebwae, ma sahena 'ino tobwatobwa 'unuwanuwahi.

*Helau 'ada 'alehao 'oidiya**(Luke 6:27-28, 32-36)*

<sup>43</sup> Gwae nugenugeta wasanapu pwaiya 'igwae,  
 “Ciyamiyao wahelauwedi, ma hesi 'ami 'alehao walo'alehedi.”

<sup>44</sup> Ma taugu yahegwagomi 'ami 'alehao wahelauwedi, ma taudi si'abi hemuyemuyegomi weyahidi wa'ahwanoi Yehoba 'oina ma 'i'abihetedi. <sup>45</sup> Bewa 'oinega Tamadai galewa 'i'ahwa natunegomi, weyahina tauna helau huhuna, ma tauna wete 'ina sinala 'ihalahala togalagala ma tobwebwe'ana 'oidiya, ma wete 'ina dohi 'itagwatagwale tobwebwe'ana ma taudi geya tobwebwe'ana 'oidiya.

<sup>46</sup> Ma 'eguma 'iyamiyaomo wahelauwedi, geya sawasawahina ma maisa Yehoba 'oinega waloba, weyahina togalaedi, gide takesi 'ana to'ewao, 'idi helau gide 'omi 'imi helau, 'iyadiyaomo sihehelauwedi.

<sup>47</sup> Wete 'eguma tasimiyaomo wahelauwedi geya mumugami hali tomota mumugadi 'ibwebwe'ana sine, weyahina taudi ganamuli 'iyadiyaomo sihehelabinidi, 'oinega taudi ma 'omi tuwa mumugami mahemahetena.

<sup>48</sup> Ma 'omi 'ilobwainegomiya ma mumugami 'ausalana mabwaiyana, gide Tamamiu galewa.

## 6

*Helau 'awawa weyahina*

<sup>1</sup> Wete Yesu 'igwaeya: Ceguma tutaina nuwanuwami ma wahelau taudi towewelohe 'oidiya, sahena tomota matadiya wapaihowa. Ceguma gide wapaihowa 'ese, sahena hepwtu nuwana maisa walobaloba Tamamiu galewa 'oinega.

<sup>2</sup> Ma tutaina wahelau towewelohe 'oidiya, sahena yoguli wamu'amu'a, gide taudi to'e'abo'abo hada tapwalolo nuwana 'asa 'oidiya yoguli simu'amu'adi ma 'abehega tomota 'idi helau si'itadi ma sihepwatuwedi. Hede 'adi maisa tuta bewamo 'oina

silobaloba ma hesi tuta 'inaonaoma geya maisadimo. <sup>3</sup> Ma 'omi tutaina wahehelau tuwa wa'ebwaya dahwana, <sup>4</sup> ma 'oinega sahena tomota si'ita'ita, ma Tamamiumo 'imi 'ebwaya dahwanaina 'i'ita, ma muliyetega maisa bwebwe'ana 'i'ebwaegomi.

*Cahwanoi weyahina*

*(Luke 11:2-4)*

<sup>5</sup> Cimi 'ahwanoi wete gide, 'eguma wa'ahwanoi Yehoba 'oina, sahena to'e'abo'abo gide wa'ahwa'ahwanoi, weyahina taudi nuwanuwadi ma tomota matadiya tapwalolo 'alona nuwana 'asai sitoholo ma si'ahwa'ahwanoi. Moisa 'adi hepwtu tuta bewa tuwa silobaloba, ma tuta 'inaonaoma geya. <sup>6</sup> Ma 'owa 'eguma 'u'ahwanoi, 'uluhi nugeta 'ino hada 'alona ma 'uhadagudu ma 'u'ahwanoi dahwana Tamadaina 'oina, ma taunamo 'i'itago ma muliyetega maisa bwebwe'ana 'i'ebwaego.

<sup>7</sup> Ma wete 'imi 'ahwanoi 'oidiya sahena walolohilahiladi gwae gide taudi ganamuli si'oba'oba. Taudi 'idi hemisa ma gwae baibaiwadi 'oidiyega maisa bwebwe'ana siloba.

<sup>8</sup> Sahena 'omi taudi gide, weyahina 'omi Tamamiu 'imiyamiya, ma tauna 'ami mwauwao 'isanapu nugetediya ma muliyetega weyahina wa'ahwa'ahwanoi.

<sup>9</sup> Coinega tuta 'ahwanoi 'oidiya bewa gide wa'ahwanoi 'esa:

“Tamama galewa, saniu 'ahe'asisiye, ma 'a'ahwanoiyego ma 'owa 'uloinemai, <sup>10</sup> ma

'oinega 'ino nuwatuhuwedi 'apaihowadi, gide tuwa megalewa sipaipaihowa.

<sup>11</sup> Cama 'e'ahai sabwelo 'aigeda 'aigeda 'oina 'u'ebwa'ebwaemai. <sup>12</sup> Ma 'ima

mumuga galadi 'unuwasamudi, gide wete tauma 'iyamayao 'idi mumuga galadi

'oima 'anuwasamudi. <sup>13</sup> Ma sahena 'utohotohomai, ma hesi togalaina 'oinega

'u'abihetemai.”

<sup>14</sup> Ceguma 'omi 'iyamiyao 'idi puiyao 'oimiya wanuwasamudi, Tamamiu galewa wete 'imi puiyao 'inuwasamudi. <sup>15</sup> Ma hesi 'eguma 'iyamiyao 'idi puiyao 'oimiya sahena wanuwanuwa samudi, Tamamiu wete 'omi 'imi puiyao sahena 'inuwanuwasamudi.

*Hudi weyahina*

<sup>16</sup> Wete 'eguma tutaina 'oina tapwalolo weyahina wahudi, beno geya sowana wa'ai, sahena manimi 'ilolonohunohu gide tuwa tonuwagala. Ma to'abo 'idi paihowa gide, weyahina taudi 'adi 'ita si'abihegaledi ma 'abehega 'idi hudi tomota sisanapu. Taudi 'adi hepwtu tuta bewamo silobaloba, ma 'abwa geya. <sup>17</sup> Ma 'omi hesi tutaina 'e'ahai 'oinega wahudi tapwalolo weyahina, wamanibuyo ma wasinate, <sup>18</sup> 'oinega tomota 'imi hudiina sahena sisanasanapu ma Tamamiumo to'aha 'atemiya 'imiyamiya 'isanasanapu ma 'ana maisa 'i'ebwaegomi.

*Maisa galewa weyahina*

*(Luke 12:33-34)*

<sup>19</sup> Sahena 'imi wasawasa bale'uwa wahehe'autedi, weyahina sohusohu ma mwahulu wasawasa bale'uwa si'abi'abi hegaladi ma wete toyagaha siluhuluhi 'imi hada 'oidiya sabi yagaha, <sup>20</sup> ma hesi 'imi wasawasa galewa weyahina wahehetapewa. Weyahina galewa geya wete sohusohu nuwana mwahulu ma 'ida tobwatobwa si'abihegaladi, ma wete geya toyagaha. <sup>21</sup> Ma to tupwa 'imi wasawasa 'imiyamiya, beno tupwaina 'oina 'imi nuwatuhu 'ipili.

*Wahida 'ana 'asilala*

*(Luke 11:34-36)*

<sup>22</sup> Matada gide wahida 'ana 'asilala. Coinega 'eguma matadaina 'ausalana, wahida mabwaiyana 'asi'asilalana, <sup>23</sup> ma 'eguma matada sigala, wahida wete mabwaiyana siguguyou, ma 'eguma 'asilalaina 'igibo, 'abwa guguyou 'ubwa'ubwa 'i'ali sakowasiyegita.

*Cada toloina 'aigeda tuwa*

*(Luke 16:13)*

<sup>24</sup> Topaihowa geya sawasawahina ma 'ihetopaihowa badao 'eluwa 'oidiya, 'aigeda 'ilogwahate ma hesi 'aigeda tuwamo weyahina 'ipaihowa, ma 'oinega 'aigeda 'i'ahwa

bwebwe'ane ma 'aigeda 'i'ahwa galagala. Coinega geya sawasawahina ma Yehoba 'ina paihowa ma wasawasa bale'u ta'abiluwedi.

*Sahena 'ateyoho*  
(Luke 12:22-24)

<sup>25</sup> Coinega yahegwaegomi 'abehega sahena 'imi miya bale'uwa weyahina wanuwatuwuhu madouna, 'ami 'e'ahai ta 'ami we'aha ta 'ami 'ale'o weyahidi. Weyahina yawasida ginaula madouna 'oida, ma tobwatobwaedi wahi weyahidi geya ginaula madouna.

<sup>26</sup> Bewa 'aigeda 'ebe'ita ya'ebwaegomi kwasumo 'oidiya, tuta mabwaiyana geya sidauna, geya si'eli'eli, ma wete geya 'idi hada 'e'ahaimo. Bwasumowedi ginaula 'i'iudi, ma tuwa beno Tamadai galewa tuta baibaiwana 'adi 'e'ahai 'i'ebwa'ebwaedi. Ma hesi wanuwatuhuyahi 'abehega 'omi madoumi Yehoba 'oina, 'oinega sawasawahina ma 'ihe'aigomi. <sup>27</sup> Ma taiya 'oimiyega sawasawahina 'ina nuwatuhuwega 'ina tuta bale'uwa 'i'abiheduduli? Geya, 'awa?

<sup>28</sup> Coinega to'aha weyahina wanuwatuwuhu madouna 'ami 'ale'o weyahidi?

Ma 'aigeda wete bewa 'ebe'ita, haneyao 'idi bwala gogowa weyahidi wanuwatuwuhu dadani. Tuta baibaiwana geya sipaihowa ma wete geya 'adi 'ale'o sipaihowadi. <sup>29</sup> Ma moisa, Solomoni 'ana 'ale'owao ma 'ana pasao 'adi 'ita 'ausaladi, ma hane 'adi 'ita hesi bwebwe'ana hedada. <sup>30</sup> Coinega wanuwatuwuhu Yehoba 'ina 'itayahina 'oimiyaya weyahina. Tauna pwatula 'ihepasediya hane bwebwe'adi 'oidiyega; nige haneyedi sididiya ma gona siwelai ma sigabudi, ma 'omi pwatula wabwebwe'ana sinediya, ma hesi 'ami 'ale'owao 'i'ebwaegomi. Coinega sahena 'imi hemisa Yehoba 'oina 'iwe'awe'a.

<sup>31</sup> Geya'abwa wanuwatuwuhu madouna ma wagwaegwae 'abehega, "To'aha 'a'ai?" bo "To'aha 'anuma?" bo "To'aha 'a'ote?" <sup>32</sup> Gwae bewa gide tomiya ganamuli 'idi gwae. Ma to'aha 'imi nuwatuwuhu Tamamiu galewa 'isanapu pwaidiya, gide 'ami 'e'ahai ta 'ami we'aha ta wete 'ami 'ale'o 'i'ebwaegomi tuwa.

<sup>33</sup> Cilobwainegomiya ma nugeta Yehoba 'ina lolina ta 'ina 'eda dumwaluna wa'ebese ma wamuliye, eeta 'ami 'e'ahai ma 'ami 'ale'o 'i'ebwaegomi wete.

<sup>34</sup> Geya'abwa wanuwatuwuhu gona weyahina. Beno namo nata tuwa weyahina wanuwatuwuhu. Ma sabwelo sinaonaoma 'adi mwau sahena sabwelo nata 'ana mwau ba'idana talagulagu hegogone, ma hesi sabwelo 'aigeda 'aigeda taudi 'adi mwau weyahidi tanuwatuwuhu 'adi sabwelowedi 'oidiya.

7

*Cahwa galagala*  
(Luke 6:37-38, 41-42)

<sup>1</sup> Sahena tomota wa'ahwa'ahwa galagaladi 'amuge wete Yehoba 'i'ahwa galagalae-gomi. <sup>2</sup> Weyahina to ginaula 'oidiyega tomota wa'ahwa galagalaedi nata 'oidiyega Yehoba 'i'ahwa galagalae-gomi, ma wete togidega wamumuga 'esa tomota 'oidiya Yehoba gide wete 'imumuga 'oimiyaya.

<sup>3</sup> Ma geya sawasawahina ma tasiu weyahina 'ugwae 'abehega matana 'aiwe tupwatupwana 'imiyamiya, weyahina 'owa wete matauwa 'etupwa 'imiyamiya, ma geya 'u'ita.

<sup>4</sup> Geya'abwa tasiu 'ugwaegwaene 'abehega 'aiwe tupwatupwana 'u'ewayahule matanega, weyahina 'owa wete matauwa 'etupwa 'imiyamiya. <sup>5</sup> Cowa hede 'aigeda to'abo, 'awa? Ma hesi 'etupwa matauwega 'u'ewayahule nugete, ma 'oinega 'u'ebubuna bwaibwaina ma muliyetega tasiu matanega 'aiwe tupwatupwana 'u'ewayahule.

<sup>6</sup> Sahena Yehoba 'ina ginaulao 'u'e'eheloye 'edewa 'oidiya, tabu ta silogwahatedi ma sinaligo. Geya sawasawahina ma wete 'imi bagi bawe wa'ebwa'ebwaedi, tabu ma wete si'ahuhe bi'ibi'idi.

*Cahwanoi weyahina*  
(Luke 11:9-13)

<sup>7</sup> Wa'ahwanoi, ma Yehoba 'i'ebwaegomi. Wete wa'ebesa ma 'oinega waloba. Ma waula'e'e ma 'ahwa'eda 'iso'e. <sup>8</sup> Ceguma ta'ahwanoi, Yehoba 'i'ebwaya 'oida, ma 'eguma ta'ebe'ebesa 'abwa taloba, ma wete 'eguma ta'eulaula'e'e beno 'ahwa'eda 'ihuwe 'oida.

<sup>9</sup> Ma togidega 'omi gwagwama tamadiyao, 'eguma natumiyao 'e'ahai weyahina si'ahwanoi, beno da'ule wa'ebwaedi? <sup>10</sup> Bo 'eguma silahana weyahina si'ahwanoi mwata wa'ebwaedi? Geya hene! <sup>11</sup> Moisa 'omi togala, ma 'imi 'eहेle natumiyao 'oidiya wasanapu pwaiya, 'abehega ginaula 'ausaladimo wa'ebwa'ebwaedi. Gide wete Tamamiu galewa, 'eguma wa'ahwanoi 'oina, 'isanapuya to'aha bwebwe'ana 'ilobwainegomiya ma 'i'ebwaegomi.

<sup>12</sup> Ma 'eguma nuwanuwami to'aha ma tomota 'oimiya sipaihowa, beno 'omi wete gide 'oidiya wapaihowa 'ese, weyahina bewa Mosesese ma palopitao 'idi loina 'ana bwagila.

*Cahwa 'i'iuna*  
(Luke 13:24)

<sup>13</sup> Cahwa 'i'iuna 'oinega waluhu ma sahena 'ahwa madouna 'oinega, beno 'ebe hesilae 'ana 'eda. Cedaina madouna ma 'ana tauya meyamayahana ma tomota mabwaiyadi 'oina sitautauya. <sup>14</sup> Ma yawasi bwebwe'ana 'ana 'eda 'ana tauya mwauna, ta 'ana 'ahwa 'i'iuna tuwa, ma tomota hisahisadimo 'oina siluhuluhu.

*Caiwe mahuwaina*  
(Luke 6:43-44)

<sup>15</sup> Tohepwaila 'abo'abodi 'oidiyega wa'itayahigomi, weyahina tupwadi 'abwa sinaoma 'oimiya, 'adi 'ita gide sipi manamanasamidi, ma 'alodiya hesi gide tuwa 'edewa lolosasa. <sup>16</sup> Ma 'idi paihowao 'oidiyega 'abwa wasanapudi, weyahina talitali geya sawasawahina huwaina 'ihepiyoi. Buyubuyuwa wete gide geya sawasawahina ma huwaina 'ihedamaya. <sup>17</sup> Weyahina 'aiwe bwebwe'adi huwaidi bwebwe'adi, ma 'aiwe galadi huwaidi wete galadi. <sup>18</sup> Ma 'iyamo 'aiwe bwebwe'adi geya sawasawahina ma huwaidi galadi sihuwaedi. Ta wete 'aiwe galadi geya sawasawahidi ma huwaidi bwebwe'adi sihuwaedi. <sup>19</sup> Ma hene 'eguma 'aiwe geya sida huwa huwaina bwebwe'ana, nata tagoha yahule ma tagabu. <sup>20</sup> Gide wete tohepwaila 'abo'abodi 'idi paihowega sawasawahina ta'inanadi.

*To'abowao*  
(Luke 13:25-27)

<sup>21</sup> Baibaiwadi 'oiguwa si'ahwa'ahwa bada ma 'abwa sahena siluhuluhu Yehoba 'ina 'ebeloina 'oina, beno namo taudi Tamagu galewa 'ana tohematamatanao. <sup>22</sup> Tuta 'inaonaoma 'oina tomota baibaiwadi 'abwa 'oiguwa sigwae, “Bada, 'apaihowa weyahiu ma saniuwega 'alologuguya ma hi'ahi'a tomota 'oidiyega 'aula latuwediya, ma wete paihowa 'ebe henainaida 'apaihowediya.”

<sup>23</sup> Ma hesi 'oidiya 'abwa yagwae, “Geya yasanapugomi taiyawedi 'omi. Wahila ma geya'abwa waluhuluhuma, weyahina 'omi togala.”

*Hada 'ana wahuwahu*  
(Luke 6:47-49)

<sup>24</sup> Cigu gwae bewa 'eguma taiya 'ihesagohedi ma 'ihematamatanedi, tauna gide 'aigeda tohada'abi sanasanapuna, 'ina wahuwahu dimwa 'oina 'i'abiya, <sup>25</sup> ma muliyetega dohi 'idobima, ma yagewa 'idauma, wete yaumai madouna 'itowa, ma 'ina hadaina geya 'iguli, weyahina 'ina wahuwahu dimwa 'oina 'i'abiya.

<sup>26</sup> Ma 'eguma taiya 'igu gwae bewa 'ihesagohediya ma geya 'imuliyedi, tauna gide toheyauyaule 'ina hada 'i'abiya nenegwala 'oina. <sup>27</sup> Coinega dohi madouna 'idobiya, ma yagewa 'idauwa, ma wete yaumai madouna 'itowa, ma hadaina 'iguliya ma 'ile'wa yahuleya.

<sup>28</sup> Tutaina he'ita bewa Yesu 'ilosalohidiya ma bodaedi nuwadi 'ihenainaida, <sup>29</sup> ma sigwae, “He'ita bewa waiwaina, ma 'ida loina 'ana tohe'itao 'idi he'ita we'ana.”



## 8

*Yesu tolepelu 'aigeda 'i'abihe bwebwe'aneyu*  
(Maki 1:43-45; Luke 5:12-16)

<sup>1</sup> Coinega 'oyega 'idobima ma boda madouna simuliye. <sup>2</sup> Ma 'oidiyega 'aigeda loheya ma 'ana lepelu 'inaoma Yesu 'oina 'i'ahetulasa, ma 'ihewwaeya 'igwae, “Bada, 'eguma 'ino nuwatuhu gide, sawasawahina ma 'u'abihe bwebwe'anegau.” <sup>3</sup> Ta Yesu nimanega loheya 'wapina 'i'abi tohoya, ma 'igwae, “Cehe 'ausala! Cubwebwe'ana.” Ta loheyaina 'ana lepelu 'igumwala mwayamwayauwa, ta 'ibwebwe'ana. <sup>4</sup> Coinega Yesu 'ihewwaeya, “Cutauya ma sahena 'eta taiya 'oina 'uhehepwailegau, ma hesi dumwadumwaluna 'utauya topwaoli 'oina ma 'i'itago, ma 'oinega 'upwaoli Yehoba 'oina to'aha gide 'ada lolina Mosese 'oinega, ma tomota sisanapugo 'abehega 'ubwebwe'ana pwaiya.”

*Tolo'aleha 'ina 'ali'e 'ana 'abihe bwebwe'ana*  
(Luke 7:1-10; Yoni 4:43-54)

<sup>5</sup> Eeta Yesu 'inaoma gogo Kapaneumi 'oina, ma tolo'alehao taudi meLoma 'adi tohanugeta 'aigeda 'inaoma ma 'i'ahwanoyi Yesu 'oina, <sup>6</sup> 'igwae, “Bada, 'igu 'ali'e 'aigeda 'ilohala, ma hadai ma'ana muya madouna 'i'eno'eno, ma geya sawasawahina ma 'inihu.”

<sup>7</sup> Ta Yesu 'igwae, “Nata yanaowa ma ya'abihe yawesai.”

<sup>8</sup> Ma loheyaina Yesu 'ina gwae 'ihemisaeya, 'igwae, “Bada, geya 'ilobwainego ma 'igu hada 'uluwu, ma hesi 'ugwaemo ma 'igu 'ali'e 'iyawesai. <sup>9</sup> Weyahina taugu lolina yasanapanu, ma 'agu tolinao 'idi gwae 'ana tomuliya, ma wete 'igu tolo'alehao yaloinaedi, ma 'eguma 'aigeda 'oina yagwae, 'Cutauya', 'itauya tuwa; ma 'eguma 'aigeda 'oina yagwae, 'Cunaoma', wete 'inaoma; ma 'eguma 'igu topaihowa 'aigeda yahegwae, 'Bewa 'upaihowa', 'ipaihowa tuwa.”

<sup>10</sup> Cina hepwaile bewa 'oinega Yesu 'iyaliyaya madouna, ta 'isakowasiya ma bodaedi simulimuliye 'ihewwaediya, 'igwae, “Moisa, geya 'aigeda taiya yaloba me'isileli 'oimiyega 'ina hemisa loheya bewa gide, <sup>11</sup> ma yahepwaila 'oimiyega 'abehega baibaiwa hedade 'abwa tupwa mabwaiyana 'oidiyega sisawalama ma 'ane Ebalahamo ma Aisake ma Yakobo ma'iyadiyao si'ai hegogona Yehoba 'ina 'ebeloina 'alona, <sup>12</sup> ma hesiyage 'omi 'abehega Yehoba natunao 'iula latuwegomi guguyou 'alona, ma nobwa wadou ma wahesala 'i'ita, muyamuya 'oinega.”

<sup>13</sup> Eeta Yesu tolo'aleha 'adi tohanugetaina 'ihewwaeya, “Causala, 'uhila. Cino 'ali'e nata 'iyawesai, gide 'ino hemisa.” Tuta nage 'oina 'ina 'ali'eina waiwai 'ilobeya.

*Tomota baibaiwadi Yesu 'i'abihe bwebwe'enediya*  
(Maki 1:29-34; Luke 4:38-41)

<sup>14</sup> Coinega Yesu Pita 'ina hada 'iluhuwa, ma Pita lawana 'i'iteya 'ilohala, wahina 'iloyahiyahiya. <sup>15</sup> Eeta 'inaowa ma nimana 'i'abiya, ma 'ina lohala 'isawala, ma 'itoholowa ma 'e'ahai 'i'atububuya Yesu weyahina.

<sup>16</sup> Coinega boi hohauwa tomiya 'asao tupwadi tomota si'ewedima, taudi hi'ahi'a\* 'oidiya simiyamiya, 'oinega Yesu hi'ahi'aedi 'ina gwaeyega 'iula latuwediya, ma wete tolohala mabwaiyadi 'i'abihe bwebwe'enediya.

<sup>17</sup> Ginaledi bewa silatu pwaiya ma 'oinega palopita Aiseya 'ina hepwaile nugeta 'ilatuwa, gide Buki He'asisi 'oina 'ihewwaile 'igwae, “Tauna 'ida muyamuya ma 'ada lohala 'ana to'ewayahula.”

*Tomota 'abehega Yesu simuliye ma geya*  
(Luke 9:57-62)

<sup>18</sup> Tuta nage 'oina Yesu boda madouna 'i'itediya sitoholo sakowasiyeya, 'oinega 'ana tomuliyao 'ihewwaediya ma 'abehega wagega sihabala hali tupwa. <sup>19</sup> Coinega 'aigeda lolina 'ana tohe'ita 'inaoma ma Yesu 'ihewwaeya 'igwae, “Tohe'ita, nuwanuwagu ma yamuliyego. To tupwa 'oina 'utautau taugu yamuliyego.” <sup>20</sup> Ma Yesu loheyaina 'ihewwaeya, 'igwae, “Cedewa totopwatula ma'idi gaula, ma wete kwasumo ma'idi nehwa, ma taugu Loheyaiguina geya 'igu 'ebe 'enomo.”

<sup>21</sup> Ta 'aigeda wete tomuliya 'inaoma ma Yesu 'ihegwaeya, 'igwae, “Bada, 'utagwalegau ma yahila nugeta ma tamagu yayamwa 'ina 'amasa weyahina, ma yalagu, ma muliyetega yamuliyego.” <sup>22</sup> Ta Yesu 'ihegwaeya, “Tuwa! Nobwa tamau, ma hesi 'umuliyegau, ma taudi to'amasa 'idi to'amasa silagu galiha.”

*Yesu wediliya 'i'abi hedaumwaliya*  
(Maki 4:35-41; Luke 8:22-25)

<sup>23</sup> Coinega Yesu ma 'ana tomuliyao sigeluwa wagai, <sup>24</sup> ma sihabahabala hali tupwa, ma Yesu waga 'alona 'i'eno sineya. Ma muliyetega wediliya madouna 'itowa, ma bagodu 'isiwasiwa di'wa wagai, ma 'i'iunamo ma sidamana. <sup>25</sup> Ta Yesu sihanoya ma sigwae, “Bada, 'ulememai 'amuge tadamana.”

<sup>26</sup> Ma 'ihegwaediya, “To'aha weyahina wamatauta? Togidega geya 'imi hemisamo, 'awa?” Coinega 'itoholowa ma yaumai ma bagodu 'iheliyediya, 'igwae, “Walolagu!” Ma ni'u mabwaiyana 'idaumwala.

<sup>27</sup> Coinega tomotaiyedi si'iteya nuwadi 'ihenainaida ma sigwae, “To loheya bewa, ta yaumai ma bagodu 'enana simuliyeya?”

*Yesu hi'ahi'a 'i'ula latuhediya*  
(Maki 5:1-20; Luke 8:26-39)

<sup>28</sup> Sihabala pwaiya ma siluhuwa meGadala 'idi tupwa, ma loheya siteluwa hi'ahi'a 'i'abihebuwediya ma galiha duluhina 'oinega silatuma. Ma mumugadi gala hedade, 'oinega geya sawasawahina ma 'aigeda taiya 'idi tupwaina 'oinega 'itauya. <sup>29</sup> Siteluwaedi Yesu si'iteya ma sitala'asona, sigwae, “Ce! Cowa Yehoba Natuna, to'aha 'utohotoho ma 'abehega 'upaihowa 'oima? Cabehega tuta bewa 'unaoma sabi 'abihe muyemuyemai ma muliyetega heyatala?”

<sup>30</sup> Ma deidiya bawe baibaiwadi siduladula, ma 'adi to'itayahinao si'ita'itayahidi. <sup>31</sup> Coinega hi'ahi'aedi Yesu 'oina si'ahwanoiya, sigwae, “Ceguma 'uula latuhemai, sawasawahina ma baweyedi nage 'oidiya 'uhetunemai?”

<sup>32</sup> Ma 'ihegwaediya, “Walatuma.” Ta loheloheya siteluwaedi 'oidiyega hi'ahi'aedi siu-lalatuwa ta silomwaya mwayauwa, bawe 'oidiya siluhuwa, 'oinega baweyedi mabwaiyadi sipili butubutu ta 'ade'adewalega sibe'uwa ma holai sidamana.

<sup>33</sup> Coinega baweyao 'adi to'itayahinaowedi simatauta ma siden sitauya 'idi 'asa, ma ginaledi si'itediya mabwaiyana sihepwaileidiya tomiya 'asaedi 'oidiya, to'aha gide yauyauledi 'oidiya 'ilatua. <sup>34</sup> Ta tomiya 'asaedi mabwaiyadi silatuma Yesu sabi 'itaina, ma tutaina silobeya silohesohesoiyeya ma 'abehega 'idi tupwa 'i'ebesine.

## 9

*Yesu topeu 'aigeda 'i'abihe bwebwe'aneya*  
(Maki 2:1-12; Luke 5:17-26)

<sup>1</sup> Coinega Yesu wagai 'igeluwa ma 'ihabala hila 'ina gogowa. <sup>2</sup> Ma 'aigeda topeu boda si'ahaliya 'ina 'ebe'eno 'oina ma sinaoleyama Yesu 'oina. Bodaedi 'idi hemisa Yesu 'isanapuya ma topeu 'ihegwaeya 'igwae, “Natugu, 'uyaliyaya, 'ino mumuga galadi 'adi nuwasam 'uloba pwaiya.”

<sup>3</sup> Ma tupwadi loina 'ana tohe'itao Yesu 'ina gwae sihesagoheya ma taudimo sihehegwae sigwae, “Yesuina 'igwaegwae hopa'ala Yehoba 'oina.”

<sup>4</sup> Cidi nuwatuhuina Yesu 'isanapu pwaiya ma 'ihegwaediya, 'igwae, “To'aha weyahina 'atemiyega wanuwatuhu galana? <sup>5</sup> Ma to'aha wanuwatuhuya yada gwae loheya bewa 'oina ma 'abehega yagwae, ‘Cino mumuga galana yanuwam pwaiya’, nuwana yada gwae, ‘Cutoholo ma 'utauya?’ <sup>6</sup> Ma wasanapu 'abehega taugu Loheyaiguina bale'uwa ma sawesawehigu tomota 'idi mumuga galana yanuwamudi.” Coinega topeuina 'ihegwaeya, 'igwae, “Cutoholo ma 'ino 'ebe'eno 'u'ahali ma 'utauya 'ino gogowa.”

<sup>7</sup> Coinega topeuina 'itoholowa ma 'itauya 'ina gogowa.’



<sup>8</sup> Ma bodaedi paihowa bewa si'iteya ma ma'idi he'asisi Yehoba sihehepwatuwe, weyahina tauna Yesu 'ana to'abihewaiwai.

*Yesu Madiu 'ibwauweya  
(Maki 2:13-17; Luke 5:27-32)*

<sup>9</sup> Coinega Yesu tupwa bewa 'i'ebesineya ma 'itauya, ma loheya 'aigeda 'i'iteya, sanina Madiu, takesi 'ana hada 'ebe paihowa 'alona 'imiyamiya, 'oinega 'ihewgaeya, 'igwae, "Madiu, 'umuliyegau." Ta Madiu 'itoholowa ma Yesu 'imuliyeya.

<sup>10</sup> Muliyetega hada 'aigeda 'oina Yesu 'iluhuwa sabi 'ai ma tolopui gide takesi 'ana to'ewao ma tolopui tupwadi wete sinaoma, ma Yesu ma'ana tomuliyao ma'iyadiyao simiyatoiya.

<sup>11</sup> Coinega tupwadi Palisiyao si'iteya ma Yesu 'ana tomuliyao 'oidiya sihesilala, sigwae, "To'aha weyahina 'imi tohe'ita takesi 'ana to'ewao ma wete togala tupwadi ba'idanao si'ai'ai hegogona?"

<sup>12</sup> Ma Yesu gwae bewa 'ihesagoheya ma 'ihewgaediya, "Taudi wahidi waiwai geya nuwadi to'abihebwebwe'ana, ma tolohalao hesi. <sup>13</sup> Coinega 'ilobwainegomiya ma Yehoba 'ina gwae wanuwa sabwalena Buki He'asisi 'oina, 'igwae, 'Nuwanuwagu 'atemuyamuya, ma geya nuwagu pwaoli.' Bewa yanaoma geya tobwebwe'ana weyahidi, ma hesi topui sabi 'abihetedi."

*Yesu 'ina gwae hudi weyahina  
(Maki 2:18-22; Luke 5:17-26)*

<sup>14</sup> Ta Yoni 'ana tomuliyao sinaoma ma Yesu sihegwae, sigwae, "Tauma ma Palisiyao 'ima tapwalolo weyahina 'ai 'oinega 'ahudi, ma togidega ma 'oinega 'owa 'a tomuliyao geya sida hudi?"

<sup>15</sup> Coinega Yesu gwae hegehegedi 'i'ebwae, 'igwae, "Togidega, sawasawahina hai 'ana toyo'owao sinuwagala 'eguma tohai meloheyana ma'iyadiu siyalialiyaya? Nuwana geya, 'awa? Ma wanuwatuhuyahi 'abehega tuta 'inaonaoma ma tohaiina 'i'ebesinedi, ma hesi sinuwagala ma 'e'ahai 'oinega si'etala he'asisi."

<sup>16</sup> Ma 'aigeda wete gwae hegehegedi 'ihewgaediya, 'igwae, "Geya sawasawahina ma 'ale'o 'ehauna tupwatupwana 'ale'o miyamiyana tabwabwada, 'amuge gide taigalaina 'ilotaigalasehe. <sup>17</sup> Ma geya wete sawasawahina ma we'aha 'ehauna ma waiwaina tasiwa 'wapi 'ebesiwa miyamiyana 'oina. Ceguma bewa gide tapaipaihowa 'ese, we'aha 'ina seseha 'oinega 'wapiina 'ilotaigala, ma we'ahaina 'ilotasiwa, ma 'oinega 'ebesiwaina 'igala. Ma 'ilobwaineya ma we'aha 'ehauna ma waiwaina tasiwa 'ebesiwa 'ehauna 'alona, ma 'oinega mabwaiyana bwebwe'ana."

*Yesu wahiwahine 'eluwa 'i'abihe bwebwe'enediya  
(Maki 5:21-43; Luke 8:40-56)*

<sup>18</sup> Cabwa Yesu 'ihegwae gwae ma 'aigeda toloina 'inaoma ma Yesu matana 'i'ahetulasi, ma 'igwae, "Bada, natugu wahinena nige 'i'amasana, ma nuwanuwagu 'unaoma ma wahina 'u'abitoho ma 'itoholo hila."

<sup>19</sup> Ma Yesu 'itoholowa ta ma'ana tomuliyao toloinaina simuliyeya, <sup>20</sup> ma sitautauya, ma wahine 'aigeda bwebwe'ana 'idaudau bolime tuwelo 'oidiya mulidiyega 'inaoma, ma Yesu 'ana 'ale'o papalina 'i'abitohoya. <sup>21</sup> Weyahina 'ina nuwatu 'atena 'igwae, "Ceguma tuwa Yesu 'ana 'ale'omo ya'abitoho, nata yabwebwe'ana."

<sup>22</sup> Ma Yesu 'ilo'itahila ta wahineina 'i'iteya, ma 'igwae, "Yauwedo natugu, 'ino hemisega 'ubwebwe'ana pwaiya." Ma tuta nage 'oina wahineina 'ibwebwe'ana.

<sup>23</sup> Coinega Yesu 'itauya ma toloinaina 'ina hada 'ilatuwa ma 'i'iteya todou sidoudou ma lololi 'ana tomu'ao lololi simu'amu'adi, ta 'enadi madou hedada. <sup>24</sup> Ta Yesu 'ihewgaediya 'igwae, "Walatu. Gwama bewa geya 'i'amasana, ma hesi 'i'eno sineya." Ma simaluweya.

<sup>25</sup> Eeta bodaedi silatuwa ma Yesu 'iluhuwa ma gwamaina nimana 'i'abiya, ta mayawasina 'itoholowa. <sup>26</sup> Muliyetega wasaina bewa 'i'edadana tupwa mabwaiyana 'oidiya.

*Yesu tomata gibugibu 'eluwa 'i'abihe bwebwe'enediya*

<sup>27</sup> Tupwa nage 'oinega Yesu 'itautauyama, tomata gibugibu 'eluwa simuliyeya, ma sibwaubwau 'enadi madouna 'oinega, sigwae, “Debida tubuna ee, 'u'atemuyemuyemai!”

<sup>28</sup> Ta hadai 'iluhuwa ma tomata gibugibuwedi sinaoma 'oina, ma Yesu 'ihewaediya, “Togidega wahemisegauwa 'abehega sawasawahigu matami ya'abi he'asilala?” Ma taudi sigwae, “Bada, sawasawahiu.”

<sup>29</sup> Coinega matadi 'i'abitohodiya ma 'ihewaediya, “Cimi hemisa 'oidiyega matami si'asilala,” <sup>30</sup> ma matadi si'asilala. Ma Yesu lina pa'alina 'i'ebwaediya, 'igwae, “Sahena taiya 'oina wahehepwailegau.”

<sup>31</sup> Ta hesi sitauya, ma Yesu 'ina lina siligehiya, ma 'ina paihowaina sihepwaila dadaneya tupwa mabwaiyana 'oidiya.

*Yesu buwa 'aigeda 'i'abihe bwebwe'aneya*

<sup>32</sup> Ma Yesu ma'ana tomuliyao sitautauya, ma 'aigeda loheya welabana memenana sibuiya sitoeyama Yesu 'oina. <sup>33</sup> Ma 'oinega Yesu welabana 'ipa'iyaya, ma loheyaina 'ibwebwe'ana ma 'ihewaegwae. Ma boda ma'idi yaliyaya Yesu si'ahwa bwebwe'aneya, ma sigwae, “Geya 'eta taiya 'ina paihowa bewa gide ta'ita Isileli 'alona.”

<sup>34</sup> Ma hesi Palisiyao sigwae, “Welabanao 'idi bada 'ina waiwaiyega Yesu welabanao 'ipa'ipa'idi, ma geya Yehoba 'ina waiwaiyega.”

*Yesu tomota 'i'atemuyemuyediya*

<sup>35</sup> Ta Yesu 'asa madoudi ma 'i'iudi 'oidiya 'isakowasiya ma 'idi hada tapwalolowao 'oidiya 'ihe'ita ma 'iloguguya Yehoba 'ina lina tetelina weyahina, ma wete lohala baibaiwana 'oidiyega tomota 'i'abihe bwebwe'enediya.

<sup>36</sup> Ma boda 'i'itediya ma 'i'atemuyemuyediya, weyahina 'adi mwauwao 'oidiyega geya 'adi to'abihetenamo, gide sipi 'wani'wanidi, geya 'adi to'itayahinamo. <sup>37</sup> Ma 'ana tomuliyao 'ihewaediya, “Mamasalai bwebwe'ana, ma to'eli'eli 'omi hisahisamimo. <sup>38</sup> Coinega tanoha taniwagana 'oina wa'ahwanoi ma topaihowao wete 'ihesumanedi, 'ina tanoha si'eli.”

## 10

*Yesu 'ana tomuliyao sanidi  
(Maki 3:13-19; Luke 6:12-16)*

<sup>1</sup> Yesu 'ana tomuliyao site tuwelo 'ibwauwediya ma lina ma waiwai 'i'ebwaediya ma 'oinega sawasawahidi hi'ahi'a tomota 'oidiyega siulalatuheidi ma lohala ma we'a 'oidiyega tomota si'abihe bwebwe'enedi. <sup>2</sup> Cana tomuliyawedi sanidiyao bewa: Nugeta Saimoni, tauna sihesaniyeya Pita, ma tasina Andulu, wete Yemesa ma tasina Yoni, taudi tamadiu Sebedi, <sup>3</sup> wete Pilipi ma Batolomiu ma Tomasi ma Madiu, tauna takesi 'ana to'ewa, ma wete hali Yemesa tauna Alipiyo natuna, ma Tadiyasi, <sup>4</sup> ma wete hali Saimoni, tauna to'ala'ohe'ohe Isileli 'ina miyawasi Loma weyahina, ma Yudasa Isakaliyota, tauna 'abwa Yesu 'itebae.

*Yesu 'ana tomuliyao 'idi paihowao  
(Maki 6:7-13; Luke 9:1-6)*

<sup>5</sup> Yesu site tuwelowedi 'iloinediya ma 'ihesumanediya, 'igwae, “Sahena taudi ganamuli 'oidiya watautauya, ma wete sahena Sameliya 'asanao 'oidiya waluhululu, <sup>6</sup> ma hesi sipi 'wani'wanidi 'oidiya watautauya, taudi beno 'ida bodao me'isileli, <sup>7</sup> ma 'oidiya wahepwaila 'abehega Yehoba 'ina lina 'ilatu pwaima. <sup>8</sup> Tolohalao wa'abihe yawesaidi ma to'amasa wa'abihe toholodi ma tolepelowao wa'abihe bwebwe'enedi, ma wete hi'ahi'a tomota 'oidiyega waulalatuheidi. Yehoba 'ina helau 'i'ebwae daisigomi pwaiya, 'oinega 'omi wete sawasawahimi ma wa'ebwaya 'awawa tomota 'oidiya.

<sup>9</sup> “Ma 'imi sakowasi 'oina sahena mane 'imi peha 'oidiya wado'odo'o, haite weyahina. <sup>10</sup> Sahena wete peha wa'ewa'ewa, sahena wete 'ami 'ale'o 'eluwa, sahena 'ami butu

'eluwa, sahena 'imi digona 'eluwa wa'ewa'ewadi, ma hesi 'abwa 'ami 'iluwana waloba, 'abwa wa'ai.

<sup>11</sup> “Ma 'eguma 'asa madouna bo 'i'iuna 'oina waluhu wa'ebesa nugeta taiya 'ina mumuga 'ausalana, ma 'oina wahetaumana ee 'ana siga tupwaina wa'ebesine. <sup>12</sup> Ma 'eguma 'aigeda hada 'oina waluhu, nugeta waloyauwedo 'oidiya. <sup>13</sup> Ceguma susuwedi 'idi mumuga 'ausalana, wahelauwedi ma wagwae helauwedi, ma 'eguma 'idi mumuga galana sahena 'imi helau ma 'imi gwae helau 'oidiya wamudamudali.

<sup>14</sup> “Ma 'eguma geya 'aigeda taiya 'itoegomi 'ina hada, nuwana 'imi gwae geya 'ihesagohedi, 'asaina 'oinega walatu ma 'ahemiyega gawalina walohutuhutui yahuledi 'idi tupwa, beno 'ebe'ita 'asa taniwagadiyao 'oidiya, ma muliyetega 'asaina wa'ebesine. <sup>15</sup> Moisa, 'abwa yatala 'ana tuta 'oina, taudi 'asaedi silologwahategemiya loina madou hedada siloba, ma geya gide meSodoma ma meGomola 'adi loina.

*Muyamuya matada weyahina*  
(Maki 13:9-13; Luke 21:12-17)

<sup>16</sup> “Wanuwatuhuyahi 'abehega taugu yahesumanegomi gide sipi manamanasamumi watautauya 'edewa lolosasa gamwagamwanidiya, 'oinega sawasawahina ma wanuwasanapu mwata gide, ma hesi wamumuga hohonuha gide gabubu.

<sup>17</sup> “Coinega wa'itayahigomi, weyahina tomota 'abwa sitauyegomi, yatala weyahina, ma hada tapwalolo 'oidiya 'abwa si'etutuwegomi, <sup>18</sup> ma sitoegomi ma sitauyegomi toloinao ma kiniyao matadiya ma sihe'ewegomi, weyahina 'omi 'abehega 'igu bodao, ma wasagu 'oidiya wahepwaile, ma wete tupwa 'atamana tomotaedi 'imi hepwaile sihesagohe.

<sup>19</sup> “Ma 'eguma matadiya sihetohologomi sahena wa'ate'ateyoho togidega wagwae 'esa, weyahina tutaina 'abwa Yehoba 'imi gwae 'ida 'ebwaegomi, <sup>20</sup> ma geya 'abehega 'omi wagwaegwae, ma Yehoba yaluyaluwana 'oimiyega 'igwaegwae.

<sup>21</sup> “Ma wete tuta sinaonaoma 'oidiya tomota 'idi susu 'alona lo'aleha 'ilatu weyahigu, beno loheya tasina 'itebae ma silohe'amasi. Gide wete tamana natuna 'itebae ma silohe'amasi. Wete gwagwama sinadiyao ma tamadiyao 'oidiya silo'aleha ma silohe'amasi. <sup>22</sup> Ma tomota mabwaiyadi silo'alehegomi weyahina 'omi 'abehega 'agu tohemisao. Ma 'eguma taiyawedi si'alama'i'ita ma sitoholo pa'ala ma 'ana siga tuta 'ana 'ebelosaloha 'oina, 'abwa yaliyaya hataya siloba.

<sup>23</sup> “Ma 'eguma 'aigeda tupwa 'oina sihunuhunugomi, wadena hali 'asa 'oina. Moisa 'abwa, sahena 'asa mabwaiyana Isileli 'alona wapaipaihowa salohi, ma taugu loheyaiguna yahilama.

<sup>24</sup> “Tomuliya geya sawasawahina ma 'ina tohe'ita 'imadousine. Gide wete topaihowa geya sawasawahina ma 'ina bada 'iloine. <sup>25</sup> Ma hesi 'ausala 'eguma 'abehega 'omi 'agu tomuliyao, ma 'omi ma taugu tahemahemahetena. Weyahina taugu hada toniwagagu, ma 'eguma sihesaniyegau Tomudulele, 'omi 'igu bodao 'abwa si'ahwa galagalaegomi madouna.

*Matauta weyahina*  
(Luke 12:2-9)

<sup>26</sup> “Coinega sahena tomotaedi wamatamatautedi, weyahina ginauledi 'wai'waihidi 'abwa Yehoba 'i'abi latuwedi, ma si'asilala. <sup>27</sup> Eeta to'aha guguyou 'oina yahepwailediya 'oimiya, sabwelowa wahepwailedi tomota baibaiwadi 'oidiya, ma to'aha yahe'ahwa henahenaeya 'oimiya wahepwaile latuwedi 'imi talube'uwega.

<sup>28</sup> “Ma taudi wahimi silolohe'amasi sahena wamatamatautedi, weyahina taudi wahimimo sawasawahina ma silohe'amasi, ma yaluyaluwami geya'abwa. Ma hesi Yehoba wamataute, weyahina tauna sawasawahina ma 'asa 'ala'alatana\* 'oina wahimi ma yaluyaluwami 'ilohe'amasi luwedi.

<sup>29</sup> “Cebe'ita bewa, 'eguma dinegwa 'eluwa tagimwanedi, 'adi maisa toea 'aigeda tuwa, ma hesi Yehoba 'i'ita'itayahidi, ma 'eguma 'aigeda 'i'amasa, beno Tamamiuina

'ina nuwatuhu 'oinega. <sup>30</sup> Ma bwagana geya sawasawahina ma hunuhunuwa wahasili deba 'aigeda 'oina, ma hesi Yehoba 'adi baibaiwa 'isanasanapu. <sup>31</sup> Coinega sahena wa'ate'ateyoho, weyahina 'omi Yehoba 'ina ginaula madouna, ma dinegwa geya ginaula madouna.

<sup>32</sup> “Ceguma taiyawedi weyahigu sihehepwaila tomota matadiya, 'abwa galewa taugu wete weyahidi yahepwaila Tamagu matana. <sup>33</sup> Ma 'eguma taiyawedi siuhalegau tomota matadiya, taugu wete 'abwa galewa Tamagu matana yauhaleli.

*Geya he'iya'iyagu yatauyeyama ma hesi 'aleha*  
(Luke 12:51-53; 14:26-27)

<sup>34</sup> “Sahena wanuwawuwatuhu 'abehega 'igu dobima bale'uwa 'oinega nuwadaumwala waloba. Geya hene, ma 'aleha hesi. <sup>35</sup> Cigu dobima weyahina loheya tamana 'ilo'alehe, ma wete wahine sinana 'ilo'alehe, ma wahine lawana 'ilo'alehe, <sup>36</sup> ma loheya 'ina susu silo'alehe.

<sup>37</sup> “Ma 'eguma taiya tamana ma sinana 'ihelauwedi madouna, ma taugu 'i'iuna, tauna geya sawasawahina ma 'imuliyegau. Ma 'eguma taiya wete natuna meloheyana bo mewahinena, 'ihelauwe madouna, ma taugu 'i'iuna, tauna geya sawasawahina ma 'imuliyegau. <sup>38</sup> Ma 'eguma taiya yawasina geya 'itagwale ma 'i'amasana kelose 'oina, gide taugu, tauna geya sawasawahina ma 'imuliyegau. <sup>39</sup> Ma 'eguma taiya tauna yawasina weyahina 'ipaipaihowa, 'abwa 'i'wadalele; ma 'eguma taiya yawasina 'i'wadalele weyahigu, 'abwa yawasi 'ausalana 'iloba hila.

*Maisa weyahina*  
(Maki 9:41)

<sup>40</sup> “Ma 'eguma taiya 'itoegomi, taugu ma 'agu Tohesumanaina wete 'itoemai. <sup>41</sup> Ma 'eguma 'owa palopita 'utoe 'ina hepalopita weyahina, 'abwa palopita 'ana maisa 'uloba. Ma 'eguma 'owa loheya 'ausalana 'utoe 'ina mumuga bwebwe'ana weyahina, 'abwa loheya bwebwe'ana 'ana maisa 'uloba. <sup>42</sup> Ma 'eguma 'owa we'aha gogai 'agu tohemisa 'ehauna 'aigeda 'oina 'u'ehele, yahegwaego 'abwa 'a maisa 'ausalana 'uloba.”

## 11

<sup>1</sup> Yesu 'ina lohatoto 'ana tomuliyao site tuwelo 'oidiya 'ilosalohiya, ma 'oinega tupwaina 'i'ebesineya ma 'isakowasiya 'asaedi 'aigeda 'aigeda 'oidiya, 'ihe'ita ma 'ilolohatoto.

*Yoni to'abihebabitaiso Yesu tetelina 'ihesagoheya*  
(Luke 7:18-35)

<sup>2</sup> Tuta nage 'oina Yoni to'abihebabitaiso deliya silagu pwaiya, ma To'abihetenaina 'ina paihowa tetelina 'ihesagoheya, ma 'oinega 'ana tomuliyao 'ihesumanediya ta sitauya Yesu 'oina, <sup>3</sup> ma sihesilaleya, sigwae, “Togidega 'owa To'abihetenaina weyahiu 'ayamwayamwa, bo hali loheya 'ayamwayamwa?”

<sup>4</sup> Ta 'idi gwae Yesu 'ihemaiseya, 'igwae, “Wahila ma Yoni 'oina wahe'ote'otetela ginauledi 'oiguwega wahesagoheya, ma wete wa'itediya, <sup>5</sup> tomata gibugibu matadi 'itayahala pwaiya, tohe'au'au sibwebwe'ana pwaiya ta sitautauya, tolepelohi hahidi sibwebwe'ana hila, totenatuitui gwae sihehesagohe, to'amasana sitoholo hila, ma wete tohewewelohe tetela bwebwe'ana sihesagohe pwaiya. <sup>6</sup> Coinega watauya ma Yoni wahewewelohe ma sahena weyahigu 'ihenuwanaluwa, weyahina 'eguma taiya 'ina hemisa weyahigu geya 'iwe'a, tauna 'iyaliyaya.”

<sup>7</sup> Eeta Yoni 'ana tomuliyawedi sihila, ma Yesu 'i'ahwa lalagata ma boda 'oidiya Yoni weyahina 'ihewewelohe 'igwae, “Mwalo mabwaiyami tupwa balabala 'awawa watauya Yoni sabi hesagohaina, ma to'aha nuwanuwami ma 'abehega wa'ita? Cemi nuwanuwami 'abehega 'aigeda pwtatula sinabwana yaumai 'inihunihuwe wa'ita?

<sup>8</sup> “Bo nuwana 'aigeda loheya ma 'ana 'ale'o wasawasa sabi 'itaina? Bo geya, weyahina taudi ma 'adi 'ale'o wasawasa toloina madoudi 'idi tupwa simiyamiya.

<sup>9</sup> “Ma to'aha hede weyahina ta watauya balabala 'awawa? Nuwana 'abehega wanuwatuhuya nata palopita 'aigeda wa'ita 'awa? Moisa, loheyaina wa'iteya palopitao 'imadou sinediya. <sup>10</sup> Yoniina weyahina mwalo Yehoba 'ina gwae Buki He'asisi 'oina bewa gide 'ihewaila nugeteya, 'igwae, 'Bewa 'igu tohalewasa yahesumane matauwa 'itautauya, ma 'ino 'eda 'ihuna.’”

<sup>11</sup> Ta Yesu wete 'igwae, “Moisa, Yoni to'abihehabitaiso tauna mebale'u mabwaiyadi 'imadou sinediya, ma hesi mabwaiyadi taudi Yehoba 'ina 'ebeloina 'alona Yoni simadou sineya.

<sup>12</sup> “Tuta Yoni 'ina 'abihehabitaiso 'oinega ma nige, tomota sitohotoho waiwai ma 'abehega Yehoba 'ina 'ebeloina 'oina siluhu, ma tohewaiwaiyadi taudi 'idi waiwaiyega siluhu. <sup>13</sup> Mwalo palopitao mabwaiyadi 'idi gwaeyao ma Mosese 'ina loina 'oidiyega gwae hemisa sigwae nugeta eeta 'ana laba Yoni 'itauyama. <sup>14</sup> Ma 'eguma nuwanuwami ma wanuwabwalena Yoni weyahina, wada sanapu 'abehega tauna tuwa Ilaitiyaina weyahina wayamwayamwa.

<sup>15</sup> “Coinega 'eguma taiya matenana gwae bewa 'ihesagohedi.

<sup>16</sup> “Comi boda 'ehaumi togidega yagwae hegehegedi 'esa weyahimi? Nuwana yagwae 'omi gide tuwa gwagwama 'ebe maketi 'alona si'e'ehayaheyale, ma 'iyadiyao 'oidiya sibwaubwau sigwae,

<sup>17</sup> ‘Ciyamayao, togidega 'iya ta 'alahulahusa ma geya wada sobuwa! Ma wete 'adou gwaegwae ma geya wada douwa!’

<sup>18</sup> “Gwae hegehegediyedi 'ana nuwasabwalena 'abehega Yoni 'inaoma ma geya 'i'ai ma geya 'inuma, ma 'oinega wagwae 'abehega hi'ahi'a Yoni 'i'abi hebuweya! <sup>19</sup> Ma taugu Loheyaiguina yanaoma ma ya'ai'ai ma yanumanuma, ma wete weyahigu walolomugi, wagwaegwae, 'Loheyaina to'ai ma tonuma hedahedade, ma topui takesi 'ana to'ewao ma topui baibaiwadi 'ihe'iyaiyaguwedi.’

“Ma taudi tosanapu moisa 'abwa 'idi paihowa bwebwe'adi 'oidiyega sanapu moisa 'ilatulatu.”

*Tupwadi 'asa galadi 'abwa yatala siloba.*

*(Luke 10:13-15)*

<sup>20</sup> Coinega Yesu 'asaedi 'ina paihowa waiwaiidi si'iteya, ma geya sinuwabui 'idi puiyao 'oidiyega, taudi 'iheliheliyediya, 'igwaeya, <sup>21</sup> “Comi meKolasini ma meBedeseida 'atemuyamuyaimi hesi. Weyahina 'ebe henainaidaedi yapaihowa pwaidiya 'oimiya, ma hesi geya wanuwabui. Ma hesi 'eguma meTaiya ma meSaidoni 'oidiya yada paihowediya, beno mwalo hene sida nuwabuiya, ma sibasibauwa 'adi 'ale'o sida 'otedi ma giba 'oidiyega sida gibadi ma sida he'itaedi 'abehega 'idi mumuga galadi 'oidiyega sinuwabui pwaiya. <sup>22</sup> Ma hesi 'omi geya, 'oinega yatala 'ana sabwelo 'oina nata Yehoba meTaiya ma meSaidoni 'i'atemuyemuyedi, ma 'omi sahena.

<sup>23</sup> “Ma 'omi meKapaneumi togidega? Cabehega taumimo wa'abilagasigomi galewa, 'awa? Geya hene! Ma hesi nata Bwebweso 'alona siula dobihegomi. Weyahina 'ebe henainaidaedi yapaihowa pwaidiya 'oimiya ma hesi geya wanuwabui, ma mwalo 'eguma meSodoma 'oidiya yada paihoweya, mwalo hene sida nuwabuiya, ma 'ane Yehoba sahena 'imutumutudi, ma nige 'idi 'asa 'ida miyamiya. <sup>24</sup> Coinega yatala 'ana sabwelo 'oina Yehoba nata meSodoma 'i'atemuyemuyedi, ma 'omi sahena.”

*Caiyawasi Yesu 'oinega*

*(Luke 10:21-22)*

<sup>25</sup> Tuta nage 'oina Yesu 'igwaeya, “Yauwedo Tamagu, 'owa galewa ma bale'u 'adi toloina, sanapu bewa 'udahweya tosonogao ma tonuwabwalena 'oidiyega, ma hesi gwagwama 'i'iudi 'oidiya 'uhe'itaeya. <sup>26</sup> Moisa Tamagu, 'ino nuwatuwa bewa 'ausala.”

<sup>27</sup> Ma wete 'igwaeya, “Ginaula mabwaiyana Tamagu nimaguwa 'ilagu pwaidiya ma Tamaguina taboinamo 'isanapugauwa, ma taugu wete Tamagu taugumo yasanapuya,



ma wete 'eguma taiyawedi taudi nuwanuwagu ma Tamagu yahe'itae 'oidiya, taudi wete sisanapu.

<sup>28</sup> “Ma 'oinega 'omi 'imi paihowa mwauna, wanaoma 'oiguwa, ma ya'abihe 'aiyawasigomi. <sup>29</sup> Ma 'omi wahe'au'aunawegau ma ma'iyagwao tapaihowa, ma 'oinega yaluyaluwami 'idi 'aiyawasi siloba, weyahina taugu 'igu mumuga nuhana ma tonuwawulu. <sup>30</sup> Coinega paihowaedi ma 'aha'ahalaedi ya'ebwaegomi meyameyahana.”

## 12

*Yesu tauna Sabati 'ana toloina*  
(Maki 2:23-28; Luke 6:1-5)

<sup>1</sup> Sabatiya Yesu ma'ana tomuliyao tanoha 'alonga sitauya, ta tomuliyawedi sigomaleya, 'oinega witi huwaina si'abilolodiya ma si'aiya.

<sup>2</sup> Ma tutaina Palisiyao si'itediya, Yesu sihegwaeya, sigwae, “Bada, togidega ma 'oinega 'a tomuliyao Sabati 'ana loina siligeligehi?”

<sup>3</sup> Coinega Yesu 'idi gwae 'ihemaiseya, 'igwae, “Buki He'asisi 'oina sileleya Debida weyahina, 'eguma wahasili wasanapu 'abehega Debidaina ma'iyanao sigomaleya, <sup>4</sup> ta Yehoba 'ina hada 'iluhuwa ma beledi hehe'asisina 'i'eweya ta si'aiya. Belediina ma'ana loina, 'abehega topwaolimo 'adi tagwala ma si'ai, ma hesi sigomaleya ta 'oinega tuwa si'aiya.

<sup>5</sup> “Buki He'asisi 'alona loina wete 'imiyamiya 'abehega Hada He'asisi 'ana topwaoliyao Sabati 'ana loina siligehi, ma beno geya pui.

<sup>6</sup> “Moisa Hada He'asisi ginaula madouna, ma hesi 'aigeda ginaula madou hedade bewa. <sup>7</sup> Yehoba 'ina gwae 'abehega, 'Pwaoli geya nuwagu, ma 'atemuyamuya hesi.' Ceguma gwae bewa 'ana sanapu wasanapu, sahena 'agu tomuliyao wa'ahwa'ahwa galagalaedi, weyahina geya sipui.

<sup>8</sup> “Weyahina Sabati 'ana toloina loheyaiguina taugu tuwa.”

*Yesu loheya nima meyomeyo 'i'abi hebwebwe'aneya*  
(Maki 3:1-6; Luke 6:6-11)

<sup>9</sup> Nage 'oinega Yesu 'itauya, ma 'idi Hada tapwalolo 'oina 'iluhuwa. <sup>10</sup> Ta nobwa 'aigeda loheya nima meyomeyona, 'oinega Palisiyao Yesu 'oina sihesilala, sigwaeya, “Bada, togidega, sawasawahina ma Sabati 'oina tolohala ta'abihe bwebwe'anidi?” Ma 'idi hesilalaina weyahina beno 'eguma Yesu 'igwae pui, eema sihe'ewa toloina matana. <sup>11</sup> Ma 'idi gwae Yesu 'ihemaiseya, 'igwae, “Togidega 'omi 'eguma 'aigeda ma'ina sipi 'aigeda tuwamo, ma sabwelo Sabati 'oina gaula 'alona 'ibe'u, 'ilobwaineya ma 'ilisi hanehe? <sup>12</sup> Moisa sipi ginaula 'i'iuna, ma tomota hesi ginaula madouna. Coinega sawasawahina ma paihowa bwebwe'adi Sabatiya tapaihowadi.”

<sup>13</sup> Coinega Yesu loheyaina 'ihewae, 'igwae, “Nimau 'uyasi.” Ta loheyaina nimana 'iyasiya ma 'ibwebwe'ana hila, gide wete hali nimana.

<sup>14</sup> Ma hesi Palisiyao ma'adi gamwasowala silatuwa ma taudimo siloina togidega Yesu silohe'amasi 'ese.

*Yehoba 'ina topaihowa*

<sup>15</sup> Taudi 'idi loina 'waihina Yesu 'isanapu pwaiya, 'oinega tupwa nage 'i'ebesineya ma 'itauya hali tupwa, ma tomota mabwaiyadi simuliyeya, ta nage 'oina tolohala mabwaiyadi 'i'abihe bwebwe'aneidiya, <sup>16</sup> ma wete 'ihewae'ediya ma 'abehega sahena sihehpwaila dadane tomota 'oidiya. <sup>17</sup> Cina paihowaina bewa mwalo palopita Aiseya Yehoba 'ina gwae 'ihewaila nugeteya, 'igwae,

<sup>18</sup> “Wa'ita 'igu topaihowa bewa hesihesinuwaina, ma 'ateguwega yahelauweya ma'igu yaliyaya. Yaluyaluwagu yalagu 'oina ma loina dumwaludi 'ihewailedi taudi ganamuli 'oidiya.

<sup>19</sup> Tauna nata geya 'ihehe'ohe'ohe bo 'ihehebwaubwau bo 'asa 'alona 'igwaegwae 'asona.

<sup>20</sup> Digona lasalasana sahena 'ilologwahate. Ma wete wodam butabutana sahena 'iuleule, ta 'ana siga tauna 'oinega lolina dumwaluna 'ihewaiwai,  
<sup>21</sup> ma 'ane tauna saninega tomiya ganamuli sihemise.”

*Yesu ma Tomudulele*  
*(Maki 3:20-30; Luke 11:14-23; 12:10)*

<sup>22</sup> Caigeda loheya, mwalo welabana 'idi paihowega matana sigibuwa, ma wete memenana 'ibuiya, 'oinega si'eweyama Yesu 'oina ta 'i'abihe bwebwe'aniya, ma sawasawahina 'igwae ma 'i'ebubuna. <sup>23</sup> Coinega tomota mabwaiyadi nuwadi 'ihenainaida ma sigwae, “Bewa To'abihetenaina, Debida 'ina susuwega, 'awa?”

<sup>24</sup> Ma hesi Palisiyao paihowa bewa wasana sihesagoheya ma sigwae, “Geya, ma hesi welabanao 'iyadi sanina Tomudulele 'ina waiwaiyega hi'ahi'a 'iula latuhediya.”

<sup>25</sup> Ma Yesu 'idi nuwatuhu 'isanapu pwaiya ta 'ihewaiyadi, 'igwae, “Tomudulele tauna 'iyanao geya sowana 'iulaula latuwedi.” Ma wete 'igwae, “Ceguma 'aigeda 'ebeloina 'oina tomota siwataha ma siboidimo silolo'aleha, 'abwa 'ebeloinaina 'iwe'a ma 'ibe'u. Casa bo susu wete gide 'eguma 'alodiya wataha 'ilatu, 'abwa siwe'a ma sibe'u.

<sup>26</sup> “Seitani wete gide, 'eguma ma'ina bodao siboidimo silo'aleha, nata 'ina 'ebeloinaina 'ibe'u. <sup>27</sup> Wagwae pwaiya 'abehega taugu Tomudulele 'ina waiwaiyega hi'ahi'a yaula latuwediya, ma taiya hede 'ina waiwaiyega 'omi waulaula latuwedi? Tomudulele 'oinega, bo Yehoba 'oinega? Bewa weyahina wanuwatuhu ma wasanapu 'abehega taiya taugu.

<sup>28</sup> “Ma taugu hesi Yehoba Yaluyaluwana 'ina waiwaiyega hi'ahi'a yaula latuwediya, 'oinega wasanapu 'abehega Yehoba 'ina lolina 'ilatu pwaima 'oimiya.

<sup>29</sup> “Cebe'ita bewa loheya waiwaina gide Seitani 'ina hada. Geya sawasawahina 'aigeda taiya 'iluhu ma 'ina tobwatobwa 'ilohetuwe, ma hesi 'eguma 'aigeda loheya balaeyega tohewaiwaiina nimana ma 'ahena 'ipai nugetedi, ma 'oinega muliyetega sawasawahina 'iluhu 'ina hada ma tobwatobwaedi 'ilohetuwe.

<sup>30</sup> “Ceguma taiyawedi taudi geya 'agu to'abihetena, taudi 'agu 'alehao. Ma wete taudi taiyawedi geya ba'idagwao 'ada paihowa hegogona, taudi 'igu paihowa si'abi'abi hegala.

<sup>31</sup> “Coinega bewa yahegwae bwaibwainigomi 'abehega tomota 'idi puiyao ma 'idi gwae galadi mabwaiyana Yehoba 'inuwasamudi. Beno namo 'eguma Yaluyaluwa Tabuna si'ahwa galegale, geya sowana Yehoba 'inuwasamudi.

<sup>32</sup> “Ma 'eguma taiya 'i'ahwa galegalegau taugu Loheyaiguina, Yehoba nata gwaeina 'inuwasam, ma 'eguma taiya Yaluyaluwa Tabuna 'i'ahwa galegale gesowana Yehoba 'inuwasam, tuta bewa 'oina, ma tuta sinaonaoma 'oidiya.”

*Caiwe huwaidi*  
*(Luke 6:43-45)*

<sup>33</sup> Yesu wete 'ihewaiyadi, “Caiwe 'eguma 'ausalana, huwaina wete 'ausalana. Ma 'eguma 'aiwe galana, huwaina wete galana. Weyahina 'aiwe 'aigeda 'aigeda huwaidi 'oidiyega tasanasanapudi 'abehega 'aiwedi 'ausaladi bo galadi.

<sup>34</sup> “Comi tuwa mwata natunao, 'oinega geya sawasawahina ma gwae 'ausaladi wa'innanadi, weyahina mabwaiyami togala, ma wete 'imi nuwatuhuwao to'aha gide 'atemiya simiyamiya, tuta mabwaiyana 'ahwamiyega silatulatuma. <sup>35</sup> Weyahina loheya 'ausalana 'atenega ginaula 'ausaladi 'ipaihowa, ma hesi loheya galana 'atenega ginaula galadi 'ipaipaihowadi.

<sup>36</sup> “Coinega yahegwaeigomi 'abehega sabwelo yatala 'oina 'omi 'imi gwae bwagabwaga mabwaiyadi weyahidi Yehoba 'ihesilalegomi, ma huhuna wahepwaiye latuwedi.

<sup>37</sup> “Ma 'owa 'ino gwaeigomi tuwa 'oidiyega Yehoba 'i'ahwa bwebwe'anego, bo nuwana 'i'ahwa galegalego.”

*Cila'ilala weyahina*  
*(Maki 8:11-12; Luke 11:29-32)*

<sup>38</sup> Eeta lolina 'ana tohe'itao ma tupwadi Palisiyao Yesu sihegwaeya, sigwae, “Tohe'ita, nuwanuwama ma 'ila'ilala 'aigeda 'upaihowa ma 'a'ita.”

<sup>39</sup> Ma Yesu 'ihegwaediya, “Comi tomota 'ehaumi galami ma ganawala huhumi, beno huhuna 'ila'ilala wa'ebe'ebesa ma 'abehega 'oidiyega wasanapu bwaibwainigau 'abehega Yehoba 'oinega yanaoma, ma hesi sahena 'ila'ilalaedi wa'ita'ita. Beno namo palopita Yona weyahina wanuwatuhuyahi, tauna tuwa 'ila'ilala weyahimi. <sup>40</sup> Weyahina tauna Yonaina sabwelo 'etoi ma nihuwana 'etoi 'oidiya silahana madouna gamwana 'imiyamiya, 'abwa taugu Loheyaiguina wete gide sabwelo 'etoi ma nihuwana 'etoi 'oidiya bale'u 'alona yamiyamiya.

<sup>41</sup> “Cabwa sabwelo yatala 'oina nata meNinibe sitoholo ma mehau 'omi sihe'ewegomi, weyahina Yona 'oidiya 'ilohatotowa ma Ninibeyedi 'idi mumuga galana 'oidiyega sinuwabuiya, ma 'omi tuta bewa lohatoto 'ausala hedade wahesagoha pwaiya ma geya wada nuwabuiya. <sup>42</sup> Wete gide kuini mwalo yalasi 'oinega 'inaoma Solomoni 'ina gwae sonosonogadi sabi hesagohedi, ma 'abwa sabwelo yatala 'oina kuiniina 'itoholo ma mehau 'omi 'ihe'ewegomi, weyahina tauna bwagebwagega 'inaoma Solomoni 'ina gwae sonosonogadi sabi hesagohedi, ta sauga bewa gwae sonosonoga hedadedi wahesagohediya ma 'omi geya wada nuwabuiya.

*Hi'ahi'a 'ilohihila loheya 'alona*

*(Luke 11:24-26)*

<sup>43</sup> “Ceguma hi'ahi'a loheya 'aigeda 'oinega 'ilatu, loheya 'ibwebwe'ana, ma hi'ahi'aina nata tuwa 'atamana 'iyawayawala bwagabwaga ma 'ina 'ebe 'aiyawasi 'i'ebe'ebesa ma geya 'iloba. <sup>44</sup> Coinega hi'ahi'aina 'iboinamo 'oina 'igwae, ‘Nuwana yalohihila 'igu 'ebemiya nugenugeta 'oina.’ Eeta 'ihila ta 'ebemiyaina 'ilobeya hadenamo se'ise'ilina ma 'atu'atububuna. <sup>45</sup> Coinega 'itauya ma hi'ahi'a site sebeni wete 'itoedima ta ba'idanao siluhuwa 'ebemiyaina 'oina, ta nobwa ba'idanao simiyamiya. Eeta loheyaina 'ina miya si'abihegala bwaibwainiya, mwalo geya gide. Mehau 'omi wete gide togala ma 'imi 'ebe losaloha gala hedade.”

*Yesu sinana ma tasinao*

*(Maki 3:31-35; Luke 8:19-21)*

<sup>46</sup> Yesu 'abwa boda 'oidiya 'ihehegwaegwae, ma sinana ma tasinao sinaoma, ma 'atamana sitotoholo, ma si'ebe'ebesa togidega ma 'oina sigwae. <sup>47</sup> Coinega 'aigeda loheya wasadi 'i'eweyama Yesu 'oina. <sup>48</sup> Ta Yesu loheyaina 'ina gwae 'ihemaiseya, 'igwae, “Taiya hede sinagu, ma taiyawedi tasigwao?” <sup>49</sup> Coinega 'ana tomuliyao 'oidiya 'ilonimasusuwa ma 'igwae, “Bewa taudi sinagu ma tasigwao.

<sup>50</sup> “Weyahina 'eguma taiyawedi Tamagu galewa 'ina nuwatuhu simulimuliye, taudi tasigwao, nuwana nuhugwao, nuwana sinagwao.”

## 13

*Witi huwaina 'adi tosaweyana*

*(Maki 4:1-9; Luke 8:4-8)*

<sup>1</sup> Nage sabweloina 'oina Yesu hadaina 'oinega 'ilatuwa, ma 'idobi holai 'imiyatoiya.

<sup>2</sup> Ma boda madouna si'autama 'oina, ta 'aigeda waga 'i'aha'ahai 'oina 'igeluwa, 'imiyatoiya, ma boda 'oya'oya sitotoholo. <sup>3</sup> Ma he'ita baibaiwana 'i'ebwaediya gwae hegehegediyega, 'igwaeya, “To'abitanoha 'aigeda 'ina tanoha 'itauya, ma witi patuna 'isaweyaneya, <sup>4</sup> ta tupwana patuwedi sibe'uwa 'edai, ma 'oinega bwasumo si'itediya, sisuluwa ta si'aidiya. <sup>5</sup> Ma tupwana patu bale'u loda'uda'uleina 'oina sibe'uwa, ma muliyetega sibwala mwayamwayauwa, weyahina bale'u 'i'iuna tuwa, <sup>6</sup> 'oinega hala 'ibwahalidiya ta siwelaiya, weyahina lamudi geya bale'u gogaina siloba.

<sup>7</sup> “Ma tupwana patu talitali 'oidiya sibe'uwa ma sibwala mahemahetena, ma tali-taliyaedi 'ihewaiwaiya, ta 'isahila he'amasidiya. <sup>8</sup> Ma tupwana patu bale'u 'ausalana



'oina sibe'uwa, ta sibwalama ta simadouwa ma sihuwa, 'oinega patu huwadi 'adi baibaiwa handeledi, ma tupwana sikisiti, ma wete tupwana teti.

<sup>9</sup> “Ceguma matenami gwae bewa wahesagohe.”

*Gwae hegehegedi 'ina latu huhuna*

*(Maki 4:10-12; Luke 8:9-10)*

<sup>10</sup> Ta 'ana tomuliyao silatuma ta Yesu sihegwaeya, sigwae, “To'aha weyahina gwae hegehegediyedi bodaedi 'oidiya 'uhe'ita?”

<sup>11</sup> Ma Yesu 'igwaeya, “Comi Yehoba 'oimiya 'itagwala pwaiya ma 'ina laina 'alona 'ana tosanapuwa, ma bodaedi geya. <sup>12</sup> Ceguma taiyawedi gide ma'idi sanapu, nata loheposeyana madou hedade siloba, ma hesi 'eguma taiyawedi geya 'idi sanapumo ma to'aha nuwana 'oidiya 'imiyamiya nata mabwaiyana silohe'waihi. <sup>13</sup> Bewa huhuna gwae hegehegediyega yahe'ita 'oidiya, weyahina 'idi 'ebubuna 'oidiyega geya si'ita bwaibwaini, ma wete 'idi hesagoha 'oidiyega geya sisanapu. <sup>14</sup> Tomotaedi weyahidi mwalo Aiseya 'ihewaila nugeta, 'igwae, 'Cabwa wahesagoha ma sahena nuwami 'isabwasabwalena. Ma wete wa'e'ebubuna tuwa ma hesi geya wa'ita.

<sup>15</sup> Weyahina tomotaedi 'idi nuwatuhwao si'elo'waniya, ma tenadi 'ituiya, ta wete matadi 'igibuwa.

Tabu ta matadiyega si'ita, ma tenadiyega sihesagoha ma sinuwasabwalena, ta 'oiguwa si'ita hila, ma ya'abi hebwebwe'enedi.’

<sup>16</sup> “Ma 'omi ma'imi yaliyaya, weyahina matamiyega wa'ita'ita ma tenamiyega wahesagoha. <sup>17</sup> Moisa, ginaula bewa wa'ebubudi ta wahesagohedi mwalo palopitao ma todumwaluwao nuwanuwadi madouna ma si'itadi bo sihesagohedi, ta geya silobadi.

*Patu 'ana gwae hegehegedi 'ana lihasa*

*(Maki 4:13-20; Luke 8:11-15)*

<sup>18</sup> “Coinega patu 'ana saweyana 'ana sanapu wahesagohe. <sup>19</sup> Ceguma taiya Yehoba 'ina laina tetelina 'ihesagoheyamo, ma geya 'inuwasabwalena, 'abwa togalaina 'inaoma ma gwaeyedi loheya 'atenega 'i'ewayahuledi. Beno patuwedi sibe'uwa 'edai 'adi sanapu.

<sup>20</sup> “Ma wete patuwedi bale'u loda'uda'uleina 'oina sibe'uwa, taudi tetela bwebwe'ana sihesagoheya, ma ma'idi yaliyaya sitagwala, <sup>21</sup> ma geya lamudi 'ipa'ala, 'oinega tuta 'i'iuna tuwa 'oina simiyamiya, ma 'eguma to tuta 'oina tetela bwebwe'ana 'ana hemisa weyahina mwau nuwana hegawagawagu siloba sibe'u mwayamwayau.

<sup>22</sup> “Ma patuwedi talitali 'oidiya sibe'uwa, taudi tetela bwebwe'ana sihesagoheya, ma hesi 'idi nuwatuha bale'u weyahina ma wete wasawasa 'ana nuwatuhwao, ma nuwatuhwedi tetela bwebwe'ana silohe'amasiya, ta geya sawasawahina ma sihuwa.

<sup>23</sup> “Ma patuwedi bale'u 'ausalana 'oina sibe'uwa, taudi tetela bwebwe'ana sihesagoheya, ma 'ana nuwasabwalena 'oidiya 'imiyamiya, ta huwaidi 'ausala silagudiya. Tupwadi huwaidiyao handeledi, ma tupwadi sikisiti, ma tupwana teti.”

*Gwae hegehegedi witi ma 'awata weyahidi*

<sup>24</sup> Gwae hegehegedi 'aigeda wete Yesu 'i'ebwaediya, 'igwae, “Yehoba 'ina laina gide tuwa 'aigeda loheya witi patuna bwebwe'adi 'ina tanoha 'isaweyanediya. <sup>25</sup> Ma nihuwana si'eno sinediya, ma 'ana 'aleha 'aigeda 'inaoma tanoha, ta 'awata 'ana 'ita gide witi wete 'isaweyaneya witi moisa 'alona, ma muliyetega 'itauya. <sup>26</sup> Coinega mabwaiyadi sibwala ta sihuwa, ma badaina 'ina topaihowao 'awataedi si'ita lobediya. <sup>27</sup> Ma topaihowaedi sinaoma ta sihegwaeya, 'Bada, patu 'ausalana 'ino tanoha mwalo 'usaweyaneya, ma togidega ta 'oinega 'awata ba'idanao sibwala mahemahetena?”

<sup>28</sup> “Ma tanoha taniwagana 'igwaeya, 'Nuwana 'agu 'aleha 'aigeda 'isaweyaneya.' Coinega 'ina topaihowao sigwaeya, 'Togidega? Sawasawahina ma 'awataedi 'adabu yahuledi?”

<sup>29</sup> “Ma badaina 'igwaeya, 'Tuwa! Walaguyawa, ma sibwala mahetena, weyahina 'eguma watoho 'awasina wadabu yahuledi, nuwana tupwana witi wete mahetenao

wadabu 'aigededi. <sup>30</sup> Ma tuta 'eli'eli hesi 'oina topaihowao yahegwaedi ma 'awasina sidomwa'autedi nugeta ta si'uinidi, ta 'oinega sigabu yahuledi, ma witi sidomwa'autedi ta 'igu hada 'e'ahaiya sihedodo.' ”

*Patu 'i'iuna ma 'ebe 'abiheseseha 'adi gwae hegehegedi*

*(Maki 4:30-32; Luke 13:18-21)*

<sup>31</sup> Caigeda wete gwae hegehegedi 'i'ebwaediya, 'igwae, “Yehoba 'ina loina gide tuwa seyala patuna 'aigeda loheya 'i'eweya ma tanoha 'idauniya. <sup>32</sup> Seyala patuna 'i'iuna tuwa ma 'ina bwala mulina 'imadou gide 'aiwe, ma 'oinega bwasmowao sinaoma ta lahalahanao 'oidiya 'idi nehwa si'abidiya.”

<sup>33</sup> Caigeda wete gwae hegehegedi 'i'ebwaediya, 'igwae, “Yehoba 'ina loina gide tuwa pwalawa 'ana 'ebe 'abiheseseha. Wahine 'i'eweya 'i'iuna tuwa ta pwalawa madouna ba'idana 'ihebweliyeya, 'oinega mabwaiyana 'iseseha.”

*Gwae hegehegedi 'ina latu huhuna*

*(Maki 4:33-34)*

<sup>34</sup> Yesu 'ina gwaeyedi gwae hegehegedi mabwaiyadi 'oidiyega boda 'ihe'itediya, weyahina tauna tuta mabwaiyana gwae hegehegediyega 'ihehe'ita tomota mabwaiyadi 'oidiya.

<sup>35</sup> Bewa 'oinega palopita 'ina gwae 'ilatuwa, beno mwalo hene 'ihewaila nugeteya, 'igwae, “Gwae hegehegediyega yahewaila, ma yagwaene to'aha Yehoba 'idahweya bale'u 'ana paihowa hauhau 'oinega ma nige.”

*Tosaweyana 'ina paihowa 'ana nuwasabwalena*

<sup>36</sup> Ma Yesu boda 'i'ebesinediya ma 'iluhuwa hadai, ma 'ana tomuliyao sinaoma ta 'oina sigwaeya, “Gwae hegehegedi 'awata tanoha 'oina 'ana nuwasabwalena 'ulihasi, ma 'asanapu.”

<sup>37</sup> Coinega Yesu 'igwae, “Witi patuna 'ana tosaweyana taugu Loheyaiguina, <sup>38</sup> ma tanoha beno bale'u mabwaiyana, ma witi beno taudi Yehoba 'ina loina 'ana tomuliyao, ma 'awata beno togalanaina 'ana topaihowao, <sup>39</sup> ma 'awata 'ana tosaweyana beno tauna Seitani, ma tuta 'eli'eli beno tuta 'ana 'ebelosaloha, ma to'eli'eli taudi anelose, <sup>40</sup> ma tuta 'ana 'ebelosaloha 'oina togala taudi tuwa gide 'awata sihegogonedi ma sigabu yahuledi.

<sup>41</sup> “Ma taugu Loheyaiguina 'igu aneloseyao yahesumanedi ma pui 'ana tohe'itao galadiyedi sihegogonedima ma 'igu 'ebeloina 'oinega <sup>42</sup> siula latuhedi, 'aiwe 'ala'alasina 'alona. Beno tupwaina 'oina tomota sidou ma sihesala'i'ita muyamuya 'oinega.

<sup>43</sup> “Ma muliyetega tobwebwe'adi Tamadiu 'ina 'ebeloina 'alona si'asilala gide sinala.

“Ceguma taiya matenana gwae bewa 'ihesagohe.

*Gwae hegehegedi 'etoi wete*

<sup>44</sup> “Yehoba 'ina loina gide tuwa wasawasa goula ma mane madouna, mwalo bale'u 'aigeda 'oina sidahweya, ma 'aigeda loheya 'ilobeya, ta 'idahwa hileya, ma ma'ina yaliyaya 'itauya, ma 'ina tobwatobwa mabwaiyadi 'ihewimwaneyediya, ma 'adi maisao 'i'eweya ta bale'uina 'igimwaneya.

<sup>45</sup> “Ma wete Yehoba 'ina loina tuwa gide to'ahwa'une 'aigeda, mwali 'ausala nuwanuwana. <sup>46</sup> Coinega 'aigeda mwali 'ausala hedade 'ilobeya, ta 'oinega tauna 'ina bagi mabwaiyadi 'iulediya ma 'abehega mwaliina 'ausala hedade 'i'ewa.

<sup>47</sup> “Ma wete Yehoba 'ina loina gide tuwa gomana tomota siyahuweya holai, ma hali silahana ma hali silahana si'onediya, <sup>48</sup> ta gomanaina 'imaha 'apu'apuwa ma silisiya 'oy-a'oya, ma simiyatoiya, ma silahana mabwaiyadi siwatahiya, ta silahana 'ausaladi gaeba 'oidiya silagudiya, ma silahana galadi siulediya. <sup>49</sup> Gide wete, tuta 'ana 'ebelosaloha 'oina, aneloseyao sinaoma ma togala siwatahidi tobwebwe'ana 'oidiyega, <sup>50</sup> ma siula latuwedi 'aiwe 'ala'alasina 'alona, ma 'oina sidou ma sihesala'i'ita muyamuya 'oinega.”

*Tobwatobwa wasawasa hauhau ma miyamiyadi*

<sup>51</sup> Coinega Yesu 'ihesilala 'oidiya, 'igwae, “Togidega gwae hegehegediyedi mabwaiyadi wasanapudiya?” Ma sihesagoha ma si'ahwa moisa, sigwae, “Cehe.” <sup>52</sup> Ma 'ihewaediya, “Bewa tuwa wasanapu 'abehega lolina 'ana tohe'itao 'eguma Yehoba 'ina lolina simanasama pwaiya, taudi gide tuwa 'aigeda hada toniwagana 'ina tobwatobwa tupwadi miyamiyadi ma tupwadi 'ehaudi ta mabwaiyadi 'alodiya wasawasa 'imiyamiya.”

*MeNasaleta Yesu silogwahateya*

*(Maki 6:1-6; Luke 4:16-30)*

<sup>53</sup> Yesu 'ina gwae hegehegediyedi 'ilosalohidiya, ma tupwa nage 'i'ebesinediya, <sup>54</sup> ma 'ihila 'ina 'asa, ma 'idi Hada tapwalolo 'oina 'iluhuwa ma 'ihe'itediya, ma tomota nuwadi 'ihenainaida ta sigwaeya, “Loheya bewa ta'ehega 'oinega 'ina sanapu ma 'ina paihowa waiwai 'i'ewa'ewadi?”

<sup>55</sup> Ma wete sigwae, “Nuwana loheya bewa to'abi'abi hada natuna? Ma sinana Meli, ma tasinao Yemesa ma Yosepa ma Saimoni ma Yudasa, <sup>56</sup> ma wete nuhunao mahetedao tamiyamiya. Ma togidega hede ta loheya bewa 'isanapu hedada?”

<sup>57</sup> Coinega silogwahateya. Ma Yesu 'ihewaediya, 'igwae, “Palopitao 'adi he'asisi silobaloba hali 'asa 'oidiya. Ma taudi 'idi 'asa, bo 'idi hada, geya 'adi he'asisimo.”

<sup>58</sup> Eema Yesu nobwa 'ina paihowa waiwai geya baibaiwadi 'ipaihowadi, weyahina geya sihemisae.

## 14

*Yoni to'abihehabitaiso 'ina 'amasa*

*(Maki 6:14-29; Luke 9:7-9)*

<sup>1</sup> Tuta nage 'oina Helodi, tauna Galili 'ana toloina, Yesu 'ina paihowa wasana 'ihesagoheya, <sup>2</sup> ta 'ina topaihowao 'ihewaediya, 'igwae, “Beno loheyaina tauna Yoni to'abihehabitaiso, 'abehega 'amasega 'itoholo hila pwaiya, ma 'oinega ma'ina waiwai 'ipaipaihowa.”

<sup>3</sup> Weyahina mwalo Helodi Yoni 'i'abiyahiya, ma 'ipaiya, ma deliya 'ilaguya. Ma Yoni 'ana 'abiyahina huhuna beno 'aigeda wahine sanina Helodiyasa, beno Helodi tasina Pilipi mwanena, <sup>4</sup> ma Helodi 'i'wayeya ta 'ihaiya, ma Yoni Helodi 'ihewaeya 'igwae, “Nage geya mumuga 'ausalana, weyahina tasiu mwanena 'uhaiya.” <sup>5</sup> Beno huhuna Helodi nuwanuwana ma Yoni 'ilohe'amasi, ma hesi tomota mabwaiyadi si'ahwa palopitaeya, 'oinega Helodi 'imatata ma geya Yoni 'ilohe'amasi.

<sup>6</sup> Muliyetega Helodi 'ina sabwelo li'u 'ana 'ebe nuwatuhu yahina guyaina 'oina boda si'autama, ma Helodiyasa natuna wahinena boda matadiya 'isobusobu, ma Helodi 'i'abihe yaliyayeya. <sup>7</sup> Ma Helodi gumalaulauina 'oina 'igwae helauwa ma 'abehega 'eguma to'aha nuwanuwana 'i'ebwae tuwa, ma wete 'igwae hemisa. <sup>8</sup> Coinega sinana 'igwae gumalaulauina 'oina, ma gumalaulauina Helodi 'ihewaeya, 'igwae, “Nuwanuwagu Yoni to'abihehabitaiso mwaguna gaeba 'oina 'ulagu ma 'u'ebwaegau.”

<sup>9</sup> Coinega Helodi 'inu wagala madouna, ma hesi 'ina gwae hemisa 'inu watuhu yahiya, ta boda 'ina hegwaegwae sihesagoha pwaiya, 'oinega 'itagwala, <sup>10</sup> ta 'ina topaihowao deliya 'ihesumanediya, ma Yoni tani'ona si'upweya, <sup>11</sup> ma mwaguna gaeba 'oina sido'oya ta si'eweyama, ta gumalaulau si'ebwaeya. Ma gumalaulauina 'i'eweya, 'itaueya sinana 'oina. <sup>12</sup> Ma Yoni 'ana tomuliyao sinaoma, ta Yoni wahina si'eweya, ta silaguya galiha, ma muliyetega sitauya Yesu 'oina, ta ginaula bewa sihepwaileya.

*Boda madouna Yesu 'ihe'aidiya*

*(Maki 6:30-44; Luke 9:10-17; Yoni 6:1-14)*

<sup>13</sup> Ta Yesu tetelaina bewa 'ihesagohediya, 'oinega 'ilatua ta wagai 'igeluwa, 'itaueya tupwa yoho 'awawa. Ma boda Yesu tetelina sihesagoheya, ta 'idi 'asa 'oidiyega silatuwa, ma 'edega sitauya Yesu 'oina.

<sup>14</sup> Ma tutaina Yesu wagega 'iulasuluwa 'oya'oya boda madouna 'i'itediya, ta 'ina 'atemuyemuyega tolohalao 'i'abihe bwebwe'enediya.

<sup>15</sup> Ma lahilahiya 'ana tomuliyao sinaoma ta Yesu sihegwaeya, sigwae, “Bada, tupwa bewa balabala 'awawa, ma nata 'iboi. Coinega boda bewa 'uhesumanedi ma sihila, ma 'adi sigimwane 'asa deidiya 'oidiya.”

<sup>16</sup> Ta Yesu 'igwaeya, “Sahena sitautauya, ma 'omi hesi 'e'ahai wa'ebwaedi ma si'ai.”

<sup>17</sup> Ma taudi sigwae, “Ya! Cama geya baibaiwana, beno namo beledi nima 'ai'aigeda ma silahana 'eluwa.”

<sup>18</sup> Ta Yesu 'igwaeya, “Beledi ma silahanaedi wa'ebwaegau.”

<sup>19</sup> Coinega boda 'iloinaediya ma modumoduwa simiyatoiya, ma beledi nima 'ai'aigeda ta silahana 'eluwa 'i'ewediya, ma 'i'ita haneya galewa, ta 'e'ahaiyedi weyahidi 'igwae helauwa, ma muliyetega beledi 'igimwahisiya, ta 'ana tomuliyao 'i'ebwaediya, ma taudi tomota 'oidiya siheguyaiya. <sup>20</sup> Ma mabwaiyadi si'aiya ta simwauyuwa, ma 'e'ahai tupwawupwadi sidomwa 'autediya, ma kodo tuwelo silohemahediya. <sup>21</sup> To'aiyedi loheloheya daisidimo 'adi baibaiwa paibi tausani gide, ta wete wahiwahine ma gwagwama geya sihasilidi.

*Yesu hola debanega 'itauya*

*(Maki 6:45-52; Yoni 6:15-21)*

<sup>22</sup> Coinega 'ana tomuliyao wedi 'iloinaediya, ma wagai sigeluwa ma 'abehega sinugeta hali tupwa, ma tauna 'abehega tomota mabwaiyadi 'ihewgaedi ma sihila 'idi 'asa. <sup>23</sup> Sigeluwa, ma Yesu boda 'ihewgaediya, ta muliyetega tauna 'iboinamo 'oyai 'ihaneya sabi 'ahwanoi Yehoba 'oina, ma 'iboiya. Ciboi pwaiya, ma Yesu 'iboinamo 'imiyamiya.

<sup>24</sup> Cimiya miya ta tomuliyao wedi 'idi waga siwoseyeya ta sidobi pwaiya ni'uwa, ma bagodu madouna silobeya ma 'idi waga 'ilolobuibui, ta wete yaumai matadiyega 'inaonaoma.

<sup>25</sup> Gona 'ada'adaleya Yesu hola tabwanega 'itautauyama, ma 'ana tomuliyao wedi deidiya 'ilatuwa. <sup>26</sup> Cana tomuliyao wedi Yesu si'iteya hola pwatanega 'inaonaoma, ta simatauta madouna, 'oinega si'alabwauwa, 'idi nuwatuhi 'abehega welabana si'iteya.

<sup>27</sup> Ma Yesu 'ihewgaediya, “Sahena wamatauta. Taugu tuwa, 'imi Cinapwana.”

<sup>28</sup> Ma Pita 'igwaeya, “Bada, 'eguma 'owa, 'uhewgaegau ma hola pwatanega yanaowa 'oiuwa.”

<sup>29</sup> Ma Yesu 'igwae, “Cunaoma.” Coinega Pita wagega 'isuluwa ma hola pwatanega 'itauya Yesu 'oina. <sup>30</sup> Citautauya ma yaumai madouna 'i'iteya, ma 'imatauta, ta holai 'idamana, ma 'ibwauwa, “Bada 'u'abihetegau!” <sup>31</sup> Ma Yesu 'ilomwayamwayauwa ma Pita 'i'abiyahiya, ta 'igwae, “Tohemisa 'i'iuu, to'aha weyahina 'uhenuwanaluwa?” <sup>32</sup> Coinega siteluwa wagai sigeluwa, ma yaumai 'i'ata.

<sup>33</sup> Ma taudi waga 'ana tomiyao si'etuluha Yesu 'oina, ma sigwae, “Moisa tuwa 'owa Yehoba Natuna.”

*Tolohalao 'i'abihe bwebwe'andiyaa tupwa Genesaleta 'oina*

*(Maki 6:55-56)*

<sup>34</sup> Eema sihabala tupwa Genesaleta 'oina ma sisuluwa 'oya'oya. <sup>35</sup> Sisuluwa ma tupwaina 'ana tomiyao Yesu si'inaneya, ta wasa sihedabalaleya 'idi 'asa mabwaiyana 'oidiya, ma 'idi tolohalao mabwaiyadi si'ewedima Yesu 'oina, <sup>36</sup> ta si'ahwanoiyeya, sigwae, “Bada, sawasawahina ma tolohalaowedi 'a 'ale'o papalina si'abitoho?” Ta Yesu 'itagwala, ma taudi 'ana 'ale'o si'abitohoya sibwebwe'ana.

## 15

*Me Yudiya tubudiyao 'idi mumuga*

*(Maki 7:1-23)*

<sup>1</sup> Muliyetega Palisiyao ma lolina 'ana tohe'itao Yelusalemega sitauyama Yesu 'oina, ma sihegwaeya sigwae, <sup>2</sup> “To'aha weyahina 'a tomuliyao 'eguma muliya 'abwa 'ai geya nimadi sida buyoya, beno tubudao 'idi lolina siligeligehi?”

<sup>3</sup> Ma 'ihewgaediya, “Comi wete Yehoba 'ina lolina waligeligehi, weyahina tubumiyao 'idi mumuga wamulimuliyedi. <sup>4</sup> Yehoba 'ina lolina 'eluwa bewa, 'aigeda 'igwae, ‘Tamau

ma sinau 'uhe'asisiyedi.' Heluwena wete 'igwae, 'Ceguma taiya tamana bo sinana 'i'ahwa galegaledi, sawasawahina walohe'amasi.'<sup>5</sup> Ma 'omi 'imi he'ita 'abo'abo, wagwae, 'Ceguma taiya tamana ma sinana 'ihewgaedi, 'igwae, "Cigu tobwatobwao yatagwala pwaiyediya Yehoba 'oina, 'oinega geya sawasawahigu ma ya'abihetegomi." ' Coinega 'imi nuwatuhu 'abehega loheyaina 'ina 'abihetena nuwana 'ina he'asisi tamana 'oina geya ginaula madouna.<sup>6</sup> Tubumiyao 'idi loina 'oinega Yehoba 'ina loina waheginaula besobesoweya.

<sup>7</sup> "Bewa 'imi 'abo. Mwalo hene Aiseya palopita weyahimi 'ihewwaila nugeta, tutaina Yehoba 'ina gwae 'ihewwaila, 'igwae,

<sup>8</sup> "Tomota bewa 'ahwadiyega sihehe 'asisiyegau ma geya 'atediyega, <sup>9</sup> ma wete 'oiguwa sitapwatapwalolo besobeso, weyahina 'idi he'itao taugu geya 'oiguwega, ma hesi tomota tuwa 'idi nuwatuhuwega.' "

<sup>10</sup> Coinega tomota 'ibwauwedima ma 'ihewgaediya, "Gwae bewa wahesagohe ma wasanapu 'abehega <sup>11</sup> 'e'ahaiyedi 'ahwadega siluhuluhu geya sawasawahina ma si'abihe bi'igita, ma hesi gwaeyedi 'ahwadega silatulatuma taudi hesi si'abi'abi hebi'igita."

<sup>12</sup> Ma Yesu 'ana tomuliyao 'oina sinaoma ma sihegwae, "Bada, 'uhesagoheya 'abehega Palisiyao 'ino gwae bewa weyahina sideba mwadina."

<sup>13</sup> Ma Yesu 'igwae, "Caiweyedi Tamagu geya 'i'umadi, 'abwa 'idabu yahuledi. <sup>14</sup> Ma tuwa, Palisiyaowedi simiyamiya 'ana siga sibe'u, weyahina taudi tohanugeta matagibugibudi, ma 'iyadiyao 'eguma matagibugibudi sihanugetedi, nata mabwaiyadi gaula sibe'u."

<sup>15</sup> Coinega Pita 'i'ahwalagata ma 'igwae, "Gwae hegehegedi bewa 'ana nuwasabwalena 'ulihasi 'oima."

<sup>16</sup> Ta Yesu 'igwae, "Nuwana 'omi wete 'abwa nuwami geya 'isabwalena, <sup>17</sup> Coinega wasanapu 'abehega to'aha 'ahwadega 'iluhuluhu gamwada 'idobidobi, ma muliyetega 'itautauya mohomoho 'oina. <sup>18</sup> Ma hesi to'aha tomota 'ahwadiyega 'ilatulatuma, beno 'atediyega silatulatuma ma si'abi'abi hebi'idi, <sup>19</sup> beno nuwatuhu galadi gide lohe'amasa ta loyawe ta ganawala ta yagaha ta gwae 'abo'abo ta gwae sinala wete.

<sup>20</sup> Ginaulaedi bewa 'oidiyega tomota 'i'abi'abi hebi'idi, ma 'eguma nimada sahena tabuyobuyo tuta 'ai 'oina, beno yaluyaluwada geya 'i'abihebi'idi."

*Kenani wahineina 'ina hemisa  
(Maki 7:24-30)*

<sup>21</sup> Ma Yesu tupwaina 'i'ebesineya ta 'itauya Taiya ma Saidoni tupwaidi 'oidiya.

<sup>22</sup> Ma tupwaina 'oinega Kenani wahineina 'aigeda 'ilatuwa, ma Yesu 'ihewgaeya, 'igwae, "Bada, 'owa Debida 'ina susu, 'u'atemuyemuyegau, weyahina natugu mewahinena hi'ahi'a 'i'abihebuweya."

<sup>23</sup> Ma Yesu wahineina 'ina bwau geya 'ihemaise, 'oinega 'ana tomuliyao sinaoma ma Yesu si'ahwanoiyeya, sigwae, "Wahineina 'uhesumane ma 'itauya, weyahina 'ibwau hedahedade."

<sup>24</sup> Ma Yesu 'igwae, "Taugu yanaoma sipi 'wani'wanidi Isilelimo 'ina 'ebeloina 'alona weyahidi."

<sup>25</sup> Ma hesi wahineina 'inaoma, ma Yesu matana 'i'etuluha, ta 'igwae, "Bada 'u'abihetegau."

<sup>26</sup> Ta Yesu 'igwae, "Geya sawasawahina ma gwagwama 'adi ya'ebwae 'edewa 'oidiya."

<sup>27</sup> Ma wahineina 'igwae, "Bada, beno moisa. Ma togidega 'e'ahai mugumuguna, 'eguma sigubagubala bada 'ina 'ebe'ai 'oinega, sawasawahina ma 'ina 'edewao si'aidi?"

<sup>28</sup> Coinega Yesu wahineina gwaeina 'ihemaiseya, 'igwae, "Wahine, 'owa tuwa tohemisa moisa, 'oinega bewa tuwa 'ino hemisaina huwaina 'ilatuwa." Ma tutaina nage 'oina wahineina natuna 'ibwebwe'ana hila.

*Tolohala baibaiwadi 'i'abihe bwebwe'enediya*

<sup>29</sup> Ta Yesu tupwaina 'i'ebesineya ma 'ihahasane Galili holai, ta 'oyai 'ihaneya, ma nobwa 'imiyatoiya. <sup>30</sup> Ta boda madouna sihanema ma 'idi tolotalao si'ewedima, taudi



toha'au'au ta taudi hesilae 'oinega siwe'a, ta taudi tomata gibugibu, ta taudi na'ona'o, ma tupwadi tolohalao wete Yesu deina sihalagudiya, ma 'i'abihe bwebwe'enediya. <sup>31</sup> Ma bodaedi si'itediya beno na'ona'owedi sihegwaegwae ma wete sihesagoha bwaibwaini, ma taudi hesilae 'oidiyega siwe'a sibwebwe'ana hila, ma toha'au'au sitauya dumwadumwalu, ma tomata gibugibu matadi sitayahala. Coinega bodaedi nuwadi 'ihenainaida ta meIsileli 'idi Yehobaina sihehepwatuwe.

*Yesu boda 'ihe'aidiya  
(Maki 8:1-10)*

<sup>32</sup> Ta Yesu 'ana tomuliyao 'ibwauwedima, ma 'ihiegwaediya, “Boda bewa ya'atemuye muyediya, weyahina sabwelo 'etoi 'ebwa mahetegwao 'amiyamiya, geya 'adimo. Geya nuwagu ma magomaledi yahesumana hiledi, 'amuge gide ma 'edai sihemwalomwalohana.”

<sup>33</sup> Ma 'ana tomuliyao sihegwaeya sigwae, “Tupwa bewa balabala 'awawa, ma togidega boda madouna bewa 'adi 'e'ahai taloba 'ese?”

<sup>34</sup> Ta Yesu 'ihesilalediya, 'igwae, “Hisa 'ami belediyao?” Ma sigwaeya, “Beledi sebeni ma tupwana silahana 'i'iudi.”

<sup>35</sup> Coinega boda 'ihiegwaediya ma bale'uwa simiyatoiya. <sup>36</sup> Ta beledi sebeni ma silahanaedi 'i'ewediya ma weyahidi 'igwae helauwa Yehoba 'oina, ma 'i'ehisihisiya, ta 'i'ebwaediya 'ana tomuliyao 'oidiya, ma taudi siheguyaiyeya bodaedi 'oidiya.

<sup>37</sup> Ma mabwaiyadi si'aiya ma simwauwuwa ma muliyetega 'e'ahai tupwatupwadi sidomwa 'autediya ta kodo sebeni silohemahediya.

<sup>38</sup> To'aiyedi loheloheyamo 'adi baibaiwa powa tausani, ma wete wahiwahine ma gwagwama baibaiwadi geya sihasilidi.

<sup>39</sup> Muliyetega boda 'ihesumanediya ma sihila, ma Yesu wagai 'igeluwa, ta Magadani tupwaina 'oina 'itauya.

## 16

*Cila'ilalao weyahidi  
(Madiu 12:38-41; Maki 8:11-13; Luke 12:54-56)*

<sup>1</sup> Caigeda tuta 'oina tupwadi Palisiyao ma Sadusiyao sinaoma ma Yesu sihesilaleya, sabi tohoina, ma sihegwaeya, “Sawasawahina ma 'ila'ilala 'aigeda 'upaihowa ma 'a'ahwa moisa 'abehega 'ino waiwai Yehoba 'oinega 'inaoma?”

<sup>2</sup> Ma Yesu 'igwaeya, “Comi 'eguma sinala wa'ita 'isopusopu ma galewa tupwa bwauiyega 'ilobwehabwehali, wasanapuya 'abehega gona 'isiwaloha bwebwe'ana. <sup>3</sup> Ma 'eguma gonagona galewa belabelalana ma dubadubana wa'itadi, beno wasanapuya 'abehega duba 'inaonaoma. Ta beno 'ila'ilalaedi yaloyaloha 'oidiya 'adi sanapu wasanapu pwaidiya, ma hesi 'ila'ilala bewa tutaedi weyahidi geya wasanapudi. <sup>4</sup> Mehau 'omi galami, ma ganawala huhumi, beno huhuna 'ila'ilala wa'ebe'ebese ma 'oidiyega wasanapu bwaibwainigau 'abehega Yehoba 'oinega yanaoma. Hesi geya'abwa 'ila'ilalaedi wa'ita'itadi. Beno namo Yona weyahina wanuwatuhuyahi, tauna tuwa 'ila'ilala weyahimi.” Coinega Yesu 'i'ebesinediya ma 'itauya.

*Palisiyao ma Sadusiyao 'idi 'ebe 'abiheseseha beledi weyahina  
(Maki 8:14-21)*

<sup>5</sup> Ta hali tupwa sihabala, ma 'ana tomuliyaoedi 'adi 'ulaheya geya si'ewadi, weyahina sinuwanaideya. <sup>6</sup> Ma nobwa Yesu 'ihiegwaediya, “Palisiyao ma Sadusiyao 'adi beledi 'ana 'ebe 'abiheseseha 'oinega wa'ita yahigomi.”

<sup>7</sup> Coinega 'ana tomuliyaoedi siboidimo 'oidiya sigwaeya, “Nuwana Yesu 'ina gwae huhuna bewa weyahina 'ada 'ulaheya tanuwanaideya.”

<sup>8</sup> Ma Yesu 'idi nuwatuhu 'isanapu pwaiya, 'oinega 'ihiegwaediya, “To'aha weyahina wagwaegwae 'abehega geya 'ami 'ulaheyamo? Beno geya weyahina yagwae. Geya wahemisa moisa, 'awa?”

<sup>9</sup> “Geya hede wanuwa sabwalena tutaina beledi nima 'ai'aigeda 'oidiyega tomota paibi tausani yahe'aidiya, ma 'e'ahai 'ana tupwa mabwaiyana wadomwa he'auteya, ma 'oinega kodo baibaiwadi walohemahediya? <sup>10</sup> Tomota wete powa tausani beledi sebeni 'oidiyega yahe'aidiya ma 'ana tupwa mabwaiyana wadomwa 'auteya, ta kodo baibaiwana 'oinega walohemahediya? <sup>11</sup> Coinega to'aha weyahina ta geya wanuwa sabwalena 'abehega geya 'e'ahai weyahina yagwaegwae? Ma hesi Palisiyao ma Sadusiyao 'idi 'ebe 'abiheseseha 'oinega wa'itayahigomi.”

<sup>12</sup> Tuta nage 'oina sisanapuwa 'abehega geya beledi moisa 'ana 'ebe 'abiheseseha weyahina 'igwaegwae, ma Palisiyao ta Sadusiyao 'idi he'itao 'oidiyega si'itayahidi.

*Pita 'ina hepwaile Yesu weyahina*

*(Maki 8:17-30; Luke 9:18-21)*

<sup>13</sup> Ma Yesu 'inaoma Sisaliya Pilipai 'ina tupwa 'oina, ma 'ihesilala 'ana tomuliyao 'oidiya, 'igwaeya, “Togidega tomota 'idi gwae 'abehega taugu Loheyaiguina taiya?”

<sup>14</sup> Ta sigwaeya, “Tupwana tomota sigwae 'abehega 'owa Yoni to'abihebabitaiso, ma tupwana tomota sigwaeya 'abehega 'owa Ilaitiya, ma tupwadi sigwaeya 'abehega 'owa Yelamaiya, bo nuwana 'aigeda palopita nugenugeta.”

<sup>15</sup> Ta Yesu 'ihesilalediya, 'igwae, “Ma 'omi togidega 'imi nuwatuhu 'abehega taugu taiya?”

<sup>16</sup> Coinega Saimoni Pita 'ihemaiseya 'igwae. “Cowa To'abihetena, Yehoba mayawasina Natuna.”

<sup>17</sup> Ma Yesu Pita 'ihewgaeya, 'igwae, “Saimoni, Yona natuna, 'owa moisa toyaliyaya 'aigeda, weyahina 'ino sanapu bewa geya tomota 'oidiyega, ma hesi Tamagu galewa 'ina sanapuwega 'i'ebwaegowa. <sup>18</sup> Ma wete yahegwae 'abehega saniu Pita, ta 'owa dimwa, ma 'oiuwa 'igu hekalesiya ya'abi, ma 'oinega sahena 'amasa bo nuwana mumuga galana sihewaiwai sine. <sup>19</sup> Ma wete 'ebeloina galewa 'ana 'ebesole ya'ebwaego, ma to'aha bale'uwa 'u'ausiya, galewa wete si'ausi, ma wete 'eguma to'aha bale'uwa 'uso'e galewa wete siso'e.”

<sup>20</sup> Eeta Yesu 'ana tomuliyao 'iloina pa'alediya, 'igwae, “Sahena 'aigeda taiya 'oina wahehpwailegau 'abehega taugu To'abihetenaina.”

*Yesu 'ihewgaile 'ina 'amasa 'abwa weyahina*

*(Maki 8:31-9:1; Luke 9:22-27)*

<sup>21</sup> Tuta nage 'oina Yesu 'ihewgaile ma 'ana tomuliyao 'ihewgaile, 'igwae, “Cilob-waineya ma yatauya Yelusalema, ma nobwa muyamuya baibaiwadi yalobadi, babadao ta topwaoli madoudi ma loina 'ana tohe'itao 'oidiyega, ma nage 'oina silohe'amasigau, ma sabwelo hetoina 'oina Yehoba 'i'abihetoholo hilegau.”

<sup>22</sup> Ma Pita Yesu 'itoewasiyeya, ma 'iheliyeya, 'igwae, “Bada, ginaula bewa sahena 'oiuwa 'ilatulatu!”

<sup>23</sup> Ma Yesu 'itehinowa, ta Pita 'oina 'igwae, “Cowa Seitani, bewa tuwa 'u'ebesinegau! Sahena 'u'au'ausigau! Cino nuwatuhu tomota 'idi nuwatuhu, ma geya Yehoba 'ina nuwatuhu gide.”

<sup>24</sup> Muliyetega Yesu 'ana tomuliyao 'ihewgaile, 'igwae, “Taiya 'eguma nuwanuwana ma 'imuliyegau, 'ilobwaineya ma tauna 'ina nuwatuhuwao 'ilogwahatedi, ma tauna 'ana kelose 'i'ahali, ma 'oinega 'i'amasa, beno gide 'agu muliyaina 'ana 'eda.

<sup>25</sup> “Ma 'eguma taiya yawasina 'inuwahi, 'abwa yawasiina 'ilohe'wadalele. Ma 'eguma yawasina weyahigu 'itagwale ma 'i'amasa, tauna nata yawasina bwebwe'ana 'iloba.

<sup>26</sup> “Ceguma 'ida wasawasao bale'uwa madou hedade talobadi, beno ginaula bwagabwaga, ma hesi ginaula madouna beno yawasida bwebwe'ana. Weyahina 'eguma yawasida bwebwe'ana talohe'wadalele, geya 'aigeda wete 'ana miyalaena 'imiyamiya.

<sup>27</sup> “Cabwa taugu Loheyaiguina yalohihilama, beno Tamagu 'ina wasawasa 'asi'asialalana, ta wete aneloseyao ba'idagwao, ma tomota 'idi paihowao 'adi maisa ya'ebwaedi.

<sup>28</sup> “Yagwaeya moisa 'oimiya 'abehega tomota tupwami sahena wa'ama'amasa 'ana siga taugu Loheyaiguina yahilama sabi loina, ma 'oina wa'ita hilegau.”

## 17

*Yesu 'ana 'ita 'idumaduma  
(Maki 9:2-13; Luke 9:28-36)*

<sup>1</sup> Sabwelo sikisi mulina Yesu 'ana tomuliyao 'etoi 'itoediya, ta sihaneya 'oya 'aigeda dudulena 'oina. Tomuliyao wedi taudi Pita ma Yemesa matasina Yoni.

<sup>2</sup> Tutaina taudimo simiyamiya 'oyai Yesu maninina si'iteya 'inamanamala gide sinala 'ana 'ita, ma 'ana 'ale'o 'ana wa'ewa'e'eina gide 'asilala 'isaesaehane. <sup>3</sup> Ma wete Mosese ma Ilaitiya silatuma ta Yesuina ba'idadiu sihehegwaegwae.

<sup>4</sup> Coinega Pita 'i'ahwalagata ma Yesu 'ihewgaeya, 'igwae, “Bada, 'ida miya bewa gide 'ausalana, 'oinega 'ilobwaineya ma 'eguma 'utagwala, hadahada 'etoi ya'abidi, ma 'aigeda 'owa weyahiu, ma 'aigeda Mosese weyahina, ma 'aigeda Ilaitiya weyahina.”

<sup>5</sup> Pita 'ina gwae 'abwa geya 'ilosalohi ma yaloyaloha 'asilalana 'i'ahuhe taluhidiya, ma yaloyaloha 'oinega 'enana 'aigeda sihesagoheya, 'igwae, “Bewa Natugu bwebwe'ana hedade, tauna weyahina yayaliyaya madouna, 'oinega 'ina gwaeyao wahesagohedi.”

<sup>6</sup> Ma Yesu 'ana tomuliyao wedi gwaeyao sihesagoheya ta ma'idi matauta sibe'u talu-talubu'liya, <sup>7</sup> ma Yesu 'inaoma ta 'i'abihe toholodiya, 'igwae, “Watoholo. Sahena wamatamatauta.” <sup>8</sup> Coinega sisapaila ta Yesu 'iboinamo 'itotoholo si'iteya.

<sup>9</sup> Yesu ba'idanao 'oyega sidobidobima, ma Yesu 'ihewgaediya, 'igwae, “Ginauledi nige wa'itediya sahena tomota 'oidiya wahehepwaila 'ana siga taugu Loheyaiguina 'amasega yatoholo hilama.”

<sup>10</sup> Ma Yesu 'ana tomuliyao 'oina sihesilala, sigwae, “To'aha weyahina lolina 'ana tohe'itao sigwae 'abehega Ilaitiya 'abwa 'inugetama, ma muliyetega To'abihetenaina 'ilatu?”

<sup>11</sup> Ta Yesu 'igwae, “Cehe gide, Ilaitiya 'abehega 'inugetama, ma 'oinega ginaula mabwaiyadi 'i'abihe dumwaludi. <sup>12</sup> Ma hesi Ilaitiyaina 'ilatu pwaima, ma tomota geya si'inana, ta hesi sipaipaihowa galana 'oina to'aha 'idi nuwatuhu gide, nata wete taugu Loheyaiguina gide 'oiguwa simumuga 'esa.” <sup>13</sup> Coinega tomuliyao wedi nage 'oina sisanapuya 'abehega Yesu Yoni to'abihebabitaiso weyahina 'igwaegwae.

*Caigeda gwama 'ana lohala hebwasubwasumo Yesu 'i'abihe bwebwe'aniya  
(Maki 9:14-29; Luke 9:37-43)*

<sup>14</sup> Coinega Yesu ma'ana tomuliyao sidobidobi boda 'oidiya, ma 'aigeda loheya 'inaoma, ta 'i'ahetulasa Yesu matana, <sup>15</sup> ma 'igwae “Bada, natugu 'u'atemuyemuye, ma 'u'abihe bwebwe'ani, weyahina tuta mabwaiyana 'ana lomagisubu weyahina 'itaitai, ta wahina simuyamuya madouna, ma sauga tupwana 'oidiya 'aiwe ninininima 'oina 'ibe'ube'u, ma sauga tupwana we'aha 'oina 'ibe'u. <sup>16</sup> Ma 'a tomuliyao 'oidiya yanaoleyama, ta geya sawasawahina ma si'abihe bwebwe'ani.”

<sup>17</sup> Coinega Yesu 'ihewgaediya, “Hede 'omi togidega? Tonuwa potapotami 'iya. Nuwana geya wahemisaegau, 'awa? Cimi nuwapotapota 'oinega yawahi dabalala. Hana gwamaina wanaoleyama 'oiguwa, ma ya'ita.”

<sup>18</sup> Gwamaina sinaoleyama, ma Yesu hi'ahi'a 'iloinaeya, ma lomagisubu gwamaina 'oinega 'ilatuwa ta 'ibwebwe'ana hila.

<sup>19</sup> Muliyetega Yesu 'ana tomuliyao tupwadi sinaoma siboidimo Yesu ba'idanao, ma sihegwaeya, sigwae, “Bada, togidega tauma ta geya sawasawahima ma hi'ahi'aina 'aulalatuhe?”

<sup>20</sup> Ta Yesu 'igwae, “Weyahina 'imi hemisa 'iwe'a. Yagwae moisa 'eguma 'imi hemisa 'ana waiwai gide seyala patuna, 'abwa 'oya nage 'oina wagwae, 'Bewa 'oinega 'umiya dobi,' nata 'ihematamatana tuwa. Gide wete ginaula mabwaiyadi sawasawahimi ma wapaihowadi.” <sup>21</sup> (-)

*Yesu 'ina 'amasa weyahina 'igwae hila  
(Maki 9:30-32; Luke 9:43-45)*



<sup>22</sup> Muliyetega Galili 'oina simiyamiya, ma Yesu 'ihenuwa laguwediyā, 'igwae, “Cabwa 'agu toteba 'itebaegau taugu Loheyaiguina 'agu 'alehao 'oidiya, <sup>23</sup> ma silohe'amasigau, ma sabwelo hetoina 'oina Yehoba 'i'abihetoholo hilegau.” Yesu 'ina hepweila bewa weyahina sinuwagala moisa.

*Cidi takesi Hada He'asisi weyahina*

<sup>24</sup> Muliyetega sitauya Kapaneumi 'oina, ma takesi Hada He'asisi weyahina 'ana tohe'autao sinaoma ta Pita 'oina sigwaeya, “Togidega, sawasawahina ma 'ino tohe'itaina 'itakesi, bo geya?” <sup>25</sup> Ma Pita 'igwaeya, “Cehe, nata 'ina takesi 'ilagu.” Coinega 'ihilama hadai, ma Yesu Pita 'ihigwaeya, 'igwae, “Saimoni, to'aha 'ino nuwatuho toloinao bale'uwa weyahidi, taiyawedi 'oidiyega takesi si'ewa'ewa? natudiyao 'oidiyega? bo hali tomota 'oidiyega?”

<sup>26</sup> Pita 'igwaeya, “Hali tomota 'oidiyega.” Ta Yesu wete 'igwae hila, 'igwaeya, “Moisa! Coinega taudi natudiyao geya'abwa sitaketakesi. <sup>27</sup> Ma sahena talogupaila, 'amuge ma 'oida sinuwagala. Coinega bewa tuwa huku 'u'ewa ma 'udobi holai, ma 'eguma silahana nugenugeta 'u'atu, 'ahwana 'uso'e ma 'alonga mane 'u'eweyama ma 'u'ebwaedi, beno 'owa ma taugu 'ida takesi sawasawahida.”

## 18

*Taiyawedi taudi sanidi madoudi Yehoba matana  
(Maki 9:33-48; Luke 9:46-48; 17:1-2)*

<sup>1</sup> Tuta nage 'oina Yesu 'ana tomuliyao sinaoma ma sihegwaeya, sigwae, “Bada, taiya sanina madouna Yehoba 'ina 'ebeloina 'alona?”

<sup>2</sup> Coinega Yesu gwama 'aigeda 'ibwauweyama, ma gwamaina gamwagamwanidiya 'ihetoholoya, <sup>3-4</sup> ma 'ihigwaediya, “Yagwae moisa, taiyawedi 'omi 'eguma 'imi nuwadobi gwama bewa gide, 'omi sanimi madoudi Yehoba 'ina 'ebeloina 'alona, ma 'eguma geya wanuwabui ma gwagwama 'i'iudi gide, sahena waluhuluhu 'ina 'ebeloina 'oina.

<sup>5</sup> “Coinega 'eguma 'aigeda loheya gwama bewa gide 'itoe weyahigu, tauna taugu wete 'itoe'gau. <sup>6</sup> Ma hesi 'eguma taiya 'itoho ma 'agu tohemisao gwagwama bewa 'oidiyega 'aigeda 'i'abihebe'u, loheyaina nuwana wahineina 'ilobwaineya ma dimwa madouna tani'ona silosipwa, madimwaina siula dobihe ni'uwa, ma 'idamana.

<sup>7</sup> “Comi mebale'u 'atemuyamuyaimi 'iya, weyahina 'ebe be'u baibaiwadi simiyamiya. Moisa tuwa, 'ilobwaineya ma 'ebe be'u'wao bale'uwa simiyamiya, ma hesi 'eguma loheya 'itoho ma 'iyanao 'i'abihebe'udi, 'abwa loheyaina 'ihesilae moisa.

<sup>8</sup> “Ma 'eguma nimau bo 'aheu 'i'abihebe'ugo 'ilobwaineya ma 'u'upwa yahuledi. Geya beno 'ana galamo 'eguma manima tomwatomwau nuwana ma'ino ha'au'au ma yawasiu bwebwe'ana 'uloba. Ma hesi gala hedade 'oiuwa 'eguma manima luwaluwau ma ma'ae luwaluwau siula dobihego 'aiwe 'ala'alata hatayana 'oina.

<sup>9</sup> “Matau wete gide, 'eguma 'i'abi hebe'ugo, 'ubwai yahule tuwa, weyahina geya 'aigeda wete 'ana galamo 'eguma mamata 'ai'aigedau ma yawasiu bwebwe'ana 'uloba. Ma hesi gala hedade 'oiuwa 'eguma mamata luwaluwau siula dobihego 'asa 'ala'alata 'oina.

*Gwagwama sahena wahe'ipi'ipiyedi  
(Luke 15:3-7)*

<sup>10</sup> “Gwagwama bewa gide sahena 'aigeda 'oidiyega walososomane. <sup>11</sup> Moisa, gwagwamaedi 'idi aneloseyao tuta mabwaiyana galewa Tamagu matana simiyamiya, ma si'e'ebubu.

<sup>12</sup> “Ma togidega 'eguma loheya 'ina sipiyao 'adi baibaiwa handeledi, ma 'aigeda 'oidiyega 'itauya puiya ma 'i'waniya, nata nainiti nainiyedi 'oyai 'ilagudiya ma 'wani'waninaina 'i'ebese, 'awa?

<sup>13</sup> “Ma 'eguma 'iloba hila, yagwae moisa nata 'ina yaliyaya madou hedade. Ma hesi site nainiti nainiyedi bwebwe'adi geya weyahidi 'iyaliyaya hedade. <sup>14</sup> Coinega bewa tuwa

wasanapu 'abehega Tamamiu galewa geya nuwana ma gwagwamaedi 'oidiyega 'aigeda taiya 'ihesilae.

*Tasidai 'eguma 'ina pui weyahina*  
(Luke 17:3)

<sup>15</sup> “Ma 'eguma tasiu 'ipaihowa galana 'oiuwa, 'utoho ma wateluwamo 'ina puiina wa'abihedumwalu, ma 'eguma 'enau 'ihesagohe, 'ausala, beno wa'ahwa 'iya'iyagu pwaiya. <sup>16</sup> Ma 'eguma geya nuwana ma 'enau 'ihesagohe, tomota 'aigeda, nuwana 'eluwa wete, 'utoedima ba'idamiyao tasiu nina 'oina wagwae ma 'ina pui 'ana moisa 'inuwasabwaleni. <sup>17</sup> Ma 'eguma tuwa geya nuwana ma 'ihesagohegemi, wagwae latu tohekalesiyao mabwaiyadi 'oidiya, ma 'eguma geya nuwana wete tohekalesiyao 'idi gwae 'ihesagohedi, walogwahate tuwa, ma 'imiya ganamuli gide takesi 'ana to'ewa. <sup>18</sup> Yagwae moisa 'oimiya, to'aha 'eguma bale'uwa wapaidi, ginauledi galewa nata wete sipaidi. Ma wete to'aha 'eguma bale'uwa walihasi, nata ginauledi wete galewa silihasidi.

<sup>19</sup> “Bewa tuwa yahegwaegomi 'abehega 'eguma 'oimiyega wateluwa bale'uwa 'imi nuwatuhu mahemahetena, ma wa'ahwanoi gide Tamagu galewa 'oina, nata tuwa 'ipaihowa. <sup>20</sup> Weyahina 'eguma 'aigeda tupwa 'oina 'eluwa bo 'etoi tomota saniguwega simiya'auta, taugu wete gamwagamwanidiya yamiyamiya.”

*Nuwasam weyahina*

<sup>21</sup> Ma Pita 'inaoma ma Yesu 'ihewaeya, 'igwae, “Bada, 'eguma tasigu tuta baibaiwana 'oiguwa galana 'ipaipaihowa, mahisa sawasawahina ma 'ina puiyedi yanuwamudi, masebeni, bo nuwana 'ehisa?”

<sup>22</sup> Ma Yesu 'igwaeya, “Geya masebenimo, ma hesi mabaibaiwana. <sup>23</sup> Weyahina Yehoba 'ina lina gide kini 'aigeda, tauna nuwanuwana ma 'ina topaihowao 'idi lowaga sihemaise 'oina. <sup>24</sup> Coinega 'ihagaina ma loheya 'aigeda si'eweyama 'ina lowaga teni tausani kina, <sup>25</sup> ma geya sawasawahina 'ihemaise, 'oinega badaina 'iloina ma 'abehega loheyaina mwanena ta natudiyao ma 'idi tobwatobwao mabwaiyadi sigimwaneyedi, ma 'adi maisa toloina 'i'ewa topaihowaina 'ina lowaga weyahina.

<sup>26</sup> “Ma topaihowaina ma'ina nuwagala 'i'etuluha, ma 'i'ahwanoiya 'oina, 'igwae, ‘Bada 'u'atemuyemuyegau, ma 'abwa 'igu lowaga mabwaiyana yahemaise.’

<sup>27</sup> “Coinega bada 'i'atemuyamuyaeya ma 'ina lowaga mabwaiyana 'inuwasamudiya, ma 'oinega topaihowaina 'ilatuwa.

<sup>28</sup> “Cilatuwa ma 'iyana 'aigeda 'ilobeya, ma 'iyanaina 'ina lowaga 'oina toea handeled-imo, ta 'iyanaina tani'ona 'i'abiya ma 'i'abihe matausiya, 'igwaeya, ‘Bewa tuwa 'ino lowaga 'oiguwa 'uhemaisa!’

<sup>29</sup> “Coinega 'iyanaina 'i'etuluha ma 'oina 'i'ahwanoiya, 'igwae, ‘Tuwa 'u'atemuyemuyegau, ma 'abwa 'igu lowaga mabwaiyana yahemaise.’ <sup>30</sup> Ma 'iyana 'enana geya 'ihesagohe, ta deliya 'ilaguya, ma 'abehega nobwa 'imiyamiya ma 'ana siga 'ina lowaga mabwaiyana 'ihemaise.

<sup>31</sup> “Ma topaihowaedi 'iyadiyao ginaulina si'iteya 'oinega sinuwagala ma sitauya 'idi bada 'oina ta siteluwaedi sihepwalediya. <sup>32</sup> Coinega badaina 'ina topaihowa 'ibwauweyama ma 'ihewaeya, 'igwae, ‘Cowa topaihowa galau, weyahina 'ino 'ahwanoi 'atemuyemuyega 'ino lowaga mabwaiyana yanuwa samudiya, <sup>33</sup> 'oinega 'owa wete sawasawahina ma 'iyau 'u'atemuyemuye ma 'ina lowaga wete 'unuwasam.’

<sup>34</sup> “Coinega badaina 'igamwasowala moisa, ta deli 'ana to'itayahinao 'ihewaediya, ma topaihowaina deliya silaguya ma 'abehega nobwa 'imiyamiya 'ana siga 'ina lowaga mabwaiyana 'ihemaise hegumwali.”

<sup>35</sup> Coinega Yesu 'ina gwae 'ilosalohiya, 'igwae, “Tamagu galewa wete 'oimiya 'ipaihowa gide, 'eguma tasimiyao sahena wa'atemuyemuyedi, ma 'idi puiyao wanuwamudi.”

## 19

*Sa'ila weyahina**(Maki 10:1-12)*

<sup>1</sup> Yesu 'ina he'itaedi 'ilosalohidiya ma tupwa Galili 'i'ebesineya, ma Yudiya 'ina tupwa 'iluhuwa, beno we'aha Yolidani hali papaliya. <sup>2</sup> Ma boda wete madouna Yesu simuliyeya ta nobwa 'idi tolohalao 'i'abihe bwebwe'anediya.

<sup>3</sup> Coinega Palisiyao sinaoma ta nuwanuwadi ma Yesu sitocho, 'oinega 'oina sihesilala, sigwae, “Bada, sawasawahina ma pui tupwana weyahina loheya mwanena 'isa'ile?”

<sup>4</sup> Ta Yesu 'igwae, “Buki He'asisi 'oina wasanapu pwaiya lelelena 'abehega tuta 'ana 'ebe hegaina 'oina Tohemasalaha tomota 'eluwa 'ihemasalehediya, meloheyana ma mewahinena, <sup>5</sup> ma 'igwaeya,

‘Bewa huhuna 'oinega loheya tamana ma sinana 'i'ebesinedi ma mwanena ba'idana simiyaluwa, ma siteluwaedi sihe'wapina 'aigeda tuwa, <sup>6</sup> ma tuta bewa sihe'aigeda pwaiya. Yehoba 'ihemiyaluwa pwaiyediya, 'oinega sahena 'eta taiya 'ihemiya wasiyedi.’”

<sup>7</sup> Coinega sigwaeya, “To'aha weyahina Mosese 'iloina 'abehega loheya sawasawahina ma pepa 'oina 'ina logwahata 'ihewwaele, ma mwanena 'i'ebwae, ma muliyetega 'isa'ila?”

<sup>8</sup> Ma Yesu 'igwaeya, “Beno 'imi nuwapota weyahina, 'oinega Mosese 'itagwala 'oimiya ma mwanemiyao gide wasa'ila 'esedi, ma hesi tuta nugenugeta geya wete tagwala sa'ila weyahina 'imiyamiya. <sup>9</sup> Ma yahegwagwagomi 'abehega 'eguma loheya 'aigeda mwanena geya 'ipui, ma loheya tuwa 'isa'ila ma 'ihaibala hali wahine 'oina, beno 'ilogwaliya.”

<sup>10</sup> Coinega 'ana tomuliyao sihegwagwae, sigwae, “Ceguma loheya mamwanena 'adi loina bewa gide, sahena hai.”

<sup>11</sup> Ma Yesu 'igwaeya, “He'ita bewa geya tomota mabwaiyadi weyahidi, ma hesi 'eguma Yehoba sanapu 'i'ebwae tupwanamo tomota 'oidiya ma sisanapu <sup>12</sup> 'abehega loheloheya tupwana 'idi li'u hohau 'oinega geya sawasawahina ma sihai, ma wete tupwadi loheloheya 'wawadi si'ewediya ma geya sowana sihai, ma tupwadi Yehoba 'ina loina weyahina siboidimo si'ausidiya ma sahena sihaihai. Ceguma taiya gwae bewa sawasawahina ma 'isanapu, ma'ina sanapu 'inuwasabwalena.”

*Yesu gwagwama 'igwae helauwediya**(Maki 10:13-16; Luke 18:15-17)*

<sup>13</sup> Ta tomota gwagwama si'ewedima Yesu 'oina ma 'abehega 'i'abitohodi ma weyahidi 'i'ahwanoi Yehoba 'oina. Ma hesi 'ana tomuliyao gwagwamaedi si'etobodediya. <sup>14</sup> Ta Yesu 'igwaeya, “Sahena gwagwama wa'eto'etobodedi, ma hesi watagwaledi ma 'oiguwa sinaoma, weyahina gwagwamaedi gide Yehoba 'ina 'ebeloina 'ilobwainediya moisa.”

<sup>15</sup> Coinega Yesu gwagwamaedi 'i'abitohodiya, ma muliyetega 'i'ebesinediya.

*Towasawasa 'aigeda Yesu 'ilogwahateya**(Maki 10:13-16; Luke 18:15-17)*

<sup>16</sup> Muliyetega 'aigeda loheya Yesu 'oina 'inaoma ta 'igwaeya, “Tohe'ita, to paihowa bwebwe'ana yada paihowa ma 'oinega yawasigu miyamiya hatayana yada loba?”

<sup>17</sup> Ma Yesu 'igwaeya, “To'aha weyahina paihowa bwebwe'ana 'uhesilala 'oiguwa? Caigeda tuwamo 'ina mumuga bwebwe'ana. Eeta 'eguma nuwanuwau ma yawasiu hataya 'uloba, sawasawahina ma tauna 'ina linao 'umuliyedi.”

<sup>18</sup> Ma loheyaina 'ihesilala, 'igwaeya, “To loina?” Ta Yesu 'igwaeya, “Sahena 'ahuyemate; sahena logwali; sahena yagaha; sahena hepwaile 'abo'abo; <sup>19</sup> ma tamau ma sinau 'uhe'asisiyedi; ma wete 'iyamwao 'uhelauwedi gide 'uboi 'uhelauwego.”

<sup>20</sup> Ta hewaliina 'igwae, “Loinaedi mabwaiyadi yamuliya bwaibwainidiya, ma to'aha wete yada paihowa?”

<sup>21</sup> Ta Yesu 'igwaeya, “Ceguma nuwanuwau ma mumugau mabwaiyana bwebwe'ana, 'uhila 'ino 'asa, ma 'ino tobwatobwa mabwaiyadi 'uhegimwaneyedi, ma 'adi maisa

'uheguyaiye towewelohe 'oidiya, ma 'oinega 'unaoma ma 'umuliyegau, ma 'oinega 'abwa wasawasa galewa 'uloba.”

<sup>22</sup> Loheyaina Yesu 'ina gwaee bewa 'ihesagoheya, ta ma'ina nuwagala 'ihila. Tauna 'ana bolime geya baibaiwana, ta 'ina tobwatobwa baibaiwa hedade 'inuwahidiya.

<sup>23</sup> Coinega Yesu 'ana tomuliyao 'ihewgaediya, “Moisa, towasawasao 'idi luhu Yehoba 'ina 'ebeloina 'oina mwauna.

<sup>24</sup> “Ma wete yahegwaegomi 'abehega hebai kameli 'ina luhu nidili 'ana 'ebesula 'oinega mwauna, ma hesi tohewasawasa 'idi luhu Yehoba 'ina 'ebeloina 'oina mwau hedada.”

<sup>25</sup> Yesu 'ana tomuliyao 'ina gwaee bewa sihesagoheya ta nuwadi 'ihenainaida hedadeya, ma sigwaeya, “Ceguma bewa gide, taiya hede sawasawahina ma 'ebe yaliyaya 'iloba?”

<sup>26</sup> Ma Yesu 'i'ebubudiya ma 'igwaeya, “Ginaula bewa mwau hedada tomota 'oidiya, ma hesi Yehoba 'oina ginula mabwaiyana meyameyahadi.”

<sup>27</sup> Coinega Pita 'ihesilala, 'igwaeya, “Bada, tauma togidega? Weyahina 'ima tobwatobwao mabwaiyadi 'a'ebesine pwaidiya ta 'amuliyegowa.”

<sup>28</sup> Ma Yesu 'ihewgaediya, “Yagwaee moisa, 'abwa bale'u 'ana 'abihe'ehau 'oina taugu Loheyaiguina 'igu wagahata wasawasa 'oina yamiyatoi, ma wete 'omi 'agu tomuliyao wate tuwelo 'imi wagahata tuwelo 'oidiya wete wamiyatoi, ma meIsileli 'idi susuwao tuwelo waloinaedi.

<sup>29</sup> “Ma 'eguma taiyawedi 'omi 'imi hadao, bo tasimiyao, bo sinamiyao, bo nuhumiyao, bo tamamiyao, bo natumiyao, bo 'imi tanohao wa'ebesinedi, 'abwa ginauledi wa'ebesinediya 'adi miyalaena ma 'adi loheposeyana handeledi walobadi, yawasimi hataya ba'idana.

<sup>30</sup> “Ma tuta bewa tohanugetao baibaiwadi 'abwa simuliya, ma taudi simulimuliya 'abwa sinugeta.

## 20

### *Tanoha 'ana topaihowao 'adi gwaee hegehegedi*

<sup>1</sup> “Yehoba 'ina lolina gide tuwa loheya 'aigeda ma'ina tanoha, loheyaina 'abwakululu 'itoholowa ma 'itauya 'asai ta tupwadi topaihowao 'itoediya sabi paihowa 'ina tanoha.

<sup>2</sup> Coinega lolina 'ilaguya ma 'abehega sabwelo 'aigeda paihowa 'ana maisa kina 'aigeda, ta sitagwala. Coinega 'ihesumanediya ta sitauya 'ina tanoha sabi paihowa.

<sup>3</sup> “Ma sinala 'isaehanema ta loheyaina 'itauya hila 'asaina 'oina, ta tomota tupwadi 'ilobediya simiyamiya bwagabwaga. <sup>4</sup> Coinega 'ibwauwedima ta 'igwaeya, ‘Comi wete watauya 'igu tanoha wapaihowa, ma 'imi paihowa 'ana maisa dumwaluna ya'ebwaegomi.’ Coinega sitauya tanoha.

<sup>5</sup> “Coinega 'asudiladila ma wete lahilahiya 'itauya hila 'asaina 'oina, ta nobwa tomota tupwadi 'ilobediya, ta 'ibwauwedima ta wete 'ihesumanediya, ta sitauya 'ina tanoha.

<sup>6</sup> “Ma lahilahi moisa wete 'ilatu hila ta 'itauya 'asai ma tomota wete tupwadi 'ilobediya ta 'ihesilalediya, 'igwaee, ‘To'aha weyahina sabwelo mabwaiyana wamiyamiya bwagabwaga?’

<sup>7</sup> “Ma sigwaeya, ‘Weyahina geya 'eta taiya 'ibwauwemai sabi paihowa.’ Ta loheyaina 'igwaeya, ‘Comi wete watauya 'igu tanoha ma wapaihowa.’

<sup>8</sup> “Coinega boi hohau 'oina tanoha toniwagana 'ina paihowa 'ana to'itayahi 'ihewgaeya, 'igwaee, ‘Topaihowao mabwaiyadi 'ubwauwedima ma 'adi maisa 'u'ebwaedi, taudi tonaoma hauhaudi 'oidiyega 'uhagaina ma 'adi maisa 'u'ebwa'ebwaedi, ma 'ana siga taudi sabwelo mabwaiyana 'oina sipaihoweya.’ <sup>9</sup> Coinega taudi lahilahimo 'oina sipaihowa sinaoma ma 'adi maisa kina 'aigeda 'aigeda si'eweya. <sup>10</sup> Muliyetega mabwaiyadi wete topaihowaedi sinaoma ta 'adi maisa kina 'aigeda 'aigeda si'eweya. Ma topaihowa nugenugeta wete, taudi sabwelo mabwaiyana 'oina sipaihowa, sinaoma ta 'idi nuwatuhu 'abehega nata maisa 'ana loheposeyana si'ewa, ta geya, taudi wete kina 'aigeda tuwa silo'ahala. <sup>11</sup> Coinega 'idi kina si'ewediya ma tanoha toniwagana 'oina silomugiya, <sup>12</sup> ma sigwaeya, ‘Tomota hauhaudi sinaoma 'idi paihowa tuta to'uto'upanamo, ma tauma

sabwelo mabwaiyana hala 'alona 'apaihowa, ma taudi 'adi maisa gide tuwa mabwaiyama mahemahetena.'

<sup>13</sup> “Ma badaina 'aigeda 'oidiyega 'ihewaeya, 'igwae, 'Ciyagu, geya wete ya'abowego, weyahina 'ida lona nugenugeta 'abehega kina 'aigeda tuwamo 'u'ewa. <sup>14</sup> Cino kina bewa 'u'ewa ma 'utauya. Ma taugu 'igu lona 'abehega tomota hauhaudi sinaoma 'adi maisa ya'ebwaedi 'owa gide 'a maisa. <sup>15</sup> Maisa bewa taugu 'igu 'ebeloina. Sahena 'omi waloiloina. Sahena 'igu helau tomota 'oidiya weyahina wahe'ipi'ipi.’ <sup>16</sup> Coinega taudi simulimuliya 'abwa sinugeta, ma taudi sinugenugeta 'abwa simuliya.”

*Yesu 'ina 'amasa 'abwa weyahina 'igwaeya  
(Maki 10:32-34; Luke 18:31-34)*

<sup>17</sup> Cabwa Yesu Yelusalema weyahina 'ihanehane ma 'ana tomuliyao site tuwelo 'itoediya 'eda papalina, ma taudimo, ma 'ihewaediya, <sup>18</sup> 'igwae, “Bewa tuwa tahanehane Yelusalema, ma nobwa 'agu totebaina taugu Loheyaiguina 'itebaegau topwaoli madoudi ma lona 'ana tohe'itao 'oidiya, ma 'igu 'amasa weyahina siloina, <sup>19</sup> ma muliyetega si'ebwayegau taudi geya meYudiya 'oidiya, ma silotuyanegau, ma balaegega sisapigau, ma kelose 'oina situtu hepatugau, ma sabwelo hetoina 'oina Yehoba 'i'abihe toholo hilegau.”

*Yemesa ma Yoni sinadiu 'ina 'ahwanoi Yesu 'oina  
(Maki 10:13-45)*

<sup>20</sup> Muliyetega Sebedi mwanena manatunao sinaoma ta sinadiuina Yesu 'oina 'i'etuluha ma 'i'ahwanoiya 'oina. <sup>21</sup> Ta Yesu 'igwaeya, “To'aha nuwanuwau?” Ma wahineina 'igwaeya, “Nuwanuwagu ma natugwao 'oidiya 'utagwala ma 'eguma tutaina 'uhetoloina, sawasawahina ma deiwa simiyatoi sabi lona, 'aigeda 'ino 'ebeulega ma 'aigeda 'ino 'adigegeyega.”

<sup>22</sup> Coinega Yesu loheloheyaedi 'ihewaediya, “Comi 'imi 'ahwanoi bewa 'ana nuwasabwalena geya wasanasanapu. Muya biyoina 'oinega yanuma, togidega, sawasawahina 'omi wete 'oinega wanuma?” Ma sigwae, “Sawasawahima.”

<sup>23</sup> Ma Yesu 'igwaeya, “Moisa, biyoina 'oinega yanuma 'omi wete 'abwa wanuma, ma hesi geya sawasawahigu ma yahesinuwa taiyawedi 'abwa 'igu hetoloina 'oina 'igu 'ebeulega ma 'igu 'adigegeyega simiyatoi sabi lona, weyahina Tamagu 'iboimo 'abwa 'ihesinuwa.”

<sup>24</sup> Ma tomuliyao site teniyedi Yemesa ma Yoni 'idi 'ahwanoi sihesagoheya, ma sigamwasowalediya. <sup>25</sup> Coinega Yesu mabwaiyadi 'ibwau he'autediya, ma 'ihewaediya, “Comi wasanapuya 'abehega babadao bale'uwa 'idi loheloheyao siloiloina pa'aledi, <sup>26</sup> ma 'omi sahena wete gide taudi wapaihowa 'ese. Ma 'eguma taiya 'owa nuwanuwau ma 'oimiyega 'uhetoloina, 'ilobwainegowa ma 'iyamwao weyahidi 'uhetopaihowa.

<sup>27</sup> “Ma wete 'eguma taiya 'owa nuwanuwau ma 'oimiyega 'uhetohanugeta 'ilobwainegowa ma 'iyamwao weyahidi 'uhetopaihowa. <sup>28</sup> Wete gide taugu Loheyaiguina yasuluma bale'uwa, geya 'abehega tomota weyahigu sipaihowa, ma hesi sabi paihowa tomota weyahidi, ma wete yatagwalegauwa ma ya'amasa tomota mabwaiyami 'ami lihasa weyahina.”

*Tomatagibu 'eluwa Yesu 'i'abihe bwebwe'enediya  
(Maki 10:46-52; Luke 18:35-43)*

<sup>29</sup> Coinega Yeliko si'ebesineya ma boda madouna Yesu simuliyeya. <sup>30</sup> Ma loheya tomata gibugibu 'eluwa 'eda papalina simiyatoiya, Yesu 'ina sakowasi wasana sihesagoheya, 'oinega Yesu 'oina sibwauwa, “Debida tubuna yo, 'u'atemuyemuyemai.”

<sup>31</sup> Ta boda siteluwaedi 'enadi sihesagoheya, ma si'etobodediya, sigwae, “Walolagu! Tuwa bwau.” Ma 'oinega siteluwaedi sibwauwau 'ohe'ohe, sigwae, “Bada, Debida tubuna yo, 'u'atemuyemuyemai.”

<sup>32</sup> Coinega Yesu 'itoholowa ta 'ibwauwedima ta 'igwaeya, “To'aha nuwanuwami ma weyahimi yapaihowa?”



<sup>33</sup> Ma sigwaeya, “Bada, sawasawahina ma matama 'u'abihe bwebwe'enedi?”

<sup>34</sup> Ma Yesu 'i'atemuyemuyediya, ma matadi 'i'abitohodiya, ma sibwebwe'ana, ma 'oinega Yesu wete simuliyeya.

## 21

*Yesu 'ina luhu Yelusalema 'oina*  
(Maki 11:1-11; Luke 19:28-38; Yoni 12:12-19)

<sup>1</sup> Ma sihanehane Yelusalema weyahina, ta Bedipegi deina silatulatu, beno 'oya Olibe gabulena, ma Yelusalema matadiyega tupwana bwaga. Coinega Yesu 'ana tomuliyao 'eluwa 'ihesumane nugetediya, <sup>2</sup> 'igwaeya, “Watauya 'asa nage matamiya, ma hebai 'ase waloba, 'aiwe 'oina silohoya, ma natuna loheyana mahetena simiyamiya. Walihasidi, ma wa'ewedima 'oiguwa. <sup>3</sup> Ceguma taiya 'ihesilalegomi 'imi paihowaina weyahina, wagwae, ‘Bada nuwanuwana,’ ma 'oinega 'itagwale 'oimiya.”

<sup>4</sup> Ginaula bewa 'ilatuwa weyahina mwalo palopita 'ihepwaila nugeteya, 'igwaeya, <sup>5</sup> “Saiyoni\* tomotainao wahegwaedi wagwae, ‘Wa'ita 'imi tolaina madouna 'inaonaoma 'oimiya. Tauna tonuwadobi moisa, ta 'ase 'igeluya, ta 'aseina meloheyana ma yauyaubona.’ ”

<sup>6</sup> Coinega Yesu 'ina gwaeina 'ana tomuliyawedi sihematamataneya ma sitauya, <sup>7</sup> ta 'ase manatuna silobediya ta si'ewedima, ta 'adi 'wama 'ase guidiya siloyesoya, ma Yesu 'igeluhaneya. <sup>8</sup> Ma boda mabwaiyadi wete 'adi 'wama 'edai siyesodiya, ma tupwadi 'aiwe lahanao manabaidi sitalagasidiya, silagudi 'eda 'ana pasa weyahina. <sup>9</sup> Ma tupwana boda Yesu sinugeteya, ma tupwana boda simulimuliyaya, ta mabwaiyadi sino'ono'o ma sihehpwatu, sigwae, “Yauwedo Debida tubuna yo. Bada saninega 'unaoma sabi 'abihetamai, 'oinega tauna Tomiyahane hedade 'ahehpwatuwe.”

<sup>10</sup> Coinega Yelusalema 'oina siluhuwa, ma tomota mabwaiyadi si'ateyoho moisa, ma sigwaeya, “Taiya hede nage?” <sup>11</sup> Ma 'ana 'wayabuwao tomotaedi 'idi gwae sihemaiseya, sigwae, “Bewa palopita, gwama Nasaleta, sanina Yesu, Galili 'ina 'ebeloina 'oinega 'inaoma.”

*Hada He'asisi Yesu 'i'abihe'ehauya*  
(Maki 11:15-19; Luke 19:45-48; Yoni 2:13-22)

<sup>12</sup> Coinega Yesu Yehoba 'ina Hada He'asisi 'oina 'iluhuwa ta togimwaneyao ma tohegimwaneyao mabwaiyadi 'ipa'i latuwediya, ma mane 'ana tohesa'ugelasao 'idi teibele 'i'ahubuinediya, ma gabubu 'adi tohegimwaneyao 'idi 'ebemiya wete 'i'ahubuinediya, <sup>13</sup> ma 'ihewgaediya, 'igwae, “Buki He'asisi 'oina Yehoba 'ina gwae sileleya, 'igwae, ‘Cigu Hada nata sanina sibwauwe hada 'ebe 'ahwanoi,’ ma 'omi wabui lohihiliya ma 'abehega 'imi 'ebe yagaha.”

<sup>14</sup> Coinega tomata gibugibu ma toha'au'au Yesu 'oina sinaoma Hada He'asisi 'alona ta mabwaiyadi 'i'abihe bwebwe'enediya. <sup>15</sup> Ma topwaoli madoudi ma lolina 'ana tohe'itao Yesu 'ina paihowa waiwaidi si'itediya, ma wete gwagwama sihesagohediya Hada He'asisi 'alona sino'ono'o, sigwae, “Debida Tubuna yo, 'u'abihetamai.”

<sup>16</sup> Coinega babadaowedi Yesu sigamwasowaleya ta sigwaeya, “Gwagwamaedi bewa 'idi gwae 'uhesagoheya?” Ma Yesu 'igwae, “Cehe, yahesagoheya. Ma togidega Buki He'asisi 'oina wahasihasili, 'igwaeya, ‘Gwagwama 'i'iudi 'ahwadiyega 'a hep watu moisa 'uloba.’ ”

<sup>17</sup> Coinega Yesu 'i'ebesinediya, ta Yelusalemega 'ilatuwa, ta Bedani 'oina 'iluhuwa, ta nobwa 'i'enowa.

*Yesu 'aigeda 'aiwe 'iheliyeya*  
(Maki 11:12-14, 20-24)

<sup>18</sup> Gona 'i'adaleya, ma Yesu 'itoholowa, ta 'ilohihila Yelusalema, magomalena. <sup>19</sup> Ma 'edai 'aiwe 'ana 'ita gide tuwa damaya 'i'ita lobeya, ma 'inaowa deina, ta geya 'aigeda huwaina 'i'ita loba, weyahina nabainamo. Coinega Yesu 'aiweina 'iheliyeya, 'igwaeya, “Cabwa sahena wete 'uhuwahuwa hila.” Ma 'aiweina 'iwelaiya mwayamwayauwa.

<sup>20</sup> Ma Yesu 'ana tomuliyao si'iteya, ta nuwadi 'ihenainaida, ma sigwaeya, “Togidega ta 'oinega 'aiweina 'iwelai mwayamwayauwa?”

<sup>21</sup> Ma Yesu 'ihewgaedi, “Yagwae moisa 'oimiya, 'eguma ma'imi hemisa, ma geya ma'imi henuwanaluwa, ginaula bewa 'aiwe 'oina yapaihoweya 'omi wete gide wapaihowa 'ese, ma 'eguma 'oya nage waloine ma wagwae, ‘Cumiya dobi holai,’ nata 'ipaihowa gide. <sup>22</sup> Ma 'eguma ma'imi hemisa Yehoba 'oina wa'ahwanoi 'abwa waloba.”

*Yesu 'ana loina weyahina*  
(Maki 11:27-33; Luke 20:1-8)

<sup>23</sup> Coinega Hada He'asisi 'oina 'iluhu ta 'ihe'ithe'ita, ma topwaoli madoudi ma babadao sinaoma ma Yesu sihesilaleya, sigwaeya, “Loheya, taiya 'ina loinega ta bewa gide 'upaipaihowa 'ese?”

<sup>24</sup> Ma Yesu 'ihewgaediya, 'igwae, “Nugeta yahesilala 'oimiya, ma 'eguma wahemaise, taugu wete yahegwaegomi 'agu loina weyahina. <sup>25</sup> Cigu hesilala bewa: Taiya 'ina loinega ta Yoni to'abihehabitaiso 'ipaipaihowa? Yehoba, bo 'aigeda tomota?” Coinega si-boidimo 'oidiya sihehe'ohe'ohe, sigwae, “Cina gwae togidega tahemaisa 'ese? Weyahina 'eguma tagwae ‘Yehoba 'oinega’, nata 'ihewgae hilegita ma 'igwae, ‘Ma! To'aha hede weyahina ta Yoni geya wahemise?” <sup>26</sup> Ma 'eguma tagwae ‘Tomota 'oinega’, nata boda sigamwasowalegita weyahina mabwaiyadi Yoni si'ahwa palopitaeya.” <sup>27</sup> Coinega Yesu 'ina hesilala geya sihemaise bwaibwaini, ma hesi sigwaeya “Geya 'asanapu.” Ma Yesu wete 'oidiya 'igwae, “Taugu sahena wete yahepwaila 'oimiya taiya 'ina loinega ma bewa gide yapaipaihowa.”

*Loheya natuna 'eluwa*

<sup>28</sup> Yesu wete topwaoliyedi ma babadaedi 'ihewgaediya, “Togidega 'eguma loheya natunao meloheyadi 'eluwa tamadiu tautuwa 'oina 'igwae, 'Natugu, nata 'utauya tanoha 'upaihowa,’ <sup>29</sup> ta 'ilogwahata, ma muliyetega 'inuwabuiya ta 'itauya 'ipaihowa. <sup>30</sup> Loheyaina natuna 'alomauna gide wete 'ihewgaeya, 'igwae, ‘Natugu nata 'utauya tanoha 'upaihowa,’ ta natunaina 'igwaeya 'Cehe, 'ausala, nata yatauya’, ma hesi geya 'itauya. <sup>31</sup> Coinega siteluwaedi 'oidiyega taiya tamana 'ina gwae 'ihematamataneya?”

Ma sigwae, “Tautuwa.”

Coinega Yesu 'ihewgaediya, 'igwae, “Cehe, moisa tuwa, togala taudi takesi 'ana to'ewao ma toganawalao wete gide siluhu nugeta Yehoba 'ina 'ebeloina 'oina, ma 'omi mulidiyega.

<sup>32</sup> “Weyahina mwalo Yoni 'eda dumwaluna 'ihe'itegomiya ma 'omi geya wahemisa, ma hesi takesi 'ana to'ewao ma toganawalao sihemiseya. Ma matamiyega wete wa'iteya sinuwabuiya, ma 'omi hesi geya wanuwabui bo nuwana wahemise, 'awa?”

*Gwae hegehegedi tanoha 'ana to'itayahinao weyahidi*  
(Maki 12:1-12; Luke 20:9-19)

<sup>33</sup> Ma Yesu wete 'ihewgaediya, 'igwae, “Caigeda gwae hegehegedi wete wahesagohe tobegula weyahina. Tobegulaina gileipa daisinamo 'ibeguliya 'ina tanoha ma 'abwalu 'ipaihoweya ma gileipa 'ana 'ebibibi wete 'ipaihoweya, ma hada tanohina 'alona 'i'abiya, 'oinega 'ina topaihowao 'ihewgaediya si'ita'itayahi, ma tauna 'itauya hali tupwa.

<sup>34</sup> “Ma hedodona 'ana tuta, badaina 'ina 'ali'eyao tupwadi 'ihesumana hilediya 'ina tanoha gileipa huwaina sabi 'ewadi tanoha 'ana to'itayahinao 'oidiyega. <sup>35</sup> Ta tutaina sitauya tobegulaedi 'ali'eyaowedi si'abiyahidiya, ta 'aigeda sisapiya, ma heluwena silohe'amasiya, ma hetoina dimwega si'ahu bwalebweleya.

<sup>36</sup> “Muliyetega tobegulaina tupwana wete 'ina 'ali'eyao tupwana baibaiwana 'ihesumanediya, ma taudi wete gide sipaihowa 'esediya.

<sup>37</sup> “Ma 'ebelosaloha 'oina natuna loheyana 'ihesumaneya 'oidiya, ma 'igwaeya, ‘Tauna hede natugu, ma 'oinega sihe'asisiye.’

<sup>38</sup> “Ma natunaina 'latuwa 'oidiya ta to'itayahinaowedi siboidimo 'oidiya sigwae, 'Ciyagwao, loheya bewa 'inaonaoma, tauna badaina natuna 'aigeda tuwamo, 'oinega nata bewa talohe'amasi, ma tauda tanoha taloina.’

<sup>39</sup> “Coinega si'abiyahiya, ta tanohega siule latuweya mulimuliya, ma silohe'amasiya.

<sup>40</sup> “Coinega 'eguma tutaina tonitanoha 'ihilama, to'aha 'ina to'itayahinedi 'oidiya 'ipaihowa?”

<sup>41</sup> Ma 'igwaeya, “Tolohe'amasiyedi 'abwa 'i'abihegaladi moisa, ma tanoha 'itagwale to'itayahinao 'ausaladi 'oidiya, ma taudi tanoha huwaina si'ebwae tonitanohina 'oina.”

<sup>42</sup> Coinega Yesu wete gwae hegehegediyega Buki He'asisi 'oinega 'ihepwaileya, 'igwae, “Nuwana Buki He'asisi 'ina hepwaileya geya wanuwatuhuyahi, beno 'igwaeya, ‘Logidiina mwalo tohada'abi silogwahateya, ma tuta bewa sihetoholo pwaiya ma sihelogidi nugeteya, ma logidi mabwaiyadi 'iloinaedi. Beno Bada 'ina paihowa 'ebe henainaida 'oida.’

<sup>43</sup> “Coinega yahegwaegomi 'abehega Yehoba 'ina loina 'oimiyega 'i'ewayahule, ma 'i'ebwaya hali boda 'oidiya, ma taudi 'oidiyega huwaina 'ausalana 'ilatu. <sup>44</sup> Ceguma taiya 'ibe'u logidi nage 'oina nata luluna 'ilasadi, ma 'eguma logidiina 'aigeda taiya 'oina 'ibe'u nata wahina 'i'ahu hepwaliliyamo.”

<sup>45</sup> Yesu 'ina gwae hegehegedi bewa topwaoli madoudi ma Palisiyao sihesagoheya ma sisanapuya 'abehega taudi weyahidi 'igwaegwae hegehegedi. <sup>46</sup> Coinega 'idi nuwatuhu si'ebe'ebese ma 'abehega Yesu si'abiyahi, ma hesi geya sawasawahina ma si'abiyahi, weyahina boda simatautediya, weyahina bodaedi Yesu si'ahwa palopitaeya.

## 22

### *Gwae hegehegedi hai 'e'ahaina weyahina (Luke 14:15-24)*

<sup>1</sup> Caigeda wete gwae hegehegedi Yesu 'i'ebwaediya, 'igwae, <sup>2</sup> “Yehoba 'ina loina gide kini 'aigeda 'ai 'ipaihoweya natuna meloheyana 'ina hai weyahina. <sup>3</sup> Coinega 'ina topaihowao 'ihesumanediya ma taiyawedi taudi 'ihenuwa laguwediyaya sitoedima 'ai 'oina, ta sitauya sabi toedima, ma hesi tomotaiyedi kini 'ina bwau silogwahateya.

<sup>4</sup> “Coinega tupwana wete 'ina topaihowao 'ihesumanediya ma taudi 'ihenuwa laguwediyaya sihegwaediya wete 'abehega, 'Bada 'ina 'ai 'igibubu pwaiya. Cina bulumakau madoudi ma 'ina bulumakau yauyaubodi 'ihunu pwaidiya ma 'e'ahai mabwaiyana 'i'atububuya. Wanaoma ma tatauya natunaina 'ina hai 'e'ahaina wa'ai.’

<sup>5</sup> “Ta taudi geya sinaoma, ma hesi sipili 'waiha, ta hali tupwa ma hali tupwa 'oidiya sitauya. Caigeda loheya 'ina tanoha 'itauya, 'aigeda loheya 'ina paihowa 'oina 'itauya, <sup>6</sup> ma tupwadi wete bada 'ina topaihowao si'abiyahidiya, ma si'abihe mwadinediya, ta silohe'amasiyediya.

<sup>7</sup> “Coinega kiniina 'igamwasowala moisa, ta 'ina tolo'alehao 'ihesumanediya, ta tolohe'amasaedi simutudiya, ma 'idi 'asa sigabuya.

<sup>8</sup> “Ma kiniina 'ina topaihowao 'oidiya 'igwaeya, ‘Hai 'e'ahaina 'atu'atububuina, ma hesi taudi yahenuwa laguwediyaya geya sawasawahina ma sinaoma. <sup>9</sup> Coinega 'eda 'oidiya wasakowasi ma 'eguma taiyawedi walobediya watoedima ma hai 'e'ahaina si'ai.’

<sup>10</sup> “Coinega silatuwa 'edai ma tomota baibaiwadi sihe'atudedima, tupwadi togala ma tupwadi tobwebwe'adi, ma 'oinega hai 'ana hadaina silohemaheya.

<sup>11</sup> “Tutaina kini 'inaoma taumanao sabi 'itadi, ta loheya 'aigeda 'i'ita lobeya, tauna geya hai 'ana 'ale'o 'i'ote, <sup>12</sup> 'oinega 'ihesilaleya, 'igwaeya, ‘Ciyagu, togidega hai 'ale'oina geya 'u'ote, ma to'ehega 'uluhuma?” Ma loheyaina geya sawasawahina ma hesilala bewa 'ihemaise. <sup>13</sup> Coinega kiniina 'ina topaihowao 'ihewgaediya, ‘Loheya bewa wa'abiyahi, ma nimana ma 'aena wapaidi, ma waula latuwe tupwa guguyou 'oina, ma nage 'oina tomota sidou ma sihesala'i'ita muya 'oinega.’

<sup>14</sup> “Weyahina tomota mabwaiyadi Yehoba 'ina henuwalagu silobeya, ma hisahisadimo 'ihesinuwediyaya.”



*Takesi kini Sisa weyahina*  
(Maki 12:13-17; Luke 20:20-26)

<sup>15</sup> Ma Palisiyao siboidimo si'eto'autama, ta siloina togidega ma hesilalega si'abowe, ma Yesu 'ina pui siloba.

<sup>16</sup> Coinega loina silobeya, ma 'adi tomuliyao ma Helodi 'ina bodao ba'idadiyao sihesumanediya Yesu 'oina, ta sigwae, “Bada 'asanapu pwaigowa 'abehega 'owa tohe'ita moisa, ta Yehoba 'ina nuwatuhu 'uhe'itae moisa, ma wete tomota 'idi waiwai weyahina geya 'umatauta, ma tuwa gwae moisa 'uhehepwaile mahemahetena tomota mabwaiyadi 'oidiya. <sup>17</sup> Coinega bewa tuwa 'uhegwaemai, togidega sawasawahina ma kini Sisa weyahina takesi talagu, bo geya?”

<sup>18</sup> Ma Yesu 'idi nuwatuhu galana 'isanapuya, 'oinega 'igwae, “Comi to'abo! To'aha weyahina watohotohogau? <sup>19</sup> Ma hana maneina takesi weyahina wahe'itegau.” Coinega mane 'aigeda si'ebwaeya, <sup>20</sup> ta Yesu 'ihagwaediya, 'igwae, “Wahagwaegau, mane bewa 'oina taiya ma'ama'ayauna ma sanina?”

<sup>21</sup> Ma sigwaeya, “Kini Sisa.”

Coinega Yesu 'ihagwaediya, “Cehe, gide. Coinega 'eguma kini 'ina ginaula wa'ebwae kini 'oina, ma 'eguma Yehoba 'ina ginaula Yehoba 'oina wa'ebwae.”

<sup>22</sup> Yesu 'ina gwae sanasanapuna hedade sihesagoheya, ta geya 'idi 'ebe gwaemo, 'oinega si'ebesineya ma sihawasiya.

*To'amasa 'idi toholo hila*  
(Maki 12:18-27; Luke 20:27-40)

<sup>23</sup> Nage sabweloina 'oina tupwana Sadusiyao, taudi geya sihemisa to'amasa 'idi toholo hila weyahina, sinaoma ta Yesu 'oina sihesilala, <sup>24</sup> sigwaeya, “Bada, Mosese 'ina loina 'igwaeya, 'Ceguma loheya mamwanena ma geya natudimo ma loheyaina 'i'amasa, loheyaina tasina hiwapeina ba'idana sihai, ma 'oinega 'eguma wahine 'ihenatuna natunao to'amasaina hesuwahenao.’

<sup>25</sup> “Caigeda loheya matasinao sikisi ba'idamao 'amiyamiya, ta loheyaina 'ihaiya ma 'i'amasa, ma geya natunamo, ma to'amasaina tasina deinega hiwapeina ba'idana sihaiya, <sup>26</sup> ma tasinaina wete 'i'amasa, ma tauna wete geya natunamo. Ma gide tuwa tasinao mabwaiyadi hiwapeina sihaihai, <sup>27</sup> ma mulidiyega wahine wete 'i'amasa. <sup>28</sup> Coinega toholo hila 'ana sauga wahineina to loheya nata mwanena moisa? Weyahina mabwaiyadi sihai pwaiya.”

<sup>29</sup> Ma Yesu hesilala bewa 'ihemaiseya, 'igwae, “Bewa 'imi pui, weyahina Buki He'asisi geya wasanapu, ma wete Yehoba 'ina waiwai geya wasanapu.

<sup>30</sup> “Toholo hila 'ana sauga tomota sahena sihaihai ma hesi 'idi miya gide aneloseyao galewa. <sup>31</sup> Ma Yehoba 'ina gwae 'oimiya toholo hila weyahina Buki He'asisi 'oina 'igwaeya,

<sup>32</sup> ‘Taugu Ebalahamo 'ina Yehoba, ma Aisake 'ina Yehoba, ma Yakobo 'ina Yehoba.’ Yehoba geya tomota 'ama'amasidi 'idi Yehoba, ma hesi tomota mayawasidi 'idi Yehoba, 'oinega babadaedi mayawasidi bewa tuwa simiyamiya.”

<sup>33</sup> Yesu 'ina gwae bewa boda sihesagoheya ma'idi yaliyaya 'ina he'ita waiwaina weyahina.

*Loina madouna*  
(Maki 12:28-34; Luke 10:25-28)

<sup>34</sup> Eeta Palisiyao sihesagoha pwaiya 'abehega Yesu Sadusiyao 'idi hesilala 'ihemaiseya ta geya 'aigeda wete 'idi 'ebe gwaemo, 'oinega Palisiyaowedi Yesu 'oina sinaoma, <sup>35</sup> ta 'oidiyega 'aigeda loina 'ana tosanapu Yesu 'oina 'ihesilala sabi tohoina, 'igwae, <sup>36</sup> “Tohe'ita, loina mabwaiyana 'oidiyega to loina madouna?”

<sup>37</sup> Ma Yesu 'igwaeya, “‘Cino Bada Yehoba 'uhelauwe 'ateu ma yaluyaluwau ma 'ino nuwatuhu mabwaiyadi 'oidiyega.’ <sup>38</sup> Bewa loina nugenugeta ma madouna. <sup>39</sup> Ma 'aigeda wete loina madouna gide bewa 'igwaeya, 'Ciyamwao 'uhelauwedi, gide 'uboi 'uhelau hilego.’

<sup>40</sup> “Loina 'eluwaedi, loina mabwaiyana ma palopitao 'idi gwae mabwaiyadi huhudi.”

*To'abihetena tauna Debida 'ina susu  
(Maki 12:35-37; Luke 20:41-44)*

<sup>41</sup> Tutaina Palisiyao si'eto'autama ta Yesu 'ihewgaediya, <sup>42</sup> 'igwae, “Togidega To'abihetenaina Keliso, taiya 'ina susuwega 'ilatuma?” Ma sigwaeya, “Debida.”

<sup>43</sup> Coinega Yesu 'igwaeya, “Togidega ta 'oinega mwalo Yaluyaluwa Tabuna Debida 'i'abihe sanapuya ma Debida To'abihetenaina 'i'ahwa badaeya, 'igwae,

<sup>44</sup> ‘Yehoba 'ina gwae 'igu bada 'oina, 'igwaeya: Cigu 'ebeulega 'umiyatoi ma 'ana siga 'a 'alehao yalagu dobihedi 'aheu gabulena.’

<sup>45</sup> “Ceguma Debida 'ina bada To'abihetenaina, togidega hede ta Debida 'ina susuwega muliyetega To'abihetena 'ilatuma?”

<sup>46</sup> Yesu 'ina hesilala bewa geya 'aigeda wete taiya sawasawahina ma 'ihemaise, ta tuta muliyetega Yesu simatauteya, 'oinega geya 'aigeda taiya 'itoho ma 'ihesilala hila Yesu 'oina.

## 23

*Loina 'ana tohe'itao ma Palisiyao Yesu 'iheliyediya  
(Maki 12:38-40; Luke 11:37-52; 20:45-47)*

<sup>1</sup> Ta Yesu boda ma 'ana tomuliyao 'oidiya 'igwaeya, 'igwae, <sup>2</sup> “Mwalo hene meIsileli Mosese 'iloiloinaedi, ta nige loina 'ana tohe'itao ma Palisiyao gide siloiloina 'esegomi. <sup>3</sup> Coinega to'aha gide sihe'itegomiya wamuliyedi, ma hesi 'idi paihowao sahena wah'e'au'aunaowedi, weyahina taudi sihehe'itamo, ma geya 'idi he'itaedi sipaihowadi.

<sup>4</sup> “Taudi 'aha'ahala mwaudi tomota si'ebwa'ebwaedi, ma hesi taudi geya sitagwala ma 'aha'ahalaedi 'oidiyega si'abihetedi.

<sup>5</sup> “Cidi paihowao mabwaiyana sipaipaihowadi ma 'abehega tomota si'itadi ma sihep-watuwedi, beno gwaeyao Buki He'asisi 'oinega leleleledi manidiya ma nimadiya si'abihe pa'inediya, ta 'adi 'ale'owao duduledi sisohasohadi, <sup>6</sup> ta guyai 'adi tuta nuwanuwadi ma wagahata simiyatoi, ma wete hada tapwalolo 'oidiya 'ebemiya 'ausaladi nuwanuwadi, <sup>7</sup> ma 'eguma 'ebe maketi 'oina sitauya nuwanuwadi ma tomota baibaiwadi siloyauwedowedi nuwana si'ahwa tohe'itaedi. <sup>8</sup> Ma 'omi hesi sahena tomota si'ahwa'ahwa tohe'itegomi, weyahina 'imi tohe'ita 'aigeda tuwamo, ma mabwaiyami wahemahemahetena.

<sup>9</sup> “Wete sahena 'aigeda taiya bale'uwa wa'ahwa'ahwa tamanae, weyahina tamamiu 'aigeda tuwamo galewa 'imiyamiya.

<sup>10</sup> “Sahena wete tomota si'ahwa'ahwa badaegomi, weyahina Keliso tauna 'iboinamo 'imi bada. <sup>11</sup> Ma 'eguma taiya 'oimiyega nuwanuwana 'ihetohanugeta 'ida he'ali'e 'oimiya, <sup>12</sup> ma 'eguma taiya 'oimiyega 'inuwahane nata 'isulu, ma 'eguma taiya 'inuwadobi nata 'ihane.

<sup>13</sup> “Ma hesi 'omi loina 'ana tohe'itao ma Palisiyao 'atemuyamuyaimi, weyahina 'imi 'abowega tomota wa'ausidiya ma 'oinega Yehoba 'ina 'ebeloina 'oina sahena siluhulu. Comi geya'abwa waluhulu, ma tomota wete taiyawedi nuwanuwadi ma siluhu wanuwahidiya. <sup>14</sup> (-)

<sup>15</sup> “Comi loina 'ana tohe'itao ma Palisiyao 'atemuyamuyaimi, weyahina 'aigeda wete bewa 'imi pui. Tuta baibaiwana wa'ada'adau sakowasi 'asa baibaiwadi 'oidiya ma 'abehega 'ami tomuliya 'aigeda waloba, ma muliyetega tomotaina wah'e'ita ma gide 'omi wapaipaihowa Tomudulele 'oina, tauna gide 'ipaihowa hedada.

<sup>16</sup> “Hesi 'atemuyamuyaimi, weyahina 'omi tohanugetao mata gibugibumi, wagwae, ‘Ceguma taiya Hada He'asisi saninega 'i'eta'wata'walulu beno geya 'aigeda to'aha, ma hesi 'eguma taiya goulaedi Hada He'asisi 'alona 'oidiyega 'i'eta'ota'olulu beno ginaula madouna, 'oinega 'ilobwaineya ma ginaulaina 'ipaihowa.’ <sup>17</sup> Moisa, 'omi yauyauleimi ma mata gibugibumi! To'aha madouna? Hada He'asisi 'ana goula? bo Hada He'asisi tauna 'oinega goula 'ihe'asisiyeya?

<sup>18</sup> “Ma wete wagwae 'abehega 'eguma taiya 'ebe pwaoli saninega 'i'eta'olulu, beno geya 'aigeda to'aha, ma hesi 'eguma 'i'eta'walulu pwaoliina 'ebe pwaoli 'oina, beno ginaula madouna, 'oinega to'aha 'igwae hemiseya, sawasawahina ma 'ipaihowa.’

<sup>19</sup> “Comi yauyauleimi! To'aha madouna? Pwaoliina, bo 'ebe pwaoli tauna 'oinega pwaoliina 'i'abihe 'asisiyeya?

<sup>20</sup> “Coinega 'eguma taiya 'ebe pwaoli saninega 'i'eta'walulu, tauna wete ginaula mabwaiyana 'ebe pwaoli 'oina 'oidiyega 'i'eta'wata'walulu. <sup>21</sup> Ma wete 'eguma taiya Hada He'asisi saninega 'i'eta'wata'walulu, tauna wete Hada He'asisi 'ana tomiya saninega 'i'eta'wata'walulu. <sup>22</sup> Ma 'eguma taiya galewa saninega 'i'eta'walulu, tauna Yehoba ma wete 'ina 'ebemiya saninega 'i'eta'wata'walulu.

<sup>23</sup> “Comi loina 'ana tohe'itao ma Palisiyao 'atemuyamuyaimi hesi, weyahina to'abo 'omi. Moisa 'imi helauwedi 'ausala weyahina 'imi helauwedi 'imi ginaula mabwaiyadi 'oidiyega, tobwatobwa madoudi ma wete ginaula 'i'iudi, gide hali pam ma hali pam 'oidiyega, ma hesi loina 'etoi madoudi wanuwanaidediya, beno mumuga dumwaluna ma 'atemuyamuya ma hemisa. Sotasowana ma ginaula bewa madoudi wapaihowadi, ma wete sahena ginaula 'i'iudi wanuwanuwa naidedi. <sup>24</sup> Ma 'omi tohanugetao mata gibugibuimi, 'ami 'wayahi 'oinega sohusohu wa'ewa yahuledi ma hesi hebai madouna, kameli gide watonetoni.

<sup>25</sup> “Comi loina 'ana tohe'itao ma Palisiyao 'atemuyamuyaimi hesi, weyahina 'imi 'abowega biyo ma gaeba 'atamanega wabuyodiya, ma 'alodiya bi'ibi'idi, beno yagaha ma mumuga galadi simaha. <sup>26</sup> Comi Palisiyao mata gibugibuimi, 'imi biyo ta 'imi gaeba 'alodi wa'abi he'ehau nugetedi, ma 'oinega wete 'atamanega wa'abi he'ehaudi.

<sup>27</sup> “Comi loina 'ana tohe'itao ma Palisiyao 'atemuyamuyaimi weyahina 'omi to'abo, gide tuwa galiha wa'ewa'e'edi ma 'ausaladi, tabwana 'adi 'ita 'ausala hedade, ma hesi 'alodiya tomota hilihiliyadi ma ginaula bi'ibi'idi simiyamiya. <sup>28</sup> Comi 'ami 'ita tomota matadiya 'abehega tohanugetao 'ausalami, ma 'alomiya 'abo ma gala baibaiwana simiyamiya.

<sup>29</sup> “Comi loina 'ana tohe'itao ma Palisiyao 'atemuyamuyaimi ta to'abowao, weyahina palopitao nugenugetai 'adi galiha 'oidiya 'adi 'ebe nuwatuhuyahina wa'abidiya, ma wete tobwebwe'ana mwalo hene 'adi 'ebe nuwatuhuyahinao wa'atububudiya, <sup>30</sup> ma wagwae, ‘Ceguma mwalo hene tamiyamiya tubudao 'idi tuta, sahena tubudaowedi talelemeledi palopitao 'adi lohe'amasas weyahina.’ <sup>31</sup> Cimi gwae bewa 'oinega wahep-waila pwaiya 'abehega palopitao 'adi tolohe'amasao tubudiyao 'omi. <sup>32</sup> Coinega taudi 'idi paihowaedi 'abwa walosalohidi.

<sup>33</sup> “Comi mwata natunao, ta geya sawasawahina ma 'asa 'ala'alatana\* 'oinega wadena. <sup>34</sup> Coinega palopitao ma tosanapuwo ma loina 'ana tohe'itao yahesumanediwa ma nata tupwadi walohe'amasidi, nuwana kelose 'oina watutu hepa'inedi, ma tupwadi 'imi hada tapwalolo 'oidiya balaeyega wahunudi, ma 'asa 'aigeda 'aigeda 'oidiyega wapa'idi.

<sup>35</sup> “Ma 'ana 'ebelosaloha 'oina tobwebwe'ana 'adi lohe'amasas 'ana maisa mabwaiyana 'omi waloba. Loheya nugenugetai Ebeli tauna tobwebwe'ana silohe'amasasiya, eeta silohe'amasas 'ana siga Balakaya natuna Sakaliya wete silohe'amasasiya Hada He'asisi ma 'ebe pwaoli gamwagamwanidiya. <sup>36</sup> Moisa, lohe'amasasidi mabwaiyadi 'adi maisa nata 'omi mehau bewa waloba.

*Yesu 'idouwa Yelusalema weyahina  
(Luke 13:34-35)*

<sup>37</sup> “Yelusalema yo! Togidega ta palopitao 'ulohe'amasidiya ma wete Yehoba 'ina tohalewasao galewega 'uloda'ulediya. Tuta baibaiwana nuwanuwagu ma 'ino tomo-taiyao yabwau he'autedima gide 'am'am natunao pepenega 'i'ahusamudiya, ma tuwa silogwahategauwa. <sup>38</sup> Coinega Yehoba nata 'i'ebesinego ma ma'ino pui tuwa 'umiyamiya. <sup>39</sup> Ta yahegwae 'abehega sahena wete 'u'ita'ita hilegau ma 'ana siga 'ino tomotaiyao sitagwala 'oiguwa ma sigwae, ‘Tahepwatuwe tauna Yehoba saninega 'inaoma.’ ”

## 24

*Tuta mwauna 'abwa 'ilatuma*  
(Maki 13:1-13; Luke 21:5-19)

<sup>1</sup> Coinega Yesu Hada He'asisi saugaina ma 'i'ebesine ma 'ana tomuliyao sinaoma ta Hada He'asisi 'ana hadao Yesu 'oina sihe'iteya.

<sup>2</sup> Ma Yesu 'igwaeya, “Hadaedi mabwaiyadi wa'ebubudi, yagwae bwaibwaina 'abwa mabwaiyadi sile'wa yahuledi ma sahena wete tupwa 'i'iuna wa'ita'ita hila.”

<sup>3</sup> Muliyetega 'itauya Olibe 'oyana 'oina ta 'imiyatoiya, ma 'ana tomuliyao 'oina sinaoma ta siboidimo simiyamiya ma 'oinega sihesilaleya, sigwaeya, “Bada, 'uhegwaemai to tuta 'oina Hada He'asisi sile'wa, ma 'ino tuta hilama, ma tuta 'ana 'ebelosaloha weyahina 'adi 'ila'ilala 'uhe'itemai ma 'asanapu.”

<sup>4</sup> Coinega Yesu 'ihewaediya, 'igwae, “Wa'itayahigemi 'amuge ma tomota tupwadi si'abowegomi. <sup>5</sup> Weyahina 'abwa baibaiwadi saniguwega sihepwaila ma 'abehega sihanugete puigomi ma 'aigeda 'aigeda 'igwae, 'Taugu To'abiheteina,' ma tomota baibaiwadi simuliyedi. <sup>6</sup> Wete wasa 'abwa wahesagohedi 'alehao deimiya ma bwaga weyahidi, ma sahena wa'ate'ateyoho. Weyahina ginaula bewa silatu nugeta ma hesi bale'u 'ana 'ebelosaloha 'abwa. <sup>7</sup> Weyahina 'abwa hali boda ma hali boda 'oidiya silo'aleha, ma wete hali 'ebeloina ma hali 'ebeloina 'oidiyega silo'aleha, ma gomale madouna ma mwani'ini'i silatu tupwa mabwaiyadi 'oidiya. <sup>8</sup> Ma ginaulaedi tuta mwaudi 'adi 'ebehegaina tuwa.

<sup>9</sup> “Comi nata tomota si'abiyahigomi ma si'abihe muyemuyegomi nuwana silohe'a-masigomi, ma tupwa mabwaiyadi tomotainao silo'alehegomi weyahina 'abehega 'omi 'agu tohemisao, <sup>10</sup> ma mwauwedi weyahidi 'abwa tupwami wawe'a ma waboimo 'iyamiyao watebaedi, nuwana walo'alehedi. <sup>11</sup> Wete palopita 'abo'abowao silatuma ma tupwami sihanugete puigomi. <sup>12</sup> Ma wete mumuga galana 'ina madou 'oinega tomota tupwana baibaiwana 'idi helau 'atediyega 'iwe'a. <sup>13</sup> Ma 'eguma taiya 'ihe'alama'i'ita ma 'itoholo pa'ala ma 'ana siga tuta 'ana 'ebelosaloha 'oina, yaliyaya hataya 'iloba.

<sup>14</sup> “Ma Yehoba 'ina lolina tetelina 'i'edadana nugeta tupwa mabwaiyana 'oidiya, ma boda mabwaiyadi 'ana loguguya sihesagohe, ma muliyetega tuta 'ana 'ebelosaloha 'ilatu.

*Mwau madouna*  
(Maki 13:14-23; Luke 21:20-24)

<sup>15</sup> “Cabwa 'ila'ilalaina palopita Daniyela 'ihewaila nugetaeya 'ilatu, beno ginaula gala hedade ma didiga tupwa he'asisi 'oina 'itoholo. (Ceguma taiya gwae bewa 'ihasili 'inuwasabwalena.) <sup>16</sup> Tuta nage 'oina Yudiya 'ana tomiyanao sawasawahidi ma 'oya 'oidiya sidena. <sup>17</sup> Ma 'eguma taiya wagahata 'imiyamiya 'idena mwayamwayau, ma sahena 'iluhuluhi hila 'ina hada 'ina tobwatobwa sabi 'ewadi. <sup>18</sup> Ma 'eguma taiya tanoha 'ipaipaihowa sahena 'ihilahila 'ana 'ale'o hali tupwa 'ilaguya sabi 'ewa.

<sup>19</sup> “Ma tuta nage 'oina togamwagamwao ma tohesusuwao sihe'atemuyamuya. <sup>20</sup> Coinega wa'ahwanoi ma tuta 'ausalana Yehoba 'i'ebwaegomi 'imi tuta dena 'oina, ma sahena gogai 'ana tuta, bo nuwana Sabati 'oina.

<sup>21</sup> “Moisa, tuta nage mwau hedade, weyahina bale'u 'ana hemasalaha hohau 'oinega eeta 'ana siga tuta bewa, geya 'aigeda wete mwauina bewa gide, ma muliyetega mwau bewa sahena wete 'ilatulatu hilama. <sup>22</sup> Mwau nage 'ana sabwelowao 'eguma Yehoba sahena 'i'abi'abi heto'uto'upadi, nata tomota mabwaiyadi si'amasa, ma hesi Yehoba sabwelowedi 'i'abihe to'uto'upadi beno 'ina boda hehe'asaidi weyahidi.

<sup>23</sup> “Coinega 'eguma taiya 'ihewaegomi ma 'igwae, 'Keliso bewa,' nuwana 'Nage,' sahena wahehemisedi. <sup>24</sup> Weyahina Keliso 'abo'abodi ma palopita 'abo'abodi 'abwa silatu ma 'ila'ilala waiwaidi tomota matadiya sipaihowaidi, ma 'oidiyega 'eguma sawasawahidi Yehoba 'ina bodao hehe'asaidi wete sida 'abihe'wanidi. <sup>25</sup> Ma 'omi ginaula bewa weyahina yahepwaila nugeta pwaiya 'oimiya.

<sup>26</sup> “Coinega 'eguma sihegwaegomi, sigwae, ‘Keliso tupwa balabala 'awawa 'imiyamiya,’ sahena pwatula nage 'oina watautauya. Ma 'eguma sigwae, ‘Keliso hada 'alona 'imiyamiya,’ sahena wahehemisedi.

<sup>27</sup> “Taugu Loheyaiguina 'igu latu hilama 'ana 'ita gide tuwa namala madouna yalasiyega 'i'asilala ta 'ana siga bwauli.

<sup>28</sup> “Ta'eha 'oina 'wayoha 'imiyamiya beno 'oina 'ao'ao si'au'autama.

*Yesu 'ina hilama*

*(Maki 13:24-27; Luke 21:25-28)*

<sup>29</sup> “Ma tuta mwauina 'igumwala ma muliyetega sinala 'iguguyou, ma wete wai'ena 'ina 'asilala 'igibogibo, ma 'ipwalao galewega sigubala, ma ginaula baibaiwadi galewa simiyamiya 'idi waiwai siwe'a. <sup>30</sup> Tuta nage 'oina taugu Loheyaiguina 'igu 'ila'ilala galewega 'ilatuma, ma boda mabwaiyadi bale'uwa si'itegau yaloha pwatanega ma'igu waiwai ma ma'igu wasawasa madouna yalatulatuma, ma sidougwaegwae. <sup>31</sup> Ma wete yoguli simu'a ma 'igu aneloseyao yahesumanedi ma 'igu boda hesihesinuwaiti sihe'au'edima bale'u mabwaiyana ma yaumai mabwaiyana 'idi tupwa 'oidiyega.

*Cebe'ita saido 'oinega*

*(Maki 13:28-31; Luke 21:29-33)*

<sup>32</sup> “Cebe'ita saido 'oinega yahe'itegomi, beno 'eguma saido 'igalugalu wasanapuya losihe 'ana tuta deina. <sup>33</sup> Ma wete 'eguma 'ila'ilalaedi bewa wa'italoba pwaidiya wasanasanapu 'abehega 'igu tuta hilama deina 'ilatu pwaiya. <sup>34</sup> Moisa, yaso bewa nata geya wagumwala ma 'ana siga ginaulaedi mabwaiyadi silatu. <sup>35</sup> Cabwa galewa ma bale'u sisawala, ma 'igu gwaeyao geya'abwa tuwa sisawasawala.

*Tuta nage geya 'aigeda 'isanapu*

*(Maki 13:32-37; Luke 17:26-30, 34-36)*

<sup>36</sup> “Geya 'eta taiya 'isanapu to tuta, nuwana to sabwelo 'oina yahilama, ma wete aneloseyao galewa geya sisanapu. Taugu wete geya yasanapu. Tamagu 'iboinamo 'isanapuya. <sup>37</sup> Tuta nage, Nowa 'ina tuta gide. <sup>38</sup> Weyahina Nowa 'ina tuta tomota 'adi si'ai'ai ma 'adi we'aha sinumanuma ma sihehehai, ma wete sihaihai, ma 'ana siga Nowa 'ina waga 'igeluwa, <sup>39</sup> ma yagewa 'ilohe'ateyohodiya, ta 'oinega tomota mabwaiyadi sidamana, ma taugu Loheyaiguina 'igu hilama gide.

<sup>40</sup> “Tuta nage 'oina 'eguma loheya 'eluwa tanoha, 'aigeda yatoe ma 'aigeda 'imiyamiya. <sup>41</sup> Wete 'eguma wahiwahine siteluwa si'e'ehalo, 'aigeda yatoe ma 'aigeda 'imiyamiya.

<sup>42</sup> “Coinega wa'itayahi bwaibwaini, weyahina 'igu hilama 'ana tuta geya wasanapu. <sup>43</sup> Ma wanuwatuhuyahi 'eguma taiya hada toniwagana 'isanapuya ma to tuta nihuwana 'alona toyagaha 'iluhu 'ina hada, 'i'atububu bwaibwaini ma 'i'o'oyatola, ma sahena 'ina hada 'ibwalebwale. <sup>44</sup> Coinega 'omi wete wa'atububu bwaibwaini, ma 'igu tuta hila weyahina wayamwegau, weyahina taugu Loheyaiguina 'igu hilama 'ana tuta geya wasanapu.

*Topaihowao 'ausaladi ma galadi*

*(Luke 12:41-48)*

<sup>45</sup> “Topaihowa 'ausaladi ma sanasanapuidi 'idi mumuga bewa gide: Ceguma taiya tauna 'ina bada 'ihesinuweya ma hada 'i'itayahi ma topaihowao 'adi 'e'ahai 'i'ebwaedi sabwelo 'aigeda 'aigeda 'oidiya, <sup>46</sup> 'abwa 'eguma badaina 'ihilama ma 'ina topaihowaina 'iloba 'ipaipaihowa dumwalu, nata weyahina 'iyaliyaya ma 'oina 'igwae, <sup>47</sup> 'Cino paihowa 'ausaladi weyahina yayaliyaya, 'oinega ginaula mabwaiyadi 'adi lona ya'ebwaego ma 'uloina.'

<sup>48</sup> “Ma hesi 'eguma topaihowa 'imumuga galana ma 'iboinamo 'oina 'igwae, 'Cigu bada 'abwa 'iheheboi,' <sup>49</sup> ma 'ihiegaina ma 'iyanao 'isapi dadanedi ma 'i'ai hedahedade, nuwana 'inuma hedahedade toheyauyaule ba'idanao, <sup>50</sup> ma 'oinega 'ina bada 'eguma 'ilohe'ateyohoyama ma 'ina paihowa galana 'i'italobadi, <sup>51</sup> nata hadega 'ipa'i ma maisa galana 'i'ebwae to'abowao 'idi tupwa, nage 'oina sidou ma sihesala'i'ita, muya 'oinega”.



## 25

*Gwae hegehegedi wahiwahine nima luwaluwa*

<sup>1</sup> Ma Yesu 'ihewgaediya wete, 'igwae, “Yehoba 'ina lolina bewa gide: wahiwahine site teni 'idi mayale si'ewediya ma sitauya tohai meloheyana sabi helatuina 'ina hai guyaina weyahina. <sup>2</sup> Coidiyega site paibi yauyauleidi ma site paibi sanapudi. <sup>3</sup> Toheyauyauleyedi 'idi mayale geya 'ana we'aha 'ana lohepoi si'ewa, <sup>4</sup> ma hesi taudi tosanapuweri ma'idi we'aha 'ana lohepoi 'idi botolo 'oidiya si'ahalidiya 'idi mayaleyao ba'idanao.

<sup>5</sup> “Ma tohai meloheyana 'iheboiya, 'oinega mabwaiyadi siloloyamwana ta si'eno sinediya. <sup>6</sup> Coinega nihuwana gamwana loheya 'aigeda 'ibwauwa, 'igwae, ‘Tohaiina bewa 'ilatua pwaima, watoholo ma tayo'o. <sup>7</sup> Coinega wahiwahineyedi mabwaiyadi sito-holowa, ta 'idi mayale si'atububudiya. <sup>8</sup> Coinega wahiwahineyedi yauyauleidi 'iyadiyao 'oidiya si'ahwanoiya, sigwaeya, ‘Ciyamayao, mayale 'ana we'aha tupwana wa'ebwaemai, weyahina 'ima mayale nata sigibo.’

<sup>9</sup> “Ma sanapudiyedi sigwaeya, ‘Nuwana geya 'ima we'aha sawasawahina ma tupwana 'a'ebwaegomi, 'oinega 'omi watauya tohegimwaneyao 'oidiya ma 'imi mayale 'adi we'aha wagimwanedi.’

<sup>10</sup> “Coinega sitauya sabi gimwane, ma tohai 'ilatuma, ta taudi si'atububu pwaiya ba'idanao siluhuwa hai 'e'ahaina weyahina, ma 'ahwa 'eda sigududiya. <sup>11</sup> Muliyetega 'iyadiyao gimwaneyega sihilama ma sigwaeya, ‘Bada, 'eda 'uso'e ma 'aluhuwa.’ <sup>12</sup> Ma 'idi gwae 'ihemaiseya, 'igwae, ‘Comi hali boda, geya yasanapugomi.’

<sup>13</sup> “Coinega sawasawahimi wa'itayahi, weyahina sabweloina, nuwana tutaina yalohihilama, geya wasanapu.

*Bada 'ina 'ebwaya 'ina topaihowa 'oidiya**(Luke 19:11-27)*

<sup>14</sup> “Yehoba 'ina lolina wete gide 'eguma 'aigeda bada nata 'itauya hali tupwa, ma 'ina topaihowao 'ibwauwedima, ma 'ihewgaediya ma 'abehega 'ina tobwatobwa si'itayahi.

<sup>15</sup> “Ma 'aigeda 'ina mane 'ina topaihowa 'i'ebwaeya 'ana baibaiwa paibi handeledi kina, ma loheya heluwena tu handeledi kina, ma loheya hetoina handeledi kina, weyahina 'ina 'ebwaya 'oidiya taudi 'aigeda 'aigeda 'idi waiwai gide. Ma muliyetega badaina 'i'ebesinediya ta 'itauya.

<sup>16</sup> “Coinega loheyaina tauna ma'ina paibi handeledi kina 'ina bada 'ina maneina 'i'ewediya, ta 'oidiyega 'ihapaihoweya, ta 'adi loheposeyana paibi handeledi wete 'ilobediya. <sup>17</sup> Loheya heluwena wete gide 'ina tu handeledi kinaedi 'ihapaihowediya ta 'oidiyega 'ina bada 'ina mane 'ana loheposeyana tu handeledi wete 'ilobeya. <sup>18</sup> Ma loheya hetoina, tauna ma'ina handeledi kina, 'i'eweya ta bale'u 'i'eliya, ta 'ina bada 'ina maneina 'idahweya 'alona.

<sup>19</sup> “Ta tuta dudulena mulina 'idi bada 'ihilama, ta 'ihesilalediya 'idi paihowa 'adi maisa weyahidi. <sup>20</sup> Ma loheya 'ina mane paibi handeledi kina 'inaoma, ta 'ana loheposeyana paibi handeledi kina wete 'i'ewedima, ta 'igwaeya, ‘Bada, paibi handeledi kina 'u'ebwaegauwa ma 'ana loheposeyana paibi handeledi kina wete yalobeya, ta bewa.’

<sup>21</sup> “Ma badaina 'igwaeya, ‘Causala, 'owa topaihowa bwaibwaina ta dumwaluna. Cuhetapewa pwaiya ginaula 'i'iudi 'oidiyega, 'oinega 'a lolina ginaula madoudi weyahidi ya'ebwaego, ma wete 'igu yaliyaya bewa 'oina 'umiyamiya.’

<sup>22</sup> “Muliyetega loheya heluwena ma'ina tu handeledi kina 'ilatuma, ta 'ana loheposeyana tu handeledi kina wete 'i'ewedima, ma 'igwaeya, ‘Bada, tu handeledi kina 'u'ebwaegauwa ta 'ana loheposeyana tu handeledi kina wete yalobeya, ta bewa.’

<sup>23</sup> “Coinega badaina 'igwaeya, ‘Causala, 'owa topaihowa bwaibwaina ta dumwaluna, 'uhetapewa pwaiya ginaula 'i'iudi 'oidiyega, 'oinega 'a lolina ginaula madoudi weyahidi ya'ebwaego, ma 'owa wete 'igu yaliyaya bewa 'oina 'umiyamiya.’

<sup>24</sup> “Eeta loheya hetoina ma'ina handeledi kina 'inaoma, ma 'igwaeya, ‘Bada, yasanapugowa 'abehega 'owa loheya pa'aliu, ma 'ino wasawasa 'u'ewa'ewa hali tomota 'idi



paihowa 'oidiyega, <sup>25</sup> 'oinega yamatautegowa, ta 'ino handeledi kinaina bale'u 'alona yadahweya, ta 'ino mane bewa.'

<sup>26</sup> “Ma badaina 'iheliyeya, 'igwae, ‘Topaihowa galau ta tologwahata 'owa, 'usanapugauwa 'abehega 'igu wasawasa ya'ewa'ewa hali tomota 'idi paihowa 'oidiyega, <sup>27</sup> 'eguma 'igu mane banika 'oina 'uda laguya, beno tutaina yahilama ma 'ana lohepoi yaloba!’

<sup>28</sup> Ta 'ina 'ali'eyao 'oidiya 'igwaeya, ‘Cigu handeledi kina 'oinega wa'ewa, ma loheyaina tauna loheposeyana madouna 'ilobeya 'oina wa'ebwae. <sup>29</sup> Weyahina 'eguma taiya 'ana heguheguyai 'iloheposeyane, 'ana loheposeyana wete 'iloba, ma 'imadou; ma 'eguma taiya geya 'iloheposeyane, to'aha 'oina 'imiyamiya 'oinega 'abwa si'ewa yahule.’

<sup>30</sup> “Coinega 'ina 'ali'eyao 'ihegwaedi ma topaihowa galanaina siula latuhe 'atamana guguyou tupwaina 'oina, ma nobwa tomota ma'idi muyamuya sidoudou ma sihesala'i'ita ba'idanao.

*Yesu bale'u mabwaiyadi 'abwa 'iloinaedi*

<sup>31</sup> “Cabwa taugu Loheyaiguina, ma'igu wasawasa 'asi'asilalaina, ma ma'igu aneloseyao 'alatumu, ma 'oinega 'igu wagahata wasawasa 'oina yamiyatoi sabi loina, <sup>32</sup> ma 'ebeloina bale'uwa mabwaiyadi tomotaedi mataguwa sihe'atedima, ma yawatahidi gide sipi 'adi to'itayahina 'iwatahidi goti 'oidiyega, <sup>33</sup> ma sipi yalagu wasiyedi 'igu 'ebeulega ma goti 'igu 'adigeyegeyega. <sup>34</sup> Ma 'oinega toloina taugu taudi 'igu 'ebeula 'oina yahegwaedi ma yagwae, ‘Comi Tamagu 'ina helauwega wayaliyaya, wanaoma ma 'imi 'ebeloinaina wa'ewa, beno bale'u 'ana hemasalaha hohau 'oinega 'i'atububuya weyahimi. <sup>35</sup> Weyahina 'omi mwalo yagomaleya ma wahe'aigauwa, ma wete tani'ogu 'iyahala ma we'aha wa'ebwaegauwa, yahesugalagala 'imi 'asa ma wabwauwegauwa 'imi hada, <sup>36</sup> ma wete geya 'agu 'ale'omo ma wahe'otegauwa, wete yalohala ma wabo'enegauwa, ma wete deli 'oina yamiyamiya ma wabo'enegauwa.’

<sup>37</sup> “Coinega todumwaluwedi 'oiguwa sigwae, ‘Bada, to tuta hede 'a'itegowa ma 'a gomale ma 'ahe'aigowa, nuwana tani'ou 'iyahala ma we'aha 'a'ebwaegowa, <sup>38</sup> nuwana 'uhesugalagala 'ima 'asa ta 'abwauwegowa 'ima hada, nuwana geya 'a 'ale'omo ma 'ahe'otegowa, <sup>39</sup> nuwana ma'a lohala, nuwana deliya 'umiyamiya ma 'abo'enegowa?’

<sup>40</sup> “Coinega yagwae 'oidiya, ma yagwae, ‘Moisa, 'eguma taiya 'owa 'iyagwao 'i'iudi 'aigeda 'oidiyega 'u'abihete, beno taugu wete 'u'abihetega.’

<sup>41</sup> “Ma taudi 'igu 'adigeyageya simiyamiya yahegwaedi, ‘Comi togala wa'ebesinegau, ma watauya 'aiwe ninima hatayana 'oina, tauna Yehoba 'i'atububuya Tomudulele ma 'ina bodao weyahidi. <sup>42</sup> Weyahina mwalo ma'agu gomale ma geya wahe'aigau, wete tani'ogu 'iyahala ma geya 'aigeda wete we'aha wa'ebwaegau, <sup>43</sup> ma yahesugalagala 'imi 'asa ma geya wabwauwegau 'imi hada, ma geya 'agu 'ale'omo ma geya wahe'otegau, wete yalohala ma wete deliya yamiyamiya ma geya wahabo'enegau.’

<sup>44</sup> “Muliyetega taudi gwae bewa sihemaise, ma sigwae, ‘Bada, to tuta 'a'itegowa ma'a gomale, nuwana tani'ou 'iyahala, nuwana 'uhesugalagala, nuwana geya 'a 'ale'omo, nuwana 'ulohala, nuwana deliya 'umiyamiya, ma geya 'alemego?’

<sup>45</sup> “Ma yahegwaedi, ‘Moisa, tutaedi 'oidiya 'eguma tomota 'i'iudi bewa 'aigeda geya wa'abihete, beno 'oina geya walemegau.’ <sup>46</sup> Coinega taudi sitauya muya hataya 'oina, ma todumwalu hesi yawasi hataya siloba.”

## 26

*Babada nuwanuwadi ma Yesu silohe'amasi  
(Maki 14:1-2; Luke 22:1-2; Yoni 11:45-53)*

<sup>1</sup> Yesu 'ina he'itaedi bewa 'ilosalohiya, ma 'ana tomuliyao 'ihegwaediya, <sup>2</sup> 'igwaeya, “Wasanapuya sabwelo 'eluwa ma Hataona Guyaina tapaihowa, ma 'oinega taugu Loheyaiguina 'agu toteba 'i'ebwaegau 'agu 'alehao 'oidiya, ma kelose 'oina silohe'amasi-gau.”

<sup>3</sup> Coinega topwaoli madoudi ma meIsileli 'idi babadao si'eto'utama Kaiyapa 'ina hada madouna 'oina, tauna topwaoliyedi 'idi bada madouna. <sup>4</sup> Ta babadaowedi taudimo siloina

ma 'abehega 'abowega Yesu si'abiyahi ma silohe'amasi, <sup>5</sup> ta sigwaeya, “Sahena guyai 'alona Yesu ta'abi'abiyahi, 'amuge ta tomota sigamwasowala ma silo'aleha 'oida.”

*Wahine Yesu 'ihholoiya 'asa Bedani 'oina*  
(Maki 14:3-9; Yoni 12:1-8)

<sup>6</sup> Tutaina Yesu Bedani 'oina 'imiyamiya, Saimoni 'ina hada. Tauna mwalo tolepelo 'aigeda. <sup>7</sup> Coinega 'aigeda wahine ma'ina holowa 'ilatuma, ma holowaina 'ana maisa madouna, ma botolo bwebwe'ana hedade 'oina sisiweya. Yesu 'abwa hadai 'i'ai'ai, ma wahineina 'ilatuma ta holowaina Yesu debana 'isiweya.

<sup>8</sup> Ma Yesu 'ana tomuliyao si'iteya, ta wahineina silomugiyeya, sigwaeya, “To'aha weyahina holowa 'imudaliya? <sup>9</sup> Cilobwaineya ma holowaina 'igimwaneye, ma maisa madouna 'i'ewa, ma 'iheguyai tohewewelohe 'oidiya.”

<sup>10</sup> Ma Yesu 'idi gwaeina 'isanapuya ta 'ihewaeidiya, 'igwae, “Sahena walolomugiye wahine bewa, 'ina paihowa 'oiguwa bwebwe'ana hedade. <sup>11</sup> Toheweweloheyedi wagwaegwaenedi tuta mabwaiyana simiyamiya deimiya, ma hesi taugu geya tuta dudulena ba'idamiu tamiyamiya. <sup>12</sup> Wahine bewa 'ihholowa pwaigauwa wahigu 'ana lagu galiha weyahina. <sup>13</sup> Yagwae moisa 'oimiya, 'abwa wasagu tomota si'oteteli bale'u mabwaiyana 'oina, ma wahineina 'ina paihowa 'oiguwa wasana wete si'oteteli.”

*Yudasa 'itagwala ma Yesu 'itebaei*  
(Maki 14:10-11; Luke 22:3-6)

<sup>14</sup> Ma Yesu 'ana tomuliyao 'aigeda sanina Yudasa Isakaliyota 'itauya topwaoli madoudi 'oidiya, <sup>15</sup> ma 'ihewaeidiya 'igwae, “Cehisa maisa nata wa'ebwaegau, 'eguma Yesu 'oimiya yatebaeyawa?” Ta mane siliba 'ana baibaiwa teti si'ebwaeya. <sup>16</sup> Coinega Yudasa tuta bwebwe'ana 'iyamweya ma 'abehega Yesu 'oidiya 'itebae ma si'abiyahi.

*Hataona 'aiina sipaihoweya*  
(Maki 14:12-21; Luke 22:7-14, 21-23; Yoni 13:21-30)

<sup>17</sup> Hataona 'aiina beledi daisina, geya 'ana 'abihesesehamo si'ai'ai. Ta Hataona 'aiina 'ana sabwelo nugeta 'oina Yesu 'ana tomuliyao tupwadi 'oina sinaoma ma sigwaeya, “Bada, ta'eha 'oina nuwanuwau ma Hataona 'e'ahaiina weyahiu 'a'atububu?” <sup>18</sup> Coinega Yesu 'igwaeya, “Watauya Yelusalema ma 'igu 'ahwanoi 'aigeda loheya 'oina wahepwaila, wagwae, 'Cima tohe'ita 'ina gwae bewa gide, 'abehega “Cigu tuta 'ilatu pwaiya ma nuwanuwagu ma 'ino hadai Hataona 'aiina ma'agu tomuliyao 'a'ai.” ” <sup>19</sup> Ta tomuliyaeidi Yesu 'ina gwaeina simuliyeya, ta loheyaina 'ina hada Hataona 'aiina si'atububuya.

<sup>20</sup> Coinega lahilahiya Yesu ma'ana tomuliyao site tuwelowedi siluhuwa ta 'e'ahaiina si'aiya. <sup>21</sup> Ma 'idi 'aiina 'oina Yesu 'igwaeya, “Ciyagwao, yagwae moisa 'abehega 'aigeda 'oimiyega nata 'itebaegau.” <sup>22</sup> Ma Yesu 'ina gwae bewa weyahina sinuwagala moisa, ta 'aigeda 'aigeda Yesu 'oina 'ihesilala 'igwaeya, “Bada taiya tauna? Nuwana taugu?”

<sup>23</sup> Ma Yesu 'ihewaeidiya, “Loheyaina tauna ba'idagu gaeba 'aigeda 'oinaga 'a'ai'ai, tauna nata 'itebaegau. <sup>24</sup> Taugu Loheyaiguina 'abwa yatautauya 'edaina mwalo Buki He'asisi 'oina sihepwaila nugeteya, ma hesi 'agu totebaina 'atemuyamuyaina, ma bwebwe'ana 'eguma mwalo sahena sinana 'ihenenatune.”

<sup>25</sup> Coinega 'ana toteba Yudasa 'ihewaeiya, “Bada to loheya tauna? Nuwana taugu?” Ta Yesu 'igwaeya, “Cugwae pwaiya bo'i.”

*Bada 'ina 'ai*  
(Maki 14:22-26; Luke 22:15-20; 1 Kolinita 11:23-25)

<sup>26</sup> Si'ai'ai ma Yesu 'e'ahai 'i'eweya ta weyahina 'igwae helauwa, ma 'i'abihisiya ta 'ana tomuliyao 'i'ebwaediya, 'igwaeya, “Bewa wahigu wa'ewa ma wa'ai.”

<sup>27</sup> Ma waini mabiyona wete 'i'eweya, ma weyahina 'iloyauwedowa Yehoba 'oina, ma 'i'ebwaediya, ma 'igwaeya, “Mabwaiyami wanuma. <sup>28</sup> Bewa bweyahigu, loina hauhauna weyahina, 'idaudau tomota mabwaiyami 'imi puiyao 'adi 'ebe nuwasam weyahina. <sup>29</sup> Ma

yahegwaegomi tuta bewa ma mulina waini bewa geya'abwa 'oinega yanumanuma hila ta 'ana siga 'omi ba'idagwao waini hauhauna tanuma Tamagu 'ina tupwa.”

<sup>30</sup> Coinega wali 'aigeda siwaliyeya ta silatuwa, ma sihaneya 'oya Olibe 'oina.

*Yesu 'ihepwaila latuwa 'abehega Pita 'imwehihiye*

*(Maki 14:27-31; Luke 22:31-34; Yoni 13:36-38)*

<sup>31</sup> Ma Yesu 'ihewgaediya, 'igwae, “Nata nihuwana mabwaiyami wadena sinegau, gide Buki He'asisi 'ina hepwaita 'igwaeya, ‘To'itayahina sipi yalohe'amasi ma sipi silelewana.’

<sup>32</sup> Ma taugu 'igu toholo hila mulina Galili 'oina yatautauya, ta 'omi muliguwega wanaowa.”

<sup>33</sup> Coinega Pita 'i'apulagata ma 'igwaeya, “Nata mabwaiyadi sidena sinego ma taugumo ba'idau.”

<sup>34</sup> Ma Yesu Pita 'ihewgaeya, “Yagwae moisa, nihuwana nata, muliyetega 'abwa 'am'am'idou, ma 'owa matoi 'uuhalegau.”

<sup>35</sup> Ma Pita 'igwaeya, “Bada, sahena hede yauhauhalego! Ceguma silohe'amasigo taugu ba'idau wete silohe'amasigita.” Tomuliyao mabwaiyadi wete gide sihegwaegwae.

*Gedesemani 'oina Yesu 'i'ahwanoi*

*(Maki 14:32-42; Luke 22:39-46)*

<sup>36</sup> Eeta Yesu 'ana tomuliyao ba'idanao sihapwesa tupwa sanina Gedesemani, ma 'ihewgaediya, 'igwae, “Cebwa wamiyatoi ma yanao nobwa tupwaina ya'ahwanoi Tamadai 'oina,” <sup>37</sup> ma hesi sitetoyedi ba'idanao 'itoediya, taudi Pita ma Sebedi natunao, ma 'inuwigala madouna, nuwana 'isiwapa, <sup>38</sup> 'ihewgaediya 'igwae, “Yanuwigala madouna, gide 'abwa ya'amasa, 'ebwa wamiyamiya, wa'o'oyatola ma ba'idagwao ta'ahwa'ahwanoi.” <sup>39</sup> Ma 'ihanaowa tupwana ta 'ibe'usuluwa, 'i'ahwanoi, 'igwaeya, “Tamagu yo, 'eguma sawasawahina muyamuya biyoina bewa 'oiguwega 'u'ewa ma geya'abwa yanumanuma, ma hesi geya'abwa 'igu nuwatuhwega, 'owa tuwa 'ino nuwatuhi gide 'upaihowe.”

<sup>40</sup> Cigumwala, ma 'ihilama 'ana tomuliyao 'ilobediya si'enosinediya, ma Pita 'ilohanoanoya, 'ihewgaeya, 'igwae, “Geya sowana sauga 'i'iuna tuwa wa'o'oyatola ma wa'abihetegau. <sup>41</sup> Hede wa'o'oyatola wa'ahwa'ahwanoi 'abehega sahena waluhuluhi 'ebe tohona 'oina. Yaluyaluwami nuwanuwana ma hesi wahimi siwe'a.”

<sup>42</sup> Cigumwala, 'ihanaowa wete, 'i'ahwanoiya, 'igwae, “Tamagu yo, 'eguma geya sowana muyamuya biyoina 'u'ewa, ma 'eguma 'ino nuwatuhi gidemusa, tuwa yanuma.”

<sup>43</sup> Eeta 'ihilama wete 'ana tomuliyao wedi 'ilobediya wete si'enosinediya, weyahina mata'eno'eno 'i'ewa pwaidiya. <sup>44</sup> Coinega 'i'ebesinediya 'ebwa, 'inaohila ma 'i'ahwanoi matoina, gide nige 'i'ahwanoi 'esa.

<sup>45</sup> Cigumwala, 'ihilama tomuliyao wedi 'ihewgaediya, “Bwebwe'ana wa'eno'eno, wa'aiyawasi. Cigu sauga 'ilatu pwaima, ma 'agu totebaina nata taugu Loheyaiguina 'itebaegau togalagalaedi 'oidiya. <sup>46</sup> Watoholo, tatauya, wa'ita 'agu totebaina 'ilatu pwaima.”

*Yesu si'abiyahiya*

*(Maki 14:43-50; Luke 22:47-53; Yoni 18:3-12)*

<sup>47</sup> Cabwa Yesuina 'ihehewgaegwae, ma Yudasaina ma 'ina boda baibaiwadi sihapwesama ma'idi 'ebe 'alehao ma ma'idi wepasi. Weyahina topwaoli madoudi ma tomota 'idi babadao sihewasaedima Yudas ba'idanao, ma Yudasaina Yesu 'ana tomuliyao, sitetuwelo 'aigeda 'oidiyega, <sup>48</sup> ma Yudasaina nige 'ebehe'ita 'ihesumanediya, 'igwae, “Wa'ita 'eguma taiya ya'atusapwali, beno loheyaina wa'abiyahi,” <sup>49</sup> ma 'idumwaluwa Yesu 'i'atusapwaliya, ta 'igwaeya, “Yauwedo Bada.”

<sup>50</sup> Ma Yesu 'igwaeya, “Ciyagu, togidega 'ino naoma?”

Cigumwala, ma sitaayama Yesu si'abiyahiya.

<sup>51</sup> Si'abi'abiyahi ma 'iyana 'aigeda 'ina 'elepa 'aleha 'ililoloya ma tolo'aleha 'aigeda 'ihunuya ma tenana 'i'upwa yahuleya. Loheyaina topwaoli madouna 'ina topaihowa 'aigeda.

<sup>52</sup> Ma Yesu 'ihewaeya, “Tuwa, 'ino 'ebe 'aleha 'ulagu hila 'ina 'ebemiya, 'eguma talolo'aleha, 'abwa 'elepa 'aleha 'oinea ta'amasa. <sup>53</sup> Ma hesi wada sanapu 'abehega sawasawahina yada 'ahwanoi Tamaguina sauga bewa ma 'ida 'ebwaegau 'ina aneloseyao 'idi bodao tausani ma tausaniyao sabi 'abihetegau. <sup>54</sup> Ma hesi ginaula bewa mabwaiyana silatulatu 'abehega to'aha mwalo Buki He'asisi 'oina silelediya weyahigu silatuwa.”

<sup>55</sup> Nage 'oina Yesu bodaedi 'ihesilelediya, 'igwae, “Taugu 'abehega toyagaha 'awa, ta ma'imi 'ebe 'aleha ta ma'imi wepasi walatuma wa'abiyahigau. Ma togidega ma mwalo Hada He'asisi 'oina yamiyamiya, tomota 'oidiya yahehe'ita ta geya wada 'abiyahigauwa? <sup>56</sup> Ma hesi bewa gide wapaihowa 'esa ma 'abehega togidega palopitaowedi mwalo weyahigu silelediya ma sauga bewa silatuma.”

Eema 'ana tomuliyao mabwaiyadi si'ebesineya ma sidena.

*Yesu sitoeya toloinao 'oidiya*

*(Maki 14:53-65; Luke 22:54-55, 63-71; Yoni 18:13-14, 19-28)*

<sup>57</sup> Tolo'alehaowedi Yesu si'abiyahiya ma sitoeya topwaoli madouna Kaiyapa matana, nage 'oina lolina 'ana tohe'itao ma babadao si'eto'autama. <sup>58</sup> Ma hesi Pita 'ana muliya tupwana bwaga, ma siluhuwa Topwaoli Madouna 'ina 'asa, ma Pitaina wete 'iluhuwa 'imiyatoiya Topwaoli Madouna 'ina topaihowao ba'idanao. Cina nuwatuhu 'abehega Yesu 'ana lolina 'ihesagohe ma 'i'ita.

<sup>59</sup> Eeta topwaoli madoudi ma toloinao baibaiwadi nuwanuwadi Yesu 'ina pui siloba ma 'abehega 'ina 'amasa siloine, 'oinea si'ebe'ebesa tohe'ewao 'abo'abodi, <sup>60</sup> ma baibaiwadi sihehe'ewa Yesu 'ina puiyao weyahidi, ma geya 'eta 'ina pui siloba. Eema 'ebelosaloha 'oina siteluwaedi sinaoma, <sup>61</sup> sigwaeya, “Yesuina 'ina gwae 'ahesagoheya 'abehega sowasowana Yehoba 'ina Hada He'asisi 'iligehi yahule ma sabwelo 'etoi 'oidiya 'i'abihila.”

<sup>62</sup> Coinega topwaoli madouna 'itoholowa, Yesu 'ihesilala 'igwaeya, “To'aha 'ino he'isa 'idi he'ewa bewa weyahiu?”

<sup>63</sup> Ma Yesu tuwa 'ihenenonomo.

Ma topwaoli madouna 'ihesilala, 'igwaeya, “Yehoba miyamiya hatayana matana 'uhe'isa moisa, togidega 'owa Keliso, Yehoba Natuna, bo geya.”

<sup>64</sup> Ma Yesu 'igwaeya, “Cino gwaeina gidemusa. Ma wete yahegwagomi beno 'abwa taugu Loheyaguina wa'itegau Tohewaiwaina 'ina 'ebeulega yamiyatoi sabi lolina, ma wete 'igu hilama wa'ita galewa yaloha debadiya.”

<sup>65</sup> Bewa 'oina topwaoli madounaina 'ihewagwagwaguwa ma tauna 'ana 'ale'o 'i'igaliya, 'igwaeya, “Yesuina bo'i Yehoba 'isinaliya. Geya sowana tohe'ewa wete sihegwagwae, weyahina Yesuina 'ina gwae gala hedadana tahesagohe pwaiya. <sup>66</sup> Togidega 'imi nuwatuhu?”

Ma mabwaiyadi sigwaeya, “Sowasowana ma 'i'amasa.”

<sup>67</sup> Coinega tupwadi manina si'esoheya, ma tupwadi sisapisapiya ta sihehesilala, <sup>68</sup> sigwaegwae, “Cabehega 'owa Kelisoina, ma sowasowana 'uhesumane gide palopita ma 'uhegwaemai taiya 'isapigowa.”

*Pita Yesu 'imwehihiya*

*(Maki 14:66-72; Luke 22:56-62; Yoni 18:15-18, 25-27)*

<sup>69</sup> Ma hesi Pitaina 'atamana 'imiyatoiya ta 'i'e'ebubuna, ma gumalaulau topaihowa 'itauya 'oina 'ihewaeya, “Cowa Yesu gwama Galiliina mwalo ba'idau wamiyamiya, 'awa?”

<sup>70</sup> Ma Pitaina tomotaedi matadiya 'imwehihiya, 'igwae, “Cino gwaeina huhuna geya yada sanapuya.”

<sup>71</sup> Coinega Pitaina 'ihapwesa tupwana, ma 'aigeda wete gumalaulau 'i'iteya, ma 'iyanao nobwa 'ihewaediya, 'igwae, “Bewa loheyaina mwalo Yesu gwama Nasaletaina ba'idana simiyamiya.”

<sup>72</sup> Ma weteyage Pitaina 'i'eta'ota'oluluwa 'imwehihiya, 'igwae, “Loheyaina geya yada sanapuya.”

<sup>73</sup> Sauga 'i'iuna ma tupwadi to'ebubunaedi Pita deina sinaoma ma sigwae, “Moisa tuwa, 'owa Yesu 'ana tomuliya 'aigeda. Cino gwaeina meGalili 'idi gwae gidemusa.”

<sup>74</sup> Ma hesi Pitaina ma'ina gwae galana 'ibwauhaneya, 'i'eta'ota'oluluwa, 'igwae, “Loheyaina geya yasanapu.” Ma sauga bewa 'oina 'am'am loheyana 'idouwa, <sup>75</sup> ma Pitaina 'inuwatuhuya Yesu 'ina gwaeina 'abehega “Muliyetega ma 'am'am 'idou ma 'owa matoi 'umwehihiyegau.”

Cinuwatuhuya, ma'ina nuwagala 'ihapwesa, ta 'idouwa madouna.

## 27

### *Yesu 'ina yatala Pailato matana*

*(Maki 15:1; Luke 23:1-2; Yoni 18:28-32)*

<sup>1</sup> Gona 'i'adaleya, topwaoli madoudi ma babada mabwaiyadi siloina Yesu weyahina, nuwanuwadi 'abehega silohe'amasi. <sup>2</sup> Coinega Yesu nimana sipaidiya ma sitauyeya toloina madouna Pailato 'oina, ma 'abehega Pailatoina 'ida loina.

### *Yudasa 'ina 'amasa*

<sup>3</sup> Ma Yudasaina 'isanapuya 'abehega Yesu 'i'iuna ma silohe'amasi, 'oinega 'inuwabuiya, ta 'ina mane siliba teti 'ihilediya topwaoliyao ma babadao 'oidiya, <sup>4</sup> ta 'igwae, “Yalopuiya, weyahina loheya bwebwe'ana 'oimiya yatebaeya.” Ma sigwaeya, “Beno geya 'aigeda to'aha 'oima, ma 'owa tuwa weyahiu 'unuwanuwatuhu.”

<sup>5</sup> Coinega mane tetiyedi 'iula suluhedi Hada He'asisi 'alona, ma 'ihapwesa ma 'itauya, ma balaeyega 'ani'ona 'ididi heyapasiya, ta 'i'amasa.

<sup>6</sup> Ma topwaoliyedi maneyedi sihegogonediya, ta sigwae, “Geya sawasawahina ma Yehoba 'ana helau 'oina talagulagu, weyahina mane bewa loheya 'ana lohe'amasa maisana.” <sup>7</sup> Coinega siboidimo siloina ma maneina 'oinega 'aigeda to'abi walata 'ina bale'u 'aigeda sihemaiseya, ma 'abehega bale'uina taumanao 'adi galiha. <sup>8</sup> Coinega bale'uina sibwauweya, “Bweyaha bale'uina”, ma saninaina 'abwa 'imiyamiya. <sup>9</sup> Nage 'oina to'aha palopita Yelemaiya 'igwae nugeteya 'ihapwesa, weyahina mwalo Buki He'asisi 'oina sileleya 'abehega,

“MeIsileli tauna 'ana maisa sibwauweya, beno dimwa siliba 'adi baibaiwa teti, ta maneyedi si'ewedima. <sup>10</sup> Ma 'oinega to'abi walataina 'ina bale'u sihemaiseya, gidemusa 'ida Bada 'ihemataluwegauwa.”

### *Pailato Yesu 'ihesilaleya*

*(Maki 15:2-5; Luke 23:3-5; Yoni 18:33-38)*

<sup>11</sup> Coinega Yesu Pailato matana sihetoholoya, tauna toloina madouna, ma Pailatoina Yesu 'ihesilaleya, 'igwae, “Cuhepwaila, 'owa meYudiya 'idi kini, 'awa?” Ma Yesu 'igwaeya, “Beno 'ugwae pwaiya.” <sup>12</sup> Coinega topwaoli madoudi ma babadao Yesu sihe'eweya Pailato matana, ma Yesu geya 'aigeda to'aha 'ihehemaise. <sup>13</sup> Ma Pailato 'igwaeya, “Togidega, hepwaila bewa 'a he'ewa weyahidi 'uhesagoheya?” <sup>14</sup> Ma Yesu geya wete 'ihemaise, ma tuwa 'ihehenono, 'oinega Pailatoina nuwana 'ihepwanopwanowa madouna.

### *Pailato 'iloina ma Yesu silohe'amasi*

*(Maki 15:6-15; Luke 23:13-35; Yoni 18:39-19:16)*

<sup>15</sup> Bolime 'aigeda 'aigeda 'oidiya, Hataona Guyaina 'oina toloinaina 'ina mumuga beno deliyega 'aigeda loheya 'ilihasi ma 'ilatu, 'eguma taiya boda sihesinuweya. <sup>16</sup> Ma tuta nage 'oina 'aigeda loheya deliya 'imiyamiya, sanina Balaba, tomota mabwaiyadi sisanapuya 'abehega tauna togala madouna. <sup>17</sup> Coinega tomota mabwaiyadi si'eto'au-tama Pailato 'oina, ma Pailato 'ihesilalediya, 'ihewgwaediya, “To loheya nuwanuwami ma weyahimi yalihasi? Balaba? bo Yesu tauna sibwauweya To'abihetena?” <sup>18</sup> Weyahina Pailato 'isanapuya 'abehega he'ipi'ipiyega Yesu sitebaeya sabi lohe'amasina.



<sup>19</sup> Ma wete tutaina 'abwa Pailato yatala 'lipaipaihowa, ma mwanena wasa 'ihetuneyama ma 'igwaeya, “Sahena wete to'aha 'uloinae loheya beno bwebwe'ana. Weyahina nige yanihiyeya, ta 'ebe matauta madouna 'oiguwa.”

<sup>20</sup> Ma hesi topwaoli madoudi ta babadao tomota sibo'a heyaheyabadi ma 'abehega si'ahwanoi Pailato 'oina ma Balaba 'ilihasi 'oidiya ta Yesu silohe'amasi. <sup>21</sup> Coinega toloinaina 'ihesilalediya, 'igwaeya, “Siteluwa 'oidiyega taiya nuwanuwami ma weyahimi yalihasi.” Coinega sigwaeya, “Balaba.”

<sup>22</sup> Ma Pailato 'igwaeya, “Ma togidega yaloina 'ese Yesu tauna sibwauweya To'abihetena?” Coinega mabwaiyadi sigwaeya, “Kelose 'oina tada tutuhepa'ine!”

<sup>23</sup> Ma Pailato 'ihewgaediya, “To'aha hede 'ina pui, ma 'oinega 'abehega 'amasa 'iloba?” Ma sibwau 'aso'asona, sigwaeya, “Kelose 'oina tada tutuhepa'ine!”

<sup>24</sup> Coinega Pailato 'isanapuya 'abehega geya 'ina waiwaimo, ma boda sihe'ohe'ohe 'ana 'oleya 'abehega nata sihegaina ma sihe'upwa. Coinega we'ahaga nimana 'ibuyoya bodaedi matadiya, ma 'igwae, “Sahena wete to'aha yaloiloina loheya bewa bwebwe'ana 'ina 'amasa weyahina, ma waboimo wada loina.”

<sup>25</sup> Ma boda mabwaiyadi sigwaeya, “Bwebwe'ana! Tauma 'ada loina, ma 'ana maisa 'ada loba, tauma, ma mehau sihanehanema 'oidiya wete.” <sup>26</sup> Coinega Pailato 'idi gwae 'ihesagoheya, ta Balaba 'ilihasiya, ma wete 'ina tolo'alehao 'iloinaediya ma Yesu balaeyega sisapi, ma muliyetega 'abwa situtuhepa'i kelose 'oina.

*Tolo'alehao Yesu silo'aleheya*  
(Maki 15:16-28; Yoni 19:2-3)

<sup>27</sup> Coinega toloinaina 'ina tolo'alehao Yesu sisapiya, ma siluhuweya 'idi hada madouna 'alona, ta 'idi boda mabwaiyadi sibwau he'autedima Yesu 'oina, <sup>28</sup> ma 'ana 'ale'owao sihalolodiya, ta 'ale'o wasawasa 'oinega sihe'oteya sabi lotuyae, <sup>29</sup> ma 'ana talatala talitali 'oidiyega sipaihoweya, ma debana silaguya, ma guna 'ina 'ebeula silaguya, ma wete matana si'etuluha ma silolotuyane, sigwaeya, “Yauwedo 'owa meYudiya 'idi kini, 'awa?” <sup>30</sup> Ma wete si'esoheya, ta 'ina guna si'eweya, ma 'oinega debana sisapiya.

<sup>31</sup> Ta 'idi lotuyana 'igumwala, ma 'ale'o wasawasa 'oinega sihaloloya, ta tauna 'ana 'ale'owega sihe'wama hileya, ma sitoeya sabi hekeloseye.

*Yesu situtu hepa'ineya kelose 'oina*  
(Maki 15:21-32; Luke 23:26-43; Yoni 19:17-27)

<sup>32</sup> Yesu sihapweseya ma sitauyeya, ma 'edai Sailini loheyaina 'aigeda, sanina Saimoni, sihalobeya, ma siloineya ma Yesu 'ana kelose 'i'ahali. <sup>33</sup> Ma Saimoniina 'i'ahala ta 'ana siga silatuwa Goligota tupwaina. (Goligota, 'ana sanapu beno mwagu 'asaina.)

<sup>34</sup> Ta waini ma pase'uma sihebweliyeya ta si'ebwaeya, ma 'abehega sahena muya madouna 'ilolotoho, ma hesi Yesu 'ilotohoyamowa ta 'ilogwahateya.

<sup>35</sup> Coinega, kelose bale'uwa silaguya ma Yesu 'oina situtu hepa'iyaya ma sihetoholoya, ma muliyetega topaihowaedi Yesu 'ana 'ale'o si'ewediya ma siguyaiyeya siboimo 'oidiya, ma 'idi heguyai 'e'opi'opi sipaihoweya gide kati, ma 'eguma taiya 'inugeta 'ana 'ale'o 'ida 'ewa. <sup>36</sup> Muliyetega simiyatoiya ma sihehe'asine. <sup>37</sup> Ma wete 'ana kelose tabwanina sileleya, “Yesu tauna meYudiya 'adi toloina.” Beno 'ina 'amasaina lamuna.

<sup>38</sup> Wete toyagaha 'eluwa si'abi hekelosediya, 'aigeda Yesu 'ina 'ebeulega ma 'aigeda 'ina 'adigegeyega.

<sup>39</sup> Ma tomota tupwadi 'edai Yesu 'ana kelose 'oina silolotuyana ma sihehenama, <sup>40</sup> sigwae “Ca mudala! Cugwaeya 'abehega sawasawahiu ma Hada He'asisi 'uligehi ma sabwelo 'etoi 'oina 'u'abihila. Hana 'uda 'etopelego 'uboi ma keloseyega 'usuluma, 'eguma 'owa Yehoba Natuna.”

<sup>41</sup> Wete gidemusa topwaoli madoudi ta loina 'ana tohe'itao ta babada Yesu silotuyaneya, ma sigwae, <sup>42</sup> “Hali tomota 'ilemediya, ma tauna 'ida 'etopele. Tauna 'abehega tupwa Isileli 'ana toloina. Hana keloseyega 'isuluma ma 'oinega tahemisae. <sup>43</sup> Tauna



'abehega Yehoba 'ana tohemisa ma 'igwaeya, 'Taugu Yehoba Natuna.' Ceguma Yehoba nuwanuwana tauna, 'ida 'etolihasi, 'awa?"

<sup>44</sup> Ma toyagahaedi Yesu ba'idanao si'abi hekelosediya, taudi 'adi keloseyega sibwa'abala ma taudi Yesu siheliyeya.

*Yesu 'ina 'amasa*

*(Maki 15:33-41; Luke 23:44-49; Yoni 19:28-30)*

<sup>45</sup> Casudiladila ma lahilahi gogo mabwaiyana 'iguguyouwa. <sup>46</sup> Ma lahilahiya Yesu 'enana madounega 'ibwauwa ma 'igwaeya, "Eli, eli, lamasabakitani!" Cana bui beno gide, "Cigu Yehoba, 'igu Yehoba, to'aha weyahina 'u'ebesinegauwa?"

<sup>47</sup> Ma tupwana tomota deina sitotoholo 'ina bwau sihesagoheya, ma sigwaeya, "Wahesagohe! Loheya bewa Ilaitiya 'ibwauwauwe." <sup>48</sup> Coinega 'aigeda 'oidiyega 'ipiliya ma balou 'i'eweya, ma waini memaina 'oina 'ihewwaseya, 'oinega 'aigeda 'ai'aiwe matana 'ibadiyeya, ma 'ihe'etohaneheya Yesu 'ahwana, ma 'imala'u'uya.

<sup>49</sup> Ma loheyaina 'iyanao sigwaeya, "Tuwa tayamwayamwa, nuwana nata Ilaitiya 'ilatuma ma 'i'etolihasi."

<sup>50</sup> Ma Yesu 'enana madounega 'ibwau hila, ma yawasina 'igumwala. <sup>51</sup> Ma 'ale'oina\* Hada He'asisi 'ana libu 'ilotaliliya tabwanega ma 'isuluwa duduna, ma mwani'ini'i 'ipiliya, ma da'ule madoudi si'emutumutudiya. <sup>52</sup> Ma wete galiha si'eso'ediya ma tohemisao tupwana baibaiwadi mwalo si'amasa wahidi sitoholo hila, <sup>53</sup> ma Yesu 'ina toholo mulina taudi wete galihega sihapwesama, ma Yelusalema 'oina siluhuwa, ma tomota tupwana baibaiwadi 'oidiya sihapwesa.

<sup>54</sup> Ma tolo'alehaowedi ma'idi tohanugeta saugenina Yesu kelose 'oina si'ita'itayahiya, mwani'ini'i ma ginaula mabwaiyana si'itediya, ta simatauta madouna, sigwaeya, "Moisa, loheya bewa Yehoba Natuna."

*Yesu 'ana lagu taona*

*(Maki 15:42-47; Luke 23:50-56; Yoni 19:35-42)*

<sup>55</sup> Wahiwahine wete tupwana bwagebwagega si'e'ebubuna, taudi mwalo Galiliyega Yesu sihemuli tabubuweyama, ma 'ana sipaipaihowa. <sup>56</sup> Caigeda sanina Meli Magidala, ma 'ina waliyesa tauna Yemesa ma Yosepa sinadiu, ma wete Sebedi natunao sinadiu.

<sup>57</sup> Lahilahiya 'aigeda Alimatiya loheyaina 'inaoma Pailato 'oina, tauna towasawasa ma wete Yesu 'ana tomuliya 'aigeda, sanina Yosepa. <sup>58</sup> Ma Pailato 'oina wahina 'i'ahwanoiyeya, ma Pailato 'itagwala.

<sup>59</sup> Citagwala, ma Yosepa ma'ina hewahewaliyao Yesu wahina si'eweya, ma 'ale'o wa'ewa'e'ena ma 'ehauna 'oinega siwaduhiya. <sup>60</sup> Ma Yosepaina 'ana galiha hauhauna 'oina silaguya, ma galihina sipidiya gide duluha 'alona. Ma da'ule madouna ma pwa'upwa'uwana 'oinega galihina 'ahwana silagu bodeya, ma muliyetega Yosepa 'itauya.

<sup>61</sup> Ma Meli Magidala ma'ina waliyesa galihina deina simiyatoiya, ma sihehe'asine.

*Galiha si'itayahiya*

<sup>62</sup> Ma Yesu si'abi hekeloseyeya meYudiya 'idi sabwelo 'atububu 'oina, 'oinega gona 'i'adaleya, beno 'idi Sabati, topwaoli madouna ma Palisiyao bodaidi sitauya Pailato 'oina, <sup>63</sup> ma sigwaeya, "Bada, to'aboina mwalo mayawasina 'imiyamiya 'ina gwae 'anuwatuhuya 'igwae, 'Sabwelo 'etoi ma 'amasega yatoholo hila.' <sup>64</sup> Coinega 'eguma sawasawahina, 'uloina ma galiha 'ana to'itayahinao si'itayahi bwaibwaini ma 'ana siga sabwelo 'etoi, tabu ta 'ana tomuliyao sinaoma ma Yesu wahina siyagahi ma sidene, ma tomota si'abowedi 'abehega 'amasega 'itoholo hila, ma 'oinega 'abo mulimuliyana 'abo nugetana 'ida gala sine."

<sup>65</sup> Ma Pailato 'ihewwadiya, 'igwaeya, "Cimi to'ita yahinaowedi tolo'alehao simiyamiya, watauyedi ma galiha simiya loyamwa bwaibwaini."

<sup>66</sup> Coinega sitauya ma galiha 'ahwana 'ana loboda dimwaina wete sibwadeya, ma nobwa to'itayahinaedi sihalagudiya.

## 28

*Yesu 'amasega 'itoholo hila**(Maki 16:1-8; Luke 24:1-12; Yoni 20:1-10)*

<sup>1</sup> Sabati mulina gona 'i'adaleya wiki hauhauna 'ana sabwelo nugenugeta 'oina, Meli Magidala ma'ina waliyesa sinaoma galiha sabi bo'ene.

<sup>2</sup> Ma mwani'ini'i madouna 'ipiliya, beno Bada 'ina anelose 'aigeda galewega 'isuluma, ta dimwa galiha 'ahwanega 'ibuiwasiyeya, ma 'oina 'imiyatoiya. <sup>3</sup> Aneloseina 'ana 'ita gide namala, ma 'ana 'ale'o wa'ewa'e'ena moisa. <sup>4</sup> Ma galiha 'ana to'itayahinao anelose si'iteya ma simatauta madouna, 'oinega sitaiya ma sibe'uwa bale'uwa to'amasa gide.

<sup>5</sup> Ma aneloseina wahiwahineyedi 'ihewaediya 'igwaeya, "Sahena wa'ate'ateyoho. Yasanasanapu 'omi Yesu tauna silohe'amasiya wabesebese. <sup>6</sup> Tauna geya 'ebwa, weyahina 'amasega 'itoholo pwaiya, gide mwalo 'ihewaegomiya. Wanaoma ma 'ina 'ebe'eno wa'ita gaugaulinamo, <sup>7</sup> ma muliyetega watauya mwayamwayau ma 'ana to-muliyao wahewaedi 'abehega Yesu 'amasega 'itoholo pwaiya, ma nata 'inugeta Galili 'oina, ma 'omi wamuliye, nage 'oina wa'ita. Beno tuwa."

<sup>8</sup> Coinega wahiwahineyedi ma'idi matauta, ma wete ma'idi yaliyaya, galiha si'ebesineya ma sipili mwayamwayauwa, 'abehega Yesu 'ana tomuliyao 'oidiya ginaula bewa sida hepwaile. <sup>9</sup> Ma Yesu 'edai 'ilobediya ma 'iloyauwedediya, ma sinaoma ma 'ahena sigitohodiya ma si'etuluha 'oina. <sup>10</sup> Coinega Yesu 'ihewaediya, 'igwaeya, "Sahena wa'ate'ateyoho, ma hesi watauya ma 'iyagwao wahemataluvedi ma sitauya Galili 'oina, nage 'oina 'abwa si'itegau."

*To'itayahinao 'idi hepwaile*

<sup>11</sup> Wahiwahineyedi 'abwa 'edai sitautauya, ma galihina 'ana to'itayahinao tupwadi sitauya 'asa Yelusalema 'oina, ma to'aha silatuwa gide sihepwaileya topwaoli madoudi 'oidiya. <sup>12</sup> Coinega topwaoliyedi ma babada mahetediyao si'eto'autama ma siloina, ta mane to'itayahinaowedi si'ebwaediya <sup>13</sup> ma 'ane tomota 'oidiya sida hepwaile dadane, ma 'ane sida gwae, "Nihuwana 'a'eno'eno ma Yesu 'ana tomuliyao sitauyama ta wahina siyagahiya."

<sup>14</sup> Eeta sihegwaediya, sigwae, "Ceguma toloina madouna wasa bewa 'ihesagohe, nata 'a'abowe ma 'oinega geya sawasawahina ma 'igamwasowala 'oimiya."

<sup>15</sup> Coinega 'idi mane si'eweya, ma topwaoliyedi ma babadao 'idi nuwatuhuina sihematamataneya, ma 'idi hepwaileya 'ilewana meYudiya 'oidiya, 'oinega bewa tuwa gide wete sihegwaegwae.

*Yesu 'ana tomuliyao 'idi paihowa 'i'ebwaediya*

<sup>16</sup> Coinega Yesu 'ana tomuliyao site lebeni sitauya Galili, ma sihaneya 'oyaina Yesu 'ihewaileya 'oina, <sup>17</sup> ma Yesu si'iteya ma 'oina si'etuluha. Ma tupwadi 'oidiyega 'abwa ma'idi henuwanaluwa.

<sup>18</sup> Eeta Yesu 'inaoma 'oidiya ma 'ihewaediya, 'igwae, "Tamagu loina waiwaina mabwaiyana galewa ma bale'uwa 'i'ebwae pwaigauwa. <sup>19</sup> Coinega watauya ma 'asa mabwaiyadi 'oidiya waloguguya, ma 'oinega tomota sihemisaegau, ma wete wa'abihe babitaisodi Tamagu saninega ma Natuna Taugu saniguwega ma wete Yaluyaluwa Tabuna saninega. <sup>20</sup> Loina mabwaiyana ya'ebwaegomiya ma wahe'itaedi, ma taudi wete sida muliyedi. Ma moisa, taugu ba'idamiu tamiyamiya sauga mabwaiyana 'oidiya, sauga bewa ma 'ana siga bale'u 'ana 'ebelosaloha 'oina."

## MAKI Tetela bwebwe'ana Maki 'ileleya

Buki bewa 'alona Yesu 'ina paihowa waiwai 'ihe'ote'otetelidiya, beno yaluyaluwa galadi mabwaiyana 'ihewaiwai sinediya ta tomota 'oidiyega 'iula latuhediya, wete lohala baibaiwana 'i'abihe bwebwe'anediya, ma wete yaumai ma bagodu 'iloinaediya, ma 'itauya hola tabwanega. Boda madouna 'ihe'aidiya 'e'ahai 'i'iuna 'oinega, ma Hada He'asisi\* 'i'abihe'ehauya, ma wete 'ana tolomugiyao 'idi gwae 'ihewaiwai sinediya, ta wete mumugana galana 'ana maisa 'amasa 'ihewaiwai sineya.

*Yoni to'abihebabitaiso 'ina guguya*

*(Madiu 3:1-12; Luke 3:1-9, 15-17; Yoni 1:19-28)*

<sup>1</sup> To'abihetena Yesu, tauna Yehoba natuna, wasana bwebwe'ana 'ana 'ebehegaina beno:

<sup>2</sup> Mwalona hene palopita Aiseya Yesu wasana 'ilele nugeteya, beno Yehoba 'enana 'ihewaiwai, 'igwae:

“Bewa 'igu tohalewasa yahewasae ma 'inugeta, ma 'ino 'eda 'ihunae. <sup>3</sup> Ma tupwa yoho 'awawa 'oina 'enana madounega 'ihewaiwai latu ma 'igwaegwae, ‘Bada 'ina 'eda wahunae, wa'abihedumwalu.’”

<sup>4</sup> Coinega Yoni to'abihe babitaisoina 'ilatuwa yoho 'awawa, 'ihewaiwai tomota 'oidiya, 'igwae, “Mumugami galadi 'oidiyega wanuwabui ma ya'abihe babitaisogemi ma Yehoba 'imi mumugaedi 'inuwasamudi.”

<sup>5</sup> Ma tomota mabwaiyadi tupwa Yudiya mabwaiyana 'oidiyega ma meYelusalema wete mabwaiyadi sisawalama, Yoni 'ina guguya sabi hesagohe. Sihesagoheya ma mumugadi galadi sihehewaiwai, ma 'i'abihe babitaisodiya we'aha Yolidani 'oina. <sup>6</sup> Yoni 'ana 'wama tuwa kameli hunuhunuwana, ma 'ana gadiwana kameli 'wapina, ma 'anaedi tuwa bilolo eema mwagagau.

<sup>7</sup> Yoni 'iguguya ma 'igwae, “Tauna muliguwega 'inaonaoma 'ihemadou sinogauwa. Geya 'ilobwainegau ma 'ahena 'oina yatuluha ma 'ana butu yalihasi. <sup>8</sup> Taugu we'ahaga tuwa ya'abihe babitaisogomi, ma tauna loheyainaina Yaluyaluwa Tabuna 'oinega 'i'abihe babitaisogomi.”

*Yesu 'ana 'abihebabitaiso*

*(Madiu 3:13-17; Luke 3:21-22)*

<sup>9</sup> Sauga nage 'oina Yesu 'asa Nasaleta 'i'ebesineya, tupwa Galili 'oinega, ma 'inaoma we'aha Yolidani 'oina, ma Yoni Yesu 'i'abihe babitaisoya. <sup>10</sup> Cibabitaiso, ma Yesu we'ahaga 'igayohanema, ma 'i'ita haneya galewa 'i'eigala luweya ma Yaluyaluwa Tabuna 'ana 'ita gide gabubu 'isuluma 'oina. <sup>11</sup> Wete 'enana 'aigeda galewega 'igwaema, 'igwae, “Cowa natugu 'ausalana, weyahu yayaliyaya madouna.”

*Seitani Yesu 'itohoya*

*(Madiu 4:1-11; Luke 4:1-13)*

<sup>12</sup> Nage 'oina Yehoba Yaluyaluwana Yesu 'ihesumaneya, 'itauya yoho 'awawa, <sup>13</sup> ma nobwa sabwelo poti 'imiyamiya, ma Seitani 'itohotoho waiwai 'abehega Yesu 'i'abi hebe'u. Ma tupwaina 'oina hebahebai sasasasaedi simiyamiya, ma hesi aneloseyao Yesu si'itayahiya.

*Togomana site hata Yesu 'ibwauwediya*

*(Madiu 4:12-22; Luke 4:14-15; 5:1-11)*

<sup>14-15</sup> Muliyetega Helodi ma'ina topaihowao Yoni deliya silaguluguheya. Yoni 'abwa deliya 'imiyamiya, ma Yesu 'ilatuwa Galili, ma wasa bwebwe'ana Yehoba 'oinega 'iguguyaeya, 'igwae, “Sauga 'ilatu pwaima Yehoba 'ihetoloina 'oida. Coinega 'imi puiyao 'oidiyega wanuwabui ma wasana bwebwe'ana wahemisae.”

<sup>16</sup> Sauga 'aigeda Yesu holega 'ihasahasane ta 'i'itanao togomana siteluwa matasina Galili holai 'idi gomana siyahuyahuwe, taudi Saimoni ma Andulu. <sup>17</sup> Ta Yesu 'ibwauwed-ima, 'igwae, “Wamuliyegau ma tomota wa'onadi.” <sup>18</sup> Nage tuwa 'oina 'idi gomana si'ebesineya ma Yesu simuliyeya.

<sup>19</sup> Wete 'ihanaowa tupwana, ta Yemesa ma Yoni, taudi Sebedi natunao, 'i'itediya wagai 'idi gomana si'atu'atububu. <sup>20</sup> Ta 'ibwauwedima ma tamadiu ma'ina topaihowao si'ebesinediya nobwa wagai ma Yesu simuliyeya.

*Yesu loheya 'aigeda 'oinega hi'ahi'a 'iulalatuheya*  
(Luke 4:31-37)

<sup>21</sup> Muliyetega sinaoma 'asa madouna sanina Kapaneumi 'oina, ma Sabatiya Yesu hada tapwalolo 'oina 'iluhuwa, 'ihe'ita. <sup>22</sup> Cihehe'ita ma tomota mabwaiyadi nuwadi 'ihewpanopwanowa, ta sigwaeya, “He'ita bewa waiwaina, ma hesi 'ida lina 'ana tohe'itao 'idi he'ita we'ana.”

<sup>23-24</sup> Ma hada tapwaloloina 'oina 'aigeda loheya 'imiyamiya, ma loheyaina 'oina hi'ahi'a mwalo 'iluhuwa ma 'imiyamiya.

Coinega loheyainaina Yesu 'oina 'ibwauwa, ma 'igwae, “Yesu, gwama Nasaleta, to'aha lamuna 'unaoma 'oima? Nuwanuwau 'abehega 'uhunumai, 'awa? Ma yasanapu bwaibwainigowa 'owa tuwa Yehoba Natuna.”

<sup>25</sup> Ma Yesu 'iloineya, 'igwae, “Culolagu, ma loheyaina 'oinega 'uhapwesa.” <sup>26</sup> Coinega hi'ahi'a loheyaina 'i'abi hededeliya. Cidededela, ma 'i'aso'asona madouna, ma muliyetega hi'ahi'a loheyaina 'alonega 'ilatuwa.

<sup>27</sup> Coinega tomota mabwaiyadi sihenainaida, ma siboi sihehesilala hiledi, sigwae, “Togidega he'ita hauhauna bewa? Bewa loheyaina 'ina loinega hi'ahi'a 'iloinaedi ma simuliye.” <sup>28</sup> Ma Yesu wasana sihewasa dadaneya Galili tupwana mabwaiyana 'oidiya.

*Yesu tolohalao 'i'abi hebwebwe'enediya*  
(Madiu 8:14-17; Luke 4:38-41)

<sup>29</sup> Yesu hada tapwalolo 'oinega 'ilatuwa ta Yemesa ma Yoni mahetenao sinaowa Saimoni ma Andulu 'idi hada. <sup>30</sup> Ma Saimoni lawana 'ilohala weyahina wahina 'iyahiyahiya. Coinega Yesu sihemataluweya wahineina 'ana lohala weyahina. <sup>31</sup> Ta Yesu 'iluhuwa 'oina ma nimanega 'i'abihe toholoya, ta 'ana lohalaina 'igumwala. Coinega wahineina 'ilatuwa ma 'adi 'ipaihoweya. <sup>32</sup> Ma 'ilahilahi, sinala 'isopu pwaiya, ma tomota 'idi tolohalao ma wete taudi hi'ahi'a 'i'abi hebwebwe'enediya sitoedima Yesu 'oina. <sup>33</sup> Ma wete 'asa 'ana tomiyao mabwaiyadi sihegogona ma hada mata'ahwana sitotoholo.

<sup>34</sup> Coinega tolohalao mabwaiyadi ma wete taudi hi'ahi'a 'i'abi hebwebwe'enediya mabwaiyadi Yesu 'i'abihe bwebwe'enediya. Ma hi'ahi'a 'i'ausidiya, 'igwae, “Geya'abwa wahehepwai-legau,” weyahina Yesu sisanapuya.

*Yesu Galili tupwaina 'iguguya*  
(Luke 4:42-44)

<sup>35</sup> Ci'iuna ma gona 'i'adale, Yesu 'itoholowa ma hadega 'ilatuwa, 'iboi 'inaowa yoho 'awawa, 'i'ahwanoiya Tamana 'oina. <sup>36</sup> Saimoni ma 'iyanao wete silatuwa ma Yesu si'ebeseya, <sup>37</sup> ta silobeya, ma sihegwae, “Tomota mabwaiyadi nuwanuwadi 'owa.”

<sup>38</sup> Ma Yesu 'igwae, “Tatau 'asa tupwadi wete 'oidiya, yaguguya. Bewa weyahina yanaoma.” <sup>39</sup> Coinega Galili mabwaiyana 'isakowasiyeya ma 'idi hada tapwalolo 'oidiya 'iguguya, ma wete hi'ahi'a\* tomota 'oidiyega 'iula latuhediya.

*Yesu tolepelo 'aigeda 'i'abihe bwebwe'aneya*

<sup>40</sup> Ma tolepelo 'aigeda Yesu 'oina 'inaoma 'i'etuluha, ma 'i'ahwanoiye, 'igwae, “Ceguma 'owa 'ino nuwatuhu gide, sowasowahina ma 'u'abihe bwebwe'anege.”

<sup>41</sup> Coinega Yesu 'i'ate muyemuyeya, ma nimanega loheyaina 'wapina 'i'abi tohoya, ma 'igwae, “Cehe gidemusa.” <sup>42</sup> Ta loheyaina 'wapina 'ibwebwe'ana mwayamwayauwa.

<sup>43-44</sup> Ma Yesu loheyaina 'iloina hepa'aleya, ma 'igwae, “Cutauya, ma gesowana taiya 'eta 'oina 'uhehepwailegau, ma hesi 'udumwalu topwaoli 'oina 'i'itago, ma 'ino pwaoli 'u'ebwaya Yehoba 'oina, to'aha gide 'ada loina Mosese 'oinega. Eema tomota sisanapugo 'abehega 'owa 'ubwebwe'ana pwaiya.”

<sup>45</sup> Ma loheyaina geya Yesu 'ina loina 'ihematamatane, ma hesi tomota 'oidiya 'ihepwaila dadaneya. Eeta Yesu geya sowasowahina ma 'iyawala 'asaedi 'alodiya, ta 'oinega 'inaowa yoho 'awawa ma nobwa 'imiyamiya, ma tomota tupwa mabwaiyana 'oidiyega sinaoma 'oina.

## 2

### *Yesu topeu 'i'abihe bwebwe'aneya*

*(Madiu 9:1-8; Luke 5:17-26)*

<sup>1</sup> Sabwelo tupwana sigumwala ma Yesu 'ihila Kapaneumi 'oina, ma wasana sihesagoheya 'abehega Yesu 'ihila pwaima. <sup>2</sup> Ma boda madouna hada 'alona ma wete 'ahwa'edaina 'atamanina si'eto'auta, ma Yesu 'iguguya 'oidiya.

<sup>3</sup> Ma boda topeu 'aigeda ma hewaina si'eweyama ma 'ana to'ahalaedi sitehata si'ahaliyama. <sup>4</sup> Ma sitohoya ma topeuina siluhuwe Yesu 'oina, ma geya sowasowahidi, weyahina boda 'imadou hedada, eeta si'ahala haneheya hada tabwana, ma 'ana 'atoha sibwaleya, 'igumwala eeta topeuina ma hewaina sihedawedaweya, Yesu matana silaguya. <sup>5</sup> Coinega Yesu loheloheyaedi 'idi hemisa 'isanapuya ma topeuina 'ihewgaeya, “Natugu, 'ino puiyao mabwaiyana yanuwamudiya.”

<sup>6-7</sup> Ma tupwana loina 'ana tohe'itao deina simiyamiya Yesu 'ina gwae sihesagoheya ma siboi 'atediya sinuwanuwatuhu, sigwae, “Loheya bewa 'igwae bwagabwaga ma Yehoba 'isinaliya. Geya 'eta taiya sowasowahina ma tomota 'idi puiyao 'inuwasamudi, beno tuwa Yehoba sowasowahina.”

<sup>8</sup> Ma hesi Yesu 'atena 'idi nuwatuhu 'isanapuya, 'oinega 'ihewgaediya, “To'aha weyahina beno gide wanuwatuhu 'esa? <sup>9</sup> Ma wanuwatuhuya 'abehega to gwae sowasowahina ma topeu bewa 'oina yagwaene, sowasowana yagwae, ‘Cino puiyao yanuwamudiya,’ bo sowasowana yagwae, ‘Cutoholo ma 'ino 'ebe'eno 'u'ahali ma 'utau.’

<sup>10</sup> Bewa 'oina wasanapugau 'abehega taugu Loheyaiguina ma'igu loina ma bale'uwa tomota 'idi puiyao yanuwamudi.”

<sup>11</sup> Coinega topeuina 'ihewgaeya, “Taugu bewa yahegwageo ‘Cutoholo 'ino 'ebe'eno 'u'ahali ma 'utauya 'ino 'asa.’”

<sup>12</sup> Ma 'itoholowa, 'ina 'ebe'eno 'i'ahaliya, ma boda matadiya 'ilatuwa. Nage 'oina boda mabwaiyadi nuwadi 'ipwanopwanowa, ma Yehobaina sihehepwatuwe, sigwaeya, “Paihowa bewa ma'aigeda tuwa ta'iteya.”

### *Yesu Libai 'ibwauweya*

*(Madiu 9:9-13; Luke 5:27-32)*

<sup>13</sup> Eema Yesu 'ihila hola Galili 'oina, ma wete boda si'autama, 'ihe'ita 'oidiya. <sup>14</sup> Cihe'ita 'igumwala ma 'inaonao. Ma loheya 'aigeda takesi 'ana to'ewa 'i'iteya 'ina hada 'ebe paihowa 'oina 'imiyamiya. Loheyaina Libai, ma tamana Alipiyo. Ma Yesu 'ihewgaeya, “Libai 'umuliyegau.” Coinega Libaiina 'itoholowa ma Yesu 'imuliyeya.

<sup>15</sup> Muliyetega Yesu ma'ana tomuliyao sinaoma Libai 'ina hada sabi 'ai, ma boda Yesu simuliyeya, taudi tolopui gide takesi 'ana to'ewao ma tolopui tupwadi wete, Yesu ma'ana tomuliyao ba'idadiyao simiyatoiya.

<sup>16</sup> Simiyamiya ta Palisi 'idi loina 'ana tohe'itao si'itediya, eeta Yesu 'ana tomuliyaoewedi 'oidiya sihesilala, sigwae, “To'aha weyahina 'imi tohe'ita takesi 'ana to'ewaowedi ma tolopuiyedi wete ba'idanao si'ai'ai hegogona?”

<sup>17</sup> Ma Yesu Palisiyao 'idi gwae 'ihewgaediya, ta 'ihewgaediya, “Taudi wahidi waiwaiidi genuwadi to'abihe bwebwe'ana, ma tolohalao hesi. Taugu yanaoma geya 'abehega tobwebwe'adi weyahidi, ma hesi topui ya'abihetedi.”



*Hudi 'ana sanapu**(Madiu 9:14-17; Luke 5:33-39)*

<sup>18</sup> Yoni 'ana tomuliyao ma wete Palisiyao sihudiya 'idi tapwalolo weyahina, 'oinega tupwadi loheloheya Yesu 'oina sinaoma ma sihesilala, sigwaeya, “Yoni 'ana tomuliyao ma wete Palisiyao 'adi tomuliyao sihudihudi, ma togidega 'a tomuliyao wedi geya sihudi?”

<sup>19</sup> Coinega Yesu gwae hegehegediyega 'ihewaediya, “Togidega, 'ilobwaineya ma hai 'ana toyo'owao sinuwagala ma sihudi 'eguma tohai meloheyana ba'idadiu simiyamiya? Geya wete. Ceguma tauna ba'idanao mabwaiyadi siyaliyaya. <sup>20</sup> Ma wanuwatuhuyahi 'eguma sauga 'inaonaoma tohaiina 'i'ebesinedi ee 'abwa sihudi, ma'idi nuwagala.”

<sup>21</sup> Ma 'aigeda wete gwae hegehegedi 'i'ebwaediya, 'igwae, “Geya sowasowahina ma 'ale'o 'ehauna tupwatupwana 'oinega ma 'wama miyamiyana tabwabwada, tabu ma taitaigalanaina 'i'eigala hila ma 'ihemadou. <sup>22</sup> Ma wete geya 'eta taiya we'aha waiwaina ma 'ehauna 'isiwa 'wapi 'ebeswa miyamiyaidi 'oidiya, tabu ma silotaigala ma we'ahina wete 'itasiwa ma 'ihepaipaisiye, ma hesi 'eguma tasiwa 'wapi 'ebeswa hauhaudimo 'oidiya.”

*Yesu toloina Sabati weyahina**(Madiu 12:1-8; Luke 6:1-5)*

<sup>23</sup> Sabati 'aigeda Yesu ma'ana tomuliyao tanoha 'alonga sitautau ma tomuliyao wedi 'idi tauya 'oina witi huwaina si'abilolodiya ma si'ai'ai. <sup>24</sup> Ma Palisiyao si'itediya ta Yesu sihegwaeya, sigwae, “Bada, togidega ta 'a tomuliyao wedi Sabati 'ana lolina siligehiya?”

<sup>25</sup> Eeta Yesu 'ihewaediya, 'igwae, “Buki He'asisi 'ana lele Debida weyahina 'eguma wahasili, wasanapu beno tauna ma'iyanao sigomaleya madouna. <sup>26</sup> Coinega Yehoba 'ina hada Debidaina 'iluhu ta beledi he'ah'e'asisina 'i'eweya ma si'aiya. Belediina ma 'ana lolina 'abehega topwaolimo 'adi tagwala ma si'ai. Ma tuwa sigomaleya, 'oinega topwaoli madouna, sanina Ebaya, 'itagwala ta si'aiya.”

<sup>27</sup> Wete Yesu 'ihewaediya, 'igwae, “Yehoba Sabati 'i'ebwaegita 'ida bwebwe'ana weyahina, geya 'abehega 'ihemasalahegita Sabati weyahina. <sup>28</sup> Ma hesi Sabati 'ana toloina taugu Loheyaiguina tuwa.”

## 3

*Yesu tonima meyomeyo 'i'abihe bwebwe'aneya**(Madiu 12:9-14; Luke 6:6-11)*

<sup>1</sup> Muliyetega Yesu 'ihilama hada tapwalolowa. Nage 'oina 'aigeda loheya nima meyomeyona 'ilobeya 'imiyamiya. <sup>2</sup> Ma Palisiyao Yesu si'e'ebubu, ma 'eguma loheya 'i'abihe bwebwe'ane Sabatiya nata sihe'ewa. <sup>3</sup> Coinega Yesu loheyaina 'ihewaeya, “Cutoholo 'ulagama,” ma loheyaina 'itoholowa ta 'ilaga.

<sup>4</sup> Cilagama. Yesu babadaedi 'ihewaediya, 'igwae, “Bewa 'igu hesilala 'oimiya: To nuwatuhi bwebwe'ana 'oida? Sabati 'oina tomota taledi, bo talohe'amasidi?”

<sup>5</sup> Ma Yesu 'i'ebubu yahiyahidiya ma'ina gamwasowala ma wete ma'ina nuwagala 'idi debapa'ala weyahina, ma loheyaina 'ihewaeya, “Nimau 'uyasi,” ma nimanaina 'iyasi hedumwaluya ma 'ibwebwe'ana.

<sup>6</sup> Coinega Palisiyao ma'idi gamwasowala silatuwa, ma Helodi 'ina boda mahetediyao siloiloina togidega Yesu silohe'amasii 'ese.

*Boda Galili holaina*

<sup>7</sup> Yesu 'i'ebesinediya ma'ana tomuliyao wedi sidobiya Galili holai, ma boda madouna simuliyeyama. <sup>8</sup> Bodaedi bewa Yesu 'ina paihowao wasana sihesagoheya, ta Galiliyega ma Yudiyaega ma Yelusalemega ma Idumea tupwanega ma Yolidani hali tupwega ma wete 'asaedi Taiya ma Saidoni deidiyega si'eto'utama.

<sup>9-10</sup> Weyahina Yesu tolohalao 'i'abihe bwebwe'aneidiya, eeta tolohalao wedi baibaiwadi siheduidui, nuwanuwadi si'abitoho, 'oinega Yesu 'ana tomuliyao wedi 'ihewaediya,



“Waga weyahigu wa'eweyama, ma 'eguma tomotaedi siheduidui hedada, yagelu wagai.”

<sup>11</sup> Ma taiyawedi tomota hi'ahi'a 'oidiya siluhuwa, ma 'eguma Yesuina si'ita sibe'u ma si'eno talutalubu'i matana ma sibwaubwau, sigwae, “Cowa Yehoba Natuna.” <sup>12</sup> Ma Yesu 'iloina pa'alediya, 'igwae, “Sahena wabwaubwau ma wahepwailegau 'abehega Taugu Yehoba Natuna.”

*Yesu 'ana tomuliyao site tuwelo 'ihesinuwediya*  
(Madiu 10:1-4; Luke 6:12-16)

<sup>13</sup> Muliyetega 'oyai 'ihaneya, ma tupwadi 'ana tomuliyawedi 'ihesinuwediya ma 'ibwauwediya, sihanema 'oina. <sup>14-15</sup> Ma 'ihewawediya, 'igwae, “Comi wate tuwelo yahesinuwegomiya ma 'omi ba'idagwao tamiyamiya, ma muliyetega yahewasaegomi 'asa tupwadi 'oidiya, ma waguguya ma waiwai 'oinega hi'ahi'a tomota 'oidiya waulalatuhe.”

<sup>16</sup> Ma sanidi bewa: Saimoni, tauna 'ibwauweya Pita. <sup>17</sup> Ma wete Yemesa ma tasina Yoni, taudi Sebedi natunao, ma Yesu 'ibwauwediya Bowanage (ma Bowanage 'ana nuwasabwalena 'abehega taudi tutu gide). <sup>18</sup> Ma wete Andulu ma Pilipi ma Batolomiu ma Madiu ma Tomasi, ma Yemesa 'ina waliyesa, tauna Alipiyo natuna, ma Tadiyasi ma Saimoni 'ina waliyesa, tauna to'ala'ohe'ohe madouna Isileli 'ina miyawasi Loma weyahina. <sup>19</sup> Ma wete Yudasa Isakaliyota, tauna 'abwa Yesu 'itebae.

*Tomudulele weyahina*  
(Madiu 12:22-32; Luke 11:14-23; 12:10)

<sup>20</sup> Yesu 'ihila 'asai, ma boda madouna si'autama, ma geya sowasowahina Yesu ma'ana tomuliyawedi si'aiyawasi eema si'ai. <sup>21</sup> Ma 'ina susuwao sihesagoheya 'abehega Yesu geya 'ida 'aiyawasiya, 'oinega sinaowa 'abehega sitoeyama, sigwaegwae, “Ciheyauyaule pwaiya.”

<sup>22</sup> Ma loina 'ana tohe'itao tupwadi Yelusalemega sidobima, ma Yesu 'ina paihowa madouna si'iteya, ma sigwae, “Loheya bewa 'ihetopaihowa weyahina welabana 'idi bada beno Tomudulele 'ilemeleme, ma tauna 'ina waiwaiyega welabanao 'ipa'ipa'idi.”

<sup>23</sup> Coinega Yesu loheloheyaowedi 'ibwauwedima ma gwae hegegediyega 'ihe'ita 'oidiya, 'igwae, “To'aha weyahina Tomudulele 'abehega tauna 'iyanao 'ipa'idi?” <sup>24</sup> Ma wete 'igwaeya, “Ceguma 'aigeda 'ebeloina 'oina loheloheya siwatahidi ma siboi silo'aleha hiladi, 'abwa 'ebeloinaina 'iwe'a ma 'ibe'u. <sup>25</sup> Wete 'eguma susu 'aigeda ma siwatahi ma siboi silo'aleha hiladi, 'idi miya 'igala. <sup>26</sup> Tomudulele wete gide, 'eguma ma'iyanao siboi silolo'aleha hiladi, 'abwa 'ina 'ebeloinaina 'ibe'u, ma 'igumwala hataya.

<sup>27</sup> “Cebe'ita 'aigeda wete loheya waiwaina, beno Tomudulele 'ina hada: Geya sowasowahina 'aigeda taiya 'iluhu tohewaiwaiina 'ina hada ma 'ina tobwatobwa 'i'ewadi, ma hesi 'eguma 'aigeda loheya gulaha 'oinega tohewaiwaiina nimana ma 'ahena 'ipai nugetedi, ee 'abwa 'iluhu 'ina hada, ma tobwatobwa 'i'ewadi.

<sup>28</sup> “Coinega bewa yahegwae bwaibwainigomi 'abehega tomota 'idi puiyao ma 'idi gwae galagala mabwaiyana Yehoba 'ida nuwasamudi, <sup>29</sup> ma hesi 'aigeda tuwa geya, beno 'eguma taiya Yaluyaluwa Tabuna 'i'ahwa galagalae, Yehoba nata geya 'inuwanuwam, ma bewa mumuga galanaina 'oina 'imiya hataya.”

<sup>30</sup> Bewa gide Yesu 'igwae 'esa weyahina sigwaegwae 'abehega tauna 'oina hi'ahi'a 'iluhuwa.

*Yesu sinana ma tasinao 'oina sinaowa*  
(Madiu 12:46-50; Luke 8:19-21)

<sup>31</sup> Eema Yesu sinana ma tasinao silatuwa ma 'atamana sitoholowa, ma gwaemo sihesawaeya Yesu 'oina ma 'abehega 'ihapwesa 'oidiya. <sup>32</sup> Ma tomotaedi Yesu deina simiyatoiya, ma sihegwae, “Bada, sinau ma tasimwao wa'ita latu 'atamana, nuwanuwadi 'owa.”

<sup>33</sup> Yesu 'ihewawedi hilediya, “Taiya sinagu? Ma taiyawedi tasigwao?” <sup>34</sup> Ma 'ana tomuliyawedi deina simiyatoiya 'i'e'ebubudi, ma 'igwaeya, “Wa'ita bewa taudi sinagu

ma tasigwao. <sup>35</sup> Taiya 'owa 'eguma Yehoba 'ina nuwatuhuina 'umulimuliya, 'owa beno tasigu bo nuhugu, nuwana sinagu.”

## 4

*Gwae hegehegedi tosaweyana weyahina*  
(Madiu 13:1-9; Luke 8:4-8)

<sup>1</sup> Muliyetega wete Yesu 'ihila hola Galili papalina sabi he'ita, ma boda madou hedade si'eto'utama, 'oinega Yesu waga 'aigeda 'i'aha'ahai holai 'oina 'igeluwa, 'imiyatoiya, ma boda madouna sitoholowa 'oya'oya.

<sup>2</sup> Ma Yesu gwae hegehegedi baibaiwana 'oidiyega 'ihe'ita 'oidiya, 'igwaeya, <sup>3</sup> “Wahesagohe: Tobegula 'aigeda 'ina tanoha 'inaowa ma witi patuna 'isaweyanediya, <sup>4</sup> ma tupwana patu 'edai sibe'uwa, ma kwasumo si'itediya, ta sitowa dobiya ma si'aidiya. <sup>5</sup> Ma tupwana patu bale'u loda'uda'uleina 'oina sibe'uwa ma sibwala mwayamwayauwa, weyahina bale'uina 'i'iuna, <sup>6</sup> 'oinega hala 'i'alasidiya ma siwelaiya, weyahina geya bale'u gogaina siloba. <sup>7</sup> Ma tupwadi patu talitali 'oidiya sibe'uwa ma sibwala hebwehebweyiya, ma geya sowasowahina ma patuwedi sihuwa, weyahina talitali 'ihewaiwaiya ta 'isahila he'amasidiya. <sup>8</sup> Ma hesi tupwana patu bale'u bwebwe'ana 'oina sibe'uwa, ma sibwalama sihemadouwa ma sihuwa, ma tupwana patuwedi huwaidi 'adi baibaiwa teti, ma tupwadi sikisiti, ma wete tupwadi handeledi.

<sup>9</sup> “Ceguma matenami, gwae bewa wahesagohe.”

*To'aha weyahina gwae hegehegedi*

<sup>10</sup> Muliyetega boda sisawala ma Yesu 'iboinamo, ma tupwadi tomota ma 'ana to-muliyao site tuwelowedi ba'idadiyao sinaoma, ma Yesu 'oina sihesilala, sigwaeya, “Cino gwae hegehegedi to'aha 'ana nuwasabwalena?”

<sup>11-12</sup> Ma Yesu 'igwaeya, “Comi moisa Yehoba 'oimiya 'itagwala ma 'ina lolina huhuna 'ana tosanapuwo, ma hesi tomota baibaiwadi nuwadi 'i'elopota ma gwae hegehegedimo sihehesagohe, ma 'ana nuwasabwalena 'abwa geya sisanapu, ma wete 'ana sanapu si'ebe'ebese ma geya'abwa silobaloba. Coinega wete geya'abwa 'idi puiyao 'oidiyega sinuwanuwabui ma geya'abwa Yehoba 'inuwanuwa samudi.”

*Tosaweyana 'ana lihasa*  
(Madiu 13:18-23; Luke 8:11-15)

<sup>13</sup> Ma Yesu 'ihewaediya, 'igwaeya, “Togidega, 'igu gwae hegehegediyedi 'adi sanapu geya 'oimiya, 'awa? Ma togidega tupwadi gwae hegehegedi bewa gide wada sanapu 'esedi? <sup>14</sup> Tobegulaina Yehoba 'ina gwae gide patu 'isaweyaneya. <sup>15</sup> Tupwadi patuwedi sibe'uwa 'edai, gide tomotaedi Yehoba 'ina gwae sihesagoheya, ma Seitani 'inaoma eema gwaeina 'oidiyega 'i'ewa yahulediya.

<sup>16</sup> “Wete gide patuwedi bale'u loda'uda'uleina 'oidiya sibe'uwa, 'adi sanapu 'abehega 'eguma tomotaedi Yehoba 'ina gwae sihesagoheya ma ma'idi yaliyaya sitagwala, <sup>17</sup> ma hesi geya walowalodi pa'alidi 'ilagudi, 'oinega sauga 'i'iuna tuwa simiyamiya, ma 'abwa to sauga 'oina Yehoba 'ina gwae 'ana hemisa weyahina mwau nuwana 'aleha siloba, beno 'oina sibe'u mwayamwayau.

<sup>18</sup> “Ma patuwedi taudi talitali 'oidiya sibe'uwa 'adi sanapu 'abehega tomotaedi taudi Yehoba 'ina gwae sihesagoheya, <sup>19</sup> ma hesi 'idi nuwatuhu bale'u ma wasawasa weyahidi, 'oidiyega Yehoba 'ina gwae silohe'amasiya, ma geya sowasowahina huwaidi silagu.

<sup>20</sup> “Ma 'ane patuwedi bale'u bwebwe'ana 'oina sibe'uwa, 'ana nuwasabwalena 'abehega tomotaedi taudi ma'idi tagwala moisa Yehoba 'ina gwae sihesagoheya, 'oinega huwaidi bwebwe'adi ma baibaiwadi 'ilagudiya. Tupwadi huwaidiyao teti, ma tupwadi sikisiti, ma tupwadi handeledi.”

*Gwae hegehegedi mayale weyahina*  
(Luke 8:16-18)

<sup>21</sup> Ma Yesu 'oidiya 'igwaeya, “Geya'abwa mayale 'asi'asilalaina ta'ahusam walata nuwana sita 'oidiya, ma hesi 'atamana talagu ma 'i'asilala, <sup>22</sup> ma 'oinega to'aha 'atemiya wadawwediya 'abwa 'asilalaina 'i'abihe latuhedi ma ta'itadi. <sup>23</sup> Ceguma matenami, gwae bewa wahesagohedi.”

<sup>24</sup> Ma wete 'ihewaediya, “Wanuwatuhuyahi ma gwae wahesagohe bwaibwaini, weyahina to'aha 'omi 'imi 'ebwaya, wete gide maisa wa'ewa, ma hesi ma 'ana loheposeyana. <sup>25</sup> Weyahina 'eguma taiya Yehoba 'ina tobwatobwa 'oina 'imiyamiya, tobwatobwaina 'iloheposeyane. Ma 'eguma taiya geya Yehoba 'ina tobwatobwa 'oina, eema to'aha bwebwe'ana 'oina 'imiyamiya Yehoba 'abwa 'oinega 'i'ewa yahuledi.”

*Gwae hegehegedi hewana weyahina*

<sup>26</sup> Ma Yesu 'igwaeya, “Yehoba 'ina lolina tomota 'oidiya gidemusa hewana loheya 'ina tanoha 'idauniya, <sup>27</sup> ma loheyaina 'i'enowa ma 'itoholo sabwelo ma nihuwana, ma hewanaibwala ma sipilipili, ma hesi 'idi bwalaina 'ana lamu geya 'ida sanapuya. <sup>28</sup> Weyahina bale'u 'iloloina 'idi bwala ma 'idi huwa weyahina. <sup>29</sup> Ma muliyetega 'abwa huwaina 'imatuha, 'oinega toni tanohaina 'ihe'ale 'etahi.”

*Gwae hegehegedi patu 'i'iuna weyahina*

<sup>30</sup> Yesu wete 'ihewaediya, 'igwaeya, “Togidega Yehoba 'ina hetoloina 'ana gwae hegehegedi ya'abi he'asilala 'ese 'oimiya? <sup>31</sup> Nuwana gide 'aigeda 'aiwe patuna, 'oina yagwaebala, beno seyala,\* weyahina seyala patuna 'i'iuna, <sup>32</sup> ma 'eguma ta'uma ma 'ibwala ma 'ihe'aiwe ma lahanao madoudi 'ilagudi, ma laganaowedi logulogudi 'oidiya bwawumowao 'idi nehwa si'abidi.”

*Yesu 'ina gwae hegehegedi baibaiwana  
(Madiu 13:34-35)*

<sup>33</sup> Yesu 'ina guguya 'oina gwae hegehegedi baibaiwadi wete 'oidiyega 'ihehe'ita. Ceguma tomota 'oidiya 'imeyameyahana, ma sida sanapu. <sup>34</sup> Weyahina tauna sauga baibaiwana gwae hegehegediyega 'ilologuguya boda 'oidiya, ma 'ana tomuliyao 'oidiya gwae hegehegediyedi 'ilihalihasi.

*Yesu yaumai ma dibana 'iloinaediya  
(Madiu 8:23-27; Luke 8:22-25)*

<sup>35</sup> Lahilahiya Yesu 'ina he'ita wagai 'ilosalohiya, ta 'ana tomuliyao 'ihewaediya, “Wagelu ma tahabala hali tupwa.”

<sup>36</sup> Eeta sigeluwu ma sihabala ma boda holai si'ebesinediya, ma tupwadi wete wagaina simulimuliyede. <sup>37</sup> Ma wediliya madouna silobeya, ta dibana wagai 'isiwasiwa taona ma 'i'iuna sidamana. <sup>38</sup> Ma Yesu waga gwahuna 'ana 'ulide 'ilaguya ma 'i'eno sineya, ma 'ana tomuliyao silohanohanoya ma sigwaeya, “Bada, 'utoholo ma 'ulememai; 'i'iuna 'a'amasa.”

<sup>39</sup> Ma Yesu 'itoholowa, ta yaumai ma dibana 'iloinaediya, 'igwae, “Tuwa! Cu'emutugo ma 'udaumwala.” Coinega yaumai 'ilolaguwu ma hola mabwaiyana 'idaumwala. <sup>40</sup> Ma 'ana tomuliyao 'ihewaediya, 'igwae, “To'aha weyahina wa'ateyohowa? Togidega ta geya 'imi hemisamo?”

<sup>41</sup> Ma nuwadi 'ihewapanowanowa ma si'ateyohowa, ma siboidimo 'oidiya sigwaeya, “Loheya to'ato'aha bewa, yaumai ma dibana 'enana simuliyeya?”

5

*Yesu hi'ahi'a 'ipa'idiya ma sihapwesa  
(Madiu 8:28-34; Luke 8:26-39)*

<sup>1</sup> Eema sihabala ma siluhuwu meGelasine 'idi gadowa. <sup>2</sup> Siluhuwu ma Yesu 'isuluwu dabala ma loheya 'aigeda 'ilobeya hi'ahi'a\* 'oina, 'ina 'ebemiyaina beno dluha, 'oinega 'ilatuma, <sup>3-4</sup> ma duluhaina beno tomota 'adi galiha. Ma loheya bewa mwalo tomota sitohoya ma 'abehega sipai gulahega (beno seni 'oinega), ma geya sowasowahidi,

weyahina gulahaedi sauga baibaiwana 'iupaupadi nimanega ma 'ahenega. Geya 'eta sawasawahina ma 'i'abiyahi, eeta 'idena sinediya ma 'itauya pwatula. <sup>5</sup> Nihuwana ma sabwelo mabwaiyana 'oidiya galiha ma 'oyai 'i'aso'asona, ma taunamo da'uleyega 'ihunuhunu hila.

<sup>6</sup> Ma loheyainaina Yesu bwagebwagega 'i'iteyama, ma 'ipilima ta Yesu matana 'i'etuluha. <sup>7</sup> Cabwa tuwa 'i'aso'asona ma 'igwae, “Yesu yo, 'owa Yehoba tohewaiwai hedada Natuna, to'aha 'abehega 'utohotoho ma 'upaihowa 'oiguwa? Ya'ahwanoi 'oiuwa Yehoba saninega sahena 'u'abi'abi hemuyemuyegau.”

<sup>8</sup> Gwae bewa 'igwaeneya weyahina Yesu 'ihewgae pwaiya, 'igwaeya, “Hi'ahi'a, loheya bewa 'oinega 'ulatu.” <sup>9</sup> Ma Yesu wete 'ihesilala 'igwae, “Togidega saniu?” Ma tauna 'igwaeya, “Sanigu Baibaiwa Hedada, weyahina mabodaima loheya bewa 'alona 'amiyamiya.” <sup>10</sup> Ma 'i'ahwa'ahwanoi 'ohe'ohe Yesu 'oina, 'igwaeya, “Sahena 'asa bewa 'oinega 'uulaula latuhemai. <sup>11-12</sup> Ma hesi 'uhewasaemai ma 'aluhu bawe bodaidi nage siduladula 'oyai.”

<sup>13</sup> Yesu 'itagwalediya ma hi'ahi'aedi loheyaina 'oinega silatuwa ma siluhuwa bawe 'oidiya, eeta baweyedi sihebuwa ma mabwaiyadi sipili butubutuwa, ma 'ade'adewala si'eloula holai ma sidamana. Baweyedi 'adi baibaiwa gide tutausani.

<sup>14</sup> Coinega bawe 'adi to'itayahinao 'idi matautega siden ma silatuwa 'asai, ma ginauledi si'itediya mabwaiyana sihewasaediya 'asa madouna ma 'asa 'i'iudi tomotaedi 'oidiya. Coinega toni'asa sinaoma ma 'abehega siboimo matadiyega si'ita togidega ta 'ilatuwa.

<sup>15</sup> Coinega Yesu 'oina sinaoma, ma loheyaina si'iteya, mwalo hi'ahi'a 'alona simiyamiya, debana 'idumwaluwa ma 'ale'o 'i'oteya ta 'imiyamiya. Nage 'oina mabwaiyadi si'ateyohowa.

<sup>16</sup> Coinega tohalewasaedi tomota 'oidiya sihe'ote'oteteleya togidega loheyaina 'ibwebwe'ana 'esa ma bawe togidega sihesilae 'esa. <sup>17</sup> Nage 'oina toni'asa sihegaina ma Yesu silososome ma 'abehega 'idi tupwa 'i'ebesine. <sup>18</sup> Coinega Yesu wagai 'idobidobi sabi gelu, ma loheyaina nige 'i'abihe bwebwe'anya Yesu 'oina 'i'ahwanoiya, 'igwae, “Bada, sawasawahina yamuliyego?” <sup>19</sup> Ma Yesu 'igwaeya, “Geya sawasawahina, ma hesi 'uhila ma 'utau 'ino susuwao 'oidiya 'uhe'ote'otetele Yehoba 'ina 'atemuyemuyega 'i'abihe bwebwe'anegowa, eema sihesagohe.”

<sup>20</sup> Coinega loheyaina 'itauya 'ebeloina Dikapoli 'asaina nima 'elu'eluwa 'oidiya, ma Yesu 'ina paihowao waiwai weyahidi 'ihe'ote'otetela, ma tomota mabwaiyadi sihesagoheya, ta nuwadi 'ihewwanopwanowa.

*Yesu wahiwahine 'eluwa 'i'abihe bwebwe'enediya  
(Madiu 9:18-26; Luke 8:40-56)*

<sup>21</sup> Yesu ma'ana tomuliyao sihabala hila, ma boda madouna si'autama gadowaina 'oina. <sup>22</sup> Eema loheya 'aigeda sanina Yailo, loheyaina tauna hada tapwalolo 'ana to'itayahina, 'inaoma ma Yesu 'ilobeya, ma matana 'ituluha, <sup>23</sup> ma 'i'ahwanoi waiwai, 'igwaeya, “Bada, natugu mewahinena 'ana lohala 'imwau hedada. Tauna gwamasine tuwa. Nuwanuwagu 'unaoma 'u'abitoho ma 'ibwebwe'ana, ma sahena 'i'ama'amasa.”

<sup>24</sup> Eeta Yesu ba'idana sinaonao, ma boda madouna sihehemulitabubu ma siheduidui 'edai. <sup>25</sup> Bodaedi 'alodiya wahine 'aigeda ba'idadiu ma'ana lohala. Lohalaina beno bweyahina 'idaudau bolime tuwelo, ta 'abwa tuwa 'idaudau. <sup>26</sup> Mwalo to'oba baibaiwadi 'oidiya 'ina mane mabwaiyana 'ilohegumwaliya, ma hesi 'idi paihowaina 'oina geya 'ida bwebwe'ana tohona, ma hesi 'ana lohalaina 'imadomadou.

<sup>27-28</sup> Wahineina Yesu 'ihemuli tabubuweya weyahina mwalo wasana 'ihesagoheya, ma 'atena 'inuwanuwatuhu, 'igwaeya, “Ceguma tuwa Yesu 'ana 'ale'omo ya'abitoho beno nata yabwebwe'ana.” <sup>29</sup> Coinega 'inaowa deina ma 'ana 'ale'oina 'i'abitohoya, ma bweyahina 'ina dau 'ilolagu mwayamwayauwa, ma 'iboi 'ana 'amna 'ilotohoya 'abehega 'ibwebwe'ana pwaiya.

<sup>30</sup> Ta Yesu 'ilotohoya 'abehega waiwai 'oinega 'ilatuwa, ma 'i'ita lohihila, ma boda 'ihesilalediya, 'igwae, “Taiya 'agu 'ale'o 'i'abitohoya?”

<sup>31</sup> Eeta 'ana tomuliyawedi sihegwaeya, “Bada, bo'i 'u'ita pwaiya boda simiya sakowasiyegowa, ma siheduidui, ma to'aha weyahina 'uhesilala taiya 'i'abi tohogowa?”

<sup>32</sup> Ma Yesu 'ilo'ita dadana ma 'abehega 'i'ita taiya 'ina waiwai 'oina 'i'habala. <sup>33</sup> Ma wahineina 'iboi 'ilotohoya nage 'oina bwebwe'ana 'ilobeya, ma 'inaoma ma'ina dedela ma wete ma'ina 'ateyoho, eeta 'ibe'uwa ma 'i'eno talutalubu'iya Yesu matana, 'ihewaila bwaibwaina 'abehega tauna 'ipaihoweya.

<sup>34</sup> Eeta Yesu 'igwaeya, “Natugu, 'ino hemisege ta 'ubwebwe'ana. Cutoholo ma'ino yaliyaya 'utau. Cino lohalao mabwaiyana sigumwala pwaiya.”

<sup>35</sup> Saugaina 'oina Yesu 'igwaegwae wahineina 'oina, ma tupwadi loheloheya wasa si'eweyama Yailo 'ina hadega, sigwaeya, “Natuu yawasina 'igumwala, ma sahena wete tohe'itaina 'ina sauga 'u'abi'abiyahi.”

<sup>36</sup> Ma Yesu wete wasaina 'ihesagoheya, ta Yailo 'ihewwaeya, 'igwae, “Sahena 'u'ate'ateyoho, ma hesi 'uhemisegau.” <sup>37</sup> Coinega Yesu boda madouna 'i'ausidiya ma sahena simulimuliye, ma hesi 'ana tomuliyao sitetoi ba'idanao, beno Pita ma Yemesa ma tasina tauna Yoni, <sup>38</sup> sinaonao ta Yailo 'ina hada silatuwa, ma wui ma dou madouna sihesagoheya. <sup>39</sup> Ta Yesu 'iluhuwa ma 'ihewwaediya, “To'aha weyahina wawuiwui ma wadoudou? Gwama bewa geya 'i'amasa, tuwa 'i'eno'eno.” Ma sihenamaeya. <sup>40</sup> Sihehenama, eeta Yesu 'ipa'idiya ta silatuwa 'atamana, ma gwama tamana ma sinana ma'ana tomuliyao sitetoiyedi Yesu ba'idanao siluhuwa gwamaina 'ina 'ebe'enowa. <sup>41</sup> Ma gwamaina nimana Yesu 'i'abiya ma 'igwaeya, “Talita kumi.” Ma 'ana bui, “Gwamasine 'utoholoma.”

<sup>42</sup> Nage 'oina 'itoholo mwayamwayauwa ma 'iyawala, weyahina 'ana bolime tuwelo 'ilobeya. Tamana ma sinana nuwadi 'ihewwanopwanowa moisa. <sup>43</sup> Ma Yesu 'i'ausidiya, 'igwae, “Sahena taiya 'eta 'oina wahehewwaila 'igu paihowa bewa weyahina, ma hesi gwama 'ana wa'ebwae ma 'i'ai.”

## 6

### *MeNasaleta Yesu siguiipaileya*

*(Madiu 13:53-58; Luke 4:16-30)*

<sup>1</sup> Yesu ma'ana tomuliyao 'asa nage si'ebesineya ma sihilama 'ina 'asa. <sup>2</sup> Ma Sabatiya 'idi hada tapwalolo 'oina 'iluhuwa 'ihehe'ita, ma tomota sihesagoheya, ta mabwaiyadi nuwadi 'ihewwanopwanowa 'ina sanapu ma 'ina paihowa weyahidi, ma sigwaeya, “Loheya bewa to'ehega 'ina sonoga 'ilobeya? Ma wete paihowaedi waiwai nimanega 'ipaihowediya ma to'ehega waiwai 'ilobeya?” <sup>3</sup> Ma sigwaeya, “Loheya bewa to'abi hada tuwa. Ma sinana Meli, ma tasinao Yemesa ta Yosese ta Yudasa ta Saimoni, ta wete nuhunao ba'idadao tamiyamiya, 'awa?” Coinega Yesu silogwahateya.

<sup>4</sup> Ma Yesu 'ihewwaediya, 'igwae, “Palopitao sihe'asisiyanedi hali 'asa 'oidiya, ma taudi 'idi 'asa geya. Weyahina tuwa taudi 'idi bodao, wete 'idi susuwao, silogwahatedi.”

<sup>5-6</sup> Coinega Yesu nuwana 'ihewwanopwanowa weyahina tomotaedi geya sihemise, eeta geya sawasawahina ma paihowa waiwai 'ebwa 'ipaihowadi. Beno tuwa tolohalao tupwadi 'i'abi tohodiya ma sibwebwe'ana.

### *Yesu 'ana tomuliyao 'ihetunediya sabi paihowa*

*(Madiu 10:1, 5-15; Luke 9:1-6)*

Coinega Yesu 'isakowasiya 'asa 'oidiya, 'ihehe'ita. <sup>7</sup> Ma 'ana tomuliyao site tuwelo 'ibwauwediya, ma 'iloinaediya ma 'abehega 'eluwa 'eluwa sisakowasi 'asa 'oidiya, ma wete loina ma waiwai 'i'ebwaediya ma 'oinega sawasawahidi hi'ahi'a tomota 'oidiyega siula latuhedi, <sup>8</sup> ta 'ina guguya 'oina 'iloinaediya, 'igwae, “Geya'abwa 'eta to'aha wa'ewa'ewa. Sahena 'e'ahai nuwana peha bo mane. Beno tuwa 'imi guna nimamiya, <sup>9</sup> ma 'ami butu wa'otedi, ma hesi sahena 'wama 'eluwa wa'ote'otedi.”



<sup>10</sup> Ma wete 'ihewagaediya, “Ceguma to hada 'oina sibwauwegomiya ma 'oina waluhulu, hadaina 'oina wahehada ma 'ana siga tupwaina wa'ebesine. <sup>11</sup> Ma hesi 'eguma 'asa tupwadi 'oidiya walatu ma tomotaedi geya sibwauwegomi ma wete geya 'imi loguguya sihesagohe, 'asaedi 'ahemi gawalana 'oina walohutuhutu yahule ma wa'ebesine, ma 'oinega wahe'itadi 'abehega nata mwau 'oidiya 'ilatu.”

<sup>12</sup> Coinega 'ana tomuliyaowedi sisakowasiya 'asa mabwaiyana 'oidiya, siguguya ma 'abehega tomota mumugadi galana silogwahatedi ma sinuwabui, <sup>13</sup> ta hi'ahi'a tomota 'oidiyega siula latuhedi ta tolohalao mabwaiyadi wete siheholoidi ma sibwebwe'ana.

*Yoni to'abihebabitaiso 'ina 'amasa  
(Madiu 14:1-12; Luke 9:7-9)*

<sup>14</sup> Coinega Yesu wasana tomota sihewasa dadaneya 'asa mabwaiyana 'oidiya, ma Kini Helodi 'ihesagoheya. Weyahina tupwana tomota sigwaegwae 'abehega, “Yoni to'abihebabitaiso 'amasega 'itoholo hila, ma ma'ina waiwai madouna 'ipaipaihowa.” <sup>15</sup> Ma tupwadi sigwae 'abehega, “Tauna tuwa Ilaitiya.” Ma wete tupwadi sigwae, “Tauna palopita 'aigeda gide palopitaowedi nugenugetaidi.”

<sup>16</sup> Helodi wete wasana 'ihesagoheya ma 'igwae, “Nuwana tauna Yoni to'abihebabitaiso. Mwalo yaloh'e'amasiya, ma nuwana 'itoholohila.” <sup>17</sup> Weyahina mwalo Helodi Yoni 'i'abiyahiya ma deliya 'ipaiya, ma Yoni 'ana 'abiyahina lamuna beno wahine 'aigeda sanina Helodiyasa, beno Helodi tasina Pilipi mwanena ma Helodi 'i'eweya, ta ba'idana sihaiya. <sup>18</sup> Eema Yoni Helodi 'ihewagaeya 'abehega, “Nage geya mumuga bwebwe'ana,” weyahina tasina mwanena ma 'ihaiya.

<sup>19</sup> Ma Yoni 'ina guguyaina weyahina wahineina 'inu wagala ma nuwanuwana Yoni 'ida lohe'amasi, ma hesi geya sawasawahina, <sup>20</sup> weyahina Helodi 'inu wahiya 'abehega Yoniina tauna loheya dumwadumwaluna Yehoba 'ina topaihowa 'aigeda, 'oinega Helodi Yoni 'ihe'asisiyeya, ma sauga baibaiwana Helodi nuwanuwana ma Yoni 'ina gwae 'ihesagohe, ma weyahina 'i'ateyohowa.

<sup>21</sup> Eeta Helodiina 'ina sauga li'u 'ana sabwelo 'ilatuwa ma Helodiyasa 'eda'eda 'inuwalobeya Yoni 'ana lohe'amasa weyahina. Sabwelo li'u 'ana 'ebenuwa tuhuyahina 'e'ahaina si'atububuya, ma tupwadi taumanao sitoedima 'aiina 'oina. Taumanaedi gabemani 'adi tohanugetao ma tolo'aleha 'adi tohanugetao, ma wete tupwadi Galili 'asaina 'adi babadao.

<sup>22</sup> Saugaina Helodiina ma 'ana taumanao si'ai'ai, Helodiyasa natuna mewahinena 'iluhuma matadiya ma selowega 'i'abihe yaliyayediya. Eeta Helodi gumalaulauina 'oina 'igwae helauwa 'igwae, “Ceguma to'aha 'ino hesinuwa ma 'oiguwa 'u'ahwanoi, yatagwala 'oiuwa.” <sup>23</sup> Ma wete 'ibwauhaneya tamada, 'igwae, “Moisa tuwa yagwae hemisa, to'aha nuwanuwau ya'ebwaego, 'eguma 'u'ahwanoi 'igu 'ebeloina weyahina yawatahi, ma tupwana ya'ebwaego.”

<sup>24</sup> Coinega gumalaulauina 'ihapwesa, ma 'itauya sinana 'oina, 'ihesilala, 'igwae, “Sinagu to'aha 'ino nuwatuhu ma kini 'oina ya'ahwanoiye?” Ma sinana 'igwae, “Kini 'uhewgae, 'ugwae, 'Nuwanuwagu Yoni to'abihebabitaiso mwaguna.’”

<sup>25</sup> Eeta gumalaulauina 'ilomwayamwayauwa, ma 'ihila kina 'oina, 'igwae, “Nuwanuwagu sauga bewa Yoni to'abihebabitaiso mwaguna gaeba 'oina 'udo'o, ma 'u'ebwaegau.”

<sup>26</sup> Helodi 'inu wagala, ma geya sawasawahina ma 'iguipaila, weyahina 'ibwauhaneya tamada taumanaowedi wete matadiya, <sup>27</sup> eeta deli 'ana to'itayahi 'aigeda 'iloinaeya 'abehega 'itauya ma Yoni mwaguna 'i'upweyama. Ta 'oinega to'ita yahinina deliya 'itauya ma Yoni 'ani'ona 'i'upweya, <sup>28</sup> ta mwaguna gaeba 'ido'oya ta 'i'eweyama gumalaulauina 'i'ebwaeya, ma tauna 'i'ahaliya, 'itauyeya sinana 'oina.

<sup>29</sup> Ma Yoni 'ana tomuliyao 'ina 'amasa wasana sihesagoheya, ma sinaoma ma Yoni wahina si'eweya ma sigaliheya.



*Yesu boda 'ihe'aidiya**(Madiu 14:13-21; Luke 9:10-17; Yoni 6:1-14)*

<sup>30</sup> Ma Yesu 'ina topaihowao site tuwelo sihilama ma Yesu 'oina 'idi paihowa ma 'idi he'ita mabwaiyana sihepwaileidiya.

<sup>31</sup> Ma tomota baibaiwadi sinaonaoma ma sihilahila, ta 'oinega geya sawasawahina ma Yesu 'ana tomuliyao si'aiyawasi ma si'ai, 'oinega 'ihewaediya, 'igwae, “Tupwa bewa ta'ebesine ma tatauya yoho 'awawa, ma nobwa tupwana wa'aiyawasi.” <sup>32</sup> Eeta siboidimo wagai sigeluwa, ma sihabala 'aigeda tupwaina 'oina, beno yoho 'awawa.

<sup>33</sup> Ma bodaedi Yesu ma'ana tomuliyao wedi 'idi geluina si'iteya, ma sisanapuya tupwaina 'oina sitautauya, 'oinega taudi ma 'asa mabwaiyadi 'adi tomiyao wete mahetediyao 'edega sipilipili, ma silatu nugeta tupwainaina 'oina.

<sup>34</sup> Cabwa muliyetega waga 'iluhuwa ma Yesu 'isuluwa dabala, ma boda madouna nenegwala 'i'itediya ma 'i'ate muyamuyaediya, weyahina taudi gide sipiyao geya 'adi to'itayahinamo, 'oinega 'ihe'aleya ma sanapu baibaiwana 'ihe'itaeya 'oidiya.

<sup>35</sup> Ma lahilahiya 'ana tomuliyao wedi sinaoma, ma Yesu 'oina sigwaeya, “Bada, tupwa bewa yoho 'awawa ma sinala 'isopusopu, <sup>36</sup> 'oinega bodaedi bewa 'uhesumanedi, ma sitauya, ma 'adi sigimwane 'asai ma hada deidiya 'oidiya.”

<sup>37</sup> Ma Yesu 'ihewaediya, 'igwae, “Ma togidega? Comi geya sowana wahe'aidi, 'awa?” Ma 'ana tomuliyao sigwaeya, “Bada, geya sawasawahina, weyahina mabwaiyadi 'adi 'ana maisa gide tausani kina.”

<sup>38</sup> Ta Yesu 'ihesilalediya, 'igwae, “Hisa beledi 'oimiya. Watauya wa'ebesa.” Sitauya ma silobeya, ma Yesu sihegwaeya, sigwae, “Beledi nima ma silahana 'eluwa 'alobediya.”

<sup>39</sup> Coinega boda 'iloinediya ma mabwaiyadi simiyatoiya boda ma boda pwtatula 'oina. <sup>40</sup> Ceeta siwatahidiya simiyatoiya, boda tupwadi handeledi, ma boda tupwadi pipiti.

<sup>41</sup> Ma beledi nima ma silahana 'eluwaedi 'i'ewediya, ma galewa 'ilo'ita haneya ma 'igwae helau 'e'ahaiyedi weyahidi, ma muliyetega belediyedi 'ihisidiya ma 'ana tomuliyao wedi 'i'ebwaediya, eeta siheguyaiyediya. Ma silahana 'eluwaedi wete gidemusa 'ihisidiya ma 'i'ebwaediya. <sup>42</sup> Coinega mabwaiyadi si'aiya ma simwauyuwa.

<sup>43</sup> Ma beledi ma silahana tupwatupwadi sidomwa 'autediya ma kodo tuwelo silohema-hediya. <sup>44</sup> To'aiyedi loheloheyamo sihasilidiya 'adi baibaiwa gide paibi tausani.

*Yesu hola debanega 'itautau**(Madiu 14:22-23; Yoni 6:15-21)*

<sup>45</sup> Cigumwala ma 'ana tomuliyao wedi 'iloinaediya ma wagai sigelu, 'igwaeya, “Wagelu ma wanugeta Bedeseida hali tupwa, ma taugu 'abwa boda yahetauidi ma sihila 'idi 'asa.” <sup>46</sup> Coinega sigeluwa ma Yesu boda 'ihetauidiya, ma muliyetega 'ihaneya 'oyai sabi 'ahwanoi Yehoba 'oina.

<sup>47</sup> Ciboi pwaiya ma 'ana tomuliyao wedi ni'u 'awawa si'ada'adau, ma tauna 'iboinamo 'oya'oya, <sup>48</sup> 'i'itediya 'idi wose 'oinega wahidi 'isabulolowa, weyahina yaumai matadiyega 'itowatowama. Ma sauga 'i'iuna ma gona 'i'adale, eeta Yesu hola debanega 'itauya ma 'abehega deidiyega 'inao ma 'i'ebesinedi.

<sup>49</sup> Eeta 'ana tomuliyao wedi Yesu si'iteya hola debanega 'inaonaoma, ma 'idi nuwatuhu 'abehega welabana, <sup>50</sup> 'oinega simatauta ma siwuiya. Ma Yesu 'ihewaediya, 'igwae, “Sahena wa'ate'ateyoho. Taugu tuwa, 'imi Badaina.” <sup>51</sup> Ma wagai 'igeluwa ba'idanao ma yaumai 'igumwala. Ma nuwadi 'ihewpanopwanowa madouna, <sup>52</sup> weyahina Yesu 'ina waiwai lamuna geya sinuwa sabwalena. Ceguma saugenina tomota baibaiwadi 'adi beledi Yesu 'ihewguyaiya ma lamuna sida sanapuya ma 'oinega nuwadi 'ida sabwalena, ma hesi geya sida sanapuya, weyahina nuwadi 'i'elopota.

*Tolohalao 'i'abihe bwebwe'enediya tupwa Genesaleta 'oina**(Madiu 14:34-36)*

<sup>53</sup> Coinega sihabala tupwa Genesaleta gadowaina 'oina, siluhuwa, ma 'idi waga nage 'oina silohoya. <sup>54</sup> Ma saugaina sisuluma toni 'asaedi Yesu si'inaneya, <sup>55</sup> ma 'oinega

tomotaedi sihila 'asa mabwaiyana 'oidiya ma tolohalao si'ewedima 'ebe'eno 'oidiyega, ma Yesu 'oina sitauyediya, 'eguma sihesagohe to tupwa 'oina 'imiyamiya.

<sup>56</sup> Ma Yesu 'isakowasi tupwa mabwaiyana 'oidiya, tupwana 'asa madouna ma 'asa 'i'iudi ma tanoha 'oidiya. Ma tomota baibaiwadi 'idi tolohalao si'ewedima 'ebe maketi 'oidiya siyamwayamwa, ma si'ahwanoiyeya, sigwae, “Bada, sawasawahina 'ima tolohalaowedi 'a 'ale'o papalina si'abitoho?” Eeta Yesu 'oidiya 'itagwala. Coinega taudi 'ana 'ale'o si'abitohoya ta sibwebwe'ana.

## 7

### *MeYudiya tubudiyao mumugadi*

(Madiu 15:1-9)

<sup>1</sup> Ta Palisiyao ma lolina 'ana tohe'itao tupwadi wete ba'idadiyao Yelusalemega sinaoma ma Yesu 'oina sihegogona, <sup>2</sup> ma tupwadi 'ana tomuliyao si'ita lobediya manima bi'ibi'idi si'ai'ai, geya nimadi sideulidi.

<sup>3</sup> Weyahina Palisiyao ma wete meYudiya mabwaiyadi mumugadi tubudiyao wega tuwa gide, nugeta nimadi sideuli bwaibwainidi 'abwa si'ai. <sup>4</sup> Ma 'eguma 'ebe gimwane 'oinega sinaoma nimadi sideuli nugete 'abwa si'ai. Ma wete lolina baibaiwana tubudiyao 'oidiyega gaeba ma biyo ma walata 'adi deula weyahina simulimuliye.

<sup>5</sup> Coinega bewa Palisiyao ma lolina 'ana tohe'itaowedi Yesu 'oina sihesilala, sigwae, “To'aha weyahina 'a tomuliyao wedi tubudao 'idi lolina geya sihe'asisiyanedi, ma manima bi'ibi'idi si'ai?”

<sup>6</sup> Ma Yesu 'ihewgaediya 'igwae, “Comi to'e'abo'abo. Mwalona Aiseya palopita weyahimi 'igwae nugeta bwaibwaina, Yehoba 'ina gwae ta sileleya bewa gide: Tomotaedi 'ahwadiyega sihe'asisiyanegau, ma hesi 'atediyega geya.

<sup>7</sup> Ma wete 'oiguwa sitapwatapwalolo bwagabwaga, weyahina 'idi he'itao taugu geya 'oiguwega, ma hesi tomota tuwa 'idi nuwatuhuwega.”

<sup>8</sup> Ma Yesu 'ihewgaediya wete, 'igwae, “Mumugami galana! Yehoba 'ina lolina wadahweya ma hesi tubumiyao mumugadi wamulimuliyedi.”

<sup>9</sup> Ma wete 'igwaeya, “Cabehega 'omi tosanapu moisa, ma hesi geya; weyahina Yehoba 'ina lolinao waguiguipaledi, ma hesi tubumiyao mumugadi wa'abi'abi yahidi. <sup>10</sup> Mwalo Mosese Yehoba 'ina lolina moisa 'i'ebwaediya, 'igwae, ‘Tamau ma sinau 'uhe'asisiyanedi.’ Ma wete, ‘Ceguma taiya tamana ma sinana 'i'ahwa galagalaedi 'ilobwaineya ma walohe'amasi.’ <sup>11</sup> Ma 'omi 'imi he'ita 'abo'aboina wagwae, ‘Ceguma 'aigeda taiya tamana ma sinana 'ihewgaedi, 'igwae, “Cigu tobwatobwao yatagwala pwaiyeya Yehoba 'oina ma hehe'asisiyaina, 'oinega geya sawasawahina ma yalemegomi.” <sup>12</sup> Bewa 'imi lolinao 'oinega loheya tamana ma sinana 'adi lema wa'au'ausi. <sup>13</sup> Tubumiyao 'idi lolina bewa 'oinega, Yehoba 'ina lolina waheginaula bwagebwageya, ma 'imi he'itao baibaiwadi gide geya Mosese 'ina lolinao Yehoba 'oinega.”

### *Tomota 'adi gihegala*

(Madiu 15:10-20)

<sup>14</sup> Coinega boda 'ibwau hiledima ma 'ihewgaediya, “Cigu gwae bewa mabwaiyami wahesagohe, ma nuwami 'i'elo'asilala. <sup>15</sup> Geya 'eta to'aha ta'ai ma si'abi'abi hebi'igita, ma hesi ginauledi 'atedega silatulatu sawasawahidi ma si'abihe bi'igita.” <sup>16</sup> (-)

<sup>17</sup> Eeta Yesu ma'ana tomuliyao boda si'ebesinediya ma hadai siluhuwa, eema 'ana tomuliyao wedi sihesilaleya sigwae, “Sawasawahina 'ino gwae hegehegediina 'ulihasi 'oima?”

<sup>18</sup> Eeta Yesu 'ihewgaediya, “Nuwana 'omi wete nuwami geya 'i'elo'asilala, 'awa? Coinega geya wasanapu 'abehega to'aha ta'ai'iai ma 'iluhuluhu 'aloda geya wete 'ida 'abihebi'igita, <sup>19</sup> weyahina geya 'ateda 'iluhu, ma hesi gamwadamo 'oina 'iluhuwa ma muliyetega 'ilatu mohomoho 'oina.” (Yesu 'ina he'ita bewa 'ana sanapu 'abehega geya 'eta wete 'e'ahai hehe'asisina, ma hesi mabwaiyana ta'ai.)

<sup>20</sup> Ma Yesu wete 'igwaeya, “To'aha tomota 'atediyega silatulatu sawasawahina ma si'abihe galegita, <sup>21</sup> gidemusa nuwatuha galana ma logwali, yagaha, lohe'amasa, pui, <sup>22</sup> lomata tobwatobwa, gamwasowala, 'abo, ganawala, he'ipi'ipi, sinala, nuwahane, ma heyauyaule. <sup>23</sup> Bewa ginauledi galadi tomota 'alodiyega silatulatu ma sigihegihe bi'idi.”

*Caigeda wahine 'ina hemisa Yesu 'oina*  
(Madiu 15:21-28)

<sup>24</sup> Nage 'oina Yesu 'itoholowa ma 'itauya Taiya ma Saidoni tupwaidiina, ma 'aigeda hada 'oina 'iluhuwa, weyahina geya nuwana ma tomota sisanapu 'ina latu weyahina, ma hesi geya sawasawahina ma 'i'edahwana, <sup>25-26</sup> weyahina 'aigeda wahine Yesu 'ina latu wasana 'ihesagoheya. Ma wahineina geya wahine Yudiya ma hesi tauna gwama Pinisiya, tupwa Siliya 'alonga, ma natuna mewahinena hi'ahi'a 'i'abi hegaleya, eeta sinana 'inaoma ma Yesu 'ahena 'ituluha ma 'i'ahwanoiya ma 'abehega hi'ahi'a natuna 'oinega 'ida pa'i. <sup>27</sup> Ma Yesu 'igwaeya, “Cilobwaineya ma sedaseda 'adiwa ya'ebwaya nugetedi, ma geya sawasawahina ma sedaseda 'adiwa 'edewa ya'ebwaedi.”

<sup>28</sup> Ma wahine 'igwaeya, “Cehe moisa Bada, ma hesi 'edewa 'ebe'ai gabulena sedaseda 'adiwa mohomohona 'oinega si'ai'ai.”

<sup>29</sup> Ma Yesu 'igwaeya, “Yauwedo! Beno gwae moisa. Coinega 'utoholo ma 'uhila 'ino hada. Hi'ahi'a natuu 'oinega 'ilatuwa ma 'ibwebwe'ana.” <sup>30</sup> Eeta wahineina 'itoholowa ma 'itauya 'ina hada, ma natunaina 'ilobeya 'ina 'ebe'eno 'oina 'ibwebwe'ana pwaiya.

*Yesu totenatui 'i'abihe bwebwe'aneya*

<sup>31</sup> Ma Yesu Taiya 'i'ebesineya, ta 'itauya Saidoni, 'oinega wete 'ihataona Dikapoli tupwaina 'oidiya, ma 'ihapwesama Galili holai. <sup>32</sup> Ma 'aigeda loheya si'eweyama Yesu 'oina, tauna tenatuituina ma wete guguguguina, ma Yesu si'ahwanoiyea ma 'abehega 'i'abitoho ma 'ibwebwe'ana.

<sup>33</sup> Ma Yesu loheyaina 'itoeya ma boda 'oidiyega sihawasiya siboidimo, ma Yesu nima matagigina 'oinega loheya tenana 'ilagu luhuwediya, ma muliyetega 'iboi nimana 'i'esoheya ma loheya memenana 'i'abitohoya, <sup>34</sup> 'oinega Yesu 'ilo'ita hane galewa, ma 'atemuyemuyega 'igwaeya, “Epapata,” beno 'ana bui “Culosabwalena.” <sup>35</sup> Eeta loheyaina tenana silosabwalena, ma wete memenana 'ibwebwe'ana, ma sawasawahina 'igwae ma 'ihesagoha dumwalu.

<sup>36</sup> Ma Yesu tomota 'i'etobodediya ma 'abehega geya'abwa taiya 'oina sida hehepwaila. Ma 'etobodaina geya sihesagohe, ma hesi sihe'ote'otetela dadaneya tomota 'oidiya. <sup>37</sup> Tomotaedi sihesagoheya nuwadi 'ihewpanopwanowa madouna, ma sigwae, “Cina paihowa mabwaiyana bwebwe'ana ma 'ebenuwa pwanopwano, weyahina totenatui ma guguguguidi 'i'abihe bwebwe'aneidiya ta sowasawahina sihegwae, ma sihesagoha.”

## 8

*Yesu boda 'ihe'aidiya*  
(Madiu 15:32-39)

<sup>1</sup> Sauga nage 'oina boda madouna wete sihegogonama Yesu 'oina, ma geya 'adimo. Coinega 'ana tomuliyao 'ibwauwedima, ma 'ihewgaediya, 'igwae, <sup>2</sup> “Tomota bewa ya'ate muyamuyaediya, weyahina sabwelo 'etoi 'ebwa ba'idadao tamiyamiya, ma geya 'adimo. <sup>3</sup> Ceguma magomaledi yahesumanedi, tabu ma 'edai sihemwalomwalohana, weyahina tupwadi bwagebwagega sitauyama.”

<sup>4</sup> Eeta Yesu 'ana tomuliyaoedi sihegwae, sigwae, “Togidega tupwa yoho 'awawa 'oina tomotaedi bewa 'adi taloba 'ese?”

<sup>5</sup> Coinega Yesu 'ihesilalediya, 'igwae, “Hisa 'ami belediyao simiyamiya?” Ma sigwae, “Sebenimo.”

<sup>6</sup> Eeta boda 'iloinediya ma bale'uwa simiyatoiya. Simiyatoiya ma beledi sebeniyedi 'i'ewediya ma weyahidi 'iloyauwedowa Yehoba 'oina, ma 'i'ehisihisiya, 'i'ebwaediya 'ana tomuliyao 'oidiya, ma tomota si'ebwaediya, eema siheguyai sakowasiyeya.

<sup>7</sup> Ma wete tupwana silahana 'i'iudi simiyamiya, weyahidi Yesu 'igwae helauwa Yehoba 'oina, ma 'ana tomuliyawedi 'iloinediya, ma siheguyaiyedi tomota 'oidiya.

<sup>8</sup> Coinega mabwaiyadi si'aiya ta simwauwuwa, ma muliyetega 'e'ahai tupwatupwadi sidomweya ma kodo sebeni silohemahediya. <sup>9</sup> Ma bodaedi 'adi baibaiwa gide powa tausani. Eeta 'ihewasa hilediya.

<sup>10</sup> Tuta nage 'oina 'ana tomuliyao ba'idanao 'idi waga sigeluwa ma sinaowa Dalimanuta tupwaina.

#### *Palisiyao nuwanuwadi 'ila'ilala si'ita*

<sup>11</sup> Eeta Palisiyao sinaoma, ma Yesu 'oina sihe'ohelo'ohena, ma sitohoya ma 'abehega galewega 'ila'ilala 'ida he'itae 'oidiya. <sup>12</sup> Ma Yesu ma'ina nuwagala 'ihewagwadiya 'igwae, “Togidega ma 'oinega yaso bewa nuwanuwami 'ila'ilala, ma hesi geya 'eta wa'ita.”

<sup>13</sup> Coinega 'i'ebesinediya ma wagai 'igeluwa, ma sihabala hali tupwa.

#### *Helodi ma Palisiyao 'idi he'ita gide beledi 'ana 'ebe 'abiheseseha (Madiu 16:5-12)*

<sup>14</sup> Ma hesi 'adi haite sinuwanaideya, ma beledi 'aigeda tuwa wagai 'itupwa. <sup>15</sup> Ma Yesu 'ihemataluwediya, 'igwae, “Wa'ita Palisiyao ma Helodi 'adi beledi 'ana 'ebe 'abiheseseha 'oinega wa'ita yahigomi.”

<sup>16</sup> Coinega tomuliyawedi siboidimo 'oidiya sigwaeya, “Yesu 'ina gwaeina lamuna weyahina 'ada haiteina tanuwanaideya.”

<sup>17</sup> Ma Yesu 'idi nuwatuhu 'isanapuya, 'oinega 'ihewagwadiya, “To'aha weyahina wagwaegwae 'abehega geya 'ami haitemo? Beno geya weyahina taugu yagwaegwae. Togidega 'imi nuwatuhu si'elopota ma geya sawasawahina ma 'igu gwae lamuna wasanapu. <sup>18</sup> Mamatami ma geya wa'ita, ma wete matenami ma geya wada hesagoha, 'oinega geya'abwa wanuwanuwa tuhuyahi 'igu paihowao boda 'adi he'ai weyahina, 'awa? <sup>19</sup> Tutaina beledi nima 'oinega tomota paibi tausani yahe'aidiya hisa kodo 'ulaheya 'oidiyega wahogogonediya?” Ma sigwae “Tuwelo.”

<sup>20</sup> Ma Yesu 'ihenaida wete 'igwaeya, “Ma tutaina beledi sebeni 'oinega tomota powa tausani yahe'aidiya, ma hisa kodo 'ulaheya 'oidiyega wahogogoneya?” Ma sigwae, “Sebeni.” <sup>21</sup> Coinega Yesu 'igwaeya, “Comi togidega ta geya nuwami 'ida sabwalena.”

#### *Yesu tomata gibugibu 'i'abihe bwebwe'anya*

<sup>22</sup> Eeta Bedeseida 'oina sitauyama, ma loheya 'aigeda mata gibugibuina sitoeyama Yesu 'oina, si'ahwanoiyeya 'abehega 'i'abitoho ma 'ibwebwe'ana. <sup>23</sup> Coinega Yesu tomata gibugibuina nimana 'oina 'i'abiya ma 'itoeya, 'asaina si'ebesineya. Ma Yesu loheyaina matana 'ihulasiya, ma nimanega matanaina 'i'abitohodiya, ma 'ihewagwadiya, “Sawasawahina to'aha 'u'itadi?”

<sup>24</sup> Coinega loheyaina 'ilo'ita dadana ma 'igwaeya, “Tomota ya'itediya, ma 'adi 'ita gide tuwa 'aiwe si'e'elo yawala.”

<sup>25</sup> Ma wete Yesu loheyaina matana 'i'abitoho hilediya, ma 'i'ebubuna, eeta 'i'asilala bwaibwaina, ma ginaula mabwaiyadi 'i'itediya.

<sup>26</sup> Coinega Yesu 'ihewasaeya, 'igwae, “Geya'abwa 'uhilahila 'asa madouna 'oina, ma hesi 'utauya 'uboi 'ino hada.”

#### *Pita 'ihewagwadi Yesu weyahina (Madiu 16:13-20; Luke 9:18-31)*

<sup>27</sup> Ta Yesu ma'ana tomuliyao sinaonao Sisaliya Pilipai tupwadi weyahidi ma 'edai 'ana tomuliyawedi 'ihewagwadiya, 'igwae, “Togidega tomota 'idi gwae weyahigu wahesagohediya 'abehega taiya taugu?”

<sup>28</sup> Ma tomuliyawedi sigwae, “Tomota tupwadi sigwaeya 'abehega 'owa Yoni To'abihe-babitaiso, ma wete tupwadi sigwae 'abehega 'owa Ilaitiya, ma tupwadi sigwae 'abehega 'owa palopita nugenugotaina 'aigeda.”

<sup>29</sup> Coinega wete 'ihesilalediya, “Ma 'omi togidega 'imi nuwatuhi 'abehega taugu taiya?”

Eema Pita 'ihemaiseya 'igwae, “Cowa Keliso To'abihetenaina.”

<sup>30</sup> Ma Yesu 'iloina pa'alediya, 'igwae, “Geya sawasawahina 'eta taiya 'oina wahehep-wailegau.”

*Yesu 'ihewwaila 'ina muya ma 'ina 'amasa weyahidi  
(Madiu 16:21-28; Luke 9:22-27)*

<sup>31</sup> Ma Yesu 'ihe'ale 'ihe'ita 'oidiya to'aha 'abwa 'oina 'ilatu, ma 'igwaeya, “Taugu Loheyaiguina 'abwa muya madouna yaloba. Weyahina babada ta topwaoli madoudi ta loina 'ana tohe'itao 'abwa silogwahategau ma silohe'amasigau, ma sabwelo 'etoi mulina 'abwa yatoholo hila.”

<sup>32</sup> Yesu 'ina gwaecina bewa 'oinega 'ilagu hemasalahiya 'ina 'amasa weyahina. Coinega Pita Yesu 'itoeya, ma mahetena sinaowa hagana, ma Pitaina 'i'ausiya ma 'abehega ginauledi sahena silatulatu Yesu 'oina. <sup>33</sup> Ma Yesu 'ihasakowasi ma 'ana tomuliyao 'i'e'ebubudiya, ma 'iheliya Pita 'oina, 'igwaeya, “Cowa Seitani, bewa sauga 'u'ebesinegau! Weyahina 'ino nuwatuhiwedi nuwatuhi 'asa gabulena 'ana nuwatuhi, ma hesi geya Yehoba 'ina nuwatuhi gide.”

<sup>34</sup> Coinega Yesu boda mabwaiyadi ma wete 'ana tomuliyao mahetediyao 'ibwau he'autedima, ma 'ihewwaeidiya, 'igwae, “Taiya 'eguma nuwanuwana ma 'imuliyegau, 'ilobwaineya ma 'iboi 'ina loina 'ilogwahate, ma 'aneyage 'iboi 'ana kelose 'i'ahali ma 'i'amasa, beno gide 'ana 'eda'eda, 'eguma taiya 'imuliyegau.”

<sup>35</sup> Ma hesiyage 'eguma taiya yawasina 'inuwahi, 'abwa yawasinaina 'ihe'wadalele. Ma 'eguma taiya weyahigu ma wasana bwebwe'ana weyahina yawasina 'itagwale ma 'i'amasa, tauna 'abwa yawasi moisa 'iloba. <sup>36</sup> Ma 'eguma 'ida wasawasao bale'uwa madou hedadedi talobediya beno ginaula bwagabwaga, ma hesi ginaula madou hedada beno yawasida moisa. <sup>37</sup> Weyahina 'eguma yawasida moisa tahe'wadalele, beno geya wete 'eta 'ana hemiyalae 'imiyamiya.

<sup>38</sup> “Ma 'eguma taiya 'owa weyahigu 'uhedeba mwadimwadina, wete 'igu he'itao weyahidi 'uhedeba mwadimwadina, ma 'uuhalegau yaso bewa galadi ma ganaganawalidi matadiya, 'abwa taugu Loheyaiguina wete yauhalego, tutaina Tamagu 'ina wasawasa maemaedanaina 'oinega yahilama ma aneloseyao wete ba'idagwao.”

## 9

<sup>1</sup> Ma wete Yesu 'ihewwaeidiya, “Moisa tuwa, tupwami 'oimiyega geya'abwa wa'ama'ama ma 'ana siga Yehoba 'ina loina waiwaina 'ilatuma ma wa'ita.”

*Yesu 'ana 'ita hagana  
(Madiu 17:1-13; Luke 9:28-36)*

<sup>2</sup> Sabwelo sikisi mulina Yesu 'ana tomuliyao 'etoi 'itoediya, taudi Pita ma Yemesa ma Yoni ba'idanao sihaneya 'oya 'aigeda dudulena 'oina, ma sibo simiyamiya, si'iteya Yesu maninina 'imaedana <sup>3</sup> ma 'ana 'ale'o wa'ewa'e'ena moisa, ma 'ana 'ita geya 'eta taiya bale'uwa sowasowana ma 'ale'oina 'ihe'ehau hila 'ana wa'ewa'e'eina gide. <sup>4</sup> Ma wete Ilaitiya ma Mosese sihapwesama ma Yesuina ba'idadiu sihehegwaegwae.

<sup>5</sup> Coinega Pita Yesu 'ihewwaeiya, 'igwae, “Bada, 'ida miya bewa bwebwe'ana, 'oinega 'imi hadahada 'etoi 'a'abidi, 'aigeda 'owa weyahiu, 'aigeda Mosese, ma 'aigeda Ilaitiya.”

<sup>6</sup> Beno Pita 'igwaegwae bwagabwaga weyahina tauna ma'iyanao simatauta hedadeya.

<sup>7</sup> Eeta yaloyaloha wete 'isuluwa ma 'i'ahusamudiya. Yaloyalohaina 'oinega 'aigeda 'enana sihesagoheya, 'igwae, “Bewa natugu bwebwe'ana hedada, ma 'ina gwaecina wahe-sagohe.” <sup>8</sup> Ma silomwayamwayauwa ma silo'ita dadana, ma Yesu 'iboinamo, ma geya 'eta wete taiya si'ita.

<sup>9</sup> Coinega 'oyega sisulusuluma ma Yesu 'iloinaediya, 'igwae, “Ginauledi nige wa'ita pwaidiya geya'abwa tomota 'oidiya wahehepwaileledi eema 'ana siga taugu Loheyaiguina



'amasega yatoholo hilama.” <sup>10</sup> Coinega ginauledi sidahwediya, ma siboi sihehegwaeg-wae, sigwaeya, “Cina gwaaina toholohila weyahina togidega 'ana sanapu?”

<sup>11</sup> Ma Yesu 'oina sihesilala wete, sigwaeya, “To'aha weyahina loina 'ana tohe'itao sigwae 'abehega Ilaitiya 'inugetama, ma gwahunega To'abihetenaina 'itautauyama?”

<sup>12-13</sup> Ma Yesu 'igwaeya, “Cehe gidemusa. Ilaitiya 'abehega 'ilatu nugetama, ma 'oinega ginaula mabwaiyana 'i'abihe dumwaludi. Ma hesi Ilaitiyaina 'ilatu pwaima, ma tomota sipaihowa galagala 'oina gide 'idi nuwatu, to'aha gide Buki Tabu 'ihewwaila nugeteya. Ma wete taugu Loheyaiguina to'aha weyahina Buki Tabu 'ihewwaila nugetegauga 'abehega muya baibaiwadi yalobadi, ma wete tomota silogwahategau?”

*Caigeda gwama 'ihebwsubwasumo  
(Madiu 17:14-20; Luke 9:27-43)*

<sup>14</sup> Eeta 'oyega sisuluma ma 'ana tomuliyao mabwaiyadi siloba hilediya, ma boda baibaiwadi ba'idadiyao ma wete loina 'ana tohe'itao ba'idadiyao sihe'ohe'oheya. <sup>15</sup> Ma tutaina boda Yesu si'inaneya nuwadi 'ipwanopwanowa madouna, ma sipilipili mwayamwayau sabi 'itaina. <sup>16</sup> Sipilima ma Yesu 'idi he'ohe'ohe weyahina 'ihesilalediya, 'igwae, “To'aha weyahina wahehegwaegwae?” <sup>17</sup> Ma 'aigeda loheya bodaedi 'oidiyega Yesu 'ihewwae, 'igwae, “Bada, 'idi he'ohe'ohe lamuna natugu, weyahina 'ina lohala 'oinega geya sawasawahina ma 'igwae. <sup>18</sup> Tuta tupwana hi'ahi'a 'ina paihowega 'itaitai ma 'ahwanega gwalabusobuso sihapwehapwesa, ma 'ihesala'i'ita ma 'idededela. Coinega 'a tomuliyao ya'ahwanoyedi ma 'abehega hi'ahi'a gwama 'oinega sipa'ihapwese, ma geya sowasowadi.”

<sup>19</sup> Coinega Yesu 'ihewwae, 'igwae, “Comi togidega, ta deba pa'ala hedade? Tuta bewa 'imi deba pa'ala 'oinega yahewahi dabalala. Tuwa gwamaina watauyeyama ma ya'ita.”

<sup>20</sup> Eeta gwamaina si'eweyama Yesu 'oina, ma hi'ahi'a 'i'iteya Yesu, 'oinega 'iginaoya gwamaina ma 'itai ma bale'uwa 'ibe'uwa, 'idededela ma 'ahwanega gwala busobuso silatulatu. <sup>21</sup> Ma tamanaina 'oina Yesu 'ihesilala, 'igwae, “To tuta 'oina 'ina lohala 'ihewwae?” Ma tamana 'igwaeya, “Cina tuta sedasedega. <sup>22</sup> Ma 'eguma 'itai, sauga tupwana 'ibe'u 'aiwe 'ala'alasina 'oidiya ma sauga tupwana bwasi ni'una 'oidiya, nata eeta 'ilohe'amasi. Coinega 'eguma sowasowana 'uda 'atemuyamuya ma 'u'abihetema.”

<sup>23</sup> Ma Yesu loheyaina 'ihewwae, 'igwae, “Cugwae pwaiya, 'Ceguma sowasowana, 'awa? Ma hesi 'unuwatuhuyahi 'abehega 'eguma tahemisa, ginaula mabwaiyana sawasawahina 'oida.”

<sup>24</sup> Nage 'oina loheyaina 'igwae hedahedada, “Moisa tuwa yahemisa, ma geya yahemisa hedada. Nuwanuwagu ma 'igu hemisa 'ugihewwaiye.” <sup>25</sup> Ma boda baibaiwadi sipilipilima Yesu 'i'itediya, 'oinega hi'ahi'a 'iheliyeya, 'igwae, “Cowa hi'ahi'a 'ino paihowega, gwama 'ihewwae, yaloinago ma 'u'ebesine hatae, ma geya sowana wete 'uluhulu hila 'oina.”

<sup>26</sup> Coinega hi'ahi'aina 'i'aso'asona, ma 'ana hebwasubwasumo 'iginaoya, ma 'idededela madouna, ma hi'ahi'aina 'ihapwesa 'itauya, ma boda gwamaina si'iteya 'ana 'ita gide 'i'amasa, ma simatauteya ma sigwae, “Beno 'i'amasa.” <sup>27</sup> Ma Yesu gwama nimana 'i'abiya ma 'i'abihe toholoya, ta gwamaina 'itoholowa ma'ina bwebwe'ana.

<sup>28</sup> Muliyetega Yesu ma 'ana tomuliyao siluhu hadai ma nobwa siboi. Eeta tomuliyawedi Yesu sihegwaeya, sigwae, “Bada, togidega tauma geya sawasawahina hi'ahi'a 'apa'i ma 'ihapesa?” <sup>29</sup> Ma Yesu 'igwaeya, “Geya 'eta wete ginaula 'oinega ma hi'ahi'a tapa'ihapwese. Beno tuwa 'ahwanoyega Yehoba 'oina.”

*Yesu 'ina 'amasa weyahina 'ihe'ote'otetela  
(Madiu 17:22-23; Luke 9:43-45)*

<sup>30-31</sup> Nage 'oinega Yesu ma 'ana tomuliyao tupwaina si'ebesineya, ma Yesu geya nuwana ma boda sisanapu to'eha 'oina sitauya, 'oinega Galili 'edaina 'oina sitautauya, ma 'ana tomuliyao 'ihewwae 'ina 'amasa weyahina, 'igwaeya, “Cabwa Loheyaiguina



'agu toteba 'i'ebwayaegau 'agu 'alehao 'oidiya ma silohe'amasigau. <sup>32</sup> Eeta sabwelo 'etoi mulina 'abwa yatoholohila." Ma 'ina he'ita bewa weyahina geya sisanapu, ma hesi geya 'oina sihesilala, weyahina simatauta.

*Tonugeta taudi 'abwa simuliya*  
(Madiu 18:1-5; Luke 9:46-48)

<sup>33</sup> Eeta 'asa Kapaneumi 'oina sihapwesa ma hadai siluhuwa, ma nobwa Yesu 'ana tomuliyao 'ihesilalediya 'igwae, "To ginaula weyahina wahehe'ohe'ohe 'edai?"

<sup>34</sup> Ma sideba mwadina, 'oinega geya sihemaisa, weyahina 'idi he'ohe'ohe lamuna beno taiya 'oidiyega 'idi tohanugeta. <sup>35</sup> Coinega Yesu 'imiyatoiya ma site tuwelo 'ibwauwediya ma 'ihe'ita 'oidiya, 'igwaeya, "Ceguma taiya 'owa nuwanuwau ma 'oimiyega 'uhedada, 'ilobwainegowa ma 'uboi 'ugihesuluhego ma 'uhetopaihowa 'iyamwao weyahidi."

<sup>36</sup> Coinega 'aigeda gwama 'itoeyama ma gamwagamwanidiya 'ihetoholoya ma 'i'atusapwaliya ma 'ihewgaediya, <sup>37</sup> "Ceguma taiya 'owa gwama bewa gidemusa 'uhelauwe weyahigu, 'owa taugu wete 'uhelauwegau, ma geya 'abehega yaboi 'uhelauwegau ma wete 'agu Tohetune Yehoba ba'idagu 'uhelauwemaiya."

*Ceguma taiya tauna geya 'ilolo'alehegita tauna 'ilemelemegita*  
(Luke 9:49-50)

<sup>38</sup> Ma Yoni 'igwaeya, "Bada, 'aigeda loheya 'a'iteya saniuwega hi'ahi'a 'iulaula latuhedi, 'oinega 'a'etobodeya weyahina loheyaina geya 'ida boda."

<sup>39</sup> Ma Yesu 'igwaeya, "Geya sowana wa'au'ausi, weyahina 'eguma taiya 'eta gin-aula waiwaiidi taugu saniguwega 'ipaihowadi, geya sowana wete 'eta 'isinasingau. <sup>40</sup> Weyahina 'eguma taiyawedi geya silolo'alehegita, taudi silemelemegita. <sup>41</sup> Ma wete wanuwatuhu 'abehega 'eguma tani'omi 'iyahala ma taiya 'ihenumegomi weyahina 'omi Keliso 'ina bodao, tauna 'ana maisa bwebwe'ana 'abwa 'iloba.

*To'aha 'igihe galey*  
(Madiu 18:6-9; Luke 17:1-2)

<sup>42</sup> "Ma hesi 'agu tohemisao gwagwamaedi 'eguma taiya 'itohodi, ma 'oidiyega 'aigeda 'i'abihebe'u, loheyaina bo wahineina 'ilobwaineya ma da'ule madouna tani'ona sisipwa mada'ulena siula suluhe ni'uwa. <sup>43</sup> Wete 'eguma nimau 'igihebe'ugo 'ilobwaineya ma 'u'upwa yahule. Beno geya 'ana galamo 'eguma manima 'upwa'upwau ma yawasi bwebwe'ana 'uloba. Ma hesi gala hedadena 'oiuwa 'eguma manima luwaluwau ma siula suluhego 'aiwe 'ala'alata hataya 'oina. <sup>44</sup> (-)

<sup>45</sup> "Ma wete 'eguma 'aheu 'igihe be'ugo, 'ilobwaineya ma 'u'upwa yahule. Beno geya 'ana galamo 'eguma ma 'ino lopego ma yawasiu bwebwe'ana 'uloba. Ma hesi gala hedadena 'oiuwa, 'eguma ma'ahe luwaluwau siula suluhego 'aiwe 'ala'alsinaina 'oina. Casaina 'oina 'aiwe 'ala'alsina geya 'ida gibowa. <sup>46</sup> (-)

<sup>47</sup> "Matau wete gidemusa 'eguma 'igihebe'ugo 'ubwaiyahule wete, weyahina geya 'eta 'ana galamo 'eguma mamata 'ai'aigedau ma Yehoba 'ina 'ebeloina 'uloba. Ma hesi gala hedadena 'oiuwa, 'eguma mamata luwaluwau siula suluhego 'aiwe 'ala'alata 'oina. <sup>48</sup> Casaina 'oina mwahulu 'oidiya yapwayapwa sisopisopila hataya ma wete 'aiweina geya 'ida gibowa.

<sup>49</sup> "Coinega tomota mabwaiyadi 'abwa 'aiwe 'ala'alsina 'i'abi hebwebwe'enedi, gide hola 'e'ahai 'i'abi hebwebwe'aneya. <sup>50</sup> Hola ginaula bwebwe'ana, ma 'eguma 'ana 'amna 'igumwala geya sawasawahina ma 'i'amna hila. Coinega 'ilobwainegomiya ma mumugami waboi walotoho, 'ana lotohona gidemusa wahelau hilegomi."

<sup>1</sup> Ma Yesu tupwaina 'i'ebesineya ma Yudiya 'ina tupwa 'itauya, ma 'ihabala we'aha Yolidani hali tupwa, eeta boda madouna si'eto'auta hilama 'oina, ma mumuganaina gide wete 'ihe'ita 'oidiya.

<sup>2</sup> Ta Palisiyao sinaoma ma nuwanuwadi Yesuina sitocho, 'oinega sihesilala 'oina, sigwae, “Bada, togidega 'ida loina sa'ila weyahina? Sawasawahina loheya mwanena 'isa'ile?”

<sup>3</sup> Ma Yesu 'igwaeya, “Togidega Mosese loina 'i'ebwaya 'esegomiya?” <sup>4</sup> Ma Palisiyao sigwaeya, “Mosese 'itagwala ma 'eguma loheya nuwanuwana ma 'isa'ila, nugeta pepa 'aigeda 'oina 'ina guipaila 'ihewwae, ma mwanena 'i'ebwae, ma 'isa'ile.”

<sup>5</sup> Ma Yesu 'ihewwae, 'igwae, “Mosese loina beno 'i'ebwaegomiya 'imi deba pa'ala weyahina. <sup>6</sup> Ma hesi wanuwatuhuyahi Yehoba 'ina hemasalaha hauhauna 'oinega tomota 'eluwa 'ihemalahediya, loheyana ma mewahinena. <sup>7</sup> Bewa lamuna 'oinega loheya tamana ta sinana 'i'ebesinedi, ma mwanena ba'idana simiyaluwa, <sup>8</sup> ma siteluwaedi wahidi 'aigeda tuwa. Mwalo siteluwaedi simiya wasiwasiya, ma bewa tutaina 'oina silo'aigeda. <sup>9</sup> Yehoba 'ilagu 'aigedediya, 'oinega geya sowana tomota sitocho ma silag-ulagu wasiyedi.”

<sup>10</sup> Muliyetega Yesu ma'ana tomuliyao sihila hadai, ma tomuliyawedi sihesilala hila sa'ila weyahina. <sup>11</sup> Eeta Yesu 'ihewwae, “Ceguma taiya loheya mwanena 'isa'ile ma 'ihaibala, loheya bewa mwanena nugenugeta 'oina galana 'ipaihoweya, weyahina 'iganawala. <sup>12</sup> Ma wete 'eguma wahine mwanena 'isa'ile ma 'ihaibala, wahineina 'iganawala.”

*Yesu gwagwama 'igwae helauwediya*

*(Madiu 19:13-15; Luke 18:15-17)*

<sup>13</sup> Ma tomota gwagwama si'ewedima Yesu 'oina 'abehega 'i'abi tohodi. Ma hesi 'ana tomuliyao gwagwamaedi si'ausidiya. <sup>14</sup> Ma Yesu 'ana tomuliyao 'i'itidiya ma 'iheliyediya, 'igwae, “Sahena gwagwama wa'au'ausidi, ma hesi watagwaledi ma 'oiguwa sinaoma, weyahina gwagwama bewa gide Yehoba 'ina 'ebeloina 'ilobwainediya. <sup>15</sup> Yahegwagomi 'eguma taiyewedi taudi geya'abwa gwagwama bewa gide 'idi hemisa, nata sahena Yehoba 'ina 'ebeloina 'oina siluhulu.”

<sup>16</sup> Coinega Yesu gwagwamaedi 'i'ahalidiya, ma wete 'i'abi tohodiya, eema 'igwae helauwediya.

*Wasawasa weyahina*

*(Madiu 19:16-30; Luke 18:18-30)*

<sup>17</sup> Ma Yesu 'itoholo 'itautauya, ma 'aigeda loheya 'ipilima, ma 'i'etuluha Yesu matana, ma 'igwaeya, “Bada, yasanapugowa 'abehega 'owa tohe'ita bwebwe'au, 'oinega to'aha yada paihowa ma 'ane yawasigu miyamiya hatayana yaloba?”

<sup>18</sup> Ma Yesu loheyaina 'ihewwae, 'igwae, “Togidega ma 'oinega 'u'ahwa bwebwe'ane-gauwa? Geya 'eta taiya wete bwebwe'ana, beno tuwa Yehoba. <sup>19</sup> Ma Yehobaina 'ina loinao 'usanapu pwaidiya, beno 'abehega:

Sahena lohe'amasa.

Sahena ganawala.

Sahena yagaha.

Sahena hepwaile 'abo'abo.

Sahena 'abowega tomota 'idi tobwatobwa 'u'ewa'ewadi.

Ma wete tamau ma sinau 'uhe'asisyanedi.”

<sup>20</sup> Ma loheyaina 'igwaeya, “Bada, 'igu tuta sedasedega 'ana siga nige, loinaedi yamuliyawaibwainidiya.”

<sup>21</sup> Coinega Yesu ma'ina yaliyaya loheyaina 'i'ebubuya ma 'igwae, “Beno tuwa 'aigeda ginaula 'ilosapuligowa. Coinega 'uhila 'ino 'asa, ma 'ino tobwatobwa mabwaiyana 'uhegimwaneye, ma 'adi maisa 'uheguyaiye towewelohe 'oidiya, eema 'unaoma 'u-muliyegau, 'abwa muliyetega 'ino wasawasa galewa 'uloba hila.”

<sup>22</sup> Gwae bewa loheyaina 'ihesagoheya, ma 'ina wasawasa madouna weyahina nuwana 'igala moisa, ma ma'ina nuwagala 'ihila, ta Yesu 'ina gwaaina geya 'imuliye.

<sup>23</sup> Coinega Yesu 'ilo'ita dadana ma 'ana tomuliyao 'ihewgaediya, 'igwae, “Ceguma taiyawedi taudi ma'idi wasawasa madouna, 'idi luhu Yehoba 'ina 'ebeloina 'alona mwauna.”

<sup>24</sup> Ma 'ana tomuliyao nuwadi 'ihewwanopwanowa 'ina gwaaina weyahina. Coinega Yesu 'ihewgaediya, 'igwae, “Natugwao, Yehoba 'ina 'ebeloina 'ana luhu mwau hedada. <sup>25</sup> Ee moisa, kameli tauna hebahebai madouna, 'oinega tupwana mwauna ma nidili 'ana bwalena 'oinega kameliina 'iluhu, ma hesi towasawasao 'idi luhu Yehoba 'ina 'ebeloina 'oina mwau hedada.”

<sup>26</sup> Yesu 'ina gwaaina 'ana tomuliyao sihesagoheya ma nuwadi 'ihewwanopwano hedada, ma sihegwae, “Ceguma beno gide, taiya hede sawasawahina ma 'ebe yaliyayaina 'iloba?”

<sup>27</sup> Coinega Yesu 'i'e'ebubudi ma 'igwae, “Ginaula bewa mwau hedada tomota 'oidiya, ma hesi geya mwauna Yehoba 'oina, weyahina Yehoba 'oina ginaula mabwaiyana sowasowana.”

<sup>28</sup> Ta Pita Yesu 'ihewgaeya, 'igwae, “Bada, tauma togidega? Weyahina 'ima tobwatobwao mabwaiyadi 'a'ebesinediya ma 'amuliyegowa.”

<sup>29-30</sup> Ma Yesu 'igwae, “Ee moisa, 'eguma taiyawedi 'omi 'imi hadao ta tasimiyao ta nuhumiyao ta sinamiyao ta tamamiyao ta natumiyao ta 'imi bale'u wete wa'ebesinediya, ma wete muya waloba weyahigu ta wasa bwebwe'ana 'ana hepwailla weyahina, 'ami maisa tuta bewa waloba gide handeledi hadao ta tasimiyao ta nuhumiyao ta sinamiyao ta natumiyao ta 'imi bale'u wete, ma 'abwa galewa yawasimi hataya wete waloba. <sup>31</sup> Ta bewa tutaina tohanugetao baibaiwadi 'abwa simuliyao, ma taudi simulimuliyao 'abwa sinugeta.”

*Yesu 'ina 'amasa 'ana hepwailla hetoina*

*(Madiu 20:17-19; Luke 18:31-34)*

<sup>32</sup> Cabwa 'edai sihanehane Yelusalema weyahina, ma Yesu 'inugenugeta ma 'ana tomuliyao simulimuliyao, ta ma'idi nuwapwanopwano, ma tupwadi tomota wete ma'idi 'ateyoho 'edai simulimuliyedi. Eeta 'ana tomuliyao site tuwelowedi 'ibwau 'autehiled-ima ma 'ihemataluwediya to'aha 'i'iunamo ma 'ilatu 'oina, <sup>33</sup> 'igwae, “Bewa tuta tahane Yelusalema, ma nobwa 'agu totebaina taugu Loheyaiguina 'itebaegau topwaoli madoudi ta loina 'ana tohe'itao 'oidiya, ma 'igu 'amasa weyahina siloina, ma muliyetega sihe'ebwaegau taudi geya meYudiya 'oidiya, <sup>34</sup> ma taudi meganamuli silotuyanegau ta si'esohegau ta gulahega sisapigau ma 'oinega silohe'amasigau, ma sabwelo 'etoi yatoholohila.”

*Yemesa ma Yoni 'idi 'ahwanoi Yesu 'oina*

*(Madiu 20:20-28)*

<sup>35</sup> Coinega Yemesa ma Yoni, taudi Sebedi natunao, Yesu 'oina sinaowa, sihegwae, sigwae, “Bada, 'anaoma sabi 'ahwanoi 'oiuwa.” <sup>36</sup> Ma Yesu 'igwae, “To'aha nuwanuwami ma yapaihowa weyahimi?”

<sup>37</sup> Coinega sigwae, “Cabwa 'ino 'ebeloina 'oina nuwanuwama ma deiuwa 'amiyatoi, 'aigeda 'ino 'ebeulega ma 'aigeda 'ino 'adigeyegaya.”

<sup>38</sup> Ma Yesu 'ihewgaediya, 'igwae, “Comi 'imi 'ahwanoina lamuna geya wasanapu. Togidega? Muya 'ana biyoina yanuma, sawasawahina ma 'omi wete 'oinega wanuma? Ma wete babitaiso mwauna 'abwa yaloba, togidega 'omi wete gide sawasawahimi ma wababitaiso 'esa?”

<sup>39</sup> Ta sigwae, “Sawasawahima.” Ma Yesu 'igwae, “Moisa, biyoina 'abwa 'oinega yanuma, 'omi wete 'oinega wanuma, wete babaitaisoina 'oinega 'i'iunamo 'abwa yababitaiso 'omi wete 'oinega wababitaiso, <sup>40</sup> ma hesi geya sawasawahigu ma yahesinuwa taiyawedi 'abwa 'igu hetoloina 'oina 'igu 'ebeulega ma 'igu 'adigeyegaya simiyatoi, weyahina Yehoba tauna 'ina 'ebeloina ma 'ihesinuwa.”

<sup>41</sup> Ta tomuliyao site teni Yemesa ma Yoni 'idi 'ahwanoi sihesagoheya ma sigamwasowalediya. <sup>42</sup> Eeta Yesu mabwaiyadi 'ibwau he'autediya ma 'ihewgaediya, “Comi wasanapuya taudi bale'uwa sibwauwediya 'abehega babadao, 'idi tomotaiyao siloiloina pa'aledi. <sup>43</sup> Ma 'omi geya'abwa wete gide taudi wapaipaihowa 'esa. Ma hesi taiya 'owa 'eguma nuwanuwau ma 'oimiyega 'uhetoloina, 'ilobwainegowa ma 'iyamwao weyahidi 'uhetopaihowa. <sup>44</sup> Ta wete 'eguma taiya 'owa nuwanuwau ma 'oimiyega 'uhetohanugeta, 'ilobwainegowa ma 'iyamwao mabwaiyadi weyahidi 'uhetopaihowa.

<sup>45</sup> “Taugu Loheyaiguina wete gide 'igu suluma bale'uwa geya 'abehega tomota weyahigu sipaihowa, ma hesi sabi paihowa tomota weyahidi, ma wete yatagwalegauwa ma ya'amasa tomota mabwaiyami 'ami 'ebelihasa weyahina.”

*Batimiyo matana 'ibwebwe'ana*

*(Madiu 20:29-34; Luke 18:35-43)*

<sup>46</sup> Eeta sitautauya Yeliko, ma tutaina Yesu ma'ana tomuliyao Yeliko si'ebesineya boda madouna si'wayabudiya, ta tomata gibugibu sanina Batimiyo silobeya, tauna Timiyo natuna, ma tuta baibaiwana 'eda papalina 'oina 'imiyamiya, 'i'ahwa'ahwanoi mane ta tobwatobwa weyahidi.

<sup>47</sup> Ma Batimiyo 'ihesagoheya 'abehega Yesu gwama Nasaleta 'itautau, 'oinaga Yesu 'oina 'ibwauwa, 'igwae, “Yesu yo, 'owa Debida 'ina susu, 'u'atemuyemuyegau.”

<sup>48</sup> Eeta tomota mabwaiyadi Batimiyo 'i'ausiya, sigwae, “Tuwa, 'ulolagu!” Ma tuwa 'iwuiwui 'enana madounega, 'igwae, “Debida tubuna yo, 'u'atemuyemuyegau.”

<sup>49</sup> Coinega Yesu 'itoholo henonowa, ma 'igwae, “Wabwauweyama.” Ma tomota sigwae, “Bwebwe'ana, 'utoholo. Yesu 'ibwauwegowa.” <sup>50</sup> Coinega 'ana 'abobo 'i'ewayahuleya ma 'itoholo mwayamwayauwa, ma Yesu 'oina 'inaoma.

<sup>51</sup> Cinaoma ma Yesu 'ihewgaeya, 'igwae, “To'aha nuwanuwau ma weyahiu yapaihowa?” Ma tomata gibugibuina 'igwae, “Bada, sawasawahina ma matagu 'ugihe'asilala?”

<sup>52</sup> Ta Yesu 'ihewgaeya, 'igwae, “Bwebwe'ana! Cino hemisa 'oinaga matau 'i'asilala.” Nage 'oina matana 'i'asilala, ma 'edai Yesu 'imuliyeya.

## 11

*Yesu 'ina luhu Yelusalema 'oina*

*(Madiu 21:1-11; Luke 19:28-40; Yoni 12:12-19)*

<sup>1</sup> Eeta silagalaga Yelusalema weyahina, ma 'asa 'i'iudi Bedani ma Bedipegi deidiya silatulatu, beno 'oya Olibe gabulena, ma Yelusalema matadiya tupwana bwaga. Ta Yesu 'ana tomuliyao 'eluwa 'ihetune nugetediya tupwaedi 'i'iudi 'oidiya ma'adi hemataluwa, <sup>2</sup> 'igwae, “Watauya 'asa nage matamiya 'oina, ma 'eguma wahapwesa 'asaina matana, hebahebai 'aigeda wa'italoba 'aiwe 'oina silohoya, beno 'ase hauhauna, tauna geya tomota sida geluya. Hebahebaiina walihasi ma wa'eweyama. <sup>3</sup> Ma 'eguma 'eta taiya 'ihesilala 'oimiya ma 'igwae, “To'aha weyahina beno hebahebaiina walihasiya?” loheyaina wahegwae, 'abehega, 'Bada nuwanuwana ma tuta 'i'iunamo 'abwa 'ihewasa hileyama.’”

<sup>4</sup> Coinega site luwaedi sitauya 'asaina 'oina, ma hebahebai 'ase silobeya hada mata 'ahwaina ma 'aiwe 'oina silohoya, 'oinaga sihegaina ma silihaliyasi. <sup>5</sup> Silihaliyasi ma tupwadi loheloheya sitotoholo deidiya sigwae, “To'aha weyahina beno hebahebaiina walihaliyasi?”

<sup>6</sup> Ma site luwaedi sigwae, “Bada nuwanuwana, ma tuta to'uto'upana tuwa 'abwa 'ihetune hileyama,” ma 'oidiya sitagwaleya. <sup>7</sup> Ma hebahebaiina si'eweya sitauyeya Yesu 'oina, ta 'adi 'ale'owega gwahuna siyesoya, 'oinaga Yesu 'igeluwa, ta 'itauya.

<sup>8</sup> Ma boda mabwaiyadi wete 'adi 'ale'o 'edai siyesodiya, ma tupwadi 'aiwe lalahadi ma nabaidi sigulediya 'eda 'ana hepasa weyahina. <sup>9</sup> Ma tupwana boda Yesu sihanugeteya ma tupwadi boda simuliyeya, ta mabwaiyadi sihepewatu ma sibwauwau, sigwae, “Yauwedo Bada, weyahina Yehoba saninega 'unaoma sabi 'abihetamai. <sup>10</sup> Cebeloina

tubumai Debida 'oinega 'ilatu hilama. Bewa weyahina Yehoba Tolotabwana hedada 'ahehepwatuwe.”

<sup>11</sup> Ma Yesuina Yelusalema 'oina 'ihapwesa, ma Hada He'asisi 'oina 'iluhuwa, ma ginaula baibaiwana Hada He'asisi 'alona 'i'e'ebubudiya, eema sinala 'isopuwa, 'oinega ma'ana tomuliyao site tuwelo mahetenao sihila Bedani 'oina, si'enowa.

*Yesu 'aiwe 'aigeda 'iheliyeya*  
(Madiu 21:18-19)

<sup>12</sup> Gona 'i'adaleya, sitoholowa ma Bedani 'oinega sihilahila Yelusalema weyahina, ta Yesu 'igomaleya, <sup>13</sup> eeta bwagebwagega 'aiwe 'ana 'ita gide damaya manabanabaina 'i'iteya, 'oinega 'inaowa deina ma nuwanuwana 'abehega huwaina 'i'ai, ma hesi 'i'iteya nabainamo, 'aiwehuwahuwa 'abwa geya 'ana tuta. <sup>14</sup> Coinega Yesu 'aiweina 'iheliyeya, ma 'igwae, “Geya'abwa wete 'uhuwahuwa hila ma tomota 'oinega si'ai'ai.” Ma 'ina gwaeina 'ana tomuliyao sihesagoheya.

*Yesu togimwane 'ipa'idiya Hada He'asisi 'alonega*  
(Madiu 21:12-17; Luke 19:45-48; Yoni 12:13-22)

<sup>15</sup> Coinega Yelusalema 'oina sinaoma, ma Hada He'asisi 'alona 'iluhuwa, ma tohegimwaneyao ma togimwaneyao 'alonega 'ipa'i hapwesediya, ma mane 'ana tohesa'ugelasao 'idi teibele 'i'ahu sepalediya, ma gabubu 'adi tohegimwaneyao 'idi 'ebemiya wete 'i'ahu buinediya. <sup>16</sup> Ma wete hada 'alona 'ihegagaleya ma sahena loheloheya ma'idi tobwatobwa sitautau hada 'alonega. <sup>17</sup> Ma 'ihe'itediya, 'igwae, “Yehoba 'ina gwae Buki He'asisi 'oina sileleya, geya wasanapu, 'igwaeya, 'Cigu hadaina 'abwa sibwauwe tomota mabwaiyadi 'idi 'ebe 'ahwanoi.’ Ma hesi 'omi wa'abi buiya 'abehega 'imi 'ebe yagaha.”

<sup>18</sup> Ma topwaoli madoudi ma lolina 'ana tohe'itao Yesu 'ina paihowa tetelina sihesagoheya, ta sigamwasowaleya ma sinuwanuwatuhu togidega ma silohe'amasi, ma hesi geya sowasowahidi, weyahina simatauta, ta wete Yesu 'ina he'itao boda mabwaiyadi nuwadi 'i'eweya.

<sup>19</sup> Ma 'iboia, 'oinega Yesu ma'ana tomuliyao 'asaina si'ebesineya, sitauya Bedani.

*Caiweina Yesu 'iheliyeya 'iwelaiya*  
(Madiu 21:20-22)

<sup>20</sup> Gona 'i'adaleya ma sitoholowa sabi hila Yelusalema, ma 'edai sitautau, ma Yesu 'aiweina 'iheliyeya si'iteya nabaina mabwaiyana siwelaiya. <sup>21</sup> Ta Pita Yesu 'ina heliyaina 'inuwatuhu yahiya ma 'ihewgaeya, 'igwae, “Bada 'u'ita, 'aiweina 'uheliyeya 'iwelai pwaiya.”

<sup>22</sup> Ma Yesu 'ihewgaediya, 'igwae, “Ceguma 'imi hemisa Yehoba 'oina walagu, beno 'omi wete paihowa waiwai wapaihowadi. <sup>23</sup> Wete yagwae moisa 'oimiya, 'eguma taiya 'omi geya 'ida henuwanaluwa, ma 'eguma ma'ina hemisa ma to'aha 'igwaene silatu tuwa, 'eguma 'oya nage 'iloina ma 'igwae, 'Cumiya dobi ni'uwa,’ beno 'ina gwaeina 'ihematamatane. <sup>24</sup> Coinega yahewgaegomi to'aha wa'ahwanoiye Yehoba 'oina, wahemisa tuwa ma 'ane waloba, ma wete 'abwa waloba. <sup>25</sup> Wete 'eguma wa'ahwanoi Yehoba 'oina, 'iyamiyao 'idi mumuga wanuwamudi, 'eguma to'aha 'idi puiyao 'oimiya, bewa 'oinega Tamamiu galewa 'omi wete 'imi puiyao 'inuwasamudi.” <sup>26</sup> (-)

*Yesu 'ina lolina weyahina*  
(Madiu 21:23-27; Luke 20:1-8)

<sup>27</sup> Coinega sihila pwaima Yelusalema, ma Yesu Hada He'asisi 'alona 'iyawayawala, ma topwaoli ta lolina 'ana tohe'itao ta wete babadao sinaoma, <sup>28</sup> ma Yesu sihesilaleya, sigwae, “Loheya, taiya 'ina loinega ta bewa gide 'upaipaihowa 'esa?”

<sup>29</sup> Ma Yesu 'ihewgaediya, 'igwae, “Nugeta yahesilala 'oimiya, ma 'eguma wahemaise, taugu wete yahewgaegomi 'igu lolina weyahina. <sup>30</sup> Cigu hesilala bewa: Taiya 'ina loinega ma Yoni to'abihebabitaiso 'ipaipaihowa? Yehoba? Bo 'aigeda loheya?”



<sup>31</sup> Coinega siboidimo 'oidiya sihehe'ohē'ohē, sigwaeya, “Cina gwae togidega tahemaisa 'ese? Weyahina 'eguma tagwae, 'Yehoba 'oinega,' nata 'ihēgwae hilegita, ma 'igwae, 'Bo! To'aha weyahina ta Yoni geya wahemisae?” <sup>32</sup> Ma 'eguma tagwae, 'Tomota 'oidiyega,' nata boda sigamwasowalegita.” Weyahina tomota baibaiwadi Yoni sihemisaeya 'abehega palopita moisa. <sup>33</sup> Coinega Yesu 'ina hesilala geya sihemaisa bwaibwaini, ma hesi sigwae, “Geya 'asanapu?”

Coinega Yesu wete 'ihēgwaediya, 'igwae, “Taugu geya'abwa wete 'oimiya yahehep-waila latu taiya 'ina loinega ma bewa gidemusa yapaipaihowa 'esa.”

## 12

*Bada 'ina tanoha 'ana topaihowao*

*(Madiu 21:33-46; Luke 20:9-19)*

<sup>1</sup> Coinega Yesu 'igwae hegehegediyediya, 'igwae, “Caigeda loheya 'ina tanoha 'idau-niya gileipa daisinamo ma 'ali 'ipaihoweya, ma gileipa 'ana 'ebe bibi 'ipaihoweya, ma hada tanoha 'alona 'i'abiya, 'oinega 'ina topaihowao 'iloinediya ma si'ita'itayahi, ta tauna 'itauya hali tupwa.

<sup>2</sup> “Ma hedodona 'ana tuta, badaina 'ina hewali 'aigeda 'ihesumaneya ma 'abehega gileipa huwaina tanoha 'ana to'itayahinaedi 'oidiyega 'i'eweyama. <sup>3</sup> Citautauya ta geya si'ebwa'ebwae, ma hesi si'abiyahiya ta sisapiya, 'oinega nimenimenamo sihewasaeya 'ihila.

<sup>4</sup> “Coinega badaina 'ina hewali heluwena wete 'ihewasaeya 'oidiya, ma sihunuya debana, ta ma'ina debamwadina 'ihila.

<sup>5</sup> “Coinega wete hetoina 'ihewasaeya 'oidiya ta silohe'amasiya. Ma baibaiwadi wete 'ihetunediya 'oidiya, ma tupwadi sisapidiya ta tupwadi silohe 'amasidiya, eeta mabwaiyadi si'abihe galediya.

<sup>6</sup> “Nage 'oina 'aigeda tuwamo 'imiyamiya, tauna natuna moisa. Tauna wete 'ihewasaeya 'oidiya, 'ina nuwatuhi 'igwaeya, 'Tauna tuwa natugu, nata sihe'asisiyane.’

<sup>7</sup> “Ma natunaina 'ilatuwa 'oidiya ma to'itayahinaowedi siboidimo 'oidiya sigwae, 'Bada bewa natuna 'inaonaoma, ma 'eguma talohe'amasi nata tanoha bewa mabwaiyana taloinae.’ <sup>8</sup> Coinega si'abiyahiya ta silohe'amasiya, ma tanohega siula latuheya papaliya.”

<sup>9</sup> Yesu 'ina he'ote'otetela 'ilosalohiya, ma 'ihesilala 'oidiya, 'igwaeya, “To'aha 'abwa badaina 'ipaihowa? Moisa tuwa badaina 'abwa 'inaoma ma topaihowaedi 'ilohe'amasidi, ma tanohaina to'itayahi hagadi wete 'i'ebwaedi.”

<sup>10</sup> Wete Yesu gwae hegehegedi Buki He'asisi 'oinega 'ihēpwaileya, 'igwae, “Wanuwatuhuya Buki He'asisi 'ina hepwaile bewa gide:

Logidiina mwalo tohada'abi siguipaileya,

ta bewa sihetoholo nugeteya hada mata 'ahwaina ma logidi mabwaiyadi 'iloinaedi.

<sup>11</sup> Beno Bada 'ina paihowa 'ebe henainaida 'oida.”

<sup>12</sup> Yesu 'ina gwae hegehegediyedi topwaoli madoudi ma Palisiyao sihesagoheya, ma sisanapuya 'abehega taudi tuwa weyahidi 'igwaegwae, 'oinega sitohotoho ma si'abiyahi, ma hesi geya sawasawahina weyahina simatauta boda 'oidiya. Eeta si'ebesineya ma sitauya.

*Sisa 'ina takesi*

*(Madiu 22:15-22; Luke 20:20-26)*

<sup>13</sup> Ma 'oinega babadaowedi sihetunediya tupwadi Palisiyao ma wete Helodi 'ina bodao, ma taudi sitauya Yesu 'oina ma 'abehega hesilalega sida 'abowe ma 'ina hemaisa pui siloba.

<sup>14</sup> Sitauyama Yesu 'oina ma sihegwae, sigwae, “Bada, 'asanapugowa 'abehega 'owa tohe'ita moisa, ma tomota 'idi waiwai weyahina geya 'uda matauta, ma tuwa gwae moisege 'uhehepwaila mahemahetena tomota mabwaiyadi 'oidiya, beno Yehoba 'ina 'eda 'uhehe'ita bwaibwaini. Coinega togidega? Cilobwainegita ma Kini Sisa 'ina takesi ta'ebwae, bo sahena? <sup>15</sup> Sowasowana takesiina tahemaisa Kini 'oina, bo sahena?”



Ma Yesu 'idi 'abo 'isanapu pwaiya, 'oinega 'ihewgaediya, 'igwae, “To'aha weyahina watohotohogau? Hana maneina wa'eweyama, ma ya'ita.”

<sup>16</sup> Coinega mane da'ule 'aigeda si'ebwaeya. Ma Yesu 'ihewgaediya, 'igwae, “Mane bewa 'oina taiya 'ana ma'ama'ayau ma sanina?”

Ma sigwae “Kini Sisa.”

<sup>17</sup> Ta Yesu 'ihewgaediya, “Ee gide, 'eguma Kini 'ina ginaula wa'ebwae Kini 'oina, ma 'eguma Yehoba 'ina ginaula Yehoba wa'ebwae.”

Ma Yesu 'ina gwaeina weyahina nuwadi 'ihewpanopwano madouna.

*To'amasa 'idi toholohila*  
(Madiu 22:23-33; Luke 20:27-40)

<sup>18</sup> Coinega wete Sadusiyao sinaoma ma Yesu 'oina sihesilala, taudi geya sihemihemisa to'amasa 'idi toholohila weyahina, ma sigwaeya, <sup>19</sup> “Bada, 'ida loina bewa gide Mosese 'ileleya, 'igwae, ‘Ceguma 'aigeda loheya 'ihai ma geya natunamo ma 'i'amasa, loheyaina tasina hiwapena ba'idana sihai, ma 'eguma wahine 'igamwa beno natunao 'ihenatunediya to'amasaina miyalaenao’ ”

<sup>20</sup> Coinega 'ebe'ita si'ebwaeya sigwae, “Caigeda loheya matasinao simiyamiya 'adi baibaiwa site sebeni, ma 'adi tautuwaina 'ihaiya ma muliyetega geya 'ihenatuna ma loheyaina 'i'amasa. Coinega wete tasina deinega hiwapeina 'ihaiya, ta wete gidemusa geya 'ihenatuna ma 'i'amasa. <sup>21</sup> Coinega tasina deinega hiwapeina 'i'eweya, ma wete simiyamiya ta geya 'ihenatuna, ma loheyaina 'i'amasa. <sup>22</sup> Ma site hataedi wete gidemusa si'ama'amasa ma hesi geya natudiyao. Ta muliyetega wahine wete 'i'amasa. <sup>23</sup> Coinega toholohila 'ana tuta wahineina nata to loheya mwanena moisa? Weyahina mabwaiyadiedi wahineina sihaiya?”

<sup>24</sup> Ma Yesu 'idi hesilalaina 'ihemaiseya, 'igwae, “Bewa 'imi heyauyaule, weyahina Buki He'asisi geya wada sanapuya, ma wete Yehoba 'ina waiwai geya wada sanapuya. <sup>25</sup> Toholohila 'ana tuta 'oina tomota geya'abwa sihaihai, ma hesi 'idi miya aneloseyao galewa gidemusa.

<sup>26</sup> “Mwalona Yehoba Mosese 'ihewgaeya toholohila weyahina, 'eguma Buki He'asisi wahasili, nata wa'ita loba. Weyahina tutaina Mosese yoho 'awawa 'itautauya ma Yehoba 'aiwe 'ala'alasina 'oinega Moseseina 'ihewgaeya 'igwae, ‘Taugu Ebalahamo 'ina Yehoba, ma Aisake 'ina Yehoba, ma Yakobo 'ina Yehoba.’ <sup>27</sup> Yehoba geya tomota 'ama'amasidi 'idi Yehoba, ma hesi tomota mayawasidi 'idi Yehoba, 'oinega tubudaowedi mayawasidi bewa tuwa simiyamiya. Ma 'omi 'imi he'ita ginaula bewa weyahina geya dumwaluna.”

*Loina madoudi*  
(Madiu 22:34-40; Luke 10:25-28)

<sup>28</sup> Eeta loina 'ana tohe'ita 'aigeda 'inaoma, ma taudi 'idi he'oh'e'ohena Yesu ba'idadiu 'ihesagoheya, ma 'idi hesilalao 'adi maisa Yesu 'oinega 'ihesagohediya wete 'abehega 'ausala hedada, 'oinega tauna wete Yesu 'oina 'ihesilala 'igwaeya, “Bada, loina mabwaiyadi 'oidiyega to loina madouna?”

<sup>29</sup> Ta Yesu 'igwaeya, “Loina madouna bewa: Comi me'Isileli 'igu gwaeina wahesagohe 'abehega Bada Yehoba 'iboinamo. <sup>30</sup> Coinega 'ino Bada Yehoba 'uhelauwe 'ateu mabwaiyanega ta yaluyaluwau ta nuwau ta wete 'ino waiwai mabwaiyana 'oidiyega. <sup>31</sup> Ma 'aigeda wete loina madouna bewa: Ciyamwao 'uhelauwedi gide 'owa 'uboi 'uhelauwego. Loina 'eluwaedi loina mabwaiyadi simadou sinediya.”

<sup>32</sup> Eeta loina 'ana tohe'itaina Yesu 'ina gwae 'ihesagoheya, ma 'igwaeya, “Bada, 'ino gwae beno gwae moisa, 'abehega tauna 'iboinamo tuwa Yehoba, ma geya 'aigeda wete Yehoba 'imiyamiya. <sup>33</sup> Coinega 'ilobwainegita ma tahelauwe 'ateda mabwaiyanega ta nuwada mabwaiyanega ta 'ida waiwai mabwaiyanega, ma wete 'iyadao tahelauwedi gidemusa tauda tahelauwe 'esegita. Loina 'eluwaedi madoudi, ma hesi hebai nuwana 'e'ahai tapwaoliye Yehoba 'oina, beno geya madouna, 'awa?”

<sup>34</sup> Ta Yesu loheyaina 'ina gwae 'ihesagoheya 'abehega dumwaluna, ma 'ihewgaeya 'igwae, “Beno gwae moisa, ma 'owa Yehoba 'ina 'ebeloina 'oina 'uhahalatulatu.”

Tuta nage 'oina tomota Yesu simatauteya, ma geya 'eta taiya sowasowana ma 'ihesilala hila.

*Kelisoina tauna Debida 'ina susu*  
(Madiu 22:41-46; Luke 20:41-44)

<sup>35</sup> Ma 'oinega Yesu Hada He'asisi 'alona 'ihehe'ita tomota 'oidiya, ma 'ihewgaediya 'igwae, “Togidega ma 'oinega loina 'ana tohe'itao sigwae 'abehega Debida 'ina susuwega Keliso 'ili'uwa? <sup>36</sup> Weyahina Debida mwalo Yaluyaluwa Tabuna 'ina waiwai 'oinega Kelisoina 'i'ahwa badaeya, 'igwae:

Yehoba 'ina gwae 'igu Bada 'oina, 'igwaeya, 'Cigu 'ebeulega 'umiyatoi ma 'ana siga 'a 'alehao yalagu suluhedi 'aheu gabulena.’

<sup>37</sup> Debidaina 'ina Bada Keliso, 'oinega togidega hede ta Debida 'ina susuwega 'abwa Keliso 'ili'uma?”

Ma boda mabwaiyadi Yesu 'ina he'ita nuwadi 'i'eweya.

*Yesu loina 'ana tohe'itao 'i'ahwa galegalediya*  
(Madiu 23:1-36; Luke 20:45-47)

<sup>38</sup> Coinega Yesu 'ihewgaediya, 'igwae, “Sahena loina 'ana tohe'itao mumugadi wamulimuliye. Weyahina taudi mumugadi tuwa gidemusa tuta baibaiwana nuwanuwadi ma'adi 'ale'o duduledi si'otedi, ma tomota gamwagamwanidiya sisakosakowasi ma 'abehega sihe'asisiyedi. <sup>39</sup> Ma wete nuwanuwadi 'ebemiya bwebwe'ana hada tapwalolo 'oidiya, ma wete guyai 'adi tuta nuwanuwadi ma wagahata simiyatoi. <sup>40</sup> Ta wete tuta mabwaiyana tomota matadiya si'ahwa'ahwanoi dudulena Yehoba 'oina, ma hesi 'idi 'ahwanoina geya bwebwe'ana, weyahina 'atediya sinuwanuwatuhu togidega nata hiwahiwapu si'abo 'esedi ma 'idi tobwatobwao si'ewadi. Coinega nata Yehoba maisa galana 'i'ebwaedi.”

*Hiwape 'ina helau*  
(Luke 21:1-4)

<sup>41</sup> Yesu Hada He'asisi 'oina helau 'ana 'ebe lagu deina 'imiyatoiya, ma tomota 'idi helau mane silagulagu ma Yesu 'i'e'ebubuna, ma towasawasao 'idi helau madoudi 'i'itediya, <sup>42</sup> ma wete hiwape wewelohena 'i'iteya 'ina helau toea 'eluwamo 'ilagudiya.

<sup>43</sup> Yesu 'i'iteya ma 'ana tomuliyao 'ibwau he'autedima, ma 'ihewgaediya, 'igwae, “Moisa tuwa, hiwape nage 'ina helau mabwaiyadi 'idi helau 'imadou sinediya. <sup>44</sup> Weyahina mabwaiyadi 'idi tupwa madouna 'imiyamiya, ma hesi hiwape nage wewelohena, ma 'ina mane mabwaiyana 'ilaguya, ta geya 'eta wete 'ina tupwa 'imiyamiya ma 'oinega 'ana 'igimwane.”

## 13

*Tuta mwauna 'abwa 'ilatuma*  
(Madiu 24:1-14; Luke 21:5-19)

<sup>1</sup> Eta Yesu ma'ana tomuliyao Hada He'asisi 'oinega silatuwa, ma 'ana tomuliyao 'aigeda Hada He'asisi 'ana hadao Yesu 'ihe'itaeya, 'igwae, “Bada, 'u'ita hadaedi 'adi paihowa bwebwe'ana hedada, da'ule madoudi 'oidiyega si'abidiya.”

<sup>2</sup> Ma Yesu 'igwae, “Hadaedi madoudi 'u'itediya 'i'iunamo ma mabwaiyadi siligehe yahuledi ma geya'abwa wete 'eta tupwa wa'ita'ita hila.”

<sup>3</sup> Muliyetega Yesu 'itauya Olibe 'oyana 'oina ta 'imiyatoiya, ma 'oinega Hada He'asisi Yelusalema 'oina 'i'e'ebubuna, ma Pita ta Yemesa ta Yoni ta Andulu sinaoma ma siboidimo Yesu ba'idadiu, eema sihewgaeya, sigwae, <sup>4</sup> “Bada 'uhewgaemai to tuta 'oina Hada He'asisi siligehe, ma to 'ila'ilala 'adi 'ita 'oidiyega 'ada sanapu 'abehega ginauledi 'i'iunamo silatuma?”

<sup>5</sup> Coinega Yesu 'ihe'ale 'oidiya 'ihewwaila ma 'igwaeya, “Wa'ita yahigomi tabu ma tomota tupwadi si'abowegomi. <sup>6</sup> Weyahina 'abwa tomota baibaiwadi saniguwega

sinaonaoma ma 'abehega sihanugeta puigomi, ma 'aigeda 'aigeda 'oidiyega sigwae, 'Taugu Kelisoina,' ma tomota baibaiwadi simuliyedi. <sup>7</sup> Wete wasa 'abwa wahesagohedi 'alehao deimiya, ma wete bwaga, taudimo si'ale'aleha hiladi, ma hesi sahena wa'ate'ateyoho. Ginaula bewa nata silatu nugeta ma hesi bale'u 'ana 'ebelosaloha 'ana tuta 'abwa hedada. <sup>8</sup> Weyahina 'abwa hali boda ma hali boda si'aleha hiladi, ma wete hali 'ebeloina ma hali 'ebeloina silo'aleha hiladi, ma wete mwani'ini'i sipilipili hali tupwa ma hali tupwa 'oidiya, ma gomale madoudi sihapwehapwesa. Ma ginaulaedi bewa tuta mwauna 'ana 'ebehegaina tuwa.

<sup>9</sup> “Ta 'omi hesi wa'itayahigomi, weyahina tomota 'abwa si'abiyahigomi ma sitauyegomi yatala weyahina, ta Hada Tapwalolo 'oidiya sisapigomi, ta wete 'abwa toloinao ma kiniyao matadiya sitoegomi ma watoholo ma siheyatalaegomi, beno weyahina 'omi 'abehega taugu 'igu bodao, ta saugaina 'oina teteligu wahepwaile 'oidiya. <sup>10</sup> Ma teteligu bwebwe'ana 'i'elelewana nugeta tupwa mabwaiyana 'oidiya, ma muliyetega tuta 'ana 'ebelosaloha 'ihapwesa.

<sup>11</sup> “Ma 'eguma toloinao matadiya sihetohologomi yatala weyahina, sahena wa'ate'ateyoho togidega wagwae 'esa. Ma hesi ma'imi 'atepatu tuwa wagwae, weyahina geya 'abehega 'omi 'imi gwae wahepwaile, ma hesi Yaluyaluwa Tabuna nata gwae 'i'ebwaegomi, ma wahepwaila latuhe.

<sup>12</sup> “Ta wete tuta sinaonaoma 'oidiya tomota 'idi susu 'alodiya 'aleha 'ihapwesa weyahigu, beno loheya tasina 'itebae ma silohe'amasi. Ma wete gide tamana natuna 'itebae ma silohe'amasi. Ma wete gwagwama sinadiyao ta tamadiyao sitebaedi ma silohe'amasidi. <sup>13</sup> Ta tomota mabwaiyadi 'abwa silo'alehegomi weyahina 'omi 'abehega 'agu tohemisao. Ma hesi taiyawedi 'omi weyahigu wa'atepatu ee 'ana siga tuta 'ana 'ebelosaloha 'oina, nata 'ebe yaliyaya waloba.

*Mwau madouna*  
(Madiu 24:15-28; Luke 21:20-24)

<sup>14</sup> “Cabwa 'eguma 'omi wa'itadi hali tomota ginaula gala hedadedi ma didigadi sihetoholodi tupwa he'ahe'asisina 'oina (Ceguma taiya nage gwaeina 'ihasili 'abwa 'isanapu), tuta nage 'oina Yudiya 'ana tomiyao 'ilobwainediya ma 'oya 'oidiya sidena. <sup>15</sup> Ma 'eguma taiya wagahata 'imiyamiya 'idena mwayamwayau, ma sahena 'iluhuluhu hila 'ina hada 'alona 'ina tobwatobwa sabi 'ewadi. <sup>16</sup> Ma 'eguma taiya wete tanoha 'ipaipaihowa geya'abwa wete 'ihilahila 'ana 'ale'o hali tupwa 'ilaguya 'i'ewa.

<sup>17</sup> “Ma tuta nage 'oina togamwa ma tohesusuwao sihenuwale'ole. <sup>18</sup> Coinega wa'ahwanoi waiwai ma tuta bwebwe'ana Yehoba 'i'ebwaegomi 'imi tuta dena 'oina, ma sahena gogai 'ana tuta.

<sup>19</sup> “Moisa tuwa, tuta nage 'oina mwau hedada, weyahina tutaina Yehoba bale'u 'ihemasaleheya 'oinega ma 'ana siga nige geya 'aigeda wete mwau nage gide 'ida latuwa, ma 'abwa geya sowana wete mwau bewa gide 'ida latu hila. <sup>20</sup> Mwau nina 'ana sabwelowao 'eguma Yehoba sahena 'i'abi'abi hetoto'upe beno tomota mabwaiyadi si'amasa, ma hesi Yehoba sabwelowedi 'abwa 'i'abi hetoto'upadi, tauna 'ina tomotaiyao hesihesinuwaidi weyahidi.

<sup>21</sup> “Tutaina 'oina 'eguma taiya 'ihewagwagomi, 'igwae, 'Keliso bewa' nuwana 'Nage,' sahena wahehemisaedi. <sup>22</sup> Weyahina Keliso 'abo'abodi ma palopita 'abo'abodi beno silatulatuma ma 'ila'ilala waiwaidi tomota 'oidiya sihe'itaedi, ma 'oidiyega 'eguma sawasawahidi Yehoba 'ina bodao hesihesinuwaidi si'abowedi. <sup>23</sup> Coinega wa'ita yahigomi, weyahina ginaulaedi bewa yahepwaila pwaiya 'oimiya.

*Yesu 'ina hilama*  
(Madiu 24:29-31; Luke 21:25-28)

<sup>24</sup> “Ma tuta mwauwedi 'igumwala ma muliyetega sinala 'iguguyou, ma wete wai'ena 'ina maedana 'igibo, <sup>25</sup> ma 'ipwala galewa sigubagubala, ma ginaulao galewa mabwaiyadi simiyamiya 'idi waiwai si'elo we'a. <sup>26</sup> Tuta nage 'oina mebale'u taugu Loheyaiguina

si'itegau yaloha 'oidiyega yasulusuluma ma'igu waiwai ta ma'igu wasawasa madouna,  
<sup>27</sup> 'oinega 'igu aneloseyao yahetunedi, 'igu bodao hesihesinuwaide sihegogonedima  
 bale'u ta galewa ta yaumai mabwaiyadi 'idi tupwa 'oidiyega.

*Cebe'ita saido 'oinega*

*(Madiu 24:32-35; Luke 21:29-33)*

<sup>28</sup> “Cebe'ita saido 'oinega yahe'itegomi 'abehega 'eguma saido nabaina hauhaudi 'ilag-  
 ulagudi, beno wasanapuya 'esihe 'ana tuta 'abwa 'ilatu. <sup>29</sup> Ma wete 'ila'ilalaowedi 'oimiya  
 yahepwalediya, 'eguma to tuta ma wa'ita lobadi, beno wasanapuya 'abehega 'igu tuta  
 hilama 'ana tuta 'i'ehohoya. <sup>30</sup> Moisa tuwa, yaso bewa geya sowana wagumwagumwala  
 ma 'ana siga ginaulaedi mabwaiyadi silatu.

<sup>31</sup> “Cabwa galewa ma bale'u sisawala, ma hesi 'igu gwae geya sowana 'isawasawala.

*Cina hilama 'ana tuta geya 'ana tosanapumo*

*(Madiu 24:36-44)*

<sup>32</sup> “Ma hesi geya 'eta taiya 'isanapu to tuta nuwana to sabwelo 'oina yahilama, ta wete  
 aneloseyao galewa geya sisanapu. Ma taugu wete geya yasanapu. Ta Tamagu 'iboinamo  
 'isanapuya. <sup>33</sup> Coinega walomatayahi, weyahina 'igu tuta hilama geya wasanapu.”

<sup>34</sup> Cebe'ita wete Yesu 'i'ebwaediya 'igwae, “Ceguma 'aigeda bada 'abehega 'ina hada  
 'abwa 'ipilisine ma 'itautau hali tupwa, 'ina topaihowa 'aigeda 'aigeda 'idi paihowa  
 'iheguyaidi, ma 'iloinedi ma 'abehega 'ina hada si'itayahi, ma wete hada 'ana 'ah-  
 wa'eda 'ana to'itayahina 'ihegwae, 'igwae, 'Geya'abwa 'u'eno'eno, ma hesi 'ulomatayahi  
 bwaibwaini.’ <sup>35</sup> Coinega 'ilobwainegomiya ma walomatayahi ma wayamweyamwegau,  
 weyahina toni hadaina 'ina latu 'ana tuta geya wasanapu, nuwana lahilahiya, nuwana  
 nihuwana gamwana, nuwana gona 'ada'adale, nuwana gonagona. <sup>36</sup> Geya'abwa yalatu-  
 latuma ma 'eno'enowega 'atemi yaloheyoho.

<sup>37</sup> “Cigu hemataluwa bewa 'oimiya ma wete tomota mabwaiyadi 'oidiya 'abehega  
 walomatayahi bwaibwaini.”

## 14

*Babada nuwanuwadi ma Yesu silohe'amasi*

*(Madiu 26:1-5; Luke 22:1-2; Yoni 11:45-53)*

<sup>1</sup> Hataona Guyaina 'ana 'ebe nuwatuhuyahina 'abwa 'ilatu sabwelo 'eluwa mulina.  
 Guyaina 'alona 'adi pwalawa geya 'ana 'ebe 'abi hesesehamo si'ai. Ma topwaoli  
 madoudi ta lona 'ana tohe'itao sinuwanuwatuhu togidega ma Yesu si'abo 'ese eema  
 'abehega si'abiyahi ma silohe'amasi, <sup>2</sup> ma sigwaeya, “Geya'abwa guyaina 'alona Yesu  
 ta'abi'abiyahi, tabu ma tomota sigamwasowalegita ma silo'alehegita.”

*Wahine Yesu 'iheloiya 'asa Bedani 'oina*

*(Madiu 26:6-13; Yoni 12:1-8)*

<sup>3</sup> Yesu 'abwa Bedani 'oina 'imiyamiya Saimoni 'ina hada, tauna mwalo lepelo 'aigeda;  
 ma tutaina Yesu 'i'ai'ai Saimoni 'ina hada, wahine 'aigeda ma'ina holowa 'iluhuma; ma  
 holowaina sanina nadi, maisana madouna, ma 'ana botolo 'ausala hedadena. Ma wahine  
 botoloina 'ahwana 'i'ahulaseya, ma holowaina Yesu debana 'isiweya.

<sup>4</sup> Ma tupwadi tomota si'iteya ma wahine silomugiyeya, sigwae, “To'aha weyahina  
 holowa 'imudaliya? <sup>5</sup> Cilobwaineya ma holowaina 'ihegimwaneye ma 'ana maisa teli  
 handeledi kina gide 'i'ewa ma 'iheguyaiye towewelohe 'oidiya.” Coinega wahineina  
 siheliyeya.

<sup>6</sup> Ma Yesu 'ihegwaediya, 'igwae, “Tuwa! Walolagu! Geya sowana wahine wa'abi'abi  
 hedohedou, weyahina 'ina lema 'oiguwa bwebwe'ana hedada. <sup>7</sup> Toweweloheyedi  
 wagwaegwaenedi tuta baibaiwana deimiya simiyamiya, ma 'eguma to tuta nuwanuwami  
 tuwa walemedi, ma taugu hesi geya tuta dudulena ba'idamiu tamiyamiya. <sup>8</sup> Ma wahine  
 bewa to'aha 'oina madouna 'ipaihoweya 'oiguwa, beno wahigu 'iheloi nugeteya sabi  
 'atububuina 'agu lagu galiha weyahina. <sup>9</sup> Ma moisa tuwa, 'abwa wasagu 'ana guguya

tomota sihesagohe bale'u mabwaiyana 'oina, ma wahine bewa 'ina paihowa 'oiguwa wete wasana sihe'ote'otetele.”

*Yudasa 'ina tagwala Yesu 'ana teba weyahina  
(Madiu 26:14-16; Luke 22:3-6)*

<sup>10</sup> Coinega Yesu 'ana tomuliya 'aigeda site tuwelo 'oidiyega, tauna Yudasa Isakaliyota, 'itauya topwaoliyao 'idi babadao 'oidiya ma nuwanuwana Yesu 'oidiya 'itebae. <sup>11</sup> Yudasa 'ina gwae sihesagoheya, ma siyaliyaya ma 'oina sigwae hemisa 'abehega 'ana maisa si'ebwae. Coinega Yudasa tuta bwebwe'ana 'iloyamweya ma 'abehega Yesu 'oidiya 'itebae ma si'abiyahi.

*Yesu ma 'ana tomuliyao si'ai'ai  
(Madiu 26:17-25; Luke 22:7-14, 21-23; Yoni 13:21-30)*

<sup>12</sup> Guyai 'ana tuta, beledi geya 'ana 'abi hesesehamo si'ai'ai, ma 'ana sabwelo nugenugetaina 'oina lamiyao sihunudi Hataona 'ana 'ebe nuwatuhuyahina weyahina, ma sabweloina 'oina Yesu 'ana tomuliyao sihegwaeya sigwae, “Bada, ta'eha 'oina nuwanuwau ma Hataona Guyaina weyahina 'a'atububu?”

<sup>13-14</sup> Coinega 'ana tomuliyao 'eluwa 'ihewasediya ma'adi hemataluwa, 'igwaeya, “Watau Yelusalema, ma 'eguma loheya 'aigeda ma'ina 'ebegoi 'i'ahaliya waloba, loheyaina wamuliye ma ba'idamiu waluhu hadai, ma tonihada wahegwae bewa gide, wagwae, ‘Bada bewa gide 'igwae 'esa 'igwaeya, “To tupwa 'eguma 'utagwale ma 'oina ma'agu tomuliyao Hataona 'e'ahaina 'a'ai?” ’ <sup>15</sup> Eema 'ihe'itegomi tupwa madouna tabwana 'atu'atububuina. Tauna 'oina Hataona 'e'ahaina wa'atububu weyahida.” <sup>16</sup> Coinega tomuliyao wedi sitauya ma 'asa Yelusalema 'oina siluhuwa ma to'aha gide Yesu 'igwaeneya 'oidiya ginauledi mabwaiyadi silobediya, ta hadaina 'oina Hataona 'e'ahaina si'atububuya weyahidi.

<sup>17</sup> Ta lahilahiya Yesu ma'ana tomuliyao sinaoma, <sup>18</sup> ma site tuwelo simiyatoiya sabi lohepa'ala. Ta 'idi 'ai 'alona Yesu 'ihewagediya, “Ciyagwao yahegwae bwaibwainigomi 'abehega 'aigeda loheya bewa ba'idada'i ta'ai'ai, 'abwa tauna nata 'i'iunamo ma 'itebae-gau.”

<sup>19</sup> Ma Yesu 'ina gwae bewa weyahina sinuwagala, ta 'aigeda 'aigeda Yesu sihegwaeya, sigwae, “Bada, taiya? Nuwana taugu?” <sup>20</sup> Ma Yesu 'igwaeya, “Cagu totebaina 'omi wate tuwelowedi 'oimiyega, ta tauna ba'idagu gaeba 'oina 'a'ai. <sup>21</sup> Taugu Loheyaiguina 'abwa yatauya 'edaina mwalo Buki Tabu 'oina sihepwaila nugeteya, ma hesi 'agu totebaina nuwagalagalaina moisa; ma bwebwe'ana 'eguma mwalo sinana geya'abwa 'ihenenatune, weyahina 'ina li'u 'oinega 'ihenuwa galagala 'ina paihowa galana weyahina.”

*Badaina 'ina 'ai  
(Madiu 26:26-30; Luke 22:15-20; 1 Kolinita 11:23-25)*

<sup>22</sup> Cabwa si'ai'ai, ma Yesu beledi 'i'eweya ma weyahina 'igwae helauwa, ta 'ihisiya ma 'i'ebwaediya, 'igwae, “Bewa wa'ai wahigu.”

<sup>23</sup> Ta waini mabiyoina wete 'i'eweya, ma weyahina 'iloyauwedo Yehoba 'oina, ma 'i'ebwaediya, ma mabwaiyadi sinuma. <sup>24</sup> Ta wete 'ihewagediya, 'igwae, “Bewa bweyahigu 'idaudau tomota mabwaiyami weyahimi, beno lona 'ehauna. <sup>25</sup> Ma yahegwae gomi tuta bewa ma mulina waini bewa geya'abwa 'oinega yanumanuma hila ma 'ana siga waini 'ehauna 'abwa yanuma Yehoba 'ina tupwa.”

<sup>26</sup> Coinega wali 'aigeda siwalileyaya ma sihapwesa sihaneya 'oya Olibe 'oina.

*Yesu 'ihewagaila latu uhala weyahina  
(Madiu 26:31-35; Luke 22:31-34; Yoni 13:36-38)*

<sup>27</sup> Ma Yesu 'ihewagediya, “Ci'iunamo ma mabwaiyami wadena sinegau, gide Buki He'asisi 'ina hepwaila 'igwaeya, 'To'itayahina sipi yalohe'amasi ma sipiyedi si'elelewana.’

<sup>28</sup> Ma 'igu toholohila mulina Galili 'oina yatauya, ma 'omi muliguwega wanaoma.”



<sup>29</sup> Coinega Pita 'igwaeya, “Nata mabwaiyadi sidenasinego, ma taugu tuwa ba'idau tamiyamiya.”

<sup>30</sup> Ta Yesu Pita 'ihewaeya, “Yagwae moisa 'oiuwa nihuwana nata muliyega 'abwa 'am'am 'idou maluwa, beno 'owa 'uuhalegau matoi.”

<sup>31</sup> Ma 'oinega Pita 'i'ahwapa'ala 'igwaeya, “Bada, geya'abwa yauhauhalego. Ceguma silohe'amasigo, taugu wete ba'idau silohe'amasigita.” Tomuliyao mabwaiyadi wete gide sigwae 'esa.

*Yesu Gedesemani 'oina 'i'ahwa'ahwanoi  
(Madiu 26:36-46; Luke 22:39-46)*

<sup>32</sup> Ma sinaowa 'aigeda tupwa sanina Gedesemani 'oina, ma 'ana tomuliyao wedi 'oidiya 'igwaeya, “Bewa 'oina wamiyamiya, ma taugu ya'ahwanoi Yehoba 'oina.” <sup>33</sup> Ma sitetoi ba'idanao 'itoediya, taudi Pita ma Yemesa ma Yoni, ta Yesu 'i'ateyohowa ma'ina nuwagala, <sup>34</sup> ma 'ihewaediya, “Cigu nuwagala madouna ma 'oinega 'abehega ya'amasa, ma 'omi tuwa 'ebwa wamiyamiya, wa'o'oyatola ta walomatayahi.”

<sup>35</sup> Ma Yesu 'ihutulaga tupwana ma 'ibe'u talutalubu'iyia ma 'i'ahwa'ahwanoi 'abehega 'eguma sawasawahina muya bewa Yehoba 'i'ewa yahule, <sup>36</sup> 'igwaegwae, “Tamagu, pai-howa baibaiwana sowasowahiu, 'oinega nuwanuwagu ma muya biyoina bewa 'oiguwega 'u'ewayahule, ma hesi geya 'abehega taugu 'igu nuwatuhuwega, ta hesi 'owa 'ino nuwatuhuwega 'upaihowa.”

<sup>37</sup> Coinega 'ihila ma sitetoiyedi 'ilobediya si'eno sinediya, ma Pita 'ilohanohanoya, 'igwae, “Saimoni, togidega ta 'u'eno'eno. Geya sowasowahiu ma tuta 'i'iuna tuwa 'oina 'u'oyatola, 'awa?”

<sup>38</sup> Ma wete 'ihewaediya mabwaiyadi, 'igwae, “Cilobwainegomiya ma wa'o'oyatola ma wa'ahwa'ahwanoi, ma 'oinega geya'abwa Seitani 'itohotoho hedadegomi. Moisa yaluyaluwami nuwanuwana, ma hesi wahimi si'elodabalala.”

<sup>39</sup> Coinega Yesu 'ilaga hila ma 'ina 'ahwanoina 'ilohileya.

<sup>40</sup> Ma wete Yesu 'ihila 'ana tomuliyao 'oidiya, 'ilobediya wete si'enosinediya, weyahina mata 'eno'eno 'i'ewa pwaidiya. Ma 'ilohanohanodiya, ta sitoholowa ma'idi debamwad-ina, ma geya wete 'idi gwaemo.

<sup>41</sup> Ta Yesu wete 'ilaga ma 'i'ahwa'ahwanoi, ma 'ina hilama hetoina 'oina 'ilobediya si'enosinediya, ta 'ihewaediya, “Togidega, 'abwa wa'eno'eno ma wa'ai'aiyawasi? Ta 'igu tuta bewa 'ilatu pwaima ma taugu Loheyaiguina 'i'iunamo sitebaegau togala 'oidiya. <sup>42</sup> Watoholo ma tatau, weyahina 'agu totebaina bewa 'inaonaoma.”

*Yesu 'ana 'abiyahina  
(Madiu 26:47-56; Luke 22:47-53; Yoni 18:2-12)*

<sup>43</sup> Yesu 'abwa 'igwaegwae ma Yudasa 'ihapwesama, tauna Yesu 'ana tomuliyao site tuwelo 'aigeda 'oidiyega. Beno weyahina topwaoliyao madoudi ta loina 'ana tohe'itao ta babadao sihwasaedima 'idi to'alehao Yudasa mahetediu ma 'abehega Yesu si'abiyahi, ma bodaedi 'idi 'ebe 'alehao ta wepasi wete si'ewediya.

<sup>44</sup> Ma Yudasa 'ila'ilalaina 'i'ebwaya pwaiya 'oidiya, 'ihewaeya, 'igwae, “Ceguma taiya ya'atusapwali, beno tauna Yesu, ma wa'abiyahi ma walomatayahi ma watauye.”

<sup>45</sup> Coinega 'idumwaluwa Yesu 'oina ma 'ihelauweya ma 'i'atusapwaliya. <sup>46</sup> Eeta bodaedi silatuma ma Yesuina si'abiyahiya.

<sup>47</sup> Ma Yesu 'ana bodao 'aigeda 'oidiyega 'itotoholo deina, ma 'ina 'elepa 'ilililoloya, ma tota'ona madouna 'ina topaihowa tenana 'i'upwa yahuleya.

<sup>48</sup> Ma Yesu boda 'ihewaediya, 'igwae, “Nuwana taugu toyagaha ta 'oinega ma'imi 'ebe'aleha ma ma'imi wepasi wanaoma sabi 'abiyahigau. <sup>49</sup> Ta to'aha lamuna 'oinega geya wa'abiyahigau sabwelowedi gamwagamwanimiya yamiyamiya Hada He'asisi 'oina ma yahehe'ita tomota 'oidiya? Ma tuwa hesi ginaula bewa silatuma ma 'ane palopitao 'idi gwae nugeta Buki He'asisi 'alona sihapwesa bwaibwaina.”



<sup>50</sup> Coinega Yesu 'ana tomuliyao mabwaiyadi sidena sineya. <sup>51</sup> Ma 'aigeda hewali ma'ana 'ale'o 'aigeda tuwa Yesu 'imuliyeya, ma tolo'alehao nuwanuwadi si'abiyahi, <sup>52</sup> ta si'abisapuliya ta 'ana 'ale'omo si'eweya, ma bugebugewanamo 'idena.

*Yesu sitoeya toloinao 'oidiya*

*(Madiu 26:57-68; Luke 22:54-55, 63-71; Yoni 18:13-14, 19-24)*

<sup>53</sup> Ma Yesu sitoeyama ma siluhuweya topwaoli madouna 'ina hada, weyahina hadaina 'oina topwaoli madoudi ta babadao ta lolina 'ana tohe'itao si'eto'autama. <sup>54</sup> Ma Pita bwagebwagega Yesu 'imulimuliye ma 'inaoma Topwaoli madouna 'ina 'asa, ma Pitaina to'itayahinao ba'idanao simiyatoiya ta 'aiwe 'oina simwaimwailu.

<sup>55</sup> Eeta topwaoli madoudi ta babadaedi nuwanuwadi Yesu 'ana tohe'ewao silobadi ma 'idi he'ewaina 'oinega Yesu silohe'amasi, ma hesi geya 'eta wete siloba. <sup>56</sup> Weyahina tohe'ewao baibaiwadi sihehepwailamo, ma hesi 'idi hepwailaedi geya sihemahemahetena. Taudi mabwaiyadi to'abo tuwa. <sup>57</sup> Ma tupwadi 'oidiyega sitoholowa ma Yesu sihe'ewa 'abo'aboweya, sigwae, <sup>58</sup> “Yesu 'ina gwae 'aigeda 'ahesagoheya 'igwae, 'Hada He'asisi bewa tomota si'abiya, 'abwa yaligehi yahule, ma sabwelo 'etoi 'oidiya ya'abihila, ma geya tomota nimadiyega,” <sup>59</sup> ma hesi 'idi he'ewa ginaula bewa weyahina geya sihemahemahetena.

<sup>60</sup> Coinega topwaoli madouna 'itoholowa gamwagamwanidiya, ma Yesu 'ihesilaleya, 'igwae, “Geya 'uda hemaiseya, 'awa? Loheloheya 'idi he'ewa 'oiuwa 'uhesagoheya?”

<sup>61</sup> Ma Yesu tuwa 'ihehenono ta geya wete 'ida gwaeya.

Eeta topwaoli madouna Yesu 'ihesilala hileya, 'igwae, “Togidega, 'owa Yehoba natuna To'abihetenaina, 'awa?”

<sup>62</sup> Ma Yesu 'igwaeya, “Cehe! Taugu! Ma wete 'abwa taugu Loheyaiguina wa'itegau Tohewaiwai moisa 'ina 'ebeulega yamiyamiya, ma wete galewa yaloha debadiyega yanaoma.”

<sup>63-64</sup> Coinega topwaoli madounaina 'igamwasowala moisa, 'oinega 'iboinamo 'ana 'ale'o 'i'igaliya, ma 'igwaeya, “Cina gwae galana wahesagoheya? Moisa, loheya bewa Yehoba 'isinaliya. Tuwa! Geya'abwa wete 'ana tohe'ewao sigwaegwaene 'ina puiyao weyahidi. Togidega 'imi nuwatuhu Yesu weyahina?” Ma 'oinega mabwaiyadi sigwaeya, “Cilobwaineya tuwa ma 'i'amasal!”

<sup>65</sup> Nage 'oina tupwadi tomota Yesu si'esoheya, ma matana 'ale'owega siwaduya, ma sihunu dadaneya ma'idi 'ehetete, sigwaeya, “Cuhegwaemai taiya 'ihunugowa?” Ma to'ita yahinedi Yesu si'abiyahiya, sisapiya ta sitauyeya.

<sup>66</sup> Ta Pita 'abwa 'atamana 'imiyamiya, ma topwaoli madouna 'ina topaihowa gumalaulauna 'aigeda 'ilatuma, <sup>67</sup> ta Pita 'i'iteya 'imwaimwailu. Coinega wahineina Pita 'i'e'ebubuya, ta 'igwaeya, “Yesu gwama Nasaleta 'owa mwalo ba'idau wamiyamiya, 'awa?”

<sup>68</sup> Ma Pita 'iuhala, 'igwaeya, “Ginaulaina 'ugwaegwaene geya yasanapu toho.” Coinega Pita 'ilatuwa mulimuliya. <sup>69</sup> Ma gumalaulauina Pita 'ihenima susuweya tomiyaedi 'oidiya, 'igwaeya, “Loheya nage Yesu 'ina boda 'aigeda.” <sup>70</sup> Ma Pita 'ihesagoheya ma 'iuhala hila, 'igwae, “Taugu geya.” Tuta 'i'iuna mulina to'ebubunaowedi Pita sihegwaeya, sigwae, “Moisa tuwa, 'u'abowa. Cowa Yesu 'ina boda, weyahina 'owa gwama Galili.”

<sup>71</sup> Coinega Pita 'iuhala moisa, ma gwae galana 'oinega 'ibwauhaneya, 'igwae, “Yesu tauna wagwaegwaene, taugu geya yasanapu toho. Tamada!” <sup>72</sup> Ta tutaina 'oina 'am'am 'idouwa maluwa, ma nage 'oina Pita 'inuwatuhuya Yesu 'ina gwaeina 'abehega “Muliyega 'abwa 'am'am 'idou maluwa, beno 'owa 'uuhalegau matoi.” Ma Pita 'ina 'aboina galana 'inuwatuhuya, ma 'idouwa.

*Yesu 'ina yatala Pailato matana*

*(Madiu 27:1-2, 11-14; Luke 23:1-5; Yoni 18:28-38)*

<sup>1</sup> Gona 'i'adaleya ma topwaoli madoudi ta babadao ta lolina 'adi tohe'itao ta wete toloinao mabwaiyadi si'eto'autama, ma siloina Yesu weyahina, 'oinega nimana sipaidiya ma sitauyeya Pailato 'oina ma 'abehega Pailatoina 'iloinae.

<sup>2</sup> Coinega Pailato Yesu 'ihesilaleya ma 'igwae, “Cuhepwaila, 'owa meYudiya 'idi kini, 'awa?”

Ma Yesu 'igwaeya, “Beno 'ugwae pwaiya.”

<sup>3</sup> Eeta topwaoli madoudi ginaula baibaiwana weyahidi Yesu sihe'eweya. <sup>4</sup> Coinega Pailato Yesu 'ihesilala hileya, 'igwae, “Togidega ta geya 'uda hemaissa? Hepwaila bewa sihehe'ewago 'uhesagoheya?”

<sup>5</sup> Ma Yesu geya wete to'aha 'ida hemaissa, 'oinega Pailato nuwana 'ihewpanop-wanowa madouna.

*Siloina ma Yesu 'i'amas*

*(Madiu 27:15-26; Luke 23:13-25; Yoni 18:38-19:16)*

<sup>6</sup> Bolime 'aigeda 'aigeda Hataona Guyaina 'oidiya toloina 'ina mumuga beno deliyega 'aigeda loheya 'ida lihasi ma 'ilatuma, 'eguma taiya boda sihesinuweya. <sup>7</sup> Tuta nage 'oina tupwadi meLoma 'adi 'alehao meYudiya deliya simiyamiya. Mwalo meYudiyaedi geya nuwadi meLoma 'idi lolina, 'oinega silo'alehediya, ma 'aigeda 'oidiyega sanina Balaba 'alehaina 'alona tomota 'ilohe'amasidiya. Coinega meLomaedi Balaba ma'iyanao si'abiyahidiya ma deliya silagu luhuwediya.

<sup>8</sup> Eeta boda si'eto'autama ma si'ahwanoiya Pailato 'oina, sigwaeya, “Sawasawahina ma 'aigeda loheya 'ulihasi weyahima, gide 'ima 'ahwanoi 'oiuwa 'upaipaihowa bolime 'aigeda 'aigeda 'oidiya?”

<sup>9</sup> Ma Pailato 'ihewgaediya, “Nuwanuwami 'abehega meYudiya 'imi kini yalihasi weyahimi, 'awa?” <sup>10</sup> Weyahina Pailato 'isanapuya 'abehega topwaoli madoudi 'idi he'ipi'ipiyega si'wayamiya.

<sup>11</sup> Ma hesi topwaoli madoudi tomota 'idi nuwatuhi sihenuwalagu pwaiyeya 'oidiya, 'oinega Yesu siguipaileya ma Balaba hesi sanina si'inaneya, ma 'abehega 'ilihasi weyahidi.

<sup>12</sup> Ma Pailato 'ihewgaediya 'igwae, “Togidega hede yaloina 'ese tauna wabwauweya 'imi kini?”

<sup>13</sup> Ma sitala'asona, sigwae, “Kelose 'oina tatutuhepa'i!”

<sup>14</sup> Ma Pailato 'igwaeya, “To'aha hede 'ina pui ta 'oinega 'abehega 'amas 'iloba?”

Ma siwuiwui 'enadi madounega, sigwae, “Kelose 'oina tatutuhepa'i.”

<sup>15</sup> Coinega Pailato nuwanuwana ma boda 'i'abihe yaliyayaedi, ta Balaba 'ilihasiya 'oidiya, ma 'ina tolo'alehao 'iloinaediya ma Yesu gulahega sisapiya ma muliyetega 'abwa situtuhepa'ine kelose 'oina.

*Tolo'alehao Yesu silotuyaneya*

*(Madiu 27:27-31; Yoni 19:2-3)*

<sup>16</sup> Pailato 'ina tolo'alehao Yesu sisapiya ma sitoeya 'ina hada siluhuweya, beno tolo'aleha 'idi tupwa madouna hadaina 'alona ma tolo'alehao 'idi bodao mabwaiyadi sibwau he'autedima. <sup>17</sup> Coinega wasawasao 'adi 'ale'o bwehabwehalinega Yesu sihe'wameya, ma debana 'ana pasa talitali 'oinega sipaihoweya ma debana silaguya.

<sup>18</sup> Ma sihe'aleya lotuyanega siloyauwedoweya, ma sihegwae, “Yauwedo, 'owa meYudiya 'idi kini baa!”

<sup>19</sup> Ma wete 'aiwe 'oinega Yesu debana sisapiya, ma si'esoheya, ta lotuyanega Yesu matana si'etuluha. <sup>20</sup> Cidi lotuyana 'igumwala, ta 'ale'o wasawasaedi 'oinega sihaloloya, ma 'iboi 'ana 'ale'owega sihe'ote hileya, ma sitoeya sabi gihekelose.

*Yesu situtu hepa'ineya kelose 'oina*

*(Madiu 27:32-44; Luke 23:26-43; Yoni 19:17-27)*

<sup>21</sup> Yesu sitoeya, 'asa madouna 'oinega silatuwa, ma silobeya gwama Sailini pwatulega 'itautauyama, ta siloineya ma Yesu 'ana kelose 'i'ahali. Loheyaina sanina Saimoni, beno Alekisana ma Lupuso tamadiu.

<sup>22</sup> Coinega sitoeya tupwa Goligota 'oina (Ma Goligota 'ana sanapu beno Mwagu 'a-saina), <sup>23</sup> ma mulamula si'ebwaeya, beno waini ta mulo ba'idana, ma 'abehega geya'abwa muya madouna 'ilolotoho, ta Yesu 'iguipaileya. <sup>24</sup> Ma 'oinega bale'uwa situtu hepa'iyeya kelose 'oina, ma sihetoholoya. Muliyetega topaihowaowedi Yesu 'ana 'ale'o si'ewediya, eeta siguyaiyeya siboidimo 'oidiya. Cidi heguyaina gide kati 'oinega, ta 'eguma taiya 'iwini 'ana 'ale'o 'aigeda 'i'ewa.

<sup>25</sup> Tutaina Yesu si'abihe keloseya beno gonagona 'ana gamwagamwana 'oina. <sup>26</sup> Ma 'ana kelose 'oina sileleya, "MeYudiya 'idi kini." Beno 'ina 'amasa lamuna. <sup>27</sup> Ma wete toy-agaha 'eluwa si'abihe kelosediya, 'aigeda 'ina 'ebeulega ma 'aigeda 'ina 'adigeyeyega. <sup>28</sup> (-)

<sup>29</sup> Tomota 'edai sitautau ma Yesu kelose 'oina si'iteya, ma silotuyaneya ma si-henameya, sigwae, "Nuwa'ole'oleu 'iya! Cugwaeya 'abehega sawasawahi Hada He'asisi 'uligehi ma sabwelo 'etoi 'oidiya 'u'abihila. <sup>30</sup> Hana 'u'abihetego 'uboi ma kelose 'oinega 'usuluma." <sup>31</sup> Ma wete topwaoli madoudi ta loina 'ana tohe'itao sibo 'oidiya sigwaehaneya, ma Yesu si'eheteyeya, sigwaegwae, "Hali tomota 'ilemediya, ma hana 'iboi 'ida leme? <sup>32</sup> Tauna 'abehega To'abihetenaina ma tupwa Isileli 'ana toloina, hana keloseina 'oinega 'ida suluma ma tada 'ita ma 'ane tahemisae."

Ma wete toyagahaowedi Yesu ba'idanao si'abihe kelosediya, taudi 'adi kelose 'oidiyega sibwau baleya eema siheliyeya.

#### *Yesu 'i'amasa*

*(Madiu 27:45-56; Luke 23:44-49; Yoni 19:28-30)*

<sup>33</sup> Ma 'i'asudiladila pwaiya, ma tupwa mabwaiyana 'iguguyouwa 'ana siga lahilahiya. <sup>34</sup> Lahilahiya Yesu 'enana madounega 'ibwauwa, 'igwae, "Eloi, eloi, lama sabakitani," ma 'ana bui, "Cigu Yehoba, 'igu Yehoba, to'aha weyahina 'u'ebesinegauwa?"

<sup>35</sup> Ma tupwadi deina sitotoholo 'ina bwauina sihesagoheya ma sigwae, "Wahesagoha, Ilaitiya 'ibwauwauwe." <sup>36</sup> Coinega 'aigeda 'oidiyega 'ipiliya ta balou 'i'eweya, ma waini memaina 'oina 'ihebuteya, eeta 'aiwe 'aigeda matana 'ibadiyeya, ma 'i'eyoyo haneheya Yesu 'ahwana, 'itonunusiya, ma loheyaina 'igwaeya, "Tuwa tayamwayamwa, nuwana 'i'iunamo Ilaitiya 'ilatuma ma kelose 'oinega 'i'abihete."

<sup>37</sup> Eeta Yesu 'enana madounega 'iwuiya, ma yawasina 'igumwala.

<sup>38</sup> Ma 'ale'oina Hada He'asisi 'ana biliupa 'i'e'igala luweya tabwanega ma 'isuluwa duduna.

<sup>39</sup> Ma tolo'alehao 'adi tohanugeta Yesu 'ana kelose matana 'itotoholo, Yesu 'ina 'amasa 'ana 'ita bewa gide 'i'iteya, 'oinega 'igwaeya, "Moisa tuwa, loheya nage Yehoba Natuna."

<sup>40</sup> Tupwadi wahiwahine wete bwagebwagega si'e'ebubuna, beno Meli Magidala ma'ina waliyesa, tauna Yosepa ma tasina 'alomauna Yemesa sinadiu, ma Salome wete, <sup>41</sup> taudi mwalo Yesu simuliyeya ma 'ana sipaihoweya 'ina sakowasi Galili 'oina, ma tupwadi wahiwahine wete Galili 'oinega silagama Yelusalema Yesu ba'idanao. Ma mabwaiyadi Yesu 'ina 'amasa si'e'ebubu.

#### *Yesu sigaliheya*

*(Madiu 27:57-61; Luke 23:50-56; Yoni 19:38-42)*

<sup>42</sup> Ma 'ilahilahi pwaiya, beno 'atububu 'ana tuta sabwelo 'inaonaoma weyahina, beno meYudiya 'idi Sabati. <sup>43</sup> Coinega Alimatiya loheyaina sanina Yosepa 'inaoma, tauna ma'ana hemisa ma 'iyamwayamwa ma to tuta Yehoba bale'uwa 'ida hetoloina. Tauna Yosepaina 'inaoma ta ma'ina 'atepatu 'iluhuwa Pailato matana, ma Yesu wahina 'i'ahwanoiyeya ma 'abehega 'igalihe.

<sup>44</sup> Ma 'oinega Pailato 'isalutuwa, 'igwae, "Ciyaa! Yesu 'i'amasa?" Coinega tolo'alehao 'adi tohanugeta 'ibwauweyama ma 'inaoma, ta Pailato 'ihesilaleya, 'igwae, "Togidega, Yesu 'i'amasa pwaiya?"

<sup>45</sup> Ma loheyaina 'igwaeya, “Cehe, 'i'amasana pwaiya.” Coinega Pailato 'itagwala ma 'abehega Yosepa Yesu wahina 'i'ewa. <sup>46</sup> Ta Yosepa 'ale'o wa'ewa'e'ena 'igimwaneya, ma 'i'eweyama, ta ma'ina topaihowao Yesu wahina kelose 'oinega silagu dobiheya, ma 'ale'oina 'oinega siwaduya, muliyetega sigaliheya. Ma galihinaina yalayalaina gide duluha da'ule 'alona, eema da'ule madouna ma pwa'upwa'uwana 'oinega galihina si'ahubodeya. <sup>47</sup> Ma Meli Magidalaina ma 'ina waliyesa, tauna Yosese sinana ma'iyana si'e'ebubuna, ta si'iteya galihina 'oina wahinaina silaguya.

## 16

### *Yesu 'ina toholohila*

*(Madiu 28:1-8; Luke 24:1-12; Yoni 20:1-10)*

<sup>1</sup> Sabatiina 'igumwala, ma Meli Magidala ma 'ina waliyesa, tauna Yemesa sinana, ma Salome wete ba'idadiu holowa bwebwe'ana sigimwaneya ma 'abehega Yesu wahina 'oinega siheholoi.

<sup>2</sup> Gona 'i'adaleya beno wiki 'ana sabwelo nugenugetaina 'oina, ma sinala 'ina saehohau 'oina wahiwahineyedi ma'idi holowa sinaonaoma Yesu galihinaina 'oina. <sup>3</sup> Ma siboidimo sihehegwaegwae, sigwaeya, “Taiya nata 'ahubodaina galihina 'ahwanega 'ida buihile weyahida?” Weyahina da'uleina madou hedada. <sup>4</sup> Ma silo'ita naowa, galihaina 'ana 'ahuboda da'uleina 'ahwanega 'ibuihileya, 'imiyamiya.

<sup>5</sup> Coinega wahiwahineyedi galiha 'alona siluhuwa, ma 'idi 'ebeulega hewali ma'ana 'ale'o wa'ewa'e'ena 'imiyamiya si'iteya, ma si'ateyohowa.

<sup>6</sup> Ma hewaliina 'ihigwaediya, 'igwae, “Sahena wa'ate'ateyoho. Yesu gwama Nasaleta, tauna sigihe keloseya wa'ebe'ebese, ma geya tauna 'ebwa 'imiyamiya, weyahina tauna 'itoholo hila. Cina 'ebe'eno bewa wa'iteya galihinamo. <sup>7</sup> Hesi wahila ma Yesu 'ana tomuliyao 'oidiya ta wete Pita 'oina wahepwaila, wagwae, ‘Yesu nata 'inugeta Galili, ma 'omi wamuliya, ma nage 'oina wa'ita, gide mwalo 'ina hepwaila 'oimiya.’”

<sup>8</sup> Coinega wahiwahineyedi galihega silatu mwayamwayauma ma sidena, weyahina nuwadi 'ihewpanopwanowa, ma wete sidedededela, ma'idi 'ateyoho ta geya 'eta taiya 'oina sihepwaila.

### *Yesu 'ina hapwesa Meli Magidala 'oina*

*(Madiu 28:9-10; Yoni 20:11-18)*

<sup>9</sup> Wiki 'ana sabwelo nugenugetaina gonagona, Yesu 'ina toholohila 'oina 'ilatu nugeta Meli Magidala 'oina, tauna 'alonega mwalo hi'ahi'a site sebeni Yesu 'i'ula latuhediya.

<sup>10</sup> Coinega Meliina 'inaoma ma Yesu 'ina tomota 'ihemataluwediya, ta taudi tuwa 'abwa ma'idi nuwagala sidoudou Yesu weyahina. <sup>11</sup> Ma Meli hemataluwa 'i'ebwaediya 'igwae, “Yesu ya'iteya mayawasina.” Ta taudi si'ahwa 'abo'aboweya.

### *Yesu 'ina helobaloba 'ana tomuliyao site luwa 'oidiya*

*(Luke 24:13-35)*

<sup>12</sup> Ma muliyetega Yesu 'ana tomuliyao 'eluwa Yelusalemega sihapwesama ma hali 'asa weyahina sitautauya, ma Yesu 'i'abilatuheya 'iboi hali 'ita 'oinega. <sup>13</sup> Eeta site luwaedi sigogona sihila Yelusalema, ma 'iyadiyao sihemataluwediya, ma hesi geya sihemisaedi.

### *Yesu 'ana tomuliyao 'idi paihowa 'i'ebwaediya*

*(Madiu 28:16-20; Luke 24:36-49; Yoni 20:19-23; Paihowa 1:6-8)*

<sup>14</sup> Muliyetega Yesu 'ana tomuliyao site lebeni si'ai'ai, ma Yesu matadiya 'ilatuwa, ma 'iheliyediya 'idi nuwapota weyahina, 'igwaeya, “Ciyadao taudi 'igu toholohila mulina si'itegauwa ta 'oimiya sihehepwaila, ma togidega ta geya wahemisaedi?”

<sup>15</sup> Coinega hemataluwa 'i'ebwaediya, 'igwae, “Watauya tupwa mabwaiyana, ma wasagu tomota mabwaiyadi 'oidiya waguguyae. <sup>16</sup> Eema taiyewedi sihemisaegauwa wa'abihe babisowedi ma lema bwebwe'ana siloba, ma 'eguma taiyewedi geya sihemisaegau 'abwa lona galana siloba.

<sup>17</sup> “Ma 'agu tohemisaowedi 'ila'ilala waiwai 'abwa sipaihowadi, beno saniguwega hi'ahi'a tomota 'oidiyega siulalatuhe, ma 'enana hagana ma hagana 'oidiyega sihehe gwaegwae, <sup>18</sup> ma 'eguma mwata lolosadi si'abi lagasidi, geya'abwa 'idi 'enali 'oidiyega si'ama'amasa. Wete we'aha newanewalina 'eguma sinuma geya'abwa si'ama'amasa. Ta wete 'eguma tolohalao si'abitohodi, sibwebwe'ana tuwa.”

*Yesu 'ina hane galewa*

*(Luke 24:50-53; Paihowa 1:9-11)*

<sup>19</sup> Cida Bada Yesu 'ina hemataluwa 'ana tomuliyao 'oidiya 'ilosaloha pwaiya ma 'ihaneya galewa, ma Yehoba 'ina 'ebeulega 'imiyatoiya. <sup>20</sup> Ta 'oinega 'ana tomuliyawedi sitauya tupwa mabwaiyana 'oidiya ma Yesu wasana siguguyaeya, ma hesi Badaina ba'idadiu sipaipaihowa, ta 'ina waiwai 'oinega paihowaedi 'ebe henainaida sipaihowediya, ma 'oinega tomota wasaina sihemisaeya.

## LUKE

### Tetela bwebwe'ana Luke 'ileleya

Luke tauna geya gwama Yudiya, ma hesi tauna gwama Gilisi, ma wete tauna doketa, nuwana tagwae toheloloha. Tutaina Paulo 'isakowasiya Luke 'ina tupwa, Luke Yesu tetelina 'ihesagoheya ma 'ihemiseya, 'oinega Paulo 'i'wayabuya ma 'i'abiheteya. Muliyetega Yesu tetelina 'ileleya 'abehega tauna mabwaiyada 'ada tohelau, beno loheloheya ma wahiwahine, madoudi ma 'i'iudi, meYudiya ma wete taudi tomiya ganamuli.

#### *Tetela 'ana 'ebe hegaina*

<sup>1</sup> Cae, Bada Tiypilo.

Tomota tupwana baibaiwana Yesu he'ote'otetelina silele pwaidiya to'aha gide 'ina paihowa 'oida weyahina. <sup>2</sup> He'ote'otetelaedi silelediya to'aha gide taudi matadiyega si'ita nugeteya, 'oinega gwaeina siloguguya ma sihe'ote'otetela 'oima, <sup>3</sup> ma hesi, nuwatuwedi mabwaiyadi 'idi 'ebehegaina 'oinega 'itauyama 'ana siga nige, ta yasanapu bwaibwainidiya, 'oinega nuwanuwagu ma mabwaiyadi yada he'ote'otetela bwaibwainidi 'oiuwa, <sup>4</sup> ma 'oinega nuwatuwedi 'uhesagoheya pwaidiya lamuna 'uda sanapu ma wete 'u'ahwa moisaedi.

#### *Elisabeti 'ina gamwa weyahina*

<sup>5</sup> Cigu he'ote'otetela 'ana 'ebehegaina bewa gidemusa: Tutaina Helodi 'ina tuta hetoloina Yudiya 'oina, topwaoli 'aigeda sanina Sakaliya. Mwanena Elisabeti. Siteluwaedi 'idi susu boda topwaoliyao, ma hesi Sakaliya 'ina boda topaihowa sanina Abaiya. <sup>6</sup> Ma siteluwaedi 'idi miya 'idumwalu hedadeya Yehoba matana, weyahina Yehoba 'ina loinao mabwaiyana sihematamatana bwaibwainidiya. <sup>7</sup> Ma hesi siteluwaedi geya 'eta natudiu, weyahina Elisabeti 'aga'agalina, wete 'ihe'ai'aihale pwaiya, ta mwanena wete 'ihetautabada pwaiya.

<sup>8</sup> Caigeda tuta 'oina Sakaliyaina 'ina boda 'idi sabwelo ma pwaoli sipaihowa Yehoba matana. <sup>9</sup> Weyahina gidemusa mumugadi, ma 'iyanao 'oidiyega Sakaliya hesinuwai 'ilobeya, 'oinega Bada 'ina Hada He'asisi 'oina 'iluhu ma 'abehega 'aiwe masina mahaina bwebwe'ana gide gado'a\* 'igabu 'ebe pwaoli 'oina. <sup>10</sup> Ma masinaina 'ana tuta gabu 'oina boda madouna Hadainaina 'atamana si'ahwa'ahwanoi Yehoba 'oina. <sup>11</sup> Coinega Yehoba 'ina tohalewasa anelose 'ilatuwa Sakaliyaina matana, ma 'aiweina masinaina mahaina bwebwe'ana 'ana 'ebe gabu 'ebeulega 'itoholowa.

<sup>12</sup> Sakaliyaina 'i'iteya ma nuwana 'ihenainaida, ma wete 'imatata madouna. <sup>13</sup> Coinega aneloseina Sakaliya 'ihewae 'igwae, "Sakaliya, sahena 'umatamata ma hesi 'uyaliyaya. Weyahina 'ino 'ahwanoi Yehoba 'ihesagoheya, 'oinega mwanen Elisabeti 'abwa natumi loheyana 'ihenatune ma sanina 'ulagu Yoni. <sup>14</sup> Tauna weyahina 'abwa 'uyaliyaya, ma wete tomota mabwaiyadi siyaliyaya gwamaina 'ina li'u weyahina. <sup>15</sup> Weyahina natumiina 'abwa sanina madouna Yehoba matana, ma hesi sahena waini ma we'aha waiwai 'inumanumadi, weyahina 'ina li'u 'oinega nata 'imaha Yaluyaluwa Tabunega. <sup>16</sup> Ma 'oinega tauna meIsileli baibaiwadi 'itoe hiledima 'idi Bada Yehoba 'oina. <sup>17</sup> Ma tauna nata ma'ina waiwai ta ma'ina 'atepatu ma Yehoba weyahina 'ida hetohepwaila, ta 'ina waiwai gidemusa mwalona palopita Ilaitiya 'ina waiwai. Ma guguya 'oinega tama nuwadi 'ibuidi ma natudiyao sinuwatuhudi. Ma wete loina 'adi toligeheyao nuwadi 'ibuidi ma 'eda dumwaluna 'oinega sitauya, ma 'oinega Bada 'ina tomota 'i'atububudi To'abihetenaina 'ina tauyama weyahina."

<sup>18</sup> Coinega Sakaliyaina aneloseina 'ihewae 'igwae, "Gwaeina bewa 'ana hesagoheya palipalina, weyahina tauyu yahetautabada, ma mwanegu wete 'ihe'ai'aihale pwaiya."

<sup>19</sup> Coinega aneloseina 'igwae, "Tauyu Gebeliyela, ma tuta mabwaiyana 'oidiya Yehoba matana yatotoholo, 'oinega tuta bewa 'oina tauna 'ihesumanegauma, yatauyama



'oiuwa, ma wasa bwebwe'ana bewa yahepwaile 'oiuwa. <sup>20</sup> Ma hesi wasaina bewa 'owa geya 'uhemisae, 'oinega nata memenau 'imwau ma geya'abwa 'uhehegwaegwae 'ana siga wasa bewa 'ana moisa 'ilatu. Cabwa hesi 'uhegwaegwae hila.”

<sup>21</sup> Ma tomotaedi mabwaiyadi 'abwa tuwa 'atamana siyamwayamwana, ma sinuwanuwatuhu sigwae, “To'aha weyahina Sakaliya 'iheheboi Hada He'asisi 'oina?”

<sup>22</sup> Muliyetega Sakaliyaina 'ilatuma ma geya sowasowahina 'oidiya 'igwae, weyahina memenana 'imwauwa. Coinega sisanapuya 'abehega Hada He'asisi 'alona 'ila'ilala 'i'ita pwaiya. Ma 'oinega geya sowasowahina ma 'oidiya 'igwae, ma hesi tuwa nimanega 'ila'ilala 'ipaihoweya.

<sup>23</sup> Ma Sakaliyaina 'ina pwaoli 'ana sabwelowedi sigumwala ma 'ilohihila 'ina 'asa. <sup>24</sup> Ma muliyetega mwanenaina Elisabeti 'igamwa, ma wai'ena paibi 'alodiya geya 'ida yawala ma hesi hadai 'imiyamiya. <sup>25</sup> Ma 'igwaeya, “Bewa taugu 'agu lema Yehoba 'oinega. Mwalo 'aga'agaligu, 'oinega ma'igu mwadina, ma tuta bewa 'igu debamwadina 'igumwala.”

#### *Meli 'ina henatuna tetelina*

<sup>26</sup> Elisabeti 'ina wai'ena sikisiina, ma tutaina 'oina Yehoba 'ina anelose sanina Gebeliyela 'ihesumaneya ma 'itauya tupwa Galili 'asa 'aigeda sanina Nasaleta 'oina, <sup>27</sup> ma wahine 'aigeda nuwanuwadeyana sanina Meli 'oina 'ilatuwa. Gumalaulauina ma Yosepa tamadiyao sitagwala ma sihehaiyedi. Yosepaina tauna Debida tubuna. <sup>28</sup> Ma anelose Meli 'oina 'ilatuwa ma 'ihegwaeya 'igwae, “Yauwedo Meli. Bada 'ina helau madou hedadana 'oiuwa, ma tauna bewa tuwa maheteu.”

<sup>29</sup> Coinega Meli nuwana 'ihenainaida moisa, ma gwaeyedi weyahidi 'inuwanuwatuhu dadana.

<sup>30</sup> Ta anelose 'igwaeya, “Meli, sahena 'umatamatauta. Weyahina Yehoba 'ina helau madou hedadana 'oiuwa 'imiyamiya, <sup>31</sup> ma 'abwa nata 'ugamwa ma natuu loheyana 'uhenatune ma sanina 'ulagu, Yesu. <sup>32</sup> Tauna nata 'aigeda tohewaiwai madouna, weyahina 'abwa nata tomota si'ita ma weyahina sigwae 'abehega tauna Tomiya Tabwana Natuna, ma Bada Yehoba lolina waiwai 'i'ebwae, gide tubuna Debida 'ina lolina, <sup>33</sup> ma 'oinega Yakobo 'ina bodao 'iloinaedi, ma hesi 'ina 'ebeloinaina geya'abwa 'igumwagumwala.”

<sup>34</sup> Coinega Meli anelose 'ihegwaeya 'igwae, “Togidega nata bewa 'ilatu 'esa? Weyahina taugu geya mwanegumo.”

<sup>35</sup> Ta anelose 'igwaeya, “Yaluyaluwa Tabuna nata 'isuluma 'oiuwa, ma Yehoba 'i'abi hewaiwaiyego, ma natuu bwebwe'ana hedadana ma he'asisina 'uhenatune. Tauna nata sibwauwe Yehoba Natuna. <sup>36</sup> Ma 'usanapu 'abehega nibaiuina Elisabeti 'ihe'ai'aihale pwaiya ma 'i'agala, ma hesi wahineinaina bewa tuwa 'igamwa pwaiya ta bewa 'ina wai'ena hesikisina. <sup>37</sup> Weyahina ginaula mabwaiyana Yehoba sowasowahina ma 'ipaihowadi.”

<sup>38</sup> Coinega Meli 'igwaeya, “Taugu Yehoba 'ina topaihowa. To'aha gidemusa 'ino gwae 'oiguwa, tuwa 'ida latu.” Ma aneloseina Meli 'i'ebesineya ma 'itauya.

#### *Meli 'ina habo'ena Elisabeti 'oina*

<sup>39</sup> Ma tuta bewa mulina Meli 'itoholowa ma Yudiya 'oyadiya 'itauya mwayamwayauwa, Elisabeti 'ina 'asa 'oina 'ilatuwa. <sup>40</sup> Cilatuwa ma Sakaliya 'ina hada 'oina 'iluhuwa ma nibainaina Elisabeti 'ihelauweya. <sup>41</sup> Beno 'oina Elisabeti nibainaina 'ina helau 'ihesagoheya ma gamwanega gwamaina 'imwasala, ma wete Yaluyaluwa Tabuna Elisabetiina 'ilohemaheya, <sup>42</sup> ma 'enana madounega 'iwuiya 'igwae, “Nibaya, Yehoba 'ihelauwegowa, geya 'eta wete wahine gidemusa 'owa. Ma 'abwa natuu 'uhenatune gomagoma bwainina. <sup>43</sup> Ma to'aha weyahina 'owa 'igu Bada sinana ma 'unaoma 'ubo'ebo'enegau? <sup>44</sup> Ma hesi 'ino loyauwedo yahesagoheya ta gwamaina 'iyaliyaya ma 'imwasala gamwaguwa. <sup>45</sup> Ma 'owa Bada 'ina gwae 'ana tohemisa, 'oinega ma'ino yaliyaya, weyahina 'abwa nata 'ana moisa 'ilatu 'oiuwa.”

#### *Meli 'ina wali*

<sup>46</sup> Ta Meli 'igwaeya,

“Tuta mabwaiyana 'ateguwega Bada yahehepwatuwe, <sup>47</sup> ma wete tuta mabwaiyana 'oidiya yaluyaluwagu 'iyaliyaliyaya Yehoba 'agu tolemaina 'oina. <sup>48</sup> Weyahina taugu 'ina topaihowa wewelohegu, ma hesi 'oiguwa 'i'ita'ita suluma, ma 'abehega tuta sinaonaoma 'oidiya mehau mabwaiyadi sihepwatuwegau. <sup>49</sup> Weyahina Yehoba tauna Tohewaiwai moisa, paihowa waiwai 'ipaihowediya weyahigu, ma wete tauna sanina bwebwe'ana ma hehe'asisiina. <sup>50</sup> Tauna 'ana tohe'asisiyanao mehau yaso 'aigeda 'aigeda 'i'ate'ate muyamuyaedi. <sup>51</sup> Ma hesi taudi togasaaedi ma tonuwa hanehaneyedi nimana 'ana waiwaiyega 'i'ahupeinedi. <sup>52</sup> Ma wete Tauna tohewasawasao 'i'abi'abi dobihedi 'idi 'ebemiya wasawasao 'oidiyega, ma hesi toweweloheyao 'i'abi'abi hanehedi. <sup>53</sup> Ma wete togomaleyao 'ihehe'aidiya ta simwauwuwa, ma tohewasawasao nimenimedimo 'ihehesumane hilediya. <sup>54</sup> Tauna wete 'ina gwae hemisaina tubudao 'oidiya 'inuwatuhu yahiya 'oinega tauda meIsileli 'i'atemuyamuyaegita ma 'ilemegita, <sup>55</sup> gidemusa 'ina gwae hemisaina tubudao Ebalahamo ma natunao 'oidiya, 'abehega 'ida 'atemuyamuya hataedi.”

<sup>56</sup> Ma Meli 'ina gwaeina 'ilosalohidiya, ma 'oinega nibainaina mahetena simiyana 'ana siga wai'ena 'etoi sigumwala, ma muliyetega 'ilohihila 'ina 'asa.

#### *Yoni to'abihebabitaiso 'ina li'u*

<sup>57</sup> Ma hesi Elisabetiina 'imiyamiya ee 'ana siga 'ihenatuna, ta gwamaina meloheyana. <sup>58</sup> Eeta Elisabeti 'ina bodao ma 'iyanao Yehoba 'ina helau 'oina sihesagoheya, ma mabwaiyadi mahetenao siyaliyaya hegogona.

<sup>59</sup> Ma gwamaina 'ina tuta li'u mulina ma sabwelo sebeni sigumwala, 'oinega 'ina bodao si'autama gwamaina 'ina 'ebeselolo 'wapina matana sabi 'upwa, ma 'abehega tamana sanina 'oinega sihewaliyese. <sup>60</sup> Ta sinanaina 'i'ausiya 'igwae, “Sahena tamana 'oina wahewaliyese, ma hesi sanina walagu Yoni.”

<sup>61</sup> Ta 'iyanaowedi sigwaeya, “Sani beno 'omi geya sanimi!”

<sup>62</sup> Coinega nimadiyega henimasusuwega gwamaina tamana sihesilaleya ma 'abehega gwamaina to sani silagu. <sup>63</sup> Ta Sakaliyaina 'ebelele 'i'ahwanoyeyea, si'ebwaeya ma gwamaina sanina 'oina 'ileleya 'igwae, “Sanina Yoni.” Ma bodaedi saninaina si'iteya ma nuwadi 'ihenainaida. <sup>64</sup> Beno 'oina Sakaliya memenana 'imeyameyahana hila, ma 'igwae hila, ma Yehoba 'ihepwatuweya. <sup>65</sup> Eeta 'iyanaowedi mabwaiyadi simatauta. Muliyetega tetelaina 'i'edadana Yudiya 'oyana ma tupwanao mabwaiyadi 'oidiya. <sup>66</sup> Ma tomotaedi sihesagoheya ma sinuwatuhu dadana, ma siboidimo 'oidiya sihesilala hilediya sigwae, “Gwama bewa nata togidega 'abwa 'ina paihowa?” Weyahina si'iteya Yehoba 'ina waiwai 'oina 'imiyamiya.

#### *Sakaliya 'ina gwae nugeta*

<sup>67</sup> Eeta tamanaina Sakaliya Yaluyaluwa Tabuna 'ilohemaheya, ma 'ipalopisai, 'igwae nugeta 'igwaeya,

<sup>68</sup> “Bada tahepwatuwe tauna meIsileli 'ida Yehoba, weyahina tauna 'itauya pwaima 'oida ma 'abehega 'i'abihetegita ma miyamwau 'oinega 'ilihasingita. <sup>69</sup> Coinega 'ina hewali Debida 'ina susuwega 'ada To'abihetenaina 'i'abi latuheya 'oida. <sup>70</sup> Mwalona Yehoba 'ina palopitao nugenugetaidi 'ina gwaeina gidemusa sihepwaila nugeteya, <sup>71</sup> ma 'abehega 'ida lemegita 'ada 'alehao 'oidiyega ma wete 'ada tolohesohesoiyao 'oidiyega. <sup>72</sup> Ma wete mwalo 'igwae hemisa ma 'abehega tubudao nugenugetaidi 'i'atemuyamuyaedi ma 'ina gwae hemisaina geya'abwa 'inuwanuwanaide. <sup>73</sup> Gwae hemisaina tubudai Ebalahamo weyahina Yehoba 'i'ebwaeya <sup>74</sup> ma 'abehega 'ilihasingita 'ada 'alehao 'oidiyega ma 'oinega ma'ida 'atepatu 'oina tapaihowa, <sup>75</sup> ma wete sabwelo 'aigeda 'aigeda 'oidiya ma'ida mumuga bwebwe'ana tadumwalu tauna matana. <sup>76</sup> Ma 'owa natugu, 'abwa nata sibwauwego Tohewaiwai moisa 'ina palopita, weyahina 'owa nata 'unugeta ma Bada 'ina 'eda 'u'atububu, <sup>77</sup> beno 'ina tomotaiyao 'uhenuwalagudi ma 'abehega

mumuga galadi 'adi nuwasam 'oidiyega 'adi 'abihetena siloba. <sup>78</sup> Weyahina Yehoba 'ina 'atemuyamuya 'oida, madou hedadena, ma 'abwa 'ida 'abihetena galewega gide 'asilala 'i'abi'abilatuhe 'oida, <sup>79</sup> ma 'oinega taudi wete guguyou ma 'amasa 'idi tupwa 'oina simiyamiya 'ida 'abihe'asilaladi, ma 'oinega mabwaiyada 'ihanugetegita miya daumwala 'ana 'eda 'oina.”

<sup>80</sup> Ma 'oinega gwamaina 'ihemadouwa ma yaluyaluwana wete 'ihewaiwaiya. Ma 'itauya yoho 'awawa, ma nobwa 'iboinamo 'imiyamiya 'ana siga meIsileli 'oidiya 'ilatuwa 'iloguguya.

## 2

### *Yesu 'ina li'u*

<sup>1</sup> Yoni 'ina tuta hesedaseda 'oina toloina 'aigeda madouna sanina Sisa Ogusito 'imiyamiya, ma 'ina loina 'ilaguya ma 'abehega gogo 'aigeda 'aigeda tomotaedi sanidiyao sileledi. <sup>2</sup> Loinaina 'ihegaina tutaina Kuwilinio 'ina tuta hetoloina Siliya 'oina. <sup>3</sup> Coinega tomota mabwaiyadi sitauya 'asa tamadiya ma 'ane sanidiyao sileledi.

<sup>4</sup> Yosepa wete Nasaletaga 'itoholowa, beno Galili 'alonga, ma 'itauya Yudiya, Debida 'ina gogo sanina Bedeliyema 'oina, weyahina Yosepa tauna Debida 'ina susu 'aigeda. <sup>5</sup> Coinega Meli mahetena sitauya ma 'abehega nobwa sanidi sileledi, ma Meliina magamwagamwana.

<sup>6</sup> Ma tutaina Bedeliyema 'oina simiyamiya ma 'ina wai'ena 'iloba pwaiya ta 'ihenatuna, <sup>7</sup> 'oinega gwamaina 'ale'owega 'iwaduya ma hebai 'idi 'ebe'ai 'oina 'ilaguya. Weyahina hada taumana 'imaha pwaiya, ta geya 'aigeda wete sawasawahina ma 'oina siluhu.

### *Sipi 'adi to'itayahinao Yesu sihabo'eneya*

<sup>8</sup> Ma tupwaina 'oina sipi 'adi to'itayahinao hinuwana si'o'oyatola pwatula, ma 'idi sipiyao si'ita'ita yahidi, <sup>9</sup> ma Bada 'ina anelose 'ilohe'ate yohodiya ma 'ina 'asilalega mabwaiyadi simatauta.

<sup>10</sup> Coinega aneloseina 'ihegwaediya, 'igwae, “Sahena wamatamatauta, ma hesi way-aliyaya, weyahina wasa bwebwe'ana ya'eweyama 'oimiya, ma nata tomota mabwaiyadi wete 'idi 'ebe yaliyaya. <sup>11</sup> Ma wasaina bewa, nige hinuwana Debida 'ina 'asa, 'ami To'abihetenaina 'ili'uwa, Tauna 'ida Bada Keliso. <sup>12</sup> Coinega 'ana 'ebe lo'inanaina bewa, ma 'eguma gwamaina 'ale'o 'oinega siwaduya ma hebai 'idi 'ebe'ai 'oina 'i'eno'eno waloba, tauna tuwa beno gwamaina.”

<sup>13</sup> Ma tutaina 'oina anelose wete baibaiwadi galewega siuhulaima, ma Yehoba sihehepwatuwe, <sup>14</sup> sigwaegwae, “Yehoba galewa tahepwatuwe, ma bale'uwa taudi 'ihelauwediya simiya yaliyaya.”

<sup>15</sup> Cigumwala ma aneloseyedi sihila pwaiya galewa, ma sipi 'adi to'itayahinao si-boidimo 'oidiya sigwae, “Bedeliyema 'oina tatauya ma ginaulaina Bada 'ihepwaileya ta'ita.” <sup>16</sup> Coinega silomwayamwayauwa ma sitauya, ma Meli ma Yosepa ta wete gwamaina hebai 'idi 'ebe'ai 'oina 'i'eno'eno silobeya. <sup>17</sup> Nage 'oina si'iteya ma gwamaina tamana ma sinana sihegwaediya to'aha gide anelose 'ina gwae 'oidiya gwamaina weyahina. <sup>18</sup> Ma tupwana tomota wete wasaina sihesagoheya ta nuwadi 'ihenainaida to'itayahi sipiyedi 'idi gwaeina weyahina.

<sup>19</sup> Ta Meli gwaeyedi mabwaiyadi 'inuwatuhu yahidiya ma nuwana 'ihenetediya weyahidi.

<sup>20</sup> Coinega to'itayahi sipiyedi sihila ma ma'idi hepwatu Yehoba sanina si'abilagasiya, weyahina anelose 'ina hepwaila 'oidiya 'ana moisa sihesagoheya, ma wete si'iteya.

<sup>21</sup> Ma 'ina wiki 'aigeda 'igumwala pwaiya, ma gwamaina 'ina 'ebeselolo 'wapina si'upwa yauleya ma sihesaniyeya Yesu, sanina beno mwalo anelose Meli 'i'ebwaeya tutaina 'abwa geya 'igamwa.

### *Yesu sitoeya Hada He'asisi\* 'alona*

<sup>22</sup> Ma 'ina tu'wau mulina Meli 'ana 'abihe'ehau 'ana tuta 'ilobeya, ta natudiuina sitoeya sihaneya Yelusalema, ma 'ane gwamaina si'ebwayae Yehoba 'oina gide Mosese 'ina loina 'abehega sipaihowa.

<sup>23</sup> Yehoba 'ina loina bewa gide sileleya, 'igwae,  
“Gwagwama toli'u nugeta meloheyadi watagwaledi Bada 'oina.”

<sup>24</sup> Ma wete taudi 'idi pwaoli Yehoba weyahina sitauyedi, gidemusa 'ina loina 'ilaguya, 'igwae,  
“Cimi pwaoli bunetutu 'eluwa bo gabubu 'eluwa.”

#### *Simioni 'ina gwae*

<sup>25</sup> Ma nage tutaina 'oina Yelusalema 'oina 'aigeda bada sanina Simioni 'imiyamiya. Tauna loheya bwebwe'ana, ma wete Yehoba 'ihe'asisiyaneya madouna, ma 'iyamwayamwa meIsileli 'adi To'abihetena weyahina. Loheyaina Yaluyaluwa Tabuna 'oina 'imiyamiya. <sup>26</sup> Ma Yaluyaluwa Tabunaina 'ihe'iteya ma 'abehega sahena 'i'ama'amasa ma 'ana siga To'abihetenaina Yehoba 'oinaga 'i'ita nugeta.

<sup>27</sup> Ma Yaluyaluwa Tabuna 'ihenuwa laguweya, ma Simioniina 'iluhuwa Hada He'asisi 'oina, ta Yosepa ma Meli gwamaina Yesu si'ahaliyama Hada He'asisi 'oina, ma weyahina sipaihowa gide loina 'ina hepwaia. <sup>28</sup> Coinega Simioni gwamaina 'i'ahaliya ma Yehoba 'oina 'iloyauwedowa, 'igwae,

<sup>29</sup> “Bada, 'ino gwae hemisa 'oiguwa yaloba pwaiya, 'oinaga bewa tuwa 'utagwalegau ma ma'igu yaliyaya ya'amasa,

<sup>30</sup> Weyahina mataguwega 'ino To'abihetenaina ya'iteya,

<sup>31</sup> bewa Tauna 'ulagu latuheya mabwaiyama 'oima,

<sup>32</sup> ta taudi ganamuli 'idi To'abihe'asilala, ma tauma 'ino tomota meIsileli 'ima 'ebe hepwaia.”

<sup>33</sup> Ma tamana ma sinana nuwadi 'ihepwanopwanowa 'ina gwaeyedi natudiu weyahina.

<sup>34</sup> Coinega Simioni 'igwae helauwedoya, ta 'igwae Meli 'oina, tauna Yesu sinana, ma 'igwaeya,

“Cu'ita gwama bewa Yehoba 'ihesinuweya ma 'oinaga 'abwa meIsileli tupwana baibaiwadi 'i'abihe be'udi, ma tupwana baibaiwadi 'i'abihe toholodi, ma tauna tuwa 'abwa 'ihe'ila'ilala tomota 'oidiya, ma tupwadi si'ahwa 'abo'abowe,

<sup>35</sup> ma 'oinaga 'idi nuwatuhu dahwadahwaidi 'i'abi latuhedi. Ma 'owa Meli nata 'ino nuwagala gide suna 'ibadibadigo.”

#### *Ana 'ina gwae*

<sup>36</sup> Nage 'oina 'aigeda wahine topalopisai 'imiyamiya, sanina Ana, tauna Penuwela natuna, ma wete Aseli 'ina susu 'aigeda. Wahineina 'ihe'ai'aihale pwaiya weyahina mwalo hene 'ihai ta mamwanena simiyamiya gide bolime sebeni. <sup>37</sup> Ma mwanena 'i'amasa ta tauna 'ihiwapeya, ma 'imiyamiya 'ana siga 'ana bolime 'eitipowa. Ma wahineina tauna Hada He'asisi geya 'ida 'ebesineya sabwelo ma hinuwana 'oidiya, ma Hada He'asisi 'alona Yehoba 'ihehe'asisiye, ma 'i'ahwa'ahwanoi hegomaleyega. <sup>38</sup> Tuta nage 'oina wahineina 'inaoma ma Yehoba 'oina 'iloyauwedowa, ma gwamaina weyahina 'igwae meYelusalema 'oidiya, 'igwaeya, “Gwama bewa tauna 'ada To'abihetena tayamweyamweya.”

#### *Cidi hila Nasaleta 'oina*

<sup>39</sup> Ma paihowa mabwaiyana silosaloha pwaidiya, to'aha gide Yehoba 'ina loina, ma sihila Galili 'oina, weyahina taudi meNasaleta. <sup>40</sup> Ta gwamaina 'imadouwa ta ma'ina waiwai, ma wete ma'ina sanapu, weyahina Yehoba gwamaina 'ihelauweya madouna.

#### *Gwamaina Yesu tohe'itao mahetenao sigwaegwae*

<sup>41</sup> Bolime 'aigeda 'aigeda 'oidiya Yesu sinana ma tamana sihanehane Yelusalema, Hataona Guyaina weyahina. <sup>42</sup> Ma tutaina Yesu 'ina bolime tuwelo 'ilobeya ta mahetedi sihaneya guyaina 'oina.

<sup>43</sup> Coinega tutaina guyai 'igumwala ta mabwaiyadi sisawala 'idi gogowa, ma gwamaina Yesu tuwa Yelusalema 'oina 'imiyamiya. Tamana ma sinana geya sisanapu, <sup>44</sup> ma 'idi nuwatuhi 'abehega tauna boda mahetenao. Coinega sitautauya ma 'ana siga 'iboiya, ma Yesu si'ebeseya 'idi bodao ma 'iyadiyao 'oidiya, <sup>45</sup> ma geya siloba, 'oinega sihila Yelusalema, ma nobwa si'ebeseya, <sup>46</sup> ta geya siloba 'ana siga sabwelo 'etoi sigumwala, ta silobeya Hada He'asisi\* 'alona, meYudiya 'idi tohe'itao mahetenao simiyamiya, 'ihehesagohedi ma wete 'ihehesilala 'oidiya. <sup>47</sup> Ma taudi 'ina hemaisao bwebwe'adi ma dumwaludi sihesagoheya ta mabwaiyadi nuwadi 'ihenainaida. <sup>48</sup> Ta wete tutaina tamana ma sinana si'iteya nuwadi 'ihenainaida, ta sinana 'ihewae, 'igwae, "Natugu, to'aha weyahina bewa gidemusa 'upaihowa 'eseya, ta 'oinega ma'ima nuwagala tamau ba'idagu 'abesebesego?"

<sup>49</sup> Coinega Yesu 'igwae, "To'aha weyahina wabesebesegau? Nuwana geya wasanapu 'agu lobwaina taugu Tamagu 'ina Hada yamiyamiya?" <sup>50</sup> Tamana ma sinana geya nuwadi 'isabwalena 'ina gwaeina weyahina.

<sup>51</sup> Coinega mahetenao sihila Nasaleta, ma nobwa 'idi gwae 'ihemata matanediya. Ma hesi sinana ginawala bewa weyahidi 'inuwanuwatuhi madouna. <sup>52</sup> Ma Yesu 'ihemadou ta ma'ina sanapu, 'oinega Yehoba 'iyaliyaya weyahina, ma tomota wete gide 'idi 'ebe yaliyaya.

### 3

#### *Yoni to'abihebabitaiso 'ina guguya (Madiu 3:1-12; Maki 1:1-8; Yoni 1:19-28)*

<sup>1</sup> Toloina madouna Sisa, sanina Taibiliya, tauna 'iloiloina bolime pipitini 'oidiya, ma gabulena Ponitio Pailato tupwa Yudiya 'ana toloina, ma Helodi tupwa Galili 'ana toloina, ma tasina Pilipi tupwa Ituliya ma Tilakoniti 'adi toloina, ma Lisaniya tupwa Abiline 'ana toloina. <sup>2</sup> Ma Anasa ma Kaiyapa taudi topwaoliyao 'adi toloinao. Tutaina nage 'oina Yehoba 'ina gwae 'inaoma Sakaliya natuna Yoni 'oina, tauna tupwa yoho 'awawa 'imiyamiya. <sup>3</sup> Nage 'oina Yoni 'itoholowa, ma Yolidani tupwainao 'oidiya 'itauya, ma tomota 'oidiya 'iguguya, 'igwae, "Cimi paihowa galadi waguipaledi ma ya'abihe babitaisogemi ta 'oinega Yehoba 'imi puiyao 'ida nuwasamudi." <sup>4</sup> Gide Buki He'asisi 'oina palopita Aiseya 'ihewaila nugeta, 'igwae,

"Tohalewasa 'aigeda yoho 'awawa 'enana madounega 'ihewaila latu, ma 'igwae, 'Bada 'ina 'eda wahuna, ma wa'abihedumwalu. <sup>5</sup> Lo'oya'oya mabwaiyadi wa'eliahuledi ma sidumwalu, ma sa'asa'ala mabwaiyadi wasamudi. Ma wete 'eda pwayopwayo'edi wa'abihe dumwaludi ma 'eda da'uda'ulena wahesapusa-pudi.

<sup>6</sup> Ma 'oinega tomota mabwaiyadi Yehoba 'ina 'abihetena si'ita.' "

<sup>7</sup> Coinega tomota mabwaiyadi sinaowa Yoni 'oina ma 'abehega 'i'abihe babitaisowedi, ma Yoniina 'ihewae, 'igwae, "To'abo 'omi, gide mwata! Ma wanuwatuhuya 'abehega nata Yehoba 'ina gamwasowala 'oinega wadena, 'awa? <sup>8</sup> Coinega 'ilobwainegomiya ma 'imi nuwabui moisa wahe'itae 'imi paihowa bwebwe'adi 'oidiyega. Ma sahena wagwaegwae 'abehega 'omi Ebalahamo tubunao 'oinega Yehoba 'i'atemuya muaegomiya. Geya hene! Ma wa'ita Yehoba sowasowahina ma da'ule bewa 'oidiyega Ebalahamo tubunao 'ihemasalahadi. <sup>9</sup> Ma 'eguma mumugami geya bwebwe'adi 'abwa Yehoba 'ibwa'omategomi gide 'aiwe, 'eguma geya huwaina bwebwe'ana, loheloheya sigoha yahule, ma 'aiwe 'ala'alata 'oina siuledi, ma sigabudi."

<sup>10</sup> Coinega bodaedi Yoni sihesilaleya, sigwae, "To'aha 'ilobwainemaiya ma 'apaihowa?"

<sup>11</sup> Ma Yoniina 'igwae, "Ceguma taiyawedi 'omi 'ami 'ale'o 'eluwa ma 'iyamiyao geya 'adi 'ale'omo, 'aigeda wa'ebwaedi. Ma wete gide 'eguma 'ami madouna, tupwana togomaleyo 'oidiya waheguyaiye."

<sup>12</sup> Ma tupwana wete takesi 'ana to'ewao sinaoma 'idi babitaiso weyahina, ma Yoni 'oina sihesilala, sigwae, "Tohe'ita, tauma togidega 'ama lina."



<sup>13</sup> Coinega Yoni 'igwaeya, “Takesi 'ana loinega wa'ewa'ewa, ma hesi sahena walolohepoi.”

<sup>14</sup> Ma tupwadi wete tolo'alehao sihesilala, sigwaeya, “Ma tauma, togidega 'ama loina?” Ta Yoni 'igwaeya, “Comi 'ami maisao sowasowahimi ma hesi weyahidi wayaliyaya, ma sahena 'ami maisa 'ana lohepoi 'abowega ma 'abihematautega wa'ewa'ewa tomota 'oidiyega.”

<sup>15</sup> Ma hesi tomota mabwaiyadi ma'idi hemisa siyamwayamwa To'abihetenaina Keliso 'ina latuma weyahina, ma Yoni si'iteya ma mabwaiyadi sihenuwanalua ma sigwaeya, “Nuwana tauna To'abihetenaina, bo geya?”

<sup>16</sup> Coinega Yoni 'igwae latuwa 'oidiya, 'igwaeya, “Taugu we'ahega tuwa ya'abihe babitaisogemi, ma hesi 'aigeda loheya muliguwega 'inaonaoma ma Yaluyaluwa Tabuna 'oinega, gide 'aiwe nininimaina, 'oinega 'i'abihe babitaisogemi. Tauna 'ihemadou sinegauwa, 'oinega geya 'ilobwainegau ma 'ana butu yalihasi. <sup>17</sup> Ma loheyaina 'ina hinawega nata witi 'itutu ma huwaina sigubala, ma muliyetega huwaina bwebwe'ana 'ihedodo 'ina hada 'e'ahaiya, ma mohomohonaowedi 'aiwe 'ala'alata hataya 'oina 'igabudi.”

<sup>18</sup> Ma guguya wete baibaiwana 'oidiyega tetela bwebwe'ana Yoni 'iguguyaeya tomota 'oidiya, <sup>19</sup> ma wete Yoniina toloina sanina Helodi 'i'ahwa galagalaeya, 'igwaeya, “Helodi 'upuiya. Helodiyasa tauna tasiu mwanena, ma 'uhaiya.” Ma tupwana wete Helodi 'ino puiyao tauna Helodiina 'oina 'ihewailediya. <sup>20</sup> Coinega Helodi 'igamwasowala, ta Yoni deliya 'ilagu luhuweya. Nage 'oinega Helodiina 'ina pui 'ihemadou bwaibwaina.

#### *Yoni Yesu 'i'abihe babitaisoweya*

*(Madiu 3:13-17; Maki 1:9-11)*

<sup>21</sup> Ma Yoni boda mabwaiyadi 'i'abihe babitaisowediya, ma muliyetega Yesu wete 'i'abihe babitaisoweya, ma 'oinega Yesu Yehoba 'oina 'i'ahwanoyiya, ma galewa 'i'eso'eya, <sup>22</sup> ma Yaluyaluwa Tabuna, mawahina 'ana 'ita gide gabubu, 'isuluma Yesu 'oina. Coinega 'aigeda 'enana galewega 'igwaema, 'igwae, “Cowa natugu moisa, weyahiu yayaliyaya madouna.”

#### *Yesu tubunao*

*(Madiu 1:1-17)*

<sup>23</sup> Ma tutaina Yesu 'ana bolime gide teti 'ilobeya, 'ina paihowa tomota 'oidiya 'ihagaineya. Ma tomota sinuwatuhuya 'abehega Tauna tamana Yosepa. Ta Yosepaina tamana Heli, <sup>24</sup> ma Heli tamana Madati, ma Madati tamana Libai, ma Libai tamana Meliki, ma Meliki tamana Yanai, ma Yanai tamana Yosepa, <sup>25</sup> ma Yosepa tamana Matadaya, ma Matadaya tamana Emosi, ma Emosi tamana Neumi, ma Neumi tamana Esili, ma Esili tamana Nagai, <sup>26</sup> ma Nagai tamana Mahati, ma Mahati tamana Matadaya, ma Matadaya tamana Semini, ma Semini tamana Yoseki, ma Yoseki tamana Yoda, <sup>27</sup> ma Yoda tamana Yoanani, ma Yoanani tamana Lisa, ma Lisa tamana Selubabela, ma Selubabela tamana Siyelitiyeli, ma Salatieli tamana Nili, <sup>28</sup> ma Nili tamana Meliki, ma Meliki tamana Adi, ma Adi tamana Kosami, ma Kosami tamana Elimadami, ma Elimadami tamana Eli, <sup>29</sup> ma Eli tamana Yosuwu, ma Yosuwu tamana Eliyesa, ma Eliyesa tamana Yolima, ma Yolima tamana Madati, ma Madati tamana Libai, <sup>30</sup> ma Libai tamana Simioni, ma Simioni tamana Yuda, ma Yuda tamana Yosepa, ma Yosepa tamana Yonami, ma Yonami tamana Ilayakimi, <sup>31</sup> ma Ilayakimi tamana Meliya, ma Meliya tamana Mena, ma Mena tamana Matata, ma Matata tamana Nadani, ma Nadani tamana Debida, <sup>32</sup> ma Debida tamana Yese, ma Yese tamana Obedi, ma Obedi tamana Boasa, ma Boasa tamana Salimoni, ma Salimoni tamana Nasoni, <sup>33</sup> ma Nasoni tamana Aminadaba, ma Aminadaba tamana Adamina, ma Adamina tamana Anai, ma Anai tamana Esiloni, ma Esiloni tamana Pelesi, ma Pelesi tamana Yuda, <sup>34</sup> ma Yuda tamana Yakobo, ma Yakobo tamana Aisake, ma Aisake tamana Ebalahamo, ma Ebalahamo tamana Tela, ma Tela tamana Naoli, <sup>35</sup> ma Naoli tamana Seluge, ma Seluge tamana Leu, ma Leu tamana Peligi, ma Peligi tamana Ibeli, ma Ibeli tamana Sila, <sup>36</sup> ma Sila tamana Keinana, ma Keinana tamana Apakisadi, ma Apakisadi tamana Semi, ma Semi tamana Nowa, ma Nowa tamana Lemeki, <sup>37</sup> ma



Lemeki tamana Metusela, ma Metusela tamana Inoke, ma Inoke tamana Yeledi, ma Yeledi tamana Malaleli, ma Malaleli tamana Keinana, <sup>38</sup> ma Keinana tamana Inosi, ma Inosi tamana Seti, ma Seti tamana Adama, ma Adama tamana Yehoba.

## 4

*Seitani Yesu 'itoho'asaeya*  
(Madiu 4:1-11; Maki 1:12-13)

<sup>1</sup> Coinega Yaluyaluwa Tabuna Yesu 'ilohemaheya, ma Yolidaniyega Yesu 'itoeya ma 'itaueya tupwa yoho 'awawa. <sup>2</sup> Sabwelo poti 'oidiya Seitani 'itoho waiwai ma 'abehega Yesu 'i'abihebe'u, ma sabwelowedi 'oidiya Yesu geya 'i'ai tohona, ma 'oinega 'igomaleya madouna. <sup>3</sup> Ma Seitaniina Yesu 'ihewaeya, 'igwae, “Ceguma 'owa Yehoba Natuna, da'ule bewa 'uloinaedi ma sihe'e'ahai.” <sup>4</sup> Ma Yesu 'igwaeya, “Buki He'asisi 'alona loina 'imiyamiya 'abehega 'Tomota yawasidi geya 'e'ahaimo 'oinega sida lobeya.’”

<sup>5</sup> Coinega Seitani Yesu 'itoe haneheya ma bale'u 'ina 'ebeloinao mabwaiyana 'ihe'iteya tutaina nage 'oina, ma 'igwaeya, <sup>6-7</sup> “Bewa 'ebeloina wasawasaedi mabwaiyadi ya'ebwaego, 'eguma 'oiguwa 'u'etuluha. Weyahina mabwaiyanaina tuwa 'igu 'ebeloina. Ma 'eguma taiya 'oina nuwanuwagu ma ya'ebwae, tuwa ya'ebwae.” <sup>8</sup> Ma Yesu 'igwaeya, “Buki He'asisi 'alona loina 'imiyamiya, 'igwae, 'Cino Bada Yehobamo 'oina 'u'etuluha ma 'iboimo 'enana 'uhematamatedi.’”

<sup>9</sup> Coinega Seitani Yesu 'itoe hileya ma 'itaueya Yelusalema ma Hada He'asisi tabwa sehenina 'ihaneheya ma 'oina 'ihewaeya, 'igwae, “Ceguma 'owa Yehoba Natuna, bewa 'oinega 'uulataheya ma gesowana 'usilasilahe, <sup>10</sup> weyahina Buki He'asisi 'ihewaila pwaiya, 'igwae, 'Yehoba 'ina aneloseyao 'iloinaedi ma si'itayahigo.’” <sup>11</sup> Ma 'aigeda 'ina hewaila 'igwaeya, 'Cino aneloseyao si'ahaligo ma 'oinega gesowana 'aheu sisilasilae da'ule 'oidiya.’” <sup>12</sup> Ma Yesu gwaaina 'ihemaiseya 'igwae, “Caigeda wete gwae Buki He'asisi 'oina 'imiyamiya, 'igwaeya, 'Sahena 'ino Bada Yehoba 'utohotoho.’”

<sup>13</sup> Ma 'oinega Seitani 'ina tohona mabwaiyana Yesu 'oina 'ilosalohiya, ta 'i'ebesineya, ma hali tuta 'oina 'ida hilama.

*Yesu 'ina paihowa Galili 'oina 'ihegaineya*

<sup>14</sup> Eeta Yesu Yaluyaluwa Tabuna 'ina waiwaiyega 'ihila Galili. Ma nage 'oina tetelina 'ilelewana Galili tupwainao 'oidiya, <sup>15</sup> weyahina meGaliliyedi 'idi hada tapwalolo 'oidiya 'iloguloguguya, ma 'oinega mabwaiyadi si'ahwa bwebwe'aneya. <sup>16</sup> Ma muliyetega Yesu 'inaoma Nasaleta 'oina, tauna nage 'ina gogo moisa. Ma Sabati 'oina Yesu 'iluhuwa hada tapwalolowa, mumugana gidemusa. Coinega 'itoholowa ma Buki He'asisi 'ihasili, <sup>17</sup> 'oinega palopita Aiseya 'ina lele si'ebwaeya, ta 'iyahaliya ma hasilaina 'ilobeya, 'igwaeya,

<sup>18</sup> “Bada Yaluyaluwana 'oiguwa 'imiyamiya. Tauna 'ihesinuwegauwa ma towewelohe 'oidiya tetela bwebwe'ana yaguguyae.

Ma paipaidi wete 'oidiya 'ihesumanegauwa ma 'adi lihasa weyahina yahepwaila.

Ma tomata gibugibu wete matadi 'idi 'asilala hila weyahina yahepwaila.

Ma wete 'ihesumanegauwa ma tomiya mwau 'adi 'alehao nimadiyega ya'etolihasi.

<sup>19</sup> Ma yahepwaila wete bolimeina 'abwa Bada 'i'abihetegomi.”

<sup>20</sup> Ma Yesu leleyedi 'ihasili pwaidiya ta 'inupilidiya, 'oinega buki 'ana to'itayahina 'i'ebwae hileya, ma 'imiyatoiya. Ma tohenonowedi mabwaiyadi nuwadi 'i'eweya, 'oinega simiyamiya ta si'e'ebubu.

<sup>21</sup> Coinega 'ihewaediya, 'igwae, “Gwae bewa yahasila pwaiya ta wahesagoheya, mwalo sihepwaila nugeteya, ma bewa tutaina 'ilatu pwaima.”

<sup>22</sup> Ma taudi nuwadi 'ihenainaida moisa, 'oinega 'ina gwaeyedi bwebwe'adi weyahidi sihepwatuweya, sigwae, “Loheya bewa Yosepa natuna, 'awa? Ma togidega hede?”

<sup>23</sup> Coinega 'ihewaediya, 'igwae, “Hesi yasanapugomiya weyahina nata gwae hegehegediyega wahewaegau ma wagwae, 'Cowa to'abihe bwebwe'ana, 'oinega 'uboi 'u'abihe bwebwe'anigo.’” Ma wete nata 'imi gwae 'aigeda 'oinega wahewaegau

ma wagwae, 'Paihowaedi waiwai gogo Kapaneumi 'oina 'upaihowediya, gide wete 'upaihowa 'esedi 'ebwa 'ida gogo bewa 'oina.' <sup>24</sup> Ma yahegwae bwaibwainigomi 'abehega geya 'aigeda palopita 'ina bodao 'oidiyega 'ana he'asisi 'iloba. <sup>25</sup> Ma wanuwatuhuyahi 'abehega mwalo palopita Ilaitiya 'ina tuta, hiwahiwape baibaiwadi Isileli 'oina simiyamiya, ma Yehoba geya Isileli wahineina 'ihesinuwe ma Ilaitiya 'i'itayahi tutaina gomale madouna, weyahina bolime 'etoi ma tupwana 'oidiya geya 'wesu, <sup>26</sup> ma hesi 'aigeda hiwape Salepati 'oinega Yehoba 'ihesinuwaneya Ilaitiya 'ana 'itayahina weyahina, beno Saidoni tupwaina, ma Yehoba Ilaitiya 'ihewasaeya hiwapeina 'ina gogowa, ta 'i'itayahiya. <sup>27</sup> Ma palopita Ilaisa wete 'ina tuta 'oina tolepelo baibaiwadi Isileli 'oina simiyamiya, ma geya 'aigeda taiya 'oidiyega 'i'abi'abi hebwebwe'ane, ma hesi 'aigedamo gwama Siliya 'i'abihe bwebwe'aneya sanina Nemani."

<sup>28</sup> Yesu 'ina gwaeyedi bewa 'oidiyega taudi totapwalolowedi 'i'abihe gamwasowalidiya, <sup>29</sup> 'oinega sitoholowa ma Yesu si'abiyahiya ma 'asega sitoe latuheyaya ma sitauyeya 'idi 'asa 'oyaina 'oina, ma 'oyaina debana silaguya ma 'abehega sihasepale dobihe 'ade'adewala. <sup>30</sup> Ma tauna bodaedi 'ihaupediya ma 'itauya.

*Yesu 'aigeda loheya 'i'abihe bwebwe'aneya hi'ahi'a 'oinega  
(Maki 1:21-28)*

<sup>31</sup> Ma muliyetega 'idobiya Kapaneumi 'oina, beno Galili tupwaina, ta nobwa Sabatiya tomota 'ihe'itediya. <sup>32</sup> Ma tomota mabwaiyadi nuwadi 'ihenainaida weyahina 'ina he'ita mabwaiyana waiwaina.

<sup>33</sup> Ma hada tapwaloloina 'oina 'aigeda loheya 'imiyamiya, ma loheyaina 'oina hi'ahi'a\* mwalo 'iluhuwa ta 'imiyamiya, 'oinega loheyaina 'enana madounega 'ibwauwa 'igwae, <sup>34</sup> "Ya! Yesu 'owa gwama Nasaleta, to'aha lamuna ta 'unaoma 'oima? Nuwanuwau 'abehega 'umutumai, 'awa? Ma 'owa hesi yasanapugowa, 'owa tuwa Yehoba Natuna."

<sup>35</sup> Ma Yesu 'iloinaeya ma 'igwae, "Culolagu, ma loheya beno 'oinega 'ulatu." Ta dumwadumwaluna boda matadiya hi'ahi'aina loheya 'iulaeya bale'uwa ta 'oinega hi'ahi'a 'ihapwesa, ma geya 'aigeda hesilae loheyaina 'iloba. <sup>36</sup> Coinega mabwaiyadi sisalutuwama, ma siboidimo sihesilalediya, sigwae, "Togidega hede bewa? Ma gwaemo 'ina waiwai 'oinega hi'ahi'a 'iloinaediya ta sihapwesa." <sup>37</sup> Eeta Yesu tetelina silelewaneya Galili tupwainao 'oidiya.

*Yesu tolohala baibaiwadi 'i'abihe bwebwe'enediya  
(Madiu 8:14-17; Maki 1:29-34)*

<sup>38</sup> Coinega Yesu Hada tapwalolowega 'ilatuma, ma Saimoni 'ina hada 'iluhuwa. Ma Saimoni lawana wahi yahiyahi 'oinega 'ilohala, 'oinega Yesu si'ahwanoyeyaya ma 'i'abihe bwebwe'ane. <sup>39</sup> Coinega Yesu 'iluhuwa, ma 'ina 'ebe'enoina deina 'itoholowa, ta lohalaina 'iloinaeya ma 'ina lohalaina 'isawala, 'oinega wahineina 'itoholo ta 'adiwa 'i'atububuya.

<sup>40</sup> Ma hesi sinala 'isopu pwaiya, ma tomota 'idi tolohalao 'adi lohalao hagadi ma hagadi sitoedima Yesu 'oina, ta mabwaiyadi 'aigeda 'aigeda 'i'abitohodiya ta sibwebwe'ana. <sup>41</sup> Ma wete tupwana baibaiwadi 'oidiyega hi'ahi'a silatulatu ma siwuiwui, sigwaeya, "Moisa 'owa Yehoba Natuna!" Ma Yesu 'i'ausidiya ma sahena gide sigwaegwae 'esa, weyahina sisanapu pwaiya 'abehega tauna To'abihetenaina Yehoba 'oinega.

*Yesu 'iguguya sakowasiya  
(Maki 1:35-39)*

<sup>42</sup> Ma gona 'i'adale pwaiya, ta Yesu gogoina 'i'ebesineya, ma 'iboinamo yoho 'awawa 'itauya. Ta tomota baibaiwadi sihegaina ma 'abehega Yesu sibese, ma tutaina silobeya sihegwaeya, sigwae, "Sahena 'utautauya. Cebwa tuwa tamiyamiya." <sup>43</sup> Coinega 'ihewasediya, 'igwae, "Tupwana wete gogo 'oidiya yatautau ma Yehoba 'ina lolina tetelina yaguguyae. Bewa tetelaina weyahina ma Yehoba 'ihewasaegauma." <sup>44</sup> Eeta 'ilatuwa ma 'itauya Yudiya tupwanao mabwaiyadi 'oidiya, ma 'idi hada tapwalolo 'alodiya 'iguguya sakowasiya.

## 5

*Yesu 'ina tomuliyao 'ibwauwediya  
(Madiu 4:18-22; Maki 1:16-20)*

<sup>1</sup> Caigeda tuta Yesu 'itoholo hola Genesaleta papalina, ta boda sinaoma ma sitoholo pogiyamowa ma 'abehega Yehoba 'ina gwae Yesu 'oinega sihesagohe. <sup>2</sup> Nage 'oina togomana 'idi waga 'eluwa 'i'itediya deina silisidiya dabala, ma togomanaedi siulasulu pwaiya ma 'idi gomanedi sibuyobuyodi. <sup>3</sup> Coinega Yesu waga 'aigeda 'oina 'igeluwa, beno Saimoni 'ina waga, ma Saimoni 'ihewaeya ma tupwana 'italadobiya ni'uwa, ma wagaina 'oina Yesu 'imiyatoiya ma 'ihe'ita boda 'oidiya.

<sup>4</sup> Ma 'ina he'ita 'igumwala ta Saimoni 'ihewaeya, 'igwae, “Saimoni tupwana 'utaladobi ni'uwa ma 'ino gomana 'uyahuwe.”

<sup>5</sup> Ma Saimoni 'igwae, “Bada, hinuwanega hene 'agomana masaliya ma geya 'aigeda wete silahana 'a'onatoho. Ma tuwa 'ino gwae weyahina, 'oinega yayahuwe.”

<sup>6</sup> Siyahuweya, ma silahana baibaiwa hedada si'onediya, ta gomanaina 'abehega 'ilotasabu. <sup>7</sup> Coinega 'iyadiyao hali waga silo'uyowediya ta 'abehega sinaoma ma si'abihetedi. Coinega taudi 'idi wagega sinaoma ta waga 'eluwaedi silohemahediya, ta 'i'iuamo ma sidamana. <sup>8</sup> Nage 'oina Saimoni Pita silahana 'ana baibaiwa 'i'itediya, ta Yesu 'ahena 'i'etuluha, ma Pita 'igwaeya, “Bada, 'u'ebesinegau, weyahina taugu togala.” <sup>9</sup> Gwae bewa 'i'ineya, weyahina 'iyanao mahetenao nuwadi 'ihenainaida madouna silahanaedi si'onediya weyahina, <sup>10</sup> ma wete gide Saimoni 'iyanaowedi Yemesa ma Yoni, taudi Sebedi natunao. Coinega Yesu Pita 'ihewaeya, 'igwae, “Sahena 'u'ate'ateyoho. Ma hesi bewa 'oinega ma tomota gide 'u'ona 'esedi.”

<sup>11</sup> Coinega 'idi wagaedi silisidiya dabala, ta ginaula mabwaiyana si'ebesinediya ma Yesu simuliyeya.

*Yesu 'aigeda tolepelo 'i'abihe bwebwe'aneya  
(Madiu 8:1-4; Maki 1:4-45)*

<sup>12</sup> Ma hali tuta Yesu wete 'aigeda 'asa 'oina 'imiyamiya. Tupwaina 'oina 'aigeda loheya wahina mabwaiyana lepelo 'i'eweya. Coinega loheyaina Yesu 'i'italobeya ma 'ibe'uwa 'ahena ma 'i'ahwanoiyeya, 'igwae, “Bada, 'eguma 'ino nuwatuhu gide, sowasowahina ma 'u'abihe bwebwe'anegau.” <sup>13</sup> Ma Yesu nimanega loheya 'wapina 'i'abi tohoya ma 'igwae, “Cehe, bwebwe'ana! Cu'ehau.” Ma loheyaina 'ana lepelo 'igumwala mwayamwayauwa. <sup>14</sup> Coinega Yesu loheyaina 'oina 'ilohatoto, 'igwaeya, “Cutautau ma gesowana 'aigeda taiya wete 'oina 'uhehepwailegau, ma hesi 'utau topwaoli 'oina ma 'i'itago, ma 'oinega 'ino pwaoli 'u'ebwae Yehoba 'oina, to'aha gide 'ada lona Mosese 'oinega, ma 'oinega tomota sisanapugo 'abehega 'ubwebwe'ana pwaiya.”

<sup>15</sup> Ma hesi nage 'oinega ma Yesu tetelina 'imadou bwaibwaina, ma boda mabwaiyadi si'eto'utama ma 'abehega Yesu 'ina gwae sihesagohe, ma wete 'adi lohalao 'abehega 'i'abihe bwebwe'anedi, <sup>16</sup> ma hesi tuta baibaiwana boda 'oidiyega 'itautauya wasiwasi ma 'i'ahwa'ahwanoi Yehoba 'oina.

*Yesu 'aigeda topeu 'i'abihe bwebwe'aneya  
(Madiu 9:1-8; Maki 2:1-12)*

<sup>17</sup> Sabwelo 'aigeda 'oina Yesu boda 'ihehe'itadi. Ma tupwadi Palisiyao ma lona 'ana tohe'itao taudi sinaoma Galili ta Yudiya ta Yelusalema tupwainao 'oidiyega, ma boda mahetediyao simiyamiya, ma sihenono. Tuta nage 'oina Yehoba 'ina waiwaiyega tolohalao 'i'abihe bwebwe'anediya.

<sup>18</sup> Coinega boda 'aigeda topeu mahewaina si'ahaliyama, eeta sitohoya ma 'abehega siluhuwe hadai ma Yesu matana silagu. <sup>19</sup> Ma geya sowasowahidi, weyahina boda madou hedada. Coinega topeuina si'ahala haneheya hada tabwanina ma 'ana 'a-toha si'ewa yahuleya, ma 'oinega topeuina mahewaina sihedawe daweyeya bodaedi gamwagamwanidiya, ta Yesu matana silaguya. <sup>20</sup> Ma Yesu loheloheyaedi 'idi hemisa

'isanapuya, ta loheyaina 'ihewgaeya, 'igwae, “Ciyagu, 'ino puiyao 'adi nuwasam 'uloba pwaiya.”

<sup>21</sup> Ma hesi lolina 'ana tohe'itao ma Palisiyao Yesu 'ina gwaeyedi sihesagohediya ta siboidimo 'oidiya sihehesilaladi, sigwaeya, “Yesu bewa togidega ta Yehoba 'oina 'ihohopa'ala? Weyahina geya 'aigeda taiya sowasowahina ma tomota 'idi puiyao 'inuwasamudi, beno tuwa Yehoba sowasowahina.”

<sup>22</sup> Cidi nuwatuhu Yesu 'isanapu pwaiya, 'oinega 'ihewgaediya, “To'aha weyahina 'atemiya beno gide wanuwatuhu 'esa? <sup>23</sup> Ma to'aha wanuwatuhuya sowasowahigu yagwaene loheya bewa 'oina ma 'abehega yagwae, ‘Cino puiyao yanuwam pwaiya,’ bo yagwae, ‘Cutoholo ma 'utauya?’ <sup>24</sup> Ma wasanapu taugu Loheyaiguina ma'igu lolina bale'uwa ma tomota 'idi puiyao yanuwamudi.” Coinega topeuina 'ihewgaeya, 'igwae, “Taugu bewa yahegwae, ‘Cutoholo ma 'ino 'ebe'eno 'u'ahali ma 'utau 'ino gogowa.’”

<sup>25</sup> Ma 'ilomwayamwayauwa ma boda matadiyega 'itoholowa ma 'ina 'ebe'eno 'i'ahaliya ma 'itauya 'ina gogowa, ta ma'ina yaliyaya Yehoba 'ihewpawuweya. <sup>26</sup> Eeta boda mabwaiyadi nuwadi 'ihenainaida madouna, ta ma'idi he'asisi Yehoba 'ihewpawuweya, ma sigwae, “Nige 'aigeda 'ebe henainaida ta'iteya.”

#### *Yesu Libai 'ibwauweya*

*(Madiu 9:9-13; Maki 2:13-17)*

<sup>27</sup> Ma muliyetega Yesu 'ilatuwa, ma 'aigeda takesi 'ana to'ewa sanina Libai 'i'iteya 'ina hada 'ebe paihowa 'oina 'imiyamiya, ma 'ihewgaeya, 'igwae, “Libai 'umuliyegau.” <sup>28</sup> Coinega Libaiina 'itoholowa, ta ginaula mabwaiyana 'i'ebesinediya, ma Yesu 'imuliyeya.

<sup>29</sup> Coinega Libai 'ina 'ai madouna 'ipaihoweya Yesu weyahina, ma boda madouna sinaoma Libai 'ina hada 'aiina weyahina, ma takesi 'ana to'ewao ma tomota baibaiwadi wete mahetediyao. <sup>30</sup> Eeta Palisiyao ta 'idi lolina 'ana tohe'itao silolomugi Yesu 'ana tomuliyao 'oidiya, sigwaeya, “To'aha lamuna ma takesi 'ana to'ewao ta wete togala tupwadi mahetemiya wa'ai hegogona?”

<sup>31</sup> Ma Yesu 'idi gwaeina 'ihemaiseya, 'igwae, “Taudi wahidi waiwadi genuwadi to'abihe bwebwe'ana, ma tolohalao hesi. <sup>32</sup> Taugu yanaoma geya 'abehega tobwebwe'adi weyahidi ma hesi topuiyao ya'abihetedi, ma 'abehega nuwabui 'oinega ma sibwebwe'ana.”

#### *Yesu 'ina gwae hudi weyahina*

*(Madiu 9:14-17; Maki 2:18-22)*

<sup>33</sup> Ma muliyetega tupwadi tomota Yesu sihegwae, sigwae, “Yoni 'ana tomuliyao tuta baibaiwana magomaledi si'ahwa'ahwanoi Yehoba 'oina, wete gide Palisiyao 'adi tomuliyao 'idi paihowa, ma togidega ta 'owa 'a tomuliyao geya sihudi, ma tuwa si'ai'ai ma sinumanuma besobeso.” <sup>34</sup> Coinega Yesu 'igwaeya, “Togidega, 'ilobwaineya ma hai 'ana to'ebubuwo sihudi 'eguma tohai meloheyana mahetedi siyaliyaya? Geya, 'awa? <sup>35</sup> Ma 'iyamo tuta 'inaonaoma 'oina ma tohaiina 'i'ebesinedi, 'oinega hesi sinuwagala ma sihudi, ma sigomale.”

<sup>36</sup> Ma wete 'aigeda gwae hegehegedi 'ihe'ote'oteteliya 'oidiya, 'igwaeya, “Geya sowa-sowahina 'ale'o 'ehauna tupwana ta'ewa ma 'ale'o miyamiyaina tabwabwada. Geya! Ma 'eguma gide, hesi 'ale'o hauhauna tagihigala, ma wete hauhauna tupwatupwanaina 'ale'o miyamiyana geya 'ilobwaine. <sup>37</sup> Ta wete geya 'aigeda taiya we'aha waiwaina gidemusa waini 'ehauna 'isiwa 'wapi 'ebeswiwa miyamiyaidi 'oidiya, tabu ma silotaigala ma we'aha ta 'ebeswiwa 'adi mudala. <sup>38</sup> Ma hesi tasiwa 'wapi 'ebeswiwa 'ehau daisinamo 'oidiya. <sup>39</sup> Ma 'eguma taiya waini miyamiyana 'inuma, nata 'igwae 'abehega genuwana hauhauna, weyahina 'abehega waini miyamiyana hesi bwebwe'ana hedada.”

## 6

*Yesu 'ana tomuliyao Sabatiya witi si'abilolodiya*

*(Madiu 12:1-8; Maki 2:23-28)*

<sup>1</sup> Sabati 'aigeda 'oina Yesu ma'ana tomuliyao tanoha 'alonga sitauya, ma 'ana tomuliyawedi witi huwaina si'abilolodiya, ma sihosodiya nimadiyega ma si'aidiya. <sup>2</sup> Ma tupwadi Palisiyao si'itediya, ta sigwaeya, “Togidega ta Sabati 'ana loina wadi'wadi'wai?”

<sup>3</sup> Coinega Yesu Palisiyao 'idi gwae 'ihemaiseya, 'igwae, “Buki He'asisi 'oina sileleya Debida weyahina, ma 'eguma wahasili wasanapu 'abehega tauna ma'iyanao sigomaleya, <sup>4</sup> ma Yehoba 'ina Hada 'oina 'iluhuwa, ta beledi he'ahe'asisina 'i'eweya, ta si'aiya. Belediina ma'ana loina 'abehega topwaolimo 'adi tagwala ma si'ai. Ma sigomaleya, 'oinega tuwa si'aiya.” <sup>5</sup> Coinega Yesu wete 'ihewgaediya, 'igwae, “Sabati 'ana toloina tuwa taugu Loheyaiguina.”

*Yesu nima meyomeyo 'i'abihe bwebwe'aneya*

*(Madiu 12:9-14; Maki 3:1-6)*

<sup>6</sup> Ma wete 'aigeda Sabati 'oina Yesu 'iluhu hada tapwalolo 'aigeda 'oina, ma 'ihe'ita. Hadaina 'oina 'aigeda loheya 'imiyamiya nima 'ebeulanega meyomeyona. <sup>7</sup> Ma wete tupwadi loina 'ana tohe'itao ta Palisiyao simiyamiya, ma Yesu silomata yahiya, ma 'eguma loheyaina 'i'abihe bwebwe'ane Sabati 'oina, 'abwa 'aneyage 'oinega sihe'ewa toloinao matadiya.

<sup>8</sup> Ma Yesu hesi 'idi nuwatuhu 'isanapuya, 'oinega loheyaina 'ihewgaeya, 'igwae, “Cutoholo ma 'ulagama.” Ma loheyaina 'itoholowa ta 'ilaga. <sup>9</sup> Coinega Yesu Palisiyao ma'iyadiyao 'ihewgaediya 'igwae, “Bewa 'igu hesilala 'oimiya: To nuwatuhu bwebwe'ana 'oida? Sabati 'oina tomota taledi bo talohe'amasidi?”

<sup>10</sup> Eeta mabwaiyadi 'i'ebubu yahiyahidiya, ta 'oinega loheyaina 'ihewgaeya, 'igwae, “Nimau 'uyasi hedumwalu.” Ta loheyaina nimana 'iyasi hedumwaluya, ta 'ibwebwe'ana. <sup>11</sup> Nage 'oina Palisiyao ma'iyadiyao sigamwasowala bwaibwaina, ta siboidimo 'oidiya sigwae, “Loheya bewa togidega ta'abihelolagu 'ese?”

*Yesu 'ina tohepwailao 'ihesinuwediya*

*(Madiu 10:1-4; Maki 3:13-19)*

<sup>12</sup> Tuta nage 'oina Yesu 'ihaneya 'oyai, ma nobwa hinuwana mabwaiyana Yehoba 'oina 'i'ahwa'ahwanoi. <sup>13</sup> Coinega gona 'i'adaleya ta 'ana tomuliyao 'ibwauwediya, ma 'oidiyega site tuwelo 'ihesinuwediya, ma 'ibwauwediya tohepwailao.

<sup>14</sup> Tohepwailawedi sanidi bewa: Saimoni, tauna wete 'ihesaniyeya Pita, ma tasina Andulu, ma wete Yemesa ma Yoni ma Pilipi ma Batolomiu, <sup>15</sup> ma wete Madiu ma Tomasi ma hali Yemesa, tauna Alipiyo natuna, ma wete hali Saimoni, tauna to'ala'ohe'ohe 'idi miyawasi Loma weyahina, <sup>16</sup> ma wete Yudasa tauna Yemesa natuna, ma wete Yudasa Isakaliyota, tauna 'abwa Yesu 'itebae.

*Yesu tolohala baibaiwadi 'i'abihe bwebwe'anediya*

*(Madiu 4:23-25)*

<sup>17</sup> Ma mabwaiyadi ba'idanao 'oyega sisuluma 'wabu 'oina, sitoholowa. Cwabuina 'oina boda madouna simiyamiya, taudi sinaoma Yudiya ta Yelusalema 'oidiyega, ma wete Taiya ta Saidoni tupwa holega.

<sup>18</sup> Taudi sinaoma 'abehega Yesu 'ina gwae sihesagohe, ma wete 'abehega 'adi lohalao 'i'abihe bwebwe'anedi. Ma wete taudi hi'ahi'a siluhuwa 'oidiya, nuwanuwadi ma yaluyaluwaedi 'oidiyega 'ida ulalatuhe. <sup>19</sup> Bodaedi mabwaiyadi nuwanuwadi ma Yesu si'abitoho ma 'oinega 'adi lohalao sigumwala, weyahina si'iteya Yesu 'oina waiwai 'imiyamiya.

*Nuwagala ta yaliyaya*

*(Madiu 5:1-12)*



<sup>20</sup> Coinega Yesu 'ana tomuliyaowedi 'i'ebubudiya ta 'ihewgaediya, 'igwae: Ceguma 'omi wewelohemi, wayaliyaya weyahina Yehoba nimana wamiyamiya. <sup>21</sup> Ma 'omi 'eguma wagomale wayaliyaya, weyahina 'abwa wamwauwu. Ma wete 'eguma 'omi wadou, wayaliyaya weyahina 'abwa wahenama.

<sup>22</sup> Taugu Loheyaiguina, ma sowasowana wayaliyaya 'eguma weyahigu tomota silolo'alehegomi, nuwana siguipailegomi, nuwana si'ahwa yaliyegomi, nuwana si'ahwa galegalegomi. <sup>23</sup> Tuta nage 'oidiya 'eguma mwauwedi silatu, weyahidi wayaliyaya, ma watoholo ma wasobu, weyahina 'ami maisa bwebwe'ana galewa 'imiyamiya. Ta wanuwatuhuyahi 'abehega to'ahwa galagalaedi tubudiyao mwalo palopitao si'ahwa galegalediya, gide wete 'omi tuta bewa 'oina si'ahwa'ahwa galegalegomi.

<sup>24</sup> Ma 'eguma hesi 'omi wahewasawasa nuwa'ole'oleimi, weyahina 'imi wasawasa waloba pwaiya, ma 'abwa geya. <sup>25</sup> Ma taiyawedi 'omi bewa tuwa wamwauwu, 'abwa wanuwagala weyahina 'i'iuna gomale madouna waloba. Ma wete 'eguma bewa tuwa wahenama, 'abwa ma'imi nuwagala wadou.

<sup>26</sup> Ma tutaedi 'oidiya 'eguma tomota baibaiwadi si'ahwa bwebwe'anegomi, wanuwahila ma wanuwagala, weyahina mwalo taudi tubudiyao wete gidemusa palopita 'abo'abo si'ahwa bwebwe'anediya.

*Cami 'alehao wahelauwedi  
(Madiu 5:38-48; 7:12)*

<sup>27</sup> Ma 'igu he'ita bewa wahesagohe, ma 'ami 'alehao wahelauwedi, ta taudi siguipailegomiya wa'abihetedi, <sup>28</sup> ma wete taudi si'ahwa'ahwa galegalegomi wa'ahwa bwebwe'anedi, ma taudi silolo'alehegomi weyahidi wa'ahwa'ahwanoi ma Yehoba 'i'abihetedi. <sup>29</sup> Ma 'eguma taiya 'ase'aseu 'isapi, sahena 'uhehenima hile, ma hesi hali 'ase'aseu wete 'utagwale ma 'isapi. Ma 'eguma taiya 'ino sita 'i'eweya, 'a 'ale'o wete 'utagwale 'oina. <sup>30</sup> Ma wete 'eguma taiya 'oiuwa 'i'ahwanoi ginaula 'aigeda weyahina, ginaulaina 'u'ebwae. Ma 'eguma taiya 'ino tobwatobwa 'i'eweya ma 'oina 'imiyamiya, sahena weyahina 'ugwaegwae hilahila.

<sup>31</sup> Ma 'eguma to'aha nuwanuwami ma tomota 'oimiya sipaihowe, 'omi wete gide 'oidiya wapaihowa 'ese.

<sup>32</sup> Ma 'eguma tomota tupwadi sihelauwegomi ma siboidimo wahelauwedi, geya 'ana bwebwe'anamo 'oimiya, weyahina togala wete 'iyadiyao sihelauwedi, 'oinega taudi ma 'omi tuwa mumugami mahemahetena. <sup>33</sup> Ma wete gide 'eguma tupwana tomota si'abihetegomi ma siboidimo wa'abihetedi, geya 'aigeda wete 'ana bwebwe'ana 'oimiya, weyahina togala wete 'iyadiyao si'abihetedi. Ma mumugadi tuwa gide wete 'omi mumugami.

<sup>34</sup> Ma 'eguma helau wa'ebwaya taboidimo wanuwatuhuya ma 'abehega 'oimiya sihemaisa hile, to'aha paihowaina 'ana bwebwe'ana 'oimiya? Paihowaina gide togala sipaipaihowadi 'iyadiyao 'oidiya, ma 'abehega 'idi 'ebwayaina maisana siloba hila.

<sup>35</sup> Ma 'omi hesi 'ami 'alehao wahamwadi, ma wahelauwedi, ta wa'ebwaya 'oidiya, ma sahena hemaisa weyahina wayamwayamwa. Ma 'abwa 'ami maisa madouna waloba, ma 'oinega 'omi Tomiya tabwana hedada natunao. Weyahina tauna tohopa'alao ma togalao 'ihelauwedi. <sup>36</sup> Coinega 'omi wete tuwa wahelau, gide Tamamiu 'ihelau 'esegomi.

*Sahena 'iyamiyao wa'ahwa'ahwa galegaledi  
(Madiu 7:1-5)*

<sup>37</sup> Ma sahena tomota wa'ahwa'ahwa galegaledi, tabu ma Yehoba wete 'i'ahwa galegalegomi. Ma wete sahena 'iyamiyao wahe'ewadi, ma 'oinega 'omi sahena he'ewa walobaloba. Ma hesi 'iyamiyao mumugadi wanuwamudi, ma 'oinega Yehoba wete mumugami 'inuwasamudi.

<sup>38</sup> Ma wete ma'imi nuwatagwala tomota wahelauwedi, ma 'oinega Yehoba 'ihelauwegomi, ma 'ina helauina madou hedada 'oimiya 'ilosywa. Weyahina to'aha 'imi paihowa tomota 'oidiya, Yehoba wete gide 'ipaipaihowa 'oimiya.



<sup>39</sup> Coinega gwae hegehegedi bewa 'i'ebwaediya, 'igwae, "Togidega? Sowasowahina ma 'aigeda tomatagibugibu 'iyana matagibugibuina 'ihanugete? Gesowana 'awa? Ceguma gide 'ipaihowa 'ese, nata siteluwaedi gaula 'oina sibe'u. <sup>40</sup> Wete gide 'eguma 'aigeda tomuliya, geya sowasowahina ma 'ina tohe'ita 'isanapu sine. Ma hesi 'eguma 'ina sanapu 'imadou, beno siteluwaedi 'idi sanapu mahemahetena.

<sup>41</sup> "Geya 'ilobwainego ma haletau weyahina 'ugwae 'eguma matana 'aiwe tupwatupwana 'imiyamiya, weyahina 'owa wete matauwa 'etupwa 'imiyamiya, ma geya 'u'ita. <sup>42</sup> Coinega sahena haletau 'uhehegwae ma 'ugwae, 'Haletagu, 'ilobwainegau ma 'aiwe tupwatupwana matauwegu ya 'ewayahule,' weyahina 'owa wete 'etupwa madouna matauwa 'imiyamiya geya 'u'ita. Moisa 'owa 'aigeda to'abo, 'awa? Ma hesi 'etupwa matauwa 'u'ewayahule nugeta, ma 'oinega 'u'ebubuna bwaibwaina, ma muliyetega haletau matanega 'aiwe tupwatupwana 'u'ewayahule.

*Loheloheya mumugadi gide 'aiwe huwaidi*

*(Madiu 7:16-20; 12:33-35)*

<sup>43</sup> "Caiwe bwebwe'ana geya sowasowahina ma huwaina galana 'ihuwa. Gide wete 'aiwe galana geya sowasowahina ma huwaina bwebwe'ana 'ihuwa. <sup>44</sup> Coinega 'aiwe 'aigeda 'aigeda huwaidi 'oidiyega tasanasanapudi 'abehega 'aiweyedi bwebwe'adi bo galadi. Geya sowasowahina ma talitali 'oidiyega damaya huwaina taloba. Wete gide geya sowasowahina ma buyubuyuwa 'oinega piyoi huwaina taloba. <sup>45</sup> Gide loheya mumugana, 'eguma loheya 'ina nuwatuhu 'ausalana mumugana mabwaiyana bwebwe'ana. Ma 'eguma loheyaina 'ina nuwatuhu galadi mumugana mabwaiyana galadi. Weyahina nuwatuhuwedi to'aha gide 'atemiya simiyamiya sauga baibaiwana 'ahwamiyega silat-  
ulatu.

*Tohada'abi 'eluwa*

*(Madiu 7:24-27)*

<sup>46</sup> "Ma to'aha weyahina wa'ahwa'ahwa badaegau, ma 'igu gwae geya wahemata-matanedi. <sup>47</sup> Ma 'eguma taiya 'owa 'unaoma 'oiguwa ma 'igu gwae 'uhesagohedi ma 'upaihowadi, 'owa mumugau gide 'aigeda tohada'abi yahe'itae 'oimiya. <sup>48</sup> Ma tohada'abiina nugeta 'ina wahuwahu pa'alina 'ilobeya, da'uda'ule 'oina, ma 'ina hada 'oina 'i'abiya, 'oinega tutaina 'wesu madouna 'isuluwa ta 'abaita 'idauwa. Ta 'ina dau 'oinega hadaina 'ihunuya madouna, ma geya 'i'abihegala, weyahina wahuwahu bwebwe'ana 'oina 'i'abiya. <sup>49</sup> Ma hesi 'eguma taiya 'owa 'igu gwae 'uhesagoheyamo ma geya 'uhematamatane, 'owa tuwa gide tohada'abi negwanegwala daisina 'oina 'i'abiya. Ma tutaina 'abaita 'ilatuwa hadaina 'ihunuya, ta 'ibuineya ma 'iligea yahuleya."

7

*Yesu tolo'alehao 'idi toloina 'ina hewali 'i'abihe bwebwe'aneya*

*(Madiu 8:5-13)*

<sup>1</sup> Ma Yesu 'ina gwae tomota 'oidiya 'igumwala, ma 'ilatuwa 'itauya Kapaneumi 'oina. <sup>2</sup> Gogoina 'oina tolo'alehao taudi meLoma 'adi tohanugeta 'aigeda ma'ina hewali simiyamiya. Ma 'ina hewaliina 'ihelau bwaibwaineya, ma tuta nage 'oina 'ilohala madouna, ma 'i'iuna ma 'i'amasa.

<sup>3</sup> Ma toloinaina Yesu 'ina naoma wasana 'ihesagoheya, ta meYudiya 'idi babadao tupwadi 'ihetunediya Yesu 'oina si'ahwanoi ma 'abehega Yesu 'inaoma ma 'ina hewaliina 'i'abihe bwebwe'ane. <sup>4</sup> Ma babadaowedi sinaoma Yesu 'oina ma si'ahwanoiya, sigwae, "Bada, nuwanuwama 'unaoma ma tatauya, ma 'iyamai 'ina hewali 'aigeda 'ilohala 'u'abihe bwebwe'ane, weyahina tauna loheya bwebwe'ana, <sup>5</sup> ma mabwaiyada meYudiya 'ihelauwegita, ta 'ida hada tapwalolo 'i'abiya."

<sup>6</sup> Coinega Yesu 'itagwala ta ba'idadiu sitauya. Sitautauya ta tupwaina deina sihapwesa, ta toloinaina 'iyanao tupwadi wete 'ihewasediya Yesu sabi 'ausina. Ta sinaoma Yesu 'oina, ta sigwaeya, "Bada 'ima tohanugetaina 'igwaeya 'abehega 'owa loheya madouna,

geya 'ilobwainego ma 'uluhu 'ina hada. <sup>7</sup> Ma wete geya 'ilobwainego ma tauna maheteu 'edai wahellobaloba. Ma hesi nuwanuwana 'abehega 'ugwaemo ma 'oinega 'ina hewaliina 'ibwebwe'ana. <sup>8</sup> Ma 'enana bewa gide 'igwaeya, 'Taugu loina yasanasanapu ta 'agu toloinao 'idi gwae 'ana tohematamatana, ma wete 'igu tolo'alehao yaloiloinaedi, ta 'eguma 'aigeda yahegwae, "Cutauya," tuwa 'itauya; ma 'eguma 'aigeda wete 'oina yagwae, "Cunaoma," wete 'inaoma, ma 'eguma 'igu topaihowa 'aigeda yahegwae ma yagwae, "Bewa 'upaihowa," tuwa 'ipaihowa."

<sup>9</sup> Bewa gwaeyedi Yesu 'ihesagohediya ta 'iyaliyaya, ma 'itoholo lohילה ta bodaedi sihememuli tabubu 'ihewgaediya, 'igwae, "Moisa, yahegwagomi geya 'aigeda taiya wete yalobaloba meIsileli 'oimiyega 'ina hemisa loheya bewa gide."

<sup>10</sup> Coinega tohewasaedi sihila toloinao 'ina hada ma nobwa hewaliina silobeya, 'ibwebwe'ana pwaiya.

*Hiwape 'aigeda natuna loheyana 'amasega 'i'abihetoholo hiley*

<sup>11</sup> Ma geya tuta dudulena mulina Yesu 'inaowa 'aigeda 'asa 'oina, sanina Neini. Ta 'ana tomuliyao ma wete boda madouna si'wayabuya. <sup>12</sup> Cinaoma 'asaina deina, ta to'amasana ma 'ana to'ahalao 'ilobediya silatulatuma 'asaina 'oinega. To'amasana hiwape natuna, 'aigeda tuwa. Coinega hiwapeina boda madouna mahetenao sitautauya sabi lagutaona.

<sup>13</sup> Ta Yesu hiwapeina 'i'iteya, ma 'i'ate muyamuyaeya, ma 'ihewgaeya, "Sahena 'udoudou." <sup>14</sup> Coinega 'inaowa ma to'amasana 'ana wadu 'i'abitohoya, ma to'ahalaedi sitoholo henonowa. Ma Yesu 'igwaeya, "Hewali, yahegwago 'utoholo." <sup>15</sup> Ma hewaliina 'itoholowa ta 'igwaeya. Coinega Yesu hewaliina 'itoeya ta sinana 'i'ebwaeya.

<sup>16</sup> Nage 'oina tomotaiyao simatauta ma Yehoba sihepwatuweya, sigwae, "Palopita madouna bewa 'ilatu pwaima. Bewa Yehoba 'ina habo'ena tauda 'ina tomotaiyao 'oida."

<sup>17</sup> Eeta Yesu tetelina sihewasa dadaneya Yudiya mabwaiyana, ma wete gogowedi deina mabwaiyana 'oidiya.

*Yoni to'abihebabitaiso 'ina besa Yesu weyahina*

*(Madiu 11:2-6)*

<sup>18</sup> Ma muliyetega Yoni 'ana tomuliyao wasa bewa sihepwawileya Yoniina 'oina. <sup>19</sup> Coinega 'ana tomuliyao 'eluwa 'ibwauwediya ma 'ihewgaediya, 'igwae, "Watauya ma badaina wahesilale, nuwana tauna To'abihetenaina weyahina mwalo yagwaegwaeya, bo hali loheya wete tayamwa?"

<sup>20</sup> Ma sitauyama Yesu 'oina ma sihegwae, sigwae, "Yoni to'abihebabitaiso 'ihewase-maiya ta 'anaoma sabi hesilalago, nuwana 'owa To'abihetenaina, bo hali loheya wete 'ayamwa?"

<sup>21</sup> Tuta nage 'oina Yesu 'abwa tuwa tolohalao 'adi lohalao ta 'adi muyao ma hi'ahi'a 'oidiya 'i'abi'abi hebwebwe'ana, ma wete tomata gibugibu matadi 'i'abihe 'asilalediya.

<sup>22</sup> Ma muliyetega siteluwaedi 'idi hesilala Yesu 'ihemaiseya, 'igwae, "Wahila ma Yoni 'oina wahe'ote'otetela ginulaedi 'oiguwega wahesagoha pwaidiya ma wa'itediya, beno tomata gibugibu matadi sitayahala, toha'au'au sibwebwe'ana pwaiya ta siyawayawala, tolepelo wahidi sibwebwe'ana hila, totenatui gwae sihesagoha pwaidiya, to'amasana sitoholo hila, ma wete wewelohedi tetela bwebwe'ana sihesagoha pwaiya. <sup>23</sup> Coinega watauya ma Yoni wahegwae ma sahena weyahigu 'ihenuwanaluwa, weyahina 'eguma taiya 'ina hemisa weyahigu sahena 'iwe'awe'a tauna 'ida yaliyaya."

*Yesu 'ina hepwaile Yoni weyahina*

*(Madiu 11:7-19)*

<sup>24</sup> Yoni 'ana tomuliyao sihila, ma Yesu 'ihewgaeya ma boda 'oidiya Yoni weyahina 'ihewwaile 'igwaeya, "Mwalo mabwaiyami tupwa yoho 'awawa watauya Yoni sabi hesagohina, ma to'aha nuwanuwami ma 'abehega wa'ita? Nuwana 'abehega 'aigeda pwatula madouna yaumai 'inihunihuwe wada 'ita, wa? <sup>25</sup> Nuwana 'aigeda loheya ma 'ana 'ale'o wasawasa sabi 'itaina? Geya! Weyahina taudi ma'adi 'ale'o wasawasa toloina madouna 'idi tupwa simiyamiya ma'idi yaliyaya. <sup>26</sup> Ma to'aha hede weyahina ta watauya tupwa

yoho 'awawa? Nuwana wanuwatuhuya 'abehega nata palopita 'aigeda wa'ita, wa? Moisa tuwa, loheya wa'iteya palopitao 'ihemadou sinediya. <sup>27</sup> Yoniina weyahina mwalo Yehoba 'ina gwae Buki He'asisi 'oina bewa gide 'ihepwaila nugeteya 'igwae, 'Bewa 'igu tohewasa yahewasaeyawa matauwa 'itauya, ma 'ino 'eda 'ihuna.' <sup>28</sup> Coinega Yesu wete 'igwae, "Yoni tauna mebale'u mabwaiyadi 'ihemadou sinediya, ta mabwaiyadi taudi Yehoba 'ina 'ebeloina 'alona Yoni sihemadou sineya."

<sup>29</sup> Coinega bodaedi ma wete takesi 'ana to'ewao Yesu 'ina gwaeyedi sihesagohediya, ta Yehoba sihepwatuweya, weyahina taudi mwalo Yoni 'i'abihe babisowediya. <sup>30</sup> Ma hesi Palisiyao ma lona 'ana tosanapuwa Yehoba 'ina nuwatuhu sabi 'abihetedi siguipaileya, 'oinega genuwadi ma Yoni 'i'abihe babisodi. <sup>31</sup> Coinega Yesu 'igwaeya, "Comi mehau togidega hede yagwae 'esa'esa mumugami weyahina? <sup>32</sup> Nuwana yagwae, 'omi gide tuwa gwagwama 'ebe maketi 'alona si'e'ehyaheyale ta 'iyadiyao 'oidiya sibwauwau, sigwaegwae, 'Ciyamayao, togidega 'iya ta 'alahulahusa ma geya wada sobuwa, ma wete 'adou gwaegwae ma geya wada douwa.' <sup>33</sup> Ceda'edaedi bewa 'ana sanapu 'abehega Yoni to'abihe babisoina 'inaoma ma beledi sahena 'i'ai'ai ma waini geya 'ida numeya, ma 'oinega wagwae 'abehega hi'ahi'a Yoni 'i'abihe yauyauleya? <sup>34</sup> Ma hesi taugu Loheyaigui-ina yanaoma ta ya'ai'ai, yanumanuma, ma wete weyahigu walolomugi, wagwaegwae, 'Loheya bewa to'ai ma tonuma hedahedada, ma wete takesi 'ana to'ewao ta tupwadi wete topui 'ihe'iyai'yaguwediya.' <sup>35</sup> Ma taudi tosanapu moisa 'abwa 'idi paihowa bwebwe'adi 'oidiyega sanapu moisa 'ilatulatu."

#### *Togala 'aigeda Yesu 'ahena 'iheloiya*

<sup>36</sup> Caigeda tuta Palisi 'aigeda sanina Saimoni, Yesu 'ibwauweya ma mahetena si'ai'ai. Coinega Yesu 'iluhuwa Palisiina 'ina hada ta 'imiyatoiya sabi 'ai. <sup>37</sup> Ma gogo nage 'oina 'aigeda wahine galana 'imiyamiya. Wahineina 'isanapuya 'abehega Palisi 'ina hada Yesu 'i'ai'ai. Coinega holowa bwebwe'ana ma 'ana botolo 'ausala hedadena 'i'eweyama, <sup>38</sup> Yesu deina 'itoholowa ma 'idoudou, ma mataneunega Yesu 'ahena 'ihebuteya, ta debanega 'isaudiya, weyahina wahineina debana dudulena, ma wete Yesu 'ahena 'inisoya, ma holowaina 'isiweya Yesu 'ahena. <sup>39</sup> Coinega Palisiina 'iboinamo 'oina 'inuwatuhu dahwana 'igwaeya, "Loheya bewa, 'eguma tauna palopita, 'ida sanapu wahineina 'i'abi'abitoho 'abehega tauna togala."

<sup>40</sup> Bewa 'oinega Yesu 'ihewgaeya ma 'igwae, "Saimoni, nuwanuwagu ma 'aigeda gin-aula yahepwaile 'oiuwa." Ta Saimoni 'igwaeya, "Bada, to ginaula? Cuda hegwaegauma."

<sup>41</sup> Coinega Yesu 'igwae, "Caigeda towasawasa ma loheya 'eluwa 'ihebukidiya, 'aigeda 'ana buki gide paibi handeledi kina, ma 'aigeda pipiti kina. <sup>42</sup> Ma siteluwaedi geya sowa-sawahidi ma sihemaise, 'oinega towasawasaina siteluwaedi 'adi bukiina 'inuwasamudiya. Coinega yahesilalego, siteluwaedi 'oidiyega taiya 'idi badaina 'iloyauwedoweya?"

<sup>43</sup> Coinega Saimoni Yesu 'ina gwae 'ihemaiseya, 'igwae, "Nuwana loheyaina tauna 'ina buki madouna 'iloyauwedoweya." Ta Yesu 'igwaeya, "Cehe, moisa." <sup>44</sup> Coinega 'i'ita lohihila wahineina 'oina, ma 'igwaeya, "Saimoni, wahine bewa 'ina paihowa weyahigu 'u'iteya, geya gide 'owa. Weyahina 'ino hada yaluhuma, ta we'aha 'ahegu 'ana 'ebebuyo weyahina geya 'u'ebwaegau, ma hesi wahine bewa mataneunega 'ahegu 'ibuyodiya, ta debanega 'isaudiya. <sup>45</sup> Ma wete 'owa haesota 'ana niso geya 'upaihowa 'oiguwa, ma tauna hesi 'igu latu hauhawega 'ahegu 'inisonisodi. <sup>46</sup> Geya wete debagu holowega 'uheheholoigau, ma tauna hesi 'ina holowega 'ahegu 'iheloloidiya. <sup>47</sup> Tauna 'ina puiyao baibaiwadi yanuwasa pwaidiya, 'oinega 'ihelauwegauwa madouna, ma hesi 'eguma taiya 'ina pui 'i'iuna ma yanuwasa, beno 'ina helau 'oiguwa wete 'i'iuna."

<sup>48</sup> Coinega Yesu wahineina 'ihewgaeya, 'igwae, "Cino galao yanuwasa pwaidiya."

<sup>49</sup> Ma loheloheyaedi taudi mahetenao si'ai'ai, Yesu 'ina gwae sihesagoheya ta taboidimo 'oidiya silolomugi, sigwae, "Taiya hede bewa ta 'abehega galana 'inuwasamudi?"

<sup>50</sup> Ma Yesu hesi wahineina 'oina 'igwaeya, “Cino hemisa 'oinega 'abihetena 'ulobeya, 'oinega ma'ino yaliyaya 'utauya.”

## 8

### *Wahiwahine tupwadi Yesu 'ina lema 'oidiya sihemaiseya*

<sup>1</sup> Ma muliyetega Yesu 'itoholowa ma 'itauya gogo madoudi ma 'i'iudi 'oidiya, Yehoba 'ina lolina tetelina bwebwe'ana sabi guguyae, ma 'ana tomuliyao site tuwelowedi mahetena. <sup>2</sup> Ma wete tupwana wahiwahine mahetediyao, beno taudi mwalo 'oidiyega hi'ahi'a Yesu 'iula latuhediya, ma wete 'adi lohalao 'i'abi hebwebwe'enediya. Wahiwahineyedi beno Meli Magidala, tauna mwalo 'oinega hi'ahi'a sebeni Yesu 'iula latuhediya, <sup>3</sup> ma wete Yowana, tauna Kusa mwanena, Kusaina Helodi 'ina topaihowa, ma wete Susana, ma wete tupwadi wahiwahine mahetediyao. Wahiwahineyedi taudi 'idi tobwatobwa 'oidiyega Yesu ma'iyanao si'itayahidiya.

### *Patu 'ana gwae hegehegedi*

*(Madiu 13:1-9; Maki 4:1-9)*

<sup>4</sup> Tomota baibaiwadi gogo mabwaiyana 'oidiyega sinaoma ta si'auta Yesu 'oina, ma Yesu gwae hegehegedi 'oinega 'ihe'itediya, 'igwae, <sup>5</sup> “Totanoha paihowa 'aigeda 'ina tanoha 'itauya ta witi patuna 'isaweyanediya, ma tupwadi patu 'edai sibe'uwa ma tomota sibasa hibibiya, ma wete kwasumo si'itediya, ta sisuluma ma si'aidiya. <sup>6</sup> Ma tupwana patu bale'u loda'uda'uleina 'oina sibe'uwa ta sibwala ma muliyetega siwelaiya, weyahina bale'uina geya gogaina. <sup>7</sup> Ma tupwadi patu talitali 'oidiya sibe'uwa, ta sibwala hegogona, ma hesi talitali 'ihewaiwaiya ta 'isahila he'amasidiya. <sup>8</sup> Ma tupwana bale'u 'ausalana 'oina sibe'uwa ta sibwalama, ma simadouwa ma sihuwa, ta 'oidiyega 'ebayo bwebwe'ana silobeya, weyahina patuwedi 'aigeda 'aigeda 'oidiyega handeledi silobediya.” Coinega Yesu boda 'ihewgaediya, 'igwae, “Ceguma matenami gwae bewa wahesagohe.”

### *Patu 'ana gwae hegehegedi 'ana lihasa*

*(Madiu 13:10-23; Maki 4:10-20)*

<sup>9</sup> Ma muliyetega 'ana tomuliyao Yesu sihesilaleya, sigwae, “Cino gwae hegehegediyedi to'aha 'adi sanapu?”

<sup>10</sup> Ma tauna 'igwaeya, “Comi Yehoba 'oimiya 'itagwala pwaiya ma 'ina lolina 'alodi moisa 'ana tosanapuwo, ma hesi tomota baibaiwadi gwae hegehegedi sihesagoheya, ma 'ana nuwasabwalena geya, ma wete 'ana nuwasabwalena sibesebese ma gesowana silobaloba. <sup>11</sup> Ma gwae hegehegedi 'ana lihasa bewa gide: Patuina beno Yehoba 'ina gwae. <sup>12</sup> Ma patuwedi 'edai sibe'uwa taudi beno tomotaedi gwaemo sihesagoheya, ma Seitani 'inaoma ma 'atediyega gwaeyedi 'i'ewayahuleya, 'oinega gesowana sihemihemise ma 'abehega Yehoba 'i'abihetedi. <sup>13</sup> Ma patuwedi sibe'uwa bale'u loloda'uda'ulena 'oina tomotaedi taudi beno Yehoba 'ina gwae weyahina siyaliyaya, ma hesi geya lamudi 'ipa'apa'ala, weyahina 'idi hemisa geya madouna, ma 'eguma 'ebe tohona 'oidiya 'ilatu nata sibe'u. <sup>14</sup> Ma patuwedi talitali 'oidiya sibe'uwa, tomotaedi taudi gwaena sihesagoheya, ma hesi 'idi nuwatuhu mabwaiyana 'itautauya wasawasao ta bale'u yaliyayaina ta wete ginaula baibaiwana 'oidiya, ma 'oinega Yehoba 'ina gwae 'oidiya geya huwaina 'ida latuwa. <sup>15</sup> Ma patuwedi bale'u bwebwe'ana 'oina sibe'uwa, taudi beno ma 'idi 'atetagwala gwaena sihesagoheya, 'oinega sihe'alama'i'itana, ma Yehoba 'ina gwae 'oidiya 'ihuwa bwaibwaina.”

### *Mayale 'ana gwae hegehegedi*

*(Madiu 4:21-25)*

<sup>16</sup> Ma Yesu wete 'oidiya 'igwaeya, “Geya 'aigeda taiya mayale 'ala'alasina 'ilagulagu dahwa walata bo sita 'oidiyega, ma hesi 'atamana 'ilagu ma 'aneyage hada 'ana tomiyao 'i'asilala 'oidiya. <sup>17</sup> Ceguma to ginaula 'atemiya wadawediya, 'abwa 'asilalaina 'i'abilatuhe. Ma to'aha 'ulagu dahweya, 'abwa ginauledi 'ilolatuhe 'atamana.

<sup>18</sup> “Coinega wanuwatuhuyahi ma gwae wahesagoha bwaibwaini. Weyahina 'eguma taiya 'oina Yehoba 'ina tobwatobwa 'imiyamiya, nata tobwatobwaina 'ilohepoi. Ma taiya 'oina geya Yehoba 'ina tobwatobwa 'imiyamiya, ma 'iboinamo 'inuwatuhuya 'abehega Yehoba 'ina tobwatobwa 'oina 'imiyamiya, nata Yehoba tobwatobwaedi 'oinega 'i'ewayahuledi.”

*Yesu sinana ma tasinao si'ebeseya*  
(Madiu 12:46-50; Maki 3:31-35)

<sup>19</sup> Ma muliyetega Yesu sinana ma tasinao sinaoma sabi 'itaina, ma boda madou hedada, 'oinega geya sowasowahina ma siluhu Yesu 'oina. <sup>20</sup> Ma gwaemo sihewasaeya, sigwae, “Bada, sinau ma tasimwao wa'italatu 'atamana sitotoholo, ma nuwanuwadi 'owa.”

<sup>21</sup> Coinega Yesu 'ihewgaediya, 'igwae, “Geya siboimo, ma hesi 'eguma taiyewedi Yehoba 'ina gwae sihehesagohe ma simulimuliyega, beno taudi sinagwao ma tasigwao.”

*Yesu yaumai ma dibana 'iheliyediya*  
(Madiu 8:23-27; Maki 4:35-41)

<sup>22</sup> Caigeda tuta Yesu ma 'ana tomuliyao sigeluwaga, ma 'oidiya 'ihewwaila, 'igwaeya, “Tahabala hali tupwa.” Ta si'u'eya, <sup>23</sup> ma sipilipili ma Yesu 'i'eno'eno ta 'i'eno sineya. Eeta wediliya madouna 'itowama ma dibana madouna sisiwasiwa taona wagai, ma 'i'iuna ma sidamana. <sup>24</sup> Coinega loheloheyaedi Yesu silohanohanoya ma sigwae, “Bada 'utoholo, 'i'iunamo tadamana!” Coinega 'itoholowa ma yaumai ma bagodu 'iheliyediya, 'igwae, “Walolagu!” Ta silolaguwa ma 'idaumwala.

<sup>25</sup> Ma Yesu 'ana tomuliyao 'ihewgaediya, 'igwae, “Comi togidega, geya wahemi-hemisaegau, 'awa?” Ma taudi sideba mwadina, ta wete nuwadi 'ihenainaida, ma siboidimo 'oidiya sigwae, “To loheya hede bewa? Ta yaumai ma dibana 'iloinaediya ma 'enana sihesagoheya!”

*Caigeda loheya 'alonega hi'ahi'a baibaiwana silatuwa*  
(Madiu 8:28-34; Maki 5:1-20)

<sup>26</sup> Ma Galili hali tupwa sihabala pwaiya ta siluhuwa meGelasine 'idi gadowa. <sup>27</sup> Coinega Yesu 'isuluwa dabala, ma toni'asa 'aigeda 'ilatuma. Loheyaina mwalo 'alona hi'ahi'a siluhuwa ma 'oina simiyamiya. Ma loheyaina tuta dudulena 'ale'o geya 'ida 'oteya, ma hada 'oidiya geya 'ida miya, ma hesi 'ina 'ebemiya galiha duluhina 'oidiya.

<sup>28</sup> Coinega loheyaina Yesu 'i'iteya ma 'ibwau ta 'ibe'u 'eno talutalubu'iyaga, ma 'ibwau waiwaiya, 'igwae, “Yesu yo, 'owa Yehoba Tohewaiwai hedada Natuna, to'aha 'utohotoho ma 'abehega 'upaihowa 'oiguwa? Tuwa! Sahena 'u'abi'abi hemuyemuyegau.”

<sup>29</sup> Gwae bewa 'i'inaneya weyahina Yesu 'ihewgae pwaiya, 'igwaeya “Hi'ahi'a, loheyaina beno 'oinega 'ulatu.” Ta wanuwatuhu 'abehega loheyaina mwalo tuta baibaiwana hi'ahi'a 'i'abi'abi heyauyaule, 'oinega si'abiyahiya ma nimana ta 'ahena sipaidiya gulaha pwawati, beno seni 'oidiyega, ma tuwa seniye 'iupaupadi ta wete hi'ahi'a loheyaina 'itautauye tupwa yoho 'awawa.

<sup>30</sup> Coinega Yesu loheyaina 'ihesilaleya, 'igwae, “Togidega saniu?” Ma tauna 'igwaeya, “Sanigu Baibaiwa Hedada, weyahina hi'ahi'a baibaiwadi siluhu pwaiya 'aloguwa ta simiyamiya.”

<sup>31</sup> Ma yaluyaluwaedi 'enadi Yesu 'oina si'ahwanoi waiwai sigwaeya, “Sahena 'uulaula suluhemai gaula 'ebesilahe 'oina, <sup>32</sup> ma hesi 'uhesumanemai ma 'aluhu bawe bodaidi nage siduladula 'oyai.” Coinega 'itagwala, <sup>33</sup> ta silatuwa loheyaina 'oinega ma bawe 'oidiya siluhuwa. Nage 'oina baweyedi siheyauyauleya, ma mabwaiyadi sipili butubutu ta 'ade'adewala sibe'uwa, ta holai sidamana.

<sup>34</sup> Ma bawe 'adi to'itayahinao baweyedi 'idi silahe si'iteya ta simatauta, 'oinega sidena ta sitauya 'asai, ta wasaina to'aha gide si'iteya sihepwalediya gogo madoudi ta gogo 'i'iudi tomotaedi 'oidiya. <sup>35</sup> Coinega tomotaedi sinaoma ma 'abehega taudi matadiyega si'ita to'aha 'ilatuwa. Sinaoma Yesu 'oina ma loheyaina si'iteya, mwalo hi'ahi'a 'alona



simiyamiya 'ibwebwe'ana pwaiya, ma 'ale'o 'i'oteya, ma Yesu 'ahena deina 'imiyamiya. Nage 'oina mabwaiyadi simatauta.

<sup>36</sup> Ma tohewasaedi tomota 'oidiya sihe'ote'otetela togidega loheyaina 'ibwebwe'ana 'esa. <sup>37</sup> Coinega meGelasine mabwaiyadi simatauta madouna, ma Yesu silohesohesoiyeya ma 'abehega 'i'ebesinedi. Coinega Yesu 'idobiya wagai ta 'igeluwa, ma sitauya.

<sup>38</sup> Ma loheyaina 'i'abihe bwebwe'anya Yesu 'oina 'i'ahwanoiya 'igwae, “Sowa-sawahina yamuliyego?” Coinega Yesu 'ihewwaeya, <sup>39</sup> 'igwae, “Geya. Ma hesi 'uhila ma 'utauya 'asai, ma to'aha gide Yehoba 'oiuwa 'ipaihoweya 'uhepwaila dadane.” Eeta loheyaina 'itauya gogoina 'alonga, ma Yesu 'ina paihowa waiwaina 'ihe'ote'oteteliya tomiya'asa mabwaiyadi 'oidiya.

*Yailo natuna 'ilohala*

*(Madiu 9:18-19; Maki 5:21-24)*

<sup>40</sup> Ma Yesu ma'ana tomuliyao sihabala hila, ma boda madouna ma'idi yaliyaya sihesohoteya, weyahina tauna tuwa siyamwayamwa.

<sup>41</sup> Coinega 'aigeda loheya 'iluhu latuma, sanina Yailo, tauna 'idi hada tapwalolo 'ana to'itayahina. Cinaoma ma Yesu 'ahena 'i'etuluha, ma 'igwaeya, “Bada tatau 'igu hada, <sup>42</sup> ma natugu 'ilohala madouna 'u'abihe bwebwe'ane. Tauna tuwa natugu 'aigeda tuwa, 'ana bolime tuwelo, hadai 'i'eno'eno, tuta 'i'iuna ma 'i'amasu.” Coinega ba'idana sitauya.

*Wahine 'aigeda Yesu 'ana 'ale'o 'i'abitohoya*

*(Madiu 9:20-22; Maki 5:25-34)*

Ma Yailo mahetena 'edai sitautau ta boda madouna simuliyediya, siheduidui.

<sup>43</sup> Ma bodaedi 'alodiya 'aigeda wahine mahetediu, ma'ana lohala. Lohalaina beno bweyahina 'idaudau bolime tuwelo 'oidiya, ma tuwa 'abwa 'idaudau. Tuta baibaiwana to'abimuya sitohotoho ma 'abehega si'abihe bwebwe'ane, ma geya sowasowahidi.

<sup>44</sup> Wahineina Yesu mulinega 'inaoma ma 'ana 'ale'o papalina 'i'abitohoya, ta bweyahina 'ina dau 'iyapasa mwayamwayauwa.

<sup>45</sup> Eeta Yesu 'isalutuwama, 'igwaeya, “Hei! Taiya 'i'abi tohogauwa?” Ta mabwaiyadi siuhala, ma hesi Pita 'ihewwaeya, 'igwae, “Bada, bodaedi siheduidui ta 'oiuwa situpa.”

<sup>46</sup> Ma Yesu 'igwaeya, “Geya! Caigeda taiya 'agu 'ale'o 'i'abitohoya, weyahina yalotohoya 'oiguwega waiwai 'ihapwesa, ta to'abi tohonaina 'oina 'ihabala.”

<sup>47</sup> Ma wahineina 'isanapuya 'abehega Yesu 'isanapu pwaiya 'ina paihowa, 'oinega 'inaoma ma'ina 'ateyoho, 'ibe'u talutalubu'iya Yesu 'ahena, ma boda matadiya 'ina 'abitohona lamuna 'ihepwaila latuheya, 'igwae, “Bada, nuwanuwagu yabwebwe'ana, 'oinega 'a 'ale'o ya'abitohoya, ma yabwebwe'ana mwayamwayauwa.”

<sup>48</sup> Ma Yesu wahineina 'ihewwaeya, 'igwae, “Natugu, 'ino hemisa 'oinega 'ubwebwe'ana pwaiya, Cutoholo ma'ino yaliyaya 'utauya.”

*Yailo natuna 'amasega Yesu 'i'abihe toholoya*

*(Madiu 9:23-26; Maki 5:35-43)*

<sup>49</sup> Yesu 'abwa 'igwaegwae wahineina 'oina, ma tutaina 'oina Yailo 'ina hadega 'ina topaihowa 'aigeda wasa 'i'eweyama Yailo 'oina, 'igwaeya, “Taubada, natuu yawasina 'igumwala pwaiya, ma sahena tohe'itaina 'ina tuta wete 'uuleule.”

<sup>50</sup> Wasaina bewa Yesu 'ihesagoheya ma Yailo 'ihewwaeya, 'igwae, “Sahena 'u'ate'ateyoho. Ma hesi 'uhemisaegau 'abehega natuu nata 'ibwebwe'ana.” <sup>51</sup> Coinega sitauya ma 'asai sihapwesa, ma Yesu boda mabwaiyadi 'i'ausidiya ma sahena hadaina 'oina siluhuluhu, tuwa beno nuwanuwana Pita ta Yoni ta Yemesa, ma wete gwamaina tamana ta sinana mahetenao siluhu.

<sup>52</sup> Ma boda hadai 'abwa tuwa sidoudou ta wete siwuiwui gwamaina weyahina. Coinega Yesu 'i'ausidiya 'igwae, “Tuwa! Dou walolagu! Weyahina gwama geya 'i'amasu, ma hesi tuwa 'i'enosineya.”

<sup>53</sup> Ma mabwaiyadi Yesu simaluweya, weyahina sisanapuya 'abehega 'i'amasu pwaiya.



<sup>54</sup> Coinega Yesu gwama nimana 'i'abiyahiya ma 'ihewawaeya, 'igwae, “Gwamasine, 'utoholo.” <sup>55</sup> Ta gwama dumwaluna yawasina 'ihilama ma 'itoholowa. Ma Yesu gwamaina sinana ma tamana 'oidiya 'igwaeya, “Ce'ahai wa'ebwae ma 'i'ai.” <sup>56</sup> Nage 'oina tamana ma sinana nuwadi 'ihenainaida moisa. Ma Yesu wete 'ihenuwa laguwediya 'igwae, “Sahena 'aigeda taiya 'oina wahehepwaila 'igu paihowa bewa weyahina.”

## 9

*Yesu 'ana tomuliyao 'ihewasediya sabi paihowa  
(Madiu 10:5-15; Maki 6:7-13)*

<sup>1</sup> Ta Yesu 'ina topaihowao site tuwelo 'ibwau 'autedima, 'adi lolina ma waiwai 'i'ebwaediya, sawasawahidi hi'ahi'a tomota 'oidiyega siula latuhedi, ma wete 'adi lohalao si'abihe bwebwe'enedi. <sup>2</sup> Coinega 'ihewasediya ma 'abehega Yehoba 'ina hetoloina tomota 'oidiya siguguyae, ma wete lohalao si'abihe bwebwe'enedi. <sup>3</sup> Ma wete 'ina guguya 'oina 'iloinaediya, 'igwae, “Sahena 'aigeda to'aha wa'ewa'ewa. Sahena guna bo peha bo 'e'ahai bo mane, bo 'ami 'wama 'eluwa. <sup>4</sup> Ma 'eguma to hada 'oina sibwauwegomi ma waluhuluhu, hadaina 'oina wahetaumana ma 'ana siga tupwaina wa'ebesine. <sup>5</sup> Ma 'eguma to 'asa 'oina geya sitoegemi 'idi hada 'oidiya, gogoina namonamoina 'ahemiyega walohutuhutu yahuledi ma wa'ebesinedi, ma 'oinega wahe'itadi 'abehega nata mwau 'oidiya 'ilatu.”

<sup>6</sup> Ma 'oinega topaihowaedi sitauya, ta tupwa mabwaiyana 'oidiya sisakowasiya ma tetela bwebwe'ana siloguguyae, ma wete tohalalao tupwa 'aigeda 'aigeda 'oidiya si'abihe bwebwe'enediya.

*Helodi nuwana 'ihenainaida Yesu weyahina  
(Madiu 14:1-12; Maki 6:14-29)*

<sup>7</sup> Ma hesi Helodi, tauna Galili 'ana tololina, ginauledi bewa silatulatu tetelidi 'ih-esagohediya, ta nuwana 'ihenainaida madouna weyahina tupwadi tomota sigwaeya, “Yoni to'abihehabitaiso 'abehega 'amasega 'itoholo hila,” <sup>8</sup> ma tupwadi sigwaeya, “Bo nuwana Ilaitiya 'ilatuma,” ma wete tupwadi sigwaeya, 'abehega “Tauna 'aigeda palopita miyamiyaina 'i'amasana ta tuta bewa 'itoholo hilama.” <sup>9</sup> Ma Helodi hesi 'igwaeya, “Yoni taugu 'igu loinega ta 'ani'ona si'upweya. Ma to loheya hede beno sigwaegwaene.” Nage 'oina Helodi 'itoho waiwai ma 'abehega Yesu 'iloba.

*Yesu tomota baibaiwadi 'ihe'aidiya  
(Madiu 14:13-21; Maki 6:30-44; Yoni 6:1-14)*

<sup>10</sup> Ma Yesu 'ina topaihowaowedi 'idi sakowasiyega sihilama, ta 'idi paihowa mabwaiyana sihe'ote'oteteliya Yesu 'oina. Ta muliyetega 'idi badaina 'itoediya, ta ba'idanao sitauya 'aigeda gogo sanina Bedeseida 'oina, ma 'abehega siboidimo nobwa simiyamiya. <sup>11</sup> Ma geya sowasawahidi, weyahina boda wasa sihesagoheya, ma Yesuina simulimuliyeya ta sinaoma 'oina. Coinega Yesu 'oidiya 'itagwala ma Yehoba 'ina lolina weyahina 'ihe'itediya, ma wete 'adi lohalao 'i'abihe bwebwe'enedi.

<sup>12</sup> Simiyamiya ta sinala 'isopuwa ma sitetuwelowedi sinaoma ma Yesu sihegwaeya, sigwae, “Bada, boda bewa 'uhesumanedi ma sihila gogo deidiya, ma nobwa 'e'ahai ma 'ebe'eno sibesa, ma 'oidiya si'aiyawasi. Weyahina bewa 'ebwa yoho 'awawa.”

<sup>13</sup> Coinega Yesu 'oidiya 'igwaeya, “Togidega, 'omi nata geya wahehe'aidi, 'awa?” Ma taudi sigwaeya, “Togidega nata 'ahe'ai 'esedi? Weyahina 'ama geya baibaiwanamo. Beledi nima ma silahana luwa situpwa. Togidega, nuwanuwau 'abehega 'atau ma bodaedi 'adi 'agimwane?”

<sup>14</sup> Ma bodaedi 'oidiyega loheloheyamo 'adi baibaiwa gide paibi tausani. Coinega Yesu 'ana tomuliyao 'ihewawaediya, 'igwae, “Tomotaedi wawatahidi ma 'idi boda 'oidiyega walagudi, gide tomota pipiti boda 'aigeda 'aigeda 'oidiya, ma gide simiyatoi 'esa.” <sup>15</sup> Ma 'ina lolinaina mabwaiyana gide sipaihoweya ta simiyatoiya 'idi boda 'oidiya.

<sup>16</sup> Coinega Yesu beledi nima ma wete silahana 'eluwa 'i'ewediya, ma galewa 'i'ita haneya, ta 'e'ahaiyedi weyahidi 'igwae helauwa. Ma muliyetega 'ihisidiya ma 'ana tomuliyao 'i'ebwaediya ma siheguyai tomota 'oidiya. <sup>17</sup> Coinega mabwaiyadi si'aiya ta simwauwuwa, ma 'e'ahai tupwatupwadi sihegogonediya, ta boha tuwelo silohemahediya.

*Pita 'ina hepwaile 'abehega Yesu tauna To'abihetenaina  
(Madiu 16:13-19; Maki 8:27-29)*

<sup>18</sup> Ta Yesu ma'ana tomuliyao sitauya, ma muliyetega Yesu 'iboi 'imiyamiya, ma Yehoba 'oina 'i'ahwa'ahwanoi. Ma 'ina 'ahwanoi 'igumwala ta 'ana tomuliyao 'ihesilala 'oidiya, 'igwae, "To'aha tomota 'idi gwae weyahigu, 'abehega taiya taugu?"

<sup>19</sup> Ma taudi sigwaeya, "Tomota tupwadi sigwae 'abehega 'owa Yoni to'abihehabitaiso, ma tupwadi sigwae 'abehega 'owa Ilaitiya, ma tupwadi sigwae 'abehega 'owa 'aigeda palopita nugenugetana 'amasega 'utoholo hilama."

<sup>20</sup> Coinega wete 'ihesilalediya, 'igwae, "Ma 'omi togidega 'imi nuwatuhu 'abehega taiya taugu?"

Ta Pita 'igwae, "Cowa To'abihetena, Yehoba 'oinega."

<sup>21</sup> Nage 'oina Yesu 'ana tomuliyao 'iloina pa'alediya ma sahena sihehepwaile tomota 'oidiya. <sup>22</sup> Ta wete 'ihewgaediya, 'igwae, "Taugu Loheyaiguina ma 'abwa muya madouna yaloba. Weyahina babadao ma topwaoli madoudi ma wete loina 'ana tohe'itao nata sigupailegau ma silohe'amasigau, ma sabwelo hetoina 'oina Yehoba 'i'abihetoholo hilegau."

*Yesu 'ana muliya weyahina  
(Madiu 16:20-28; Maki 8:30; 9:1)*

<sup>23</sup> Muliyetega mabwaiyadi 'oidiya 'igwae, "Ceguma taiya 'owa nuwanuwau ma 'u-muliyegau, sahena 'uboi weyahiu 'unuwanuwatuhu. Ma hesi 'uboi 'a kelose 'u'ahali sabwelo 'aigeda 'aigeda ma 'oinega 'umuliyegau. <sup>24</sup> Ma 'eguma taiya yawasina 'inuwahi 'abwa yawasina 'ihe'waihi. Ma 'eguma taiya yawasina weyahigu 'itagwale ma 'i'amasa, tauna 'abwa yawasina 'ausalana 'iloba. <sup>25</sup> Ceguma 'ida wasawasao madou hedada talobadi beno ginaula bwagabwaga, ma hesi ginaula madouna beno yawasida bwebwe'ana. Weyahina 'eguma yawasida bwebwe'ana tahe'waihi, beno mwau hedada.

<sup>26</sup> Taugu Loheyaiguina, ma 'eguma taiya 'owa weyahigu 'udebamwadina ma wete 'igu he'ita weyahina 'udebamwadina ma 'uuhalegau, 'abwa yauhalego tutaina 'eguma yahilama ma'agu hepwaile ta ma'igu 'asilalaina, ta wete Tamagu ma'ina aneloseyao 'idi 'asilalaina 'oiguwa. <sup>27</sup> Yagwae moisa 'oimiya 'abehega tomota tupwami geya'abwa wa'ama'amasa ta 'ana siga Yehoba 'ina hetoloina matamiya wa'ita."

*Yesu 'ana 'ita 'ibuiya  
(Madiu 17:1-8; Maki 9:2-8)*

<sup>28</sup> Gwaeyedi bewa sigumwala ma gide wiki 'aigeda mulina, Pita ta Yoni ta wete Yemesa Yesu 'itoediya, ma mahetenao sihaneya 'aigeda 'oya 'oina sabi 'ahwanoi Yehoba 'oina. <sup>29</sup> Ma 'abwa tuwa Yesu 'i'ahwa'ahwanoi, ma manina 'ana 'ita 'ibuiya ta wete 'ana 'ale'o wa'ewa'e'ena moisa. <sup>30</sup> Nage 'oina loheya 'eluwa silatuwa, ma Yesu mahetediu sihehegwaegwae, taudi beno Mosese ma Ilaitiya. <sup>31</sup> Taudi wete 'oidiyega 'asilala 'i'asi'asilala, ma Yesu mahetediu sihehegwaegwae Yesuina 'ina 'amasa 'abwa Yelusalema 'oina weyahina.

<sup>32</sup> Ta Pita ma'iyanao si'enosinediya, ma 'oinega si'eno toholowa, ma 'asilala madouna si'iteya 'isae Yesu ma'iyanao 'oidiya. <sup>33</sup> Nata ma siteluwaedi Yesu si'ebe sine, ma Pita 'i'apulagata ma 'igwae, "Bada, bwebwe'ana 'eguma taudi siteluwaedi mahetedai 'abwa tamiyamiya, ma 'oinega 'imi yoheyohe 'etoi 'a'abidi, 'aigeda 'owa weyahiu, ma 'aigeda Mosese weyahina ma wete 'aigeda Ilaitiya weyahina." Beno Pita tuwa 'igwaegwae bwagabwaga.

<sup>34</sup> Pita 'ina gwae 'abwa geya 'ilosalohi, ta tabwanidiya yalowa 'isuluma ta 'i'ahuhe taluhidiya, 'oinega sitetoyedi simatauta. <sup>35</sup> Ma yaloha 'oinega 'enana sihesagoheya,

'igwae, “Bewa Natugu bwebwe'ana hedada, 'ina gwae wahesagohedi.” <sup>36</sup> Ma 'enanaina 'igumwala ta Yesu 'iboinamo si'iteya 'itotoholo. Saugaina nage 'oina to'aha gidemusa matadiya si'iteya geya 'eta taiya 'oina sihepwaile, ma sidahweya.

*Yesu gwama 'i'abihe bwebwe'aneya*  
(Madiu 17:14-18; Maki 9:14-27)

<sup>37</sup> Gona 'i'adaleya ta Yesu ma'ana tomuliyao 'oyega sisuluma 'asai, ma boda madouna mahetediyao sihelobaloba. <sup>38</sup> Ma 'aigeda loheya bodaedi 'oidiyega Yesu 'i'iteya ta 'iwuiya, 'igwae, “Tohe'ita, nuwanuwagu ma natugu 'u'abihe bwebwe'ane, tauna natugu 'aigeda tuwamo. <sup>39</sup> Ma tuta baibaiwana 'eguma hi'ahi'a gwamaina 'i'abiyahiya, natuguina 'iwuiwui madouna ma 'ihehebwsubwasumo, weyahina 'itaitai ma 'ahwanega gwalabuso silatulatu. Tuta baibaiwana gidemusa 'i'abi'abi hemuyamuya. <sup>40</sup> Ma 'a tomuliyaeidi ya'ahwanoyediya ma 'abehega hi'ahi'aina siulalatuhe, ma geya sowa-sawahidi.”

<sup>41</sup> Coinega Yesu 'oidiya 'igwaeya, “Mehau 'omi hede togidega? Ta debami pa'ala hedada! Nuwana geya wahemisaegau, 'awa? Cimi debapa'alina 'oinega yalowahi'wata.” Coinega loheyaina 'ihewgaeya, 'igwae, “Natuina 'u'eweyama 'oiguwa.” <sup>42</sup> Ma gwamaina 'inaoma Yesu 'oina, ta hi'ahi'a gwamaina 'i'ulasuluheya bale'uwa ta 'itaiya, 'oinega Yesu 'iloina ma yaluyaluwaina 'ilatuwa ma gwamaina 'ibwebwe'ana. Ta muliyetega Yesu gwamaina 'itoeya tamana 'oina.

*Yesu 'igwaehila 'ina 'amasa weyahina*  
(Madiu 17:22-23; Maki 9:30-32)

<sup>43</sup> Tuta nage 'oina tomota mabwaiyadi Yehoba 'ina waiwai si'iteya, 'oinega nuwadi 'ihenainaida madouna. Ma tomotaedi 'abwa sihehenainaida 'ina pailhowa weyahina, ma Yesu 'ana tomuliyao 'ihewgaedi, <sup>44</sup> 'igwaeya, “Cigu gwae bewa nata yahepwaile 'oimiya wanuwatuhuyahi bwaibwaini, beno taugu Loheyaiguina 'i'iunamo ma sitebae ma 'agu 'alehao 'oidiya si'ebwayaegau.”

<sup>45</sup> Nage 'oina 'i'abi he'wani bwaibwainidiya, 'oinega geya sowasowahina ma ginaula bewa weyahidi nuwadi 'isabwalena, ma Yesu 'oina geya sihesilala ma 'abehega 'ida he'itae 'oidiya, weyahina simatauta.

*Tonugeta taudi tomuliya*  
(Madiu 18:1-5; Maki 9:33-37)

<sup>46</sup> Ta muliyetega 'ana tomuliyaoewedi sihe'ohe'oheya 'abehega taiya 'oidiyega 'adi tohanugeta.

<sup>47</sup> Ma Yesu hesi 'idi nuwatuhu 'isanapudiya. Coinega gwama 'aigeda 'itoeyama ta deina 'ihetoholoya, <sup>48</sup> ma 'ihewgaediya, “Gwama bewa wa'ita. Ceguma taiya 'owa gwama bewa weyahigu 'uhelauwe, 'owa beno 'uhelau pwaigauwa, ma wete 'agu Tohewasaina 'uhelau pwaiyeya. Coinega 'eguma taiya 'oimiyega sanina geya madouna tauna 'ihane hedadeya.”

*Ceguma taiya tauna geya 'ilolo'alehegita tauna 'i'abi'abihetegita*  
(Maki 9:38-40)

<sup>49</sup> Ma Yoni 'i'apulagata ma 'igwaeya, “Bada, 'aigeda loheya 'a'iteya ta saniuwega hi'ahi'a 'i'ulaula hapwesedi. Eeta 'a'ausiya, weyahina loheyaina geya 'ida boda.”

<sup>50</sup> Ma Yesu 'igwaeya, “Sahena wa'au'ausi! Weyahina 'eguma taiya tauna geya 'ilolo'alehegomi tauna 'ami to'abihetena.”

*MeSameliya tupwadi Yesu silogwahateya*

<sup>51</sup> Sabweloina 'ihahohoyama ta Yesu 'ihila galewa, 'oinega 'ina nuwatuhu 'ilaguya ma 'abehega 'itautau Yelusalema. Coinega 'itoholo ma ma'ana tomuliyao sitauya. <sup>52</sup> Sitautauya, ma Yesu 'ana tomuliyao tupwadi 'ihewasa nugetediya, meSameliya 'idi gogowa, ma 'abehega 'ebe'aiyawasi weyahina si'atububu. <sup>53</sup> Ma hesi tomiya 'asaedi geya

'oidiya sitagwatagwala, weyahina sinuwatuhuya Yesu geya 'idi gogo 'oina 'itautauya, ma hesi 'itautauya Yelusalema.

<sup>54</sup> Yemesa ta Yoni gwae bewa sihesagoheya, ta Yesu 'oina sigwaeya, “Bada, togidega? Sowasowahina taloina ma 'aiwe 'ala'alata galewega 'isuluma 'i'alahe gumwalidi?”

<sup>55</sup> Ma Yesu 'igwaeya, “Tuwa! Sahena gide.” <sup>56</sup> Ma 'oinega hali gogowa sitauya.

*Loheloheya sitetoi nuwanuwadi ma 'abehega Yesu simuliye*

*(Madiu 8:19-22)*

<sup>57</sup> Sitautauya, ta 'aigeda loheya 'inaoma ma Yesu 'oina 'igwaeya, “Taugu nuwanuwagu ma yamuliyego. To tupwa 'oina 'utautauya yamuliyego.” <sup>58</sup> Coinega Yesu loheyaina 'ihewgaeya, 'igwae, “Cedewa totopwatula ma'idi gaula ma wete kwasumo ma'idi nehwa, ma taugu Loheyaiguina geya 'igu 'ebe'enomo.”

<sup>59</sup> Coinega heluwena wete 'inaoma ma Yesu loheyaina 'oina 'igwaeya, “Cumuliyegau.” Ma tauna 'igwaeya, “Bada, 'utagwalegau ma nugeta yahila, ma tamagu yayamwa 'ina 'amasa weyahina, yagalihe, ma muliyetega yamuliyego.” <sup>60</sup> Ma Yesu 'igwaeya, “Tuwa nobwa tamauina, ma taudi to'amasa 'idi to'amasa sigalihedi. Ma 'owa hesi 'ino paihowa 'abehega 'uhetohalewasa Yehoba 'ina 'ebeloina weyahina.”

<sup>61</sup> Ma hetoina wete 'inaoma ta 'igwaeya, “Bada bwebwe'ana ma yamuliyego, ta 'utagwalegau ma nugeta yahila ma 'igu susuwao yahelauwedi, ma muliyetega yamuliyego.” <sup>62</sup> Coinega Yesu wete 'ihewgaeya, 'igwae, “Ceguma taiya 'owa nuwanuwau ma 'upaihowa ta ma'ino henuwanaluwa, geya 'a lobwaina ma Yehoba 'ina 'ebeloina weyahina 'upaihowa.”

## 10

*Tomuliyao mabwaiyadi 'ihesumanediya*

<sup>1</sup> Tuta nage mulina, tupwadi wete 'ana tomuliyao 'ihesinuwediya, sebeniti 'adi baibaiwa, ma 'eluwa 'eluwa 'ihesumane nugetediya gogo baibaiwadi 'oidiya, ma 'ane toni'asa si'atububudi Yesu 'ina tauyama 'oidiya weyahina.

<sup>2</sup> Ma 'ihewgaediya, 'igwae, “Celi'eli bwebwe'ana ma to'eli'eli 'omi tupwamimo, 'oinega toni tanoha 'oina wa'ahwa'ahwanoi ma 'ane topaihowao wete 'ihesumanedi 'ina tanoha sabi 'elina. <sup>3</sup> Sauga bewa yahesumanegomi, watauya gide sipi manamanasamina 'edewa lolosasaidi gamwagamwanidiya.

<sup>4</sup> “Sahena mane wa'ewa'ewa, sahena 'e'ahai mabohaidi, sahena 'ami butu wa'ewa'ewadi. Ma 'eguma 'edai watautau sahena tomota mahetemiya wahehewgaewae.

<sup>5</sup> “Ma 'eguma 'aigeda hada 'oina waluhu, nugeta wahehewgaedi, wagwae, ‘Daumwala 'oimiya.’ <sup>6</sup> Ma 'eguma nuwadaumwala 'ana topaihowao simiyamiya, 'imi helauina 'oidiya 'ida miyamiya. Ma 'eguma geya, tuwa helauina 'ihilawa 'oimiya.

<sup>7</sup> “Ma 'eguma hadaina 'oina wamiyamiya, ma to'aha 'ami, nuwana 'ami we'aha matamiya silagu tuwa wa'ai, weyahina topaihowao 'ilobwainediya ma 'adi 'iluwana siloba. Ma sahena watautau hali hada 'oidiya, ma hesi hadaina 'oina waluhu nugeta 'oina tuwa wamiyamiya.

<sup>8</sup> “Ma 'eguma to 'asa 'oina si'ahesohetegomiya ma 'oidiya waluhuwa, ma to'aha matamiya silagu latuheya, tuwa wa'ai. <sup>9</sup> Ma wete gogoina 'oina wamiyamiya 'idi tolohalao wa'abihe bwebwe'enedi, ma wete toni 'asa wahehewgaedi, wagwae, ‘Yehoba 'ina loina 'i'iunamo ma 'ilatu 'oimiya.’ <sup>10</sup> Ma 'eguma to 'asa 'oina walatu ma silogwahategomi, mulimuliya 'eda 'oidiya wahahila ma wahehewgaedi, wagwae, <sup>11</sup> ‘Wa'ita, 'imi gogo nenegwalina 'ahemega 'alohutuhutu yahule, ma wasanapu 'abehega Yehoba 'ina loina deimiya 'imiyamiya!’ <sup>12</sup> Yagwae moisa 'oimiya, 'abwa bwa'omatana 'ana tuta 'oina taudi gogowedi silogwahategomiya loina madou hedadena siloba, ma geya gide meSodoma 'adi loina.”

*Gogo tupwana 'oidiya Yesu geya sihemise*

*(Madiu 11:2-24)*

<sup>13</sup> Coinega tupwaedi 'ana tomiyao 'ihewaediya, 'igwae, “MeKolesini ta meBedeseida 'atemuyamuyaimi. Weyahina 'igu paihowa 'ebe henainaidaedi yapaihowa pwaidiya matamiya ma hesi geya wanuwabui, ma hesi 'eguma meTaiya ta meSaidoni 'oidiya yada paihowediya, beno mwalohene sida nuwabui pwaiya, ma sibauwa 'adi 'ale'owega sida 'otedi ta giba 'oidiyega sida gibediya, ta sihe'itaedi 'abehega mumuga galana 'oidiyega sinuwabui pwaiya. <sup>14</sup> Ma 'omi hesi geya uleulena. Coinega bwa'omatana 'ana sabweloina 'oina Yehoba 'abwa meTaiya ta meSaidoni 'i'atemuyamuyaedi, ma 'omi geya. <sup>15</sup> Ma meKapaneumi 'omi togidega, 'abehega wa'abilagasigomi galewa, 'awa? Nata geya! Ma hesi nata siulasuluhegomi Bwebweso 'oina.”

<sup>16</sup> Ta 'ana tomuliyaowedi 'oidiya 'igwaeya, “Ceguma taiya 'imi gwae 'ihesagohedi, beno taugu 'igu gwae 'ihesagoheya. Ma 'eguma taiya 'ilogwahategomi taugu wete 'ilogwahategauwa. Ma wete 'agu Tohewasaina 'ilogwahateya.”

*Tomuliyaowedi mabwaiyadi 'idi paihowega sihila pwaima*

<sup>17</sup> Ma 'ana tomuliyaowedi site sebeniti 'idi paihowega sihilama, ta ma'idi yaliyaya Yesu 'oina sihe'ote'otetela, sigwaeya, “Bada, 'eguma welabanao bo hi'ahi'a saniuwega 'aloinaediya, ta sihapwesa.”

<sup>18</sup> Ma Yesu 'oidiya 'igwaeya, “Tomudulele ya'iteya galewega 'isulusuluma gide tuwa namala 'ina pili. <sup>19</sup> Coinega wasanapu 'abehega ya'abihewaiwai pwaigomiya ma 'oinaga sowasowahimi wahewaiwai 'ada 'alehaina 'ina paihowa mabwaiyana 'oidiya, ma 'eguma mwata bo ganohana wabasa yahidi, sahena wamatamatauta, weyahina gesowana to'aha si'abihe galegomi.” <sup>20</sup> Ta wete 'ihewaediya, “Moisa 'imi paihowa hi'ahi'a 'oidiya waiwaina, ta weyahina wayaliyaya, ma beno geya ginaula madouna, ma hesi 'imi 'ebeyaliyaya madouna 'eguma sanimi galewa silele pwaidiya.”

*Yesu 'ina yaliyaya*

*(Madiu 11:25-27; 13:16-17)*

<sup>21</sup> Tuta nage 'oina Yaluyaluwa Tabuna Yesu 'i'abihe yaliyayaeya, ta 'igwaeya, “Yauwedo Tamagu, 'owa galewa ta bale'u 'adi Toloina, nuwasabwalena bewa 'udahweya tosonogao ma tonuwasabwalena 'oidiyega, ma hesi gwagwama 'i'iudi 'oidiya 'uhe'itaeya. Moisa Tamagu, 'ino nuwatuwu bwebwe'ana bewa.” <sup>22</sup> Nage tutaina 'oina wete 'igwaeya, “Gin-aula mabwaiyadi Tamagu nimaguwa 'ilagudiya, ma Tamagu 'iboimo 'isanapugauwa, ma Taugu wete yaboimo Tamagu yasanapuya, ma wete taiyewedi taudi 'eguma nuwanuwagu ma Tamagu yahe'itae 'oidiya, taudi wete sida sanapu.”

<sup>23</sup> Coinega Yesu 'ilo'ita lohihila 'ana tomuliyao 'oidiya ma 'ihewaediya, 'igwae, “Comi ma'imi yaliyaya, weyahina ginaulaedi matamiyega wa'ita'ita. <sup>24</sup> Yagwae moisa 'oimiya 'abehega mwalo palopitao ta toloinao baibaiwadi nuwanuwadi ma ginaulaedi si'itadi, ma hesi geya si'ita'ita, ta wete gwaeyedi wahesagohediya taudi wete nuwanuwadi ma 'abehega sihesagohedi, ta geya sida hesagohediya.”

*Gwae hegehegedi gwama Sameliya 'aigeda weyahina*

<sup>25</sup> Ma 'aigeda loina 'ana tohanugeta 'itayama ma Yesu 'oina 'ihesilala sabi tohona, 'igwaeya, “Bada, to'aha yapaihowa ma yawasigu hataya yada loba?” <sup>26</sup> Coinega Yesu 'igwaeya, “Loinaedi Mosese 'ilelediya Buki He'asisi 'oina, 'usanapu pwaidiya, 'awa?” <sup>27</sup> Ma loheyaina 'igwaeya, “Cehe, loina bewa gidemusa, 'Cino Bada Yehoba 'uda helauwe 'ateu ta yaluyaluwau ta 'ino waiwai ta 'ino nuwatuwu mabwaiyadi 'oidiyega. Ma wete 'iyamwao 'uda helauwedi gidemusa 'uboi 'uhelauwego.” <sup>28</sup> Coinega Yesu 'igwaeya, “Beno gwae moisa, 'oinaga gide 'uda paihowa 'ese ma yawasiu hataya 'uda loba.”

<sup>29</sup> Ma loheyaina 'ina nuwatuwu 'abehega tauna todumwalu, 'oinaga Yesu wete 'oina 'ihesilala hila, “Taiya hede 'iyagu?”

<sup>30</sup> Coinega Yesu gwae hegehegediyega loheyaina 'ihewaeya, 'igwae, “Caigeda loheya Yelusalemega 'itoholowa ma 'itautauya Yeliko, ta 'edai toyagaha 'ilobediya ma



si'abiyahiya, 'ana 'ale'o si'igalidiya ta sihunu geyogeyoiya, 'i'iunamo 'i'amasa, ma si'ebesineya ma sitauya.

<sup>31</sup> Sitauya, ma loheyaina 'i'eno'eno eeta 'aigeda topwaoli 'ihapwesama, ma tohesilaeina 'i'iteya, ma 'inaowa ma 'eda papalinega 'itauya. <sup>32</sup> Ta wete gide topwaoli 'adi tolema 'aigeda 'itauyama, ta loheyaina 'i'iteya, ta wete 'i'e'ebubuyamo ma 'i'ebesineya.

<sup>33</sup> Ma muliyetega 'aigeda gwama Sameliya 'ihapwesama, ma loheyaina 'i'iteya ta 'i'atemuyamuyaeya. <sup>34</sup> Coinega deina 'inaowa, ma holowa ta waini 'ilagu latuhediya, ma 'ana hesilaeyedi 'oidiya 'isiwediya ma 'ipaidiya, ta muliyega 'ina hebai 'oina 'ido'oya ma ba'idana sitauya 'aigeda hada taumana 'oina ta nobwa 'i'itayahiya. <sup>35</sup> Gona 'i'adaleya, ma kina 'eluwa 'i'ewediya ma hadaina 'ana to'itayahina 'i'ebwaeya, ta 'ihegwaeya, 'Tohesilae bewa 'u'itayahi weyahigu, ma 'eguma 'ehisa wete mane 'ulaguya weyahina, taugu yahilama yagihedumwalu 'oiuwa.' ”

<sup>36</sup> Coinega Yesu loheyaina 'ihesilaleya 'igwae, “Taiya tohesilaeina 'iyana sitetoyedi 'oidiyega?” <sup>37</sup> Ma loheyaina 'igwaeya, “Tauna 'ana tohelauina.” Coinega Yesu 'igwaeya, “Beno gwae moisa, 'utauya ma gidemusa 'upaihowa 'esa.”

#### *Yesu 'ina habo'e Meli ta Malida 'oidiya*

<sup>38</sup> Ma Yesu ma'ana tomuliyao sitauya ta silatuwa 'aigeda tupwa 'oina, ma wahine 'aigeda, sanina Malida 'itoeya 'ina hada. <sup>39</sup> Ma wahineina tasina wete 'imiyamiya, sanina Meli, ma Meliina 'inaoma ta Yesu deina 'imiyatoiya, ma 'ina gwae sabi hesagohena. <sup>40</sup> Ma Malida 'i'e'uleya ta 'ina paihowa baibaiwana. Coinega Malida 'inaoma Yesu 'oina ma 'igwaeya, “Bada togidega ma tasigu ba'idau wamiyamiya, ma geya 'ida lemegauwa? Sowasowahina 'uhegwae ma 'i'abihetega 'awa?”

<sup>41</sup> Ta Yesu 'igwaeya, “Malida, togidega ma ginaula mabwaiyana weyahidi 'unuwanuwatuhu, <sup>42</sup> ma hesi 'aigedamo ginaula madouna weyahina 'unuwatuhu, gidemusa tasiu Meli 'ina hesinuwa. Meli nuwanuwana ma 'igu gwae 'ida hesagohedi, 'oinega geya sowahina 'aigeda taiya 'i'ausi.”

## 11

#### *Yesu 'ina he'ita 'ahwanoi weyahina*

*(Madiu 6:9-13; 7:7-11)*

<sup>1</sup> Caigeda tuta Yesu 'iboinamo tupwa 'aigeda 'oina 'i'ahwa'ahwanoi. Cina 'ahwanoi mulina 'ana tomuliyao 'aigeda 'ihewgaeya, 'igwae, “Bada, 'ahwanoi 'uhe'itemai, gidemusa Yoni 'ana tomuliyao 'ahwanoi 'ihe'ita 'esediya.” <sup>2</sup> Coinega Yesu 'oidiya 'igwaeya, “Bewa gide wa'ahwanoi 'esa, wagwae:

Tamama, saniu 'ahe'asisiyane. Ca'ahwanoi 'oiuwa ma 'ane 'uloinemai. <sup>3</sup> Cama sabwelo 'aigeda 'aigeda nata 'u'ebwaemai. <sup>4</sup> Ta 'ima mumuga galadi 'unuwasamudi weyahina 'iyamayao 'idi puiyao 'oima 'anuwasamudi. Ma hesi sahena 'utohotohomai.”

<sup>5</sup> Ma Yesu wete 'oidiya 'igwaeya, “Cahwanoi 'ana sanapu bewa gidemusa. Ceguma taiya 'owa 'aigeda 'a taumana hinuwana gamwana 'itauyawa 'oiuwa, ma geya 'aigeda to'aha 'oiuwa ma 'u'ebwae 'ana lohepa'ala weyahina, 'oinega 'ilobwainegowa ma 'iyau 'aigeda 'oina 'utauya ma 'u'ahwanoi, ma 'ugwae, 'Ciyagu, sowasowahina ma 'ulemegau ma beledi 'etoi 'u'ebwaega, <sup>6</sup> weyahina 'aigeda 'iyagu nige 'eda dudulenege 'itauyama, ma geya 'eta to'aha 'oiguwa ma 'ida lohepa'ala.’ <sup>7</sup> Ma 'eguma loheyaina hada 'alonga 'ino gwae 'ihemaiseyawa ma 'igwae, 'Ciyagu, sahena wahi'wata'wata 'ulagulagu weyahina manatugwao 'a'eno'eno, ma wete 'ahwa'eda ya'ausiya, 'oinega geya sowasowahina yalemego.’ <sup>8</sup> Ma 'eguma 'ihagagala 'oiuwa tuwa 'u'ala'ohe'ohe, ma 'oinega 'ida 'enotoholo, ma to'aha 'ino 'ahwanoi gidemusa 'i'ebwaego. <sup>9</sup> Coinega yahepwaila 'oimiya, wa'ahwanoi ma nata Yehoba 'i'ebwaegomi. Wete wa'ebesa ma nata waloba, ma wete wa'etunatuna ma 'oinega 'ahwa'eda 'iso'e weyahimi. <sup>10</sup> Weyahina 'eguma ta'ahwanoi



Yehoba 'i'ebwaya 'oida, ma wete 'eguma ta'ebesa wete nata taloba, ma wete 'eguma ta'etunatuna, 'oinega 'ahwa'eda 'ida so'e.

<sup>11</sup> Ma togidega 'omi gwagwama tamadiyao, 'eguma natumiyao silahana weyahina si'ahwanoi, mwata wa'ebwaedi? <sup>12</sup> Nuwana pou weyahina si'ahwanoi ganihana wa'ebwaedi? Geya bo? <sup>13</sup> Moisa, 'omi togala ma 'imi 'ebwaya natumiyao 'oidiya wasanasanapu 'abehega ginaula bwebwe'ana wa'ebwa'ebwaedi. Gide wete Tamamiu galewa 'ina 'ebwaya 'oimiya bwebwe'ana hedada, ma 'eguma wa'ahwanoi 'oina, nata Yaluyaluwa Tabuna 'i'ebwaegomi.”

*Taiya 'ina waiwaiyega Yesu hi'ahi'a 'iula latuhediya  
(Madiu 12:22-30; Maki 3:20-27)*

<sup>14</sup> Ma tutaina Yesu loheya 'aigeda 'ilobeya, tauna hi'ahi'a 'ina paihowega memenana 'ilidowa ma geya 'ida gwaeya, 'oinega Yesu hi'ahi'aina 'iula latuheya, eeta loheyaina 'ibwebwe'ana ma 'igwaeya. Nage 'oina tomota si'iteya ma nuwadi 'ihenainaida. <sup>15</sup> Coinega tupwadi sigwae, “Hi'ahi'a 'idi badaina, Tomudulele 'ina waiwaiyega Yesu hi'ahi'aina 'iulalatuheya.” <sup>16</sup> Ma tupwadi wete Yesu sitohoya ma 'abehega 'ila'ilala tupwadi 'ida paihowedi weyahidi, ma sida 'ahwamoisa 'abehega 'ina waiwai Yehoba 'oinega 'itauyama.

<sup>17</sup> Ma Yesu bodaedi 'idi nuwatuhuina 'isanapu pwaiya, ma 'ihewgaediya, 'igwae, “Tomudulele tauna 'iyanao gesowana 'ipa'ipa'idi.” Ma wete 'igwaeya, “Ceguma 'aigeda 'ebeloina 'oina loheloheya siwataha ma siboi silo'aleha, nata 'ebeloinaina 'iwe'a ma 'ibe'u. Ma wete gidemusa 'eguma 'aigeda susu taudimo silo'aleha, nata 'abwa 'idi miya 'igala. <sup>18</sup> Seitani wete gidemusa 'eguma ma'ina bodao siboidimo silo'aleha nata 'ina 'ebeloinaina 'ibe'u. Ma togidega ma wagwae 'abehega Tomudulele 'ina waiwaiyega hi'ahi'a yaula latuhedi, <sup>19</sup> ma taiya hede 'ina waiwaiyega 'omi hi'ahi'a waula latuhedi? Tomudulele 'oinega bo Yehoba 'oinega? Bewa weyahina wanuwatuhu ma wasanapu 'abehega taiya taugu. <sup>20</sup> Ma taugu hesi Yehoba 'ina waiwaiyega hi'ahi'a yaulaula latuhedi, 'oinega wada sanapu 'abehega Yehoba 'ina lona 'ilatu pwaima 'oimiya.

<sup>21</sup> “Seitaniina tauna gide 'aigeda loheya waiwaina, ta ma'ina 'ebe 'aleha 'ina hada madouna 'i'ita'itayahi, ma geya sowana 'aigeda taiya 'ina tobwatobwa 'i'abihegala. <sup>22</sup> Ma 'eguma 'aigeda loheya waiwai hedada 'ihapwesama, nata loheyaina 'ipai ma 'ina 'ebe 'aleha nimanega 'i'ewadi, ma 'ina tobwatobwa mabwaiyadi 'i'ewadi ma 'iyanao 'i'ebwaedi.

<sup>23</sup> “Ceguma taiyawedi taudi geya 'agu to'abihetena, taudi 'agu 'alehao. Ma wete taiyawedi taudi geya ba'idagwao 'ada paihowa hegogona, taudi 'igu paihowa si'abihegaleya.

*Hi'ahi'a 'iluhuwa loheya 'alona  
(Madiu 12:43-45)*

<sup>24</sup> “Ma 'eguma hi'ahi'a loheya 'aigeda 'oinega 'ihapwesa, loheya 'ida bwebwe'ana ma hi'ahi'aina nata tuwa 'atamana 'iyawayawala besobeso ma 'ina 'ebe'aiyawasi 'ibesabesa ma gesowana 'ilobaloba. Coinega hi'ahi'aina 'iboinamo 'igwae, ‘Cana 'ita yahila 'igu 'ebemiya 'oina.’ <sup>25</sup> Coinega 'ihila ma 'ebemiyaina 'iloba hileya 'asi'asilalana ma 'atu'atububuna. <sup>26</sup> Eeta 'itauya ma hi'ahi'a site sebeni galadi moisa wete 'itoedima, ma ba'idanao siluhuwa 'ebemiyaina 'oina, ta nobwa mahetena simiyamiya, 'oinega loheyaina 'ina 'ebemiya si'abihegala bwaibwainiya, mwalo geya gidemusa.”

<sup>27</sup> Gidemusa Yesu 'igwae 'esa boda 'oidiya, ma 'aigeda wahine 'oidiyega 'enana madounega 'iwuiya, ma Yesu 'oina 'igwaeya, “Bada wahineina tauna gamwanega 'ihenatunegowa ma wete susunega 'ususuwa, tauna toyaliyaya moisa.” <sup>28</sup> Ma Yesu wete 'igwaeya, “Taudi hesi 'eguma Yehoba 'ina gwae sihesagohe ma 'ina gwae sihematamatane, taudi toyaliyaya moisa.”

*Yona tauna 'ebe'ita 'aigeda 'oida*  
(Madiu 12:38-42)

<sup>29</sup> Ma bodaedi Yesu sitoholo 'wabu'wabuneya, ma 'i'ahwa lalagata ma 'oidiya 'igwaeya, “Mehau 'omi galami! Beno lamuna 'ila'ilala wa'ebe'ebese, ma sahena hesi 'ila'ilalaeidi wa'ita'itadi. Ma 'iyamo Yona weyahina 'eguma wanuwatuhuyahi, tauna tuwa 'ila'ilalaina weyahimi. <sup>30</sup> Weyahina Yona 'ina paihowa 'oinega meNinibe sisanapuya 'abehega tauna Yehoba 'oinega 'inaoma. Gide wete taugu Loheyaiguina 'igu paihowa 'oidiyega mehau 'omi wada sanapugau 'abehega Yehoba 'oinega yanaoma. <sup>31</sup> Cabwa hesi, sabwelo bwa'omatana 'oina meSiba 'idi kuini 'ida toholo ma mehau 'omi 'ihe'ewegomi, weyahina mwalo hene wahineina bwagebwagega 'inaoma Solomoni 'ina gwae sanasanapuna sabi hesagohena, ma bewa tuwa gwae sanasanapu hedada wahesagohediya, ma genuwami.

<sup>32</sup> Wete gide sabwelo bwa'omatana 'oina meNinibe 'abwa sitoholo ma mehau 'omi sihe'ewegomi, weyahina mwalo hene Yona 'oidiya 'iguguya, ta mumugadi galadiyedi 'oidiyega sinuwabuiya, ma 'omi bewa tuwa guguya bwebwe'ana hedada wahesagohediya, ma geya wanuwabui hila.

*Mayale 'ana gwae hegehegedi*  
(Madiu 5:15; 6:22-23)

<sup>33</sup> Geya 'eta taiya mayale 'igabu ma 'idahwa gaula, nuwana gaeba gabulena, ma hesi 'ebelagu tabwanina 'ilagu ma 'oinega taudi hada 'ana toluhuwao 'i'asilaladi.

<sup>34</sup> “Weyahina matau wahi 'ana 'asilaladi gide, ma 'eguma matau 'asi'asilalaina wahi mabwaiyana wete 'asi'asilalaina. Ma 'eguma matau 'igala wahi mabwaiyana wete 'iguguyou. <sup>35</sup> Coinega 'u'itayahigo tabu ma 'ino 'asilalaina 'iguguyou. <sup>36</sup> Ma 'eguma wahi mabwaiyana 'asilaladi 'oina 'imiyamiya, ma geya 'aigeda wete guguyou 'oina, mabwaiyana tuwa 'asi'asilalaina, gide tuwa 'asilaladi madouna 'ina 'asilaladi.”

*Palisiyao ma loina 'adi tohanugetao Yesu 'iheliyediya*  
(Madiu 23:1-36; Maki 12:38-40)

<sup>37</sup> Yesu 'ina gwae 'igumwala pwaiya, ma 'aigeda Palisi Yesu 'ibwauweya ma mahetena si'ai. Coinega 'iluhuwa ma 'imiyatoiya 'ebe'ai 'oina. <sup>38</sup> Ma Palisiina nuwana 'ihenainaida weyahina Yesu 'i'iteya nimana geya 'ibuyodi ma 'i'aiya. <sup>39</sup> Ma Yesu Palisiina 'ina nuwatuhuna 'isanapu pwaiya, 'oinega 'oina 'igwaeya, “Comi Palisiyao gide tuwa biyo ma gaeba, weyahina gwahumiumo wabuyobuyodi, ma 'alomiya 'imaha moisa yagaha ma mumuga galadi 'oidiyega. <sup>40</sup> Waheyauyauleya! Weyahina geya wasanasanapu 'abehega tauna 'wapimi 'ipaihowediya, 'atemi wete 'ipaihowedi. <sup>41</sup> Ma 'ilobwainegomiya ma 'atemi 'ehe'ehele 'oinega wa'abihe 'asilaladi, ma 'oinega wa'asilaladi bwaibwaina.

<sup>42</sup> “Ma 'omi Palisiyao hesi 'atemuyamuyaimi! Tuwa 'imi helau bwebwe'ana, weyahina helauina 'ana loina mabwaiyana wa'itayahi bwaibwainiya, 'imi tobwatobwa madoudi ma 'i'iudi 'oidiyega tupwana Yehoba wa'ebwa'ebwae, gide hali pam ma hali pam 'oidiyega. Ma hesi loina tuwa madoudi wanuwanaidediya, beno Yehoba 'ana helau ta wete loina dumwadumwaluna. Sowasowana ginaula bewa madoudi wapaihowadi, ma wete sahena ginaula 'i'iudi wanuwanuwa naidedi.

<sup>43</sup> “Comi Palisiyao 'atemuyamuyaimi, weyahina hada tapwalolo 'oidiya nuwanuwami ma 'abehega 'ebemiya bwebwe'ana 'oidiya wamiyatoi, ma wete nuwanuwami ma 'abehega tutaina 'eguma watautau 'asai tomota mabwaiyadi sihe'asisiyegomi.

<sup>44</sup> “Ma hesi tuwa 'atemuyamuyaimi, weyahina 'atemi gide galiha bisubisulidi, tomota 'oidiyega sitautau ma geya sisanasanapu 'abehega galiha.”

<sup>45</sup> Ma 'aigeda loina 'ana tohanugeta Yesu 'ihewaeya, 'igwae, “Bada, 'ino gwaeyedi bewa 'oidiyega 'usinalimaiya, 'awa?”

<sup>46</sup> Ma Yesu 'oina 'igwaeya, “Comi wete loina 'ana tohanugetao 'atemuyamuyaimi, weyahina tomota 'aha'ahala mwaudi wa'ebwa'ebwaedi, ma 'omi geya hesi wada tagwala ma 'aha'ahalaedi 'oidiyega walemedi.

<sup>47</sup> “Catemuyamuyaimi, weyahina tubumiyao mwalo palopitao silohe'amasidiya, ma 'omi palopitaowedi galihidi 'oidiya 'adi 'ebenuwatuhu yahina wa'abi'abidi. <sup>48</sup> Ginaula bewa 'oinega tubumiyao 'idi loina wa'ahwa bwebwe'aneya, beno taudi palopitao silohe'amasidiya, ma 'omi galihidi 'oidiya 'adi 'ebenuwatuhu yahina wa'abi'abidi. <sup>49</sup> Ginaulaedi weyahidi Yehoba 'ina sanapu 'ilaguya, 'igwae, ‘Cabwa tupwadi palopitao ma 'igu tohepwailao yahesumanediwa, ma tupwadi walohe'amasidi ma tupwadi nata wapa'idi.’ <sup>50</sup> Coinega mehau 'omi nata maisa mabwaiyana waloba palopitaowedi bale'u 'ebehagina 'oinega ma nige 'adi lohe'amasa weyahina, <sup>51</sup> beno Ebeli silohe'amasiya ma 'oinega silohe'amasa ma 'ana siga Sakaliya 'ina tuta 'oina silohe'amasiya Hada He'asisi ma 'ebepwaoli gamwagamwanidiya. Moisa tuwa lohe'amasaedi mabwaiyadi 'adi maisa mehau 'omi waloba.

<sup>52</sup> “Comi loina 'ana tohanugetao 'atemuyamuyaimi, weyahina sanapu 'ana 'ahwa'eda wa'ausiya, ma 'omi geya sowasowahimi waluhu, ma taudi wete nuwanuwadi 'abehega siluhu ta 'omi wa'ausidiya.”

<sup>53</sup> Ma tupwainaina nage Yesu 'i'ebesineya, ma muliyetega loina 'ana tohe'itao ta Palisiyao sitohowaiwai hesilala baibaiwadi 'oidiyega, <sup>54</sup> 'abehega togidega ma 'ina gwae pui siloba, ma 'oinega sihe'ewa.

## 12

### *Guguya*

*(Madiu 10:26-31)*

<sup>1</sup> Boda madou hedada si'eto'autama ma sihetupa duidui, ma Yesu 'igwae nugeta 'ana tomuliyao 'oidiya, 'igwaeya, “Wa'ita yahigomi ma Palisiyao 'idi paihowa 'abo'abo sahena wapaipaihowadi, weyahina 'idi paihowa gide tuwa pwalawa 'ana 'ebe'abi heseseha. Cebe'abi hesesehaina 'eguma to'aha gide 'i'iuna, nata 'i'abi hemadou, <sup>2</sup> ma ginaulaedi dahwadahwaidi 'abwa Yehoba 'i'abilatuhedi ma silo'atamanedi. <sup>3</sup> Ma wete to'aha guguyou 'oina wagwaeneya nata sabwelo 'oina tomota sihesagohe. Ma to'aha weyahina wahe'ahwa henahena hada 'alona, nata tomota mabwaiyadi 'oidiya sihepwaila latuhedi.

<sup>4</sup> “Ma 'iyagwao yahegwaeagomi, taudi wahimi silohe'amasi, sahena wamatamatautedi, weyahina taudi wahimimo sowasowahina ma silohe'amasi, ma yaluyaluwami geya. <sup>5</sup> Ma hesi Yehoba wamataute, weyahina tauna ma'ina loina ma 'ilohe'amasa nugetegomi ma muliyetega 'iula suluhegomi 'asa 'ala'alata\* 'oina. Moisa tuwa, 'iboinamo wamataute!

<sup>6</sup> “Hisa gidemusa dinegwa 'adi maisa? Geya madouna, gidemusa toea 'eluwamo ma kwasumo nima 'ai'aigeda 'adi baibaiwa. Ma tuwa Yehoba geya'abwa wete 'aigeda 'oidiyega 'inuwa nuwanaide. <sup>7</sup> Ma 'iyamo geya sowasowahina ma deba wahasili mwagu 'aigeda 'oina, Yehoba 'adi baibaiwa 'isanasanapudi. Coinega sahena wa'ate'ateyoho, weyahina 'omi Yehoba 'ina ginaula madouna, ma dinegwa geya ginaula madouna.

### *Yesu 'ana hemisa ma 'ana uhala weyahina*

*(Madiu 10:32-33; 12:32; 10:19-20)*

<sup>8</sup> “Ma bewa wete wasanapu bwaibwaini: Ceguma taiyawedi weyahigu tomota matadiya sihepwaila, taugu Loheyaiguina nata weyahidi yada hepweila Tamagu 'ina aneloseyao matadiya. <sup>9</sup> Ma 'eguma taiyawedi siuhalegau tomota matadiya, taugu wete 'abwa Yehoba 'ina aneloseyao matadiya yauhalede. <sup>10</sup> Taugu Loheyaiguina, ma 'eguma taiya 'i'ahwa galegalegau, Yehoba nata gwaeina 'inuwasam. Ma 'eguma taiya Yaluyaluwa Tabuna 'i'ahwa galegale, nata geya'abwa Yehoba 'inuwanuwasam.

<sup>11</sup> “Ma 'eguma tomota sitoegomi hada tapwalolo 'oidiya sabi heyatalaegomi babadao ta toloinao matadiya, sahena wa'ate'ateyoho bo nuwana wanuwatuhu togidega 'idi hesilalaina wahemaisa 'ese, <sup>12</sup> weyahina 'abwa tutaina beno 'oina Yaluyaluwa Tabuna ba'idamiu, ma nata tauna 'ihe'itegomi to'aha wagwaene.”

### *Gwae hegegedi wasawasa weyahina*

<sup>13</sup> Ma bodaedi 'oidiyega 'aigeda tomota 'igwaeya, “Tohe'ita, tasigu 'uhegwae ma tupwana 'ebeloina 'i'ebwaegau, mwalo tamamai 'ilaguya.”

<sup>14</sup> Ma Yesu loheyaina 'enana 'ihemaiseya, 'igwae, “Loheya, taugu geya sowasowahigu ma yahetoloina 'ami heguheguyaiina weyahina.” <sup>15</sup> Ma wete 'ina gwaeina 'itubweya ma boda mabwaiyadi 'oidiya 'igwaeya, “Wa'itayahigomi ma sahena wasawasa nuwami 'i'ewa'ewa. Geya sowasowahina ma wasawasa 'oinega yawasimi bwebwe'ana waloba.”

<sup>16</sup> Coinega 'ebe'ita 'i'ebwaediya gwae hegehegediyega, 'igwaeya, “Caigeda tohewasawasa 'ina tanoha madoudi ma baibaiwadi, ta 'eli'eli madouna 'oidiyega 'ilobeya. <sup>17</sup> Eeta loheyaina 'iboinamo 'inuwatuhu dadana, ma 'igwaeya, ‘Celi'eli madouna ta 'igu hada 'e'ahai geya sowasowahina. Coinega to'aha yapaihowa? <sup>18</sup> Nuwana bewa gidemusa, hada 'e'ahai miyamiyadi yale'wa yahuledi, ma hauhau di ta madoudi ya'abidi, ma 'oidiya 'e'ahai ta wete 'igu tobwatobwao mabwaiyana yahedodo, <sup>19</sup> ma muliyetega ma'igu yaliyaya sowasowahigu ma yagwae, “Caigeda towasawasa taugu. Bo'i ya'atububuwa ta 'igu wasawasao mabwaiyana sowasowahigu bolime hisa sinaonaoma weyahidi. Eeta paihowa 'oinega ya'aiyawasi, ma hesi tuwa yaliyayamo, weyahina 'agu ma 'agu we'aha mabwaiyana sowasowahigu.” <sup>20</sup> Ma Yehoba loheyaina 'oina 'igwaeya, ‘Loheya yauyauleiu! Hinuwana bewa yawasiu 'ilolagu, ma tobwatobwaedi 'ulagulagudiya, taiya nata weyahina?’ ”

<sup>21</sup> Ma Yesu 'ina gwae 'ana 'ebelolagu 'oina 'igwaeya, “Moisa, 'eguma taiya wasawasa weyahina 'ipaihowa, ma 'imiya wasawasa tobwatobwa bale'uwa 'oidiyega, ma geya galewa 'ana wasawasa 'oidiyega, tauna yauyauleina!”

*Cateyoho weyahina*  
(Madiu 6:25-34)

<sup>22</sup> Coinega 'ana tomuliyao 'oidiya 'igwaeya, “Sahena 'imi miya weyahina wanuwatuwatu madouna, 'amiwa ma 'ami 'ale'o weyahidi. <sup>23</sup> Weyahina yawasida ginaula madouna mabwaiyada 'oida, ma tobwatobwaedi 'wapi weyahina geya ginaula madouna.

<sup>24</sup> “Bewa 'aigeda 'ebe'ita ya'ebwaegomi 'ao'ao weyahidi, tuta baibaiwana geya sida dauna, geya sida 'etahiya, ma wete geya 'idi hada 'e'ahaimo. Bwasumowedi ginaula 'i'itudi, ma tuwa Yehoba tuta baibaiwana 'adiwa 'i'ebwa'ebwaedi, ma hesi wanuwatuhuyahi 'abehega 'omi ginaula madouna Yehoba 'oina, 'oinega sowasowahina ma 'ihe'aigomi. <sup>25</sup> Taiya 'oimiyega sowasowana 'ina nuwatuhuwega 'ina tuta bale'uwa 'i'abiheduduli? Geya, 'awa? <sup>26</sup> Moisa tuwa, 'ateyoho geya wete 'ina lema 'oida ginaula 'i'iuna weyahina, ma to'aha lamuna wa'ate'ateyoho ginaula madouna weyahidi?”

<sup>27</sup> “Ma 'aigeda wete bewa 'ebe'ita, hane 'idi bwala weyahina wanuwatuwatu. Tuta baibaiwana geya sida paihowa, ma wete geya 'adi 'ale'o sida paihowediya. Ma moisa tuwa, Solomoni 'ana 'wamao ma 'ana pasao 'adi 'ita 'ausaladi, ma hesi hane 'adi 'ita 'ausala hedadena. <sup>28</sup> Coinega wanuwatuwatu Yehoba 'ina 'itayahina 'oimiya weyahina. Tauna 'awata 'ihepasediya hoyadi bwebwe'adi 'oidiyega, nata sididi ma gona siwelai ma sigabudi, ma 'omi 'awata wabwebwe'ana sinediya, 'oinega sowasowana 'ami 'wamao Yehobaina 'i'ebwaegomi. Ma 'iyamo sahena 'imi hemisa Yehoba 'oina 'iwe'awe'a.

<sup>29</sup> “Ma weteyage sahena wanuwatuwatu madouna nuwana wa'ateyoho 'e'ahai weyahidi. <sup>30</sup> Tomiya bale'u mabwaiyadi ginaulaedi weyahidi sinuwatuwatu, ma to'aha 'imi nuwatuwatu Yehoba 'isanapu pwaidiya, gidemusa 'amiwa ta 'ami we'aha ta wete 'ami 'wama. <sup>31</sup> Ma 'ilobwainegomiya nugeta Yehoba 'ina loina 'oina watagwalegomi, ma 'oinega 'amiwa ta 'ami 'wama wete 'i'ebwaegomi. <sup>32</sup> Ma 'omi moisa Yehoba 'ina sipiyao, 'oinega sahena wa'ate'ateyoho, weyahina tauna 'ihesinuwa paigomiya ma 'ina 'ebeloina 'oina waluhu.

<sup>33</sup> “Coinega 'imi tobwatobwao wahegimwaneyedi ma maneyedi waheguyaiyedi towewelohe 'oidiya, ma 'oinega galewa 'imi wasawasa 'imiya hataya. Wasawasaina galewa 'imiyamiya geya wete 'ina 'ebegumwalamo, weyahina geya 'aigeda wete toyagaha

tupwaina 'oina, ma wete geya sohusohu. <sup>34</sup> Ma 'eguma to tupwa 'oina 'imi wasawasa 'imiyamiya beno 'oina 'imi nuwatuhi sipili.

*Bada 'ina hewahewaliyao tupwadi bwebwe'adi ma tupwadi galadi  
(Madiu 24:45-51)*

<sup>35</sup> “Coinega wa'atububu bwaibwaina ma 'ami 'wamao wa'otedi, ta wete ma'imi mayale 'asi'asilaladi ma wayamwayamwa, <sup>36</sup> gidemusa hewahewaliyao 'idi bada siyamwayamwa 'ina hilama hai 'e'ahaina 'oinega. Ma 'eguma to tuta 'oina 'ilatuma ma 'ahwa'eda 'oina 'i'etunatuna, dumwaluna tuwa 'ahwa'edaina siso'e ma 'iluhuma. <sup>37</sup> Ma 'eguma simata pa'ali ma si'atu'atububudi ma siyamwayamwa ma 'ilobadi, nata siyaliyaya madouna. Yagwae moisa 'oimiya 'idi badaina nata 'wama 'ebe paihowa 'i'ote, ma hewaliyaowedi simiyatoi ma tauna weyahidi 'ida hetopaihowa. <sup>38</sup> Ma wete 'eguma 'ina tuta hilama 'oina 'iheheboi, ma hinuwana gamwana nuwana gona 'ada'adale 'ilatuma, ma tuwa gide 'idi miyaina, ma 'ilobadi, nata wete siyaliyaya madouna.

<sup>39</sup> “Ma wete ginaula 'aigeda bewa wanuwatuhuyahi, 'eguma toni hada 'isanapuya to tuta 'oina toyagaha 'iluhuluhi 'ina hada, nata 'i'atububu bwaibwaina ma 'i'o'oyatola ma sahena 'ina hada 'ibwalebwale. <sup>40</sup> Coinega 'omi wete wa'atububu bwaibwaina ma 'igu tuta hilama weyahina wayamwegau, weyahina taugu Loheyaiguina 'igu hilama 'ana tuta geya wasanapu.”

<sup>41</sup> Coinega Pita 'igwaeya, “Bada, beno taumamo weyahima 'ugwaegwae, bo nuwana tomota mabwaiyadi weyahidi?” <sup>42</sup> Ta Yesu 'igwaeya, “Topaihowa bwebwe'adi ma sanasanapuidi mumugadi bewa gide, 'eguma taiya tauna 'ina bada 'ihesinuwe ma hada 'i'itayahi, ma 'iyanao 'adi 'i'ebwaedi sabwelo 'aigeda 'aigeda 'oidiya, <sup>43</sup> 'abwa 'eguma badaina 'ihilama ma 'ina topaihowa 'iloba 'ipaipaihowa bwaibwaina, nata weyahina 'iyaliyaya ma 'oina 'igwae, <sup>44</sup> 'Cino paihowa mabwaiyana bwebwe'ana, 'oinega ginaula mabwaiyadi 'adi loina ya'ebwaego ma 'uloina.’ <sup>45</sup> Ma hesi 'eguma topaihowaina 'iboimo 'oina 'igwae, 'Cigu bada 'abwa 'iheheboi, 'oinega taugu 'igu nuwatuhi yapaihowadi.’ Coinega 'iyanaowedi loheloheyadi ma mewahinedi 'isapisapidi, ma wete geya 'e'ahai 'ida 'ebwaediya, ma 'iboinamo 'i'ai'ai ma 'inumanuma, ma 'inuma yauyau. <sup>46</sup> Ma muliyetega 'abwa badaina 'ilohesalutuyama, ma 'ina hewali 'ina paihowa galana 'i'italoba, nata hadega 'ipa'i, ma 'oinega maisa gala hedadena 'iloba, taudi tologwahata 'idi tupwa.

<sup>47</sup> “Ma 'eguma taiya 'ina bada 'ina nuwatuhi 'isanapu ma tuwa geya 'i'atububu ta wete geya 'ipaihowa, 'abwa sapi mwauna 'iloba. <sup>48</sup> Ta 'eguma taiya 'ina bada 'ina nuwatuhi geya 'isanapu, ma 'ipaihowa pui, nata sapi 'iloba, ta geya madouna. Ma 'eguma hewali 'ana heguheguyai madouna, 'ilobwaineya ma 'ina bada weyahina 'ipaihowa madouna; ta 'eguma 'ana heguheguyai madou hedada, sowasowana 'ipaihowa madou hedada.

*Yesu weyahina wataha 'ilatuwa  
(Madiu 10:34-36)*

<sup>49</sup> “Taugu boi yatauma ma 'abehega 'aiwe yamu'a 'ebwa bale'uwa, ta nuwanuwagu 'ilomwayamwayau ma 'i'alata. <sup>50</sup> Ma hesi tuta 'i'iuna ma babitaiso galana yaloba, 'oinega ma'igu 'ateyoho ma 'ana siga babitaisoina 'oiguwa sipaihowa.

<sup>51</sup> “Ma togidega? Wanuwatuhuya 'abehega 'igu latuma bale'uwa 'oinega daumwala waloba? Geya hene. Ma hesi yahegwagomi nata 'aleha ta wataha 'oimiya silatu. <sup>52</sup> Tutaina bewa 'oidiyega ma tuta sinaonaoma 'oidiya nata susu 'alodiya wataha silatu. Susuwedi 'alodiya 'eguma gidemusa tomota 'adi baibaiwa nima, nata 'alodiyega sitetoi sihe'upwa siteluwa 'oidiya. <sup>53</sup> Ma wete 'eguma tama natuna loheyana 'oina 'i'aleha, nata wete natunaina tamana 'oina 'ilo'aleha. Gidemusa wete sina 'eguma 'ilo'aleha natuna mewahinena 'oina, nata wete tauna sinana 'ilo'aleha. Ma wete 'eguma wahine 'i'aleha lawana mewahinena 'oina, nata lawanaina 'oina 'ihe'upwa hila.”

*Cila'ilala 'adi sanapu weyahina  
(Madiu 16:2-3; 5:25-26)*



<sup>54</sup> Ma Yesu wete tomotaedi 'oidiya 'igwaeya, “Tutaina 'eguma wa'ita bolimana yaloha dubadubana sihanehanema, wanuwatuhuya 'abehega nata 'idohi, beno moisa. <sup>55</sup> Ma 'eguma tupwa yalasi 'oinega yaumai 'itowatowama, beno 'oinega wasanapu pwaiya 'abehega tuta 'i'iuna ma hala 'ihapwesa. <sup>56</sup> Moisa 'omi bale'u 'adi 'ila'ilalao wasanapu pwaidiya, ma hesi Yehoba 'ina 'ila'ilalao geya wasanapudi tuta hauhauna nage weyahina. Beno 'imi 'abo.

<sup>57</sup> “Ma to'aha lamuna ta geya wahesinuwa bwaibwaina ma 'eda dumwalunega watauya?

<sup>58</sup> “Ma 'eguma 'a 'aleha 'inaoma ma 'itoego 'abehega 'iheyatalaego, 'ilobwainegowa ma tutaina 'edai watautauya 'utoho ma galanaina 'upaihowa pwaiya 'u'abihedumwalu, ma 'oinega sahena 'a toheyatalaina 'itoetoego toloina 'oina, tabu ma toloina tolo'alehao 'iloinaedi ma deliya silagugo. <sup>59</sup> Ma yahegwaego hesi sahena wete 'ulatulatu ma 'ana siga 'a buki mabwaiyana 'uhemaisa hegumwalidi!”

## 13

### *Nuwabui*

<sup>1</sup> Tutaina 'oina tupwadi loheloheya sinaoma ma Yesu 'oina sihe'ote'otetela meGalili weyahidi, sigwaeya, “Bada, meGalili tupwadi sipwaopwaoli Yehoba 'oina, ma Pailato 'ina tolo'alehao 'iloinaediya ta tomotaedi silohe'amasidiya.”

<sup>2</sup> Coinega Yesu 'ihewgaediya, “Ma wanuwatuhu 'abehega taudi mumugadi galana ma 'iyadiyao geya galadi, 'oinega silohe'amasidiya, 'awa? Geya! MeGalili mabwaiyadi topui tuwa gide.

<sup>3</sup> “Ma 'omi wete 'abwa wa'amasa gide tuwa taudi, 'eguma mumugami galadiyedi 'oidiyega geya wanuwabui.

<sup>4</sup> “Ma taudi meSailoma site 'eitiniyedi tutaina hada madouna 'ibe'uwa ta 'ilohe'amasidiya, togidega 'imi nuwatuhu 'abehega taudi mumugadi gala hedadena meYelusalema mabwaiyadi 'oidiyega, ta 'oinega hesilaeina silobeya? <sup>5</sup> Geya hene! Ma hesi 'omi 'abwa 'eguma mumugami 'oidiyega geya wanuwabui, 'abwa wa'amasa site 'eitiniyedi gidemusa.”

### *Caiweina geya huwainamo*

<sup>6</sup> Ma muliyetega 'aigeda wete gwae hegehegedi 'i'ebwaediya 'igwae, “Caigeda loheya 'ina tanoha 'aiwe 'i'umeya gide damaya. Ma tuta baibaiwana 'inaonaoma 'aiweina ma huwaina sabi bayoina, ta geya 'aigeda tuta huwaina 'ida lobeya. <sup>7</sup> Coinega 'ina tanohina 'ana to'itayahina 'ihewgaeya, 'igwae, ‘Cusanapu pwaiya 'abehega bolime 'etoi 'oidiya yahilahilama 'ebwa damayaina huwaina sabi bayoina, ma huwaina geya 'aigeda yaloba toho. Bewa tuwa 'ugoha yahule, weyahina bale'u bwebwe'ana 'imudamudali.’ <sup>8</sup> Ma to'itayahinaina 'ina bada 'ihewgaeya, 'igwae, ‘Bada yo, tuwa! Sahena yagohagoha yahule, ma hesi 'ina gala yaloba ma gawala 'oina yalagu, hali bolime 'oina ta'ita, <sup>9</sup> ma 'eguma 'ihuwa, tuwa 'itotoholo, ta 'eguma geya huwainamo, 'oinega 'ugoha yahule.’”

### *Sabatiya Yesu wahine 'i'abihe bwebwe'aneya*

<sup>10</sup> Caigeda Sabati 'oina hada tapwalolo 'oina 'iluhuwa ma 'ihehe'ita. <sup>11</sup> Ta 'aigeda wahine 'imiyamiya, ma bolime 'eitini 'alodiya hi'ahi'a 'oina 'imiyamiya, 'oinega 'ilolohala, ma 'ina tauya tuwa 'ihahatulutuluha, ta geya sowasowahina 'isapaila ma 'itauya dumwalu. <sup>12</sup> Ma tutaina Yesu wahineina 'i'iteya ta 'ibwauweya, “Wahine 'unaoma.” Cinaoma ta 'ihewgaeya, “Caihale, 'a lohala 'oinega yalihalago.” <sup>13</sup> Coinega nimana 'ilaguya wahineina 'oina, ma 'isapaila ta Yehoba 'ihewwatuweya.

<sup>14</sup> Nage 'oina hada tapwaloloina 'ana to'itayahina Yesu 'ina paihowa 'i'iteya, ta 'igamwasowala weyahina Sabatiya lohala 'i'abihe bwebwe'aneya, 'oinega loheyaina boda 'oidiya 'ihewwaila, 'igwaeya, “Cada loina tasanasanapu 'abehega sabwelo sikisi 'oidiya 'ida paihowao tapaihowadi. Bewa geya 'ana 'ita bwebwe'ana ma Sabatiya tolohalao si'ewedima ma 'adi lohalao ta'abihe bwebwe'anedi.”



<sup>15</sup> Ma Yesu 'ihesagoha pwaiya, ta mabwaiyadi 'oidiya 'igwaeya, “Cabo'aboimiu, weyahina 'omi mumugami Sabati 'aigeda 'aigeda 'oidiya 'imi hebaiyao mabwaiyadi 'adi 'ali 'oidiyega walihasi, ma silatulatu 'atamana we'aha sabi numa. <sup>16</sup> Ma togidega wahineina wanuwatuhuya 'abehega geya sowasowahina ma 'ana mwau 'oinega yalihasi ma 'abihetena 'iloba, gidemusa 'imi hebahebaiyaowedi. Weyahina wahine bewa Ebalahamo 'ina boda 'aigeda, ma hesi Seitani bolime 'eitini 'oidiya 'i'abiyahiya.”

<sup>17</sup> Yesu 'ina gwae bewa 'oinega tolongiyedi 'i'abihedeba mwadinediya, ma hesi tomota baibaiwa hedada siyaliyaya madouna Yesu 'ina paihowa waiwai weyahidi.

*Yesu 'igwae hegehegedi Yehoba 'ina hetoloina weyahina*  
(Madiu 13:31-33; Maki 4:30-32)

<sup>18</sup> Coinega bodaedi 'oidiya wete 'igwaeya, “Togidega Yehoba 'ina hetoloina ya'abihe'asilala 'ese 'oimiya. Nuwana bewa gide 'aigeda 'aiwe 'oinega yagwae hegehegedi. <sup>19</sup> Loheya 'aigeda seyala patuna 'i'eweya, ma 'atamana 'ibeguliya, ma 'ibwala ta 'ihemadouwa, ma muliyetega kwasumo sinaoma ma 'idi nehwa lahanao 'oidiya si'abidiya.”

<sup>20</sup> Coinega wete 'ihewae hilediya, 'igwae, “To gwae hegehegediyega ya'abihe 'asilala 'ese ma 'oinega Yehoba 'ina hetoloina wasanapu? <sup>21</sup> Nuwana bewa gide: Wahine 'aigeda pwalawa 'ana 'ebe'abi heseseha 'i'iuna tuwa 'i'eweya, ma pwalawa madouna mahetena 'ihebweiyeya, 'oinega pwalawa 'iseseha.”

*Cahwa 'eda 'i'iuna*  
(Madiu 7:13-14, 21-23)

<sup>22</sup> Tutaina Yesu 'itautau Yelusalema, ma 'edai tupwana 'asa madoudi ta 'i'iudi 'oidiya 'ilatuwa, ma 'oidiya 'ihehe'ita ta 'iloguguya. <sup>23</sup> Coinega 'aigeda loheya Yesu 'ihesilaleya, 'igwae, “Bada, togidega? Nata tomota hisahisadimo 'abihetena siloba, 'awa?” Ma Yesu 'igwaeya, <sup>24</sup> “Cehe gide, ma hesi watoho waiwai ma waluhu 'ahwa'edaina 'i'iuna 'oinega. Weyahina baibaiwadi sitoho ma 'abehega siluhu, ma si'aipate 'asaya. <sup>25</sup> Ma 'abwa wete toni hadaina 'ahwa'eda 'igudu, ma 'omi 'atamana watotoholo, ma 'ahwa'edaina 'oina wa'etunatuna, ma wa'ahwanoi, wagwae, 'Bada, 'ahwa'eda 'uso'e ma 'aluhuwa.' Ma nata badaina 'enami 'ihemaisa ma 'oimiya 'igwae, 'Ta'ehega wanaoma? Geya yasanapugomi.' <sup>26</sup> Ma 'oinega 'omi wahemaisa ma wagwae, 'Tauma mwalo mahetemwao ta'aiya, tanumanuma, ma wete 'ima 'asa 'uhehe'ita.' <sup>27</sup> Ma 'oinega nata Badaina 'ihewagwagomi ma 'igwae, 'Moisa, geya yasanapugomi. Ta'ehega watauyama? Wahila ma sahena waluhuluhuma, weyahina 'omi togala.' <sup>28</sup> Ma 'oinega 'abwa 'eguma Ebalahamo ta Aisake ta Yakobo ma wete palopitao mabwaiyadi mahetediyao wa'itadi Yehoba 'ina 'ebeloina 'oina simiyamiya, ma 'omi ma'imi dou ta ma'imi hesala'i'ita tutaina 'oina, 'eguma 'atamana wamiyamiya. <sup>29</sup> Ma tupwa mabwaiyana 'oidiyega tomota sinaoma, ma 'idi 'ebemiya bwebwe'adi si'ewadi Yehoba 'ina 'ebeloina 'oina. <sup>30</sup> Ma 'eguma taiyawedi bewa tuwa sinugenugeta 'abwa simuliya, ma taiyawedi taudi bewa tuwa simulimuliya 'abwa sinugeta.”

*Yesu 'ina nuwagala Yelusalema weyahina*  
(Madiu 23:37-39)

<sup>31</sup> Tuta nage 'oina tupwadi Palisiyao sinaoma ma Yesu sihegwae, sigwae, “Bewa tuwa 'ulomwayamwayau ma 'udena, tabu ma Helodi 'ilohe'amasigo!”

<sup>32</sup> Coinega Yesu 'oidiya 'igwaeya, “Watauya ma bosasaina wahewae 'abehega bewa tuwa hi'ahi'a tomota 'oidiyega yaulaula hapwesedi, tolohalao ya'abi'abi hebwebwe'angedi, ma wete gona gidemusa, ma 'i'adale 'igu paihowa mabwaiyana yalosalohi.

<sup>33</sup> “Ma taugu 'abwa yatautau Yelusalema, nata ta gona ta hedabaha yalatu, ma nobwa ya'amasa, weyahina palopitao mabwaiyama 'ima 'ebe'amasa Yelusalema.” Coinega Yesu nuwana 'igala ta Yelusalema weyahina 'idouwa, 'igwae, <sup>34</sup> “Yelusalema he, togidega ma palopitao 'ulohelohe 'amasidi, ma wete Yehoba 'ina tohalewasao dimwega 'u'ahu'ahu yamatedi? Tuta mabwaiyana nuwanuwagu ma 'ino tomotaedi yabwau 'autedima gide 'am'am natunao papenega 'i'ahuyahidiya, ma hesi silogwahategauwa! <sup>35</sup> Coinega Yehoba

'iunamo ma 'lebesinego, ma yahegwaego 'abehega sahena wete 'u'ita'ita hilegau ma 'ana siga 'ino tomotaedi sitagwala 'oiguwa ma sigwae, 'Tauna Yehoba saninega 'inaonaoma tahepwatuwe.' ”

## 14

### *Sabati 'ana lona*

<sup>1</sup> Sabati 'aigeda 'oina Yesu 'itauya sabi 'ai Palisi 'idi bada 'aigeda 'ina hada. Hadaina 'oina 'iluhuwa ma boda si'e'ebubu, <sup>2</sup> weyahina tupwaina 'oina 'aigeda tolohala 'imiyamiya, wahina mabwaiyana si'eloseseha. <sup>3</sup> Coinega Yesu tolohalaina weyahina 'ihesilala lona 'ana tosanapuwao ta Palisiyao 'oidiya, 'igwaeya, “Togidega? Wanuweya 'abehega bwebwe'ana 'eguma tolohala sabwelo Sabati 'oina ta'abihe bwebwe'ane, bo geya?” <sup>4</sup> Ta 'ina gwae geya sihemaisa, ma muliyetega Yesu tolohalaina nimana 'i'abiya, ma 'ana lohala 'i'abihe bwebwe'aneya. Eeta 'ihewaseya ta 'itauya 'ina 'asa. <sup>5</sup> Coinega 'ihewaseya, 'igwae, “Ceguma taiyewedi 'omi ma'imi hebaiyao gide 'ase bo bulumakau, ma 'aigeda hebaiina sabwelo Sabatiya 'ibe'u gaula 'oina, togidega, 'ana lobwaina ma walisi hanehe?” <sup>6</sup> Ma taudi tuwa geya 'idi hemaisamo.

### *Sahena 'ebemiya bwebwe'ana wahehesinuwedi*

<sup>7</sup> Caiina 'alona Yesu loheloheya 'i'itediya, taudi nuwanuwadi ma 'ebemiya bwebwe'ana 'oidiya simiyatoi, 'oinega 'aigeda gwae hegehegedi 'i'ebwaediya, 'igwae, <sup>8</sup> “Ceguma taiya 'ina hada 'ibwauwego hai guyaina weyahina, sahena tohai 'ina 'ebeulega 'umiyatoi, weyahina 'eguma loheya 'aigeda sanina madouna 'inaoma, <sup>9</sup> beno guyai taniwagana 'i'hegwaego ma 'utauya papaliya, ma 'ino 'ebemiyaina 'oina loheya hauhaunaina 'imiyatoi. Ma 'owa nata ma'ino debamwadina papaliya 'uhila. <sup>10</sup> Coinega 'eguma sibwauwego ma 'uluhulu 'oidiya, 'ebemiyaina papaliya 'uhesinuwane ma 'oina 'umiyatoi, ma 'oinega tutaina 'eguma guyai toniwagana 'inaoma ma 'i'itago, nata 'oiuwa 'igwae, 'Ciyagu, 'umiyalaga gamwagamwana,’ ta 'oinega 'ulaga ma'ino yaliyaya ma wete 'a hepwtu loheloheya matadiya. <sup>11</sup> Bewa 'oinega tasanapu 'abehega taiya tauna 'i'abilagasi, 'abwa 'isulu; ma 'eguma taiya tauna 'ilagusuluhe, nata 'ihane.”

<sup>12</sup> Coinega Yesu Palisiina 'ibwauweya ma 'oina 'igwaeya, “Ceguma 'e'ahai 'upaihoweya, sahena 'iyamwao bo tasimwao, bo 'ino bodao bo towasawasao 'ubwauwauwedi 'ai nina 'oina, weyahina taudi 'abwa sibwauwego sabi hemaisa 'oiuwa. <sup>13</sup> Ma hesi 'eguma 'e'ahaiina 'upaihowa, taudi wewelohedi ta peupeudi ta tohe'au'au ta wete tomatagibugibu 'ubwauwedi, <sup>14</sup> ma 'oinega 'ahwa bwebwe'ana moisa 'uloba, weyahina bewa taudi geya sowasawahidi ma 'ino helauina sihemaisa. Ma hesi Yehoba 'oinega 'a maisa 'uloba, tutaina 'eguma tobwebwe'adi 'amasega 'i'abihe toholodi.”

### *Bada 'aigeda 'ai madouna 'ipaihoweya (Madiu 22:1-10)*

<sup>15</sup> Ta ba'idanao si'ai'ai, ma 'aigeda 'oidiyega gwae bewa 'ihesagoheya, ta Yesu 'ihewaseya, 'igwae, “Cehe gide! Ceguma taiyewedi siluhu Yehoba 'ina 'ebeloina 'oina ma si'ai, siyaliyaya madouna.”

<sup>16</sup> Coinega Yesu loheyaina 'ina gwae 'ihemaiseya, 'igwae, “Caigeda loheya 'e'ahai madouna 'ipaihoweya ma tomota baibaiwadi 'ibwauwediya. <sup>17</sup> Ma 'e'ahaiina 'ipaihowa pwaiya, ta 'ina hewali 'ihewaseya tomotaedi 'oidiya ma 'ihewaseya, 'Ce'ahai sipaihowa pwaiya, 'oinega wanaoma tatauya ma wa'ai.”

<sup>18</sup> “Ma mabwaiyadi geya nuwadi, 'oinega hali gwae ma hali gwae si'ebwaeya. Caigeda 'igwaeya, 'Tanoha hauhauna yagimwane pwaiya, 'oinega nuwana yatautau ma yahabo'ene. Ma yawwedo madouna, ma hesi geya'abwa yanaonaowa.’ <sup>19</sup> Ma 'aigeda wete 'igwaeya, 'Yawwedo madouna, nuwana taugu wete geya'abwa yanaonaowa, weyahina bulumakau nimaluwaluwa ta wete 'ebegesoha nima'ai'aigeda yagimwane pwaiya, 'oinega yatautauya ma 'abehega beno bulumakau 'eluwa yahepaihowa tohodi

'ebegesoha 'aigeda silisi bwaibwaini bo geya.' <sup>20</sup> Ma wete 'aigeda 'igwaeya, 'Taugu hauhauna yahaiya, 'oinega nata geya'abwa yanaonaowa.'

<sup>21</sup> "Eeta hewaliina 'ihila ma 'ina badaina 'oina 'ihepwaila, 'igwaeya, 'Mabwaiyadi genuwadi.' Ma toni hadaina 'igamwasowala, 'oinega 'ina hewaliina 'oina 'igwaeya, 'Cutauya mwayamwayau gogo madoudi 'adi 'edao mabwaiyadi 'oidiya, ma 'eguma hisa tomota 'ulobediya, bwagana nanaewana bo belubeluina bo matagibugibuna bo peupeuna, tuwa mabwaiyadi 'utoedima si'ai.'

<sup>22</sup> "Ma hewaliina 'ipaihoweya gide, ma muliyetega 'inaoma ta 'igwaeya, 'Bada yo, tomotaedi yatoedima, ma hesi 'ino hadaina geya silohemaha.' <sup>23</sup> Ta badaina wete 'igwaeya, 'Ceda mabwaiyadi 'oidiya 'utauya, ma tomota 'uhegwaedi ma sinaoma, ma 'igu hada silohemaha. <sup>24</sup> Ta hesi tomotaedi yatoe nugetediya sahena 'aigeda 'oidiyega 'aguina 'ilolotoho.'"

*Togidega Yesu 'ana muliya*  
(Madiu 10:38-39)

<sup>25</sup> Ma boda madouna mahetenaositautauya, ma 'oinega Yesu 'i'itahila, ta bodaedi 'ihewgaediya, <sup>26</sup> "Taiya 'eguma nuwanuwana ma 'imuliyegau, nugeta 'ihamwegau moisa ma tamana ta sinana ta mwanena ta natunao ta tasinao ta nuhunao, ma wete tauna tuwa weyahina 'ilogwahatedi. Ma 'eguma geya, tauna geya 'agu tomuliya. <sup>27</sup> Ma 'eguma taiya yawasina geya 'itagwale ma 'i'amasakelose 'oina gide taugu, tauna geya sowasowahina ma 'imuliyegau.

<sup>28</sup> Gide tuwa 'eguma taiya nuwanuwana ma hada madouna 'i'abi, nugeta ginaula mabwaiyadi 'i'atububudi hadaina weyahina, <sup>29</sup> tabu ma logidimo 'ihetoholodi ma geya hada mabwaiyana 'ilosalohi. Bewa 'oinega nata tomota si'ita ta loheyaina silotuyane. <sup>30</sup> Ma sigwae, 'Loheya bewa gide waiwaina ma logidi 'ihetoholodiya ta geya hadaina mabwaiyana 'i'abi.'

<sup>31</sup> Ta wete 'eguma 'aigeda kini ma'ina tolo'alehao teni tausani sitautauya sabi lo'aleha wete hali kini ma'ina bodao tuweniti tausani 'oidiya, togidega kini nata 'inuwatuhu 'esa? Nuwana nugeta 'imiyatoi ta 'inuwatuhu ma 'abehega sowasowahidi sihewaiwai 'adi 'alehaowedi 'oidiya, bo geya? <sup>32</sup> Ma 'eguma geya, 'ina tohalewasao 'ihewasaedi ma sipilibodedi, 'eguma hali kiniina ma'ina bodao 'abwa bwagabwaga simiyamiya, ma 'oinega mahetediyaosihewgaegwae daumwala weyahina."

<sup>33</sup> Coinega Yesu 'ina hemataluwa 'ilosalohiya, ma 'oidiya 'igwae, "Bewa gide wete 'agu muliya 'ana 'eda. Ceguma taiya 'owa nuwanuwau ma 'umuliyegau, nugeta 'ino 'ebeloina mabwaiyana 'u'ebesinedi.

*Hola ginaula bwebwe'ana*  
(Madiu 5:13; Maki 9:50)

<sup>34</sup> "Hola ginaula bwebwe'ana. Ma 'eguma 'ana 'amna 'igumwala, geya sowasowahina ma 'i'amna hila. <sup>35</sup> Geya wete 'ilobwalobwaine ma bale'u 'i'abihe bwebwe'ane, ma hesi talogwahateyamo.

"Ceguma matenami gwae bewa wahesagohe."

## 15

*Sipi 'wada'wadaleleina gwae hegehegedina*  
(Madiu 18:12-14)

<sup>1</sup> Caigeda tuta takesi 'ana to'ewao ma hali togala tupwadi wete sinaoma Yesu sabi hesagohina. <sup>2</sup> Coinega Palisiyao ta lolina 'ana tohe'itao silomugiyeya, sigwae, "Loheya bewa togalao 'i'ahwa 'iya'iyaguwediyaya ma wete mahetenaosil'ai'ai." <sup>3</sup> Ta 'idi gwaeina Yesu 'ihemaiseya gwae hegehegediyega, 'igwae, <sup>4</sup> "Togidega 'eguma 'aigeda 'oimiyege 'ina sipi 'adi baibaiwa handeledi, ma 'aigeda 'i'wadalele, sowasowahina ma nainiti naeniyedi pwtatula 'i'ebesinedi ma sipiina 'wada'wadalelena 'i'ebese 'ana siga 'iloba. <sup>5</sup> Ma 'eguma 'iloba nata ma'ina yaliyaya 'ahalana 'ilagu ma 'ihila 'asai, <sup>6</sup> ma 'oinega 'iyanao

'ibwau he'atudedima ma 'ihewgaedi, 'igwae, 'Sipiina 'wada'wadalelena yaloba pwaiya, 'oinega weyahina tayaliyaya.' <sup>7</sup> Coinega gide wete 'eguma 'aigeda togala 'inuwabui, megalewa aneloseyao weyahina siyaliyaya madouna, ma hesi tobwebwe'adi site nainti naeniyedi weyahidi 'idi yaliyaya 'i'iuna.

*Kina 'wada'wadalelena 'ana gwae hegehegedi*

<sup>8</sup> “Gide wete 'eguma wahine 'ina kina 'adi baibaiwa nima bwaubwau, ma 'aigeda 'ihe'wadaleleya, 'oinega to'aha 'ida paihowa ma kinaina 'iloba? Nuwana mayale 'igabu, ma hada mabwaiyana 'ise'ili ma 'ibesa bwaibwaina 'ana siga 'iloba. <sup>9</sup> Ma 'eguma 'iloba, nata 'iyanao 'ibwau 'atudedima ma 'oidiya 'igwae, 'Cigu kinaina yahe'waihiya yaloba pwaiya, 'oinega weyahina tayaliyaya?’ <sup>10</sup> Gide wete 'eguma 'aigeda togala 'inuwabui, nata Yehoba 'ina aneloseyao weyahina siyaliyaya madouna.”

*Caigeda bada natuna 'ihe'waihiya*

<sup>11</sup> Ma Yesu wete 'igwae hegehegediya, 'igwae, “Caigeda bada natunao loheyadi 'eluwa ba'idanao simiyamiya, <sup>12</sup> ta 'alomauna tamana 'ihewgaeya, 'igwae, ‘Tamagu, nuwanuwagu ma bewa tuwa 'agu heguheguyai 'u'ebwaegau.’ Coinega bada 'ina tobwatobwa mabwaiyana 'ihewguyaiyeya natunaowedi 'oidiya.

<sup>13</sup> Sabwelo tupwana sigumwala, ma 'alomauna 'ina tobwatobwa 'ihewganwaneyediya, ma 'ana maisa mane 'i'eweya, ma tupwaina 'i'ebesineya, ta tupwa bwaga hedada 'oina 'itauya, ma nobwa yaliyaya bwagabwaga 'oinega 'ina mane 'ilohegumwalidiya.

<sup>14</sup> “Cina mane mabwaiyana 'igumwala ta nimenimenamo 'imiyamiya, ma tuta nage 'oina gomale madouna tupwaina 'oina 'ilatua. <sup>15</sup> Coinega loheyaina 'ina paihowa 'i'ebesa, ta 'aigeda 'asa 'ana bada 'ilobeya, ta 'ihewaseya ma 'ina baweyao 'i'itayahidi. <sup>16</sup> Ta loheyaina nuwanuwana ma bawe 'adiyega 'i'ai, weyahina geya 'anamo. <sup>17</sup> Tuta nage 'oina nuwana 'isabwalena, ma 'iboinamo 'oina 'igwaeya, 'Moisa, tamagu 'ina topaihowao 'adi 'e'ahai madouna, ma taugu 'ebwa tuwa gomale 'ihunuhunugau. <sup>18</sup> Coinega yatoholo ma yatauya tamagu 'oina yagwae, “Tamagu, yagala pwaiya Yehoba 'oina, ma wete 'owa 'oiuwa. <sup>19</sup> Ta geya 'ilobwainegau ma 'u'ahwa natuwegau, ma hesi 'u'ahwa topaihowegau.” ’

<sup>20</sup> “Bewa gide 'inuwanuwatuhu 'esa, ta 'oinega 'itoholowa ma tamana weyahina 'itauya, ma bwagebwagega tamana 'i'iteyama 'itautauyama, 'oinega ma'ina 'atemuyamuya 'ipili 'oina, ma 'i'atusapwaliya, ta mahetena sihedoudou.

<sup>21</sup> “Eeta natunaina tamana 'ihewgaeya, 'igwae, ‘Tamagu, yagala pwaiya Yehoba 'oina ma wete 'owa 'oiuwa, 'oinega geya 'ilobwainegau ma 'u'ahwa natunegau.’ <sup>22</sup> Ma hesi tamana 'ina hewaliyao 'ibwauwediya ma 'oidiya 'igwaeya, ‘Walomwayamwayau ma 'wama bwebwe'ana wa'eweyama ma natugu wahe'ote, ma wete 'ana nipuna wa'eweyama ma nimana walagu, ma 'ana butu 'ahena walagu, <sup>23</sup> ma muliyetega watauya ma bulumakau yauyubona ta momonana wahunuyama, ma 'e'ahai madouna tapaihowa, ma 'oinega ma'ida yaliyaya tauna mahetedai ta'ai. <sup>24</sup> Weyahina natugu bewa mwalo 'i'amasa, ta nige mayawasina taloba hileya.’ Coinega sihegaina ma siguyai ma'idi yaliyaya.

<sup>25</sup> “Ma hesi natuna tautuwa 'abwa tanoha 'ipaipaihowa. Cina paihowa 'igumwala, ma tutaina 'asa deina 'ilatulatu, lahusa ma selo 'ihewgohediya. <sup>26</sup> Coinega 'aigeda 'idi hewali 'ibwauweya ma 'ihewsilaleya, 'igwae, ‘To'aha lamuna 'oinega siyaliyaliyaya?’

<sup>27</sup> Ma hewaliina 'igwaeya, ‘Tasiu 'ihila pwaima ta tamana bulumakau yauyubona ta momonana 'ihunuya, ma mahetema 'ayaliyaliyaya, weyahina natunaina ma'ina bwebwe'ana 'iloba hileya.’ <sup>28</sup> Gwae bewa 'ihewgoheya ta 'igamwasowala madouna, ta genuwana ma hadai 'iluhu.

“Coinega tamana 'ilatuma ma natuna tautuwana 'ihewgaeya 'abehega mahetena siluhu hadai. <sup>29</sup> Ma hesi loheyaina 'ilogwahata, weyahina 'igamwasowala hedada, ma tamana 'oina 'igwaeya, ‘Tamagu, hisa bolime 'oidiya weyahiu yapaipaihowa ma 'ino heyowana mabwaiyana yapaihowediya, ma geya 'aigeda tuta 'uda helauwegauwa. Geya 'aigeda wete hebai 'u'ebwaegau ma ma'iyagwao 'a'ai hegogona ma 'ayaliyaya. Geya

hene! <sup>30</sup> Ma natuina bewa 'ino tobwatobwa mabwaiyana 'imudaliya tosogalao 'oidiya, ma to'aha weyahina 'uhelauweya, ma bulumakau yauyaubona ta momonana 'uhunuya weyahina?'

<sup>31</sup> “Ta 'oinega badaina natuna 'oina 'igwaeya, ‘Natugu, 'usanapuya 'abehega 'owa tuta mabwaiyana deiguwa 'umiyamiya, ma to'aha gide 'igu 'ebeloinao, mabwaiyana nimauwa simiyamiya, <sup>32</sup> ma hesi tasiu bewa 'i'amasana, ta bewa tuwa mayawasina taloba hileya, 'oinega 'ilobwainegita ma mahetedai tayaliyaya.’”

Tetela bewa 'oinega Yesu Palisiyao ma loina 'ana tohe'itao 'igwae hegehegediyediya.

## 16

### *Caigeda to'itayahina galana*

<sup>1</sup> Wete Yesu gwae hegehegedi 'aigeda 'ana tomuliyao 'i'ebwaediya, 'igwae, “Loheya towasawasa ma'ina topaihowa, tauna 'ina wasawasa 'ana to'itayahina, ta 'aigeda tuta 'oina tupwadi loheloheya wasa si'eweyama towasawasaina 'oina, sigwaeya, ‘Bada, 'ino topaihowaina 'ino tobwatobwa 'ihehepaipaisiyedi.’” <sup>2</sup> Coinega, towasawasaina 'ina topaihowaina 'ibwauweyama, ma 'ihewgaeya, 'igwae, “Hepwaila galadi weyahiu yahesagoheya 'oinega bewa tuwa 'igu tobwatobwa 'adi pepao 'u'ebwae hilegau, ma 'oiguwega 'ulatu.”

<sup>3</sup> “Coinega topaihowaina 'inuwatuhuwa ta 'igwae, ‘Togidega nata yapaihowa 'esa, weyahina 'igu badaina 'ilogwahategauwa? Geya sowasowahina ma yatanoha paihowa, ma wete debamwadina 'eguma yatautauya tomota 'oidiya, 'e'ahai weyahina yalo'ahwa'ahwanoi.’” <sup>4</sup> Cinuwanuwatuhu ma 'aigeda 'eda 'inuwalobeya, 'igwaeya, ‘Cehe, bewa gide yapaihowa 'ese ma 'oinega 'iyagwao baibaiwadi yalobadi, 'eguma paihowa bewa 'oinega yalatu.’” <sup>5</sup> Eeta 'ina badaina 'ina tobukiyao 'ibwauwediya, ma 'aigeda 'aigeda 'oidiya 'ihesilala.

Loheya nugenugetaina 'oina 'ihesilala, 'igwaeya, ‘Hisa 'a buki 'igu badaina 'oina?’” <sup>6</sup> Ma 'igwaeya, ‘Holowa 'adi baibaiwa handeledi yabukidiya.’ Coinega topaihowaina 'igwaeya, ‘Pepa bewa 'oina 'a bukiyedi 'uleledi ma pipitimo 'ulagu.’” <sup>7</sup> Ma 'aigeda wete 'iluhuwa ta 'ihesilaleya, 'igwae, ‘Ma 'owa hisa 'a buki?’ Ta 'igwaeya, ‘Ce'ahai 'adi baibaiwa handeledi yabukidiya.’ Coinega tauna wete 'igwaeya, ‘Pepa bewa 'oina 'a bukiina 'ulele ma 'eitimo 'ulagu.’ Ma mabwaiyadi gide 'adi bukiyedi silagu suluhediya.

<sup>8</sup> “Coinega 'ina badaina 'ina paihowa bewa wasana 'ihesagoheya, ma 'ihewwatuweya, weyahina mebale'u sihewaiwai 'idi wasawasa 'ana paihowa 'oina, ma hesi Yehoba 'ina bodao geya sihewaiwai 'idi paihowao 'asilala weyahina.”

<sup>9</sup> Ta Yesu wete 'ihewgaediya, “Bale'u wasawasao galadi, ma 'eguma wasawasaedi 'oidiyega 'iyamiyao wahelauwedi, 'abwa taudi sihaesotegomi 'ebemiya hatayaina 'oina, tutaina wasawasaedi sigumwala.

<sup>10</sup> “Weyahina 'eguma taiya ginaula 'i'iuna 'oina 'ihematamatana, wete ginaula madoudi 'oidiya 'ihematamatana. Ma 'eguma 'i'iudi 'oidiya 'i'abo wete ginaula madoudi 'oidiya 'i'abo. <sup>11</sup> Comi wete, 'eguma geya bale'u wasawasao weyahidi wapaihowa bwaibwaini, nata Yehoba geya'abwa wete wasawasa moisa 'i'ebwa'ebwaegomi. <sup>12</sup> Ma 'eguma 'iyamiyao 'idi wasawasa weyahidi geya wapaihowa bwaibwaini, gesowana wete Yehoba 'imi wasawasaina 'i'ebwaegomi.

<sup>13</sup> “Coinega topaihowa geya sowasowahina ma 'ihetopaihowa bada 'eluwa 'oidiya, ma 'aigeda 'iguipaille ma hesi 'aigedamo weyahina 'ipaihowa, ma 'oinega 'aigeda 'i'ahwa bwebwe'ane ma 'aigeda 'i'ahwa galagalae. Coinega geya sowasowahina ma Yehoba 'ina paihowa ma wasawasa bale'uwa ta'abiluwedi.”

### *Palisiyao mumugadi*

(Madiu 11:12-13; 5:31-32; Maki 10:11-12)

<sup>14</sup> Saugaina Palisiyao gwaeina sihesagoheya ta Yesu silotuyaneya, weyahina taudi mane nuwanuwadi madouna. <sup>15</sup> Coinega Yesu Palisiyaowedi 'oidiya 'igwaeya, “Comi



wanuwatuhuya 'abehega mumugami bwebwe'ana tomota matadiya, ma hesi galana mabwaiyana 'atemiya Yehoba 'isanasanapudi, weyahina ginaulaedi tomota nuwadi si'eweya, Yehoba 'ilogwahatediya. <sup>16</sup> Moisa tuwa, Mosese ma palopitao 'idi loinao 'oimiya simiyamiya 'ana siga Yoni to'abihehabitaiso 'inaoma, ma tuta nage 'oinega 'ana siga nige tetela bwebwe'ana Yehoba 'ina loina weyahina 'abwa 'ahehepwaledi, ma 'ebeloinaina weyahina tomota baibaiwadi ma'idi waiwai sitohotoho ma siluhuluhu. <sup>17</sup> Galewa ma bale'u 'idi sawala sowaswahina, ma hesi Mosese 'ina loinao bwagana 'i'iu sehenina, geya'abwa sigumwagumwala.”

<sup>18</sup> Ma Yesu wete 'oidiya 'igwaeya, “Ceguma taiya loheya mwanena 'isa'ile ma 'ihaibala hali wahine 'oina, tauna 'ipui pwaiya, ma wete 'eguma wahine sa'isa'ilina 'ihaihila hali loheya 'oina, loheyaina tauna wete 'ipui pwaiya.”

#### *Towasawasa 'aigeda ma Lasalo*

<sup>19</sup> Ma Yesu wete 'ihewgaediya, 'igwae, “Caigeda tuta 'oina towasawasa 'aigeda ma Lasalo simiyamiya. Towasawasaina 'ana 'ale'owao 'ausala hedadedi ma wete 'anao mabwaiyadi bwebwe'adi, 'oinega sabwelo 'aigeda 'aigeda 'oidiya ma'ina yaliyaya. <sup>20</sup> Ma Lasalo wewelohena ma lobwe'abwe'aina, 'oinega Lasaloina towasawasaina hada 'ahwa'eda 'oina 'imiyamiya, <sup>21</sup> ma 'abehega towasawasaina 'ana mugumuguna 'oinega 'ida 'ai. Ma Lasaloina bwe'anao tuta baibaiwana 'edewa siyamoyamosidi. <sup>22</sup> Ma tutaina Lasalo 'i'amasana aneloseyao sitoeya ta Ebalahamo deina silaguya tobwebwe'ana 'idi tupwa. Ma muliyetega wete towasawasaina 'i'amasana ma sigaliheya, <sup>23</sup> ma tauna ma'ina muya madouna to'amasana 'idi tupwa 'oinega 'i'ita haneya, ta Lasalo 'i'iteya Ebalahamo ba'idana simiyamiya. <sup>24</sup> Coinega 'ibwau madouna ma 'igwaeya, ‘Tamagu yo! Cuda 'atemuyemuyegau ma Lasalo 'uhewasaeyama ma we'aha gogaina nimanega memenagu 'i'abihegogai, weyahina tuta bewa yamuyamuya madouna 'aiwe 'ala'alata 'oina.’

<sup>25</sup> “Ma Ebalahamo 'ihewgaeya, 'igwae, ‘Natugu, 'usanapuya 'abehega mwalo yawasiu mabwaiyana yaliyayamo, ma hesi Lasalo geya 'aigeda 'ebeyaliyaya 'iloba. Coinega bewa tutaina tauna ma'ina yaliyaya, ma 'owa 'umuyamuya. <sup>26</sup> Ma wete 'uda sanapu 'abehega gamwagamwanida sa'ala madouna 'imiyamiya, 'iwatahigita, 'oinega geya sowaswahina ma bewa 'oinega 'ahabalawa 'oimiya. Comi wete, geya sowaswahimi ma wahabalama 'oima.’

<sup>27</sup> “Towasawasaina 'igwaeya, ‘Ee bwebwe'ana, ma benomo nuwanuwagu ma Lasalo 'uhewasae 'igu bodao 'oidiya, <sup>28</sup> ma tasigwao site nima 'ida hemataluwedi, tabu ma taudi wete sinaoma muya 'ina tupwa bewa 'oina.’ <sup>29</sup> Coinega Ebalahamo loheyaina 'ihewgaeya, 'igwae, ‘Tasimwaowedi 'adi tohenuwalagu simiyamiya, taudi beno Mosese ta palopitao 'idi gwaeyedi Buki He'asisi 'oina. Gwaeyedi 'alona sowaswahina ma tasimwaowedi sihesagoha bwaibwaini.’ <sup>30</sup> Ma hesi towasawasaina 'igwaeya, ‘Tamagu, beno geya sowaswahina. Ma 'eguma taiya 'amasega 'itoholohila ma 'itauya 'oidiya, ma tauna si'ita, 'oinega sinuwabui bwaibwaini.’ <sup>31</sup> Ta Ebalahamo wete 'igwaeya, ‘Ceguma Mosese ma palopitao 'idi gwae geya sihemisaedi, geya'abwa wete 'aigeda taiya sihehemisae, bwagana 'eguma 'aigeda to'amasana 'itoholo hila ma 'itauya 'oidiya.’”

## 17

#### *Galana 'ana he'ita (Madiu 18:6-7; Maki 9:42)*

<sup>1</sup> Coinega Yesu 'ana tomuliyao 'ihewgaediya, 'igwae, “Tomota tupwadi nata 'ebetoho baibaiwana sipaihowadi 'oimiya ma 'abehega si'abi hebe'ugomi, ma 'eguma taiyawedi taudi 'ebetohowedi sipaihowediya tuwa 'atemuyamuyaidi. <sup>2</sup> Ma 'eguma taiya to'abi hebe'uina, 'ilobwaineya ma da'ule madouna silosipwa 'ani'ona ma ni'u dubaduba siulasuluhe, ma 'oinega sahena gwagwama sihehe'au'aunaowe.

#### *Nuwasam weyahina*

<sup>3</sup> “Coinega wa'itayahigomi, ma 'eguma tasiu 'oiuwa 'ipaihowa galagala, 'uhegwae 'ina puiina, ma 'eguma 'inuwabui 'unuwasam. <sup>4</sup> Ma 'eguma tasiu 'ina sabwelo 'aigeda 'oina ta masebeni 'ipaihowa galagala 'oiuwa, ma tuta 'aigeda 'aigeda 'oina 'i'ahwa'ahwanoi 'oiuwa sabi nuwasam, 'ilobwainegowa ma mabwaiyana 'unuwasamudi.”

#### *Hemisa weyahina*

<sup>5</sup> Eeta Yesu 'ana tohepwailaowedi sigwaeya, sigwae, “Cima hemisa 'u'abihewaiwai.”  
<sup>6</sup> Ma badaina 'igwaeya, “Ceguma 'imi hemisa 'ana waiwai gide seyala patuna, sowa-sowahina ma 'aiwe bewa madouna 'oina wagwae, ‘Cudabugo ma ni'uwa 'uboi 'u'umago,’ nata 'imi gwaaina 'ihematamatane.”

#### *Topaihowao 'idi paihowa*

<sup>7</sup> Ma wete 'oidiya 'igwaeya, “Ceguma 'aigeda taiya 'owa ma 'ino hewali, tauna togesoha bo nuwana hebai 'ana to'itayahina, ma tutaina 'eguma hewaliina 'ina paihowega 'ilatuma, geya sowasowahina ma 'uloina 'abehega tauna 'i'ai nugeta, <sup>8</sup> ma hesi 'ugwae, ‘Cagu 'u'atububu ma 'u'itayahigau ma ya'ai, ma 'oinega 'owa muliyetega 'u'ai ma 'unuma.’ <sup>9</sup> Coinega hewaliina 'ina paihowa weyahina 'ana loyauwedo geya 'ida lobeya 'ina bada 'oinega, weyahina tauna tuwa 'ina paihowa. <sup>10</sup> Ma 'omi wete gidemusa, 'eguma tutaina ginaula mabwaiyana wapaihowadi, to'aha gide yaloinegomiya, wagwae, ‘Cehe, tauma tuwa topaihowa, 'oinega to'aha gidemusa 'ama loinaina gide 'apaihoweya, beno gide 'ama lobwaina moisa.’”

#### *Tolepelo nima luwaluwa 'i'abihe bwebwe'andediya*

<sup>11</sup> Ma Yesu Yelusalema weyahina 'itautauya ma Sameliya ta Galili gamwagamwanidiya 'ilatulatu. <sup>12</sup> Ta 'aigeda 'asa 'oina 'inaoma ma tolepelo nima luwaluwa 'ilobediya, eema 'ina 'eda 'oinega siha hila, <sup>13</sup> ma sibwaubwau 'enadi madounega, sigwaeya, “Bada Yesu 'u'atemuyamuyaemai.” <sup>14</sup> Coinega 'ilo'itahila ma 'ihewgaediya, “Watauya ma topwaoli 'oidiya wahe'itaegomi.” Ma sitautauya 'edai ta 'adi lepelo 'igumwala, <sup>15</sup> ma 'aigeda loheya 'oidiyega, tauna gwama Sameliya, 'i'iteya 'abehega 'ibwebwe'ana pwaiya, 'oinega 'ihila ma 'enana madounega Yehoba 'ihewpawuweya, <sup>16</sup> ma Yesu 'ahena 'ibe'u talutalubu'iya ma 'oina 'iloyauwedowa. <sup>17</sup> Coinega Yesu loheyaina 'ihewgaeya, “Nige wate nima luwaluwa ya'abihe bwebwe'anegomiya, ma ta'eha site naeniyedi? <sup>18</sup> Togidega geya sihilama ma Yehoba 'oina siloyauwedo? Ma 'owa taumana geya Yudiya 'oinega, ma 'unaoma sabi loyauwedo. <sup>19</sup> Coinega 'ino hemisega 'abihetena 'ulobeya. Causala, 'utoholo ma 'utau.”

#### *Yehoba 'ina loina tuta 'inaonaoma weyahina (Madiu 24:23-28, 37-41)*

<sup>20</sup> Palisiyao tupwadi sinaoma ma Yesu sihesilaleya to tuta gide 'oina Yehoba 'ina loina 'ilatuma. Coinega Yesu 'idi hesilalaina 'ihemaiseya bewa gidemusa, 'igwaeya, “Geya sowasowahina ma tomota matadiya Yehoba 'ina loina 'inaonaoma si'ita. <sup>21</sup> Ma wete geya sowasowahidi ma sigwae, ‘Wa'ita Bewa’, bo nuwana ‘Nage’, weyahina Yehoba 'ina loina 'oimiya 'imiya pwaiya.”

<sup>22</sup> Coinega 'ana tomuliyao 'ihewgaediya, 'igwae, “Cabwa ya'ebesinegomi, ma muliyetega nuwanuwami madouna ma taugu Loheyaiguina ba'idamiu tada miyamiya sabwelo 'aigeda tuwa weyahina, ma hesi nata geya wa'ite'itegau. <sup>23</sup> Ma 'eguma tomota sigwae, ‘Keliso nage’, bo nuwana ‘Bewa’, nata sahena wamulimuliyedi. <sup>24</sup> Weyahina saugaina 'eguma yanaonaoma, galewa 'ana 'ita gide 'asilala daisinamo, gide namala madouna 'ana 'ita.

<sup>25</sup> “Ta muliyetega ma ginauledi sihapwesa, nugeta mehau bewa silogwahategau, ma 'oidiyega muya yaloba.

<sup>26</sup> “Cigu hilama 'ana tuta Nowa 'ina tuta gidemusa. <sup>27</sup> Weyahina Nowa 'ina tuta si'ai'ai ma sinumanuma ma wete loheloheyadi ta wahiwhinedi sihaihai 'ana siga Nowa 'ina

waga 'igeluwa, ta yagewa 'ilatuwa ta 'oinega tomota mabwaiyadi 'imutudiya. Ma taugu Loheyaiguina 'igu hilama gidemusa.

<sup>28</sup> “Ma wete Lota 'ina tuta gide, saugaina tomota mabwaiyadi si'ai'ai ma sinumanuma, ma wete sigimwagimwane ma sihehegimwane, ta wete sitanohapaihowa ma sihadahada'abi, <sup>29</sup> ta 'ana siga Lota Sodoma 'i'ebesineya, 'oinega 'aiwe ganinisa ma da'ule yahiyahidi galewega sigubalama gide dohi, ma tomota mabwaiyadi 'ilohe'amasidiya.

<sup>30</sup> “Ginauledi silatuwa 'oidiya, 'abwa wete gide tomota 'oidiya sida latu 'esa, beno tutaina taugu Loheyaiguina yahilama.

<sup>31</sup> “Ma sabweloina 'oina 'eguma taiya wagahata 'imiyamiya, sahena wete hada 'alona 'iluhulu ma 'abehega 'ilotobwatobwa. Wete 'eguma taiya tanoha 'ipaipaihowa sahena 'asa weyahina 'ipilipili.

<sup>32</sup> “Ma hesi wanuwatuhuyahi to'aha gide 'ihapwesa Lota mwanena 'oina.

<sup>33</sup> “Ceguma taiya tauna yawasina weyahina 'i'aipate, nata yawasinaina 'ihe'wadalele, ma 'eguma taiya yawasina 'itagwale ma 'ihe'wadalele, 'abwa 'iloba hila.

<sup>34</sup> “Ma yahegwae bwaibwainigomi 'abehega hinuwanaina nage 'oina tomota 'eluwa 'ebe'eno 'aigeda 'oina si'eno, ma 'aigeda yatoe ta 'aigeda 'imiyamiya. <sup>35</sup> Wete gide wahiwahine 'eluwa si'e'ehalo, 'aigeda yatoe ta 'aigeda 'imiyamiya.” <sup>36</sup> (-)

<sup>37</sup> Coinega 'ana tomuliyawedi sihesilaleya, sigwae, “Bada, ta'eha?” Ta Yesu 'ihewaediya, “Ta'eha 'oina 'wayoha 'imiyamiya beno 'oina 'ao'ao si'eto'eto'auta.”

## 18

### *Hiwape 'aigeda 'ina 'ahwanoi toloina 'aigeda 'oina*

<sup>1</sup> Eema 'aigeda gwae hegehegedi Yesu 'i'ebwaediya ma 'abehega sahena 'ahwanoi 'oinega siwe'awe'a. <sup>2</sup> Bewa gidemusa 'igwaeya, “Caigeda 'asa 'oina toloina 'aigeda madouna 'imiyamiya, tauna Yehoba geya 'ida matauteya ta wete loheloheya geya 'ida he'asisiyediya. <sup>3</sup> Tupwaina 'oina wete 'aigeda hiwape 'imiyamiya, ma tuta baibaiwana hiwapeina 'ilatulatu toloinaina 'oina ta 'i'ahwa'ahwanoi 'oina lema weyahina, 'igwae, ‘Bada, 'agu 'aleha 'oinega 'u'abihetegau.’

<sup>4</sup> “Tuta 'aigeda 'aigeda gide 'ina paihowa, ma toloinaina genuwana ma 'ileme. Ta 'aigeda tuta 'oina toloinaina 'ilowahi'wata, 'oinega 'iboinamo 'oina 'igwaeya, ‘Tuwa Yehoba geya yamataute ta wete loheloheya geya yada he'asisiyanediya, <sup>5</sup> ma hesi hiwape bewa 'ina tauya hilahlama 'oiguwa weyahina ya'abihete 'ana 'aleha 'oinega, tabu ma 'agu wahi'wata 'ilagu hila.’”

<sup>6</sup> Coinega Yesu wete 'ihewaediya, 'igwae, “Toloinaina 'ina gwae weyahina wanuwatuhu. Tauna loheya galana ma hesi hiwape 'ilemeya. <sup>7</sup> Wete gide Yehoba 'ina tomotaiyao hehesinuwaidi nata 'ilemedi, 'eguma si'ahwanoi hilahila 'oina, sabwelo ma nihuwana 'oidiya. <sup>8</sup> Moisa tuwa, 'ina lemaina dumwaluna nata 'ipaihowa 'oidiya.

“Ma togidega 'omi wanuwatuhu 'eseya 'eguma saugaina taugu Loheyaiguina yahilama bale'u bewa 'oina, hisa tomota ma'idi hemisa yalobadi sitoholo pa'ala?”

### *Palisi ma takesi 'ana to'ewa 'idi 'ahwanoi*

<sup>9</sup> Tomota tupwadi sinuwatuhuya 'abehega taudi dumwaludi ma hali tomota geya, 'oinega Yesu 'igwae hegehegediyediya bewa gide, <sup>10</sup> 'igwaeya, “Caigeda tuta 'oina loheloheya siteluwa siluhuwa Hada He'asisi 'oina sabi 'ahwanoi Yehoba 'oina. Caigeda Palisi ma 'aigeda takesi 'ana to'ewa. <sup>11</sup> Coinega Palisiina 'itoholowa ma 'i'ahwanoiya, 'igwae, ‘Yehoba yo, yaloyauwedo 'oiuwa weyahina taugu geya gide 'iyagwao mumugadi, weyahina taudi toyagaha hedade, ma 'abo'aboidi, ma lologwalidi, ma wete taugu geya gide takesi 'ana to'ewa nage. <sup>12</sup> Taugu hesi wiki 'aigeda 'aigeda sabwelo 'eluwa 'oidiya 'e'ahai 'oinega yahudihudi, ma wete 'igu tobwatobwa mabwaiyana 'oinega tupwana ya'ebwa'ebwaego.’

<sup>13</sup> “Ma hesi takesi 'ana to'ewaina bwagebwagega 'itoholowa, ta ma'ina debamwad-ina lumalumana 'itutuya, ma 'ituluha ta 'i'ahwanoi, 'igwaeya, ‘Yehoba yo, 'usanapu pwaigauwa 'abehega taugu togala, 'oinega 'u'atemuyemuyegau!’ ”

<sup>14</sup> Ta Yesu wete 'oidiya 'igwaeya, “Moisa, loheyaina bewa 'ina 'ahwanoiina weyahina 'ana 'ahwabwebwe'ana 'ilobeya Yehoba 'oinega, ma hesi Palisiina geya. Weyahina 'eguma taiya tauna 'i'abilagasi nata silagusuluhe, ma 'eguma taiya tauna 'ilagusuluhe si'abilagasi.”

*Gwagwama Yesu 'igwae helauwediya*  
(Madiu 19:13-15; Maki 10:13-16)

<sup>15</sup> Tupwadi tomota natudiyao 'i'iudi si'ewedima ma 'abehega Yesu 'i'abitohodi, ma 'ana tomuliyao tomotaedi si'itediya ta si'ausidiya.

<sup>16</sup> Ma Yesu 'ibwau he'autediya ma 'igwae, “Sahena gwagwama wa'au'ausidi ma hesi watagwaledi ma 'oiguwa sinaoma. Weyahina gwagwama bewa gide Yehoba 'ina 'ebeloina 'ilobwaine bwaibwainidiya. <sup>17</sup> Yahegwaegomi 'eguma taiyewedi taudi gwagwama bewa gide 'idi hemisa, sowaswana Yehoba 'ina 'ebeloina 'oina siluhuluhe, ma hesi 'eguma geya, nata geya.”

*Wasawasa weyahina*  
(Madiu 19:16-30; Maki 10:17-31)

<sup>18</sup> MeYudiya 'idi tohanugeta 'aigeda 'inaoma ma Yesu 'ihesilaleya, 'igwae, “Bada, yasanapuya 'abehega 'owa tohe'ita bwebwe'ana, 'oinega to'aha nata yapaihowa ma yawasigu hataya yaloba?”

<sup>19</sup> Ma Yesu loheyaina 'ihewgaeya, “Togidega ta 'oinega 'u'ahwa bwebwe'anaegauwa? Geya 'eta taiya bwebwe'ana, beno tuwa Yehoba. <sup>20</sup> Ma Yehoba 'ina loinao 'usanapu pwaidiya, beno 'abehega:

Sahena logwali,

Sahena lohe'amasa,

Sahena yagaha,

Sahena hepwaila 'abo'abo,

Ma wete tamau ma sinau 'uhe'asisyanedi.”

<sup>21</sup> Ta loheyaina 'igwaeya, “Cigu tuta gwamega ta nige loinaedi beno yamuliya bwaibwainidiya.”

<sup>22</sup> Cina gwaaina bewa gide Yesu 'ihesagoheya, 'oinega 'igwaeya, “Caigeda ginaula tuwa 'ilosapuligowa, beno 'abehega 'ino tobwatobwa mabwaiyana 'uhegimwaneyedi ma 'adi maisa towewelohe 'oidiya 'uheguyaiyedi, ta 'oinega 'unaoma, 'umuliyegau ma 'oinega 'abwa 'ino wasawasa galewa 'uloba.”

<sup>23</sup> Gwae bewa loheyaina 'ihesagoheya, ta 'ina wasawasa madouna 'inuwhiya, 'oinega nuwana 'igala moisa.

<sup>24</sup> Cina nuwagalaina Yesu 'isanapu pwaiya, 'oinega tomota 'oidiya 'igwaeya, “Ceguma taiyewedi taudi ma'idi wasawasa madouna 'idi luhu Yehoba 'ina 'ebeloina 'oina mwau hedada. <sup>25</sup> Moisa, kameli tauna hebai madouna, 'oinega tupwana mwauna ma nidili 'ana 'ebesula 'oinega 'iluhu, ma hesi towasawasao 'idi luhu Yehoba 'ina 'ebeloina 'oina mwau hedade.”

<sup>26</sup> Bodaedi Yesu mahetenao simiyamiya gwaaina sihesagoheya, ta sihesilaleya, sigwae, “Ceguma bewa gidemusa, taiya hede sowaswahina ma 'ebe yaliyayaina 'iloba?”

<sup>27</sup> Coinega 'igwaeya 'oidiya, “To'aha tomota 'oidiya geya sowaswahina, Yehoba 'oina ginaulaedi meyameyahadi.”

<sup>28</sup> Coinega Pita Yesu 'ihewgaeya, “Bada, ma tauma togidega? Weyahina 'ima 'asao 'a'ebesine pwaidiya ma 'amuliyegowa.” <sup>29</sup> Ta Yesu mabwaiyadi 'ihewgaediya, 'igwae, “Yahepwaila dumwalu 'oimiya, 'eguma taiyewedi 'omi 'imi gogo bo mwanemiyao bo tasimiyao bo tamamiyao bo sinamiyao bo natumiyao wa'ebesinediya ma Yehoba 'ina

loina 'oina watagwalegemiya, <sup>30</sup> tuta bewa 'oina maisa madouna waloba, ma wete tuta sinaonaoma 'oina yawasimi hataya wa'ewa.”

*Yesu 'ina gwae 'amasa weyahina*  
(Madiu 20:17-19; Maki 10:32-34)

<sup>31</sup> Yesu site tuwelowedi 'ibwau 'autedima ma 'itoediya papaliya ta 'ihewgaediya, “Bewa tuwa tahanehane Yelusalema ma ginaulaina mabwaiyana palopitao mwalona silelediya taugu Loheyaiguina weyahigu nata silatu ma wa'itadi.

<sup>32</sup> Nugeta si'ebwayaegau taudi geya meYudiya 'oidiya, ma silotuyanegau ma si'abi-hedeba mwadinegau ma si'esohegau, <sup>33</sup> ta wete balaeyega sisapigau, ma silohe'amasigau, ta sabwelo hetoina 'oina 'amasega yatoholo hila.”

<sup>34</sup> Ma 'ana tomuliyaedi geya 'aigeda 'ina gwaeina 'ana nuwasabwalena 'oidiya 'iluhu.

*Yesu 'aigeda tomatagibugibu 'i'abihe bwebwe'aneya*  
(Madiu 20:29-34; Maki 10:46-52)

<sup>35</sup> Ma Yesu Yeliko 'oina 'ilatulatu, ma 'aigeda tomatagibugibu 'edai 'imiyamiya, 'ilolo'ahwa'ahwanoi mane ma tobwatobwa weyahidi. <sup>36</sup> Yesu ma 'ana bodao 'enadi 'ihesoheya, ta 'isalutuwa ma 'igwaeya, “Tayewedi beno?” <sup>37</sup> Ta sigwaeya, “Yesu gwama Nasaleta 'itautauya,”

<sup>38</sup> Coinega tomatagibugibuina 'ibwau 'enana madounega ma 'igwae, “Yesu yo, 'owa Debida 'ina susu, 'u'atemuyemuyegau!”

<sup>39</sup> Ma taudi tomotaedi sinugetama loheyaina si'ausiya, sigwae, “Culolagu! Tuwa wui!” Ma tuwa 'ibwau 'enana madounega ma 'igwae, “Debida tubuna yo, 'u'atemuyemuyegau.”

<sup>40</sup> Coinega Yesu 'itoholowa ta 'ihewgaediya ma loheyaina sibwauweyama.

Ta 'inao pwaima ta Yesu 'ihesilaleya, 'igwae, <sup>41</sup> “To'aha nuwanuwau ma yapaihowa 'oiuwa?”

Coinega 'igwaeya, “Bada sowaswahina ma matagu 'u'abihe 'asilaladi?”

<sup>42</sup> Ma Yesu 'igwaeya, “Bewa tuwa matau 'i'asilala, weyahina 'ino hemisa 'oinega 'ubwebwe'ana.”

<sup>43</sup> Nage 'oina matana 'i'asilala, ta ma'ina loyauwedo Yehoba 'oina Yesu 'imuliyeya. Ma bodaedi si'iteya, ta mabwaiyadi Yehoba sihepwatuweya.

## 19

*Sakiusa weyahina*

<sup>1</sup> Ma Yesu Yeliko 'oina 'iluhu pwaiya, ma 'asaina 'alonga 'itautauya. <sup>2</sup> Tupwaina 'oina 'aigeda takesi 'adi to'ewao 'adi tohanugeta 'imiyamiya, sanina Sakiusa, tauna towasawasa 'aigeda. <sup>3</sup> Ma tutaina Yesu 'itautauya, Sakiusa nuwanuwana ma Yesu 'ida 'ita 'abehega taiya tauna, ma hesi geya sowaswahina ma 'i'ita, weyahina tauna loheya to'uto'upana, ma wete boda madouna. <sup>4</sup> Coinega 'ipili nugeta ta 'aiwe 'aigeda 'ihaneya, sanina sikamole, ta nage 'oinega Yesu 'ida 'ita, 'eguma saugaina tupwaina 'oina 'ilatu.

<sup>5</sup> Ma saugaina Yesu 'inaoma tupwaina 'oina, 'i'itahaneya ta Sakiusa 'i'iteya, 'oinega 'ihewgaeya, 'igwae, “Sakiusa, 'usuluma mwayamwayau, weyahina nata taugu ba'idau 'ino hada tamiyamiya.”

<sup>6</sup> Sakiusa 'ilomwayamwayauwa ta 'isuluwa, ma ma'ina yaliyaya Yesu ba'idana sihelobaloba.

<sup>7</sup> Nage 'oina tomotaedi ginaula bewa si'iteya, ma silomugiyeya, sigwaeya, “Togidega ta Yesu 'iluhuwa togala 'ina hada?”

<sup>8</sup> Ma Sakiusaina 'itoholowa ta Yesu 'ihewgaeya, 'igwae, “Bada, bewa 'oinega 'igu tobwatobwa mabwaiyana ya'upwaluwa ma 'aigeda tupwa towewelohe ya'ebwaedi. Ta wete 'eguma taiya 'oinega mwalo ya'ewa puiya, yada hemaize ma'ana lohepoi 'ehata wete ya'ebwae.”



<sup>9</sup> Coinega Yesu 'ihegwaeya, “Bewa tuwa hada bewa 'oina 'abihetena 'ilatuma, weyahina loheya bewa tauna 'aigeda Ebalahamo 'ina boda. <sup>10</sup> Taugu Loheyaiguina, ta yanaoma ma 'ane todeya ya'ebesedi ma ya'abihetedi, gide loheya bewa.”

*Gwae hegehegedi heguyai weyahina*

*(Madiu 25:14-30)*

<sup>11</sup> Ma Yelusalema deina nata ma silatu, eeta bodaedi sinuwanuwatuhu 'abehega Yehoba 'ina lolina nata 'ihegaina, 'oinega gwae hegehegedi bewa 'i'ebwaediya, <sup>12</sup> 'igwaeya, “Caigeda bada 'i'atububu pwaiya ta 'itautauya tupwana bwaga 'oina ma 'abehega nobwa 'ihetoloina, ma 'abwa muliyetega 'ilohihilama. <sup>13</sup> Mulina ma 'itauya, 'ina topaihowao teni 'ibwau he'atedima ma 'adi heguheguyai kina 'aigeda 'aigeda 'i'ebwaediya ma 'ihegwaediya, ‘Cami heguheguyai bewa wahapaihowadi ma 'ana lohepoi waloba, 'ana siga yalohihilama.’

<sup>14</sup> “Ma muliyetega badaina 'ina tomotaiyao tupwadi silogwahateya, geya nuwadi ma 'oidiya 'ihetoloina, 'oinega wasa sihesumaneya, sigwaeya, ‘Loheyaina beno geya nuwama ma 'oima 'ihetoloina.’

<sup>15</sup> “Ma badaina tuwa 'ihetoloina. Eeta tutaina 'ilohihilama ta 'ina topaihowaedi 'ibwau he'atedima, nuwanuwana 'isanapu 'adi heguheguyaiyedi 'oidiyega hisa loheposeyana silobediya.

<sup>16</sup> “Ma loheya 'aigeda 'inugetama 'ina badaina matana 'itoholowa, ma 'ihegwaeya, 'igwae, ‘Bada, 'ino kinaina 'aigeda mwalo 'u'ebwaegauwa bewa 'ana lohepoi wete teni yalobediya.’

<sup>17</sup> “Coinega badaina 'igwaeya, ‘Causala! Cowa toguibiga moisa, weyahina ginaula 'i'iuna ma 'uhapaihowa bwaibwainiya, 'oinega maisau ya'ebwaego, beno 'asa teni 'oidiya 'uhetoloina.’

<sup>18</sup> “Ma loheya heluwena wete 'inaoma ta 'igwaeya, ‘Bada, 'ino kinaina 'aigeda mwalo 'u'ebwaegauwa bewa 'ana lohepoi paibi yalobediya.’

<sup>19</sup> “Coinega tauna wete 'ihegwaeya, 'igwae, ‘Casa paibi 'oidiya 'uhetoloina.’

<sup>20</sup> “Ma hetoina wete 'inaoma ma 'ihegwaeya, ‘Bada, 'ino kinaina bewa 'ale'o 'oinega yawaduya ta yalagu bwaibwainiya. <sup>21</sup> Weyahina yamatautegowa 'amuge ma 'i'waiha. Ma moisa, yamatautegowa weyahina 'owa loheya pa'aliu ma 'ino wasawasa 'u'ewa'ewa hali tomota 'idi paihowa 'oidiyega. Coinega 'ino kina bewa 'u'ewa hila.’

<sup>22</sup> “Ma badaina 'igwaeya, ‘Moisa, 'owa topaihowa galau. Tuwa 'uboi 'ino gwaeyega 'a lolina ya'ebwaego. Weyahina 'usanapugauwa 'abehega taugu loheya pa'aligu, ta 'igu wasawasa ya'ewa'ewa hali tomota 'idi paihowa 'oidiyega, <sup>23</sup> ma to'aha huhuna ta 'oinega geya 'igu maneina banika 'oina 'ulagu, ma saugaina yahilama ma'ana lohepoi yaloba?’

<sup>24</sup> “Coinega taudi badaina deina sitotoholo 'ihegwaediya, 'igwaeya, ‘Cigu kinaina 'oinega wa'ewa, ma loheyaina tauna loheposeyana madouna 'ilobeya wa'ebwae.’

<sup>25</sup> “Ma taudi sigwaeya, ‘Bada, sahena 'a'ebwa'ebwae, weyahina tauna teni kina 'i'ewediya ta sowasowahina.’

<sup>26</sup> “Ma badaina wete 'oidiya 'igwaeya, ‘Tuwa wa'ebwae, weyahina 'eguma taiya 'ana heguheguyai 'iloheposeyane, 'ana loheposeyana wete 'iloba, ma 'eguma taiya geya 'iloheposeyane, to'aha 'oina 'imiyamiya 'abwa 'oinega si'ewayahule. <sup>27</sup> Coinega bewa tuwa 'agu 'alehaowedi, taudi silogwahategauwa ma 'abehega geya nuwadi 'oidiya yahetoloina, watoedima ma mataguwa walohe'amasidi.’ ”

*Yesu 'ina luhu Yelusalema 'oina*

*(Madiu 21:1-11; Maki 11:1-11; Yoni 12:12-19)*

<sup>28</sup> Yesu 'ina gwae bewa 'ilosalohiya ma 'itoholowa, ta ma'ana tomuliyao sihanehane Yelusalema weyahina, <sup>29</sup> ta 'idi tauya 'oina Bedipegi ma Bedani deidiya silatulatu, beno Olibe 'oyana gabulena, 'oinega 'ana tomuliyao 'eluwa 'ihesumane nugetediya tupwae 'i'iudi 'oidiya ma'adi henuwalagu, <sup>30</sup> 'igwaeya, “Casa nage matamiya 'oina watauya, ta nage 'oina nata 'aigeda hebai wa'italoba, beno 'ase yauyaubona, tauna geya tomota sida

gelu tohoya, hebaiina walihasi wa'eweyama. <sup>31</sup> Ma 'eguma taiya 'igwae, 'To'aha weyahina beno hebaiina walihalihasi?' loheyaina wahegwae, wagwae, 'Bada nuwanuwana.'

<sup>32</sup> Coinega taudi sitauya ta ginaula mabwaiyadi silobediya gide Yesu 'ihewgae 'esediya. <sup>33</sup> Ma tutaina 'aseina silihasiya ma toni hebaiyedi sihegwaeidiya, sigwaeya, "Togidega ta 'ima hebai walihalihasi?" <sup>34</sup> Ta sigwaeya, "Bada nuwanuwana."

<sup>35</sup> Ma hebaiina si'eweya ta sitauyeya Yesu 'oina, ma 'adi 'wamega gwahuna siloyesoya, 'oinaga Yesu 'igeluhaneya, <sup>36</sup> ta 'itautauya ma tomota baibaiwadi 'adi 'wamao 'edai siyesodiya.

<sup>37</sup> Silatulatu Yelusalema deina, ta sidobidobi Olibe 'edana 'oina, ta 'ana tomuliyaowedi mabodaidi ma'idi yaliyaya Yehoba sihehpwatuwe, weyahina 'ina paihowa waiwaidi si'ita pwaidiya, <sup>38</sup> sigwaegwae, "Yauwedo Bada, Yehoba Saninega 'utauyama, 'oinaga yaliyaya ma hepwtu galewa 'oina simadou hedada."

<sup>39</sup> Coinega Palisiyao tupwadi bodaedi 'oidiyega Yesu sihegwaeiya, sigwaeya, "Bada, 'a tomuliyaedi 'uhewgaeidi ma silolagu."

<sup>40</sup> Ma Yesu 'igwaeya, "Sahena ya'au'ausidi, weyahina 'eguma taudi silolagu da'ule 'enadi 'ilagu ma sibwau."

#### *Yesu 'idouwa Yelusalema weyahina*

<sup>41</sup> Yesu 'ilatu pwaiya Yelusalema deina, ma 'asaina madouna 'i'iteya, nuwana 'igala ma 'idouwa, 'igwaeya, <sup>42</sup> "Yelusalema yo, nata tomotaimwao 'atemuyamuyaidi, weyahina tuta bewa 'oina 'adi 'abihetenaina 'ihapwesama, ma hesi geya sisanapu. <sup>43</sup> Ma hesi tuta 'inaonaoma 'oidiya 'adi 'alehao silatu ma simutudi, weyahina nata 'ino tupwa mabwaiyana si'ali sakowasiye, <sup>44</sup> ma mabwaiyadi siluhu ma tomotaimwao silohewumwalidi, ma wete hada mabwaiyadi sile'wa yahuledi. Muyaedi 'abwa 'oiuwa silatu, weyahina natumwaowedi 'adi to'abihetenaina geya si'inana."

#### *Yesu togimwaneyao Hada He'asisiyega 'ipa'idiya*

*(Madiu 21:12-17; Maki 11:15-19; Yoni 2:13-22)*

<sup>45</sup> Coinega 'itauya ta 'iluhuwa Hada He'asisi 'alona, ma tohegimwane 'alonega 'ipa'idiya, ma 'ihewgaeidiya, <sup>46</sup> 'igwaeya, "Buki He'asisi 'oina Yehoba 'ina gwae sileleya 'igwaeya, 'Cigu hada 'abehega hada 'ebe 'ahwanoi, ma 'omi wa'abibuiya ta 'abehega 'imi 'ebeyagaha."

<sup>47</sup> Ma sabwelo 'aigeda 'aigeda Hada He'asisiina 'oina 'ihehe'ita, ma topwaoli madoudi ta loina 'ana tohe'itao ma wete tohanugetao sitohotoho ma 'abehega Yesu silohewamasi, <sup>48</sup> ma geya sowaswahidi, weyahina Yesu 'ina he'itao tomota baibaiwadi nuwadi 'i'eweya.

## 20

#### *Yesu 'ana loina weyahina*

*(Madiu 21:23-27; Maki 11:27-33)*

<sup>1</sup> Caigeda tuta 'oina Yesu 'ihehe'ita Hada He'asisi 'oina, beno tetela bwebwe'ana 'ihehpwaila tomota 'oidiya, ma topwaoliyao ma loina 'ana tohe'itao ma wete babadao sinaoma ta Yesu sihesilaleya, <sup>2</sup> sigwae, "Loheya, taiya 'ina loinega ta bewa gide 'upaipaihowa 'ese?"

<sup>3</sup> Ma Yesu 'ihewgaeidiya, 'igwaeya, "Nugeta yahesilala 'oimiya. <sup>4</sup> Taiya 'ina loinega ta Yoni to'abihebabitaiso 'ipaihowa? Yehoba bo 'aigeda tomota?"

<sup>5</sup> Coinega taudimo 'oidiya sinuwanuwatuhu, ta sigwaeya, "Cina gwae togidega tahemaisa 'ese? Weyahina 'eguma tagwae, 'Yehoba 'oinaga' nata 'ihewgae hilegita 'igwae, 'Ma! To'aha hede weyahina ta Yoni geya wahemise?" <sup>6</sup> Ma 'eguma tagwae, "Tomota 'oinaga, tabu ta boda da'uleyega si'ahu yamategita, weyahina tomota mabwaiyadi Yoni sihemisaeya 'abehega tauna 'aigeda palopita."

<sup>7</sup> Coinega 'ina hesilalaina geya sihemaise bwaibwaini, ma hesi sigwaeya, "Geya 'asanapu."

<sup>8</sup> Ma Yesu wete 'igwaeya, “Taugu wete sahena 'oimiya yahehepwaila latuwe 'abehega taiya 'ina loinega ta bewa gide yapaipaihowa 'esa.”

*Bada 'ina tanoha 'ana topaihowao gwae hegehegedina  
(Madiu 21:33-46; Maki 12:1-12)*

<sup>9</sup> Coinega Yesu tomotaedi 'igwae hegehegediyediya 'igwaeya, “Caigeda loheya 'ina tanoha gileipa daisinamo 'i'umeya, ma 'ina topaihowao 'ihewgaediya ma si'ita'itayahi, ma tauna 'itauya hali tupwa, ta nobwa 'imiyamiya.

<sup>10</sup> “Ma hedodona 'ana tuta badaina 'ina hewali 'aigeda 'ihesumane hileya ma 'abehega gileipa huwaina tanoha 'ana to'itayahinao 'oidiyega 'i'eweyama. Citautauya ta geya si'ebwae, ma hesi sisapiya ta manimenimenamo sihesumaneya ta 'ihila.

<sup>11</sup> “Coinega badaina 'ina hewali heluwena wete 'ihesumaneya 'oidiya, ta sihunuya, ta wete si'abihedeba mwadineya, ta sihesumaneya 'ihila.

<sup>12</sup> “Ma wete hetoina 'ihesumaneya 'oidiya, ta wete sihunu he'i'iwasiya, ma sipali latuweya.

<sup>13</sup> “Coinega toni tanohaina 'inuwanuwatuhu, 'igwaeya, ‘To 'eda wete yapaihowa? Tuwa taugu natuguina yahesumane ma 'oinega si'amayabe, weyahina tauna tuwa natugu.’

<sup>14</sup> “Ma saugaina topaihowaedi bada natuna si'iteya 'inaonaoma siboidimo 'oidiya sigwaegwae, ‘Ciyagwao, loheya nage 'inaonaoma, tauna badaina natuna 'aigeda tuwa, 'oinega nata tuwa talohe'amasidi ma tauda tanoha taloinae.’

<sup>15</sup> “Coinega si'abiyahiya ta tanohega siula latuweya mulimuliya, ta nobwa silohe'amasiya.”

Ma Yesu 'ina he'ote'otetela 'igumwala pwaiya ta 'ihesilala 'oidiya, 'igwaeya, “To'aha nata badaina 'ina to'ita yahinaowedi 'oidiya 'ipaihowa? <sup>16</sup> Moisa, badaina 'abwa 'ilatu ma topaihowaedi 'ilohe'amasidi, ma 'oinega tanohina hali to'itayahinao 'i'ebwae.”

Babadaedi Yesu 'ina gwae bewa gide sihesagoheya ta sigwaeya, “Tauda sahena wete gidel!”

<sup>17</sup> Ma Yesu 'i'ebubudiya ta wete 'oidiya 'igwaeya, “Togidega 'ana sanapu Buki He'asisi 'ina hepweilaina, 'igwaeya, ‘Logidiina mwalo tohada'abi silogwahateya, ta tuta bewa sihetoholo nugeteya hada mata'ahwanina ma logidi mabwaiyadi 'iloinaedi.’

<sup>18</sup> “Ceguma taiya 'ibe'u logidi bewa 'oina, nata luluna 'ilasadi, ma logidiina 'eguma 'ibe'u 'aigeda taiya tabwanina nata wahina 'i'ahu piyapiyeyamo.”

<sup>19</sup> Bewa 'oina topwaoliyedi ta lina 'ana tohe'itao 'eda'eda si'ebeseya ta 'abehega Yesu si'abiyahi, weyahina sisanapuya 'abehega taudi tuwa weyahidi 'igwae hegehegediya, ma hesi geya si'abiyahi weyahina boda 'oidiya simatauta.

*Takesi Sisa weyahina  
(Madiu 22:15-22; Maki 12:13-17)*

<sup>20</sup> Eeta tuta baibaiwana Yesu silolomatayahi ma 'abehega to'aha 'ina pui siloba, eema 'oinega sihepwaile tolina 'oina ma 'ihewatalae, 'oinega tomota tupwadi sihesumanediya Yesu 'oina ta hesilalega si'abowe ma 'abehega 'ina pui siloba. <sup>21</sup> Ma tomotaiyedi sinaoma ta Yesu sihegwae, sigwae, “Bada, moisa 'owa 'ino gwaeyao ta 'ino he'itao mabwaiyana dumwaludi, ma wete 'asanapugowa 'abehega geya wete 'aigeda loheya 'uda matauteya, ma hesi Yehoba 'ina nuwatuhu 'ana tohe'ita moisa 'owa. <sup>22</sup> Coinega togidega, sowasowahina ma Kini Sisa weyahina takesi talagu, bo geya?”

<sup>23</sup> Ma Yesu bo'i 'idi 'aboina 'isanapuya, 'oinega 'ihewgaediya, <sup>24</sup> 'igwaeya, “Hana maneina wa'eweyama ya'ita.” Coinega si'ebwae ta 'ihewgaediya, 'igwaeya, “Wahewgaewau taiya bewa ma'ama'ayauna ma sanina maneina 'oina?”

Ta taudi sigwaeya, “Kini Sisa.”

<sup>25</sup> Coinega Yesu 'igwaeya, “Cehe gide! Ceguma Kini 'ina ginawala wa'ebwaya Kini 'oina, ma 'eguma Yehoba 'ina ginawala Yehoba wa'ebwae.”

<sup>26</sup> Yesu 'ina gwa'e bewa boda matadiya mabwaiyana dumwaluna, ta geya 'aigeda wete 'ina gwa'e pui siloba, ta 'atedi 'iyohowa ma simiya henonowa.

*To'amasa 'idi toholo hila  
(Madiu 22:23-33; Maki 12:18-27)*

<sup>27</sup> Coinega wete tupwana Sadusiyao, taudi geya sihemisa to'amasa 'idi toholo hila weyahina, sinaoma ta Yesu 'oina sihesilala, sigwaeya, <sup>28</sup> “Bada, lolina bewa gide Mosese 'ileleya weyahida, 'igwaeya, 'Ceguma 'aigeda loheya 'ihai ma geya natunamo ma 'i'amasa, loheyaina tasina hiwapeina ba'idana sihai ta 'oinega 'eguma wahineina 'ihenatuna, natunaina to'amasina 'ana miyalaena.’”

<sup>29</sup> Coinega 'ebe'ita si'ebwaeya, sigwaeya, “Caigeda loheya matasinao simiyamiya 'adi baibaiwa site sebeni, ta 'adi tautuwaina 'ihaiya ta geya natunamo, ma muliyetega loheyaina 'i'amasa. <sup>30</sup> Coinega tasina deinega hiwapeina 'i'eweya ta wete simiyamiyana ta geya natunamo, ta loheyaina 'i'amasa. <sup>31</sup> Coinega tasina wete deinega hiwapeina 'ihaiya, ta wete gide geya natunamo, ta 'i'amasa. Ta gide tuwa tasinao mabwaiyadi hiwapeina sihaihaiya si'amasa, ma geya natudiyao, <sup>32</sup> ta muliyetega wahine wete 'i'amasa.

<sup>33</sup> “Ma to'aha 'unuwatuhuya tomotaedi weyahidi, to loheya wahineina mwanena moisa, tutaina 'eguma 'amasega sitoholo hila? Weyahina site sebeniyedi sihaiya.”

<sup>34</sup> Ta Yesu 'idi gwa'e 'ihemaiseya, 'igwaeya, “Wanuwatuhuyahi 'abehega tuta bewa 'oina wahine ma loheya sihaihai, <sup>35</sup> ma hesi tuta 'inaonaoma 'oina 'eguma wahine ma loheya sowasowahidi ma 'amasega sitoholo hila nata geya'abwa wete sihaihai. <sup>36</sup> Weyahina nata taudi gide aneloseyao, ta geya'abwa wete si'ama'amasa hila, ma hesi Yehoba 'i'ahwa natunedi weyahina 'amasega sitoholo hila.

<sup>37</sup> “Ma Mosese mwalohene 'ihe'ita bwaibwainigita to'amasa 'idi toholo hila weyahina. Saugaina Mosese pwtula 'alona 'itautauya ta Yehoba 'aiwe sabelulu 'oinega 'ihewaeya, 'igwaeya, “Taugu Ebalahamo ta Aisake ta Yakobo 'idi Yehoba.’ <sup>38</sup> Bewa 'ana nuwasabwalena 'abehega geya to'amasa 'idi Yehoba, ma hesi taudi mayawasidi 'idi Yehoba, weyahina babadaedi Yehoba 'ina tupwa tuta bewa mayawasidi simiyamiya.”

<sup>39-40</sup> Nage 'oina lolina 'ana tohe'itao simatauta ta tupwadi sigwaeya, “Tohe'ita, 'ino maisa bwebwe'ana hedade,” 'oinega geya 'aigeda wete hesilala si'ebwa'ebwae.

*To'abihetenaina tauna Debida 'ina susu  
(Madiu 22:41-46; Maki 12:35-37)*

<sup>41</sup> Coinega Yesu wete 'ihesilala 'oidiya 'igwaeya, “Togidega ta 'oinega tomota tupwadi sigwaeya, 'abehega Debida 'ina susuwega To'abihetenaina Keliso 'ilatu, <sup>42</sup> weyahina buki wali Same 'oina Debida 'ina gwa'e 'igwaeya, 'Yehoba 'igwaeya 'igu Bada 'oina 'igwaeya: Cigu 'ebeulega 'umiyatoi, <sup>43</sup> ta 'ana siga 'a 'alehao yalagu suluhedi 'aheu 'adi 'ebelagu gabulena.’

<sup>44</sup> “Debidaina 'ina Bada Keliso, ma togidega hede Debida 'ina susuwega muliyetega Keliso 'ilatuma?”

*Lolina 'ana tohe'itao 'idi mumuga  
(Madiu 23:1-36; Maki 12:38-40)*

<sup>45</sup> Coinega boda mabwaiyadi sihehenono, ma Yesu 'ana tomuliyao 'ihewaediya, 'igwaeya, <sup>46</sup> “Tasigwao, sahena lolina 'ana tohe'itao 'idi mumuga wamulimuliye. Weyahina taudi mumugadi tuwa gide tuta baibaiwana nuwanuwadi ma 'adi 'ale'owao duduledi si'otedi ma tomota gamwagamwanidiya sisakosakowasi ma 'abehega sihe'asisiyedi. Ta wete nuwanuwadi 'idi 'ebemiya bwebwe'adi Hada Tapwalolo 'oidiya, ta wete guyai 'adi tuta nuwanuwadi ma wagahata simiyatoi. <sup>47</sup> Ta wete tuta baibaiwana tomota matadiya Yehoba 'oina si'ahwa'ahwanoi dudulena, ma hesi 'idi 'ahwanoiina geya bwebwe'ana, weyahina 'atediya sinuwanuwatuhu togidega nata hiwahiwape si'abo 'esedi ma 'idi tobwatobwao si'ewadi. Coinega 'abwa Yehoba maisa galana 'i'ebwaedi.”

## 21

*Hiwape 'aigeda 'ina helau**(Madiu 12:41-44)*

<sup>1</sup> Yesu 'i'e'ebubuna ta towasawasao 'idi helau mane helau 'ana 'ebelagu 'oina silagu-lagudi.

<sup>2</sup> Ci'e'ebubuna ta 'aigeda hiwape wewelohena 'i'iteya, 'ilaga ta 'ina helau toea 'eluwamo 'ilagudiya.

<sup>3</sup> Coinega Yesu 'igwaeya, “Moisa yahegwaegomi mabwaiyadi 'oidiyega hiwape nage 'ina helau madou hedade, <sup>4</sup> weyahina mabwaiyadi 'idi tupwa madouna 'imiyamiya, ma hiwape nage wewelohena ta 'ina mane mabwaiyana 'ilaguya. Geya 'aigeda wete 'ina tupwa 'imiyamiya ma 'oinega 'ana 'ilogimwane.”

*Tuta mwauna nata 'ilatu**(Madiu 24:1-14; Maki 13:1-13)*

<sup>5</sup> Ma Yesu 'ana tomuliyao tupwadi Hada He'asisi 'ana 'ita bwebwe'ana si'iteya, ta Yesu sihe'iteya ma sigwaeya, “Bada, Hada He'asisiina 'ana pasao 'adi 'ita bwebwe'ana hedade, weyahina da'ule madoudi 'oidiyega si'abiya, ma wete tomota 'idi helauwao bwebwe'adi 'oidiyega sihepaseya.”

Ma Yesu 'oidiya 'igwaeya, <sup>6</sup> “Hadaina nige wa'iteya, ma tuta 'inaonaoma 'oina mabwaiyana sile'wa yahuledi, ma sahena wete 'aigeda tupwa wa'ita'ita hile.”

<sup>7</sup> Coinega Yesu 'oina sihesilala, sigwaeya, “Tohe'ita 'uhegwaemai to tuta 'oina Hada He'asisiina siligehi, ma to 'ila'ilala 'adi 'ita 'oidiyega 'ada sanapu 'abehega ginauledi 'ugwaenediya nata silatuma?”

<sup>8</sup> Ta Yesu 'oidiya 'igwaeya, “Wa'itayahigomi 'amuge ta tomota tupwadi si'abowegomi, weyahina 'abwa tomota tupwana baibaiwana saniguwega sinaoma ma 'abehega sinugeta puiyegomi, ma 'aigeda 'aigeda 'igwae, 'Taugu To'abihetena,' ma tupwadi wete sigwae, 'To'abihetenaina 'ina tuta 'i'ehohoyama.' Ma hesi sahena taudi 'enadi wamulimuliyedi.

<sup>9</sup> “Ma 'eguma wete lo'aleha ma sahiya wasana wahesagohe, sahena wa'ate'ateyoho, weyahina ginaulaedi sida latu nugeta ma bale'u 'ana 'ebelosaloha 'abwa.”

<sup>10</sup> Ma wete 'ihewgaediya, “Cabwa hali boda hali boda 'oidiya silo'aleha. Ma wete hali 'ebeloina hali 'ebeloina 'oidiya silo'aleha.

<sup>11</sup> “Ma tutaina 'oina mwani'ini'i hali tupwa ma hali tupwa 'oidiya, ma gomale madouna, ma wete muyamuya madoudi, ma wete nata 'ebe henainaida ta 'ebe matauta galewega silatuma.

<sup>12</sup> “Ma hesi nugeta 'ami 'alehao si'abiyahigomi ma si'abihe muyemuyegomi, ma wete hada tapwalolo 'oidiya siheyatalaegomi ma deliya silagugomi. Ma wete kiniyao ta toloinao matadiya sitoegomi ma siheyatalaegomi weyahina 'omi 'abehega 'igu bodao.

<sup>13</sup> Cimi yatalaedi 'oidiya wasagu wahepwaile 'oidiya. <sup>14</sup> Ma sahena wanuwauwatuho hedade, 'eguma tutaina watoho ma 'oidiya wagwaegwae, <sup>15</sup> weyahina taugu 'abwa gwae dumwaludi ta sanapu ya'ebwaegomi ma 'ami 'alehao gesowana si'ahwa 'abo'abowegomi.

<sup>16</sup> “Tutaina 'oina wete tamamiyao ta sinamiyao ta tasimiyao ta 'imi susuwao ta wete 'iyamiyao sitebaegomi, ta tupwadi 'oimiyega silohe'amasidi, <sup>17</sup> ta tomota mabwaiyadi silo'alehegomi weyahina 'omi 'abehega 'agu tohemisao. <sup>18</sup> Ma hesi sahena 'aigeda to'ehimi si'abi'abihegala, <sup>19</sup> ma 'omi watoholo pa'ala eeta 'oinega yawasimi hataya waloba.

*Yelusalema 'ana 'abihegala**(Madiu 24:15-21; Maki 13:14-19)*

<sup>20</sup> “Ma 'eguma to tuta 'oina Yelusalema wa'ita tolo'alehao simiya sakowasiye wasanapuya 'abehega nata Yelusalema silohegwatu. <sup>21</sup> Coinega Yudiya 'ana tomiyao sowasowahidi ma 'oyai siden. Ma wete Yelusalema 'ana tomiyao sowasowahidi ma 'asega silatu. Wete gide taudi tanoha sipaipaihowa geya'abwa 'asai siluhuluhu hila.



<sup>22</sup> Sabwelowedi 'oidiya Yehoba 'ina yatala nata 'ilatu tomota 'oidiya, ta 'oinega Buki He'asisi 'ina hepweila nugeta mabwaiyana 'ilatu.

<sup>23</sup> “Tuta nage 'oina togamwagamwa ma tohesusuwao si'atemuyamuya, weyahina tuta mwauna mebale'u weyahidi, ta nage 'oina nata Yehoba 'ina gamwasowalega meYudiya 'i'abihe muyamuyadi moisa. <sup>24</sup> Nage 'oina tolo'alehaowedi 'abwa tupwana tomota silohe'amasidi, ma tupwadi si'abiyahidi ta hali tupwa ma hali tupwa 'oidiya sitauyedi, ma tolo'alehaowedi taudi tomiya ganamuli 'abwa sihewaiwai ma Yelusalema mabwaiyana siloine, ma 'oina sisakosakowasi 'ana siga tolo'alehaowedi 'idi lolina 'ilolagu.

*Yesu 'ina hilama*  
(Madiu 24:29-31; Maki 13:24-27)

<sup>25</sup> “Ma wete muliyetega 'ebehenainaida silatuma sinala ma wai'ena ta 'ipwalao 'oidiyega, ma tomiya bale'u mabwaiyadi 'idi matautega sitaitai weyahina bagodu madoudi sidagugu hanema, <sup>26</sup> ta 'oinega ma'idi matauta madouna siyamwayamwa 'abehega to ginaula wete galana nata bale'uwa 'ida latu, weyahina ginaula mabwaiyana galewa simiyamiya 'idi waiwai si'elowe'a.

<sup>27</sup> “Taugu Loheyaiguina, ta tuta nage 'oina mebale'u mabwaiyadi si'itegau yalohega yasulusuluma, ma'igu waiwai ta ma'igu wasawasa madouna. <sup>28</sup> Ma 'eguma wa'ita 'ila'ilalaedi bewa sihegaina hohau, beno wa'atepatu ma wa'itahane, 'ami 'abihetena 'ilatulatu.”

*Saido 'ana gwae hegehegedi*  
(Madiu 24:32-35; Maki 13:28-31)

<sup>29</sup> Coinega Yesu wete 'aigeda gwae hegehegediyega 'ihewagediya, 'igwaeya, “Caiweina saido ma wete tupwana 'aiweyao 'eguma wa'itadi, <sup>30</sup> ta nabaidi 'ehaudi 'igalugalu wasanapuya 'abehega losihe 'ana tuta 'ilohohoya. <sup>31</sup> Gide wete 'eguma 'ila'ilalaedi wa'italobadi, beno wada sanapu 'abehega Yehoba 'ina lolina 'ilatulatuma. <sup>32</sup> Yagwae moisa 'oimiya mehau 'omi sahena wagumwagumwala ta 'ana siga ginulaedi silatu nugeta. <sup>33</sup> Cabwa galewa ta bale'u sisawala ma hesi 'igu gwaeyao geya'abwa sisawasawala.

*Wa'itayahi ma wa'atububu*

<sup>34</sup> “Ma wa'itayahigomi ma sahena 'e'ahai ta numa we'aha waiwai 'oidiya watautauya hedade, ma wete sahena 'imi miya bale'uwa weyahina wanuwawatuwu hedade, 'amuge ma sabweloina 'oina Yehoba 'ilohe'ateyohogomi ta gide gomana 'oinega si'onegomi. <sup>35</sup> Weyahina sabweloina 'oina mebale'u mabwaiyadi 'ilohe'ateyohodi 'ina bwa'omatana 'oinega.

<sup>36</sup> “Coinega wa'atububu hataya, ma tuta baibaiwana wa'ahwa'ahwanoi 'abehega ma'imi 'atepatu ginulaedi 'oidiyega wahewaiwai, ma sowaswana watoholo taugu Loheyaiguina mataguwa.”

<sup>37</sup> Tuta bewa 'oidiya Yesu Hada He'asisi 'oina 'ihehe'ita, ta lahilahiya 'ihilahila Olibe 'oyana 'oina 'i'eno'eno, <sup>38</sup> ma gonagona 'aigeda 'aigeda tomota sitautauya Hada He'asisi 'oina Yesu sabi hesagoheina.

## 22

*Yudasa nuwanuwana ma Yesu 'itebae*  
(Madiu 26:1-5, 14-16; Maki 14:1-2, 10-11; Yoni 11:45-53)

<sup>1</sup> Ma Hataona Guyaina 'ana tuta 'i'ehohoya ta 'ane pwalawa daisinamo geya 'ana 'ebe 'abisesehamo si'ai. <sup>2</sup> Tutaina 'oina topwaoliyao madoudi ta lolina 'ana tohe'itao sinuwawatuwu dadana togidega ma Yesu si'abiyahi ma silohe'amasi, ta geya sowa-sawahidi, weyahina boda simatautediya.

<sup>3</sup> Nage 'oina Seitani Yudasa 'oina 'iluhuwa, tauna sanina heluwena Isakaliyota, ma wete tauna Yesu 'ana tomuliya 'aigeda site tuwelo 'oidiyega. <sup>4</sup> Coinega Yudasaina 'itauya Topwaoli Madoudi ta Hada He'asisi 'ana to'itayahinao 'oidiya, ma ba'idadiu sihegwaegwaeya 'abehega togidega Yesu 'itebae 'ese ma si'abiyahi. <sup>5</sup> Yudasa 'ina gwae

sihesagoheya ma siyaliyaya, ta 'oina sigwae hemisa 'abehega 'ana maisa si'ebwae. <sup>6</sup> Ma Yudasa wete 'oidiya 'itagwala, 'oinega tuta bwebwe'ana 'iyamweya ta 'abehega Yesu 'oidiya 'itebae ma si'abiyahi, ma sahena tomota matadiya.

*Hataona 'e'ahaiina*

*(Madiu 26:17-25; Maki 14:12-21; Yoni 13:21-30)*

<sup>7</sup> Coinega Hataona 'ana sabwelo 'ilatuwa, ta pwalawa geya 'ana 'abihesesehamo si'ai, ma wete lamiyao sihunudi Hataona 'ana 'ebenuwatuhu weyahina. <sup>8</sup> Coinega Yesu 'ana tomuliyao Yoni ma Pita 'ihewgaediya, 'igwaeya, “Watauya ma Hataona 'aiina weyahida wa'atububu.”

<sup>9</sup> Ta taudi sigwaeya, “Ta'eha 'oina nuwanuwau ma 'a'atububu?”

<sup>10</sup> Coinega 'oidiya 'igwaeya, “Watauya Yelusalema 'oina walatu, ma 'eguma 'aigeda loheya ma'ina we'aha patu 'i'ahaliya waloba, loheyaina wamuliye, ma 'eguma hadai 'iluhulu 'omi wete hadaina 'oina waluhu, <sup>11</sup> ma tonihada wahegwae, wagwae, ‘Cima tohe'ita bewa gide 'igwae 'esa 'igwaeya, “To tupwa 'utagwale ma 'oina ma'agu tomuliyao Hataona 'aiina 'a'ai?”’ <sup>12</sup> Ma 'oinega nata tupwa madouna tabwana ta 'atu'atububuina 'ihe'itegomi, tauna 'oina Hataona 'aiina wa'atububu weyahida.”

<sup>13</sup> Coinega 'ana tomuliyawedi sitauya ta to'aha gide Yesu 'igwaeneya 'oidiya, ginauledi mabwaiyadi silobediya, ta hadaina 'oina Hataona 'e'ahaiina si'atububuya weyahidi.

*Bada 'ina 'ai*

*(Madiu 26:26-30; Maki 14:22-26; 1 Kolinita 11:23-25)*

<sup>14</sup> Ma 'e'ahai si'atububu pwaiya, ta Yesu ma'ana tohepwailao simiya 'autama, ta ba'idanao si'ai'ai, <sup>15</sup> ma 'idi 'aiina 'alona Yesu 'ihewgaediya, 'igwaeya, “Nuwanuwagu madouna ma 'omi ba'idagwao Hataona 'e'ahaiina ta'ai ma muliyetega 'igu muyamuyao yalobadi. <sup>16</sup> Ma yahegwagomi 'igu 'ai bewa 'ana 'ebelosaloha, ta geya wete Hataona 'aiina yalotolotoho hila 'ana siga 'ana sanapu moisa 'ilatu Yehoba 'ina 'ebeloina 'oina.”

<sup>17</sup> Ta waini mabiyona 'i'eweya, ta weyahina 'iloyauwedowa Yehoba 'oina, ma muliyetega 'ihewgaediya, 'igwaeya, “Biyo bewa wa'ewa ma 'aigeda 'aigeda mabwaiyami wanuma. <sup>18</sup> Ma yahegwagomi tuta bewa ma muliyetega waini bewa sahena 'oinega yanumanuma hila ta 'ana siga Yehoba 'ina lona 'ilatu.”

<sup>19-20</sup> Ta beledi 'i'eweya, ta weyahina 'iloyauwedowa Yehoba 'oina ma muliyetega 'i'abihisiya, ma 'oidiya 'ihewguyaiya, ma 'ihewgaediya, “Bewa wahigu, <sup>21</sup> ma wa'ita, loheyaina tauna nata 'itebaegau tuta bewa ba'idagu 'a'ai'ai. <sup>22</sup> Taugu Loheyaiguina 'abwa yatauya 'edaina mwalo Yehoba 'iloineya, ma hesi 'agu totebaina hesi 'atemuyamuyana!”

<sup>23</sup> Coinega 'ana tomuliyawedi taudi 'oidiya sihesilala, sigwaeya, “Taiya hede bewa gide 'ina paihowa?”

*Tohanugeta ma 'ina hewali weyahidi*

<sup>24</sup> Coinega taudi 'oidiyega he'ohe'ohena 'ilatuwa 'abehega taiya lohanena mabwaiyadi 'oidiyega. <sup>25</sup> Coinega Yesu 'ihewgaediya, 'igwaeya, “Bale'uwa kiniyao 'idi tomotao 'oidiya siloiloina, ta topaihowawedi 'idi toloinao si'ahwa'ahwa bwebwe'enedi, <sup>26</sup> ma 'omi sahena gide taudi, ma hesi taiya tauna 'oimiyega lohanena 'ida loduduna tauna gide tuwa 'imi hewali, ma wete 'imi tohanugetao sida hetopaihowa weyahimi.

<sup>27</sup> “Ma to'aha wanuwatuhuya, 'abehega taiya lohanena, 'eguma 'aigeda 'imiyatoi 'i'ai'ai ta 'aigeda weyahina 'ihetapewa? Nuwana tauna to'ai 'awa? Ma taugu tuwa tohetapewaina, weyahina wa'ita taugu gamwagamwanimiya bewa tuwa yahetapewa, ta taugu gide 'imi hewali.

<sup>28</sup> “Ma 'omi 'igu tuta mwau 'oidiyega bo'i watoholo pa'ala, ta bewa tuwa 'omi ba'idagwao tamiyamiya. <sup>29</sup> Coinega to'aha gide Tamagu 'igu 'ebeloina 'i'ebwaegauwa 'omi wete gide ya'ebwae 'esegomi, <sup>30</sup> ma 'oinega 'omi 'igu 'ebeloina 'oina ba'idagwao 'abwa ta'ai ma tanuma, ta wete wagahata wasawasa 'oidiya wamiyatoi ma me'Isileli 'idi susuwao tuwelo waloinaedi.”

*Pita 'ina uhala Yesu 'ihewwaila nugeteya  
(Madiu 26:31-35; Maki 14:27-31; Yoni 13:30-38)*

<sup>31</sup> Ma wete Yesu 'igwaeya, “Saimoni gwae bewa 'uhesagohe, weyahina Seitani tagwala 'i'ewa pwaiya ma mabwaiyami 'itohogomi, gide tuwa tobegula 'ina witiyao 'i'ahu hutuhutu tohodiya, <sup>32</sup> ma sahena 'ebetohoina 'oina 'uwe'awe'a, weyahina weyahiu ya'ah-wanoi waiwaiya 'ino toholo pa'ala weyahina. Coinega 'eguma to tuta ma 'unuwahilama 'eda 'ausalana 'oina, tasimwao wete 'u'abihe waiwaiyedi.”

<sup>33</sup> Coinega Pita 'igwaeya, “Bada, yapasima pwaiya weyahiu, ma 'eguma deliya silaguluhuwego, taugu wete ba'idau, ma 'eguma wete silohe'amasigo, taugu wete gide silohe'amasigau.”

<sup>34</sup> Ma Yesu 'ihewwaeeya, “Pita, yagwae moisa 'oiuwa, nata muliyetega ma 'am'am 'idou, ma nugeta 'owa 'uuhalaegau matoi.”

<sup>35</sup> Ta Yesu mabwaiyadi 'ihewwaeediya, 'igwaeya, “Mwalo yahesumanegomiya ma yahewwaeegomiya, 'oinega geya 'imi mane 'ana 'ebedo'o bo 'imi peha bo 'ami butu wa'ewa'ewadi, ma togidega mwau walobeya?”

Ta taudi sigwaeya, “Geya 'eta wete to'aha.”

<sup>36</sup> Coinega Yesu wete 'ihewwaeediya, “Bewa tuwa 'imi mane ma'ana 'ebedo'o ma 'imi peha wete wa'ewadi. Ma 'eguma taiya 'oimiyega geya 'ina 'elepa 'alehamo, 'ana 'ale'o 'igimwaneye ma 'ana maisa 'oinega 'ina 'elepa 'ida gimwane.

<sup>37</sup> “Weyahina tuta 'ilatu pwaima, ma 'oinega Buki He'asisi 'oina mwalo 'aigeda gwae weyahigu sileleya, 'ida latu moisa, 'igwaeya, 'Siyatalaeyeya gide tuwa 'aigeda loina 'ana toligeha.' Ma wete gwae baibaiwana weyahigu sowasowana silatu.”

<sup>38</sup> Ta taudi 'ina gwae sihemaiseya sigwaeya, “Bada, 'ima 'elepa 'alehao bewa 'eluwa.” Ma Yesu 'igwaeya, “Beno sowasowahina.”

*Yesu 'i'ahwa'ahwanoi Yehoba 'oina  
(Madiu 26:36-46; Maki 14:32-42)*

<sup>39</sup> Ma Yesu 'asa madouna 'i'ebesineya, ta ma'ana tomuliyao sihilama 'oya Olibe 'oina, beno 'idi 'ebe'eno. <sup>40</sup> Tupwaina 'oina sinaoma, ta Yesu 'ana tomuliyao 'ihewwaeediya, “Wa'ahwa'ahwanoi Yehoba 'oina ma 'oinega sahena Seitani 'itohotohogemi.” <sup>41</sup> Ta muliyetega 'ana tomuliyao 'oidiyega 'ihawasiya, ta taunamo nobwa 'ahena 'itulaseya, ta 'i'ahwa'ahwanoi Tamana 'oina, <sup>42</sup> 'igwaeya, “Tamagu yo, 'eguma nuwanuwau, muya-muya biyoina bewa 'oiguwega 'uda 'ewayahule. Ma sahena taugu 'igu nuwatuhu 'oinega, ma hesi 'owa 'ino nuwatuhu 'oinega 'upaihowa.”

<sup>43</sup> Coinega anelose galewega 'ilatuwa ta Yesu 'i'abihe waiwaiyeya, <sup>44</sup> ma nuwana 'imwau hedadeya, 'oinega 'i'ahwanoi waiwaiya, ta 'ana 'amweyahi 'ipesupesu bale'uwa, gide tuwa bweyaha 'idaudau.

<sup>45</sup> Yesu 'ina 'ahwanoi 'ilosalohiya, ma 'itoholowa ta 'ihila, 'ana tomuliyao 'i'itediya 'idi nuwanuwau 'oinega si'eno sinediya, <sup>46</sup> eeta 'ihewwaeediya, 'igwaeya, “Sahena wa'eno'eno! Watoholo ma wa'ahwa'ahwanoi, sahena Seitani 'itohotohogemi.”

*Yesu si'abiyahiya  
(Madiu 26:47-56; Maki 14:43-50; Yoni 18:3-11)*

<sup>47</sup> Yesu 'abwa 'ilolohatoto ma boda silatuma, ta Yudas ba'idadiu, tauna Yesu 'ana tomuliyaya 'aigeda, ta bodaedi 'ihanugetedima. Yudasaina 'inaowa Yesu deina ta 'abehega 'i'atusapwali. <sup>48</sup> Coinega Yesu Yudas 'ihewwaeeya, 'igwaeya, “Yudas, geya 'umwadina ma 'unaoma, ta taugu Loheyaiguina 'atusapwalega 'utebatebaegau!”

<sup>49</sup> Ma Yesu 'ana tomuliyaeedi sisanapu pwaiya to'aha nata 'ilatu, 'oinega sigwaeya, “Bada, togidega, tahunudi?” <sup>50</sup> Eeta 'aigeda 'ana tomuliyaina 'ina 'elepa 'aleha 'i'abilagasiya ma Topwaoli Madouna 'ina topaihowa tena 'ebeulega 'i'upwa yahuleya.

<sup>51</sup> Ta Yesu 'igwaeya, “Walolagu! Sahena gide!” Ta muliyetega Yesu loheyaina tenana 'i'abitohoya, ma 'i'abihe bwebwe'aneya.

<sup>52</sup> Yesu 'ana to'abiyahinaowedi, taudi Topwaoli Madoudi ma Hada He'asisi 'ana to'itayahinao ta babadao sinaoma, ta Yesu 'ihewgaediya, 'igwaeya, “Hede taugu toyagaha, ta 'oinega ma'imi 'elepa 'aleha ta ma'imi wepasi wanaoma sabi 'abiyahigau! <sup>53</sup> Ma to'aha huhuna ta 'oinega geya wa'abiyahigau sabwelowedi mabwaiyadi gamwagamwanimiya yamiyamiya Hada He'asisi 'alona yahehe'ita tomota 'oidiya? Ma bewa tuwa 'abehega watoho ma wa'abiyahigau weyahina lina guguyou 'ina tuta 'ilatu pwaiya.”

*Pita matoi Yesu 'iuhaleya*

*(Madiu 26:57-58, 59-67; Maki 14:53-54, 66-72; Yoni 18:12-18, 25-27)*

<sup>54</sup> Coinega Yesu si'abiyahiya, ta sitoeya Topwaoli Madouna 'ina hada. Ma Pita bwagebwagega 'imuliyedima.

<sup>55</sup> Hadaina 'ana 'abwalu 'alona topaihowao 'aiwe siholeya ta mabwaiyadi simwaimwailu. Pita 'i'itediya ta 'oidiya wete 'iluhuwa. <sup>56</sup> Coinega topaihowa 'aigeda mewahinena Pita 'i'e'ebubuya ta 'igwaeya, “Loheya bewa mwalo Yesu ba'idana ya'itediya.” <sup>57</sup> Ma Pita 'iuhala ta 'igwaeya, “Wahine, geya yasanapu taiya tauna weyahina 'ugwaegwae.”

<sup>58</sup> Muliyetega 'aigeda wete loheya Pita 'i'e'ebubuya ta 'ihewgaeya, 'igwae, “Cowa 'aigeda 'ana tomuliyaina.”

Ta Pita 'igwaeya, “Ciya! Taugu geya!”

<sup>59</sup> Ma tupwana simiya 'amana, ma loheya 'aigeda wete 'enana waiwaina 'oinega 'iyanao 'ihewgaediya, 'igwaeya, “Moisa, loheya bewa Yesu 'ana tomuliyaina 'aigeda, weyahina tauna gwama Galili.”

<sup>60</sup> Ma Pita 'igwaeya, “Ciyagu, loheyaina weyahina 'ugwaegwae geya yasanapu.” Cabwa 'igwaegwae ma 'am'am meloheyana 'idouwa.

<sup>61</sup> Coinega Yesu 'i'ita hila ta Pita 'i'iteya, ta nage 'oina Pita 'inuwatuhu yahiya Badaina 'ina gwae tutaina 'igwaeya, “Nata muliyetega ma 'am'am 'idoudou ma nugeta 'owa 'uuhalegau matoi.” <sup>62</sup> Eema Pita nuwana 'igala madouna, ta 'ilatuwa 'atamana, ta 'idouwa.

*Yesu 'ina yatala meYudiya 'idi babadao matadiya*

*(Madiu 26:54-68; Maki 14:55-65; Yoni 18:19-24)*

<sup>63</sup> Ta Yesu 'ana to'itayahinao taudi Yesu silolotuyaneya ma sisapisapiya. <sup>64</sup> Ma wete matana sipaiya ma sahena 'i'e'ebubuna, ta sisapisapi ma sihehesilala, sigwaeya, “Cuhegwae mai taiya 'isapigowa? Weyahina 'ugwae 'abehega 'owa palopita.” <sup>65</sup> Ta wete tupwana gwae galadi 'oidiyega siheliye ta 'ana siga <sup>66</sup> gona 'i'adaleya, ma 'oinega meYudiya 'idi babadao, beno Topwaoli madoudi ta lina 'ana tohe'itao sideli 'auta, ma Yesu si'eweyama, ta gamwagamwanidiya sihetoholoya, <sup>67</sup> ma sihesilaleya sigwaeya, “Cuhepwaila dumwalu 'oima, togidega 'owa To'abihetenaina bo geya?”

Coinega Yesu 'ihewgaediya, 'igwaeya, “Geya wahemisaegau, 'oinega sahena ya-hehepwaila 'oimiya, <sup>68</sup> weyahina 'eguma hesilala ya'ebwaegomi geya'abwa wahehe-maisadi. <sup>69</sup> Ma wasanapu 'abehega tuta bewa 'oinega ma muliyetega taugu Loheyaiguina yamiyamiya Yehoba Tohewaiwai hedade 'ina 'ebeulega.”

<sup>70</sup> Coinega mabwaiyadi sigwaeya, “Cawa, tomada! Cowa Yehoba natuna?” Coinega 'idi gwae 'ihemaiseya, 'igwae, “Beno wagwae pwaiya.”

<sup>71</sup> Coinega taudi sigwaeya, “Bo'i 'ina gwae pui taloba pwaiya, 'oinega sahena wete 'ana tohe'ewao weyahidi tanuwanuwatuhu, weyahina 'i'abo pwaiya 'abehega tauna Yehoba natuna.”

## 23

*Yesu 'ina yatala Pailato matana*

*(Madiu 27:1-2, 11-14; Maki 15:1-5; Yoni 18:28-38)*

<sup>1</sup> Coinega mabwaiyadi sitoholowa, ta Yesu sitoeya ta sitauyeya toloina madouna sanina Pailato 'oina, sabi yatalae.

<sup>2</sup> Sitauyeya Pailatoina 'oina, ta Yesu weyahina sihepwaila 'abo'abowa, sigwaeya, “Loheya bewa 'ina he'ita 'ahesagohediya ta 'abehega tauma meYudiya 'ihawasiyemai, beno gide 'igwaeya, ‘Sahena Kini Sisa 'ana takesi walagulagu, weyahina taugu kiniina, ta To'abihetenaigu.’”

<sup>3</sup> Coinega Pailato Yesu 'ihesilaleya, 'igwaeya, “Togidega, 'owa meYudiya 'idi kini, wa?” Ta 'ihewaeya, 'igwae, “Beno 'ugwae pwaiya.”

<sup>4</sup> Ta muliyetega Pailato topwaoliyedi ta bodao 'ihewaediya 'igwaeya, “Loheya bewa geya 'eta 'ina pui yaloba.”

<sup>5</sup> Ma taudi tuwa sihe'ewa yahiya, sigwae, “Ci'abo'abowego beno, weyahina 'aloba pwaiya tomota 'i'abo'abowedi ma 'abehega gabemaniyao 'oidiyega 'iwatahidi. Weyahina Galili 'oina 'ihewaineya 'ina 'aboina, ta Yudiya tupwanao mabwaiyadi 'ilohegumwalidiya, ma 'ilatu pwaima tupwa bewa 'oina.”

#### *Yesu 'ina yatala Helodi matana*

<sup>6</sup> Cidi gwae bewa Pailato 'ihewaineya ta 'ihewaediya, “Togidega tauna gwama Galili, wa?”

<sup>7</sup> Ma taudi sigwaeya, “Cehe, gide.”

Coinega Pailato 'ihewaediya, 'igwaeya, “Galili beno Helodi 'ina 'ebeloina, 'oinega Yesu watauye Helodi 'oina ma tauna 'iloinae, weyahina bewa tuwa Helodi 'ebwa Yelusalema 'oina 'imiyamiya.”

<sup>8</sup> Sitauyeya Helodi 'oina, ta tutaina Helodi Yesu 'i'iteya 'iyaliyaya madouna, weyahina tuta dudulena Helodiina nuwanuwana ma Yesu 'i'ita, weyahina wasana 'ihewaineya, ta 'ina paihwa waiwai nuwanuwana ma 'i'itadi. <sup>9</sup> Coinega Helodi Yesu 'ihesilala hedadeya, ta geya 'aigeda wete 'ida hemaeseya.

<sup>10</sup> Ta topwaoli madoudi ta loina 'ana tohe'itao silaga Helodi 'oina, ma Yesu sihehe'ewa tubatubali. <sup>11</sup> Ma 'oinega Helodi ma'ina tolo'alehao Yesu silolotuyaneya ta si'ahwa galegaleya. Ma muliyetega kini 'ana 'wama sihe'oteya ma sihesumane hileya Pailato 'oina. <sup>12</sup> Sabweloina 'oina Helodi ma Pailato 'idi hegamwagamwagu tuta dudulena 'oinega sihe'iyaiyaguwa.

#### *Yesu 'ina 'amasa weyahina*

*(Madiu 27:15-26; Maki 15:6-15; Yoni 18:39-19:16)*

<sup>13</sup> Coinega Pailato Topwaoli Madoudi ma babada ta tupwana meYudiyaedi 'ibwau he'atudima, <sup>14</sup> ta 'ihewaediya, 'igwaeya, “Loheya bewa 'oiguwa wa'eweyama ta wahewaiyeya 'abehega tomota 'i'waniyediya, ta matamiya yaheyatala pwaiyeya ma geya 'aigeda 'ina pui yalobaloba 'imi he'ewaowedi 'oidiyega. <sup>15</sup> Helodi wete geya 'aigeda pui 'ilobaloba, ta 'oida 'ihesumane hileyama. Coinega geya wete lohe'amasa 'ilobwaine, <sup>16</sup> ma sapimo 'iloba, ma 'oinega yatagwala ma 'itauya.” <sup>17</sup> (-)

<sup>18</sup> Coinega bodaedi mahemahetena sibwauwa sigwaeya, “Tauna 'i'amasa, ma hesi Balaba 'ulihasi weyahima.” <sup>19</sup> Balabaina lohe'amasa weyahina deliya silaguya, weyahina tupwaina 'oina mwalo Balaba ma'iyanao meLoma silo'alehediya, ta tupwana loheloheya silohe'amasidiya.

<sup>20</sup> Ma Pailato nuwanuwana ma Yesu 'i'etolihasi, 'oinega boda wete 'ihesilalediya, <sup>21</sup> ma hesi taudi si'alamaninini hedadeya, sigwaeya, “Kelose 'oina tatutu hepa'ine!”

<sup>22</sup> Pailato 'ina gwae hetoina 'oina 'ihewaediya, 'igwaeya, “To'aha hede 'ina pui ta 'oinega 'abehega 'amasa 'iloba? Weyahina geya 'eta wete galana 'oina yalobaloba. Ma hesi sapimo 'ilobwaineya ma muliyetega yalihasi.”

<sup>23</sup> Ma hesi bodaedi tuwa 'abwa sibwauwau hedahedade, sigwaegwae, “Kelose 'oina tatutu hepa'ine!”

Ta bodaedi 'idi gwae 'ihewaiwaiya, <sup>24</sup> 'oinega Pailato 'oidiya 'itagwala ma Yesu sida 'abihekelose. <sup>25</sup> Ma loheyaina nuwanuwadi 'i'etolihasi weyahidi, tuwa 'i'etolihasiya, tauna tolohe'amasaina deliya silaguya mwalo tutaina tauna meLoma 'idi tohanugetao



'ilo'aleha 'oidiya. Coinega Pailatoina boda nimadiya Yesu 'ilaguya, ma 'idi nuwatuhiina sida losalohi.

*Yesu kelose 'oina situtu hepa'iyeya*

*(Madiu 27:32-44; Maki 15:21-32; Yoni 19:17-27)*

<sup>26</sup> Yesu sitoe pwaiya ta sitauyeya, ma 'edai 'aigeda loheya sanina Saimoni silobeya, tauna gwama Sailini, pwtulega 'ilatuma ta 'itautauya 'asai. Coinega tolo'alehaowedi Saimoniina siloineya ta Yesu 'ana kelose 'i'ahaliya, ta 'imuliya.

<sup>27</sup> Ma boda madouna Yesu simuliyeya, ma wete wahiwahine baibaiwadi simulimuliya, ma sidoudou ma'idi nuwagala Yesu weyahina. <sup>28</sup> Ma Yesu 'i'itahila ta wahiwahineyedi 'ihewaediya, “Comi Yelusalema wahiwahinediyao, sahena weyahigu wadoudou, ma 'omi waboi weyahimi ma natumiyao weyahidi wadou, <sup>29</sup> weyahina tuta 'inaonaoma 'oina mwau 'ilatu ma taiyawedi 'omi 'aga'agalimi, nuwana geya natumimo, nata bwebwe'ana waloba. <sup>30</sup> Weyahina tutaedi 'oidiya 'abwa tomota 'oya 'oidiya sigwae, ‘Coya, wabe'uma ma wasamumai!’ <sup>31</sup> Moisa, taugu nata yahesilae, ma 'omi 'abwa wahesilae geyogeyoi. Weyahina taugu gide 'aiwe 'idahigu, ma 'omi tuwa gide 'aiwe 'ama'amasidi.”

<sup>32</sup> Ma togala wete 'eluwa sitoediya ta Yesu ba'idanao silohe'amasidi. <sup>33</sup> Coinega 'aigeda tupwa 'oina silatuwa, sanina Mwagu, ma tupwaina 'oina kelose bale'uwa silaguya ma Yesu situtu hepa'ineya ma sihetoholoya, ma togalaedi siteluwa wete 'adi kelose 'oidiya situtu hepa'iyediya, ta 'aigeda Yesu 'ebeulanega, ma heluwena Yesu 'adigeyageyanega sihetoholodiya.

<sup>34</sup> Coinega Yesu 'igwaeya, “Tamagu yo, 'idi pui bewa 'unuwasamudi, weyahina geya sisanapu to'aha sipaipaihowa.” Ma tolo'alehaowedi Yesu 'ana 'wama si'eweya, ta 'oinega si'ehayaheyaleya, tuwa gide siulahesinuwa, ma 'oinega 'eguma taiyawedi sinugeta 'wamaedi si'ewadi.

<sup>35</sup> Nage 'oina tomota si'e'ebubuna, ta meYudiya 'adi tohanugetao Yesu silolotuyaneya, sigwaegwae, “Hali tomota 'i'abihetediya, ma hana bewa tuwa tauna 'ida 'abihete, 'eguma tauna To'abihetena Keliso Yehoba 'oinega.”

<sup>36</sup> Tolo'alehaowedi wete Yesu silotuyaneya, ta waini memaina si'eweyama ta si'abihaneheya, <sup>37</sup> ma sigwaeya, “Ceguma 'owa meYudiya 'idi kini, 'u'etopelego 'uboi.” <sup>38</sup> Ma wete 'ana kelose pwtana 'ina 'amasa huhuna sileleya, 'igwaeya, “Loheya bewa meYudiya 'idi kini.”

<sup>39</sup> Keloseyedi 'oidiyega 'aigeda togalaina Yesu 'iheliyeya, 'igwaeya, “To'aha weyahina 'owa To'abihetenaina, ma geya 'u'etopelegita?”

<sup>40</sup> Ma togalaina heluwena 'iyanaina 'iheliyeya, 'igwae, “Togidega Yehoba geya 'u-mataute? Ma 'uhesagohe tatetoi 'ada lolina 'aigeda tuwa si'ebwaegita, <sup>41</sup> ma lomaina 'owa ma taugu 'ilobwainegita, weyahina tauda togala, ma loheya bewa geya 'eta 'ina puimo.”

<sup>42</sup> Coinega loheyaina Yesu 'ihewaeya, “Yesu, 'abwa 'ino hetoloina 'ana tuta, sowa-sawahina ma 'unuwatuhugau?” <sup>43</sup> Ma Yesu 'igwaeya, “Yagwae moisa 'oiuwa, 'owa ma taugu tupwa 'ausalana 'oina nata tamiyamiya.”

*Yesu 'ina 'amasa*

*(Madiu 27:45-56; Maki 15:33-41; Yoni 19:28-30)*

<sup>44</sup> Casudiladila ma sinala 'iguguyouwa, 'oinega tupwa mabwaiyana 'iguguyouwa ta 'ana siga lahilahiya 'asa 'i'asilala hila. <sup>45</sup> Ma 'ale'oina 'oinega Hada He'asisi sibiliupeya, tutaina 'oina 'ilotaigala luwa. <sup>46</sup> Coinega Yesu 'enana madounega 'ibwauwa, 'igwaeya, “Tamagu yo, yaluyaluwagu nimauwa yalagulagu.” Cina gwae bewa 'igwaeneya ma yawasina 'igumwala.

<sup>47</sup> Nage 'oina tolo'alehao 'adi tohanugeta 'i'iteya Yesu yawasina 'igumwala, 'oinega Yehoba 'ihewatuweya 'igwaeya, “Moisa, loheya bewa loheya bwebwe'ana.”

<sup>48</sup> Ma wete to'ebubuna mabwaiyadi tupwaina 'oina si'eto'autama Yesuina 'ina 'amasa si'iteya, ta ma'idi nuwagala sihila 'idi 'asa. <sup>49</sup> Ma Yesu 'iyanao ta wete wahiwahineyedi mwalo Galiliyega simuliyeyama, taudi bwaga sitotoholo ma Yesu 'ina 'amasa si'e'ebubu.

*Yesu 'ana lagu taona*

*(Madiu 27:57-61; Maki 15:42-47; Yoni 19:38-42)*

<sup>50-51</sup> Caigeda loheya sanina Yosepa, Yudiya loheyaina 'ina 'asa 'i'iuna Alimatiya, tauna loheya bwebwe'ana ta ma'ana hemisa. Loheyaina meYudiya 'idi tohanugeta 'aigeda, ta 'iyamwayamwa ma to tuta Yehoba 'ihetoloina meYudiya 'oidiya. Mwalo tutaina tohanugetao nuwanuwadi ma Yesu silohe'amasi, ma Yosepaina geya nuwana. <sup>52</sup> Loheyaina Pailato 'oina 'itauya, ta Yesu wahina 'i'ahwanoiyeya ma 'abehega 'igalihe. <sup>53</sup> Coinega Pailato 'itagwala, ta Yosepa ma'iyanao Yesu wahina kelose 'oinega si'ewa suluheyama, ta siwaduhiya 'ale'o wa'ewa'e'ena 'oinega, ma muliyetega sigaliheya. Gogoina siyalaiya gide tuwa duluha dimwa 'alona, ma geya 'aigeda tuta to'amasa wahina 'oina silagu.

<sup>54</sup> Sabwelo nage 'oina meYudiya 'idi tuta 'atububuna 'idi Sabati weyahina. <sup>55</sup> Ma wahiwahineyedi mwalo Galiliyega Yesu simuliyeyama taudi sitauya Yesu 'ana galiha si'iteya, ma wete wahina 'ana 'ebelagu si'iteya. <sup>56</sup> Coinega sihila 'asai ta holowa 'ausalana si'atububuya Yesu wahina 'ana holowa weyahina, ta sabweloina mulina si'aiyawasiya, weyahina Sabati gide 'ana loina.

## 24

*Yesu 'ina toholo hila*

*(Madiu 28:1-10; Maki 16:1-8; Yoni 20:1-10)*

<sup>1</sup> Coinega wete gona 'i'adaleya, beno wiki 'ana sabwelo nugenugetana gonagona, ma wahiwahineyedi holowa si'atububuya si'eweya, ma sitauyeyama gogowa. <sup>2</sup> Sitauyama ma gogo si'iteya 'ana 'ahuboda dimwa sibui hile pwaiya. <sup>3</sup> Coinega galihina 'alona siluhuwa, ma Yesu wahina geya si'itatho.

<sup>4</sup> Coinega gogoina 'oina ma'idi henuwanaluwa simiyamiya ma si'e'ebubuna, ma tuta 'i'iuna 'oina loheya 'eluwa, ma 'adi 'wama wa'ewa'e'ena ta 'asi'asilalana silatuwa, ta deidiya sitoholowa.

<sup>5</sup> Wahiwahine loheyaedi si'itediya ta simatauta, 'oinega sibe'u talutalubu'iya bale'uwa, ma loheloheyaedi wahiwahine 'oidiya sigwaeya, "To'aha weyahina to'amasa 'idi tupwa ma loheya mayawasina wa'ebe'ebese?" <sup>6</sup> Tauna geya 'ebwa, ta 'ina gwaaina 'oimiya wanuwatuhuyahi mwalo Galili 'oina ba'idamiu wamiyamiya, tutaina 'igwaeya, <sup>7</sup> "Taugu Loheyaiguina nata sihe'ebwayaegau togala 'oidiya, kelose 'oina situtu hepa'iyegau, ma sabwelo hetoina 'oina 'amasega nata yatoholo hila.'" <sup>8</sup> Wahiwahineyedi gwaewa bewa sinuwatuhu yahiya, <sup>9</sup> 'oinega galihina si'ebesineya sitauya Yesu 'ina topaihowao site lebeni ma 'iyadiyao 'oidiya, ta sihepwaila to'aha gide gogowa 'oidiya 'ilatuwa.

<sup>10</sup> Tohepwailaedi taudi Meli Magidala ta Yowana ta hali Meli, tauna Yemesa sinana, ma wete tupwadi wahiwahine ba'idadiyao, Yesu 'ina toholo hila weyahina 'ina topaihowaowedi sihegwaediya, <sup>11</sup> ma tomotaedi wahiwahine 'idi gwaewa geya sihemisae, 'idi nuwatuhu 'abehega tuwa silolotuyena. <sup>12</sup> Ma hesi Pita 'itoholowa, 'ipili gogoina 'oina, 'i'italuhuwa 'ale'omo, 'oinega 'ihila ma'ina nuwapwanopwano to'aha 'ilatuwa.

*Tomota siteluwa 'idi helobaloba Yesu ba'idadiu*

*(Maki 16:12-13)*

<sup>13</sup> Sabweloina 'oina Yesu 'ana tomuliyao 'eluwa sitautauya 'aigeda 'asa 'oina sanina Emeusa. Casaina 'ana dudula Yelusalema 'oinega gide 'eguma gonegonega tatoholo ma gonagonaina 'ana gamwagamwana 'oina talatu. <sup>14</sup> Siteluwaedi sitautauya ma sihegwaegwae ginauledi Yesu 'oina silatuwa weyahidi, <sup>15</sup> Sitautauya sigwaegwae liya, 'oinega Yesu 'oidiya 'ilatuwa ta ba'idadiu sitautauya. <sup>16</sup> Yesuina si'ita pwaiya, ma hesi gesowana si'inana.

<sup>17</sup> Coinega 'ihegwaediya, 'igwaeya, "To nuwatuhu weyahina wahegwaegwae liya?"

Ma taudi ma'idi nuwagala sitoholo henonowa. <sup>18</sup> Ma 'iyanaina sanina Kaliopasa 'igwae hila, ta Yesu 'oina 'igwaeya, "Ciya, 'owa 'uboimo Yelusalema 'oina geya 'usanapu to'aha 'ilatuwa sabwelo 'etoi 'oidiya wa?"

<sup>19</sup> Coinega Yesu 'igwaeya, “To'aha?” Ma taudi sigwaeya, “Nuwatuhuwedi Yesu gwama Nasaleta 'oina silatuwa. Loheyaina tauna palopita, ma wete Yehoba ma tomota matadiya 'ina gwaeyao ta 'ina paihowao waiwai. <sup>20</sup> Ma 'ima Topwaoli Madoudi ma 'ima tohanugetao loheyaina siyatalaeya 'ina 'amasa weyahina, ta muliyetega tolo'alehao situtu hepaliyeya kelose 'oina. <sup>21</sup> Ma 'ahemiseya 'abehega 'ida 'abihetema tauma meIsileli. Silohe'amasiya ma sabwelo 'eluwa sigumwala, ma nige sabwelo hetoina. <sup>22</sup> Ma tupwana wahiwahine 'oimega nuwama si'abihe'waniya weyahina nige 'abwa kululu sitauya galiha, <sup>23</sup> ta Yesuina wahina geya si'itatoho, ma sihilama, ta to'aha gide anelose 'idi he'ita 'oidiya beno 'oima sihepwaila 'abehega 'itoholo hila pwaiya. <sup>24</sup> Wete gide tupwadi 'oimega sitauya galihina 'oina, ta silobeya gide wahiwahineyedi 'idi hepwailla, ta Yesuina geya si'itatoho.”

<sup>25</sup> Coinega Yesu 'oidiya 'igwaeya, “Nuwapotapotaimi, weyahina geya palopitao nugenugeti 'idi gwaeyao wada hemisediya. <sup>26</sup> To'abihetenaina 'ilobwaine bwaibwainiya ma muyamuyaedi 'ida lobadi ma 'oinega muliyetega sanina 'ihemadou.” <sup>27</sup> Coinega 'ihegaina ma 'oidiya 'ilihasa to'aha gide Buki He'asisi 'ina hepwailla To'abihetenaina weyahina. Mosese ta palopitao 'idi bukiyao 'oidiyega 'ihegaina, ma Buki He'asisi mabwaiyana 'ilohegumwalidiya, ta 'oinega sanapu sida loba.

<sup>28</sup> Ma tupwana 'oina sitautauya deina silatu pwaiya, ta Yesu 'ihewaediya, 'igwaeya, “Wamiyamiya ma yatautauya.” <sup>29</sup> Ma taudi sigwaeya, “Geya! Sahena 'utautauya, 'ebwa ta'eno, weyahina 'iboi pwaiya.” Coinega 'itagwala, ma 'iluhuwa 'idi hada.

<sup>30</sup> Cidi tuta 'ai 'oina, Yesu beledi 'i'eweya, ta weyahina 'igwae helauwa, ma muliyetega 'i'abihisiya ta 'i'ebwaediya. <sup>31</sup> Nage 'oina nuwadi 'isabwalena ta Yesuina si'inaneya, ta 'oidiyega 'i'waiha.

<sup>32</sup> Ta siteluwaedi taudi 'oidiya sigwaegwae, sigwaeya, “Moisa tutenina 'edai tanaonaoma, ma 'ilihalihasa Buki weyahina, 'ada lotohona hagana gide tuwa 'aiwe 'ateda 'isabesabelulu.”

<sup>33</sup> Coinega sitoholo mwayamwayauwa ma sitauya Yelusalema, ta nobwa 'iyadiyao site lebeni silobediya, ma tupwadi wete ba'idadiyao simiya 'autama, <sup>34</sup> ma bodaedi Yesu weyahina sigwaegwae, sigwaeya, “Saimoni 'ida Badaina 'i'ita pwaiya, 'amasega 'itoholo hila.”

<sup>35</sup> Ta siteluwaedi wete sihe'ote'otetela to'aha gide 'edai 'ilatuwa, ma wete 'ina 'abihisi beledi 'oinega si'inaneya, siteteliya.

*Yesu 'ilatuwa 'ana tomuliyao 'oidiya*

*(Madiu 28:16-20; Maki 16:14-18; Yoni 20:19-24; Paihowa 1:6-8)*

<sup>36</sup> Cabwa 'iyadiyao 'oidiya sihe'ote'otetela ma Yesuina 'ilatuwa ta gamwagamwanidiya 'itoholowa, 'igwaeya, “Helau 'oimiya,” <sup>37</sup> ta si'iteya ma simatauta, 'idi nuwatuhu 'aigeda yaluyaluwa galana. <sup>38</sup> Coinega Yesu 'ihewaediya, 'igwaeya, “Sahena wamatamatauta! Sahena wete wahehenuwanaluwa. Taugu tuwa. <sup>39</sup> Ma hesi nimagu ta 'ahegu wa'itadi ma wa'abitohogau, weyahina yaluyaluwa galana geya 'wapinamo, ta wete geya lulunamo.” <sup>40</sup> Gide 'ihewaeya, ma wete nimana ta 'ahena 'ihe'itaediya 'oidiya.

<sup>41</sup> Nage 'oina siyaliyaya, ma hesi tupwana ma'idi henuwanaluwa weyahina geya sihemisa moisa. Ma 'ihewaediya, “Ce'ahai hisa, wa'ebwaegau ma ya'ai?” <sup>42</sup> Ma silahana tupwana mwesomwesona si'ebwaeya, <sup>43</sup> ma matadiya 'i'aiya.

<sup>44</sup> Ma 'ihewaediya, 'igwaeya, “Gwaeyedi yatetela pwaidiya 'oimiya tutaina taugu ba'idamiu, mabwaiyana weyahigu sileleya Mosese 'ina Buki 'oina ta palopitao 'idi buki 'oidiya ma wete buki wali Same 'oidiya, ma 'oinega 'igu hepwaillaina 'ana sanapu moisa 'ida latu.”

<sup>45</sup> Nage 'oina nuwadi 'i'abihe 'asilalediya ta Buki He'asisi sisanapuya.

<sup>46</sup> Ma 'oidiya 'igwaeya, “Bewa gide silele 'esediya 'igwae, 'To'abihetenaina muyamuya ta 'amasa 'ida loba, ma sabwelo hetoina 'oina 'amasega 'ida toholo hila, <sup>47</sup> ma muliyetega saninega tetela bwebwe'ana, nuwabui ma galana 'ana nuwasam weyahidi siguguyae.' Cidi guguyaina 'ida hegaina Yelusalema 'oinega, ma 'ida sakowasi bale'u mabwaiyana

'oina. <sup>48</sup> Ginaula bewa 'omi tuwa 'adi tohepwailao. <sup>49</sup> Ma hesi taugu nata Tamagu 'ina gwae hemisaina, beno Yaluyaluwana yahesumaneyama 'oimiya ma 'i'abihe waiwaiyegomi, 'oinega Yelusalema 'oina wayamwayamwa weyahina.”

*Yesu 'ina hane galewa*

*(Madiu 16:19-20; Paihowa 1:9-11)*

<sup>50</sup> Coinega 'ina gwae 'ilosalohiya, ma muliyetega 'itoediya ma sitauya Bedani 'oina, ta nobwa nimana 'iyasidiya 'oidiya, ma 'igwae helauwediya. <sup>51</sup> Cina gwae helauina 'oina, 'aena 'i'eweya ma 'ihaneya galewa. <sup>52</sup> Taudi 'ina 'ebhaneina 'oina ma'idi he'asisi si'etuluha, ma muliyetega ma'idi yaliyaya madouna sihila Yelusalema. <sup>53</sup> Sihila ma Hada He'asisi 'alona tuta baibaiwana Yehoba sihehpwatuwe.

## YONI Tetela Bwebwe'ana Yoni Cileleya

Yoni Yesu 'ana tomuliya 'aigeda, ma Yesu Yoni 'ihelauweya madouna, 'oinega Yesu 'ina toholohila mulina 'ihetohewpaila Yesu weyahina, ma tetelina 'ileleya 'abehega Yesuina tauna Yehoba, ta hesi meYudiya 'idi tohanugetao Yesu siguipaileya, ta taudi 'idi loina galana 'oinega meLoma Yesu silohe'amasiya kelose 'oina.

Buki bewa 'alona Yesu 'ina hegwaegwaeyao baibaiwadi Yaluyaluwa Tabuna weyahina, ma tauna Yesu 'ina hane galewa mulina 'ihewaseyama bale'uwa, 'ana tohemisao 'i'abihe waiwaidi, ma 'i'abihenuwa sanapuwedi Yehoba ma Yesu weyahidi.

### *Gwae Ciheloheya*

<sup>1</sup> Tuta 'ebe hegaina hauhau 'oina Gwae huhuna 'imiyamiya. Huhunaina tuwa Tauna Keliso. Tauna Yehoba ba'idana, eeta tauna tuwa Yehobaina. <sup>2</sup> Weyahina 'ebe hegaina hauhau 'oina Gwae huhunaina Yehoba ba'idana simiyamiya. <sup>3</sup> Ma Gwae huhunaina tauna ginaula mabwaiyana 'ipaihowediya ma wete ginaula mabwaiyadi 'ihemasalahediya Yehoba ba'idana, ta geya 'eta wete tohemasalaha. <sup>4</sup> Gwae huhunaina mayawasina moisa, 'oinega 'asilala 'i'eweyama ta 'i'abi latuheyama tomiya bale'u mabwaiyada 'oida. <sup>5</sup> Ma 'oinega 'asilalaina guguyou 'oina 'isae haneya ma guguyouina geya 'ina waiwaimo. Casilalaina geya wete 'ina 'ebe lolagumo.

<sup>6</sup> Eeta Yehoba loheya 'aigeda 'ihesumaneya, sanina Yoni, <sup>7</sup> Tauna tomota 'oidiya 'inaoma ma 'abehega 'asilalaina weyahina 'ida hepwaile ma 'oinega 'abehega tomota baibaiwadi sihesagohe ma 'idi hemisa silagu 'asilalaina 'oina. <sup>8</sup> Tauna Yoniina geya 'asilalaina, ma hesi 'asilalaina 'ana to'etala hepwahepwaila. <sup>9</sup> Ma 'asilalaina 'asilala moisa. Gogo gabulena mabwaiyada 'oida 'ihe'asilala.

<sup>10</sup> Tauna 'itauya pwaima gogo gabulena 'oina, ma gogo gabulena 'imiyamiya, ma tauna tuwa gogo gabulena 'ana tohemasalaha, ma gogo gabulena 'ana tomiyaedi geya sisanapu to loheya. <sup>11</sup> Ma saugaina wete 'iboi 'inaoma 'ina bodao 'oidiya, ma wete taudi silogwahateya. <sup>12</sup> Ma hesi boda tupwadimo 'ina gwae sihesagoheya ta sihemisaeya 'abehega tauna tuwa To'abihetenaina. Coinega bodaedi 'oidiya 'itagwala 'abehega Yehoba natunao. <sup>13</sup> Bodaedi taudi tagwae sili'uhila. Ma li'uhilaina geya 'abehega loheloheya bweyahidi nuwana 'idi nuwatuhu 'oinega. Ma hesi li'uhilaina Yehoba 'oinega.

<sup>14</sup> Ma Gwae huhuna 'iheloheya, ma bewa tuwa mahetedai tamiyamiya. Ma 'ina wasawasa madou hedadena 'i'abi hemaedaneya 'oima ta 'a'iteya, 'oinega 'asanapuya 'abehega tauna tuwa Yehoba natuna moisa, ma wete tauna tohelau moisa, wete mumugana mabwaiyana bwebwe'ana.

<sup>15</sup> Mwalo Yoni Yesu 'ihewpawileya 'enana madouna 'oinega 'igwae, "Loheyainaina bewa tauna weyahina yahehewasa, tutaina yagwaeya, 'Loheya 'aigeda muliguwega 'itautayama, sanina madou hedadena 'abwa taugu. Weyahina taugu 'abwa geya yali'u ma tauna 'imiyamiya.'

<sup>16</sup> "Tauna tohelau ma to'ebwaya moisa, weyahina 'ina helauina 'oinega mabwaiyada 'ilohemahegita. <sup>17</sup> Yehoba 'ina loina Mosese 'oinega silatuwa. Ma hesi helau moisa ma mumuga bwebwe'adi Yesu Keliso 'oinega silatuma. <sup>18</sup> Yehoba 'ana 'ita geya 'eta taiya 'ida 'iteya, ma hesi natuna moisa 'iboi 'isanasanapu Tamana 'ana 'ita. Weyahina tauna Tamana deina 'imiyamiya, 'oinega tauna Tamana 'ana 'ita 'ihe'itegita."

### *Yoni tauna to loheya?*

<sup>19</sup> Tuta beno 'oidiya, meYudiya 'idi tohanugetao topwaoli tupwadi ma Libai tupwana 'ina bodao 'oidiyega sihesumanedima Yelusalema 'oinega Yoni sabi hesilalaina 'abehega tauna to loheya. <sup>20</sup> Beno 'oina Yoni geya 'ilowahi'wata 'idi hesilalaina 'oina weyahina,



ma hesi 'idi hesilalaina 'ana maisa bwebwe'ana ma maemaedanina 'i'ebwaediya 'igwae, "Taugu geya To'abihetenaina." <sup>21</sup> Coinega taudi wete sihesilala hileya sigwae, "Hede taiya 'owa? Bo 'abehega 'owa Ilaitiya?" Ma Yoni 'igwaeya, "Taugu geya Ilaitiya." Ma taudi wete sihesilala hileya sigwae, "Bo nuwana 'owa 'aigeda wete palopita, palopitainaina tauna 'ayamwayamwa?" Ma Yoni 'ihewgae hilediya 'igwae, "Geya."

<sup>22</sup> Coinega tohesilalaedi wete sigwae hila, sigwae, "Cowa hede to loheya? Mane hana 'uda hegwaemai ma 'aneyage 'alohihila ma 'ima tohanugetao 'ahewgae bwaibwainidi to'aha gide 'ino hegwaegwae weyahiu." <sup>23</sup> Ma Yoni 'igwaeya, "Mwalona palopita Aiseya weyahigu 'ihewwaila pwaiya 'igwae,

'Cabwa nata tobwau 'aigeda yoho 'awawa 'ilatu ma 'ibwauwau 'igwae, "Cinapwana 'ina 'eda wahunae ma wa'abi heduhedumwalu." ' ' "

<sup>24-25</sup> Coinega tohalewasaedi taudi Palisiyedi sihewasaedima sihesilaleya sigwae, "Ceguma 'owa geya To'abihetenaina, bo 'owa geya Ilaitiya, bo 'owa geya palopitaina tauna weyahina 'ayamwayamwana, hede to'aha weyahina 'u'abi'abi hehabitaiso?" <sup>26</sup> Ma Yoni 'idi hesilalaina 'ihemaiseya 'igwae, "Taugu tuwa tomota we'ahaga ya'abi'abi hehabitaisodi. Ma loheyaina geya wasanapu bewa tuwa gamwagamwanimiya 'itotoholo. <sup>27</sup> Tauna tuwa muliguwega 'itautauyama, sanina madou hedadena 'abwa taugu. Geya sawasawahigu ma 'ana butu 'ahenega yalihasi yahule, weyahina tauna loheya madou hedadena."

<sup>28</sup> Ginaula mabwaiyana bewa Bedani 'oina silatuwa, beno Yoni 'ina 'ebe hehabitaiso 'oina, Yolidani hali tupwega.

#### *Yehoba 'ina lami weyahina*

<sup>29</sup> Ci'adaleya, Yoni Yesu 'i'iteya 'itautauyama 'oina. Ma Yoni boda 'ihewgaediya 'igwae, "Loheya nage 'itautauyama Yehoba 'ina lami, tauna 'abwa mebale'u weyahida 'i'amasana, ma 'ida puiyao 'i'ewa yahuledi. <sup>30</sup> Loheyainaina mwalona weyahina yahepwaila nugeta, tutaina yagwaeya 'abehega loheya 'aigeda muliguwega 'itautauyama, tauna sanina madou hedadena 'abwa taugu. Weyahina tauna tonugeta, 'abwa muliyetega yalatumu. <sup>31</sup> Loheyainaina taugu geya yasanapu toho. Beno yasanapuya 'abehega taugu meIsileli 'oimiya yatauyama ma we'aha 'oinega ya'abi'abi hehabitaisogemi. Muliyetega 'abwa 'igu pailowa 'oinega loheyainaina 'omi wasanapu."

<sup>32</sup> Yoni 'ihewwaila latuwa 'igwae, "Yehoba Yaluyaluwana ya'iteya 'ana 'ita gidemusa gabubu galewega 'isuluma Yesu 'oina 'itowa. <sup>33</sup> Mwalo loheyainaina geya yasanapu toho. Ma hesi Yehoba tauna 'ihesumanegauma babitaiso we'ahaga yapaipailowadi, 'ihewgaeguwa 'igwae, 'Cabwa nata Yaluyaluwagu 'u'ita 'isuluma ma loheyaina 'oina 'itowa, beno tauna 'abwa Yaluyaluwagu 'oinega boda 'i'abi hehabitaisodi." <sup>34</sup> Coinega Yoni boda 'ihewgaediya 'igwae, "Loheyainaina moisa mataguwega ya'iteya, ma bewa tuwa weyahina 'oimiya yahehewasa tauna moisa Yehoba natuna."

#### *Yesu 'ana tomuliyao nugenugetaidi*

<sup>35</sup> Ci'adaleya hali sabwelo 'oina, Yoni ma'ana tomuliyao siteluwa mahetenao sitotoholo, <sup>36</sup> ma Yesu si'iteya deidiyega 'itautauya. Coinega Yoni 'ana tomuliyaeidi 'ihewgaediya 'igwae, "Loheyaina nage Yehoba 'ina lami."

<sup>37</sup> Eema siteluwaedi Yoni 'ina gwae sihesagoheya, 'oinega Yesu simuliyeya. <sup>38</sup> Simulimuliyeya, sitautauya ma Yesuina 'i'ita lohihila, ta 'i'itediya mulinega sitautauyama. Coinega 'ihesilalediya 'igwae, "To'aha nuwanuwami?" Ma taudi sigwae, "Tohe'ita, ta'ehina 'umiyamiya?" <sup>39</sup> Coinega Yesu 'ihewgaediya, 'igwae, "Tanaowa ma 'igu 'ebe miya yahe'itegomi." Sitautauya ma Yesu 'ina 'ebe miyaina si'iteya, beno lahilahi, 'oinega nobwa mahetenao simiya heboiya.

<sup>40</sup> Tomuliyaeidi siteluwa 'oidiyega 'aigeda sanina Andulu, Saimoni Pita tasina. <sup>41</sup> Anduluina tasinaina Saimoni 'inuwatuhuya, 'oinega 'itauya tasinaina 'ibesa mwayamwayauweya, ma 'ilobeya, ma 'ihewgaeya 'igwae, "Mesaiyaina 'alobeya." (Mesaiya\* 'ana bui Keliso, beno 'ena Gilisi. Ma 'ana sanapu To'abihetena.) <sup>42</sup> Eeta

Anduluina tasina Saimoni 'itoeya ma mahetena sitauya Yesu 'oina. Ma Yesu Saimoniina 'i'ebubuya, 'ihewgaeya, 'igwae, "Cowa saniu Saimoni, tamau Yoni. Bewa tuwa saniu hauhauna yabwauwe Pita." (Pita 'ana bui beno da'ule.)

### *Pilipi ma Nataniyela Yesu 'ibwauwediya*

<sup>43</sup> Gona 'i'adaleya, Yesu nuwanuwana 'itauya Galili. Citauya ma Galili 'oina Pilipi 'ilobeya, 'ibwauweya 'igwae, "Pilipi, 'unaoma 'umuliyegau." <sup>44</sup> Pilipi 'ina 'asa sanina Bedeseida, beno Andulu ma Pita 'idi 'asa. <sup>45</sup> Muliyetega Pilipi Nataniyela 'ilobeya, ma 'ihewgaeya 'igwae, "Nataniyela, loheyaina sigwaegwaeneya 'alobeya. Tauna mwalona Mosese 'ina buki 'oina weyahina 'ihewgaegwae. Palopitao 'idi lele 'oidiya wete weyahina sihewgaegwaeneya. Tauna tuwa Yesu, tamana Yosepa, Nasaleta loheyaina." <sup>46</sup> Ma Nataniyela Pilipi 'ihewgaeya 'igwae, "Geya 'eta to'aha bwebwe'ana Nasaleta 'oinega 'ida latuwa." Ma hesi Pilipi 'igwae, "Tuwa hana 'unaoma, tatauya ma loheyaina 'u'ita." Coinega siteluwaedi sitauya Yesu 'oina.

<sup>47</sup> Sitautauya, ma Yesu Nataniyela 'i'iteya, ma Nataniyelaina weyahina 'ihewgaegwaeya 'igwae, "Loheya nage gwama Isileli moisa, ma mumugana 'ausalana mabwaiyana." <sup>48</sup> Nataniyela Yesu 'ihesilaleya 'igwae, "Togidega ta 'usanapugauwa?" Ma Yesu 'igwae, "Nige heneyage ya'ita nugetegowa 'abwa muliyetega Pilipi 'ibwauwegowa, tutaina 'owa damaya huhuna 'umiyamiya." <sup>49</sup> Coinega Nataniyela Yesu 'ihewgaeya 'igwae, "Cinapwana, 'owa moisa Yehoba natuna. Ma wete 'owa meIsileli 'ima kini."

<sup>50</sup> Coinega Yesu 'ihewgaeya 'igwae, "Nataniyela, 'abwa hesi 'uhemisaegauwa weyahina yahegwaegowa 'abehega damaya 'oina 'umiyamiya ma ya'itegowa, 'awa? Ma hesi 'uda sanapu 'abehega bewa tuwa 'ebe'ita 'i'iuna 'oiuwa. Ma 'abwa nata tuta sinaonaoma 'oidiya 'abwa ginaula madoudi 'u'itadi." <sup>51</sup> Ma Yesu wete 'ihewgaediya 'igwae, "Yagwae moisa 'oimiya, 'abwa nata galewa huwehuweina 'u'ita, ma wete Yehoba 'ina aneloseyao 'u'itadi sihanehane ma sisulusuluma taugu Loheyaiguina 'oiguwa."

## 2

### *Kena 'oina hehai 'aigeda sipaihoweya*

<sup>1</sup> Sabwelo 'eluwa sigumwala ma hehai sipaihowa 'asa sanina Kena 'oina, beno Galili 'ina tupwa 'oina. Hehaiina solana Yesu sinana 'imiyamiya. <sup>2</sup> Ta Yesu wete ma'ana tomuliyao hehaiina 'oina sibwauwediya ma siluhuwa 'e'ahaiina si'aiya.

<sup>3</sup> Cidi 'aiina solana 'adi waini mabwaiyana 'igumwala, 'oinega Yesu sinana 'ihewgaeya 'igwae, "Natugu, waini mabwaiyana 'igumwala pwaiya." <sup>4</sup> Coinega Yesu sinana 'enana 'i-hemaiseya, 'igwae, "Cowa sahena 'uloiloinegau, weyahina geya 'igu paihowa yahegaine." <sup>5</sup> Ma 'iyamo Yesuina sinana topaihowao 'ihewgaediya 'igwae, "Yesu 'enana wahesagohe, 'eguma to'aha nuwanuwana tuwa wada paihowa."

<sup>6</sup> Tupwaina 'oina we'aha 'adi we'aha patu 'adi baibaiwa sikisi sitotoholo, da'ule 'oidiyega sipaihowediya. Taudi sowasowahidi ma we'aha madouna 'oidiyega silohemahadi, meYudiya mumugadiyega 'idi 'ebe deudeula weyahidi. <sup>7</sup> Coinega Yesu topaihowaedi 'ihewgaediya ma we'aha patuwedi gaugaulidimo we'ahaga silohemahediya ta mabwaiyadi simaha. <sup>8</sup> Ma wete 'ihewgaediya ma we'aha patuwedi 'oidiyega we'aha tupwadi sigoidiya ma sitauyediya haiina toni waganana 'oina.

<sup>9</sup> Coinega hehaiina toni waganana we'ahedi 'inuma tohodiya, ta 'adi 'amna bwebwe'ana. Weyahina we'ahedi 'ihemala waini pwaiya, tuwa waini moisa. Beno 'oina hehaiina toni waganaina geya 'isanapu ta'ehega waini bewa si'eweya, benomo topaihowaedi sisanapuya. Eema hehaiina toni waganana tohai loheyana 'ihewgae gahuweya <sup>10</sup> 'igwae, "Togidega ta waini bewa bwebwe'ana ne'abwega tuwa 'abwa 'ulagu latuheyama? Ma hesi 'uda sanapu 'abehega tauda mumugada beno waini bwebwe'ana ta'ebwae nugetedi tomota 'oidiya 'abwa muliyetega waini galana."

<sup>11</sup> Beno Yesu 'ina 'ila'ilala waiwaina 'ihegaine nugeteya 'asa Kena 'oina, beno Galili tupwaina, ma 'ihe'itaeya tomota 'oidiya, ma wetenuge 'ina waiwai si'iteya, 'oinega 'ana tomuliyao sihemisaeya.

<sup>12</sup> Hehaiina 'igumwala, ma Yesu sinana ma tasinao ma wete 'ana tomuliyao mahetenao sisuluwa Kapaneumi 'oina. Beno 'oina simiyamiya tupwana sabwelo 'oidiya.

#### *Yehoba 'ina hada 'oinega Yesu tohegimwane 'ipa'idiya*

<sup>13</sup> MeYudiya 'idi Hataona Guyaina 'ana tuta 'i'ehohoya, ma Yesu 'ihaneya Yelusalema, <sup>14</sup> Yehoba 'ina Hada He'asisi\* 'oina 'iluhuwa ma tohegimwane 'i'itidiya sihegimwane. Tohegimwaneyedi beno bulumakau ma sipi ma wete gabubu sihegimwaneyedi hadainaina 'oina. Mane 'adi tohe'ebwaya hila wete 'i'itidiya 'idi 'ebelagu hatahatala deina simiyamiya. <sup>15</sup> Coinega Yesu balae 'i'eweya ma 'oinega tohegimwaneyedi ma 'idi hebahebaiyao Yehoba 'ina hada 'oinega 'ipa'idiya. Mane 'adi tohe'ebwaya hilao 'idi 'ebelagu hatahatala wete 'i'ahu peinediya ma 'idi mane 'ihabiya biyaunediya. <sup>16</sup> Ma wete gabubu 'adi tohegimwane 'ihegwaediya 'igwae, "Cimi kwasumowao wa'ahalidi ma hada bewa 'oinega walatu, sahena Tamagu 'ina hada wahehemohomoho ma 'abehega 'imi 'ebe gimwane." <sup>17</sup> Cana tomuliyao si'e'ebubu ma Yehoba 'ina buki 'ina hepwaita sinuwatuhu yahiya beno 'igwaeya, "Yehoba yo, 'ino hada tobwebwe'ana 'iya, ma nuwagu 'i'eweya."

<sup>18</sup> Muliyetega meYudiya 'idi tohanugetao sitauya Yesu sihesilaleya sigwae, "To 'ila'ilala nata 'oinega 'uhe'itemai ma 'oinega 'asanapu to lina 'oinega ginaula bewa 'upaipaihowadi?" <sup>19</sup> Coinega Yesu 'enadi 'ihemaiseya 'igwae, "Hada bewa 'eguma waligehe, nata sawasawahigu sabwelo 'etoi 'oidiya yahetoholo hila." <sup>20</sup> Ma 'iyamo taudi sigwaeya, sigwae, "Hada bewa sabwelo 'etoi 'oidiya 'uhetoholo hila? Ma hesi 'uda sanapu 'abehega hada bewa bolime poti sikisi 'oidiya si'abi'abi." <sup>21</sup> Ma hesi Yesu geya hada moisana weyahina 'ihehegwaegwae, ma 'iboi tuwa wahina weyahina 'ihegwaegwaeya.

<sup>22</sup> Muliyetega Yesu 'amasa 'oinega 'itoholo hila ee 'abwa 'ana tomuliyaeidi 'ina gwaeina 'oidiya sinuwatuhuya, 'oinega Yehoba 'ina hepwaita bukiina 'oina ma wete Yesuina 'ina gwaeiyedi 'abwa hesi sihemisa bwaibwainidiya.

#### *Yesu boda mabwaiyadi 'idi nuwatuhu 'isanasanapudi*

<sup>23</sup> Tutaina 'oina Yesu Hataona Guyaina 'oina 'imiyamiya. Ma boda mabwaiyadi 'ina paihowa waiwaina si'iteya, 'oinega sihemisaeya 'abehega tauna tuwa To'abihetenaina. <sup>24</sup> Ma hesiyage bodaedi Yesu geya 'ihemisaedi. Weyahina 'idi nuwatuhu mabwaiyana 'isanapu nugetediya. <sup>25</sup> Coinega geya 'eta taiya sawasawahina ma boda weyahidi 'ihegwaegwae Yesu 'oina, weyahina Yesu boda mabwaiyadi 'idi nuwatuhu 'atediya simiyamiya 'isanasanapudi.

### 3

#### *Nikodimo ma Yesu 'idi hegwaegwae*

<sup>1</sup> Loheya 'aigeda sanina Nikodimo, tauna Palisi 'idi boda 'aigeda. Ma wete tauna meYudiya 'adi tohanugeta. <sup>2</sup> Loheyainaina nihuwanega 'itauya Yesu 'oina ma 'ihegwaeya 'igwae, "Cinapwana, 'asanapuya 'owa tohe'itaina Yehoba 'oinega 'utauyama. Weyahina geya 'eta taiya 'ina paihowa waiwaina 'owa gidemusa 'eguma Yehoba geya mahetena."

<sup>3</sup> Coinega Yesu Nikodimo 'ihegwaeya 'igwae, "Yagwae moisa 'oiuwa, 'eguma geya'abwa 'uli'u hila, geya'abwa wete Yehoba 'ina 'ebeloina 'u'ita'ita."

<sup>4</sup> Ma Nikodimo Yesu 'ihesilaleya 'igwae, "Togidega ma taugu loheya madougu ma 'abehega sinagu gamwanega yali'u hila? Ma moisa tuwa, geya sawasawahigu ma sinagu gamwana yaluhu ma 'ihenatune hilegau." <sup>5</sup> Coinega Yesu Nikodimo 'ihegwaeya 'igwae, "Yagwae moisa 'oiuwa, 'eguma geya'abwa we'aha ma Yehoba Yaluyaluwana 'oidiyega 'uli'uli'u hila, nata geya'abwa wete Yehoba 'ina 'ebe lina 'oina 'uluhulu. <sup>6</sup> Tomota natudiyao sili'u tomota moisa. Ma Yehoba Yaluyaluwana 'oinega yaluyaluwamo 'ihenatune.

<sup>7</sup> “Coinega sahena nuwau 'ihenenainaida weyahina yahegwaegowa 'abehega 'ihenatune hilago. <sup>8</sup> Yaumai 'ina towa wete gidemusa, 'eguma ta'ehega nuwanuwana ma 'oinega 'itowa, nata tuwa wete 'oinega 'itowama. Ta yaumai nata moisa 'enadi tahesagohedi, ma hesi geya tasanapu ta'ehega yaumai 'ihaha'esama, nuwana to'eha 'itautauya. Ceda 'aigedanaina wete gidemusa 'eguma taiyawedi Yehoba Yaluyaluwana 'ihenatunedi.”

<sup>9</sup> Coinega Nikodimo Yesu 'ihesilala hileya 'igwae, “To'aha 'ino gwaeina 'ana sanapu?”

<sup>10</sup> Ma Yesu Nikodimo 'enana 'ihemaiseya 'igwae, “Cowa 'aigeda melsileli 'idi tohanugeta madouna. Ma to'aha weyahina 'igu gwae bewa 'oiuwa geya 'usanapu? <sup>11</sup> Ma yagwae moisa 'oiuwa 'abehega bewa tuwa 'ahehegwae bwaibwainigomi to'aha gidemusa 'asanapudiya ma 'a'itediya. Ma hesi 'ima gwaeyedi geya wada hesagohediya ma nuwana wada hemisaediya. <sup>12</sup> Ceguma bale'u weyahina 'ahehepwaila ma geya wada hemisaediya, togidega nata galewa 'ina 'ebe lina wasanapu 'ese tutaina 'eguma galewa weyahina 'ahegwaegwae 'oimiya? <sup>13</sup> Coimiyega geya 'eta taiya wete galewa 'oina 'ihane tohona, yaboi Loheyaiguina sowasowagu, weyahina galewega yasulu nugetama.

<sup>14</sup> “Mwalona gidemusa tubudao 'oidiya yoho 'awawa sitautauya ma Mosese mwata pwawati 'oinega 'ipaihoweya ma 'aiwe 'oinega 'i'abi haneheya ma 'oinega tubudaowedi lema silobeya. Coinega taugu 'abwa nata wete 'aiwe 'oina si'abi hanehegau, <sup>15</sup> ma taiyawedi 'omi 'eguma wahemisaegauwa, nata yawasi miyamiya hatayana waloba. <sup>16</sup> Comi tomiya bale'u Yehoba 'ihelauwegomiya sinabwana, 'oinega taugu natunaina 'aigeda tuwa 'itagwalegauwa 'oimiya, ma 'oinega taiyawedi 'omi 'eguma wahemisaegau, geya'abwa wahesilae, ma hesi yawasimi miyamiya hatayana waloba. <sup>17</sup> Ta Yehobaina natunaina taugu 'ihesumanegauma bale'uwa geya 'abehega yaloinaegomi, ma hesi yatauyama 'imi pui 'oidiyega sabi lemegomi.

<sup>18</sup> “Coinega taiyawedi 'omi 'eguma Yehoba natunaina taugu wahemisegau, nata geya'abwa lina mwaudi walobalobadi. Ma hesi taiyawedi 'omi geya wahemisegau, 'omi lina mwauna 'oina waluhu pwaiya, weyahina taugu Yehobaina natunaina moisa geya wahemisaegau. <sup>19</sup> Loinaedi mwaudiyedi huhuna bewa gidemusa: Maedanaina 'isulu pwaima bale'uwa, ma hesi tomiya bale'u nuwanuwadi guguyou. Coinega maedanaina silogwahateya, weyahina mumugadiyedi galadi. <sup>20</sup> Coinega taiyawedi mumugadi galadi maedanaina geya nuwadi. Ma wete geya nuwadi ma maedanaina 'oina silatu, nata gidemusa mumugadiyedi galadi maedanaina 'i'abi latuhedi. <sup>21</sup> Ma hesi taiyawedi mumugadi bwebwe'adi, nata taudi ma'idi yaliyaya maedanaina 'oina silatu ma maedanaina 'idi mumuga bwebwe'adiyedi 'i'abi latuhedi 'abehega Yehoba 'oinega simumuga 'esa.”

#### *Yoni Yesu weyahina 'ihewwaila latuwa*

<sup>22</sup> Muliyetega Yesu ma'ana tomuliyao sitauya Yudiya 'ina tupwa 'oina. Tupwainaina 'oina sabwelo tupwadi 'oidiya simiyamiya ma Yesu tomota 'i'abi'abi hehabitaisodi. <sup>23</sup> Yoni wete 'asa 'aigeda sanina Ainoni 'oina, beno 'asa Selimi deina, 'i'abi'abi hehabitaiso. Weyahina tupwainaina 'oina we'aha madouna 'imiyamiya, eeta we'ahinaina 'oina boda sitautauyama, ma Yoni 'i'abi'abi hehabitaisodi. <sup>24</sup> Tutainaina 'oina Yoni 'abwa geya deliya silagu luhuwe.

<sup>25</sup> Ta Yoni 'ana tomuliyao Yudiya loheyaina 'aigeda mahetedi sihe'ohe'ohena babitaiso weyahina. Weyahina geya sisanapu taiya 'ina babitaiso bwebwe'ana hedadena tauna sawasawahina ma tomota 'i'abi he'ehaudi. <sup>26</sup> Coinega tohe'ohe'ohedyedi sitauya Yoni 'oina sigwae, “Cinapwana, mwalona loheyaina 'oima 'ugwaegwaeneya tutaina 'owa ma tauma Yolidani we'ahina hali tupwanega tamiyamiya. Tauna bewa tuwa loheyaina 'i'abi'abi hehabitaiso, ma boda mabwaiyadi 'ina babitaiso nuwadi 'i'eweya, 'oinega si'au'auta 'oina.”

<sup>27</sup> Ma Yoni 'ana tomuliyae 'enadi 'ihemaiseya 'igwae, “Geya 'eta taiya sowasowahina ma 'iheloheya madou 'eguma Yehoba geya 'oina 'itagwala. <sup>28</sup> Coimiya wete yagwae pwaiya ta wasanapuya 'abehega taugu geya To'abihetenaina. Taugu tuwa Yehoba 'ihesumanegauma yanugetama ta loheyainaina 'ana muliya. <sup>29</sup> Loheyainaina tauna

gidemusa haihai meloheyana ma taugu tuwa 'ana tohayahina. Tuwa gidemusa 'eguma haihai loheyana mwanena 'iloba ma 'oinega 'iyana 'aigeda haihai loheyainaina 'enana 'ihesagohe ma weyahina 'iyaliyaya. Coinega taugu wete gide Yesu wasana yahesagoheya ma weyahina yayaliyaya sinabwana. <sup>30</sup> Tauna 'ilobwaineya ma 'iheloheya madou, ma hesi taugu tuwa yamuliyeyamo.

*Loheyaina tauna galewega 'isuluma*

<sup>31</sup> “Loheyainaina tauna galewega 'isuluma, tomota mabwaiyadi 'imadou sinediya. Weyahina taiya 'eguma bale'uwega 'itauyama, tauna tuwa bale'u loheyaina, ma bale'u ginaulinao 'oidiyega 'ihehegwaegwae. Ma hesi loheyainaina tauna galewega 'isuluma, tauna moisa tomota mabwaiyadi 'imadou sinediya. <sup>32</sup> To'aha gide 'inonodiya ta 'i'itediya weyahidi 'ihehegwaegwae. Ma hesi 'ina gwaeyedi geya 'eta taiya 'ida 'abi yahidiya. <sup>33</sup> Ma hesi taiyawedi 'eguma 'ina gwaeyedi si'abi'abi yahidi, beno taudi sihepwaileya 'abehega Yehoba 'ina gwae moisa.

<sup>34</sup> “Loheyainaina Yehoba 'ihesumaneyama tauna 'ina gwae 'ihehepwailedi, weyahina Yehoba Yaluyaluwana 'oinega 'ilohemaheya. <sup>35</sup> Eeta Yehoba natunaina 'ihelauweya, 'oinega 'ina 'ebeloina mabwaiyana natuna nimana 'ilaguya. <sup>36</sup> Coinega taiyawedi 'omi 'eguma Yehoba natunaina wahemisae, nata yawasi hataya waloba. Ma hesi taiyawedi 'omi 'eguma Yehoba natunaina geya wahemisae, nata geya'abwa yawasi hataya walobaloba, ma hesi 'omi nata Yehoba 'ina gamwasowala 'oimiya geya'abwa 'igumwagumwala.”

4

*Yesu ma Sameliya wahineina 'idi hegwaegwae*

<sup>1</sup> Yesu 'ina 'abi hehabitaiso 'oinega 'ana tomuliyao baibaiwadi 'ilobediya. Ma hesi Yoni 'ana tomuliyao geya baibaiwadi. <sup>2</sup> Yesu moisa geya babitaiso 'ida paihowediya, 'ana tomuliyae di sibo babitaiso sipaipaihowadi. <sup>3</sup> Ma Palisiyao 'enadi Yesu 'ihesagoheya 'abehega 'ina paihowa wasana sisanapuya, 'oinega Yudiya 'i'ebe sineya ma 'ilohihila Galili.

<sup>4</sup> Cina tauyaina 'oina nuwanuwana ma 'abehega Sameliya 'oinega 'itauya. <sup>5</sup> Coinega 'itauya Sameliya 'ana gamwagamwana 'oina 'ilatuwa ma 'itautauya ta 'asa 'aigeda 'oina 'ilatuwa, 'asainaina sanina Saika, 'oinega geya 'eda saliyana mwalona Yakobo bale'uina natuna Yosepa 'i'ebwaeya.

<sup>6</sup> Casainaina 'oina we'aha 'eli 'aigeda 'imiyamiya, Yakobo mwalo 'ana paipaihowa. Yesu tupwainaina 'oina 'ilatuwa 'asudiladila gamwana. Wahina 'ibeluwa, ma we'ahina papalina 'imiyatoiya sabi 'aiyawasi. <sup>7</sup> Tuta 'i'iuna 'oina ma Sameliya wahineina 'aigeda 'ilatuwa we'ahinaina 'oina 'ana we'aha sabi goi. Beno 'oina Yesu wahineina 'i'iteya ma 'oina 'i'ahwanoiya 'igwae. “Wahine, we'aha 'u'ebwaegau yanuma.”

<sup>8</sup> Tuta beno 'oina Yesu 'iboinamo 'imiyamiya, weyahina 'ana tomuliyae di sitauya 'asa madouna 'oina 'adi sigimwagimwane.

<sup>9</sup> Coinega Sameliya wahineina Yesu 'ihewgaeya, “Cu'ita, 'owa Yudiya loheyaina ma taugu Sameliya wahineina. Ma to'aha weyahina we'aha weyahina 'oiguwa 'u'ahwanoiyeya?” Weyahina meYudiya ma meSameliya geya si'ahwa 'iya'iyagu.

<sup>10</sup> Coinega Yesu Sameliya wahineina 'ihewgaehileya, “Yehoba 'eguma 'ina helau 'oiuwa 'usanasanapu, ma wete 'eguma 'usanapugauwa taiya taugu 'oiuwa we'aha weyahina ya'ahwa'awanoi, 'owa hesi 'ilobwainegowa 'oiguwa 'uda 'ahwanoi ma we'aha yawasiu weyahina ya'ebwaego.” <sup>11</sup> Ma wahineina 'igwaeya “Cinapwana, 'owa geya 'ino 'ebe goimo. Weyahina we'aha gaula bewa 'isulu hedadeya ma 'ugwaeya 'abehega we'aha 'u'ebwaegau yawasigu weyahina. <sup>12</sup> Cowa nuwana 'utohotoho ma 'abehega tubudai Yakobo 'ulagu suluhe? Ma hesiyage 'uda sanapu 'abehega 'ama we'aha 'eli bewa, Yakobo mwalona heneyage 'ipaihoweya ma we'ahinaina bewa, manatunao ma wete 'idi hebahebaiyao 'idi 'ebe numa.”



<sup>13</sup> Ma Yesu wahineina 'ihewgae hileya, “Taiya 'eguma we'aha bewa 'oinega 'inuma, nata wete tani'ona 'iyahala hila. <sup>14</sup> Ma hesi taiya 'eguma we'ahina 'oiguwega ya'ebwae ma 'inuma, nata geya'abwa wete tani'ona 'iyahayahala hila. Weyahina we'ahina 'oiguwega ya'ebwae, nata 'atena 'ihebidala yawasina miyamiya hatayana weyahina.”

<sup>15</sup> Coinega wahineina 'igwaeya “Cinapwana, we'ahinaina bewa tuwa 'uda 'ebwaegau, ma 'aneyage geya'abwa tani'ogu 'iyahayahala hila bo nuwana geya'abwa wete yahilahilama we'aha 'eli bewa 'oina ma yagoigoi hila.”

<sup>16</sup> Coinega Yesu wahineina 'ihewgae hileya, “Cutauya mwanu 'u'auliyama.” <sup>17</sup> Ma wahineina Yesu 'ihewgae 'igwae, “Ciya, taugu geya mwanegumo.” Coinega Yesu wahineina 'enana 'ihemaiseya 'igwae, “Moisa beno 'ugwaeya 'abehega geya mwanemo. <sup>18</sup> Ma hesi mwanemwao 'adi baibaiwa nima 'ai'aigeda taudi bewa tuwa geya mahetemwao. Ma hesi loheyaina tauna bewa tuwa maheteu wamiyamiya geya mwanu moisa, 'awa?”

<sup>19</sup> Coinega wahineina 'igwaeya, “Cinapwana, 'abwa hesi yasanapugowa 'owa 'abe 'aigeda palopita. <sup>20</sup> Bewa tuwa 'uhewgae to tupwa 'oina 'ilobwaineya ma Yehoba 'oina tatapwalolo? Weyahina tauna mwalona tubumayao 'oidiyega ma bewa tuwa 'itautauya 'ima 'oya bewa Sameliya 'oina 'atapwatapwalolo. Ma hesi 'omi meYudiya wagwaeya 'abehega Yelusalema 'ebe tapwalolo moisa.” <sup>21</sup> Ma Yesu wahineina 'ihewgae hileya, “Wahine, bewa tuwa 'uhemisaegau. Weyahina 'abwa tuta sinaonaoma 'oidiya, tomota geya'abwa 'oya bewa Sameliya 'oina bo Yelusalema 'oina sitapwatapwalolo. <sup>22</sup> Comi meSameliya geya wasanapu taiya 'oina watapwatapwalolo. Ma hesiyage tauna meYudiya 'asanapuya taiya 'oina 'atapwatapwalolo, weyahina tauna 'oimega Yehoba 'ina lemaina 'ilatuwa. <sup>23</sup> Ma sauga deina ma wete bewa 'ilatu pwaima, ma taiyawedi taudi Tamada 'ana totapwalolowao moisa, Tamadai 'oina sitapwalolo yaluyaluwadi mabwaiyana 'oidiyega ma wete nuwadi moisa 'oidiyega. Weyahina totapwalolowedi taudi bewa gide Yehoba nuwanuwana ma 'oina sitapwalolo. <sup>24</sup> Weyahina Yehoba tauna tuwa yaluyaluwa, 'oinega taiyawedi 'eguma 'oina sitapwatapwalolo, 'ilobwainediya ma yaluyaluwadi mabwaiyana 'oinega ma wete nuwadi moisa 'oidiyega 'oina sitapwalolo.”

<sup>25</sup> Coinega wahineina Yesu 'ihewgaehileya, “Yasanapuya 'abehega 'abwa nata To'abihetenaina 'itauyama, tauna sibwauweya Keliso. Tauna nata 'itauyama 'abwa ginaula mabwaiyana 'oida 'ilihasidi.” <sup>26</sup> Ma Yesu 'ihewgae, 'igwae, “Taugu bewa To'abihetenaina 'oiuwa yahehewgae.”

<sup>27</sup> Tutaina 'oina Yesu 'ana tomuliyaedi silohihilama, ta 'idi Cinapwana si'iteya wahine mahetena sihehewgae. Coinega taudi nuwadi 'ihenainaida, ma hesiyage geya 'eta taiya Yesuina 'ihesilala ma 'igwae, “To'aha nuwanuwau?” Bo 'igwae, “To'aha weyahina wahine maheteu wahehewgae?”

<sup>28</sup> Ma hesi wahineina 'ina 'ebe goi 'i'ebesineya ma 'itauya 'asai, tomota 'ihewgaediya 'igwae, <sup>29</sup> “Ciyagwao, wanaoma tatauya wa'ita loheyaina tauna mumugagu mabwaiyana 'oiguwa 'ihewgaediya nuwana tauna To'abihetenaina?” <sup>30</sup> Coinega tomotaedi 'asa madounaina 'oinega silatuwa ma sitauya Yesu 'oina.

<sup>31</sup> Beno 'oina tomuliyaedi Yesu sihewgae sigwae, “Cinapwana, mane musa 'eta to'aha 'uda 'aputoho?” <sup>32</sup> Ma hesi 'ihewgae hilediya, 'igwae, “Cagu 'e'ahai 'imiyamiya, 'omi geya wasanapu.” <sup>33</sup> Ta tomuliyaedi nuwadi 'ihenainaida, ma siboi 'oidiya sigwae, “Nuwana 'eta taiya 'ana 'e'ahai 'itauyeyama.” <sup>34</sup> Muliyetega Yesu 'ana tomuliyaedi 'ihewgae hilediya, “Bewa tauna 'aguina: Tauna 'ihesumanegauma 'ina nuwatuhi yapaihowadi ma 'ina paihowa mabwaiyana yalosalohidi.”

<sup>35</sup> Coinega wete 'ihewgae hilediya 'igwae, “Tomadega 'imi nuwatuhi 'abehega wai'ena 'ehata sigumwala 'abwa mamasalai. Ma hesi yagwae moisa 'oimiya 'abehega mamasalai bewa tuwa 'ilatu pwaiya. Nata hina wa'ita lohihila ma tanoha 'adi 'ita wa'itadi. <sup>36</sup> Ma hesi taiyawedi 'eguma 'e'etahiina 'oina si'etahi, nata 'adi maisa siloba. Tanohinaina 'e'etahinaina yawasi miyamiya hatayana weyahina. Tanohinaina 'ana todauna hagadi ma wete 'ana to'etahi hagadi, ma hesi mabwaiyadi nata 'idi yaliyaya mahemahetena.

<sup>37</sup> Ta moisa tuwa Yehoba 'ina buki 'oina 'ihewwaila bwaibwaina 'igwaeya 'Loheya 'aigeda todauna ma 'aigeda to'etahi.' <sup>38</sup> Coinega bewa tuwa taugu yahehesumanegomi ma tanohinaina 'oina geya wadauna 'oinaga wa'etahi. Hali tomota mwalo sidauna, ma 'idi paihowega 'omi 'etahi nata wapaihowa."

<sup>39</sup> Casa nage 'oina meSameliya baibaiwadi Yesu sihemisaeya, weyahina wahineina 'oidiya 'ihewwaila 'igwae, "Cigu 'eda'eda mabwaiyana 'oiguwa 'ihewwalediya."

<sup>40</sup> Saugaina 'oina meSameliya sitauya Yesu 'oina ma sigwae, "Ceguma sowasawahina 'owa mahetema tada miyamiya." Coinega 'itagwala ma 'imiya hila gide sabwelo 'eluwa 'oidiya.

<sup>41</sup> Coinega boda baibaiwadi wete sihemisaeya 'ina gwae weyahina. <sup>42</sup> Eeta wahineina sihegwae sigwae, "Moisa tuwa 'ino gwaeina geya 'u'abo. Ta geya 'abehega 'ino gwaemo 'oidiyega ma 'ahemiseya, weyahina tauma 'aboi wete 'ina gwae 'ahesagohediya ma 'asanapuya 'abehega moisa tauna tuwa Tolemaina gogo gabulena mabwaiyada weyahida."

#### *Yesu toloina 'aigeda natuna 'i'abi hebwebwe'aniya*

<sup>43</sup> Sabwelo 'eluwa sigumwala ma Yesu tupwaina 'i'ebesineya ta Galili 'oina 'itauya. <sup>44</sup> Yesuina 'iboinamo 'igwaeya, "Moisa, palopita geya 'adi he'asisimo 'eguma siboi 'idi 'asa 'oina siguguguya." <sup>45</sup> Ma hesi tutaina Yesu Galili 'oina 'ilatuwa, meGalili siyaliyaya, weyahina bodaedi Yesu 'ina paihowa waiwaina si'iteya tutaina mwalo sitauya Yelusalema Hataona Guyaina 'oina.

<sup>46</sup> Muliyetega Yesu 'ilohihila Kena 'oina, beno Galili 'ina tupwa 'oina. Casainaina 'oina mwalona Yesu we'aha 'i'abi buiya ma 'ihemala wainiya. Beno 'oina toloina 'aigeda madouna natuna 'ilohala ma 'asa Kapaneumi 'oina 'i'eno'eno. <sup>47</sup> Toloinaina Yesu wasana 'ihesagoheya 'abehega Yudiya 'oinaga 'itautauyama Galili. Coinega loheyainaina Yesu 'oina 'itauya ma 'i'ahwanoiya 'igwae, "Ceguma sawasawahina 'owa mahetegu tatauya Kapaneumi ma natugu 'u'abi hebwebwe'ane. Weyahina gwamainaina 'i'iunamo ma yawasina 'igumwala."

<sup>48</sup> Coinega Yesu toloinaina 'ihewwae hileya, "Geya 'eta taiya 'ida hemisaegauwa, beno tuwa 'eguma 'igu paihowa waiwaidi ya'abi latuhedi wa'itadi ee 'abwa wahemisaegau."

<sup>49</sup> Ma hesi toloinaina Yesu 'ihewwae, "Cinapwana, 'ulomwayamwayau 'unaoma tatauya, nata gide natugu yawasina 'igumwala." <sup>50</sup> Coinega Yesu 'igwae, "Natuina 'i'iuna ma 'ibwebwe'ana, nata 'ulohihila natuina 'u'ita bwebwe'ana 'imiyamiya." Eeta loheyaina Yesu 'ina gwae 'ihemisaeya ma 'ilohihila natunaina 'oina.

<sup>51</sup> Citautauya ta 'edai 'ina topaihowao 'eluwa 'ilobediya, ma wasa si'ebwaeya sigwae, "Cinapwana, natuina 'ibwebwe'ana pwaiya." <sup>52</sup> Coinega 'ihesilalediya 'igwae, "To sauga gide 'oina natugu 'iyawesaiya?" Ma taudi sigwae, "Boi 'asudiladila 'ana gamwagamwana 'oina ma wahina mabwaiyana 'iyawesaiya." <sup>53</sup> Nage 'oina gwamaina tamana Yesu 'ina gwae 'inuwatuhuya tutaina 'oina 'igwae, "Natuina 'i'iunamo ma 'ibwebwe'ana." Beno 'oina loheyainaina ma'ina susuwao Yesu sihemisaeya.

<sup>54</sup> Bewa Yesu 'ina paihowa waiwaina heluwena 'i'abi latuheya, tutaina Yudiya 'oinaga 'itauyama ma Galili 'oina 'ipaihowa.

## 5

#### *We'aha 'aigeda ni'una 'oina Yesu tolohala 'aigeda 'i'abi hebwebwe'aneya*

<sup>1</sup> Muliyetega Yesu 'ihaneya Yelusalema meYudiya 'idi guyai weyahina. <sup>2</sup> Yelusalema 'oina sipi 'idi 'ahwa'eda deina, we'aha 'aigeda ni'una 'imiyamiya. We'ahinaina meYudiya 'enadiyega beno Bedeseida. Ma we'ahinaina papalina hada 'ebe 'aiyawasi ma'ana 'ahwa'eda 'adi baibaiwa nima 'ai'aigeda simiyamiya. <sup>3</sup> Hadaedi 'oidiya tolohala baibaiwadi si'eno'eno, taudi mata gibugibuidi ma peupeudi ma wete hemwalomwalo howaidi. <sup>4</sup> (-) <sup>5</sup> Tolohalaedi 'oidiyega loheya 'aigeda 'ana lohala 'oina 'imiyamiya gide bolime teti 'eiti (38) sigumwala.

<sup>6</sup> Tutainaina Yesu 'itauyama loheyainaina 'i'iteya ta wete 'isanapuya 'abehega 'ana lohalaina 'oina 'imiyamiya tuta saliya hedadena 'oidiya. Coinega Yesu loheyaina 'ihewae'ya 'igwae, “Nuwanuwau ma 'ubwebwe'ana?” <sup>7</sup> Coinega loheyaina Yesu 'enana 'ihemaiseya 'igwae, “Cinapwana, geya 'eta taiya weyahigu ma 'i'ahala dobihegau we'aha bewa 'ina tuta nihu 'oina. Tuta baibaiwana 'oidiya yatohotohona ma 'abehega yaboigumo yadobi we'ahaina bewa 'oina, ma hesi geya sawasawahigu. Weyahina taugu 'abwa yaheheboi ma 'iyagwaowedi silomwayamwayau sidobi nugeta ma 'adi lohalaedi 'oidiyega sigumwagumwala, ma taugu 'agu 'itaina.”

<sup>8</sup> Ma Yesu loheyaina 'ihewae'hileya, “Cutoholo 'ino sita 'u'ewadi ma 'utauya.” <sup>9</sup> Saugaina 'oina loheya 'ibwebwe'ana ma 'ina sita 'i'ewediya ma 'itauya.

Sabweloinaina 'oina Sabati, <sup>10</sup> 'oinega meYudiya 'idi tohanugetao loheyaina si'iteya ma sihegwae'ya sigwae, “Geya 'ana 'ita bwebwe'ana Sabati 'oina 'ino sita 'u'ahala dadanedi.”

<sup>11</sup> Loheyaina 'idi gwae 'ihemaiseya 'igwae, “Loheyaina tauna 'i'abi hebwebwe'ane-gauwa 'ihewae'gauwa 'igwae, ‘Cino sita 'u'ewadi ma 'utauya.’” <sup>12</sup> Coinega sihesilala hileya sigwae, “To loheya beno gidemusa 'ihewae' 'esegowa?” <sup>13</sup> Ma hesi loheyaina 'ana lohala 'igumwagumwala 'ana to'abi hebwebwe'anaina geya 'isanapu. Weyahina 'asainaina 'oina boda madouna simiyamiya ma Yesu soladiyega 'itauya pwaiya.

<sup>14</sup> Muliyetega Yesu loheyaina 'ilobeya Yehoba 'ina hada solana, ma 'ihewae'ya 'igwae, “Bewa tuwa 'ubwebwe'ana pwaiya, 'oinega sahena wete 'upuipui hila, nata gide ginaula gala hedadedi 'oiuwa silatu.” <sup>15</sup> Beno 'oina loheyaina 'itauya meYudiya 'idi tohanugetao 'oidiya ma 'ana to'abi hebwebwe'anaina 'ihewae'ya 'abehega Yesu tauna 'ana to'abi hebwebwe'anaina.

<sup>16</sup> Beno huhuna 'oinega meYudiyaedi Yesu sihe'aleheya, weyahina ginaula bewa Sabati 'oina 'ipaihoweya. <sup>17</sup> Ma hesi Yesu meYudiyaedi 'ihewae'ya 'igwae, “Sabwelo mabwaiyana 'oidiya Tamagu 'ipaipaihowa, 'oinega taugu wete gide yapaihowa 'esa.” <sup>18</sup> MeYudiyaedi Yesu 'ina gwae sihesagoheya, 'oinega sitohotoho waiwai ma 'abehega togidega ma silohe'amasi. Weyahina Sabati 'ana lina 'iligehiya, ma wete 'igwae'ya 'abehega Yehoba Tamana moisa ta 'abehega Yehoba mahetena sihemahemahetena.

### *Yehoba natuna 'ina lina*

<sup>19</sup> Coinega Yesu tomotaedi 'ihewae'ya 'igwae, “Yagwae moisa 'oimiya, taugu geya sowasawahigu ma yaboi 'igu nuwatuhi 'oinega yapaihowa. Ma hesiyage to'aha gide Tamagu ya'iteya 'ipaipaihowadi, taugu wete gide yapaihowa 'esa. <sup>20</sup> Ma Tamagu 'ihelauwegauwa, 'oinega 'ina paihowa mabwaiyana to'aha gide 'ipaipaihowadi 'ihewae'gauwa. Ma wete paihowa madoudi nata 'abwa 'ihewae'gau ma yapaihowadi, 'oinega mabwaiyami nuwami sihenainaida. <sup>21</sup> Gide Tamagu to'amasa 'i'abi'abi hetoholo hiledi ma yawasidi 'i'ebwa'ebwaedi. Coinega taugu wete gide yawasi hauhauna tomota ya'ebwa'ebwaedi taiyawedi taudi yahesinuweddi.

<sup>22</sup> “Ma wada sanapu 'abehega Tamagu geya 'eta wete 'ina lina mwauna 'imiyamiya tomota 'adi heyatala weyahina, weyahina heyatala 'ana lina mabwaiyana 'i'ebwae pwaigauwa ma yaboi yapaihowadi, <sup>23</sup> ma 'oinega mabwaiyami wahe'asisiyane'gau gide Tamagu wahehe'asisiyana 'ese. Ma 'eguma taiyawedi geya wahe'asisiyane'gau, beno wete Tamagu tauna 'ihesumanegauma geya wahe'asisiyane.

<sup>24</sup> “Coinega yahegwae bwaibwainigomi 'eguma taiyawedi 'omi 'igu gwae wahesago-hedi ma wete 'agu Tohesumaneina wahemise, nata yawasi miyamiya hatayaina waloba. Ma 'oinega heyatala 'ana tuta 'oina 'omi geya'abwa lina walobaloba. Weyahina 'omi 'amasa 'ina tupwa wa'ebesineya ma wahabala yawasi hauhauna 'ina tupwa.

<sup>25</sup> “Ma wete yahegwae bwaibwainigomi 'abehega tuta bewa tuwa 'ilatulatuma, bo tagwae tuta 'ilatu pwaima ma to'amasa Yehoba natuna 'enana sihesagohe, beno taugu tuwa 'enagu. Ma 'eguma taiyawedi 'omi 'enagu wahesagohe, nata yawasi hauhauna waloba.

<sup>26</sup> “Tamagu tauna yawasi moisa huhuna, 'oinega 'oiguwa 'itagwala ma taugu wete yawasi huhuna, <sup>27</sup> ma wete heyatalaina 'ana lolina 'i'ebwaegauwa ma taugu heyatala yapaihowadi, taugu tuwa Loheyaiguina moisa. <sup>28</sup> Coinega sahena nuwami sihehenainaida gwae bewa weyahina. Ma wete tuta 'inaonaoma 'oina to'amasa mabwaiyadi nata 'enagu sihesagohe <sup>29</sup> ma galihega silatuma. Ma 'eguma taiyawedi taudi mumugadi bwebwe'adi, nata yawasi bwebwe'ana siloba. Ma taiyawedi taudi mumugadi geya bwebwe'adi, lolina mwauna siloba.

*Yesu 'ana tohepwailao*

<sup>30</sup> “Taugu wete geya sowasowahigu ma yaboigumo paihowaedi yapaihowadi, weyahina 'igu lolina heyatala weyahina Yehoba tauna 'ihe'itegauwa, 'oinega 'igu lolina bwebwe'ana. Weyahina taugu geya yatohotoho ma 'abehega yaboi 'igu nuwatuhi yapaihowadi, ma hesi to'aha gide 'agu Tohesumaneina 'ina nuwatuhi gide yapaihowa 'esedi.

<sup>31</sup> “Eeta 'eguma yaboi weyahigu yahehepwaila, nata geya'abwa wa'ahwa'ahwa moisaegau. <sup>32</sup> Ma hesiyage wada sanapu 'abehega hali loheya weyahigu 'ihepwaila pwaiya, ma yasanapuya to'aha gide 'ina hepwaila weyahigu mabwaiyana gwae moisa. <sup>33</sup> Loheyainaina mwalona tohalewasa tupwadi 'oina wahesumanediya, sanina Yoni. Ta gwae moisa 'i'ebwaediya ta 'oimiya wete sihepwaila bwaibwaina.”

<sup>34</sup> Coinega Yesu wete 'ihewaediya 'igwae, “Taugu tomota 'idi hepwaila geya weyahina yada nuwatuhiwa. Ma hesi gwae bewa Yoni weyahina yahehepwaila ma 'oinega nuwami 'i'asilala ma 'abihetena waloba. <sup>35</sup> Yoni tauna gide mayale waiwaina, 'oinega 'omi nuwanuwami ma 'ina 'asilalaina 'oina wayaliyaya tuta 'i'iunamo. <sup>36</sup> Ma Yoni weyahigu 'ihepwaila, beno geya ginaula madouna. Ma hesi ginaula 'aigeda madou hedadena 'imiyamiya, beno 'ebe'itaedi Tamagu 'oinega bewa tuwa yapaihowadi. Coinega paihowaedi weyahidi wanuwatuhi bwaibwaina, ma 'oinega wasanapugau 'abehega Tamagu tauna 'ihesumanegauma.

<sup>37</sup> “Tamagu tauna weyahigu 'ihepwaila pwaiya ma hesi 'omi geya 'eta tuta 'enana wahesagoha toho, bo nuwana manina wa'ita tohoya, <sup>38</sup> ma wete 'ina gwae 'oimiya geya 'atemiya walagudi, huhunaina geya wahemisaegau 'abehega taugu Yehoba 'oinega yatauyama. <sup>39</sup> Yehoba 'ina buki wahasisili. Ma wanuwatuhi 'abehega bukiina 'oinega yawasimi miyamiya hatayana wada loba. Ma hesi geya wasanapu 'abehega bukiina taugu tuwa weyahigu 'ihehegwae. <sup>40</sup> Beno 'oinega geya nuwami ma wanaoma 'oiguwa yawasimi miyamiya hatayana weyahina.

<sup>41</sup> “Ma hesi wada sanapu 'abehega taugu geya tomota 'idi hepwatu weyahidi yada nuwatuhiwa. <sup>42</sup> Comi weteyage yasanapu pwaigomiya, geya 'eta wete Yehoba 'ana helau 'atemiya walagu tohodi. <sup>43</sup> Taugu Tamagu saninega yatauyama ma geya wahemisaegau. Ma hesi 'omi 'eguma hali loheya tauna saninega 'itayawa 'oimiya, nata loheyainaina wahemisa. <sup>44</sup> Ta moisa tuwa, 'omi nuwanuwami ma 'ami hepwatu waboi 'oimiyege wahesagohedi. Ma hesi geya watohona ma 'ane Yehoba 'iboimo 'oinega 'ami hepwatu walobadi. Beno 'oinega geya sowasowahimi ma wahemisaegau.

<sup>45</sup> “Sahena wanuwatuhi 'abehega taugu nata Tamagu 'oina yahe'ewegami, loheya 'aigeda hesi tauna nata 'ihe'ewegami, tauna wanuwatuhuya 'abehega 'abwa nata 'ilemegomi, sanina Mosese. <sup>46</sup> Ma 'eguma moisa Mosese wahemisaeya, taugu wete gide wahemisaegau. Weyahina Mosese tauna mwalona Yehoba 'ina buki 'oina weyahigu 'ihepwaila pwaiya. <sup>47</sup> Ma hesi 'ina hepwaila geya wahemisa, 'oinega geya sowasowahimi ma 'igu gwae wahemisaedi.”

6

*Yesu boda madouna 'ihe'aidiya*

<sup>1</sup> Coinega Yesu 'ilohihilama Galili 'ina tupwa ma 'igeluwa 'ihabala Galili holaina hali tupwanega. Holainaina sanina heluwena Taibiliya. <sup>2</sup> Eeta boda madouna mulinega sitauya, weyahina 'ina paihowa waiwaina tolhala 'oidiya si'ita pwaiya. <sup>3</sup> Coinega Yesu

ma'ana tomuliyao sihaneya 'oyai simiyatoiya. <sup>4</sup> Tutaina 'oina meYudiya 'idi Hataona Guyaina 'ana tuta 'i'ehohoya. <sup>5</sup> Yesu 'i'ita lohihila ma boda madouna 'i'itediya mulinega sitautauyama, 'oinega Yesu Pilipi 'ihewgaeya 'igwae, “Ta'ehoga nata 'e'ahai tagimwanedi ma boda bewa tahe'aidi?” <sup>6</sup> Hesilala bewa 'oinega Pilipi 'itohoya, ma hesi Yesu 'isanapu nugeteya to'aha nata 'ipaihowa.

<sup>7</sup> Ma Pilipi Yesu 'ihewgaeya 'igwae, “Boda bewa madou hedadena, ma 'eguma tu handeledi kina 'oinega beledi tagimwanedi weyahidi, bwagana nata 'i'iuna 'i'iuna si'ai, ma hesi nata geya'abwa mabwaiyadi sowasowahidi.” <sup>8</sup> Coinega Yesu 'ana tomuliyaya 'aigeda wete Yesu 'ihewgaeya 'igwae, <sup>9</sup> “Gwama 'aigeda yalobeya 'ana beledi nima 'ai'aigeda, ma wete 'ana silahana 'eluwa. Ma boda mabwaiyadi geya sowasowahidi.” Tomuliyaina sanina Andulu, Saimoni Pita tasina.

<sup>10</sup> Muliyetega Yesu 'ana tomuliyaeadi 'ihewgaediya 'igwae, “Tomota mabwaiyadi wahewgaedi ma modumoduwa simiya 'alatutu.” Weyahina 'asainaina 'oina modumodu 'ana 'asa, 'oinega mabwaiyadi modumodu 'oina simiya toiya, loheloheyaedimo 'adi baibaiwa gide paibi tausani.

<sup>11</sup> Muliyetega Yesu beledi 'i'ewediya ma weyahidi 'igwae helauwa Yehoba 'oina, 'abwa muliyetega tomotaedi simiyatoiya 'ihewguyaiyediya ma silahanedi wete gide 'oidiya 'ipaihowa 'esediya. Coinega mabwaiyadi si'aiya ta sowasowahidi, simwauwuwa. <sup>12</sup> Simwauwuwa, ta Yesu 'ana tomuliyaeadi 'ihewgaediya 'igwae, “Beledi 'ana tupwa mabwaiyana wasiwa he'autedi, sahena 'eta to'ehina wete wamudamudali.” <sup>13</sup> Coinega belediyedi mugumugudi sisiwa he'autediya ma boha tuwelo 'adi baibaiwa silohemahediya.

<sup>14</sup> Cigumwala ma bodaedi Yesu 'ina paihowa waiwaina 'ana 'ila'ilala si'iteya ma sigwae, “Tauna tuwa bewa palopitainaina tauna 'abehega gogo gabulena 'oina 'itauyama.”

<sup>15</sup> Eeta Yesu tomotaedi 'isanapudiya 'abehega nata si'abiyahi ma 'oidiya 'ihekini. Ma hesi Yesuina geya nuwana, 'oinega 'iboinamo 'ilohihila 'oyai.

#### *Yesu 'ina tauya hola tabwanega*

<sup>16</sup> Coinega lahilahiyege 'ana tomuliyaeadi sidobiya Galili holaina gadowaina 'oina, <sup>17</sup> ma 'idi waga 'oina sigeluwa ma sihababala Kapaneumi, ma ni'u 'awawa 'iguguyouwa. Eeta Yesu geya 'itauya 'oidiya. <sup>18</sup> Coinega sihababala ma ni'uwa yaumai ma bagodu madouna silobeya. <sup>19</sup> Tutaina 'oina sihadobiya ni'u gamwagamwana, 'abwa muliyetega Yesu si'iteya hola tabwanega 'itautauyama 'idi waga deina. Beno 'oina simatauta. <sup>20</sup> Ma 'iyamo Yesu 'ihewgaediya 'igwae. “Sahena wamatamatauta, taugu tuwa.” <sup>21</sup> Coinega tomuliyaeadi Yesu sido'oya wagai, ma tutaina 'oina sisohota 'asaina silagalaga 'oina gadowaina.

#### *Yesu tauna 'e'ahai moisa tomota yawasida weyahina*

<sup>22</sup> Gona 'i'adaleya ma bodaedi taudi Galili holaina hali tupwanega simiyamiya, sisanapuya 'abehega boi Yesu ma'ana tomuliyao 'idi waga 'aigeda tuwa 'oinega sigeluwa. Ma hesi 'idi lohihila 'oina tomuliyaeadi siboidimo sigeluwa wagai ta sitauya, ma Yesu geya mahetedi sigelu. <sup>23</sup> Ma 'iyamo waga tupwadi Taibiliya 'oinega sitauyama gadowaina 'oina boi Yesu boda beledi 'oinega 'ihe'aidiya, tutaina belediyedi 'i'ahwa bwebwe'aniya Yehoba 'oina. <sup>24</sup> Ma bodaedi Yesu ma'ana tomuliyao sibesa 'asaediya, 'oinega wagaedi 'oidiya sigeluwa, ma sihabala Kapaneumi 'oina Yesu sibesebese.

<sup>25</sup> Muliyetega Galili holaina hali tupwega silobeya, ma sihewgaeya, sigwae, “Cinapwana, tolahisa 'uhabalama?” <sup>26</sup> Coinega Yesu tomotaedi 'ihewgaediya 'igwae, “Yagwae moisa 'oimiya, belediyedi 'oidiyega yahe'aigomiya ma wamwauwuwa 'oinega bewa wabesebesegau, geya 'igu paihowa waiwaidi 'adi 'ila'ilalaina weyahina. <sup>27</sup> Coinega bewa tuwa yahegwagomi, sahena 'e'ahai gumwagumwalidi weyahidi wapaipaihowa, ma hesi 'e'ahai yawasimi miyamiya hatayana weyahidi wapaihowa. Ce'ahainaina bewa weyahina yahegwagwae. Loheyaiguina taugu nata ya'ebwagomi. Weyahina Tamagu 'ina paihowa bewa weyahina 'ihesumanegauma ma yapaihowadi.”



<sup>28</sup> Coinega tomotaedi Yesu sihegwae hileya, “To'aha nata 'oidiyega Yehoba 'ina paihowa 'apaihowadi?” <sup>29</sup> Ma Yesu 'ihewgae hilediya, “Yehoba 'ina paihowaina bewa gide taugu wahemisaegauwa, weyahina tauna 'ihesumanegauma.”

<sup>30</sup> Ma wete sihegwae hileya, “To 'ila'ilala nata 'oima 'upaihowa ma 'oinega 'ahemisaego? <sup>31</sup> Mwalona gide tubumayao yoho 'awawa 'e'ahainaina si'aiya sanina mana. Yehoba 'ina buki 'oina wete gide 'ihewwaila 'esa 'igwae, 'Ce'ahainaina galewega 'i'ebwaediya ma si'aiya.' Coinega 'owa mane wete 'ino 'ila'ilala 'upaihowa ma 'a'ita.”

<sup>32</sup> Ma Yesu tomotaedi 'ihewgaediya 'igwae, “Yagwae moisa 'oimiya, Mosese 'e'ahainaina beno geya galewega 'i'ebwaegomi, ma hesi Tamagu tauna hene 'e'ahai moisaina galewega 'i'ebwa'ebwaegomi. <sup>33</sup> Ma 'e'ahainaina Yehoba 'oinega tauna 'ilatu pwaima bale'uwa ma tomota yawasidi 'i'ebwa'ebwaedi.”

<sup>34</sup> Coinega taudi wete Yesu sihegwae, sigwae, “Cinapwana, 'e'ahainaina beno sauga mabwaiyana 'u'ebwa'ebwaemai.”

<sup>35</sup> Ma Yesu wete 'ihewgaediya, “Taugu yawasimi 'ana 'e'ahai, 'oinega taiyawedi 'omi 'eguma watauyama 'oiguwa, geya'abwa wagomagomale. Taiyawedi wete 'eguma 'omi wahemisaegau, nata geya'abwa tani'omi siyahayahala.

<sup>36</sup> “Ma yahegwae pwaigomiya 'abehega wa'ita pwaigauwa, ma hesi geya wahemisaegau. <sup>37</sup> Tomotaedi taudi Tamagu 'i'ebwaegauwa hesi nata 'oiguwa sitauyama, ma 'eguma sitauyama 'oiguwa, nata geya'abwa yalolohesohesoyedi. <sup>38</sup> Weyahina taugu galewega yasuluma geya 'igu nuwatuhi sabi paihowaina, ma hesi tauna 'ihesumanegauma 'ina nuwatuhi sabi paihowaina. <sup>39</sup> Cihesumanegauma ma 'igu tomotaedi 'i'ebwaegauwa 'ina nuwatuhi bewa gide ma 'abehega geya'abwa 'eta taiya 'oidiyega yahe'wadalele. Ma hesi mabwaiyadi 'amasa 'oinega yada 'abi hetoholo hiladi tuta 'ana 'ebe losaloha 'oina. <sup>40</sup> Tamagu bewa gide wete 'ina nuwatuhi ma 'abehega taiyawedi 'eguma taugu natunaina si'itegauwa ma sihemisaegauwa, nata yawasidi miyamiya hatayana siloba. Ma wete tuta 'ana 'ebe losaloha 'oina 'amasa 'oinega ya'abi hetoholo hiladi.”

<sup>41</sup> Beno 'oina meYudiya Yesu 'ina gwae sihesagoheya ma silomugiyeya 'ina gwaeina weyahina 'igwae, “Taugu bewa 'e'ahainaina galewega yasuluma.” <sup>42</sup> Ma siboidimo 'oidiya sigwae, “Loheya bewa Yosepa natuna, sanina Yesu, 'awa? Tamana ma sinana wete tasanapu pwaidiya, ma togidega ta 'igwaeya 'abehega tauna galewega 'isuluma?”

<sup>43</sup> Coinega Yesu 'ihewgae hilediya, “Sahena waboi 'oimiya weyahigu walolomugi. <sup>44</sup> Weyahina Tamagu 'ihesumanegauma ma 'oinega taiyawedi 'omi 'ilidigomi ma wanaoma 'oiguwa, 'omi nata tuta 'ana 'ebe losaloha 'oina 'amasa 'oinega ya'abihetoho hilegomi. Ma taiyawedi 'eguma geya 'ilididima taudi nata geya'abwa 'oiguwa sinaonaoma.

<sup>45</sup> “Gwae bewa mwalo heneyage Yehoba 'ina buki 'oina palopitao sileleya sigwae, 'Tomota mabwaiyadi nata 'adi he'ita Yehoba 'oinega siloba.' Ma 'oinega taiyawedi 'omi Tamadai 'ina he'ita wahesagoheya ma wasanapudiya, 'omi nata 'oiguwa watauyama.

<sup>46</sup> Ma geya 'eta taiya Tamadai 'i'ita toho, beno tuwa yaboi, weyahina taugu 'oinega yasuluma. <sup>47</sup> Coinega bewa yagwae moisa 'oimiya 'eguma taiyawedi 'omi wahemisaegau, nata yawasi miyamiya hatayana waloba. <sup>48</sup> Taugu tuwa yawasimi 'ana 'e'ahai. <sup>49</sup> Tubumiyaowede mwalona yoho 'awawa 'oina 'e'ahai sanina mana si'aiya, ma 'iyamo geya manaina 'oinega yawasidi miyamiya hatayana siloba, ma hesi 'oinega simiyamiya 'ana siga si'amasaeya.

<sup>50</sup> “Ma hesi 'e'ahai hauhaunaina galewega 'isuluma taiyawedi 'omi 'eguma wa'ewa ma wa'ai, nata geya'abwa wa'ama'amasa. <sup>51</sup> Weyahina taugu yawasimi 'ana 'e'ahai galewega yasuluma, ma taiyawedi 'omi 'eguma 'e'ahainaina 'oiguwega wa'ai, nata yawasimi miyamiya hatayana waloba. Ce'ahainaina beno taugu hesiyogu ya'ebwaegomi ma wa'ai, weyahina wahigu yatagwaleya me bale'u mabwaiyami yawasimi weyahina.”

<sup>52</sup> Beno 'oina meYudiya siboidimo sihe'ohe'ohena sigwae, “Togidega ma loheya bewa 'abehega hesiyona 'i'ebwaegita ma ta'ai?” <sup>53</sup> Coinega Yesu 'ihewgae hilediya, “Yagwae moisa 'oimiya, taugu loheyaiguina moisa, ma 'eguma hesiyogu geya'abwa wa'ai'ai ma wete 'eguma geya'abwa bweyahigu wanumanuma, nata geya'abwa yawasimi miyamiya

hatayaina walobaloba. <sup>54</sup> Ma hesi taiyawedi 'omi 'eguma hesiyogu wa'ai ma bweyahigu wanuma, nata moisa yawasimi miyamiya hatayaina waloba, ma wete taugu 'abwa nata 'amasa 'oinega ya'abi hetoholo hilegomi tuta 'ana 'ebe losaloha 'oina. <sup>55</sup> Weyahina wahigu bewa tauna 'e'ahai moisa, ma wete bweyahigu 'ebe numa moisa. <sup>56</sup> Taiyawedi 'omi 'eguma wahigu wa'ewa wa'ai ma bweyahigu wanuma, 'omi 'oiguwa wamiyamiya ma taugu wete 'oimiya yamiyamiya. <sup>57</sup> Tamagu tauna moisa miyamiya hatayaina 'ihe-sumanegauma, tauna 'oinega yawasigu ya'ewa'ewa. Coinega taugu wete gide, 'eguma taiyawedi 'omi hesiyogu wa'ai, 'omi nata wete yawasimi 'oiguwega wa'ewa'ewadi.

<sup>58</sup> “Ce'ahainaina bewa galewega 'isuluma geya gide tubumiyaowedi 'e'ahainaina mwalona yoho 'awawa si'aiya. Weyahina 'e'ahainaina mwalona si'aiya ma geya 'oinega yawasidi miyamiya hatayana siloba, ma hesi 'oinega simiyamiya 'ana siga si'amasaeya. Ma hesi 'e'ahaiina bewa 'oiguwega taiyawedi 'omi 'eguma wa'ai, nata yawasimi miyamiya hatayana waloba.”

<sup>59</sup> Gwae bewa mabwaiyana 'ihepwaila latuhediya Kapaneumi 'oina tutaina hada tapwalolo 'oina 'ihehe'ita.

#### *Yawasi miyamiya hatayaina hegwaegwaeina*

<sup>60</sup> Cihehe'ita, ma 'ana tomuliyao Yesu 'ina gwaeina sihesagoheya, 'oinega tupwana baibaiwadi siboidimo 'oidiya sigwae, “Gwae bewa 'ana hesagoha mwauna, 'oinega tauda geya nuwada.” <sup>61</sup> Ma hesi Yesu nige heneyage 'isanapu pwaiya 'abehega 'ana tomuliyaoowedi gwae bewa weyahina silolomugi. Coinega 'ihewgaediya 'igwae, “Gwae bewa weyahina ma 'abehega waguipaila? <sup>62</sup> Taugu loheyaiguina moisa ma togidega 'eguma wa'itegau yahane 'asainaina mwalona 'oinega yasuluma? <sup>63</sup> Yehoba Yaluyaluwana 'iboinamo yawasimi 'ana to'ebwaya, ma hesiyage wahimi geya 'eta wete 'ina lema 'oimiya. Cigu gwaeyedi ya'ebwaya pwaigomiya ma 'oidiyega yawasimi Yehoba Yaluyaluwana 'oinega wa'ewa'ewadi. <sup>64</sup> Ma hesiyage tupwami geya wahemisegauwa.” Gwae bewa Yesu 'i'inatediya weyahina 'isanapu nugeteya taiyawedi geya sihemisae, ma wete 'isanapuya taiya tauna 'abwa nata 'itebae 'ana 'alehaowedi 'oidiya. <sup>65</sup> Coinega wete 'igwae, “Nuwatuhu bewa weyahina mwalona yahegwaegomiya 'abehega geya 'eta taiya sowasowahina ma 'itauyama 'oiguwa, 'eguma Tamagu geya 'oina 'itagwala.”

<sup>66</sup> Bewa weyahina tomuliyaeadi taudi Yesu silogwahateya ma si'ebesineya. <sup>67</sup> Ma site tuwelowedi siboidimo simiya hila, 'oinega Yesu 'ihewgaediya 'igwae, “Comi togidega, nuwanuwami wete watauya?”

<sup>68</sup> Coinega Saimoni Pita Yesu 'enana 'ihemaiseya 'igwae, “Cinapwana, taiya nata 'oina 'atauya? Weyahina 'owa 'uboi yawasi miyamiya hatayana 'ana gwae 'oiuwa 'imiyamiya. <sup>69</sup> Ma wete tauma 'ahemisaegowa 'abehega 'owa To'abihetenaina Yehoba 'oinega 'utauyama.”

<sup>70</sup> Coinega Yesu 'ihewgae hilediya, 'igwae, “Moisa tuwa, 'omi wate tuwelo yahesinuwa pwaigomiya, ma hesiyage 'oimiyega nata 'aigeda Seitani 'ina boda.” <sup>71</sup> Gwae bewa Yesu 'igwaeneya Yudasa weyahina, tauna Saimoni Isakaliyota natuna. Yudasaina tauna tuwa 'aigeda Yesu 'ana tomuliyaa, ma hesi nata Yesu 'itebae 'ana 'alehaowedi 'oidiya.

## 7

#### *Yesu tasinao geya sihemisae*

<sup>1</sup> Muliyetega Yesu Galili 'ina 'ebe lolina mabwaiyana 'oidiya 'itauya, ma hesiyage geya nuwana Yudiya 'ina 'ebe lolina 'oidiya 'itauya. Weyahina meYudiya 'idi 'inapwanaedi nuwanuwadi Yesu silohe'amasi. <sup>2</sup> Sauga beno 'oina meYudiya 'idi Yoheyohe Guyaina 'i'ehohoya. <sup>3</sup> Coinega Yesu tasinao sihegwaeya 'oina sigwae, “Casa bewa 'u'ebesine ma 'utauya Yudiya, ma 'a tomuliyao nobwa 'ino paihowa si'ita.” <sup>4</sup> Ma wete sigwae, “Geya 'eta taiya paihowa dahwana 'oinega sanina 'ida hemadouwa. Ceguma nuwanuwau ma tomota mabwaiyadi sisanapugo 'owa tuwa 'uboi 'uhe'itaego 'oidiya.” <sup>5</sup> Tasinaowedi gwae bewa si'inaneya 'oina weyahina geya sihemisae.

<sup>6</sup> Coinega Yesu 'ihewgae hilediya, “Casainaina 'oina 'igu sauga tauya geya 'ana tuta 'iloba. Ma hesi 'omi 'ami lobwaina to tuta 'oina 'eguma nuwanuwami, watauya. <sup>7</sup> Weyahina 'omi nata geya'abwa me bale'u silolo'alehegomi, ma taugu hesi silo'alehegauwa, weyahina mumugadi galanaina yahepwailediya 'oidiya. <sup>8</sup> Comi nata watauya guyaiina 'oina, taugu nata geya'abwa yatautauyawa, weyahina 'igu sauga 'abwa geya 'ilatu.” <sup>9</sup> Gwae bewa 'i'ebwaediya 'oinega sitauya, ma tauna tuwa Galili 'oina 'imiyahila.

*Yesu 'ina loguguya Yoheyohe Guyaina 'oina*

<sup>10</sup> Coinega Yesu tasinaowedi si'ebesineya ma sitauya guyaiina 'oina. Muliyetega Yesu wete 'itauya dahwana ma 'asainaina 'oina 'ilatuwa, ma geya 'eta taiya 'isanapu toho. <sup>11</sup> Tutaina 'oina meYudiya 'idi 'inapwanao Yesu sibesebeseya ma sigwaegwae, “Ta'eha tauna loheyainaina?” <sup>12</sup> Tomota baibaiwadi siboidimo 'oidiya sihehe'ahwa henahena Yesu weyahina. Tupwadi tomota sigwae, “Tauna loheya bwebwe'ana.” Ma tupwadi tomota sigwae, “Tauna wete to'e'abo'abo 'aigeda, tomota 'i'waya'wayamidi.” <sup>13</sup> Ma hesi geya 'eta taiya Yesu 'ihewwaila latuwe, weyahina meYudiya 'idi 'inapwanao simatautediya.

<sup>14</sup> Ma guyai 'ana gamwagamwana 'oina Yesu Hada He'asisi 'oina 'iluhuwa ma 'ihehe'ita. <sup>15</sup> Beno 'oina meYudiya nuwadi 'ihenainaida madouna, sigwae, “To'ehaga loheya bewa 'ina sanapu 'iloba 'eseya? Weyahina tauna geya 'eta 'ebe se'ulu madouna 'oina 'iluhu tohona.”

<sup>16</sup> Coinega Yesu 'ihewgaediya 'igwae, “Taugu geya yaboi 'igu nuwatuhuwega yahehe'ita, ma hesi tauna 'ihesumanegauma 'ina nuwatuhu 'oinega yahehe'ita. <sup>17</sup> Taiyawedi 'omi 'eguma Yehoba 'ina nuwatuhu wapaipaihowa, 'omi nata wasanapugau 'abehega 'igu he'itaina Yehoba 'oinega, ma geya yaboi 'igu nuwatuhuwega. <sup>18</sup> Ma hesi wanuwatuhuyahi 'eguma taiya 'iboimo 'ina nuwatuhu 'ihehe'ita, 'iboimo sanina weyahina 'ipaipaihowa. Ma hesi taugu nuwanuwagu ma tauna 'ihesumanegauma sanina ya'abi hemadou. Weyahina taugu 'igu gwaeyao moisa, ma wete geya 'igu puimo. <sup>19</sup> Ma togidega? Mosese loinaina 'i'ebwaegomiya wanuwa naideya? Ma geya 'eta taiya 'oimiyega loinaedi 'imuliya bwaibwainidi. Ma bewa watohotohogau ma 'abehega walohe'amasigau.”

<sup>20</sup> Coinega bodaedi Yesu sihegwae hileya, “Yaluyaluwa bi'i debau 'i'abi heyauyauleya 'oinega beno gide 'ugwaegwae 'esa? Taiya hede nuwanuwana ma 'abehega 'ilohe'amasigo?”

<sup>21</sup> Coinega Yesu bodaedi wete 'ihewgaediya 'igwae, “Wagamwasowalegauwa weyahina loheya ya'abi hebwebwe'aneya Sabati 'ana sabwelo 'oina? Ma 'omi togidega 'imi paihowa Sabati 'ina sabwelo 'oina? <sup>22</sup> Weyahina Mosese 'ina loina 'abehega natumiyao loheloheyadi 'idi 'ebe selolo 'wapina wa'upwa yahuledi. (Loinaina bewa geya Mosese 'oinega, ma hesi tubumiyao nugenugeti 'oidiyega loina bewa 'itauyama.) <sup>23</sup> Coinega 'eda'eda bewa 'eguma gide wapaihowa 'esedi ma gwagwama loheloheyadi 'oidiya gide wapaihowa 'esedi Sabati 'ana sabwelo 'oina, beno moisa Mosese 'ina loina wamulimuliye. Ma to'aha hede weyahina ta walo'alehegauwa tutaina loheya Sabati 'ana sabwelo 'oina ya'abi hebwebwe'aniya? <sup>24</sup> Coinega sahena 'iyamiyao 'adi 'ita 'oinega weyahidi wagwaegwae hesihesinuwa. Ma hesi soladiya loina dumwalunega wagwae hesihesinuwa bwaibwaina.”

*Yesu tauna 'abehega To'abihetenaina*

<sup>25</sup> Saugaina 'oina meYelusalema tupwadi sigwaeya sigwae, “Loheya bewa nuwana tauna nuwanuwadi ma 'abehega silohe'amasi, 'awa? <sup>26</sup> Ma hesi wa'ita, boda gamwagamwanidiya 'itoholowa ma 'oidiya 'ihehegwae ma geya 'eta taiya 'enana 'ida hehileya. Togidega ma 'ida tohanugetao si'ahwa moisaeya 'abehega tauna tuwa To'abihetenaina, 'awa? <sup>27</sup> Ma nuwana geya, weyahina mabwaiyada loheya bewa tasanapuya to 'asa 'oinega 'itauyama. Ma hesi To'abihetenaina 'eguma 'itauyama, geya 'eta taiya 'ina 'ebe tauyama 'isanapu.”

<sup>28</sup> Tutaina Yesu 'abwa Yehoba 'ina hada 'oina 'ihehe'ita, 'enana madouna 'oinega 'ihewagwaeya 'igwae, “Moisa tuwa, wasanapu pwaigauwa to 'asa 'oinega yatauyama, ma hesi wanuwatuhuyahi 'abehega tauna 'ihesumanegauma 'ina loina 'oinega yatauyama 'asa bewa 'oina. Geya yaboi 'igu loina 'oinega ma 'asa bewa 'oina yatauyama. Cagu tohesumaneina tauna mumugana bwebwe'ana, ma 'omi geya wasanapu tauna. <sup>29</sup> Yaboi hesi yasanasanapu weyahina tauna 'ihesumanegauma ma wete tauna 'oinega yatauyama.”

<sup>30</sup> Beno 'oina loheloheyaedi sitohoya ma 'abehega si'abiyahi, ma togidega ta geya 'eta taiya 'wapina 'i'abi toho. Weyahina 'ina 'amasa 'ana sauga geya 'iloba. <sup>31</sup> Ma hesi tomota tupwana baibaiwadi sihemisaeya, 'oinega sigwae, “Loheya bewa moisa To'abihetena, weyahina geya sowasowahina ma 'eta taiya 'itauyama ma loheya bewa 'ina paihowa waiwaina 'inugete.”

*MeYudiya 'idi 'inapwanao nuwanuwadi ma Yesu si'abiyahi*

<sup>32</sup> Eeta tomota 'idi gwae dahwana meYudiya 'idi 'inapwanao sisanapuya, 'oinega taudi ma topwaoli madoudi 'idi tuilalao sihesumanediya sitauya Yesu 'abehega si'abiyahi.

<sup>33</sup> Sitauyama ma Yesu 'ihewagwaediya 'igwae, “Taugu tuwa sauga 'i'iunamo 'oina 'oimiya yamiyamiya ma wete yalohihila tauna 'ihesumanegauma 'oina. <sup>34</sup> Cabwa nata wabesegau ma gesowana walobegau. Casainaina 'oina yamiyamiya 'omi geya sowasowahimi 'oina watauyawa.”

<sup>35</sup> Coinega meYudiyaedi siboidimo 'oidiya sigwae, “To'ehega 'abehega 'iha'esa ma geya'abwa talobaloba? Bo nuwana 'abehega taudi meYudiya siboi 'idi 'asa 'oinega silatuwa ma sitauya tupwa ganamuliyedi 'oidiya simiyamiya, ma nobwa tomiya ganamuliyedi 'ihe'itadi, 'awa? <sup>36</sup> Cina gwaeina togidega 'ana sanapu? Weyahina 'igwaeya 'igwae, 'Nata wabesegau, ma hesi gesowana walobegau'. Ma wete 'igwaeya 'igwae, 'Casainaina 'oina yamiyamiya 'omi geya sowasowahimi ma 'oina watauyawa.’”

*We'aha 'idaudau loheloheya yawasidi weyahina*

<sup>37</sup> Ma guyainaina 'ana 'ebe losaloha, beno 'ana sabwelo madouna 'oina, Yesu boda gamwagwanidiya 'itoholowa ma 'enana madounega 'ihewagwaediya 'igwae, “Taiyawedi 'omi 'eguma tani'omi siyahala, wanaoma 'oiguwa ma we'aha wanuma. <sup>38</sup> Weyahina Buki He'asisi 'oina 'ihewaila 'igwae, 'Taiyawedi 'agu tohemisaowedi, 'atediyega we'aha 'idaudau tomota yawasidi weyahina.’” <sup>39</sup> Yesu 'ihehewagwaeya Yaluyaluwa Tabuna weyahina, ma muliyetega 'abwa 'ana tohemisaowedi Yaluyaluwa Tabuna 'oidiya 'iluhu. Tutaina beno 'oina, Yaluyaluwa Tabuna 'abwa geya tomota 'oidiya 'iluhu, weyahina Yesu 'abwa geya 'ihane 'ina 'ebeloina 'oina.

*Tomota 'oidiya miya wasiwasi 'ilatuwa*

<sup>40</sup> Yesu 'ina hewagwaeya tomota sihesagoheya 'oinega tupwana baibaiwadi siboidimo 'oidiya sigwae, “Moisa tuwa, loheya bewa palopitaina sigwaegwaeneya.” <sup>41</sup> Ma tupwadi sigwae, “Tauna tuwa To'abihetenaina.” Ma tupwadi wete sigwae, “Moisa wanuwatuhuya 'abehega To'abihetenaina Galili 'oinega 'itauyama? Cana 'ita geya sowasowahina. <sup>42</sup> Weyahina Buki He'asisi 'oina 'ihewaila pwaiya 'abehega To'abihetenaina nata tubudai Debida 'ina susu 'oinega 'itauyama. Ma wete Debidaina 'ina 'asa Bedeliyema 'oina, nata To'abihetenaina 'oina 'ili'u.” <sup>43</sup> Bewa 'oinega, tomota 'oidiya miya wasiwasi 'ilatuwa. <sup>44</sup> Tomotaedi tupwadi nuwanuwadi ma Yesu si'abiyahi, ma hesi geya 'eta taiya 'oidiyega Yesu 'wapina 'i'abitoho.

*MeYudiya 'idi 'inapwanao Yesu geya sihemisae*

<sup>45</sup> Coinega tuilalaedi silohihila topwaoli madoudi ma wete Palisiyao 'oidiya, 'oinega 'inapwanaowedi 'idi tuilalaedi sihesilalediya sigwae, “To'aha weyahina geya wa'abiyahi ma watauyeyama?” <sup>46</sup> Coinega tuilalaedi sigwae, “Loheya nage 'ina gwae mabwaiyana bwebwe'adi. Geya 'eta taiya gidemusa.” <sup>47</sup> Coinega Palisiyedi sigwae, “Nuwana 'ihenuwa 'ewegomiya, 'awa? <sup>48</sup> Ma hesi wada sanapu 'abehega geya 'eta taiya 'inapwanao 'oidiyega bo wete tauma Palisiyao 'oimega Yesu 'ihemisae. <sup>49</sup> Boda baibaiwadi hesi sihemisaeya,

weyahina taudi Mosese 'ina linao geya sisanapudi, 'oinega taudi Yehoba 'ina lina mwau hedadena nata siloba.”

<sup>50</sup> Toloinaedi 'oidiyega 'aigeda sanina Nikodimo, tauna mwalona nihuwanega Yesu 'oina 'itauya ma mahetena sihegwaegwaeya. Nikodimoina tolinaowedi 'ihewagediya 'igwae, <sup>51</sup> “Tauda 'ida lina 'abehega geya'abwa taloiloina bwagabwaga, ma hesi loheya tahesilalae ma 'ina pui tabesa nugete, 'abwa muliyetega to'aha 'ana lina ta'ebwae.”

<sup>52</sup> Coinega 'inapwanaowedi Nikodimo sihegwae hileya, “Nuwana 'owa Galili loheyaina, 'awa? Ma hesi 'eguma Buki He'asisi 'uhasili, nata 'usanapu 'abehega geya 'eta wete palopita Galili 'oinega 'itauyama.”

<sup>53</sup> Muliyetega mabwaiyadi silohihila 'idi hada 'oidiya.

## 8

<sup>1</sup> Ma Yesu 'ilatuwa, 'itauya Olibe 'oyana 'oina.

### *Wahine 'aigeda silobeya 'ipuiya*

<sup>2</sup> Gona 'i'adaleya ma Yesu wete 'ilohihila Hada He'asisi 'alona, ma tomota mabwaiyadi wete simiya 'wabu'wabuya ma tauna wete 'imiyatoiya ma 'ihe'itediya.

<sup>3</sup> Muliyetega lina 'adi tohe'itao\* ma wete Palisiyao wahine 'aigeda sitoeyama Yesu 'oina. Weyahina wahineina si'italobeya pui 'ipaihoweya, 'oinega sihetoholoya tomota gamwagamwanidiya, ma Yesu sihegwaeya sigwae, <sup>4</sup> “Tohe'ita, wahine bewa 'alobeya pui 'ipaihoweya. <sup>5</sup> Tauda 'ida lina Mosese 'i'ebwaegita 'abehega 'eguma taiyawedi tolopui talobadi wahine bewa gidemusa, 'abehega 'ilobwainediya ma da'ule 'oidiyega ta'ahu yamatedi ma si'amasana. Ma hesi 'owa togidega 'ino nuwatuhu wahine bewa weyahina?”

<sup>6</sup> Gwae bewa si'inaneya ma 'abehega 'oinega Yesu 'ina 'abo siloba ma wete siheyatalae. Ma hesi 'idi gwaeina Yesu geya 'ihemaise, tuwa 'imiya bwasi'abwa ma negwanegwala 'oina nimanega 'ilelelele. <sup>7</sup> Taudi 'abwa tuwa sihehesilala dada, 'oinega Yesu 'itoholowa ma 'ihewagediya 'igwae, “Ceguma 'omi 'oimiyega taiya geya 'ina puimo, bewa tuwa da'ule 'i'ewa ma wahineina 'oina 'iula nugeta.” <sup>8</sup> Coinega 'imiya bwasi'abwa hila ma wete negwanegwala 'oina 'ilelelele.

<sup>9</sup> Beno 'oina Yesu 'ina gwae sihesagoheya ma 'aigeda 'aigeda 'idi pui sinuwatuhudiya ma 'oinega silatulatu. Cinapwanaowedi sihapwesa nugeta, ta baibaiwadi simuliya, eeta siteluwaedi Yesu ma wahineina 'itotoholo ba'idana si'ebesinediya. <sup>10</sup> Muliyetega Yesu 'isapaila hila ta wahineina 'ihesilaleya 'igwae, “Loheloheyaedi ta'ehega siha'esa? Ta geya 'eta taiya 'imiya hila ma tauna 'ihe'ewago?”

<sup>11</sup> Ma wahineina 'igwaeya, “Cinapwana, geya 'eta taiya.” Coinega Yesu wete 'igwaeya, “Bwebwe'ana, taugu nata geya'abwa wete yahehe'ewago. Coinega bewa tuwa 'utauya ma hesi sahena wete 'upuipui hila.”

### *Yesu tauna gogo gabulena 'ana 'asilala*

<sup>12</sup> Coinega Yesu wete 'ihewagediya 'igwae, “Taugu gogo gabulena 'ana 'asilala. Ma taiyawedi 'omi 'eguma wamuliyegau, nata taugu 'asilalaina yawasimi 'oidiya yasae hane, ma 'oinega geya'abwa guguyou 'oina watautauya.” <sup>13</sup> Ma hesi Palisiyedi Yesu sihegwaeya sigwae, “Cowa hene 'uboi weyahiu 'uhehegwaegwae, 'oinega geya wete 'ahemisamo.”

<sup>14</sup> Yesu wete 'ihewagediya 'igwae, “Yaboi moisa weyahigu yahehegwaegwae, ma hesi to'aha gide 'igu hepwailla, mabwaiyadi hepwailla moisa. Weyahina yasanapuya ta'ehega yatauyama ma wete yasanapuya ta'eha yatautauya. Ma hesi 'omi geya wasanapu ta'ehega yatauyama ma wete geya wasanapu ta'eha yahaha'esa. <sup>15</sup> Comi, 'imi hesinuwa me bale'u 'idi hesinuwa gidemusa. Ma hesiyage taugu geya 'eta taiya weyahina yada hesinuwa, bo nuwana yada lina. <sup>16</sup> Ma 'eguma tomota weyahidi yahesinuwa, nata 'igu lina mabwaiyana bwebwe'ana. Weyahina loina geya yaboi 'igu lina, ma hesi Tamagu tauna 'ihesumanegauma mahetegu 'ima loinega yaloiloina. <sup>17</sup> Mosese 'ina linaedi wasanapudiya 'abehega 'eguma tohepwailla siteluwa 'oidiyega 'idi hepwailla



mahemahetena, beno hepwailla moisa. <sup>18</sup> Taugu yaboi weyahigu yahehepwaila, ma Tamagu wete weyahigu 'ihehepwaila, tauna 'ihesumanegauma.”

<sup>19</sup> Coinega sihesilaleya sigwae, “Tamauna ta'eha 'imiyamiya?” Ma Yesu 'enadi 'ihemaiseya, 'igwae, “Geya wasanapugau, 'oinega Tamagu wete geya wasanapu. Ma 'eguma moisa wada sanapugauwa, Tamagu wete wada sanapuya.” <sup>20</sup> Yesu 'ina he'itaedi bewa, Hada He'asisi 'oina 'ihe'itaediya, helau 'adi 'ebe do'ona deidiya. Ma hesi geya 'eta taiya Yesu 'i'abiyahi, weyahina 'ina tuta 'abwa geya 'iloba.

*“Casainaina 'oina yatautauya 'omi geya sowasowahimi ma 'oina watauyawa”*

<sup>21</sup> Yesu wete 'ihewgaediya, “Cabwa nata ya'ebe sinogomi, ma hesi 'asainaina 'oina yatautauya geya sowasowahimi ma 'oina watauyawa. Weyahina nata moisa wa'ebesegau, ma hesi nata 'imi pui 'oidiyega wa'amasa.”

<sup>22</sup> Coinega meYudiyaedi siboidimo 'oidiya sigwae, “To'aha 'ina gwaeina 'ana sanapu, weyahina 'igwaeya 'abehega 'asainaina 'oina 'itautauya, geya sowasowahida ma 'oina tatauya? Bo nuwana 'iboimo 'abehega 'ilohe'amasa hile?”

<sup>23</sup> Ma Yesu wete 'ihewgaediya, 'igwae, “Comi gogo gabulena 'oinega walatuma, ma taugu hesiyage tabwanega yasuluma. Coinega 'omi moisa 'imi gogo bewa, taugu geya. <sup>24</sup> Beno huhuna 'oinega yahegwagomiya 'abehega 'imi pui nata 'oidiyega wa'amasa, 'eguma geya wahemisaegau taugu.”

<sup>25</sup> Coinega taudi wete Yesu sihegwae sigwae, “To loheya hede 'owa?” Ta tauna wete 'enadi 'ihemaiseya 'igwae, “Mwalona yahegwae pwaigomiya taugu taiya.” <sup>26</sup> Ma wete 'ihewgae hilediya 'igwae, “Sowasowahigu ma ginawala baibaiwadi weyahidi yahegwagwae ma wete weyahidi yaloina, ma hesiyage tauna 'ihesumanegauma mumugana mabwaiyana bwebwe'ana. To'aha gidemusa 'oinega yahesagohediya, beno tuwa taudi weyahidi yahegwagwae mebale'u 'oimiya.”

<sup>27</sup> Ma hesi taudi tuwa Yesuina 'ina gwaeina 'oidiya Tamana weyahina geya nuwadi 'i'asilala tohona.

<sup>28</sup> Ma Yesu wete 'igwaeya, “Taugu Loheyaiguina moisa 'abwa nata wa'abi hanehegau ma beno 'oina nata wasanapugau taugu taiya, ma wete wasanapu 'abehega taugu geya yaboi 'igu nuwatuhu 'oinega yada paihowa, ma hesi to'aha gide Tamagu 'ihe'itegauwa 'oidiyega yahegwagwae. <sup>29</sup> Tauna 'ihesumanegauma geya 'i'ebesinegau, deiguwa 'imiyamiya. Weyahina tuta mabwaiyana 'oidiya 'igu paihowa 'oidiyega ya'abi'abi heyaliyaya.”

<sup>30</sup> Yesu 'ina gwaeina bewa tomota tupwana baibaiwadi sihesagoheya, 'abwa hesi sihemisae bwaibwainiya.

*Taiyawedi 'ilihasidi ma sihapwesa*

<sup>31</sup> Coinega meYudiyaedi taudi Yesu sihemisaeya, 'ihewgaediya 'igwae, “Cigu he'ita 'eguma wamuliyedi, 'omi moisa 'agu tomuliyao. <sup>32</sup> Ma 'oinega sanapu moisa waloba, ma sanapuina 'oinega lihasa waloba.”

<sup>33</sup> Ma taudi Yesu sihegwae sigwae, “Ciya, tauma hene Ebalahamo 'ina bodao, geya 'eta taiya wete 'ina loina 'oinega 'ipaimai. Ma to'aha weyahina 'ugwaeya 'abehega lihasa 'oiuwega 'aloba?”

<sup>34</sup> Coinega Yesu wete 'ihewgae hilediya 'igwae, “Yagwae moisa 'oimiya, taiyawedi 'eguma 'idi paihowa galadi, taudi beno bodaedi geya lihasa 'oina simiyamiya. Weyahina ginawala galadi 'ina waiwai 'oinega 'ipaidiya. <sup>35</sup> Weyahina topaihowa taudi geya lihalihasidi, tuta mabwaiyana geya susu 'ina boda 'oina sida miya hataya. Ma hesi toni hada natuna tauna susu 'ina boda 'ona miyamiya hatayana. <sup>36</sup> Comi wete gidemusa, 'eguma toni hada natunaina 'ilihasigomi 'omi nata bewa tuwa lihalihasimi.

<sup>37</sup> “Yasanapu pwaigomiya 'omi Ebalahamo 'ina bodao, ma hesiyage watohotoho ma 'abehega walohe'amasigau. Weyahina 'igu he'itao geya 'atemiya wada lagudiya.

<sup>38</sup> Ma hesiyage taugu to'aha gide Tamagu 'ihe'itegauwa, wete gide 'oimiya yahehegwaegwaenedi. Comi hesi to'aha gidemusa tamamiu 'oinega wahesagoheya, wete gide wapaipaihowa 'esedi.”

*Tomotaedi taudi Yesu geya sihemisae taudi Seitani tamadiu*

<sup>39</sup> Coinega Yesu 'enana sihemaiseya sigwae, “Ciya, tauma heneyage Ebalahamo tama-mai.” Ma Yesu wete 'ihewgaediya 'igwae, “Ceguma 'omi moisa Ebalahamo natunao, 'ina paihowega wada paihowa. <sup>40</sup> Ma hesi 'omi 'imi paihowa hagana, weyahina watohotoho ma 'abehega taugu gwaeina moisaina 'ana tohepwailina Yehoba 'oinega walohe'amasi-gau. Ma wete paihowaedi bewa gide wapaipaihowa 'esedi, geya gidemusa Ebalahamo 'ina paihowa. <sup>41</sup> Comi hene waboi tamamiu 'ina paihowa 'oinega watautauya.” Coinega Yesu 'enana sihemaiseya sigwae, “Tauma geya tama budabudaima, tauma hene tamamaina 'aigeda tuwa Yehoba.”

<sup>42</sup> Yesu wete 'ihewgaediya 'igwae, “Comi 'eguma moisa Yehoba tamamiu, wada helauwegauwa. Weyahina taugu Yehoba 'ihesumanegauma, ma 'asa bewa 'oina yatauyama. Ma geya 'abehega yaboi 'igu nuwatuhuwega yatauyama 'asa bewa 'oina, ma hesi tauna 'ihesumanegauma 'ina nuwatu 'oinega yatauyama. <sup>43</sup> Coinega to'aha weyahina 'igu gwae geya wada sanapudiya? Nuwana 'igu hepwaileadi geya wada hesagoha bwaibwainidiya. <sup>44</sup> Comi hesiyage Seitani tamamiu, 'oinega nuwanuwami ma tamamiuina 'ina nuwatuhuwedi wapaipaihowadi. Weyahina sauga 'ebe hegaina hauhau 'oinega 'itayama, tauna tolohe'amasa moisa. Geya 'eta wete 'eda dumwadumwaluna 'oinega 'ida tauya. Weyahina geya 'eta wete gwae moisa 'oina 'ida miyana. Tuta mabwaiyana 'oidiya 'e'abo'abo 'oidiyega 'ihehegwaegwae, weyahina tauna tuwa beno gidemusa mumugana, ma wete tauna to'e'abo'abowao mabwaiyadi tamadiu. <sup>45</sup> Ma hesiyage taugu gwae moisa 'oimiya yahehepwaileadi, ma geya wada hemisaegauwa.

<sup>46</sup> “Ma togidega? Sowasowahimi ma 'eta taiya 'oimiyega 'igu 'eda galadi 'ihewwaileadi? Nuwana geya sowasowahimi, 'awa? Coinega 'eguma gwae moisa 'oidiyega yahehegwaegwae, to'aha weyahina geya wada hemisaegauwa? <sup>47</sup> Weyahina taiya 'eguma moisa Yehoba 'oinega 'itayama, tauna moisa Yehoba 'ina gwae 'ana tohesagoha bwaibwaina. Ma 'omi hesi nuwana geya Yehoba 'oinega watauyama, 'oinega Yehoba 'ina gwae geya wada hesagohediya.”

*Yesu 'imiyamiya 'abwa muliyetega Ebalahamo 'ili'uwa*

<sup>48</sup> MeYudiyaedi 'idi 'inapwano Yesu 'ina gwaeina sihemisaeya, sigwae, “Mwalona 'ima gwae weyahiu, 'ana moisa 'ilatu pwaima. Weyahina 'agwaeya 'abehega 'owa Sameliya loheyaina, ma wete hi'ahi'a\* 'oiuwa 'imiyamiya.”

<sup>49</sup> Ma Yesu 'ihewgaediya 'igwae, “Taugu geya hi'ahi'a 'oiguwa, weyahina Tamagu yahe'asisiyaneya, ma hesi geya wahe'asisiyanegau. <sup>50</sup> Taugu moisa yaboi geya sanigu yada 'abi haneheya. Toloina 'aigeda tauna hesi sanigu 'i'abi'abi hanehe. <sup>51</sup> Coinega yagwae moisa 'oimiya taiyawedi 'omi 'eguma 'igu gwae wagwahu bigadi, 'omi nata geya'abwa wa'ama'amasa.”

<sup>52</sup> Coinega meYudiyaedi wete sihegwaeya sigwae, “Cabwa hesi 'asanapu bwaibwainigowa, tomada 'abe hi'ahi'a 'oiuwa 'imiyamiya. Weyahina Ebalahamo 'asanapuya 'i'amasa pwaiya ma wete palopitao 'asanapudiya si'amasa pwaiya. Ma 'ugwaeya 'abehega taiyawedi 'eguma 'ino gwae sihegwahu bigadi, geya'abwa si'ama'amasa. <sup>53</sup> Tamamaina Ebalahamo 'i'amasa pwaiya, 'oinega sahena 'utohotoho ma 'abehega tamamaina 'ulagu suluhe ma 'uboi 'ulagu hanehego. Palopitao wete si'amasa pwaiya, 'oinega sahena wete 'utohotoho ma 'abehega 'ulagu suluhedi, 'awa?”

<sup>54</sup> Eema Yesu 'ihewgaediya 'igwae, “Taugu 'eguma yaboi moisa yahehepwatu hilegau, 'agu hepwauiina ginaula bwagabwaga. Ma hesi Tamagu tauna moisa 'agu tohepwatuina, tauna tuwa wagwaeneya 'abehega 'imi Yehoba. <sup>55</sup> Ma hesi tauna geya wasanapu toho, yaboi tuwa yasanapuya. Ma 'eguma yagwae, 'Geya yasanapu,' nata ya'abowegomi gidemusa 'omi wa'e'abo'abo. Ma hesiyage tauna yasanapu bwaibwainiya 'oinega 'enanaina

yagwahugwahu bigadi. <sup>56</sup> Tamamiuina Ebalahamo ma'ina yaliyaya ma 'abehega 'igu sabwelo 'i'ita, 'oinega 'igu sabwelo 'i'iteya ma 'iyaliyaya madouna.”

<sup>57</sup> Coinega meYudiyaedi Yesu sihegwaeya sigwae, “Cowa 'abwa geya 'ino bolime pipiti 'uloba ma 'ugwaeya 'abehega Ebalahamo 'u'iteya.” <sup>58</sup> Ma Yesu 'ihegwaediya, 'igwae, “Yagwae moisa 'oimiya, taugu nugeta yamiyamiya, 'abwa muliyetega Ebalahamo 'ili'uwa.”

<sup>59</sup> Coinega meYudiyaedi da'ule si'ewediya ma 'abehega si'ahu yamate, ma Yesu 'oidiyega 'iha'waiha ma Hada He'asisi 'oinega 'ilatuwa ma 'itauya.

## 9

### *Yesu tomata gibugibu 'aigeda 'i'abi hebwebwe'aniya*

<sup>1</sup> Hali sabwelo 'oina Yesu 'itautauya ta 'edai loheya 'aigeda mata gibugibuina 'ilobeya, loheyaina 'ina mata gibugibuina 'ina sauga li'u 'oinega. <sup>2</sup> Ma Yesu 'ana tomuliyao sihegwae sigwae, “Tohe'ita, taiya 'ina pui 'oinega loheya nage 'ili'uwa mata gibugibuina? Ciboimo tuwa 'ina pui bo sinana ma tamana 'idi pui?”

<sup>3</sup> Coinega 'enadi Yesu 'ihemaiseya 'igwae, “Geya tauna 'ina pui 'oinega, bo nuwana sinana ma tamana 'idi pui 'oinega. Ma hesi tuwa nage gidemusa matana 'igibuwa ma 'oinega tomota mabwaiyadi Yehoba 'ina paihowa waiwaina si'ita, loheyaina 'oinega. <sup>4</sup> Tauna 'ihesumanegauma 'ina paihowa sowasowana tapaihowadi sabwelo 'oina, weyahina nihuwana 'eguma 'ilatu, geya sowasowahina tapaihowa. <sup>5</sup> Coinega tutaina taugu bale'uwa yamiyamiya, taugu tuwa bale'uina 'ana 'asilalaina.”

<sup>6</sup> Gwae bewa 'i'inatediya 'igumwala, ma bale'uwa 'i'esoha ma 'esohanaina 'oinega bale'u mahetena 'ihinisiya ta dobadoba'a 'ipaihoweya, ma 'oinega loheyaina mata gibugibuina matana 'oina 'i'e'abi'abiyeya. Cigumwala <sup>7</sup> ma 'ihegwaeya 'igwae, “Cutauya Sailome we'ahina 'oina matauina 'ubuyo.” (Sailome 'ana bui beno hesumane.) Coinega loheyaina 'itauya Sailome we'ahina 'oina, matanaina 'ibuyoya ma 'ibwebwe'ana ma wete 'ihilama.

<sup>8</sup> Muliyetega loheyaina 'iyanaowedi ma wete tomotaedi taudi loheyaina sisanapuya 'abehega tauna tolo'ahwa'ahwanoi ta sigwae, “Tauna bewa tolo'ahwa'ahwanoi heda-hedada sauga mabwaiyana 'imiyamiya ma 'ilolo'ahwa'ahwanoi, 'awa?”

<sup>9</sup> Coinega tupwadi sigwae, “Cehe, tauna tuwa beno loheyainaina.” Ma wete tupwadi sigwae, “Ciya, hagana, ma hesi loheya 'aigeda 'ana 'ita tauna gidemusa.” Ma 'iyamo loheyaina 'iboimo 'ihewwaila hileya 'igwae, “Geya, taugu tuwa tolo'ahwa 'ahwanoiina.”

<sup>10</sup> Coinega sihesilaleya sigwae, “Togidega matauina 'ibwebwe'ana 'esa?” <sup>11</sup> Ma loheyainaina 'enadi 'ihemaiseya 'igwae, “Loheya 'aigeda sanina Yesu dobadoba'a 'ipaihoweya ma matagu 'oina 'i'e'abi'abiyeya, ma 'ihegwaegauwa 'igwae, 'Cutauya Sailome we'ahina 'oina matauina 'ubuyo.’ Coinega yatauya we'ahina 'oina mataguina yabuyoya, 'oinega nige bewa mataguina 'ibwebwe'ana.”

<sup>12</sup> Ta wete sihesilala hileya sigwae, “Ta'eha tauna loheyainaina?” Ma 'ihegwaediya 'igwae, “Cinamuge, geya yasanapu.”

### *Palisiyao nuwanuwadi ma ginaulaedi bewa sisanapudi*

<sup>13-14</sup> Yesu loheyaina matana 'i'abi'abi hebwebwe'aneya Sabati 'ana sabwelo 'oina. Coinega tomata gibugibuina sitoeya ma sitauyeya Palisiyao 'oidiya. <sup>15</sup> Ma Palisiyedi tomata gibugibuina wete sihesilala hileya sigwae, “Togidega matauina 'ibwebwe'ana 'esa?” Coinega 'ihegwaediya 'igwae, “Dobadoba'a 'ipaihoweya ma mataguina 'i'e'abi'abiyeya ma we'aha 'oina yabuyoya ma mataguina 'ibwebwe'ana.”

<sup>16</sup> Coinega Palisiyedi tupwadi sigwae, “Matauina 'ana topaihowaina, tauna geya Yehoba 'oinega 'itauyama. Weyahina Sabati 'ana lolina geya 'ida muliyediya.” Ma tupwadi wete sigwae, “Togidega, togala 'eta sowasowahina ma 'ila'ilala bewa gidemusa 'ipaihowa 'ese? Bo geya 'eta taiya sowasowahina, 'awa?” Bewa 'oinega wataha 'oidiya 'ilatuwa. Weyahina boda tupwadi 'idi gwae hagadi ma hali boda wete 'idi gwae hagadi.

<sup>17</sup> Muliyetega Palisiyedi wete tomata gibugibuina sihesilala hileya sigwae, “Cowa togidega 'ino nuwatuhi matau 'ana to'abi hebwebwe'anaina weyahina?” Coinega tauna 'igwaeya, “Tauna palopita 'aigeda.”

<sup>18</sup> Ma hesi meYudiyaedi loheyaina geya sihemisae 'abehega tauna moisa mata gibugibuina ma 'abehega bewa tuwa matana 'ibwebwe'ana hila. Coinega sinana ma tamana sibwauwediya <sup>19</sup> ma sihesilalediya sigwae, “Tauna bewa moisa natumi? Ma wete wasanapuya 'abehega mamata gibugibuina 'ili'uwa? Ma wete togidega ta matana 'ibwebwe'ana hila?”

<sup>20</sup> Coinega loheyaina sinana ma tamana Palisiyao 'enadi sihemaiseya sigwae, “Tauma bewa moisa natumai, ma wete 'asanapuya 'abehega mata gibugibuina 'ili'uwa. <sup>21</sup> Ma hesi geya 'asanapu togidega matana 'ibwebwe'ana 'esa. Ma wete geya 'asanapu taiya matana 'i'abi hebwebwe'aniya. Ma mane hana tauna wahesilala. Tauna bo'iyage 'ihemadou pwaiya, sowasowahina ma 'iboi weyahina 'ihewgaegwae.”

<sup>22</sup> Sinanaina ma tamanaina gwae bewa si'inediya weyahina meYudiya 'idi tohanuge-tao simatautediya. Weyahina meYudiya 'idi lina silaguya 'abehega taiyawedi 'eguma Yesu si'ahwa To'abihetena, taudi nata hada tapwalolo 'oinega sipa'idi. <sup>23</sup> Bewa huhuna 'oinega loheyaina tamana ma sinana sigwaeya sigwae, “Mane hana tauna wahesilala ma 'iboi weyahina 'ihewgaegwae, weyahina 'ihemadou pwaiya.”

<sup>24</sup> Coinega wete tomata gibugibuina sibwau hileya ma sihegwae sigwae, “Cuhepwaila bwaibwaina 'oima, weyahina loheyaina 'asanapu bwaibwainiya tauna togala.” <sup>25</sup> Ma 'igwaeya, “Geya yasanapu nuwana tauna togala, bo nuwana geya. Ma tuwa beno yasanapuya matagu 'igibuwa ma 'i'abihe bwebwe'anigauwa.”

<sup>26</sup> Coinega 'oina sihesilala, sigwae, “To'aha matauina 'oina 'ipaihoweya ma 'ubwebwe'ana?” <sup>27</sup> Ma tauna wete 'ihewgaediya, “Nige heneyage yahewgae pwaigomiya ma 'enagu geya wahesagohe. To'aha weyahina 'abehega wahesagohe hila? Nuwana nuwanuwami ma 'abehega wamuliye, 'awa?”

<sup>28</sup> Ma hesi taudi siheliyeya sigwae, “Cowa tuwa 'ana tomuliyaina, taiya hedeyage. Ma tauma Mosese 'ana tomuliyao, <sup>29</sup> weyahina 'asanapuya 'abehega Yehoba 'ina hepwillao 'i'ebwaeya Mosese 'oina. Ma hesi loheyaina beno geya 'asanapu ta'ehega 'itauyama.”

<sup>30</sup> Loheyaina 'enadi 'ihemaiseya 'igwae, “Cebe nuwa henainaida, weyahina loheyaina matagu 'i'abi hebwebwe'aneya, ma hesi geya wasanapu ta'ehega 'itauyama. <sup>31</sup> Ta wete mabwaiyada tasanasanapu 'abehega Yehoba geya sowasowahina ma togala 'enadi 'ihesagohedi, beno tuwa 'eguma taiya Yehoba 'ihe'asisiyane ma 'ina nuwatuhi 'ipaihowadi, nata tauna 'enana Yehoba 'ihesagohedi. <sup>32</sup> Ma wete tasanasanapu 'abehega bale'u 'ana hemasalaha hauhau 'oinega ta nige bewa, geya 'eta taiya wasana tahesagohe 'abehega tomata gibugibu 'i'abi'abi hebwebwe'enedi. <sup>33</sup> Loheyaina beno 'eguma geya Yehoba 'oinega, geya sawasowahina ma 'ila'ilala bewa gide 'ipaihowa 'ese.”

<sup>34</sup> Ta Palisiyedi loheyaina sihegwae sigwae, “Cino li'u hauhau 'oinega 'itauyama 'owa 'aigeda topui. Ma bewa 'abehega 'utohotoho ma 'uhe'itemai, 'awa? Taiya 'owa nigeyage?” Coinega loheyaina hada tapwalolo 'oinega sipa'iya ma 'ilatuwa.

<sup>35</sup> Loheyaina wasana Yesu 'ihesagoheya 'abehega hada tapwalolo 'oinega sipa'iya, 'oinega 'itauya loheyainaina 'ibeseya, ta 'ilobeya, ma 'ihewgaeya 'igwae, “Loheyaina moisa 'uhemisaeya?” <sup>36</sup> Ma loheyaina 'igwae, “Cinapwana, taiya 'abehega yahemisaeya?” <sup>37</sup> Coinega Yesu wete 'ihewgae hileya 'igwae, “Loheyainaina 'u'ita pwaiya ta tauna bewa tuwa maheteu wahewgaegwae.” <sup>38</sup> Coinega loheyaina 'igwae, “Cinapwana, 'abwa hesi yahemisaegowa,” eeta 'i'etuluha Yesu 'oina.

<sup>39</sup> Muliyetega Yesu 'igwae, “Taugu yatauya pwaima bale'uwa ma yaloinaegomi ma 'oinega taiyawedi 'omi mata gibugibuimi, matami sibwebwe'ana hila. Ma hesi taudi sigwaeya 'abehega matadi bwebwe'ana, nata matadi sigibu.” <sup>40</sup> Ta Palisiyedi Yesu deina sitotoholo 'ina gwaeina sihesagoheya ma sigwae, “Togidega ma tauma 'abehega wete mata gibugibuima, 'awa?” <sup>41</sup> Ma Yesu 'ihewgaediya 'igwae, “Comi 'eguma mata

gibugibuimi, geya'abwa 'imi mumuga galadi. Ma hesi wagwaeya 'abehega matami bwebwe'adi, 'oinega 'imi mumuga galadiyedi 'abwa tuwa simiyamiya.”

## 10

### *Sipi 'adi gwaē hegehegediina*

<sup>1</sup> Yesu wete 'ihēgwaediya 'igwae, “Yagwae moisa 'oimiya, taiyawedi 'eguma sipi 'adi 'ali 'ana 'ahwa'eda geya 'oinega siluhu, ma sinao hali tupwega siluhu, taudi sanidi toyagaha. <sup>2</sup> Ma hesi taiya 'eguma sipi 'idi 'ahwa'eda moisa 'oinega 'iluhu, tauna sipi 'adi to'itayahina. <sup>3</sup> Weyahina 'idi 'ahwa'edaina 'ana to'itayahina 'ahwa'edaina 'iso'e. Ciso'eya ma sipi 'adi to'itayahinaina 'iluhu ma 'ina sipiyedi 'aigeda 'aigeda sanidi 'oidiyega 'ibwauwauwedi. Cibwauwedi ma 'enana sihesagohe, ma 'inugetedi, silatulatu 'atamana. <sup>4</sup> Silatu mabwaiyadi ma 'adi to'itayahinaina 'inugenugeta ma taudi simulimuliyaya. Weyahina 'adi toniina 'enana sisanasanapu ma wete simanasameya. <sup>5</sup> Sipiyedi geya sowasowahina ma 'eta taiya hagahagana sihemuli tabubu, ma hesi nata hali loheya 'oidiyega sidenā. Weyahina hali loheya 'enadi geya sisanapu ma wete geya simanasamedī.” <sup>6</sup> Yesu gwae hegehegedi bewa 'oidiya 'i'inaneya, ma hesi taudi tuwa geya 'oidiya 'imaedana tohona to'aha weyahina 'ihegwaegwae.

### *Yesu tauna sipi 'adi to'itayahina*

<sup>7</sup> Coinega Yesu wete 'ihēgwae hilediya 'igwae, “Yagwae moisa 'oimiya, taugu sipi 'idi 'ahwa'eda moisa. <sup>8</sup> To'itayahinedi mwālona sinugetama taudi toyagaha, 'oinega 'enadi sipiyedi geya sihesagohedi.” <sup>9</sup> Coinega wete 'ihēgwae hilediya 'igwae, “Taugu tuwa bewa sipiyedi 'idi 'ahwa'edaina. Coinega taiyawedi 'omi 'eguma 'oiguwega waluhu, nata bwebwe'ana waloba. Weyahina sauga 'aigeda 'aigeda nata 'oidiya 'oiguwega waluhuluhu ma wete 'oiguwega walatulatu ma modumodu bwebwe'ana 'oidiya wa'ai'ai. <sup>10</sup> Ma hesi toyagaha 'idi paihowa beno nata sitauyama siyagaha ma silohe'amasā, ma wete sipi si'abi hegaladi. Taugu hesiyage yatauyama ma 'oinega 'oiguwega tomota yawasidi bwebwe'ana ma mahamahana siloba.”

<sup>11</sup> Coinega wete 'ihēgwae hilediya 'igwae, “Taugu moisa sipi 'adi to'itayahina bwebwe'agu, weyahina yawasigu yatagwaleya ma 'abehega 'igu sipi weyahidi ya'amasā. <sup>12</sup> Ma hesiyage taiya 'eguma geya sipi 'adi to'itayahina moisa ma maisamo weyahina 'ipaipaihowa, tutaina 'eguma 'edewa sasasaina 'i'ita 'itautauyama, nata sipiyedi 'i'ebesinedi ma 'idena. Cabwa hesi 'edewaina sasasaina 'inaoma ma sipi tupwadi 'ilohe'amasidi ma mabwaiyadi 'ipa'i lelewanedi. <sup>13</sup> Loheyaina bewa gidemusa nata 'idena weyahina tauna tuwa maisamo weyahina 'ipaipaihowa, tauna geya sipiyedi weyahidi 'inuwatuhu.” <sup>14</sup> Coinega wete 'ihēgwaediya 'igwae, “Ma taugu hesi sipi 'adi to'itayahina bwebwe'agu, weyahina 'igu sipiyao mabwaiyadi yasanasanapudi ma wete taudi sisanasanapugau. <sup>15</sup> Gidemusa tuwa, Tamagu 'isanasanapugau ma wete taugu Tamagu yasanasanapu. Eema yawasigu yatagwaleya ma 'igu sipi weyahidi ya'amasā. <sup>16</sup> Cigu sipi tupwadi wete simiyamiya taudi tuta bewa 'oina geya 'igu 'ali 'alona simiyamiya. Ma hesi yatohotoho ma sipidiyedi yatoedima, ma 'oinega 'enagu sihesagohe ma 'oiguwa sinaoma ma'iyadiyao siheboda 'aigeda, ma wete 'aneyage 'adi to'itayahina 'aigeda tuwa. <sup>17</sup> Tamaguina tauna 'ihelauwegauwa madouna, weyahina yawasigu yatagwaleya ma ya'amasā 'abwa muliyetega yawasigu ya'ewahila. <sup>18</sup> Cigu 'amasaina geya 'eta taiya 'iloinaegau ma ya'amasā, yaboi tuwa yatagwalegauwa ma ya'amasā. Sowasowahigu yatagwalegau ya'amasā, ma weteyage sowasowahigu yawasigu ya'ewa hila, weyahina Tamagu bewa gide 'ina nuwatuhu ta wete 'ina lina 'oiguwa.”

<sup>19</sup> Yesu 'ina gwaeyedi weyahidi meYudiya siboidimo sihe'ohe'ohena madouna, 'oinega 'oidiya wataha 'ilatua. <sup>20</sup> Nage 'oina tomota baibaiwa hedade sigwae, “Loheya beno hi'ahi'a 'oina 'imiyamiya, 'oinega 'i'abi'abi heyauyaule. Sahena 'ina gwae wahehesagohedi.” <sup>21</sup> Ma hesiyage tomota tupwadi sigwae, “Ciya, bewa geya gidemusa hi'ahi'a 'ina



gwae. Weyahina yaluyaluwa bi'i geya sowasawahina tomata gibugibu bewa gidemusa 'i'abi hebwebwe'ana 'ese.”

*MeYudiya Yesu silogwahateya*

<sup>22</sup> Gogagogai 'ana tuta 'oina guyai 'aigeda Yelusalema 'oina sipaihoweya, beno meYudiya 'idi 'ebe nuwatuhuyahina weyahina beno Hada He'asisi si'abi hemaedana hileya ma sibwa'a he'asisiyane Yehoba 'oina. <sup>23</sup> Guyainaina 'oina Yesu Hada He'asisi 'oina 'iyawala dadana 'aigeda biliupa 'oina. Biliupainaina sibwauweya Kini Solomononi 'ina biliupa. <sup>24</sup> Nage 'oina meYudiya Yesu siha'wabu'wabuya ma sihegwaeya sigwae, “Tuta mabwaiyana 'oidiya 'owa 'ima nuwatuhe 'uhehe lahalahadi. Ma to tuta 'oina 'abwa 'oima 'uhepwaila bwaibwaina, 'owa moisa To'abihetenaina bo geya?”

<sup>25</sup> Ma Yesu 'ihegwaediya 'igwae, “Coimiya yahepwaila pwaiya ma geya wahemisaegau. Ma wete paihowaedi Tamagu saninega yapaipaihowadi ta 'oidiyega wete sihepwaila pwaigauwa, <sup>26</sup> ma hesiyage geya wahemisa tohogau, weyahina 'omi geya 'igu sipiyao moisa. <sup>27</sup> Weyahina taugu 'igu sipiyao 'enagu sisanasanapu, ma wete taugu yasanasanapudi eema simulimuliyegau. <sup>28</sup> Ma wete 'igu sipiyedi yawasidi miyamiya hatayana ya'ebwaediya ma 'oinaga geya'abwa sigalagala. Ma wete taudi nata geya'abwa 'eta taiya nimaguwega 'i'waye'wayegau. <sup>29</sup> Sipiyedi Tamagu tauna 'i'ebwaegauwa, 'oinaga geya 'eta taiya sowasawahina ma Tamagu nimanega 'i'waya. Weyahina tauna ginaula mabwaiyana 'ihemadou sinediya. <sup>30</sup> Taugu ma Tamagu 'aigeda tuwa.”

<sup>31</sup> Coinega meYudiyaedi da'ule wete si'ewediya ma 'abehega Yesu si'ahu he'amasi, <sup>32</sup> ma Yesuina 'i'itediya ma 'ihegwaediya 'igwae, “Paihowa bwebwe'adi ma wete baibaiwadi Tamagu 'oinaga yapaihowediya 'oimiya ma wa'itediya, ma to paihowa hede weyahina nuwanuwami ma 'abehega da'uleyega walohe'amasigau?”

<sup>33</sup> Coinega meYudiyaedi Yesu 'enana sihemaiseya sigwae, “Geya 'abehega 'ino paihowa bwebwe'adi weyahidi 'ahunugo, ma hesiyage 'ino gwae hohopa'ala weyahidi 'ahunugo. Weyahina 'owa tuwa loheya masiha ma 'ugwaeya 'abehega 'owa tuwa Yehobaina.”

<sup>34</sup> Coinega Yesu wete 'ihegwae hilediya 'igwae, “Cima lona 'oidiya Buki He'asisi 'oina silele pwaiya Yehoba 'ina gwae 'abehega, 'Comi tuwa yehobaedi.’ <sup>35</sup> Ma moisa tuwa Yehoba 'ina hepweilaina 'ina Buki He'asisi 'oidiya mabwaiyana geya 'ida 'abowa. Ma bukinaina 'oina 'ihepwaila 'abehega tomotaedi taudi Yehoba 'ina gwae 'i'ebwaediya, ma 'i'ahwa yehobaediya. <sup>36</sup> Coinega to'aha weyahina 'igu gwae wanuwatuhuya 'abehega gwae hohopa'ala tutaina yagwaeya 'abehega taugu Yehoba natuna? Ma hesi wa'ita, taugu 'ihesuwanegauwa ma 'ihesumanegauma ma yatauyama bale'uwa ma 'ina paihowa yapaipaihowadi. <sup>37</sup> Coinega 'eguma taugu geya Tamagu 'ina paihowa yada paihowediya, sahena wete wahemisaegau. <sup>38</sup> Ma 'eguma taugu moisa Tamagu 'ina paihowa yapaipaihowadi, ma geya wahemisaegau, tuwa hede paihowaedi wahemisaedi, 'abwa hesi 'igu paihowaedi 'oidiyega wasanapu bwaibwainigau 'abehega taugu moisa Tamagu 'oiguwa 'imiyamiya ma wete taugu Tamagu 'oina yamiyamiya.”

<sup>39</sup> Nage 'oina meYudiyaedi wete sitohoya ma 'abehega si'abiyahi, ma hesi nimadiyega 'ilatuwa ma 'itauya. <sup>40</sup> Ci'ebesinediya ma 'ihabala hila Yolidani we'ahina 'oina, beno Yoni 'ina 'ebe hehabitaiso nugenugeta deina, ma 'oina nobwa 'ilo'asa. <sup>41</sup> Nage 'oina boda si'autama 'oina ma siboidimo 'oidiya sihegwaegwaeya sigwae, “Yoni moisa geya 'eta paihowa waiwaina 'ipaihowadi, ma hesiyage 'ina hepweilala loheya bewa weyahina 'ana moisa 'ilatu pwaima, ta wete ta'ahwa moisaeya.” <sup>42</sup> Casainaina 'oina tomota baibaiwadi Yesu sihemisaeya.

## 11

*Lasalo 'ina 'amasa weyahina*

<sup>1</sup> Loheya 'aigeda lolohalaina sanina Lasalo, Bedani loheyaina. Loheyainaina nuhunao siteluwa mahetenao simiyamiya, 'aigeda sanina Meli ma 'aigeda sanina Malida. <sup>2</sup> Meliina tauna 'abwa nata Yesu 'ahena 'iheholoi ma wete debanega Yesuina 'ahena 'ilogogosi.

<sup>3</sup> Coinega tutaina nuhudiina Lasalo 'ilohala taudi tuwa nuhunaowedi wasa sitauyeya Yesu 'oina sigwae, “Cinapwana, 'iyauina Lasalo 'ilohala.” <sup>4</sup> Nage 'oina Yesu Lasalo wasana 'ihesoheya 'oinega tomota 'ihewgaediya 'igwae, “Lohalaina beno 'ana sanapu nata geya'abwa yawasina 'igumwagumwala. Ma hesi lohala nage 'oina 'ilatuwa ma 'oinega tomota mabwaiyadi Yehoba sihepwatuwe ma wete natunaina sihepwatuwe.” <sup>5</sup> Yesu Malida matasina ma wete nuhudiina Lasalo 'ihelauwediya madouna. <sup>6</sup> Eeta tutaina Lasalo wasana 'ihesoheya 'asainaina 'oina 'imiyamiya, 'oina sabwelo 'eluwa 'imiya hila.

<sup>7</sup> Sabwelowedi 'eluwa sigumwala ma 'ana tomuliyaedi 'ihewgaediya 'igwae, “Bewa tuwa talohihila Yudiya.” <sup>8</sup> Coinega 'ana tomuliyaedi sihegwae sigwae, “Cinapwana, sa-hena tatautauya 'asainaina 'oina. Weyahina 'eguma tatauya, nata meYudiya da'uleyega si'ahu he'amasigo.” <sup>9</sup> Coinega Yesu 'ana tomuliyaedi 'ihewgaediya 'igwae, “Sabwelo 'ana mabwaiyana beno gonagona 'oinega ma 'itauya 'ana siga lahilahi. Sabweloina 'oina 'eguma 'eta taiya loheya 'itauya, nata geya'abwa 'ihehetupatupa. Weyahina gogo gabulena 'ana maedana 'imiyamiya. <sup>10</sup> Ma hesi 'eguma 'eta loheya nihuwanega 'itauya, nata 'ihetupa deyadeya. Weyahina nihuwana 'oina geya 'eta wete he'ala hemaedana 'imiyamiya.”

<sup>11</sup> Gwaeyedi 'i'inediya ma wete 'oidiya 'igwae, “Ciyadaina Lasalo 'i'eno sineya, 'oinega yatauya ma yahano.” <sup>12</sup> Coinega 'ana tomuliyaedi sigwae, “Cinapwana, 'eguma moisa 'i'eno sineya, nata moisa 'ana lohalaina 'oinega 'ibwebwe'ana hila.” <sup>13</sup> Weyahina tomuliyaedi 'idi nuwatuhu 'abehega Lasalo moisa 'i'eno sineya Yesu weyahina 'ihewgaegwae. Ma hesi Yesu 'ina gwae 'ana sanapu 'abehega Lasalo moisa yawasina 'igumwala pwaiya. <sup>14</sup> Coinega Yesu 'igwae latu bwaibwaina 'oidiya 'igwae, “Lasalo yawasina 'igumwala pwaiya. <sup>15</sup> Ma hesiyage ma'igu yaliyaya, weyahina 'ina 'amasaina geya 'oina yamiyamiya ma 'oinega 'igu paihowa waiwaina wa'ita ma wahemisaegau. Ma tuwa wete bwebwe'ana, ma hana tuwa tatauya ma ta'ita.”

<sup>16</sup> Coinega Tomasi tauna sibwauweya Didiluwaluwa 'iyanaowedi 'ihewgaediya 'igwae, “Cida tohe'ita tuwa mahetedai tatauya, 'eguma 'i'amasa, tauda wete ta'amasa.”

#### *Yesu tauna toholo hila huhuna*

<sup>17</sup> Coinega tutaina Yesu Bedani deina 'ilatuwa ma wasa 'ihesoheya 'abehega sabwelo 'ehata sigumwala 'oidiya Lasalo sigaliheya. <sup>18</sup> Bedani beno geya bwaga Yelusalema 'oinega, <sup>19</sup> eeta meYudiya baibaiwadi ma'idi 'ate muyamuya sitauyama Malida ma Meli 'abehega nuwadi si'abi hebwebwe'anidi. <sup>20</sup> Sauga nage 'oina Malida Yesu wasana 'ihesoheya 'abehega 'itauyama, 'oinega 'iboinamo 'ilatuwa 'edai Yesu sabi helatuina. Ma Meli beno hadai 'imiyamiya.

<sup>21</sup> Malidaina Yesu 'ilobeya ma 'ihewgaeya 'igwae, “Cinapwana, 'owa 'eguma 'ebwa 'uda miyamiyana, nuhugu geya'abwa yawasina 'ida gumwagumwala. <sup>22</sup> Ma hesiyage yasanapuya 'abehega 'eguma to'aha weyahina Yehoba 'oina 'u'ahwanoi nata tuwa 'ino 'ahwanoiina maisana 'i'ebwaego.”

<sup>23</sup> Coinega Yesu Malida 'ihewgaeya 'igwae, “Nuhuina nata 'itoholo hila.”

<sup>24</sup> Coinega wahineina 'igwae, “Cehe, yasanapuya nata moisa tuta 'ana 'ebe losa-loha 'oina galihega 'itoholo hila.” <sup>25</sup> Coinega Yesu wahineina wete 'ihewgae hileya 'igwae, “Taugu moisa toholo hila huhuna ma wete yawasi moisa. Ma taiyawedi 'eguma sihemisaegau, tutaina 'eguma yawasidi 'igumwala, yawasi miyamiya hatayana siloba. <sup>26</sup> Ma taiyawedi 'eguma mayawasidi ma sihemisaegau, nata geya'abwa yawasidi 'igumwagumwala. Coinega togidega 'igu gwae bewa 'oiuwa, 'uhemisaegauwa bo geya?”

<sup>27</sup> Ta Malida 'igwae, “Cinapwana, yahemisaegowa 'abehega 'owa To'abihetenaina, Yehoba natuna, gogo gabulena bewa 'oina 'utauyama.”

#### *Yesu Lasalo weyahina 'idouwa*

<sup>28</sup> Malida 'ina gwae mulina 'ilohihila hadai ma tasinaina Meli 'ihewgae gahuya 'igwae, “Ciyagu, Tohe'itaina 'ilatuma ma 'ihesilalegowa.” <sup>29</sup> Nage 'oina Meli tasina 'enana 'ihesoheya 'oinega 'isiwa toholo mwayamwayauwa ma 'itauya Yesu 'oina.

<sup>30</sup> Ma hesiyage Yesu 'abwa geya 'asainaina 'oina 'iluhuma, 'abwa tuwa tupwaina Malida 'oina 'ilobeya 'oina 'itotoholo. <sup>31</sup> Sauga nage 'oina meYudiyaedi taudi Meli mahetedi sihedoudouwa Meliina 'ina tauya 'oina si'iteya, ma 'idi nuwatuhu 'abehega 'itautauya galiha 'idou, 'oinega sihemuli tabubuya mahetedi sitauya. <sup>32</sup> Coinega tutaina Meli Yesu 'oina 'ilatuwa 'ahena 'ituluha ma 'ihe'asisiyaneya, ma 'igwaeya, 'igwae, “Cinapwana, 'owa 'eguma 'ebwalai 'ebwa 'uda miyamiya geya'abwa wete nuhuguina yawasina 'ida gumwagumwala.”

<sup>33</sup> Yesu nage 'oina 'i'iteya Meli ma meYudiyaedi mahetenao sitauyama sidoudou. Cidi douwega Yesu wete 'atena 'imuyamuya ma nuwana 'igala madouna. <sup>34</sup> Ma 'ihewgaediya 'igwae, “Mane 'oina 'ana galihina?” Ma taudi sigwae, “Cinapwana, 'unaoma tatauya ma 'ahe'itago.”

<sup>35</sup> Ta Yesu wete 'idouwa. <sup>36</sup> Coinega meYudiyaedi Yesu si'iteya ma sigwaeya, “Ciyainaina moisa 'ihelauweya madouna.” <sup>37</sup> Ta 'oidiyega tupwadi sigwae, “Tauna tuwa Yesuina mwalona tomata gibugibu 'i'abihe bwebwe'aniya. Ma to'aha weyahina geya 'itauyama ma 'iyanaina bewa 'ilemema geya'abwa yawasina 'igumwagumwala?”

#### *Yesu Lasalo galihega 'i'abi hetoholo hileya*

<sup>38</sup> Beno 'oina Yesu tuwa ma'ina nuwagala madouna ma galihina 'oina 'ilatuwa. Galihina duluha, 'oinega 'ahwanaina da'ule tabatabana 'oinega silagu 'ausiya. <sup>39</sup> Ta Yesu boda 'ihewgaediya 'igwae, “Da'uleina nage galihina 'oinega wa'ewa yahule.” Coinega Malida tauna tuwa loheyaina yawasina 'igumwagumwala nuhuna Yesu 'enana 'ihemaiseya 'igwae, “Cinapwana, tuta bewa 'oina 'imwahulu pwaiya. Weyahina 'ebwalai heneyage 'ahemiya taona pwaiya ta nige bewa sabwelo hehatana 'ilobeya.” <sup>40</sup> Ma Yesu Malida 'ihewgaeya 'igwae, “Mwalona yahegwae pwaigowa, 'eguma moisa 'uhemisaegauwa, nata Yehoba 'ina waiwai 'u'ita.”

<sup>41</sup> Coinega da'uleina sibui wasiyeya, ma Yesu 'i'ita haneya galewa, ma 'i'ahwanoiya 'igwae, “Tamagu yawwedo, weyahina 'owa 'enagu 'ana tohesagoha. <sup>42</sup> Yasanapuya 'owa moisa 'enagu 'ana tohesagoha bwaibwaina, 'oinega 'igu 'ahwanoi bewa 'oiuwa 'uda hesagohe ma 'oinega 'ino waiwai tomotaedi bewa si'ita ma sihemisa 'abehega 'owa moisa 'uhesumanegauma.” <sup>43</sup> Yesu 'ina 'ahwanoi mulina 'enana madouna 'oinega 'ibwauwa 'igwae, “Lasalo, 'ulatuma!” <sup>44</sup> Nage 'oina Lasalo galihega ma'ana wadu 'ilatuma. Weyahina nimana ma 'ahena ma wete manina 'ale'o 'oidiyega siwaduhidiya. Ta Yesu boda 'ihewgaediya 'igwae, “Cana waduhedi walihasi ma 'itauya.”

#### *MeYudiya nuwanuwadi ma Yesu silohe'amasi*

<sup>45</sup> Nage 'oina meYudiyaedi taudi Meli 'ana tohabo'enedi Yesu 'ina paihowa si'iteya ma 'oinega sihemisaeya. <sup>46</sup> Ma hesiyage tupwadi geya sihemisae, 'oinega Palisiyao 'oidiya silohihila sihepwaila to'aha gide 'idi 'ita Yesu 'ina paihowa weyahina. <sup>47</sup> Coinega Palisiyaowedi ma wete topwaoli 'idi 'inapwanao simiya 'auta, ma sihegwagwaeya sigwae, “To'aha loheyaina 'oina tapaihowa? Weyahina bewa tuwa ginaula waiwai 'ipaipaihowadi. <sup>48</sup> Ma 'eguma geya'abwa to'aha 'oina tapaipaihowa, nata tomota mabwaiyadi 'ilisidi, 'abwa hesi meLoma 'idi loina mwauna 'oida 'ilatu, ma 'ida Yehoba 'ina hada ma wete 'ida boda mabwaiyadi si'abi hegaladi.”

<sup>49</sup> Coidiyega loheya 'aigeda sanina Kaiyapa, tauna bolime nage 'oina topwaoli 'idi 'inapwana madouna. Ciyanaowedi 'ihewgaediya 'igwae, “Comi hede nuwa potapotaimi? <sup>50</sup> Ma hesi wa'ita! Ceguma loheya 'aigeda tuwa 'i'amasa mabwaiyada weyahida, beno bwebwe'ana. Ma hesi geya 'ana 'ita bwebwe'ana 'eguma meLoma sitauyama ma 'ida boda mabwaiyana Yudiya 'oina si'abi hegaladi.” <sup>51</sup> Kaiyapaina gwae bewa 'i'inaneya geya tauna 'ina nuwatuhewega, ma hesi bolimeina beno 'oina tauna topwaoliyedi mabwaiyadi 'idi 'inapwana madouna. Coinega tuta beno 'oina 'ipalopisai 'abehega tuta muliya 'oina, nata Yesu 'i'amasa meYudiya mabwaiyadi weyahidi. <sup>52</sup> Ma geya 'abehega meYudiya siboidimo weyahidi, ma hesi Yehoba 'ina tomotaiyao mabwaiyadi gogo gabulena 'oina

simiyamiya, 'ihemiya 'autedi boda 'aigeda tuwa 'oina. <sup>53</sup> Sauga nage 'oina toloinaedi 'idi loina silaguya ma 'abehega Yesu silohe'amasi.

<sup>54</sup> Nage 'oina Yesu meYudiyaedi geya matadiya 'ida ha'ata'atamana, 'oinega 'i'ebesinediya ma 'itauya 'asa 'aigeda madouna 'oina sanina Epileimi, yoho 'awawa deina, ma nobwa ma'ana tomuliyaedi 'oina simiyamiya.

<sup>55</sup> Sauga nage 'oina meYudiyaedi 'idi Hataona Guyaina 'ana sauga 'ilobeya, 'oinega tomota baibaiwadi 'idi 'asa 'oidiyega sihanema Yelusalema 'oina sabi 'abi'ehau hiladi 'abwa muliyetega 'idi Guyaiina sipaihowa. <sup>56</sup> Nage 'oina Yesu si'ebeseya, 'idi 'ebesaina 'oina Hada He'asisi deina sitotoholo ma sihehegwaegwae sigwae, "Togidega, loheyaina nata gesowana 'itauyama guyai bewa 'oina, 'awa?" <sup>57</sup> Tomota 'idi gwae bewa gide, weyahina 'idi babadao 'idi loina pa'alina silaguya, beno topwaoliyedi 'idi 'inapwanao ma wete Palisiyedi siloinaediya 'abehega 'eguma to tupwa 'oina Yesu siloba, mwayamwayau babadaowedi 'oidiya sihepwaila ma si'abiyahi.

## 12

### *Yesu 'ana heholowa weyahina*

<sup>1</sup> Sabwelo sikisi simiyamiya ma Hataona Guyaina sipaihowa, ma Yesu 'itauya Bedani, beno Lasalo 'ina 'asa 'oina. Lasalo tauna mwalona Yesu 'amasa 'oinega 'i'abi hetoholo hileya. <sup>2</sup> Yesu 'itauya 'asainaina 'oina ma nobwa 'ana sipaihowa. Malida tauna 'adi 'ipaipaihowa, ma Yesuina ma'ina bodao ma Lasalo si'ai'ai. <sup>3</sup> Muliyetega Meli holowa 'aigeda bwebwe'ana sanina nadi ma wete 'ana maisa madouna, 'i'eweyama Yesu 'ahena 'iheloiya ma wete Meliina debanega Yesuina 'ahena 'isaudiya. Holowainaina mahaina madou hedadana 'oinega mahainega hada 'alona mabwaiyana 'imiya hegagaleya. <sup>4</sup> Ta 'oinega Yudasa Isakaliyota, tauna tuwa Yesu 'ana tomuliya 'aigeda ma wete tauna tuwa loheyainaina 'abwa nata Yesu 'ihe'ebwayae, 'ilomugiya 'igwae, <sup>5</sup> "To'aha weyahina holowa nage geya 'ihegimwaneya ma 'ana maisa gide teli handeledi kina 'i'ewa ma wewelohe 'oidiya 'iheguyai?" <sup>6</sup> Yudasa 'ina gwae geya 'abehega moisa wewelohe weyahidi 'ihehegwaegwae, ma hesi tauna tuwa weyahina 'ihehegwaegwae. Tauna tuwa toyagaha 'aigeda ma Yesu 'ana tomuliyao 'idi mane 'ana to'ita yahina tauna. Coinega 'idi manaina 'i'ita'ita yahi ma maneinaina 'oinega 'iyagayagaha.

<sup>7</sup> Ma Yesu Yudasa 'ihewaeya, "Tuwa 'ulolagu, sahena wete to'aha 'oina 'ugwaegwaene. To'aha gide 'oiguwa 'ipaihoweya, beno tuwa 'agu hemiya taona weyahina. <sup>8</sup> Ta 'owa nige wewelohe weyahidi 'uhehegwaegwae, taudi tuta mabwaiyana 'oidiya mahetemiya wamiyamiya. Ma hesi taugu nata geya'abwa tuta saliyana 'oimiya yamiyamiya."

### *Lasalo wete 'abehega silohe'amasi*

<sup>9</sup> Ma meYudiya boda madouna Yesu wasana sihesagoheya 'abehega Bedani 'oina 'imiyamiya, 'oinega 'asainaina 'oina sitauya. Nuwanuwadi Yesu ma Lasalo si'itadi, Lasaloina tauna mwalona 'amasega Yesu 'i'abi hetoholo hileya. <sup>10</sup> Coinega topwaoliyao 'idi 'inapwanao Lasalo weyahina sihetala gwaeya ma 'abehega silohe'amasi. <sup>11</sup> Weyahina meYudiya baibaiwadi Lasalo si'iteya ma 'adi tohanugetaowedi 'oidiyega sihawahawasi ma Yesu simulimuliye.

### *Yesu 'ina luhu Yelusalema 'oina*

<sup>12</sup> Hali sabwelowa boda madouna taudi sitauyama Yelusalema Hataona Guyaina weyahina Yesu wasana sihesagoheya 'abehega 'abwa nata Yesu Yelusalema 'oina 'iluhuma. <sup>13</sup> Coinega tomotaedi sadasada lahwaina si'ewediya ma silatuwa 'edai Yesu sabi lobaina. Cedaina 'oina sitotoholo ma 'enadi madouna 'oidiyega sibwaubwau sigwae, "Yauwedo Cinapwana, Yehoba saninega 'utauyama, ma 'uhetoloina madouna 'ima 'asa Isileli 'oina." <sup>14</sup> Yesuina hebai 'aigeda sanina 'ase 'oina 'igeluwa ma 'iluhulu Yelusalema. Tuwa gide to'aha Buki He'asisi 'oina 'ihewaila, gide wete 'ilatu 'esa, tutaina 'igwae,

<sup>15</sup> “MeSaiyoni, sahena wamatamatauta, bewa tuwa 'imi kini 'oimiya 'iluhuluwuwa. Tauna 'ase hauhauna 'oina 'igeluwa.”

<sup>16</sup> Sauga nage 'oina tomuliyaeadi gwaewewa bewa sihesagoheya ma hesi geya 'oidiya 'imaedana. Yesu 'ina 'amasa 'oina ma 'ina toholo hila 'oina 'abwa hesi Yehobaina 'ina gwaewewa Buki He'asisi 'oina sinuwatuhu yahiya ma sisanapuya to'aha gide tomota 'idi paihowa Yesu 'oina, gwaewewa 'ana moisa 'ilatuwa.

<sup>17</sup> Ma bodaedi taudi matadiya Yesu Lasalo galihega 'ibwauweya ma 'amasega 'i'abi hetoholo hileya, taudi sitauya 'iyadiyao 'oidiya ma Lasalo 'ina toholo hila wasana sihepwaila dadaneya. <sup>18</sup> Nage 'oina meYudiya baibaiwadi Yesu 'ina paihowa waiwaina wasana sihesagoheya, 'oina sitauya Yesu 'ina tauyama 'ana sauga 'oina ma 'abehega 'ina luhu Yelusalema 'oina sihelatu. <sup>19</sup> Beno 'oina Palisiyao siboidimo 'oidiya sigwae, “Moisa tuwa, 'ida waiwai 'igumwala. Weyahina tomota mabwaiyadi Yesu 'ina boda 'oina sitautauya.”

*MeGilisi tupwadi nuwanuwadi ma Yesu si'ita*

<sup>20</sup> Tuta nage 'oina meGilisi tupwadi bodaedi soladiya simiyamiya. Taudi tuwa totapwalolo 'idi 'asega siliya hanema Yelusalema 'oina sabi tapwalolo, Hataona Guyaina 'ana tuta 'oina. <sup>21</sup> MeGilisiyedi sitauyama Pilipi 'oina, ma sihesilala, sigwae, “Cinapwana, nuwanuwama Yesu 'a'ita.” Pilipiina tauna Bedeseida loheyaina, beno Galili 'ina tupwa 'oina. <sup>22</sup> Coinega Pilipi 'itoholowa ma 'itauya Andulu 'ihewegwae, ma siteluwaedi sitauya Yesu 'oina, ma meGilisiyedi 'idi nuwatuhuina sihepwaila 'oina. <sup>23</sup> Coinega meGilisiyedi 'enadi Yesu 'ihemaiseya, 'igwae, “Bewa tuwa tuta 'ilatu pwaima ma tauyu Loheyaiguina 'agu hepwatu yaloba. <sup>24</sup> Coinega bewa tuwa yahegwae bwaibwainigomi, 'eguma hewana bale'u 'oina wadauni, 'italasawala ma solanega nata 'isiwa 'e'enina madouna ma bwebwe'ana taloba. Weyahina hewana 'eguma geya'abwa bale'u 'oina tadaudauni, ma 'italasawala, nata geya'abwa wete 'e'enina bwebwe'ana talobaloba. <sup>25</sup> Coinega 'eda 'aigedanaina wete gide, 'eguma taiya bale'u 'oina yawasina 'ihelauwe bale'u 'ana miya weyahina, nata yawasina bwebwe'ana geya'abwa 'ilobaloba. Ma hesi taiya 'eguma bale'u 'oina yawasina 'itagwale, nata tauna moisa tuta 'inaonaoma 'oidiya yawasi hataya 'iloba. <sup>26</sup> Coinega taiyawedi 'omi 'eguma nuwanuwami ma 'oiguwa wahetopaihowa, 'omi wamuliyegau. Ma to 'asa 'oina yamiyamiya, 'omi wete 'asainaina 'oina wamiyamiya. Ma taiya 'eguma wete weyahigu wahetopaihowa, nata 'omi Tamagu 'i'ahwa bwebwe'anegomi.”

*Yesu 'ina 'amasa weyahina 'ihewegwae*

<sup>27</sup> Yesu wete 'igwae, “Tuta nage 'oina nuwagu 'igala hedadeya 'oina togidega nata Tamagu 'oina ya'ahwanoi 'esa? Nuwana bewa gidemusa 'oina ya'ahwanoi 'esa ma 'abehega mwau bewa 'oina 'ilemegau. Ma geya'abwa bewa gide ya'ahwa'ahwanoi 'esa. Weyahina mwau bewa tauna weyahina yatauyama. <sup>28</sup> Ma hesiyage bewa gidemusa ya'ahwanoi 'esa, yagwae, ‘Tamagu, saniu 'u'abi hanehe.’” Nage 'oina 'enana 'aigeda galewega 'igwae, “Sanigu ya'abi hanehe pwaiya, ma 'abwa nata wete ya'abi hanehe hila.”

<sup>29</sup> Tuta nage 'oina bodaedi sitotoholowa 'enana nage sihesagoheya, 'oina siboidimo 'oidiya sigwae, “Tutu 'itutututu.” Ma hesi tupwadi sigwae, “Geya, Yehoba 'ina anelose 'aigeda 'ihewegwae.”

<sup>30</sup> Ma Yesu bodaedi 'ihewegwae 'igwae, “Cenanaina nige wahesagoheya geya tauyu weyahigu, ma hesi 'omi weyahimi. <sup>31</sup> Eeta tuta 'ilatu pwaima ma Yehoba gogo gabulena 'ana tomiyao 'iloinaedi, ma wete togala 'adi toloina gogo gabulena bewa 'oina 'ipa'i. <sup>32</sup> Ma hesi tauyu 'eguma bale'uwegu si'abi hanehegau 'aiwe 'oina, nata tomota mabwaiyadi yalisidima ma sinaoma 'oiguwa.” <sup>33</sup> Yesu 'ina 'amasa weyahina bewa gidemusa 'ihe'ita 'esediya.

<sup>34</sup> Bodaedi Yesu 'ina gwaewewa sihesagoheya 'igumwala ma 'enana sihemaiseya sigwae, “Cima Buki He'asisi 'oina 'ihewaila 'abehega To'abihetena miyamiya hatayana. Ma hesi 'owa 'ugwae 'abehega Loheyainaina si'abi hanehe. Taiya tauna Loheyainaina?” <sup>35</sup> Cidi



gwaaina Yesu 'ihemaiseya 'igwae, “Sauga 'i'iuna 'oina maedana 'oimiya 'imiyamiya, 'oinega bewa tuwa maedanaina 'oina watauya. Weyahina guguyou 'eguma 'ilatuma, nata geya sawasawahimi ma 'eda wa'ita. Weyahina taiya 'eguma guguyou 'oina 'itauya, geya sawasawahina ma 'isanapu to'eha 'itautauya.<sup>36</sup> Coinega tuta bewa 'oina watoho ma maedanaina 'ina miyana 'oimiya wahemisa ma 'oinega 'omi maedanaina natunao ma maemaedanimi.”

*MeYudiya 'abwa geya sihemisa*

Yesu 'ina gwa bewa 'oidiya 'igumwala, ma 'itauya, eeta 'oidiyega 'i'waiha.<sup>37</sup> Yesu 'ila'ilala moisa baibaiwadi 'ihe'itediya, ma hesiyage geya sihemisa toho.<sup>38</sup> Coinega to'aha gidemusa mwalona palopita Aiseya 'ina hepzilla Buki He'asisi 'oina, 'abwa hesi 'ana moisa 'ilatu bwaibwainama 'igwae, “Cinapwana, wasaedi 'ahepwailediya, taiya hede 'ihemisaediya? Ma wete Cinapwanaina 'ina waiwai taiyawedi 'oidiya 'ihe'itaediya?”

<sup>39</sup> MeYudiyaedi geya sihemisa, weyahina Aiseyaina Buki He'asisi 'oina wete 'ihepzilla, 'igwaeya,

<sup>40</sup> “Yehoba matadi 'i'abi heguguyou pwaiya, ma wete 'idi nuwatuhi 'i'ausiya. Coinega geya sawasawahidi ma matadi 'oidiyega si'ebubuna ma wete geya sawasawahidi ma 'idi nuwatuhi 'i'asilala. Coinega geya sawasawahidi ma sitauyama 'oiguwa ma ya'abi hebwebwe'anidi.”

<sup>41</sup> Aiseya gwa bewa 'i'inaneya weyahina Yesu 'ina hewaiwai 'isanapu nugeteya 'oinega weyahina 'ihepzilla nugeta.

<sup>42</sup> Nage 'oina meYudiyaedi 'idi tohanugetao tupwana baibaiwadi Yesu sihemisaeya, ma hesiyage geya sihepzilla hapwesa. Weyahina Palisiyao simatautediya, nata gide hada tapwalolo 'oinega silohesohesoyedi.<sup>43</sup> Ma wete tomotaedi taudi nuwanuwadi ma 'adi 'ahwa bwebwe'ana tomota 'oidiyega siloba, ma hesi geya nuwadi ma Yehoba 'oinega 'adi 'ahwa bwebwe'ana siloba.

*Yesu 'ina gwa hesihesinuwa weyahina*

<sup>44</sup> Eeta Yesu 'enana madouna 'oinega 'ihewgaediya 'igwae, “Taiyawedi 'omi 'eguma wahemisaegau, 'omi wete tauna 'ihesumanegauma wahemisaeya.<sup>45</sup> Ma wete taiyawedi 'omi 'eguma wa'itegauwa, 'omi wete 'agu tohesumanaina wa'ita pwaiya.<sup>46</sup> Taugu bewa maedanaina yatauyama bale'uwa ma 'oinega taiyawedi 'omi 'eguma wahemisaegau, nata geya'abwa guguyou 'oina watautauya.<sup>47</sup> Ma wete taiyawedi 'omi 'eguma 'enagu wah-esagohedi, ma geya wapaihowadi, nata geya'abwa 'imi pui weyahidi yaloiloinaegomi. Weyahina taugu yatauyama geya 'abehega tomota 'idi pui sabi heyatalaina, ma hesi yatauyama tomota 'idi pui 'oidiyega ya'abihetedi.<sup>48</sup> Weyahina taiyawedi 'omi 'eguma walogwahategau ma 'igu gwa wete walogwahatediya, nata tuta 'ana 'ebe losaloha 'oina lona waloba. Loinaina beno 'igu gwaeyedi 'oidiyega nata waloba.<sup>49</sup> Weyahina gwaeyedi taugu geya 'igu nuwatuhi 'oidiyega, ma hesi to'aha gide tauna 'ihesumanegauma 'ina nuwatuhi 'oidiyega 'ilohatotogauwa, wete gide 'oimiya yahehepwailediwa.<sup>50</sup> Cina lohatotowedi mabwaiyadi yasanapudiya yawasi miyamiya hatayana 'oidiya simiyamiya. Coinega to'aha gidemusa Tamagu 'ina lohatoto 'oiguwa, wete gide bewa 'oimiya yahehepwailediwa.”

13

*Yesu 'ana tomuliyao 'ahedi 'ibuyodiya*

<sup>1</sup> Hataona guyaina 'ana sauga 'i'e'ehoho, ma Yesu 'isanapuya 'abehega 'ina sauga 'iloba pwaiya ma bale'u bewa 'i'ebesine ma 'ilohihila Tamana 'oina. Yesu 'ina bodaowedi 'ihelauwediya madouna, 'ina tuta 'ebe hegaina hauhau 'oinega ma 'ana 'ebe losaloha 'oina 'ihelauwediya.

<sup>2</sup> Sauga nage 'oina Yesu ma 'ana tomuliyao nima bwaubwau ma 'eluwa mahetenao si'ai'ai. Ma Yudasa Isakaliyota, tauna Saimoni natuna, Seitani 'oina 'iluhu pwaiya

'ihenuwa laguweya ma 'abehega Yesu 'itebae. <sup>3</sup> Ma hesi Yesu 'isanapu pwaiya 'abehega ginaula mabwaiyana Tamana 'i'ebwaya pwaiya ma 'iboimo 'iloina. Ma wete Yesu 'isanapuya 'abehega Yehoba 'oinega 'itauyama ma 'isanapuya 'abehega Yehoba 'oina nata wete 'ilohihila. <sup>4</sup> Eeta 'idi 'ebe 'aiina 'oinega Yesu 'itoholowa, 'ana 'ale'o 'i'ewa yahuleya, ma tawelo 'i'oteya. <sup>5</sup> Muliyetega gaeba 'oina we'aha 'isiweya, ma 'ana tomuliyaedi 'ahedi 'ibuyodiya, 'abwa muliyetega taweloina 'oinega 'ahediyedi 'isaudiya.

<sup>6</sup> Coinega Yesu Saimoni Pita 'oina 'ilatuwa ma Saimoniina Yesu 'ihewgaeya 'igwae, "Cinapwana, sahena 'aheguvedi 'ubuyobuyodi." <sup>7</sup> Ma Yesu Saimoni 'enana 'ihelihleya 'igwae, "Geya 'usanapu to'aha bewa tuwa 'oiuwa yapaipaihowa, ma hesi tuta muliya 'oina 'abwa hesi 'usanapu." <sup>8</sup> Coinega Saimoni Pita 'ihewgae hiley a 'igwae, "Sahena 'eta wete tuta 'oina 'ahegu 'ubuyobuyodi." Coinega Yesu wete 'igwae, "Ceguma geya 'abwa 'ahewgabuyobuyodi, 'owa geya 'iyagu."

<sup>9</sup> Saimoni Pita Yesu 'oina 'itagwala 'igwae, "Cinapwana, bwebwe'ana. Ta geya 'abehega 'ahegumo, ma hesi nuwanuwagu nimagu wete debagu mabwaiyana 'ubuyodi." <sup>10</sup> Coinega Yesu 'ihewgaeya 'igwae, "Taiyawedi 'omi 'eguma wahatui pwaiya, 'ilobwainegomiya ma 'ahemimo yabuyodi ma 'oinega wahimi mabwaiyadi si'e'hau. Yasanapugomiya 'omi bwebwe'ami, ma hesi geya mabwaiyami bwebwe'ami." <sup>11</sup> Yesu gwae bewa 'i'inaneya weyahina 'isanapu nugeteya taiya nata 'oidiyega Yesu 'itebae, tutaina 'igwae, "Geya mabwaiyami bwebwe'ami."

<sup>12</sup> Cahediyedi 'ibuyodiya 'igumwala ma 'ana 'ale'oina 'isipwa hiley a ma 'imiya toiya. Cabwa hesi 'ihewgaediya 'igwae, "Nuwamiya 'imaedana to'aha yapaihoweya 'oimiya, bo geya? <sup>13</sup> Comi wabwauwegauwa 'abehega taugu Tohe'ita ma wete 'imi Cinapwana. Ta beno moisa, geya wa'abo. <sup>14</sup> Taugu moisa 'imi Tohe'ita ma wete 'imi Cinapwana ma 'ahemi yabuyodiya. Coinega 'omi wete 'ilobwainegomiya ma 'iyamiyao 'ahedi wabuyodi. <sup>15</sup> Wahetotowanegau ma to'aha gide 'oimiya yapaihoweya, 'omi wete gidemusa 'iyamiyao 'oidiya wapaihowa 'esedi. <sup>16</sup> Bewa yahegwae bwaibwainigomi 'abehega geya 'eta taiya topaihowa 'ina 'inapwana 'ida hanesineya. Tohewasa wete gidemusa, geya sowa-sawahina ma 'ana tohesumaneina 'ihanesine. <sup>17</sup> He'itaedi mabwaiyadi wasanapudiya, ma 'eguma wapaihowadi, nata 'omi 'ebe yaliyaya bwebwe'ana waloba.

<sup>18</sup> "Cigu gwae bewa geya 'abehega mabwaiyami weyahimi, ma hesiyage taiyawedi taudi yahesinuwana pwaiya weyahidi yahehewgaegwae. Ma hesi Buki He'asisi 'oina hali loheya weyahina 'ihewpaila, 'ana moisa 'ilatu bwaibwaina tutaina 'igwae, 'Loheyainaina tauna 'ana ya'ebwa'ebwaeya, tauna tuwa loheyainaina nata 'imiya lohihila ma 'ilo'alehewgae."

<sup>19</sup> "Ginauledi bewa yahepwaila pwaidiwa 'oimiya, ma 'oinega 'abwa tuta muliya 'oina silatuma, 'abwa wa'itadi ma wahemisaegau 'abehega taugu tuwa Loheyaiquina bewa yahehewgaegwae. <sup>20</sup> Moisa tuwa, 'abwa yahewasaegomi tomota 'oidiya, ma 'eguma taiya 'itagwala 'oimiya, beno tauna 'itagwala pwaiya 'oiguwa, ma wete 'itagwala 'agu tohewasaina 'oina."

#### *Yesu 'ana he'ebwaya weyahina*

<sup>21</sup> Gwae bewa 'igwaenediya 'igumwala, ma nuwana 'igala madouna, 'oinega 'ana tomuliyaedi 'oidiya 'ihewpaila latuwa 'igwae, "Yagwae moisa 'oimiya, nata 'oimiyega loheya 'aigeda 'itebaegau." <sup>22</sup> Nage 'oina tomuliyaedi mabwaiyadi nuwadi 'ihenainaida 'oinega mabwaiyadi sihe'ebu'ebubuna hilediya, weyahina geya sisanapu taiya weyahina 'idi Cinapwanaina 'oidiya 'ihewgaegwae.

<sup>23</sup> Tuwa 'ana tomuliyaina 'aigeda, tauna moisa 'iyana, Yesuina deina 'imiyana. <sup>24</sup> Eeta Saimoni Pita nimanega tomuliyainaina 'ihewgaeya 'igwae, "Cuhesilala taiya weyahina 'ihewgaegwae?"

<sup>25</sup> Ma tomuliyaina tauna Yesu deina 'i'eno hilahila, Yesu 'ihewgaeya 'igwae, "Cinapwana, taiya weyahina 'uhehewgaegwae?" <sup>26</sup> Coinega loheyaina 'enana Yesu 'ihemaiseya 'igwae, "Cu'ita'ita nata 'eguma beledi yahisi ma 'wayahi 'oina yahepwasa ma ya'ebwae,

tauna beno loheyainaina.” Coinega Yesu beledi 'i'iuna 'i'eweya 'wayahi 'oina 'ihewaseya ma Yudasana 'i'ebwaeya, tauna tuwa Saimoni Isakaliyota natuna.

<sup>27</sup> Sauga nage 'oina Yudasana beledi 'i'eweya ma Seitani 'oina 'iluhuwa. Coinega Yesu Yudasana 'ihewaseya 'igwae, “Culomwayamwayau ma 'ino paihowaina 'upaihowa.”

<sup>28</sup> Ma 'iyamo bodaedi, taudi mahetediyao simiyamiya, Yesuina 'ina gwaaina Yudasana 'oina geya sisanapu to'aha weyahina 'ihehewaseya. <sup>29</sup> Yudasana tauna 'idi mane 'ana to'itayahina, 'oinega 'idi nuwatuhu 'abehega Yesu Yudasana 'ihewaseya ma 'itauya geyaina weyahina ginaula 'igimwane, bo nuwana 'itautauya wewelohe 'oidiya ma 'idi mane 'i'ebwaedi. <sup>30</sup> Eeta Yudasana belediina 'i'aiya, ma 'ilomwayamwayauwa 'ilatuwa 'atamana. Beno nihuwana.

#### *Yesu 'ina loinao hauhaudi*

<sup>31</sup> Yudasana 'i'ebesinediya, ma Yesu 'ana tomuliyae 'ihewaseya 'igwae, “Taugu Loheyaiguina 'igu sauga 'ilatu pwaima, ma 'igu wasawasa 'ilatu, ma wete taugu Yehoba 'ina wasawasa ya'abilatuhe. <sup>32</sup> Cabwa nata 'oiguwega Yehoba sanina 'i'abi hanehe, ma wete Yehoba 'iboi 'oinega taugu sanigu 'i'abi hanehe mwayamwayauwe. <sup>33</sup> Natugwao, tuta 'i'iunamo taugu mahetemiya tamiyamiya. Ma 'abwa nata ya'ebesinegomi ma wabesegau. Ma hesi bewa tuwa yahegwaegomi gide mwalona meYudiya yahegwa 'esediya yagwae, 'Casainaina 'oina yatautauya, 'omi geya sowasowahimi ma 'oina watauyawa.”

<sup>34</sup> “Coinega wete 'omi loina hauhauna bewa ya'ebwaegomi ma 'aigeda 'aigeda 'atemiyega wahelau hilegami. Ma wahelau hilegami gidemusa taugu yahehelauwegomi. <sup>35</sup> Ma 'oinega 'imi helauina tomota baibaiwadi si'ita, ma sisanapugomi 'abehega 'omi moisa 'agu tomuliyao.”

#### *Pita 'ina mwehihi Yesu 'ilagu latuheya*

<sup>36</sup> Ma Saimoni Pita Yesu 'ihesilaleya 'igwae, “Cinapwana, ta'eha 'uhaha'esa?” Coinega Yesu Saimoni 'enana 'ihemaiseya 'igwae, “Sauga bewa 'oina geya sowasowahiu ma 'umuliyegau, ma hesi sauga 'inaonaoma 'oina 'abwa hesi 'umuliyegau 'asainaina 'oina yatautauya.”

<sup>37</sup> Ma Pita Yesu wete 'enana 'ihemaiseya, 'igwae, “Cinapwana, to'aha weyahina sauga bewa 'oina geya'abwa yamulimuliyego? Hesi 'uda sanapu yatagwalegauwa ma weyahiu ya'amasa.”

<sup>38</sup> Coinega Yesu 'igwae, “Cino gwaeyedi geya yahemisaedi, ma hesi 'oiuwa yahepwaila dumwalu nata nihuwanega 'umwehihiyegau matoi, 'abwa muliyetega 'am'am'idou.”

## 14

#### *Yesu tauna 'eda Tamadai 'oina*

<sup>1</sup> Yesu wete 'ihewaseya, 'igwae, “Sahena nuwami sihehelahalaha, ma hesi Yehoba wahemisa ma wete taugu wahemisaegau. <sup>2</sup> Casainaina Tamagu 'oina 'imiyamiya hada baibaiwadi sitotoholo, 'oinega 'asainaina 'oina yatautauya ma 'imi 'ebemiya ya'atububudi. Gwae bewa 'eguma geya moisa, geya'abwa wete 'oimiya yahehpwaille. <sup>3</sup> Ma 'eguma yatautauya ma 'imi 'ebe miya ya'atububudi 'igumwala, nata yahilama yatoegomi ma tatauya gogoinaina 'oina yamiyamiya, ma 'omi wete 'oina wamiyamiya. <sup>4</sup> Cedainaina 'oinega yatautauya 'omi wasanapu pwaiya.”

<sup>5</sup> Ma Tomasi Yesu 'ihesilaleya 'igwae, “Cinapwana, to 'eda 'oinega 'utautauya? Togidega ma 'edainaina 'ada sanapu?” <sup>6</sup> Coinega Yesu Tomasi 'ihewaseya 'igwae, “Taugu 'eda, ma gwae moisa, ma wete yawasimi huhudi. Weyahina geya 'eta taiya sowasowahina ma Tamagu 'oina 'itauya 'eguma loheyainaina geya 'oiguwega 'itauya. <sup>7</sup> Taugu moisa wasanapu pwaigauwa ma Tamagu wete wasanapuya, 'oinega bewa tuwa Tamagu wasanasanapu ma wete 'ana 'ita wa'ita'ita.”

<sup>8</sup> Nage 'oina Pilipi Yesu 'ihesilaleya 'igwae, “Cinapwana, Tamauina hede 'uhe'itemai.” <sup>9</sup> Ma Yesu 'enana 'ihemaiseya 'igwae, “Pilipi, sauga saliya hedadena 'oimiya yamiyamiya ma hesi geya 'usanapu tohogau. Taiyawedi 'omi wa'ita pwaigauwa, 'omi Tamagu wete

wa'ita pwaiya. Coinega to'aha weyahina 'ugwaeya, 'Tamauna hede 'uhe'itemai?' <sup>10</sup> Bo nuwana geya wahemisaegau 'abehega taugu Tamagu 'oiguwa 'imiyamiya, ma taugu wete 'oina yamiyamiya."

Coinega wete 'ihewgaediya 'igwae, "Gwaeyedi yagwaenediya 'oimiya, taugu geya 'e-nagu. Ma hesi Tamagu tauna 'enana yagwaenediwa, weyahina tauna 'oiguwa 'imiyamiya ma 'oiguwega 'ipaipaihowa. <sup>11</sup> Coinega bewa tuwa wahemisaegau 'abehega taugu Tamagu 'oina yamiyamiya ma wete Tamagu tauna 'oiguwa 'imiyamiya. Ma 'eguma 'igu gwaeyedi geya wahemisaedi, hede 'igu paihowaedi waiwai waiwai wanuwatuhudi ma 'oidiyega wahemisaegau. <sup>12</sup> Bewa tuwa 'oimiya yahepwaila dumwalu, 'eguma taiyawedi 'omi wahemisaegau nata paihowaedi waiwai yapaihowediya, 'omi wete gidemusa wapaihowa 'esedi. Ma wete tuta muliya 'oina 'imi paihowa waiwai hedadena wa'abi latuhedi, weyahina taugu yatautauya Tamagu 'oina. <sup>13</sup> Ma 'eguma to'aha nuwanuwami ma saniguwega wa'ahwanoi, nata ya'ebwaegomi, ma 'oinega Tamagu 'ana hep watu 'iloba 'igu paihowega. <sup>14</sup> Ceguma to'aha nuwanuwami ma saniguwega wa'ahwanoi, nata taugu yapaihowa."

#### *Yesu 'ina gwae hemisa Yaluyaluwa Tabuna weyahina*

<sup>15</sup> Coinega Yesu 'ana tomuliyae wete 'ihewgaediya 'igwae, "Ceguma moisa wahelauwegauwa, 'igu loinao mabwaiyadi wahematamatedi. <sup>16</sup> Ma wete Tamagu 'oina ya'ahwanoi ma 'ami tolema 'aigeda 'ihesumaneyama, <sup>17</sup> tauna tuwa Yaluyaluwa moisa ma dumwadumwaluna. Ma 'oinega tauna 'oimiya 'imiya hataya. Mebale'u geya sowasowahidi ma Yaluyaluwanaina 'oina sitagwaledi, weyahina 'ana 'ita geya si'ita ma geya wete sisanapu. Ma hesiyage 'omi Tolemainaina wasanasanapu, weyahina sauga 'aigeda 'aigeda 'oidiya 'atemiya 'imiyamiya. <sup>18</sup> Ma hesiyage 'eguma ya'ebesinegomi, sahena 'imi nuwatuhu 'abehega wahesina sinageheya, weyahina nata yatauya 'abwa wete yalohihilama 'oimiya.

<sup>19</sup> "Ci'iunamo ma ya'ebesinegomi. Ma hesi mebale'u taudi geya sihemisaegau nata geya'abwa si'ita'ita hilegau. Ma hesiyage 'omi nata moisa wa'ita hilegau mayawasigu yamiyamiya. Beno 'oinega 'omi nata wete yawasi miyamiya hatayana 'oiguwega waloba.

<sup>20</sup> "Sabwelo nage nata 'oina 'abwa hesi wasanapugau 'abehega taugu Tamagu 'oina yamiyamiya, ma 'omi wete 'oiguwa wamiyamiya, ma taugu wete 'oimiya yamiyamiya. <sup>21</sup> Ma taiyawedi 'omi 'eguma 'igu loina wasanapudiya ma wahematamatedi, 'omi moisa wahelauwegauwa. Coinega Tamagu 'omi nata wete 'ihelauwegomi, ma wete taugu nata yahelauwegomi, ma yaboi yahe'itaegau 'oimiya."

<sup>22</sup> Sauga beno 'oina hali Yudasa, geya Isakaliyota natuna, Yesu 'ihewgaeya 'igwae, "Cinapwana, to'aha weyahina 'abehega tauma 'oima 'uhe'itaego ma 'abehega mebale'u 'oidiya geya'abwa?"

<sup>23</sup> Coinega Yesu loheyaina 'enana 'ihemaiseya 'igwae, "Taiyawedi 'omi 'eguma wahelauwegau ma 'igu gwae wamuliyedi, nata Tamagu wete 'ihelauwegomi. Ma 'oinega tauna ba'idagu 'atauyawa 'oimiya ma 'omi ma tauma tamiya hegogona. <sup>24</sup> Ma taiyawedi 'omi 'eguma geya wahelauwegau 'omi geya 'igu gwae 'ana topaihowao. Ma hesi gwaeyedi wahesagohediya, taugu geya 'oiguwega, ma hesi Tamagu 'oinega, tauna 'ihesumanegauma. <sup>25</sup> Sauga bewa 'oina taugu ba'idamiu tamiyamiya 'oinega 'igu gwae bewa ya'ebwa'ebwaegomi. <sup>26</sup> Ma hesi sauga muliya 'oina 'abwa hesi tolemaina saniguwega Yehoba 'ihesumaneyama 'oimiya, tauna tuwa Yaluyaluwa Tabuna, nuwatuhu mabwaiyana 'ihe'itegomi ma wete 'igu gwaeyedi mabwaiyadi 'oimiya 'i'abi henuwatuhu yahigomi.

<sup>27</sup> "Ma hesi taugu sauga 'i'iunamo ma ya'ebesinegomi, 'oinega taugu tuwa 'igu nuwadaumwala 'oinega nuwadaumwala ya'ebwaegomi. Nuwadaumwala bewa geya gidemusa mebale'u 'oidiyega, 'oinega sahena nuwami sihehelalalaha bo 'atemi siyohoyoho.

<sup>28</sup> “Cigu gwaē bewa wahesagoha pwaidiya, beno ‘Nata yatauya, ‘abwa wete yahilama ‘oimiya.’ Ma hesi ‘omi ‘eguma wahelauwegau, ‘igu tauyaina Tamadaina ‘oina weyahina wayaliyaya. Weyahina Tamadainaina tauna ‘ihane sinegauwa.

<sup>29</sup> “Sauga bewa ‘oidiya ginaulaedi yahepwaila pwaidiya ‘oimiya, ma ‘eguma sauga sinaonaoma ‘oidiya ginaulaedi silatu, nata wa‘ahwa moisaegau. <sup>30</sup> Nata geya‘abwa wete sauga saliyana ‘oimiya yahehegwaegwae, weyahina bewa tuwa mebale‘u ‘idi toloina galana ‘itautauyama. Tauna geya sawasawahina ma ‘ihewaiwai sinegau. <sup>31</sup> Ma hesi ‘agu lohatoto Tamagu ‘oinega sauga baibaiwana yapaipaihowadi, bewa ‘oinega ma mebale‘u sisanapugau ‘abehega Tamagu yahelauweya. Tuwa tauna beno. Watoholo ma tatauya.”

## 15

### *Yesu tauna ‘aiwe huwahuwa moisa*

<sup>1</sup> Coinega Yesu wete ‘ihewaediya ‘igwae, “Taugu ‘aiwe huwahuwa moisa waini weyahina, ma Tamagu tauna topaihowa. <sup>2</sup> Lahagwao ‘eguma geya sida huwa bwaibwaina nata tauna lahagwaowedi ‘i‘upwa yahuledi. Ma hesi lahagwaowedi ‘eguma huwaidi bwebwe‘adi nata moisa ‘i‘abi bwaibwainidi ma sihuwa bwaibwaina. <sup>3</sup> Comi wete gidemusa ‘igu gwaē ‘oidiyega ya‘abihe bwebwe‘anegomiya. <sup>4</sup> Comi ‘oiguwa wamiyamiya ma taugu wete ‘oimiya yamiyamiya. Comi ‘eguma geya‘abwa ‘oiguwa wamiyamiya nata geya‘abwa huwaimi bwebwe‘adi silagulagu. Ceda ‘aigedanaina wete gide, ‘eguma ‘aiwe madouna laganao ‘oinega simiyawasi nata laganawedi geya huwaidi bwebwe‘adi silagulagu.

<sup>5</sup> “Taugu gide ‘aiwe ‘aigeda madouna ma ‘omi gide lahagwao. Coinega taiyawedi ‘omi ‘eguma ‘oiguwa wamiyamiya nata huwaimi bwebwe‘adi silagulagu. Weyahina taugu ‘eguma geya, nata geya sowasowahimi ma paihowa bwebwe‘adi wapaihowadi. <sup>6</sup> Coinega taiyawedi ‘omi ‘eguma geya‘abwa ‘oiguwa wamiyamiya, nata Tamagu ‘oiguwega ‘i‘ewa yahulegomi ma wawelai. Gidemusa ‘aiwe lagalaganao siwelawelai ma ‘aiwe ‘ala‘alasi ‘oidiya sigabugabudi. <sup>7</sup> Ma hesi ‘oiguwa ‘eguma wamiyamiya, ma wete ‘igu gwaē ‘oimiya simiyamiya, ma to‘aha ‘eguma nuwanuwami ma saniguwega wa‘ahwanoi, nata tuwa wete walobadi. <sup>8</sup> Ma ‘eguma moisa wamuliya bwaibwainigau, nata huwaimi bwebwe‘adi silatu ma ‘oidiyega tomota si‘ita ma Yehoba sihepwatuwe. <sup>9</sup> Tamagu ‘ihelauwegauwa madouna, ‘oinega taugu wete yahelauwegomiya madouna, ma ‘oinega ‘igu helauina ‘oina wada miyamiya. <sup>10</sup> Ma ‘igu loinao ‘eguma wete wamuliya bwaibwainidi nata ‘omi wete ‘igu helau ‘oina wamiyamiya. Gide taugu Tamagu ‘ina loinao yamuliya bwaibwainidiya, ‘oinega ‘ina helau ‘oina yamiyamiya.

<sup>11</sup> “Beni tuwa tauna gidemusa yahegwaegomiya, ma ‘oinega ‘igu yaliyayega wayaliyaya ma nuwami mabwaiyana sibwebwe‘ana. <sup>12</sup> Ma bewa ‘igu loina ‘oimiya ma ‘aigeda ‘aigeda wahelau hilegomi gidemusa yahehelauwegomi. <sup>13</sup> Ma taiya ‘eguma ‘iyanao weyahidi ‘i‘amasa, beno moisa helau madou hedadena. <sup>14</sup> Comi ‘eguma ‘igu loinao wagwahu bigadi ‘omi moisa ‘iyagwao. <sup>15</sup> Sauga bewa ‘oinega ma ‘ilagalaga geya‘abwa wete ya‘ahwa‘ahwa topaihowaegomi. Weyahina topaihowa geya ‘ilobwainedi ma ‘idi ‘inapwanao ‘idi nuwatuhi sisanapudi. Ma hesi ‘ilobwainegomiya bewa tuwa ya‘ahwa ‘iyaguwegomi, Weyahina to‘aha gidemusa Tamagu ‘oinega yahesagohediya, bo‘iyage yahepwaila pwaidiwa ‘oimiya.

<sup>16</sup> “Comi geya wahesinuwegau ma ‘oimiya yahe‘inapwana. Taugu hesiyage yahesinuwanegomiya ma ‘abehega yahesumanegomi, wapaihowa, ma ‘imi paihowaedi ‘oidiyega huwaimi bwebwe‘adi silatu, ma wete ‘oimiya simiya hataya. Ma ‘oinega to‘aha nuwanuwami, ma saniguwega wa‘ahwanoi, nata wete Tamagu ‘i‘ebwaegomi. <sup>17</sup> Ma yalohatotogomi ‘abehega wahelau hilegomi.”

### *Yesu ‘ina bodao mebale‘u silogwahatediya*

<sup>18</sup> Coinega Yesu wete ‘ihewaediya ‘igwae, “Mebale‘u ‘eguma silogwahategomi, wanuwatuhuyahi ‘abehega taugu mwalona wete gide si‘esegauwa. <sup>19</sup> Ma ‘eguma



mumugami tomiya bale'u gidemusa tomiya bale'u sihelauwegomi, weyahina sisanapuya 'abehega 'omi 'iyadiyao. Ma 'iyamo sauga bewa 'oina, 'omi yahesinuwane pwaigomiya, 'oinega mebale'u 'oidiyega ya'ewa yahulegomiya. Eeta 'omi geya wete mebale'u 'idi boda 'oidiya wamiyamiya. Beno huhuna 'oinega mebale'u silogwahategomiya.

<sup>20</sup> “Gwaeyedi ya'ebwaegomiya wanuwatuhuyahi pa'alidi, tutaina yagwaeya 'abehega geya 'eta topaihowa sowasowahina ma 'ina 'inapwana 'ihanesine. Weyahina taugu mwalona gide silo'alehegauwa, 'oinega 'omi nata wete gide silo'alehegemi. Ma 'eguma mwalona 'igu gwae sida muliyaediya, 'omi wete gide 'imi gwae nata simuliya.

<sup>21</sup> Ginaulaedi galadi bewa nata 'oimiya sipaihowadi weyahina 'omi 'igu bodao, ma wete tauna 'ihesumanegauma geya sisanapu. <sup>22</sup> Ma 'eguma mwalona geya'abwa 'oidiya yatautauya ma 'oidiya yahehepwaila, geya'abwa wete 'idi pui 'oidiya sida miyamiya. Ma hesi yatauya pwaiya 'oidiya ta wete yagwae pwaiya 'oidiya. Coinega geya sowasowahidi ma 'idi puiyedi weyahidi sigwae hila. <sup>23</sup> Ma taiyawedi 'eguma silogwahategau, bodaedi beno taudi wete Tamagu silogwahateya.

<sup>24</sup> “Ma wete 'eguma mwalo geya'abwa 'igu paihowa waiwaidi matadiya yada paipaihowadi, beno geya 'idi puimo. Ma hesi paihowaedi yapaihowa pwaidiya 'oidiya, paihowaedi geya 'eta taiya gide 'ida paihowa 'esediya. Ma paihowaedi si'ita pwaidiya, ma hesi Tamagu ma taugu tuwa silogwahatemaiya. <sup>25</sup> Ma 'idi paihowa galadiyedi silatu bwaibwaina weyahina Buki He'asisi 'oina 'ihewpaila 'igwae, ‘Silogwahategauwa geya huhunamo.’

<sup>26</sup> “Comi nata 'ami tolema Tamagu 'oinega yahesumaneyama. Tauna Yaluyaluwaina, gwae moisa huhuna. Tauna nata 'ihetohepwaila weyahigu. <sup>27</sup> Ma wete 'omi weyahigu wahetohepwaila. Weyahina 'omi 'igu paihowa hauhau 'ebe hegaina eema 'ana siga bewa, 'omi mahetegwao.”

## 16

<sup>1</sup> Yesu 'ana tomuliyaedi wete 'ihewgwaediya 'igwae, “Ginaulaedi yagwaenediya 'oimiya ma 'oinega geya'abwa 'oiguwega wabe'ube'u. <sup>2</sup> Weyahina 'abwa nata hada tapwalolo 'oidiyega sipa'igomi, ma wete tuta sinaonaoma 'oidiya taiyawedi silohe'amasigomi nata taudi 'idi nuwatuhi 'abehega ginaula bwebwe'ana sipaipaihowa Yehoba 'ina 'ebe yaliyaya. <sup>3</sup> Cidi paihowaedi galadi nata 'oimiya sipaihowadi weyahina Tamagu ma taugu geya sisanapumai. <sup>4</sup> Ginaula bewa yahepwailediwa, ma 'eguma sauganaina silatu, nata wanuwatuhu hila 'abehega ginaulaedi 'oimiya hepwailediya.”

### *Yaluyaluwa Tabuna 'ina paihowa*

Coinega wete 'ihewgwaediya 'igwae, “Ginaulaedi bewa mwalona geya yahepwaila nugetedi 'oimiya, weyahina sauga baibaiwana 'oidiya taugu ba'idamui. <sup>5</sup> Ma hesi 'i'iu-namo ma ya'ebesinegomi ma yatauya tauna 'ihesumanegauma 'oina, 'oinega ginaulaedi yahehepwailedi 'oimiya. Bewa tuwa nata ya'ebesinegomi ma hesi geya 'eta taiya 'ida hesilalegau nuwana 'ida gwae, ‘Cinapwana, ta'eha 'utautauya?’

<sup>6</sup> “Ma ginaulaedi yagwaenediya 'oimiya weyahidi wanuwagala madouna. <sup>7</sup> Ma hesiyage bewa yagwae moisa 'oimiya 'abehega bwebwe'ana 'oimiya 'eguma ya'ebesinegomi. Weyahina 'eguma geya'abwa ya'ebe'ebe sinegomi, nata geya'abwa wete Tolemaina 'itautauyama 'oimiya. Ma hesi 'eguma ya'ebesinegomi ma yatauya, nata 'ami Tolemaina yahesumaneyama 'oimiya. <sup>8</sup> Ma tutaina 'eguma 'itauyama 'oimiya, nata ginaula 'etoi mebale'u 'ihe'itadi ma sisanapudi. Ginaulaedi beno taudi, paihowa galadi, ma paihowa bwebwe'adi, ma wete heyatala weyahidi.

<sup>9</sup> “Ma tutaina 'eguma 'ihe'itadi ma geya sihemisaegau, tomotaiyedi taudi ginaula galadi 'adi topaihowao moisa. <sup>10</sup> Ma wete tauna nata mumuga bwebwe'ana 'ihe'itegami, weyahina taugu yatautauya Tamagu 'oina ma geya'abwa wete wa'ita'ita hilegau. <sup>11</sup> Tolemaina tauna nata wete mebale'u bwa'omatana 'ihe'itadi ma 'oinega mebale'u sisanapu 'abehega bwa'omatana 'itauya pwaima bale'uwa. Weyahina bale'uina 'ana toloinaina 'ina paihowa galadi 'oidiyega 'ana heyatala 'iloba pwaiya.

<sup>12</sup> “He'ita baibaiwa hedadedi simiyamiya, ma hesi nata geya'abwa yahehepwalediwa sauga bewa 'oina, weyahina geya sowasawahimi ma wasanapudi. <sup>13</sup> Ma hesiyage 'abwa nata Yaluyaluwa Tabuna 'itauyama 'abwa hesi tauna 'ihanugetegomi ginaula mabwaiyana 'ausaladi 'oidiya. Tauna nata geya'abwa 'ina lolina 'oinega 'iloiloina, ma hesiyage to'aha gidemusa Tamagu 'oinega 'ihesagoheya nata 'oidiyega 'iloina. Ma wete nata 'ihewagewegomi to'aha 'abwa sauga sinaonaoma 'oidiya silatu. <sup>14</sup> Tauna nata wete 'igu sonogega 'ihe'itegomi ma 'oinega sanigu wa'abi hanehe. <sup>15</sup> Ma to'aha gidemusa Tamagu 'ina 'ebe lolinao, mabwaiyana taugu 'igu 'ebe lolinao. Beno 'oinega yagwaeya 'abehega 'igu sonogega 'ihe'itegomi.”

#### *Nuwagala 'ibui yaliyaya 'oina*

<sup>16</sup> Coinega Yesu wete 'ihewagewegomi 'igwae, “Sauga 'i'iunamo ma geya'abwa wa'ite'itegau. Ma sauga 'i'iunamo 'oina 'abwa wete wa'ita hilegau.”

<sup>17</sup> Coinega tomuliyaedi tupwadi sihegwae hilediya sigwae. “Togidega 'ina gwaeina 'ana sanapu, weyahina 'igwaeya 'abehega sauga 'i'iunamo 'oina ma 'i'ebe sinigita ma wete sauga 'i'iunamo 'oina 'abwa wete ta'ita hila? Ma wete 'igwaeya 'abehega 'itautauya Tamana 'oina. <sup>18</sup> Coinega to'aha sauga 'i'iuna 'ana sanapu?” Ma tomuliyaedi sigwae, “Cinamuge, geya tasanapu to'aha weyahina 'ihewagewegae.”

<sup>19</sup> Eeta Yesu 'ana tomuliyaedi 'idi nuwatuhu 'isanapuya, 'oinega 'ihewagewegomi 'igwae, “To'aha weyahina wahegwagewae? Bo nuwana yahegwagewegomi 'abehega sauga 'i'iunamo ma ya'ebesinegomi 'abwa wete sauga 'i'iunamo 'oina wa'ita hilegau weyahina wahegwagewae, 'awa? <sup>20</sup> Ma hesiyage bewa yahegwae bwaibwainigomi 'abehega 'abwa nata ma'imi nuwagala weyahigu wadou. Ma tomiya bale'u nata 'igu tauya weyahina siyaliyaya. Ma hesiyage 'imi nuwa galaedi nata sauga sinaonaoma 'oidiya 'i'abibui ma wayaliyaya. <sup>21</sup> Tuwa gide 'eguma wahine 'ina tuta henatuna 'oina, nata ma'ina nuwagala weyahina muya 'iloba. Ma tutaina 'eguma 'ihenatuna, muya mabwaiyana 'inuwenaide, ta 'iyaliyaya tuwa, weyahina gwama 'i'ahala pwaiya. <sup>22</sup> Coinega 'omi wete gide, sauga bewa 'oina ma'imi nuwagala. Ma tutaina 'eguma yahilama 'oimiya ma wa'itegau, nata weyahigu wayaliyaya madouna. Yaliyayaina nata geya'abwa 'eta taiya 'i'ewa'ewa yahuledi 'oimiyega. <sup>23</sup> Ma tuta nage 'oina geya'abwa 'eta to'aha weyahidi wahehesilalegau, ma moisa hesi saniguwega Tamagu 'oina ginaulinaina weyahina wa'ahwanoi, nata tuwa 'i'ebwaegomi. <sup>24</sup> Comi mwalo ta bewa 'oina saniguwega geya 'eta to'aha weyahina wada 'ahwanoiya. Coinega bewa tuwa 'eguma 'eta to'aha nuwanuwami, wa'ahwanoi ma 'i'ebwaegomi, ma 'oinega wayaliyaya moisa.”

#### *Yesu bale'u 'ana lolina 'ihewaiwai sineya*

<sup>25</sup> Coinega Yesu wete 'ihewagewegomi 'igwae, “Ginulaedi gwae hegehegedi 'oidiyega yahepwale pwaidiwa 'oimiya. Ma hesi sauga sinaonaoma 'oidiya nata geya'abwa wete gwae hegehegedi 'oidiyega yahegwagewegomi, ma hesiyage nata Tamagu weyahina 'abwa hesi yagwae hapwesa bwaibwaina 'oimiya. <sup>26</sup> Ma sauga nage 'oina nata 'omi saniguwega Tamagu 'oina wa'ahwanoi, taugu nata geya'abwa weyahimi ya'ahwa'ahwanoi, <sup>27</sup> weyahina Tamagu 'ihelauwe pwaigomiya. Cina helauina huhuna weyahina 'omi wahelauwegauwa, ma wete wahemisaegauwa 'abehega taugu Yehoba 'oinega yatauyama. <sup>28</sup> Ta moisa tuwa beno, taugu Tamagu 'oinega yatauyama ma bale'u bewa 'oina yamiyamiya. Coinega bewa tuwa bale'u ya'ebe'ebesine ma yalolohihila Tamagu 'oina.”

<sup>29</sup> Coinega 'ana tomuliyaedi sihegwagewegomi 'igwae, “Cinapwana, bewa tuwa 'oima 'ugwaelatu bwaibwaina, weyahina geya gwae hegehegedi 'oidiyega 'ugwae. <sup>30</sup> Coinega bewa tuwa 'asanapu bwaibwainigowa 'abehega 'owa moisa ginaula mabwaiyana 'usanapudiya. Coinega bewa tuwa geya'abwa wete 'ahehesilala hilago, weyahina 'ima nuwatuhu mabwaiyadi 'usanapu pwaidiya. Beno 'oinega 'ahemisaegowa 'abehega 'owa moisa Yehoba 'oinega 'utauyama.”

<sup>31</sup> Coinega Yesu wete 'ihegwae hilediya 'igwae, “Bewa tuwa 'abwa hesi wahemisae-gauwa, 'awa? <sup>32</sup> Ma hesiyage wada sanapu 'abehega tuta 'inaonaoma 'oina, bo nuwana tagwae tuta bewa 'ilatu pwaima, ma mabwaiyami waliya sawala 'imi 'asa 'oidiya ma yaboigumo 'ebwa yamiyamiya. Ta geya 'abehega moisa yaboigumo, weyahina Tamagu ba'idagu 'amiyamiya. <sup>33</sup> Gwae bewa ya'inatediwa 'oimiya ma 'oiguwega wanuwa daumwala. Ma hesiyage 'imi miya gogo gabulena 'oina nata 'igala. Ma hesiyage wa'atepatu, weyahina taugu gogo gabulena 'ana lolina mabwaiyana yahewaiwai sinediya.”

## 17

### *Yesu 'ana tomuliyao weyahidi 'i'ahwanoiya*

<sup>1</sup> Gwae bewa Yesu 'igwaenediya 'igumwala, ma 'i'ita haneya galewa ma 'i'ahwanoiya, 'igwae, “Tamagu, bewa tuwa 'igu tuta 'ilatu pwaima ma taugu tuwa natuina sanigu 'u'abi hanehe ma 'oinega taugu wete saniu ya'abi hanehe. <sup>2</sup> Weyahina lolina mabwaiyana tomota weyahidi 'u'ebwaya pwaigauwa ma taugu yawasidi miyamiya hatayana baibaiwadi ya'ebwaedi, tomotaedi 'u'ebwaegauwa 'oidiya. <sup>3</sup> Yawasiina miyamiya hatayana bewa gidemusa 'ina 'eda: Ceguma tomota sisanapugo 'abehega 'owa moisa Yehoba, ma wete 'eguma sisanapugau 'abehega taugu To'abiheteguina 'owa 'u'hesumanegauma. <sup>4</sup> Gogo gabulena bewa 'oina saniu ya'abi hanehe pwaiya, weyahina paihowaedi 'u'ebwaegauwa yapaihowa pwaidiya. <sup>5</sup> Coinega Tamagu, bewa tuwa matauwa sanigu 'u'abi hanehe, gidemusa mwalona tuwa 'owa ma taugu 'ida wasawasaina, muliyetega 'abwa gogo gabulena 'ilatuma.

<sup>6</sup> “Tamagu, mumugau mabwaiyana yahe'ita pwaidiya taudi tomotaedi gogo gabulena 'oina 'u'ebwaegauwa 'oidiya. Ma wete 'enau mabwaiyana si'obigaiya, weyahina tomotaedi 'owa 'u'ebwaegauwa. <sup>7</sup> Ginaulaedi mabwaiyadi 'u'ebwaegauwa sisanapu pwaidiya 'abehega mabwaiyadi 'owa 'oiuwega sitauyama. <sup>8</sup> Weyahina gwaeyedi 'u'ebwaegauwa yahe'ita pwaidiya ma wete sihemiseya. Coinega sisanapu bwaibwainigauwa 'abehega 'owa moisa 'oiuwega yatauyama ma wete sihemisaegauwa 'abehega 'owa 'u'hesumanegauma. <sup>9</sup> Coinega bewa tuwa weyahidi ya'ahwa 'ahwanoiwa 'oiuwa. Ta geya 'abehega me bale'u weyahidi, ma hesi tomotaedi taudi 'u'ebwaegauwa weyahidi, weyahina taudi 'ino tomotaiyao. <sup>10</sup> Weyahina to'aha gidemusa 'oiguwa simiyamiya, 'owa mabwaiyana 'ino 'ebeloinao. Ma wete 'owa to'aha gidemusa 'oiuwa simiyamiya, mabwaiyana taugu 'igu 'ebeloinao, ma 'oidiyega sanigu 'ihemadou pwaiya. <sup>11</sup> Sauga 'i'iunamo ma yalohihilawa 'oiuwa, nata geya 'abwa bale'u bewa wete 'oina yamiyamiya. Ma hesiyage tomotaedi taudi 'u'ebwaegauwa nata tuwa bale'u bewa 'oina simiyamiya. Tamagu, 'owa moisa saniu hehe'asisiyanaina, 'oinega bewa tuwa ya'ahwa'ahwanoi 'oiuwa ma tomotaedi 'owa 'ino waiwai 'oinega 'u'itayahidi ma 'oinega siheboda 'aigeda, tuwa gide 'owa ma taugu huhunida 'aigeda.

<sup>12</sup> “Weyahina tutaina taugu mahetediu, 'owa 'ino waiwai 'oinega ya'ita'ita yahidi. Waiwaiina 'owa 'u'ebwaegauwa 'oinega ya'ita'ita yahidi. Ma Tamagu, bo'iyage 'usanapu pwaiya beno tomotaedi 'u'ebwaegauwa, geya 'eta taiya 'oidiyega yahe'waihi. Beno tuwa loheyaina 'ino buki 'oina lele 'imiyamiya 'abehega tauna 'i'waiha, loheyainaina 'iboinamo 'ihesilae.

<sup>13</sup> “Ma hesiyage taugu 'i'iunamo ma yahilawa 'oiuwa, ma 'igu gwaeyedi yagwaenediya 'igu tomotaiyao gogo gabulena 'oidiya, ma 'oinega 'igu yaliyayega sida yaliyaya madouna. <sup>14</sup> Cino gwaeyedi ya'ebwaya pwaidiya, ma hesiyage me bale'u 'ino tomotaedi silogwahatediya. Weyahina taudi me bale'u 'idi boda geya 'oina simiyamiya. Taugu tuwa wete gidemusa me bale'u geya 'idi boda 'oina yamiyamiya. <sup>15</sup> Ma geya 'abehega ya'ahwa'ahwanoi ma bale'uwega 'u'ewa yahuledi, ma hesi nuwanuwagu ma 'abehega togalaina 'oinega 'u'ahu su'wasu'wanidi. <sup>16</sup> Taudi geya me bale'u 'idi boda 'oina simiyamiya, gide wete taugu. <sup>17</sup> Taudi weyahidi ya'ahwa'ahwanoi 'oiuwa ma 'ino gwae moisanega 'u'abihe bwebwe'anidi ma 'oinega 'ino bodao 'ehaudi taudi. <sup>18</sup> Tuwa gidemusa

'owa 'uhesumanegauma bale'u bewa 'oina 'oinega taugu wete gidemusa tomotaedi yahesumanedi tomiya bale'u 'oidiya. <sup>19</sup> Tomotaedi weyahidi yatagwalegauwa 'oiuwa ma 'oinega sauga 'inaonaoma 'oina taudi wete sitagwaledi moisa 'oiuwa.

<sup>20</sup> “Tamagu, geya 'abehega taudi siboi weyahidi ya'ahwa 'ahwanoiwa, ma hesiyage taudi 'abwa nata 'idi gwae 'oidiyega sihemisaegau, taudi wete weyahidi ya'ahwa 'ahwanoiwa. <sup>21</sup> Ya'ahwa'ahwanoi 'oiuwa ma 'abehega mabwaiyadi sida heboda 'aigeda 'oida, gide 'owa ma taugu 'aigeda tuwa. Ma 'oinega mebale'u sihemisaegau 'abehega 'owa moisa 'uhesumanegauma. <sup>22</sup> Mwalona 'ino wasawasaina bwebwe'anaina 'u'ebwaegauwa, taudi wete gide ya'ebwae pwaidiya, ma 'oinega mabwaiyadi sida heboda 'aigeda. Gidemusa 'owa ma taugu 'aigeda. <sup>23</sup> Taugu moisa 'oidiya yamiyamiya ma 'owa wete gide 'oiguwa 'umiyamiya, ma 'oinega sida heboda 'aigeda bwaibwaina. Ma 'oinega mebale'u si'itadi ma sida sanapugau 'abehega 'owa moisa 'uhesumanegauma. Ma wete sisanapugo 'abehega moisa 'uhelauwediya gidemusa 'uhelauwegauwa.

<sup>24</sup> “Tamagu, tomotaedi 'u'ebwaegauwa, nuwanuwagu ma 'asainaina 'oina yatautauya taudi wete 'asainaina 'oina mahetegwao 'ada miyamiya ma 'oinega 'igu wasawasaina 'u'ebwaegauwa nage 'oina si'ita. Weyahina muliyetega ma bale'u bewa 'upaihoweya, taugu 'uhelauwe nugetegauwa.

<sup>25</sup> “Tamagu, 'owa moisa bwebwe'au. Ma hesiyage mebale'u geya sisanapugo, yaboi hesi yasanasanapugo. Ma wete tomotaedi sisanapugauwa 'abehega 'owa 'uhesumanegauma. <sup>26</sup> Coinega mumugau yahe'ita pwaiyeya 'oidiya, ma 'abwa nata wete yahe'ite hiladi, ma 'oinega 'ino helauina 'ateguwa 'imiyamiya taudi 'atediya wete gidemusa 'ida miyamiya, ma taugu wete 'oidiya yada miyamiya.”

## 18

### *Yesu 'ana 'abiyahina weyahina*

<sup>1</sup> Yesu 'ina 'ahwanoi mulina, ma'ana tomuliyao sitauya papali 'aigeda sanina Kidiloni we'ahina sihabaleya, ma Olibe tanohina 'oina siluhuwa. <sup>2</sup> Ma Yudasaina totebaina tupwaina 'isanapu bwaibwainiya. Weyahina sauga baibaiwana Yesu ma'ana tomuliyao 'oina sitautau. <sup>3</sup> Coinega Yudasa tolo'alehaowedi ba'idanao sinao tupwaina 'oina, ma'idi wodam ma mayale, ma wete ma'idi gwegwe 'aleha. Ma tolo'alehaowedi 'adi tohewasao taudi topwaoli ma Palisiyao.

<sup>4</sup> Ma hesi Yesu ginaula mabwaiyadi 'isanapu nugetediya to'aha nata 'oina 'ilatu. Coinega Yesu 'inaowa tolo'alehaedi 'oidiya ma 'ihesilalediya 'igwae, “Taiya wa'ebese?”

<sup>5</sup> Ma taudi sigwae, “Caigeda Nasaleta loheyaina, sanina Yesu.” Coinega Yesu 'ihewgae hilediya, “Taugu!” Ma totebaina tolo'alehaowedi ba'idadiu sitohotoholo. <sup>6</sup> Sauga nage 'oina tutaina Yesu 'igwaeya, “Taugu,” beno 'oina tolo'alehaedi tupwana sihutu hila ma sibe'uwa bale'uwa.

<sup>7</sup> Muliyetega tolo'alehaedi bale'uwegu sitoholo hila, ma Yesuina wete 'ihewgae hilediya 'igwae, “Taiya wa'ebese?” Coinega taudi sigwae, “Nasaleta loheyaina 'aigeda, sanina Yesu.” <sup>8</sup> Coinega wete 'ihewgae hilediya 'igwae, “Nige yahegwae pwaigomiya, taugu. Ma 'eguma taugu moisa wabesebesegau, hede 'agu tomuliyaoowedi bewa watagwaledi ma sitauya 'idi 'asa.” <sup>9</sup> Yesu gwae bewa 'i'inaneya ma 'oinega 'ina 'ahwanoiina Tamana 'oina 'ana moisa 'ilatu bwaibwaina, tutaina 'igwae, “Tamagu, loheloheyaowedi 'u'ebwaegauwa geya 'eta taiya 'oidiyega yahe'waihi.”

<sup>10</sup> Ma Saimoni Pita Yesu deina 'itotoholo 'ina 'elepa 'aleha tolobwanega 'ilisi 'eweya, ma Topwaoli Madouna 'ina topaihowa tenana 'ebeulega 'i'upwa yahuleya. Topaihowaina sanina Maleko. <sup>11</sup> Coinega Yesu Saimoni Pita 'ihewgaeya 'igwae, “Cino 'elepa 'aleha 'ana 'ebe laguwa 'ulagu hila, sahena 'agu muya biyoina 'usu'wasu'wani. Weyahina biyo bewa Tamagu 'i'ebwaegauwa ma 'abehega yanuma.”

### *Yesu Anasa matana sihetoholoya*

<sup>12</sup> Nage 'oina tolo'alehaowedi ma'idi tohanugetao ma wete meYudiya 'idi hewahe-waliyao Yesu si'abi yahiya ma nimana sipaiya. <sup>13</sup> Nugeta sitauyeya Anasa 'ina hada. Anasa tauna Kaiyapa bwahiyana. Bolime nage 'oina Kaiyapaina tauna topwaoliyao 'idi taubada madouna. <sup>14</sup> Tauna tuwa Kaiyapaina mwalona meYudiya 'ihewgaediya 'abehega 'ilobwaineya ma loheya 'aigeda tuwa 'i'amasana tomota mabwaiyadi weyahidi.

#### *Pita Yesu 'imwehihiyeya*

<sup>15</sup> Coinega Yesu sitoeya ma 'ana tomuliya 'eluwa boda simuliyedi. Taudi Saimoni Pita ma wete 'aigeda tomuliya tauna Topwaoli Madouna 'iyana. Coinega boda ba'idadiyao siluhuwa Topwaoli Madouna 'ina hada. <sup>16</sup> Pita hesiyage geya 'iluhu hadai, 'atamana 'itotoholo. Muliyetega tomuliyaina tauna tuwa Topwaoli Madouna 'iyanaina 'ilatuwa, ma wahine 'aigeda tauna 'ahwa'eda 'ana to'itayahina 'ihewgaeya ma 'abehega Pita 'oina 'itagwala ma 'iluhu hadai. Coinega wahineina Pita 'itagwaleya ma 'iluhuwa hadai. <sup>17</sup> Nage 'oina wahineina Pita 'ihewgaeya 'igwae, “Cowa nuwana Yesu 'ana tomuliya 'aigeda, 'awa?” Ta Pitaina 'imwehihiya 'igwae, “Ciya, taugu hene geya!”

<sup>18</sup> Ma sauga nage 'oina gogagogai 'ana tuta, 'oinega topaihowa ma tolo'alehaedi 'aiwe sihataliya ma 'oina simwaimwailu. Coinega Pitaina 'i'itediya simwaimwailu, ta wete tauna 'iluhuwa 'oidiya, ma mahetenao simwaimwailu.

#### *Topwaoli Madouna Yesu 'ibwa'a hesilaleya*

<sup>19</sup> Nage 'oina Topwaoli Madouna Yesu 'ihesilaleya 'igwae, “Taiyawedi taudi 'a tomuliyawedi? Ma wete togidega 'uhehe'ita 'esedi?” <sup>20</sup> Coinega Yesu Topwaoli Madouna 'enana 'ihemaiseya 'igwae, “Sauga mabwaiyana 'oidiya 'atamana ta hada tapwalolo 'oidiya ta Yehoba 'ina Hada He'asisi solana yahehe'ita. Coinega meYudiya mabwaiyadi 'igu he'ita sihesagohediya ta sisanapudiya. Weyahina 'igu he'ita geya yada dahweya. Tuta mabwaiyana tomota matadiya yahehe'ita. <sup>21</sup> Coinega to'aha weyahina taudi geya 'oidiya wahesilala? Weyahina 'igu gwae mabwaiyadi taudi sihesagoha pwaidiya to'aha 'igu he'ita gwae 'oidiya mabwaiyana sisanasanapudi.”

<sup>22</sup> Yesu 'ina hemaisao 'ihewgaediya 'igumwala, 'oinega 'aigeda tolo'aleha deina 'itoholo ma nimana 'oinega Yesu 'i'ahu nahenaheya, ma 'ihewgaeya, 'igwae, “Taiya 'owa nige Topwaoli Madouna 'oina bewa gidemusa 'ugwae 'esa?”

<sup>23</sup> Coinega Yesu loheyaina 'enana 'ihemaiseya, 'igwae, “Ceguma moisa 'usanapuya 'abehega yagwae puiya, bewa tuwa 'igu gwae puiina 'ugwae latuhe. Ma 'eguma 'igu gwae bwebwe'adi, to'aha weyahina 'u'ahu nahenahegauwa?”

<sup>24</sup> Coinega Anasa Yesu ma'ana pai 'ihesumane hileya ma 'ilohihila Topwaoli Madouna 'oina, sanina Kaiyapa.

#### *Pita Yesu 'imwehihi hileya*

<sup>25</sup> Ma Pitaina 'abwa 'aiweina 'oina 'imwaimwailu bodaedi mahetedi ma sihesilaleya sigwae, “Cowa nuwana 'aigeda bewa loheyaina 'ana tomuliya, 'awa?” Ma Pitaina wete 'imwehihi hila 'igwae, “Ciya, taugu hene geya.” <sup>26</sup> Coinega Topwaoli Madouna 'ina topaihowa 'aigeda, tauna mwalo Pita loheyaina 'aneyage tenana 'i'upwe'upweya 'ina susu 'aigeda, 'ihewgaeya Pitaina 'igwae, “Cowa nuwana mahetena Olibe tanohina 'oina ya'itegomiya mwalo, 'awa?” <sup>27</sup> Ta Pitaina wete 'imwehihi hila 'igwae, “Ciya, geya.” Tuwa beno ma 'am'am loheyana 'idouwa.

#### *Yesu 'ina lauhetala Pailato 'oina*

<sup>28</sup> Coinega Yesu Kaiyapa 'ina hadega sitoehileya ma sitauyeya toloina madouna tauna Loma loheyaina sanina Pailato 'ina hada 'oina. Silatuwa ma gona 'i'adaleya. Coinega meYudiyaedi geya sawasawahidi ma toloinaina 'ina hada 'oina siluhu. Weyahina mumugadi 'eguma nuwanuwadi ma Hataona Guyaina si'ai, geya'abwa meLoma 'idi hada 'oina siluhuluhu, beno taudi 'idi he'asisi. <sup>29</sup> Beno 'oinega Pailato 'ilatuwa 'atamana ma 'ihesilalediya 'igwae, “Togidega 'imi nuwatuhu loheya bewa 'ana he'ewa weyahina, hana wagwae ma yahesagohe.”



<sup>30</sup> Coinega meYudiyaedi sihemaiseya sigwae, “Loheya bewa 'eguma moisa geya 'ina puimo, geya'abwa wete 'atoetoeyama 'oiuwa.”

<sup>31</sup> Ma Pailatoina wete 'ihewgae hilediya 'igwae, “Hede 'omi wanaoma watoe ma watauye nobwa waboi 'imi loina 'oidiyega waheyatalae.” Coinega meYudiyaedi sigwae, “Geya 'eta wete 'ama tagwala ma 'eta taiya 'ina 'amasa weyahina 'aloina ma 'alohe'amasi.” <sup>32</sup> Gwae bewa 'ilatuwa ma 'oinega Yesuina 'ina gwaeina 'ina 'amasa weyahina 'ana moisa 'ilatu bwaibwaina, beno mwalona 'igwaeya togidega nata 'i'amasa 'esa.

<sup>33</sup> Coinega Pailato 'iluhu hila 'ina 'ebe miyaina 'oina ma Yesu 'ibwauweya 'iluhuwa ma 'ihesilaleya 'igwae, “Cowa moisa meYudiya 'idi kini?” <sup>34</sup> Coinega Yesuina Pailato 'enana 'ihemaiseya 'igwae, “Cino hesilalaina 'owa tuwa 'uboi 'oiuwega bo 'eta taiyawedi weyahigu sihegwaeigwaeya 'oiuwa?” <sup>35</sup> Ma Pailato 'igwaeya, “Cino nuwatuhi 'abehega taugu Yudiya loheyaina? Cowa hene 'uboi 'ino bodao ma'idi topwaoli 'idi babadao sitoegoma, 'oinega 'uhepwaila bwaibwaina to'aha 'ino pui?”

<sup>36</sup> Ma Yesu 'igwaeya, “Bale'u bewa taugu geya 'igu 'ebeloina. Weyahina taugu 'eguma moisa bale'u bewa 'igu 'ebeloina, 'agu tomuliyaedi sawasawahidi ma weyahigu silosabilau ma meYudiya geya'abwa si'abi'abi yahigau. Ta moisa tuwa, bale'u bewa taugu geya 'igu 'ebeloina.”

<sup>37</sup> Coinega Pailatoina Yesu wete 'ihesilala hileya 'igwae, “Cabehega 'owa 'aigeda kini?” Ma Yesu 'igwae, “Beni tuwa 'ugwae pwaiya, weyahina yali'uma ta bale'u bewa 'oina yatauyama ginaula bewa weyahina, ma 'oinega sanapu moisa weyahina yahetohewpaila, ma taiyawedi 'eguma sanapu moisa sihemisae ma si'abiyahi, taudi beno 'enagu 'ana tohesagohao moisa.” <sup>38</sup> Coinega Pailatoina wete Yesu 'oina 'ihesilala, 'igwae, “To'aha sanina sanapu moisa?”

#### *Pailato 'abwa hesi 'itagwala ma Yesu 'i'amasa*

Pailato 'ihesilala 'igumwala, ma 'ilatuwa 'atamana, ta meYudiyaedi 'ihewgaediya 'igwae, “Loheya bewa geya 'eta wete pui 'oinega yaloba. <sup>39</sup> Ma hesiyage 'omi tuta mabwaiyana 'oidiya mumugami ma 'abehega Hataona Guyaina 'aigeda 'aigeda 'adi tuta 'oidiya, deli 'adi tomiya 'oidiyega 'aigeda loheya yaliali weyahimi. Coinega togidega 'imi nuwatuhi, meYudiya 'imi kini bewa 'oimiya yaliali?” <sup>40</sup> Coinega bodaedi mabwaiyadi si'apu lagata ma 'enadi madounega sigwaeya, “Geya, tauna sahena 'ulihaliyasi, nuwanuwama Balabasa hesi 'ulihasi weyahima.” (Balabasaina tauna toyagaha.)

## 19

<sup>1</sup> Coinega Pailato Yesu 'itoeya 'inaowa 'ina tolo'alehaedi 'i'ebwaediya ma gulahega sisapiya. <sup>2</sup> Muliyetega tolo'alehaedi talitali si'eweya, Yesu 'ana talatala sipaihoweya, ma Yesu debana silaguya. Cabwa wete 'aigeda 'ale'o wasawasa bwehabwehalina si'eweya ma sihe'oteya. <sup>3</sup> Coinega sinaowa deina ma sigwae lotuyaneya, sigwae, “MeYudiya 'idi kini yo, yawedo.” Ma wete nimadiyega sisapiya.

<sup>4</sup> Ma Pailato 'ilatu hila ma bodaedi 'ihewgaediya, 'igwae, “Loheya bewa yatoeyama 'oimiya, ma waboi matamiyega wa'ita ma wasanasanapu 'abehega geya 'eta wete pui 'oinega yaloba toho.” <sup>5</sup> Coinega Yesu ma'ana talatala, ma wete ma'ana 'ale'o wasawasa bwehabwehalina 'ilatuwa 'atamana, ma Pailatoina wete bodaedi 'ihewgaediya 'igwae, “Bewa tauna loheyainaina wa'ita!”

<sup>6</sup> Nage 'oina topwaoliyao 'idi 'inapwanao ma wete 'idi topaihowao Yesu si'iteya, 'oinega 'enadi madounega sibwauwa, sigwae, “Kelose 'oina watutu hepa'ine!” Coinega Pailatoina 'ihewgaediya, 'igwae, “Hede 'omi wanaoma watoe watauye ma watutu hepa'ine, weyahina taugu geya 'eta 'ina pui yaloba toho.” <sup>7</sup> Coinega meYudiyaedi sigwae, “Tauma 'ima loina 'abehega bewa tuwa 'ida 'amasa. Weyahina 'i'abowa 'abehega tauna Yehoba natuna.”

<sup>8</sup> Cidi gwaeina Pailato 'ihesagoheya eeta 'imatauta madouna. <sup>9</sup> Coinega Yesu 'itoehileya ma siluhuwa 'ina hada 'oina, ma 'ihesilaleya 'igwae, “Cowa ta'ehega 'utauyama?” Ma hesiyage Yesuina geya 'eta to'aha 'igwaene. <sup>10</sup> Coinega Pailatoina wete 'ihesilala

hileya 'igwae, “To'aha weyahina 'igu hesilala geya 'uhemaisa? Geya 'usanapu 'abehega taugu sawasawahigu ma yaloinaego? Ceguma yagwae silihasigo, nata wete lihasa 'uloba, ma 'eguma yagwae silohe'amasigo, nata wete tuwa silohe'amasigo.” <sup>11</sup> Ta Yesu Pailato 'ihewgaeya 'igwae, “Geya 'eta wete 'ino lina 'oiguwa 'imiyamiya, 'eguma Yehoba geya 'oiuwa 'itagwala. Ma hesiyage 'uda sanapu 'abehega loheyaina tauna 'ihe'ebwayaegauma 'ino lina 'oina, 'ina pui gala hedadena, 'abwa 'owa 'ino pui.”

<sup>12</sup> Pailatoina Yesu 'ina gwae gidemusa 'ihesagoha 'eseya, 'oinega nuwanuwana madouna Yesu 'ilihasi. Ma hesiyage meYudiyaedi geya nuwadi, 'oinega mabwaiyadi 'enadi madounega sigwaeya, “Yesu 'eguma 'ulihasi, 'owa geya Sisa 'iyana. Weyahina loheya beno 'i'abowa 'abehega tauna kini 'aigeda, ma hesiyage Sisa 'iboinamo kini. Coinega tasanapuya 'abehega tauna Sisa 'ana 'aleha.”

<sup>13</sup> Pailato gwae bewa gidemusa 'ihesagoha 'eseya, 'oinega Yesu 'ilatuehya 'atamana, ma Pailato 'ebeloina bwasa 'oina 'imiyatoiya. Bwasaina 'ane da'ule 'oinega sipaihoweya ma sibwauweya Gabata, beno meYudiya 'enadi. <sup>14</sup> Tuta nage 'oina 'asu diladila gamwana 'oina. Cabwa 'i'adale hali sabwelo 'oina Hataona Guyaina si'ai. Tutaina 'oina Pailato meYudiya 'ihewgaediya 'igwae, “Wa'ita, loheya bewa tauna 'imi kini.” <sup>15</sup> Ma taudi sigwae, “Geya, watauya kelose 'oina watutu hepa'ine.” Coinega Pailatoina wete 'ihesilala hilediya 'igwae, “Togidega ta 'imi kini ma 'abehega 'alohe'amasig?” Coinega topwaoliyao 'idi babadao sigwae, “Tauma hene Sisa 'iboinamo 'ima kini, geya 'eta wete taiya.” <sup>16</sup> Eeta Pailatoina 'itagwala 'oidiya ma Yesu Kolose 'oina situtu hepa'ine.

#### *Yesu 'ana tutu hepa'ina kelose 'oina*

Coinega tolo'alehaedi Yesu si'abi yahiya ma sitauyeya. <sup>17</sup> Sitauyeya ma Yesu 'iboinamo 'ana kelose 'i'ahaliya, ma tolo'alehaedi mahetenao sitauya 'asa 'aigeda sanina Bulubulu 'oina, ma hesiyage sanina meYudiya 'enadiyega sigwae Goligota. <sup>18</sup> Casainaina 'oina Yesu situtu hepa'ineya 'ana kelose 'oina. Ma 'ana keloseina deina loheloheya siteluwa wete situtu hepa'inediya 'adi kelose 'oidiya, loheya 'aigeda 'ina 'ebeulega ma 'aigeda 'ina 'adigeyegyega, ma Yesu gamwagamwana.

<sup>19</sup> Yesuina 'ana kelose debana Pailato gwae 'ileleya ma 'i'ahu hepa'ineya 'igwae, “Yesu gwama Nasaleta tauna meYudiya 'idi kini.” <sup>20</sup> Casainaina 'oina Yesu si'abi hekeloseyeya geya bwaga Yelusalema 'oinega. Coinega meYudiya baibaiwadi gwaeina sihasiliya, weyahina gwaeina sileleya 'ena 'etoi 'oidiyega. MeYudiya 'enadiyega ma meLoma 'enadiyega ma wete meGilisi 'enadiyega. <sup>21</sup> Coinega topwaoliyao 'idi babadao sitauya Pailato sihegwae sigwae, “Cinapwana, to'aha weyahina 'MeYudiya 'idi kini' 'uleleya? Ma hesiyage 'uda lele 'ugwae, 'Loheya bewa 'igwaeya 'abehega tauna meYudiya 'idi kini.” <sup>22</sup> Coinega Pailato babadaedi 'ihewgaediya 'igwae, “Nata geya wete yalagulagu lohili, tuwa nage gidemusa 'imiyamiya.”

<sup>23</sup> Muliyetega tolo'alehaedi taudi Yesu si'abi hekeloseyeya sitehataedi Yesuina 'ana 'ale'o si'ewediya ma siboidimo 'oidiya siheguyaiyeya. Cana hewanu wete si'eweya ma sigwae, “Cale'o bewa tabataba hedadena ma wete saliyana, geya 'ana tubwemo. Coinega nata geya'abwa tahahaigaigali, ma hesiyage 'e'opi'opi 'aigeda tapaihowa gidemusa kati. Ma 'oinega 'eguma taiya 'inugeta hewanu bewa 'i'ewa.” <sup>24</sup> Nuwatu bewa gidemusa sipaihowa 'eseya, ma 'oinega Yehoba 'ina Buki He'asisi 'oina gwaeina 'ana moisa 'ilatu bwaibwaina, tutaina 'igwae,

“Cagu 'ale'o siheguyaiyediya, ma hesi 'agu hewanu si'e'opi'opiyediya.”

Ma 'ina gwaeina bewa gidemusa moisa tuwa tolo'alehaedi sipaihowa 'eseya.

<sup>25</sup> Ma Yesuina 'ana kelose deina wahiwahine sitehata sitotoholo, taudi beno Yesu sinana matasina, ma wete hali Meli tauna Kilopa mwanena, ma wete Meli Magidala. <sup>26</sup> Ta Yesu 'i'ita suluwa sinana ma wete 'ana tomuliya tauna 'ihelauweya madouna sitotoholo, 'oinega sinanaina 'ihewgaeya 'igwae, “Sinagu, loheya beno natuu.” <sup>27</sup> Yesu loheyaina wete gidemusa 'ihewgae 'eseya 'igwae, “Ciyagu, sinau beno.” Coinega Yesuina 'ina 'amasa mulina, loheyaina Yesu sinana 'itoeya 'ina hada ma 'i'itayahiya.

*Yesu yawasina 'ina gumwala*

<sup>28</sup> Tuta nage 'oina Yesu 'isanapuya 'abehega ginaula mabwaiyana 'ilohegumwalidiya, 'oinega 'igwaeya, “Tani'ogu 'iyahala.” Ma 'oinega Yehoba 'ina buki 'ina gwaaina 'ana moisa 'ilatu bwaibwaina. <sup>29</sup> Tupwaina 'oina we'aha payupayuyuna, sanina waini, mabiyona silaguya 'imiyamiya. Coinega balou si'eweya, we'ahina 'oina sihebuteya, ma 'aiwe 'aigeda sanina hisopa 'oina si'atubadiyeya, ma si'eyoyowe haneheya Yesu sopana ma 'abehega 'imala'u'u. <sup>30</sup> Cimala'u'u 'igumwala ma 'igwae, “Cigumwala pwaiya.”

Tuwa beno ma mwaguna 'ilotasouwa, 'isuluwa 'ahalana, ma yawasina 'igumwala.

*Yesu lisulisuna sibadiya*

<sup>31</sup> Ma meYudiyaedi 'idi tohanugetao Pailato 'oina si'ahwanoiya, ma 'eguma sawahina 'itagwala 'oidiya ma loheloheyaedi kelose 'oidiya sisanasanana 'ahedi silasadi, ma 'oinega si'amasa mwayamwayau, eeta 'adi kelose 'oidiyega si'ahala suluhedi. Weyahina sisanapuya 'idi sabwelo madouna 'ihohoya, 'oinega geya nuwadi ma 'abehega loheloheyaedi 'adi kelose 'oidiya sisanasanana 'idi Sabatinaina 'oina.

<sup>32</sup> Coinega tolo'alehaedi Pailato 'oidiya 'itagwala ma sitauya keloseyedi 'oidiyega loheloheyaedi siteluwa 'ahedi si'ahu lasediya. Loheya 'aigeda 'ahena silasediya 'igumwala, ma wete hali loheya 'ahena silasediya. <sup>33</sup> Muliyetega Yesu 'oina sitauyama, ma si'iteya yawasina 'igumwala pwaiya, 'oinega 'ahena geya silasadi. <sup>34</sup> Beno namo tolo'aleha 'aigeda 'aliliya 'i'eweya ma Yesu lisulisuna 'ibadiya, ma lisulisunega bweyaha ma we'aha sidauwa. <sup>35</sup> Taugu tuwa mataguwega ya'iteya, 'oinega weyahidi 'oimiya yahehewasa, ma 'oinega gwaeyedi bewa moisadi wahesagohedi ma wahemisaedi.

<sup>36</sup> Ginaulaedi bewa silatuma ma 'oinega Yehobaina 'ina gwaaina 'ina Buki He'asisi 'oina 'ihewpwaileya, 'ana moisa 'ilatu bwaibwaina, tutaina 'igwae, “Geya'abwa wete hilihiliyana silasalasadi.”

<sup>37</sup> Yehoba 'ina buki 'oina wete 'ihewpwaileya 'igwaeya, “Cana tobadiyedi nata 'oina si'ebubuna.”

*Yesu 'ana hemiya taona*

<sup>38</sup> Muliyetega loheya 'aigeda sanina Yosepa 'itauyama Pailato 'oina ma Yesu wahina 'ihetalamuya. Loheyainaina tauna Alimatiya loheyaina, tauna tuwa 'aigeda wete Yesu 'ana tomuliya dahwadahwaina, weyahina meYudiya 'imatautediya. Coinega Pailato Yosepa 'oina 'itagwala, ma Yesu wahina kelose 'oinega 'i'ahala suluheya ma 'itauyeya. <sup>39</sup> Loheya 'aigeda wete 'itauyama, Yosepaina 'ilemeya ma Yesu wahina si'ahaliya. Loheyaina sanina Nikodimo, tauna tuwa mwalona nihuwanega 'itauya Yesu 'oina ma mahetena sihegwaegwaeya. Loheyainaina holowa 'aigeda mahaina bwebwe'ana ma wete madouna ma mwauna 'i'ahaliyama, 'ana mwauina gide loheya 'ana mwau. Holowinaina solana, mulo ma alowesi mahetena sihebweleliya. <sup>40</sup> Eeta loheloheyaedi siteluwaedi Yesu wahina si'ahaliya, ma holoina 'oinega wahinaina siheholoia, 'abwa muliyetega 'ale'o wa'ewa'e'ena ma dudulena si'eweya ma 'oinega wahina siwaduhiya holoina 'ana tupwa mahetena siwaduha hehogoya. MeYudiya 'idi to'amasao 'adi hemiya taona gidemusa sipaihowa 'eseya. <sup>41</sup> Yesu 'ina 'ebe 'amasaina deina gogo 'aigeda 'imiyamiya. Gogoina 'oina galiha 'aigeda hauhauna 'imiyamiya, geya 'eta taiya to'amasao 'oina silagu toho. <sup>42</sup> Coinega galihinaina 'oina Yesu wahina silaguya. Weyahina galihaina deidiya, ma wete sisanapuya 'abehega meYudiya 'idi Sabati madouna deina silatu pwaiya.

## 20

*Yesu 'ina toholo hila*

<sup>1</sup> Wiki 'ana sabwelo nugenugetaina gona 'ada'adale 'oina Meli Magidala 'itauya galiha 'i'iteya, 'ana 'ahusu'wana sibui wasiyeya. <sup>2</sup> Coinega 'ipili lohilihila Yesu 'ana tomuliyaowedi 'ihewgwaediya 'igwae, “Cinapwana galihega si'eweya ma ta'eha nana silaguya, geya tosanapunamo.” Tomuliyaedi beno Saimoni Pita ma loheyaina tauna Yesu 'iyana moisa.

<sup>3</sup> Coinega siteluwaedi sigogona sitauya galihina 'oina. <sup>4</sup> Cidi tauyaina 'oina sip-iliyamowa, ma loheyaina tauna Yesu 'iyanaina moisa galihina 'oina 'ilatu nugeta <sup>5</sup> ma galihina 'oina 'i'etuluha 'i'ita luhuwa galihinamo, beno 'ale'odimo si'eno'eno. Loheyainaina galihina 'oina geya 'iluhu.

<sup>6</sup> Muliyetega Saimoni Pita 'ipili latuwa, ta dumwaluna galihina 'oina 'iluhuwa, ma wete 'i'iteya galihinamo, ma hesiyage 'ale'owedi 'i'itediya si'eno'eno. <sup>7</sup> Cale'owedi 'eluwa 'i'itediya, 'aigeda mwaguna 'ana samu, ma 'aigeda wahina mabwaiyana 'ana samu. Mwangunaina 'ana samuina 'i'iteya tuwa losilosipwana, ma wete 'i'iteya wahinaina 'ana samu 'oinega 'i'eno wasiya.

<sup>8</sup> Loheyaina tauna 'ilatu nugeta galihina 'oina, 'iyanaina Pita mulinega wete 'iluhuwa galihina 'oina, ma 'ale'odimo wete 'i'itediya, ma 'i'ahwa moisa. <sup>9</sup> Ma hesiyage ma'iyanaina geya Yehoba 'ina gwaena 'ina buki 'oina sinuwatuhuyahi, tutaina 'igwaeya 'abehega 'abwa nata galihega 'itoholo hila. <sup>10</sup> Coinega siteluwaedi silohihila 'idi hada.

#### *Yesu Meli Magidala 'oina 'ilatuwa*

<sup>11</sup> Ma hesiyage Meli 'abwa tuwa galihina 'oina 'itotoholo ma 'idoudou. Cidoudou ma 'i'etuluha galihina 'oina <sup>12</sup> 'i'ita luhuwa Yehoba 'ina anelose 'eluwa simiyamiya Yesu 'ina 'ebe'eno 'oina, ma'adi 'ale'o wa'ewa'e'edi. Caigeda 'aba 'ununega ma 'aigeda 'aba 'ahenega. <sup>13</sup> Siteluwaedi Meli sihegwaeya sigwae, "To'aha weyahina 'udoudou?". Ma Meli 'igwaeya, "Cigu Cinapwana galiha bewa 'oinega si'eweya ma ta'eha nana silaguya, ma weyahina yadoudou."

<sup>14</sup> Muliyetega Meli 'i'ita lohihila Yesu deina 'itotoholo, ma 'iyamo geya 'isanapu toho 'abehega tauna Yesu. <sup>15</sup> Ta Yesu Meli 'ihesilaley 'igwae, "Taiya weyahina 'ubesabesa ma 'udoudou?" Ma Meliina 'ina nuwatuhi 'abehega tanoha 'ana topaihowa 'aigeda, 'oinega 'ihewgaeya 'igwae, "Cinapwana, 'eguma 'owa moisa 'u'eweya, bewa tuwa 'uhepwaile ta'eha 'ulaguya, ma ya'ewa hila." <sup>16</sup> Muliyetega Yesu Meli sanina 'i'inaneya 'igwae, "Meli." Meliina 'ihutu lohihila, ma Yesu 'oina 'igwaeya, 'igwae, "Labonai." (Labonai 'ana sanapu 'Tohe'ita.)

<sup>17</sup> Ma Yesu 'ihewgae hileya 'igwae, "Sahena 'u'abi'abi tohogau, weyahina 'abwa geya Tamagu 'oina yahane. Ma hesiyage 'utauya tasigwao 'oidiya, ma 'uhegwaedi 'abehega bewa tuwa taugu yahanehane Tamagu 'oina, tauna 'omi wete Tamamiu. Tauna taugu 'igu Yehoba ma 'omi wete 'imi Yehoba." <sup>18</sup> Coinega Meli Magidala 'itauya tomuliyaeidi 'oidiya ma 'oidiya 'ihewwaila 'igwae, "Cinapwana ya'iteya 'itoholo hila pwaiya." Meli Yesuina 'enanaedi 'ihewwaila latuhediya tomuliyaeidi 'oidiya.

#### *Yesu 'ilatuwa 'ana tomuliyaeidi 'oidiya*

<sup>19</sup> Ma wete wiki 'ana sabwelo nugenugetaina lahilahiyega Yesu 'ana tomuliyaeidi 'oidiya 'ilatuwa. Tutaina 'oina, 'ana tomuliyaeidi hada 'aigeda 'oina siluhuwa ma si'eda gudu su'wasu'wana ma solana simiyamiya, weyahina meYudiya simatautediya. Coinega Yesu 'oidiya 'ilatuwa ma gamwagamwanidiya 'itoholowa ma 'ihewgaediya 'igwae, "Sahena wa'ate'ate yoho." <sup>20</sup> Muliyetega nimana ma lisulisuna 'ana tomuliyaeidi 'i'itediya. Beno 'oina 'ana tomuliyaeidi si'iteya ma siyaliyaya madouna, weyahina 'idi Cinapwanaina si'iteya. <sup>21</sup> Coinega Yesu wete 'ana tomuliyaeidi 'ihewgae hilediya 'igwae, "Wa'ate patu, sahena 'ateyoho. Weyahina Tamagu tauna 'ihesumanegauma, 'oinega taugu wete gidemusa 'omi yahesumanegemi." <sup>22</sup> Cina gwaena mulina, yawasina 'imu'a baleya 'oidiya, ma wete 'ihewgaediya 'igwae, "Yaluyaluwa He'asisi wa'ewa. <sup>23</sup> Ma 'oinega 'eguma tomota 'idi puiyao wanuwamudi, nata Yehoba wete 'inuwasamudi. Ma 'eguma taiyawedi 'idi puiyao geya wanuwamudi, nata 'oidiya simiya hataya."

#### *Yesu ma Tomasi 'idi hegwagwae*

<sup>24</sup> Tutaina beno 'oina Tomasi geya mahetedi ma Yesu 'ilatuwa. Tomasiina tauna tuwa Yesu 'ana tomuliyaeidi 'aigeda sitetuwelo 'oidiyega, sanina heluwena Didiluwaluwa. <sup>25</sup> Coinega tutaina Tomasi 'ilohihilama 'iyanaowedi sihegwaeya sigwae, "Ciyamai, tauma

'ida Cinapwanaina 'a'iteya.” Ma hesi Tomasi 'i'ahwa 'abo'abowediya, 'igwae, “Taugu 'eguma yaboi mataguwega 'ana 'ila'ilalaeidi nimanaina 'oidiya situtudiya ya'itadi ma wete nimaguwega ya'abi tohodi, ya'ahwa moisa. Ma wete 'eguma lisulisunaina sibadiya 'oina nimagu yalagu luhuwe, 'abwa hesi ya'ahwa moisa.”

<sup>26</sup> Coinega wiki 'aigeda 'igumwala ma tomuliyaeidi wete simiya 'autahila, hada 'aigeda solana si'edagudu hila simiyamiya, ma Yesuina 'oidiya 'ilatu hila. Tuta bewa 'oina Tomasi mahetediu. Coinega Yesu 'oidiya 'ilatuwa ma gamwagamwanidiya 'itoholowa ma 'ihewgaediya 'igwae, “Sahena 'ateyoho.” <sup>27</sup> Eeta Yesu Tomasi 'ihewgaeya 'igwae, “Nimagu bewa 'u'itadi, ma nima 'uyamosiu 'ebwa 'ulagu ma 'agu 'ila'ilala bewa 'u'abi tohodi. Ma wete nimau 'uyasi 'ebwa 'agu badi lisulisuguina 'oina 'ulagu luhuwe, ma 'uhemisaegau. Ma sahena 'ahwa 'abo'abo.” <sup>28</sup> Coinega Tomasi 'igwae hila, ma 'igwaeya, “Cowa moisa 'igu Badaina ma wete 'igu Yehobaina.”

<sup>29</sup> Ma Yesu 'igwaeya, “Tomasi, 'abwa hesi 'u'itegauwa ma 'uhemisaegauwa, 'awa? Ma hesiyage taiyawedi taudi 'eguma geya si'itegau ma sihemisaegau, nata moisa siyaliyaya.”

### *Buki bewa hegwaegwaaina*

<sup>30</sup> Yesu 'ina 'ila'ilala waiwaiidi 'ana tomuliyao matadiya 'ipaihowediya, baibaiwa hedada simiyamiya, geya mabwaiyana buki bewa 'oina yaleledi. <sup>31</sup> Ma hesiyage hisadimo tuwa bewa yalelediya ma 'oinega wahasilidi ma Yesu wasanapu ma wahemisaegau 'abehega tauna moisa To'abihetena Yehoba natuna. Ma 'oinega Yesu saninega yawasimi miyamiya hatayana waloba.

## 21

### *Yesu Hola Taibiliya 'oina 'ilatuwa*

<sup>1</sup> Yesu wete 'iboinamo 'ihe'itae hileya 'ana tomuliyao 'oidiya, tutaina Hola Taibiliya 'oina sigomagomana. <sup>14</sup> Cina latuina bewa hetoina 'ana tomuliyaeidi 'oidiya tutaina 'amasega 'itoholo hila. Bewa gidemusa 'ilatu 'esa 'oidiya: <sup>2</sup> Tutaina 'oina Saimoni Pita, Tomasi tauna sanina Didiluwaluwa, Nataniyela tauna Kena loheyaina Galili tupwanega, ma Sebedi natunao, ma tomuliyao 'eluwa wete mahetediyao simiyamiya. <sup>3</sup> Ma Saimoni Pita 'iyanaowedi 'ihewgaediya 'igwae, “Ciyagwao, yatautauya taugu yagomana.” Ma 'iyanaowedi sigwae, “Bwebwe'ana, tauma wete 'anaonaowa.” Coinega mabwaiyadi 'ewou 'aigeda sigeluya ma siwoseya sitauya. Nihuwana beno 'oina, sigomana masaliya, ma 'iyamo geya 'eta silahana si'onatoho.

<sup>4</sup> Gona 'i'adaleya, ma tomuliyaeidi Yesu si'iteya 'oya'oya 'itotoholo, ma 'iyamo geya si'inana toho 'abehega tauna Yesu. <sup>5</sup> Coinega 'ihewgaediya 'igwae, “Ciyagwao, hisa silahana wa'onediya?” Ta taudi sigwae, “Geya 'eta silahana 'a'onatoho.”

<sup>6</sup> Ma wete 'ihewgaediya 'igwae, “Cimi gomanina wa'abi ma 'ateyaniyega wayahuwe ma silahana wa'onadi.” Coinega 'idi gomanaina si'abiya ma 'ateyaniyega siyahuweya, ma silahana baibaiwadi si'onediya, ma gomana 'abina sigagadeya.

<sup>7</sup> Coinega loheyaina tauna Yesu 'iyana moisa Saimoni Pita 'ihewgaeya 'igwae, “Ciyagu, nage tauna tuwa 'ida Cinapwanaina.” Saimoni Pita gwae bewa 'ihewgaehya, ma 'ilomwayamwayauwa, 'ana 'ale'o 'i'ote hileya, weyahina tutaina 'oina 'i'elolowa ma 'igomagomana. Ee 'ana 'ale'oina 'i'ote hileya, ma 'i'eno hatuiya ni'uwa, ma 'ilaga 'oya'oya. <sup>8</sup> Muliyetega 'iyanaowedi mabwaiyadi wagega gomana masilahaina silisi lagaheya 'oya'oya. Weyahina 'idi 'ebe gomanaina 'oya'oya deina.

<sup>9</sup> Silaga 'oya'oya, si'iteya 'aiwe 'i'ala ganiyala 'i'ala'alata ma wete ganiyalainaina 'oina si'iteya beledi ma silahana 'ibwasabwasadi.

<sup>10</sup> Ma Yesu 'ihewgaediya 'igwae, “Ceta wete silahana wa'ewedima ma talagu baledi.”

<sup>11</sup> Coinega Saimoni Pita wagai 'igelu hila, ma gomana 'i'abi lagaheya 'oya'oya. Gomanaina 'oina silahana 'imaha geyogeyoiya, silahanedi 'adi baibaiwa gide wani handeledi pipti teli (153) ma wete madomadoudimo. Ma 'iyamo gomanaina geya si'enosabu toho.



<sup>12</sup> Ma Yesu 'ihewgaediya 'igwae, “Wanaoma wa'ai.” Beno 'oina 'abwa hesi sisanapu bwaibwainiya 'abehega tauna tuwa 'idi Cinapwanaina. Coinega geya 'eta to'aha wete 'oina sigwaene, bo nuwana 'ihesilala ma 'igwae, “Taiya 'owa?”

<sup>13</sup> Coinega Yesu beledi ma silahana 'i'ewediya ma 'ana tomuliyaedi 'i'ebwaediya.

<sup>14</sup> Tuta bewa 'oina Yesu 'iboinamo 'ihe'itaeya hetoina 'ana tomuliyaedi 'oidiya tutaina 'ina 'amasa 'oinega 'itoholo hila.

*Yesu ma Pita 'idi hegwae*

<sup>15</sup> Silohepa'ala 'igumwala, ma Yesu Saimoni Pita 'ihewgaeya 'igwae, “Saimoni, Yoni natuna, 'owa moisa 'uhelauwegauwa 'abwa bewa taudi?” Coinega Saimoni 'igwae, “Cinapwana, 'usanapu pwaigauwa 'abehega moisa tuwa yahelauwegowa.” Ma Yesu Saimoni 'ihewgaeya 'igwae, “Cigu lamiyao 'u'ita yahidi.” <sup>16</sup> Muliyetega Yesu Saimoni wete 'ihesilala hileya 'igwae, “Saimoni, Yoni natuna, moisa 'uhelauwegauwa?” Coinega Saimoni wete 'igwae, “Cinapwana, 'usanapu pwaigauwa 'abehega yahelauwegowa.” Ma Yesu Saimoni 'ihewgaeya 'igwae, “Cigu sipi 'u'ita yahidi.”

<sup>17</sup> Coinega Yesu Saimoni Pita 'ihesilaleya hetoina 'igwae, “Saimoni, Yoni natuna, 'uhelauwegauwa?” Ta Saimoni Pita nuwana 'igala weyahina Yesu 'ina hesilala 'oina matoi, 'oinega Yesu 'enana 'ihemaiseya 'igwae, “Cinapwana, 'owa ginaula mabwaiyana 'usanasanapudi, ma 'usanapu pwaigauwa 'abehega yahelauwegowa.” Coinega Yesu wete Saimoni Pita 'ihewgaeya 'igwae, “Cigu sipi 'u'ita yahidi. <sup>18</sup> Ma wete yagwae moisa 'oiuwa 'abehega 'ino tuta gwama 'oina, 'uboi 'a 'ale'o 'u'ote'ote, ma wete to 'asa 'oina 'eguma nuwanuwau, ma 'oina 'utau. Ma hesiyage tutaina 'eguma 'uhe'ina'napwana, nata nimau 'uyasidi ma tomota hagadi 'a 'ale'o sihe'otego, ma wete to 'asa 'oina geya nuwau ma 'oina 'utauya, 'asainaina nata 'oina sitauyego.” <sup>19</sup> Gwae bewa 'oinega Pita 'ina 'amasa weyahina Yesu 'ilihasa, ma 'ina 'amasaina 'oinega nata Yehoba sanina 'i'abi hanehe. Muliyetega Yesu Pita 'ihewgae hileya 'igwae, “Cumuliyegau.”

*Yesu ma'ana tomuliyao Yoni weyahina sihegwae*

<sup>20</sup> Ma Pita 'i'ita lohihila loheyaina tauna Yesu 'iyana moisa 'i'iteya. Loheyaina tauna mwalona 'idi 'ai solana Yesu deina 'imiya toiya ma 'aneyage 'ihewgaeya 'igwae, “Cinapwana, taiya tauna nata 'itebaego?” <sup>21</sup> Loheyainaina tauna Pita 'i'iteya mulinega 'itautauya, 'oinega Pitaina loheyaina weyahina Yesu 'oina 'ihewgaewaeya 'igwae, “Cinapwana, loheya bewa togidega 'ana lina?”

<sup>22</sup> Coinega Yesu Pita 'enana 'ihemaiseya 'igwae, “Beno geya 'eta to'aha 'oiuwa, ma 'eguma nuwanuwagu ma loheyainaina tuwa 'imiyamiya 'ana siga yahilama, nata wete gidemusa 'ilatu 'esa. Ma hesiyage 'owa bewa tuwa 'umuliyegau.” <sup>23</sup> Yesu 'ina gwaeina bewa 'ana tomuliyaedi sihesagoheya 'oinega siboidimo 'oidiya sihegwae geya weyahina 'idi nuwatuhu 'abehega tomuliyaina geya'abwa 'i'ama'amasa. Ma hesiyage Yesu bewa geya gidemusa 'igwae 'esa. Ma hesi 'ina gwaeina 'igwae, “Loheyainaina 'eguma nuwanuwagu ma 'imiyamiya 'ana siga yahilama, beno geya 'eta to'aha 'oiuwa.”

<sup>24</sup> Tomuliyainaina beno taugu tuwa ginaula bewa weyahidi yahehepwaila ma yalediya he'ote'otetela bewa 'oina. Coinega tasanapuya 'abehega 'igu hepweila mabwaiyana gwae moisadi.

<sup>25</sup> Yesu 'ina paihowao baibaiwa hedadedi simiyamiya, ma 'eguma 'ina paihowaedi mabwaiyadi taleledi, yanuwatuhuya nata bale'u bewa buki 'imaha geyogeyoi.

## PAIHOWA

### Yesu 'ana tohepwailao 'idi paihowa

Luke 'ina buki heluwena bewa ma 'ihe'ote'oteteleya Yesu 'ina toholohila ta 'ina hane galewa weyahidi, ta muliyetega Yaluyaluwa Tabuna 'isuluma ma 'ana tomuliyao 'i'abihe waiwaiya, ma siguguya ta wete paihowa waiwaiya Yesu saninega sipaihowediya. Tupwana tapwalolo 'ana tohanugetao silo'alehediya, ma tuwa sihewaiwaiya ta tomota baibaiwadi Yesu tetelina sihemiseya ta sibabaitaisowa.

Muliyetega 'adi 'aleha madouna, sanina Saulo, 'inuwabuiya ma 'ihetohepwaila Yesu weyahina, ta 'isakowasi tupwa mabwaiyana 'oidiya, 'iguguya Yesu tetelina, eema 'ana siga meYudiya 'idi tohanugetao Pauloina si'wayamiya ta nuwanuwadi silohe'amasi. Ma hesi meLoma Paulo si'abiheteya, ta sitoeya Loma 'oina yatala weyahina 'idi tololina madouna Sisa matana.

Saugaina Paulo deliya 'imiyamiya, tohekalesiyao 'idi letao 'ilelediya, beno meEpeso ma mePilipai ma meKolose 'idi letao, ma Pilimoni 'ina leta, ta wete Timoti 'ina leta heluwena.

#### *Yesu 'ana tohepwailao 'idi paihowa*

<sup>1</sup> Cae Tiyopilo, mwalo bukiina yalele nugeteya 'alona Yesu 'ina paihowao ma 'ina he'itao, <sup>2</sup> tutaina 'ina miya gogo gabulena 'ana siga Yehoba 'itoe haneheya galewa, Yesuina 'ina 'amasa mulina, mayawasina 'ilatuwa 'ana tohepwailao hesihesinuwadi 'oidiya, ta Yaluyaluwa Tabuna 'ina waiwaiyega 'adi lona 'i'ebwaediya. <sup>3</sup> Sabwelo poti 'alodiya 'ilatulatu 'oidiya, ta 'ebe'ita baibaiwadi 'ihe'itediya, 'oinega 'ina toholohila si'ahwa moiseya, ma Yehoba 'ina lona weyahina 'ihe'itediya.

<sup>4</sup> Cabwa ba'idadiu simiyamiya ta 'adi lona 'i'ebwaediya, 'igwae, “Sahena Yelusalema wa'ebe'ebesine, ma hesi Tamadai 'ina gwae hemisaina mwalo yahegwagomiyaya weyahina wayamwayamwa. <sup>5</sup> Wanuwatuhuyahi 'abehega Yoni we'ahega 'i'abi'abihe babitaisowegomi ma sabwelo geya baibaiwana simiyamiya ma 'omi 'imi babitaiso Yaluyaluwa Tabuna 'oinega waloba.”

#### *Yesu 'ina hane galewa*

<sup>6</sup> Caigeda sauga Yesu ma 'ana tomuliyao simiya'auta, ma sihesilala 'oina, sigwae, “Bada, sowasowahina ma sauga bewa tauda meIsileli 'uhanugetegita ma taboidamo taloina hilegita?”

<sup>7</sup> Ma Yesu 'igwae, “Tamagu tauna 'iloiloina, ma geya sowasowahina ma 'omi wasanapu to sauga 'ina lonaedi 'ipaihowadi. <sup>8</sup> Ma 'omi hesi 'abwa Yaluyaluwa Tabuna 'inaowa 'oimiya ma 'i'abihe waiwaiyegomi, ma taugu weyahigu wahetohepwaila Yelusalema 'oina, ma Yudiya ma Sameliya gogonao mabwaiyadi 'oidiya, ta wete gogo gabulena mabwaiyana 'oidiya.” <sup>9</sup> Cina gwaeyaowedi bewa 'ilosalahidiya, ta matadiyega Yesu si'iteya 'ihane galewa, ma yaloha 'alona 'i'waiha.

<sup>10</sup> Ci'ebesine pwaidiya, ta 'abwa hene si'e'ebubuna galewa, ma loheya 'eluwa ma'adi 'ale'o wa'ewa'e'edi deidiya sitoholo, <sup>11</sup> ta sigwae, “MeGalili he, to'aha weyahina wa'e'ebubuna galewa? Yehoba Yesuina 'itoe pwaiya galewa, ma 'abwa 'isulu hilama, ma 'ina suluma 'ana 'ita 'abwa gide 'ina haneina nige wa'iteya.”

#### *Yudasa miyalaena*

<sup>12</sup> Coyaina sanina Olibe 'oinega sihila ta sitauya Yelusalema, beno geya bwaga, gide loheloheya siyawayawala sabwelo Sabati 'oina. <sup>13</sup> Ta siluhuwa 'idi hada ta sihaneya 'aigeda tupwa 'aliupa 'oina, taudi Pita ma Yoni ma Yemesa ma Andulu ma Pilipi ma Tomasi ma Batolomiu ma Madiu ta hali Yemesa (tauna Alipiyo natuna), ma Saimoni (tauna mwalo to'ohe Isileli 'ina miyawasi Loma weyahina), ma Yudasa (tauna Yemesa natuna). <sup>14</sup> Mabwaiyadi bewa sabwelo 'aigeda 'aigeda 'oina 'idi 'atetagwala 'oinega

si'ahwa'ahwanoi Yehoba 'oina, wahiwahine mahetediyao, ma Meli tauna Yesu sinana, ma Yesu tasinao wete mahetediyao.

<sup>15</sup> Bodaedi 'adi baibaiwa gidemusa wani handeledi ma tuweniti, ma 'aigeda sabwelo 'oina Pita gamwagamwanidiya 'itoholowa ma 'ihewaediya, 'igwae:

<sup>16-20</sup> “Tasigwao, mwalo Yaluyaluwa Tabuna Debida 'ina gwae 'i'ebwaeya Yudasaweyahina, ma Buki He'asisi 'oina 'imiyamiya. Yudasaina mwalo mahetedai tahetohewaila Yesu weyahina, ma hesi 'ida Bada 'itebaeya ta 'i'ebwayaeya Yesu 'ana 'alehao nimadiya. Ta 'aigeda wali Buki He'asisi 'alona Debida 'ina gwae Yudasaweyahina, bewa gide 'igwaeya,

'Cina gogo 'ibisula ma gesowana 'eta taiya loheya 'oina 'imiya.'

Ma wete 'igwaeya,

'Miyalaena tauna 'ina paihowa 'i'ewa.'

Coinega 'ilobwaineya 'ilatu gide gwae bewa 'igwae 'ese.”

Pita 'ina gwae bewa gide, weyahina Yudasaweyahina 'i'amasa pwaiya. Tauna mwalo 'ina paihowa galana 'ana maisa 'i'eweya ma 'aigeda bale'u 'igimwaneya, ta bale'uina 'alona 'ibe'u talutalubu'ia, ta gamwana 'ilosabuweya, ma sinaena mabwaiyana 'ilatuwa ta tetelina meYelusalema mabwaiyadi sihesagoheya, ta 'enadiyega bale'uina sibwauweya “Akeladama,” ma 'ana sanapu “Bale'u Bweyaha.”

<sup>21</sup> Ma Pita wete 'igwaeya, “Coinega Yudasaweyahina miyalaena tabese, ma 'ilobwaineya ma loheyaina mwalo mahetedai tamiyamiya sauga mabwaiyana, <sup>22</sup> Yesu 'ina babitaiso Yoni 'oinega 'ana siga 'ina hane galewa, 'ina sakowasi mabwaiyana 'oidiya, ma 'ane loheyaina mahetedai tahehepwaila Yesu 'ina toholohila weyahina.”

<sup>23</sup> Coinega loheya 'eluwa sanidiyao si'abi lagasidiya, 'aigeda Yosepa, tauna sibwauweya Basaba, tauna wete sibwauweya Yusito, ma heluwena loheya sanina Mataya. <sup>24</sup> Coinega si'ahwa'ahwanoi Yehoba 'oina, sigwaeya, “Bada yo, 'owa tomota mabwaiyama 'ima nuwatuhu 'usanasanapudi, 'oinega 'ino hesinuwa loheloheya 'eluwa bewa 'oidiyega 'uhe'itae 'oima, <sup>25</sup> ma Yudasaweyahina miyalaena, ma tauna 'ihetopaihowa ma 'ihetohewaila Yesu weyahina, weyahina Yudasaweyahina 'i'ebesineya ta 'itauya tauna 'ina tupwa.”

<sup>26</sup> Coinega dimwa 'eluwa 'oidiya sanidi silelediya ma siula haneheddi ma sibe'uwa, ta Mataya sanina 'inugeta, 'oinega tauna 'iluhu Yesu 'ana tohepwailao site lebeniyedi ba'idanao, ta mahetediyao sipaihowa.

## 2

### *Yaluyaluwa Tabuna 'ina tauyama*

<sup>1</sup> Ma muliyetega paihowa sanina Penitikosi 'ana sabwelo 'oina Yesu 'ana tohemisao mabwaiyadi si'eto'autama, <sup>2</sup> ma hadai simiyamiya, ma galewega 'aigeda dagugu gide wediliya madouna sihesagoheya, ta 'idi hada 'alona gesowana ma to'aha wete sihesagohe, <sup>3</sup> ta ginaula 'aigeda si'iteya 'ana 'ita gide 'aiwe ninininimina, ma 'alataedi sitowa 'aigeda 'aigeda debadiya. <sup>4</sup> Coinega mabwaiyadi Yaluyaluwa Tabuna 'ilohemahediya, ta sihegaina ma hali 'enana ma hali 'enana 'oidiyega sigwaegwae, beno Yaluyaluwa Tabuna 'ina waiwaiyega.

<sup>5</sup> Sauga nage 'oina totapwalolo meYudiya hali tupwega ma hali tupwega sitauya pwaima, ma Yelusalema 'oina simiyamiya, <sup>6</sup> ma daguguina sihesagoheya ta si'eto'autama, ma mabwaiyadi taudi 'enadiyega 'aigeda 'aigeda gwae sihesagoheya 'oinega nuwadi 'ihewpanopwanowa madouna, <sup>7</sup> ta sigwae, “Togidega, taudi togwaeyedi mabwaiyadi meGalili 'awa? <sup>8</sup> Ma togidega ta 'oinega mabwaiyada tauda 'enadega sigwaegwae, <sup>9</sup> 'enanaedi beno Palitiya, ma Midiya, ma Elama, ma Mesopotemiya 'ana tomiya, ma Yudiya ma Kapadosiya, ma Ponito, ma Esiya, ma <sup>10</sup> Piligiya, ma Pamipiliya, ma Itipita, ta Libiya tupwainawedi Sailini 'alona simiyamiya, ta taudi Lomega sitauyama, tupwadi meYudiya, ma tupwadi geya meYudiya ma hesi 'ida tapwalolo 'oina sitagwalediya mahetediyao, <sup>11</sup> ma wete meKiliti, ma meAlebiya, ta mabwaiyada tauda 'enada hagana ma hagana 'oidiyega sigwaegwae Yehoba 'ina paihowa waiwaiyedi weyahina.”

<sup>12</sup> Coinega mabwaiyadi ma'idi henuwanainaida siboidimo sigwaegwae, “To'aha lamuna ta 'idi paihowa bewa gidemusa?”

<sup>13</sup> Ma hesi 'iyadiyao tupwadi sigwae, “Nuwana we'aha waiwai 'oinega sihebuwa.”

*Pita 'ina hepwaile*

<sup>14</sup> Ma Pita 'iyanao site lebeni mahetenao sitoholo, ma Pita 'ihagaina ma 'oidiya 'iloguguya, 'igwaeya, “Comi meYudiya ma Yelusalema 'ana tomiyao mabwaiyami 'igu gwae wahesagohe, ma wanuwa sabwalena, <sup>15</sup> 'abehega 'ima paihowa bewa geya we'aha waiwai 'oinega, weyahina 'abwa gonagona, geya numa yauyaule 'ana tuta. <sup>16</sup> Ma hesi mwalo palopita Yoeli 'ihepwaile nugeteya, 'igwae, <sup>17</sup> 'Yehoba 'ina hepwaile bewa gidemusa 'igwae:

Cabwa sauga 'ana 'ebelosaloha 'oina, Yaluyaluwagu yalosiwa tomota mabwaiyadi 'oidiya, ma natumiyao loheyadi nuwana natumiyao wahinedi siloguguya, ta 'imi hewahewaliyao si'eno mata'ita'ita, ta 'imi babadao sinihi. <sup>18</sup> Moisa, tuta nage 'oina Yaluyaluwagu yalosiwa 'igu topaihowa, loheloheya ma wahiwahine 'oidiya, ma 'igu nuwatuhu sihepwaila nugete. <sup>19</sup> Ma 'ebe'ita henainaida yapaihowadi galewa, ta wete bale'uwa, gidemusa bweyaha ma 'aiwe ganinisa ma 'asu, <sup>20</sup> ta sinala 'iguguyou, ta wai'ena 'ana 'ita 'ihebweyaha, ma muliyetega Bada 'ina sabwelo 'ebe matauta 'ilatu. <sup>21</sup> Ta 'eguma taiyawedi Bada saninega sibwaubwau nata 'i'abihetedi.’”

<sup>22</sup> Pita wete 'ihegwaediya, 'igwae, “MeIsileli 'omi gwae bewa wahesagohe, Yesu tauna gwama Nasaleta matamiya Yehoba 'ihe'itaeya 'abehega tauna 'ina topaihowaina, weyahina Yesu 'ina paihowa waiwai ma 'ebe henainaida Yehoba 'ina waiwaiyega 'ipaihowediya, ma wasanasanapudi weyahina gamwagamwanimiya 'ipaihowediya. <sup>23</sup> Yehoba mwalo hene Yesuina weyahina 'iloina, ma to'aha bale'uwa Yesu nata 'iloba Yehoba 'isanapu nugeteya, beno 'omi watebaeya, ta 'imi loina 'oinega tomota galadi kelose 'oina silohe'amasiya. <sup>24</sup> Ma Yehoba 'amasa 'ina tupwa mwauna 'oinega 'i'abiheteya ta 'i'abihetoholo hileya, weyahina geya sowasowahina ma 'amasa 'ina tupwa 'imiyamiya hataya. <sup>25</sup> Bewa weyahina mwalo Debida Yesu 'ina gwae 'ihepwaile nugeteya 'igwae, 'Bada ya'iteya mataguwega 'imiya hataya, ma 'igu 'ebeulega 'imiyamiya, ta 'i'abihe waiwaiyegauwa ma sahena yawe'awe'a.

<sup>26</sup> Coinega yayaliyaya madouna ma yahehepwatuwe, ma yahemisaeya 'ane gesowana 'wapigu 'igalagala.

<sup>27</sup> Taugu 'ino loheya hesihesinuwaigu, eema sahena yaluyaluwagu 'ulagulagu hataya to'amasao 'idi gogowa, ma gesowana wete 'wapigu 'imwahulu.

<sup>28</sup> Ta hesi yawasi bwebwe'ana 'ina 'eda 'uhe'itaeya 'oiguwa, 'oinega matauwa 'u'abihe yaliyaya hataegau.’”

<sup>29</sup> Ma Pita wete 'igwaeya, “Tasigwao, gwae bewa geya tubuda Debida weyahina, weyahina Debidaina tasanapuya 'abehega mwalohene 'i'amaso ta sigaliheya, ma bewa tuwa 'ana galihina 'ebwa 'imiyamiya. <sup>30</sup> Ma Debidaina palopita 'aigeda, ma Yehoba 'ina gwae hemisa waiwaina 'oina 'inuwatuhu yahiya 'abehega 'abwa Debida tubuna 'aigeda Debidaina 'ina 'ebeloina 'i'ewa Yehoba 'oinega. <sup>31</sup> Coinega To'abihetenaina 'ina toholohila 'isanapu nugeteya, ta 'ihegwaeya 'abehega sahena to'amasao yaluyaluwadi 'idi gogo 'oina 'imiyamiya hataya, ma wete 'wapina gesowana 'imwahumwahulu. <sup>32</sup> Bewa Yesu 'ina 'amasega Yehoba 'i'abihetoholo hila pwaiya, ma tauna mabwaiyama 'a'iteya. <sup>33</sup> Coinega Yehoba 'i'abihaneheya ta tauna 'ina 'ebeulega 'imiyamiya, ma tauna Yaluyaluwa Tabunaina Yehoba mwalo 'igwae hemisaeya, ma bewa tuwa 'i'ebwaya pwaimaiya, 'oinega paihowa bewa wa'ita'itadi ma wahehesagohedi, tauna 'oinega sitauyama. <sup>34</sup> Weyahina Debida geya tauna 'ina hane galewa weyahina 'igwae, ma Yesu hesi weyahina 'igwaeya, 'igwae,

'Yehoba 'igwae pwaiya 'igu Bada 'oina, “Cigu 'ebeulega 'umiyatoi,

<sup>35</sup> ma 'ana siga tutaina 'a sahiyao yalagu suluhedi 'aheu 'adi 'ebelagu 'oina.’”

<sup>36</sup> “Bewa weyahina meIsileli mabwaiyami wasanapu bwaibwaini 'abehega Yehoba Yesu 'i'ahwa bada pwaiyeya ma tauna To'abihetena, tauna Yesuina wa'abihekelose pwaiya.”

<sup>37</sup> Loheloheyaedi Pita 'ina gwae bewa sihesagoheya ta weyahina sinuwagala moisa, ma Pita ma'iyanao 'oidiya sihesilala, sigwae, “Tasimao 'alopuiya. Togidega nata 'apaihowa 'esa?”

<sup>38</sup> Coinega Pita 'igwaeya, “Cimi paihowa galana 'oidiyega wanuwabui, ma mabwaiyami To'abihetena Yesu saninega 'ada 'abihe babisogomi, ma wete 'imi puiyao 'inuwasamudi, ta wete Yaluyaluwa Tabuna 'i'ebwaegomi. <sup>39</sup> Weyahina Yehoba 'ina gwae hemisaina 'abehega 'omi weyahimi, ma natumiya wete weyahidi, ma taudi bwaga 'ana tomiyao weyahidi, taudi mabwaiyadi 'ida Badaina Yehoba 'ibwauwedi 'oina.”

<sup>40</sup> Ma Pita 'ina gwae ta 'ina loguguya baibaiwana wete 'oidiyega 'ihewaila, ta 'igwaeya, “Ciyagwao, mehau galadi wa'ebesinedi ma 'abihetena wa'ebese.”

<sup>41</sup> Coinega sabweloina 'oina Pita 'ina gwae sihesagoheya, ta sibabitaoso, ta 'adi baibaiwa gidemusa 'etoi tausani, <sup>42</sup> ta sitagwala moisa tohepwaledi 'idi he'itao 'oidiya ma sihe'iyaiyagu moisa, ma si'ai mahemahetena, ta wete si'ahwa'ahwanoi Yehoba 'oina.

#### *Tohekalesiyao mumugadi*

<sup>43</sup> Ta mabwaiyadi Yehoba sihe'asisiyeya, ma tohepwailao 'idi paihowao 'ebehenainaida ma hedehede baibaiwadi sipaihowediya. <sup>44</sup> Ma tohemisaowedi taudimo sihegogoned-ima, ta 'idi tobwatobwao sitagwalediya ma 'abehega tomota mabwaiyadi 'idi tobwatobwa. <sup>45</sup> Ta 'eguma 'idi 'ebeloina 'asai simiyamiya sihegimwaneyedi ta ginaulaedi 'adi maisega siheguyaiyedi taudi geya 'idi tobwatobwaomo 'oidiya.

<sup>46</sup> Coinega sabwelo 'aigeda 'aigeda 'oidiya ma'idi 'atetagwala sitapwatapwalolo Hada He'asisi 'oina, ma taudi 'idi hada ma'idi yaliyaya si'ai hegogona, <sup>47</sup> ma Yehoba sihehepwatuwe. Ta hesi tomota mabwaiyana tohemisaowedi si'ahwa bwebwe'anediya. Ma sabwelo 'aigeda 'aigeda 'oidiya Yehoba tupwana tomota wete 'i'abi'abihetedi, ta tohekalesiyao 'adi baibaiwa 'imadomadou.

### 3

#### *Topeu si'abihe bwebwe'aneya*

<sup>1</sup> Caigeda tuta lahilahiya, Pita Yoni ba'idana silagalaga Hada He'asisi 'oina sabi 'ahwanoi, weyahina beno 'ahwanoi 'ana tuta. <sup>2</sup> Ma Hada He'asisiina 'ana 'ahwa'eda sihesaniyeya Causalana deina topeu 'aigeda 'imiyamiya, tauna 'ina tuta li'u 'oinega ma'ina peu, 'oinega 'iyanao sabwelo 'aigeda 'aigeda 'oidiya si'ewe'eweyama 'ahwa'edaina 'oina ma 'ilo'ahwa'ahwanoi 'ina mane bo 'ina tobwatobwa weyahidi, Hada He'asisi 'ana toluhuwao 'oidiya. <sup>3</sup> Ta topeuina Pita ma Yoni 'i'itediya 'i'iuna ma siluhu, 'oinega lema weyahina 'i'ahwanoiya 'oidiya.

<sup>4</sup> Eeta Pita ma Yoni si'ebubuya, ta Pita 'igwaeya, “Cu'ebubumai.” <sup>5</sup> Coinega topeuina 'i'ebubudiya ma'ina hemisa 'abehega to'aha nata si'ebwae. <sup>6</sup> Ta Pita 'igwaeya, “Geya 'igu manemo, ma hesi helauina 'oiguwa 'imiyamiya ya'ebwaego, To'abihetena Yesu, tauna gwama Nasaleta, saninega yaloinego ma 'utoholo ma 'utauya.”

<sup>7</sup> Ma nima 'ebeulega 'i'abihe toholoya, ma 'aetubwenao sipa'ala, <sup>8</sup> ma 'iulataheya ma 'itoholowa, ma 'oinega 'itauya ta ba'idanao siluhuwa Hada He'asisi 'alona, ma loheyaina 'iulaula taheya ma 'ihehepwatu Yehoba 'oina.

<sup>9</sup> Coinega boda si'iteya topeuina 'itautauya ma'ina hepwtu Yehoba 'oina, <sup>10</sup> ta si'inaneya 'abehega topeuina mwalo Hada He'asisi 'ana 'ahwa'eda 'ausalana deina 'imiyamiya ma 'ilolo'ahwa'ahwanoi 'ana lema weyahina, 'oinega sisalutuwa ma sihenainaida madouna 'ina bwebwe'ana hila weyahina.

#### *Pita 'ina guguya*

<sup>11</sup> Tutaina loheyaina Pita ma Yoni 'i'abi'abi yahidi Hada He'asisi papena, tauna sihesaniyeya Solomoni 'ina biliupa, ta bodaedi ma'idi henainaida sipili hegogona 'oidiya.

<sup>12</sup> Ma Pita 'i'itediya, 'oinega boda 'ihewalediya, 'igwae, “Comi meIsileli, to'aha weyahina



nuwami 'ihenainaida ma wa'e'ebubumai? Geya 'abehega tauma 'ima waiwaiyega bo nuwana 'ima mumuga bwebwe'ana 'oinega, loheya bewa 'a'abihe bwebwe'aneya ta 'itautau, <sup>13</sup> ma hesi Yehoba 'ina waiwaiyega, tauna Ebalahamo ma Aisake ma Yakobo 'idi Yehoba, ta tubudao 'idi Yehoba. Yehobaina 'ina hewali Yesu sanina 'i'abihaneheya, tauna mwalo Pailato nuwanuwana ma 'ilihasi, ma 'omi wamwehihiyeya, ta wa'ahwa galagalaeya Pailato matana.

<sup>14</sup> “Moisa tuwa, Yesu tauna loheya dumwaluna ma bwebwe'ana, ma hesi walogwahateya, ta tomota 'adi tolohe'amasa 'aigeda nuwanuwami, ta weyahina Pailato 'oina wa'ahwanoiyeya. <sup>15</sup> Coinega yawasi bwebwe'ana 'ana to'ebwaya walohe'amasiya, ma Yehoba tauna 'amasega 'i'abihetoholo hileya, ta mabwaiyama 'a'iteya. <sup>16</sup> Coinega Yesu saninega loheya bewa 'ibwebwe'ana pwaiya. Loheya bewa wa'iteya ma wasanapuya, ma Yesu sanina 'ihemiseya, 'oinega matamiya 'ibwebwe'ana moisa ma 'ihewaiwaiya.

<sup>17</sup> “Tasigwao, yasanapugomiya 'abehega 'imi henuwa potepotega Yesuina walohe'amasiya, gidemusa 'imi babadao. <sup>18</sup> Ma hesi wada nuwahila 'abehega Yehoba 'ina palopitao 'oidiyega 'ihewaila nugeta beno To'abihetena 'ina muyao 'ilobadi, 'oinega gwaeina 'ana moisa 'ilatu pwaiya. <sup>19</sup> Coinega 'ilobwainegomiya wanuwabui ma 'imi puiyao 'i'ewayahuledi, ma lotohona bwebwe'ana waloba Bada tauna 'oinega, <sup>20</sup> ta wete To'abihetenaina tauna 'ihesinuwa nugeteya, 'ihewasae 'oimiya, beno Yesu. <sup>21</sup> Tauna 'itauya pwaiya galewa, ma 'imiyamiya 'ana siga ginaula mabwaiyadi 'i'abihe dumwaludi, gidemusa Yehoba 'ina palopitao mwalona sihepwaiyega. <sup>22</sup> Mwalo Mosese wete 'igwae hemisa, 'igwae,

'Cabwa 'ida Bada Yehoba 'oimiyega 'aigeda loheya 'i'abilagasi ma 'ihewaila weyahimi, gidemusa taugu 'i'abi lagasigauwa, ma 'ina hepwaile mabwaiyami nata wahe-sagohedi. <sup>23</sup> Ma 'eguma taiyawedi palopitaina 'ina gwae silogwahate Yehoba 'i'abihegaladi, ma 'i'ewa yahuledi 'ina tomotaedi 'oidiyega.’

<sup>24</sup> Ma palopita mabwaiyadi Samuwela 'oinega ma taudi simuliyeya 'oidiya, 'idi gwae hemisa 'oidiyega sihepwaila nugeta paihowaedi bewa tuwa weyahidi. <sup>25</sup> Ma 'omi palopitaowedi tubumiyao. Ma wete gwae hemisaina Yehoba tubudai Ebalahamo 'i'ebwaeya, 'igwae,

'Cowa 'ino susuwega 'abwa 'ebeloinao mabwaiyadi bale'uwa 'idi 'ebeyaliyaya.’

Coinega gwae hemisaina bewa 'omi wete weyahimi. <sup>26</sup> Ma Yehoba 'ina hewali Yesu 'i'abihe toholoya, ta 'omi meYudiya 'oimiya 'ihetune nugeteyama, ma 'ina helau 'oimiya beno 'abehega 'imi puiyao 'oidiyega wanuwabui, ma hali bodao muliyetega.”

## 4

### *Pita ma Yoni 'idi yatala*

<sup>1</sup> Ma 'abwa tuwa sigwaegwae boda 'oidiya, ma topwaoliyao ma Hada He'asisi 'ana tuilala madoudi, ma wete Sadusiyao sinaoma, <sup>2</sup> ma'idi gamwasowala weyahina Pita ma Yoni bodao sihe'itediya 'abehega Yesu 'amasega 'itoholo hila. <sup>3</sup> Coinega si'abiyahidiya ma deliya silagu luguhediya ma 'abehega gona 'i'adale ma 'idi yatala sida paihowa, weyahina 'iboi pwaiya. <sup>4</sup> Ta hesi 'idi loguguya bodaedi sihesagoha pwaidiya, ma tupwana baibaiwadi sihemisaediya, 'oinega tohemisaowedi mabwaiyadi loheloheya 'adi hasihasila gidemusa paibi tausani.

<sup>5</sup> Gona 'i'adaleya, ta 'idi toloinao ta 'idi babadao ma lina 'ana tohe'itao, <sup>6</sup> ma wete Anasa, tauna Topwaoli Madouna ma'ina susuwao ta ma'ina bodao, beno Kaiyapa ma Yoni ma Alekisana, taudi Yelusalema 'oina sideli 'autama.

<sup>7</sup> Coinega Pita ma Yoni gamwagamwanidiya sihetoholodiya, ma sihesilalediya, sigwae, “Cimi paihowa bewa taiya 'ina waiwaiyega, nuwana taiya saninega wapaihoweya?”

<sup>8</sup> Ma Pita Yaluyaluwa Tabuna 'ina waiwaiyega 'ihewaiyediya, 'igwae, “Cima toloinao ma babadao he, <sup>9</sup> nuwana 'ima yatala bewa lamuna weyahina tolopegoi 'a'abiheteya, ma 'abehega togidega 'a'abihe bwebwe'ana 'eseya? <sup>10</sup> Coinega nuwanuwama 'omi ma meIsileli mabwaiyami wada sanapu 'abehega loheya bewa matamiya 'itohotoholo 'ina

bwebwe'ana Yesu Keliso 'oinega, tauna gwama Nasaleta, kelose 'oina walohe'amasiya, ma Yehoba 'i'abihetoholo hileya. <sup>11</sup> Yesuina gide logidi, ma to'abi hada 'omi logidiina walogwahateya, ma hesi tuta bewa 'ihelogidi nugeta ma logidi mabwaiyadi 'iloinaedi. <sup>12</sup> Ta geya 'eta taiya wete sowasowahina ma 'ilemegita. Beno tuwa Yesu. Ma geya 'aigeda wete sani bale'uwa 'imiyamiya ma 'oinega lemaina taloba.”

<sup>13</sup> Ma toloinaowedi si'iteya Pita ma Yoni 'idi 'atepatu, ma sisanapuya 'abehega taudi tuwa tomiya 'asa, ma 'ebe se'ulu madouna 'oidiya geya siluhuluhu, 'oinega nuwadi sihepwanopwanowa ma sinuwatuhuya 'abehega mwalo Yesu ba'idadiu simiyamiya. <sup>14</sup> Ta wete topeuina 'ibwebwe'ana pwaiya si'iteya deidiya 'itohotoholo, 'oinega geya wete 'idi 'ebe gwaemo. <sup>15</sup> Ta sihewasaediya ma silatuwa ma 'abehega siboidimo hadai sida lolina, 'oinega Pita ma Yoni sihapwesa, ta toloinaowedi siloina, <sup>16</sup> ma sigwaeya, “Togidega tada lolina 'esa loheloheya 'eluwaedi weyahidi, weyahina Yelusalema 'ana tomiyanao mabwaiyadi sisanapudiya 'abehega 'ila'ilala madouna sipaihowa pwaiya, ma geya sowasowahida tauhale. <sup>17</sup> Benomo tada toho ma tetela bewa tada 'ausi, ma sahena 'ilelelelewana boda mabwaiyadi 'oidiya, 'oinega tada lolina pa'ala 'oidiya ma sahena wete Yesu sanina tomota 'oidiya sihehewasae.”

<sup>18</sup> Coinega sibwauwedima ma siluhu hila 'oidiya, ma siloinedi ma sahena wete Yesu sanina sigwaegwaene, bo sihehe'itae tomota 'oidiya.

<sup>19</sup> Ta Pita ma Yoni 'idi lolina sihemaiseya, sigwae, “Togidega 'ilobwaineya ma Yehoba matana tauna 'ina gwae 'amuliya, bo nuwana 'omi tuwa 'imi gwae 'ada muliya? Bewa weyahina wanuwanuwa. <sup>20</sup> Ma tauma hesi geya sowasowahima ma 'ima gwae 'alolagu ginauledi 'a'itediya ma 'ahesagohediya weyahidi.”

<sup>21</sup> Coinega siheliyediya ma muliyetega silihasidiya. Geya 'idi pui 'eta silobaloba ma weyahina maisa mwauna sida 'ebwaedi, ma hesi boda mabwaiyadi Yehoba sihepwatuweya. <sup>22</sup> Weyahina topeuina 'ana bolime poti ma tupwana, ma si'abihe bwebwe'ana pwaiya. Coinega toloinao boda simatautediya, ta geya 'eta to'aha sipaihowa Pita ma Yoni 'oidiya.

<sup>23</sup> Coinega Pita ma Yoni sihapwesa ma 'iyadiyao 'oidiya sitauya ma topwaoli madoudi ma babadao 'idi gwae sihepwaileidiya. <sup>24</sup> Ta 'iyadiyao sihesagoheya mabwaiyana, 'oinega Yehoba 'oina sigwae mahemahetena sigwaeya, “Cima Bada yo, 'owa galewa ta bale'u ta hola ta ginaula mabwaiyadi 'alodiya simiyamiya 'uhemasalahediya, <sup>25</sup> 'oinega 'ino hewali, tauna tubuma Debida, Yaluyaluwa Tabuna 'ina waiwai 'oinega 'ino gwae 'ihepwaila latuwa, 'igwaeya, 'To'aha lamuna 'ebeloina baibaiwadi silolo'alehe, ta wete sinuwatuhutu bwagabwaga?

<sup>26</sup> Coinega mebale'u 'idi kiniyao ma toloinao sideli 'autama ma si'atu'atububuwa sabi lo'aleha Yehoba ta 'ina Keliso 'oidiya.’

<sup>27</sup> “Moisa gogo bewa 'alona si'eto'autama ma Yesu si'aleha, tauna 'ino hewali dumwaluna ma hesihesinuwaina, taudi to'alehaowedi beno Helodi, ma Ponitio Pailato, ma meYudiya ma wete taudi geya meYudiya, <sup>28</sup> ma sipaihoweya to'aha gide 'owa 'ino nuwatuhu mwalo 'uloinaeya. <sup>29</sup> Bada yo, 'u'ita 'idi heliya tauma 'ino topaihowao 'oima, ma hesi 'uda 'abi hewaiwaiyemai ma ma'ima 'atepatu 'ino gwae 'ada hepwaile latuhe. <sup>30</sup> Ta wete 'ino waiwaiyega tolohalao 'uda 'abihe bwebwe'enedi, ma 'ila'ilalao ma hedehedede 'uda ghelatuhedi, 'ino hewali hesihesinuwaina, sanina Yesu 'oinega.”

<sup>31</sup> Cidi 'ahwanoi bewa silosalohiya, ma hadaina 'oina simiyamiya 'ilonihuwa, ma mabwaiyadi Yaluyaluwa Tabuna 'ina waiwai 'oinega si'atepatu, ma Yehoba 'ina gwae sigwae latuheya.

*Cidi tobwatobwa siheguyaiyediya 'aigeda 'aigeda 'oidiya*

<sup>32</sup> Bodaedi Yesu sihemisaeya, ta 'idi nuwatuhu mabwaiyana mahemahetena, ma geya sida 'enuwaha, ma hesi 'idi tobwatobwa mabwaiyadi sitagwalediya boda mabwaiyadi 'idi paihowa weyahidi. <sup>33</sup> Ta wete Bada Yesu 'ana tohepwailaowedi sihewaiwai hedada 'ina

toholo hila 'ana hepwailea weyahina, ma mabwaiyadi sihehelau hiledi mahemahetena.  
<sup>34</sup> Ma wete mabwaiyadi ma'adi, ma ma'adi 'wama, weyahina taudi towasawasao 'idi bale'u ma 'idi hadao sihegimwane pwaidiya, <sup>35</sup> ta 'adi maisao mabwaiyana si'ewedima ma si'ebwaediya Yesu 'ana tohepwailao 'oidiya, ma taudi siheguyaiya taiyewedi simiya mwau 'oidiya.

<sup>36</sup> Towasawasa 'aigeda 'oidiyega, sanina Yosepa, ma sanina hauhauna tohepwailaowedi si'ebwaeya Banaba, beno 'ana sanapu "To'abihe 'atepatu," tauna gwama Saipilosi, ma Libai 'ina susu 'aigeda, <sup>37</sup> ma tauna 'ina tanoha 'ihegimwaneyeya, ta maneina 'i'eweyama ta 'i'ebwaeya Yesu 'ana tohepwailao 'oidiya.

## 5

### *Ananaiyasi ma Sapaila*

<sup>1</sup> Loheya 'aigeda wete mamwanena 'idi tanoha sihegimwaneyeya, maneina si'eweyama. Loheyaina sanina Ananaiyasi ma mwanena Sapaila. <sup>2</sup> Siteluwaedi sitalamwa ma tupwana mane sidahweya, ta 'ana tupwamo Ananaiyasi 'i'eweyama tohepwailaowedi 'oidiya. <sup>3</sup> Pita 'ihegwaeya, 'igwae, "Ananaiyasi to'aha weyahina Seitani nuwau 'i'eweya ma tanoha 'ana maisa tupwana 'udahweya? Beno 'ino 'abo Yaluyaluwa Tabuna 'oina. <sup>4</sup> Mwalo geya 'uhegimwaneyeye, tanohaina 'owa 'ino 'ebeloina, ma wete tutaina 'uhegimwaneyeya, maneina 'owa 'ino 'ebeloina. Ma to'aha weyahina 'ateuwa 'unuwanuwatuhu ma maneina weyahina 'u'abowa? Cino 'abo bewa geya tomota 'oima, ma hesi Yehoba 'oina."

<sup>5</sup> Pita 'ina gwae bewa Ananaiyasi 'ihesoheya ma 'ibe'uwa ta 'i'amasana, 'oinega tomota mabwaiyadi tetelina sihesoheya ma si'ateyohowa madouna. <sup>6</sup> Ta tupwadi hewahewali sinaoma ma to'amasana 'ale'owega siwaduya ma si'ahala latuheya ma sigaliheya.

<sup>7</sup> Ma mwanena geya 'isanapu. Eema mulina 'iluhuwa hadai, <sup>8</sup> ma Pita 'ihesilaleya, 'igwae, "Sapaila, 'imi tanohaina wagimwaneyeya, hisa 'ana maisaina wa'eweya? Gide mwaneu 'ihegwaemaiya 'awa?"

Ma Sapailaina 'igwae, "Cehe, gidemusa."

<sup>9</sup> Coinega Pita 'igwae, "Togidega ma wateluwa watagwala ma watoho ta 'abehega Bada Yaluyaluwana wa'abowe? Cuhesohe, mwaneu 'ana togalihao siluhuluhuma ma 'i'iunamo si'ahala latuhego wete."

<sup>10</sup> Ma Sapailaina 'ibe'uwa mwayamwayauwa Pita 'aena, ma 'i'amasana wete. Ta hewahewaliyedi siluhuma, ma si'iteya 'i'amasana pwaiya, ta si'ahala latuheya ma sigaliheya, mwanena deina.

<sup>11</sup> Ta tohekalesiyao mabwaiyadi simatauta madouna, ma taiyawedi wasaina sihesoheya wete si'ateyohowa.

### *Hedehedede baibaiwana sipaihowediya*

<sup>12</sup> Ma wete boda gamwagamwanidiya Yesu 'ana tohepwailaowedi hedehedede ma ginaula 'ebehenainaida baibaiwadi sipaihowediya. Ma mabwaiyadi 'idi 'ebe deli'auta Hada He'asisi papena, tauna sibwauweya Solomoni 'ina biliupa.

<sup>13</sup> Ma boda baibaiwadi 'idi matautega geya siluhuluhi tohemisaowedi 'oidiya, ma tomota mabwaiyadi tohekalesiyao sihe'asisiyediya madouna, <sup>14</sup> ma baibaiwa hedada sihemisa, ma 'oinega silugu Bada 'ina bodao 'oidiya, meloheyadi ma wete mewahinedi.

<sup>15</sup> Ma wete tolohalao sitoedima ma'ebe'enoidi ma silagudiya Pita 'ina 'ebetayao 'oidiya, ma 'abehega Pita loguloguna 'ida 'abihe bwebwe'enedi. <sup>16</sup> Wete gogowedi Yelusalema deina 'adi tomiyao sideli 'autama, ma 'idi tolohalao ma taiyawedi welabana yaluyaluwadi nuwana hali yaluyaluwa galadi si'abihe lohaleidiya si'ewedima ta mabwaiyadi si'abihe bwebwe'enediya.

### *Yesu 'ana tohepwailao deliya silagudiya*

<sup>17</sup> Ma topwaoliyao 'idi bada madouna ma Sadusi 'idi boda ba'idanao sigamwasowala ma sihe'ipi'ipiyediya, <sup>18</sup> 'oinega sitoholo ma Yesu 'ana tohepwailaowedi si'abiyahidi, ma deliya silagudiya.

<sup>19</sup> Ma nihuwanega Bada 'ina anelose 'aigeda deli 'ana gudu 'iso'eya, ma 'itoe hapwesediya, <sup>20</sup> ma 'ihewaediya, 'igwae, “Watauya Hada He'asisi 'oina, ma nobwa watoholo ma tomota 'oidiya gwaeyedi yawasi bwebwe'ana weyahina waguguya.”

<sup>21</sup> Coinega aneloseina 'ina gwae sihesagoheya ma gona 'i'adaleya, ta Hada He'asisi 'oina siluhuwa, ma boda sihe'itediya. Coinega wete Topwaoli Madouna ma 'ina bodao si'eto 'autama, ma meIsileli 'idi babadao ma 'adi tolinao mabwaiyadi sibwauwedima ta 'idi hewaliyao tupwadi deliya sihwasaedi ma 'abehega Yesu 'ana tohepwailao si'ewedima ma sida yatala matadiya. <sup>22</sup> Ta sitauya ma deli hagalinao si'iteya, ma sihilama, <sup>23</sup> ma sigwae, “Deli guduguduina ma pa'alina 'a'iteya, ta 'ana tolomatayahinao 'ahwa'eda 'oidiya sitotoholo wete, ma tutaina 'ahwa'eda 'aso'eya 'alona gaugaulinamo.”

<sup>24</sup> Ma Hada He'asisi 'ana to'itayahi madouna, ma topwaoliyao madoudi wasa bewa sihesagoheya ma si'ateyohowa madouna, to'aha 'i'iunamo ma 'ilatu weyahina.

<sup>25</sup> Ma 'aigeda loheya 'oidiya 'inaoma ma 'ihewaediya, 'igwae, “Loheloheyaedi deliya walagulagudiya, Hada He'asisi 'alona sitotoholo, ma sihehe'ita tomota 'oidiya.”

<sup>26</sup> Ta Hada He'asisi 'ana to'itayahi ma 'ina topaihowao sihapwesa, ma tohepwailaowedi si'abiyahidiya ma hohobigega si'ewedima, weyahina simatauta boda 'oidiya, ta geya nuwadi ma boda sigamwasowala 'oidiya, tabu ta da'uleyega si'etutuwedidi.

<sup>27</sup> Coinega ma wahi bigega si'ewedima ma tolinaedi matadiya sihetoholodiya. Ma Topwaoli Madouna 'ihesilalediya, <sup>28</sup> 'igwae, “Mwalo 'oimiya 'aloina pa'ala 'abehega gesowana Yesu saninega wahehe'ita tomota 'oidiya, ma togidega ta 'oinega Yelusalema mabwaiyana 'alona Tomota wahehe'ita Yesu weyahina, 'abehega tauma 'ima loinega silohe'amasiya?”

<sup>29</sup> Ta Pita ma tohepwailaowedi sigwaeya, “Cilobwaineya ma Yehoba 'ina gwae 'ahe-matamatane, ma geya'abwa tomota 'idi gwae. <sup>30</sup> Moisa, 'omi Yesu 'aiwe 'oina watutu hepa'ineya ta 'ana siga 'i'amasa, ma tubudao 'idi Yehoba Yesu 'i'abihetoholo hileya, <sup>31</sup> ma 'i'abilagasiya tauna 'ina 'ebeulega 'abehega tauna To'abihetena ma Tohanugeta, ma wete tauna To'abihenuwabui meIsileli tauda weyahida, ma 'oinega 'ida puiyao 'inuwasamudi. <sup>32</sup> Coinega tauma ginaulaedi bewa weyahidi 'ahehpwaila, ma Yaluyaluwa Tabuna tohepwaila wete, tauna Yehoba 'i'ebwaeya 'ana tohematamatanao 'oidiya.”

### *Gameliyela 'ina gwae*

<sup>33</sup> Ta tolinao Yesu 'ana tohepwailao 'idi gwae bewa gidemusa sihesagoheya, ma sigamwasowala moisa, ma nuwanuwadi ma silohe'amasidi. <sup>34</sup> Ta 'aigeda 'oidiyega, sanina Gameliyela, tauna Palisi, ma loina 'ana tohe'ita, ta ma'ana he'asisi tomota baibaiwadi 'oidiya, 'itoholo ma 'iloina ma 'abehega Yesu 'ana tohepwailaowedi sitio hapwesedi tuta to'uto'upanamo weyahina. <sup>35</sup> Ta muliyetega tolinaowedi 'ihewaediya, 'igwae, “MeIsileli he, wa'itayahigomi ma sahena waloiloina pa'ala loheloheya nage weyahidi. <sup>36</sup> Wanuwatuhuyahi tuta mwalo Tudasi 'ihapwesa 'abehega tauna hali tohanugeta 'aigeda, ma loheloheya 'adi baibaiwa gide powa handeledi siluhu 'ina boda 'oina, ma hesi gabemani Tudasiina silohe'amasiya, ma 'ana tomuliyao sisawaleya, ta 'idi boda 'isawala.

<sup>37</sup> “Ma Tudasi muliyetega, tutaina tomota mabwaiyadi sihasilidiya 'oina, 'aigeda gwama Galili 'ihapwesa, sanina Yudasa, ta tupwadi loheloheya 'ilididima ma simuliyeya, ta 'aleha 'oina 'i'amasa, ta 'ana tomuliyao sisawaleya.

<sup>38</sup> “Tuta bewa yahegwagomi 'abehega sahena to'aha waloiloinae loheloheya nage weyahidi. Ceguma 'adi loina nuwana 'idi paihowa bewa tomota 'oidiyega 'ihapwesama, 'abwa siwe'a, <sup>39</sup> ma hesi 'eguma 'adi loina Yehoba 'oinega 'ilatuma, geya sowasowahina ma wa'abihe lolagudi, weyahina 'eguma gidemusa, Yehoba walolo'alehe.”

<sup>40</sup> Coinega Gameliyela 'ina lolina simuliyeya, ma tohepwailao wete sibwau hiledima 'oidiya, ma sisapidiya, ta sigwae, “Geya sowana wete Yesu sanina wagwaegwaene tomota 'oidiya.”

<sup>41</sup> Ma silihasidiya ma sihapwesa, ma sitauya taudi 'idi boda 'oidiya ma'idi yaliyaya, weyahina sowasowahidi ma muyaedi silobadi Yesu sanina weyahina. <sup>42</sup> Ma sabwelo 'aigeda 'aigeda 'oidiya sihehe'ita ma siguguya Hada He'asisi 'alona, ta wete tomota 'idi hadao 'oidiya, 'abehega Yesu tauna To'abihetenaina.

## 6

### *To'itayahinao site sebeni sihesinuwedi*

<sup>1</sup> Tuta nage 'oina Yesu 'ana tohemisao 'idi boda 'ihehemadou, ma 'oidiyega to'ena Gilisi 'idi boda to'ena Yudiya silolomugiyedi, weyahina sabwelo 'aigeda 'aigeda, 'eguma tutaina 'e'ahai siheheguyaiyedi hiwahiwape 'oidiya, taudi to'ena Gilisi 'idi hiwapeyao 'adi 'e'ahai geya sowasowahidi, 'oinega sigomagomale.

<sup>2</sup> Coinega Yesu 'ana tohepwailao site tuwelo 'idi boda tohemisao mabwaiyadi sibwau he'atudema, ma 'oidiya sigwaeya, “Geya sowasowahina Yehoba 'ina gwae 'ana guguya 'alolagu ma 'abehega 'e'ahai 'aheguyai. <sup>3</sup> Ma 'omi 'oimiyega loheloheya sebeni wahesinuwedi, taiyewedi ma'adi he'asisi, ma sanasanapudi, ma wete 'eguma Yaluyaluwa Tabuna 'ina waiwai 'oidiya, ma paihowa bewa 'e'ahai 'ana heguyai weyahina, 'ada 'ebwaedi. <sup>4</sup> Ma tauna 'ada hetapewa 'ahwanoi weyahina ta wete Yehoba 'ina gwae 'ana he'ita weyahina.”

<sup>5</sup> Ma boda siyaliyaya 'idi lolina bewa weyahina, 'oinega site sebeni sihesinuwediya, beno Sitibeni, tauna 'ina hemisa madouna Yesu 'oina, ma Yaluyaluwa Tabuna 'ina waiwai 'oina, ma Pilipi ma Pilokolo ma Nikano ma Timoti ma Pamena ma wete Nikola, tauna gwama Anitioki ma meYudiya 'idi tapwalolo 'oina 'iluhu pwaiya. <sup>6</sup> Coinega loheloheyaedi si'abi lagasidiya Yesu 'ana tohepwailao matadiya, ma si'abi debediya ma weyahidi si'ahwa 'ahwanoiya Yehoba 'oina, ma paihowaina sihegainea.

<sup>7</sup> Coinega Yehoba 'ina gwae 'ihewaiwai tomota 'oidiya, ma tomuliyao 'adi boda madou hedada tupwa Yelusalema 'oina, ma topwaoliyao tupwana baibaiwana wete gwaeina sihesagoheya, ta Yesu sihemisaeya.

### *Sitibeni si'abiyahiya*

<sup>8</sup> Sitibeniina ma'ina waiwai, ta ma'ina helau madouna, ma paihowa 'ebe henainaida ma 'ila'ilalao 'ipaihowediya tomota gamwagamwanidiya.

<sup>9</sup> Ta tupwana tomota sinaoma ma Sitibeni ba'idadiu sihe'ohe'ohe, taudi tupwadi meYudiya 'idi tapwalolo sihesaniyeya “Lihalihasina,” ma tupwadi Yudiyaedi 'asa Sailini 'oinega, ma tupwadi 'asa Alekisanidela 'oinega, ma tupwadi 'asa Silisiya ma Esiya 'oidiyega, <sup>10</sup> ma geya sowasowahina sihewaiwai, weyahina Sitibeni 'ina gwae 'ana sanapu Yaluyaluwa Tabuna 'oinega.

<sup>11</sup> Coinega taudi Sitibeni sitebaeya ma tupwana loheloheya sihegwaediya ma Sitibeni sida he'ewa, sigwae, “Sitibeniina 'ina gwae galana 'ahesagoheya, beno Mosese ma Yehoba 'i'ahwa galagalaediya.” <sup>12</sup> Ma wete loheloheya sihenuwa laguwediya ma Sitibeniina silo'aleheya, 'oinega boda baibaiwadi ma babadao ma wete lolina 'ana tohe'itao sinaoma ma si'abiyahiya, ta sitoeya toloinao 'idi delihegogona 'oina, <sup>13</sup> ta tohe'ewa 'abo'abowedi sibwauwedima, ma taudi sigwae, “Loheya bewa tuta baibaiwana 'oidiya Mosese 'ina lolinao ma Hada He'asisi bewa wete 'isinasinalidi, <sup>14</sup> ta wete 'ina gwae 'ahesagoheya 'igwae, 'Yesu tauna gwama Nasaleta 'abwa Hada He'asisi bewa 'ida ligehi yahule ma mumugada Mosese 'i'ebwaegita 'ida buidi, ma hagadi 'ilagudi.” <sup>15</sup> Ma todeli hegogonaedi mabwaiyadi Sitibeni manina si'e'ebubuya, 'ana 'ita anelose manina gide.

## 7

<sup>1</sup> Ma Topwaoli Madouna Sitibeni 'ihesilaleya, 'igwae, “Togidega 'idi he'ewa weyahiu, gwae moisa 'awa?”



<sup>2</sup> Ma Sitibeni 'igwae, “Tasigwao ma tamagwao, 'igu gwae bewa wahesagohe. Yehoba tomiya hane hedada mwahlohene tubudai Ebalahamo 'oina 'ilatuwa, tutaina Mesopotemi 'oina 'imiyamiya, ma 'abwa geya 'i'asa'asaliya Helana 'oina, <sup>3</sup> ma Yehobaina 'igwae, 'Ebalahamo, 'ino gogo ma 'ino susu bewa 'u'ebesinedi ma 'utauya hali tupwa, tupwaina yahe'itago 'oina.’

<sup>4</sup> “Ta tupwa Kalidiya 'ihasineya ma 'ilo'asa Helana 'oina. Ma Ebalahamo tamana 'ina 'amasa mulina Yehoba 'ihanugeteya ma 'ebwa 'i'asa, 'ida gogo bewa 'oina, <sup>5</sup> ma geya 'eta wete bale'u 'i'ebwae Ebalahamo 'ina 'ebeloina, ma hesi Yehoba 'igwae hemisa tuwa ma 'abehega tupwaina bewa tauna Ebalahamo ma'ina susuwao 'idi bale'u si'ewa, ma tuta nage 'oina Ebalahamo geya natunamo.

<sup>6</sup> “Ma wete Yehoba 'ihewaila nugeteya 'abehega Ebalahamo tubunao sihetamana hali boda 'idi tupwa 'oina, ma toni'asaedi paihowa mwauna nata si'ebwae Ebalahamo tubunao 'oidiya, ta 'idi miya 'igala bolime powa handeledi 'oidiya. <sup>7</sup> Ma hesi Yehoba 'igwaeya, 'Cabwa toni'asaowedi loina mwaudi ya'ebwaedi, ma muliyetega tupwa nage 'oinaga 'igu bodao silatu ma si'etuluha 'oiguwa tupwa bewa 'oina.’

<sup>8</sup> “Ma Yehoba 'ina gwaeina 'ana 'ila'ilala 'i'ebwaeya Ebalahamo 'wapina 'ana 'upwa. Coinega Ebalahamo Aisake 'ihenatuneya, ta 'ina sabwelo nima ma hetoina 'oina 'wapina matana 'i'upweya, ma muliyetega Aisake Yakobo 'ihenatuneya, ma muliyetega Yakobo natunao loheloheyadi tuwelo 'ihenatunediya, ma site tuwelowedi tauda tubudao.

<sup>9</sup> “Ta 'aigeda 'oidiyega sanina Yosepa, ma tasinao site lebeni sihe'ipi'ipiyeya ma sihegimwaneyeya tomota tupwadi 'oidiya, ma taudi Yosepaina sitauyeya 'asa Itipita 'oina, <sup>10</sup> ma Yehoba ba'idana ta 'ilemeya 'ana mwauiyao 'oidiyega, ta wete sonoga bwebwe'ana 'i'ebwaeya, ma meItipita 'idi kini Pelo sonogaina 'i'ita lobeya, 'oinaga Pelo Yosepa 'ihemiya haneheya, ma loina 'i'ebwaeya tupwa Itipita mabwaiyana weyahina, ta wete kiniina tauna 'ina hada weyahina.

<sup>11</sup> “Ma muliyetega gomale madouna 'ilatuwa Itipita mabwaiyana ma 'asa Kenani 'oidiya, ma miya mwauna moisa 'ihapwesa, ma tubudaowedi geya 'adimo. <sup>12</sup> Ta Yakobo tetela 'ihesagoheya 'abehega 'e'ahai Itipita 'oina 'imiyamiya, ma natunao loheloheyadi 'ihesumanediya Itipita 'oina, 'e'ahai weyahina. <sup>13</sup> Ma muliyetega wete sihila Itipita 'oina, ma Yosepa tasinao 'oidiya 'igwae latuwa, 'igwae, ‘Taugu tasimiu Yosepa,’ ma Pelo wete 'oina 'ihewailediya, 'igwae, 'Tasigwao bewa.’

<sup>14</sup> “Ma Yosepa tamana Yakobo ma 'ina susuwao 'ibwauwedima, 'adi baibaiwa sebeniti paibi, ma Itipita 'oina sinaoma. <sup>15</sup> Ma nobwa Yakoboina 'i'amasa, ma wete tubudaowedi si'amasa, <sup>16</sup> ta wawanidi si'ewa hiledima gogo Sekemi 'oina, ma sigalihediya, galihaina mwalo Ebalahamo 'ihemaiseya meSekemi, taudi Hemoli natunao, 'oidiyega, beno galihaina 'ana maisa siliba 'i'ebwaediya.

<sup>17</sup> “Ma Yosepa 'ina 'amasa mulina Yehoba 'ina gwae hemisa Ebalahamo 'oina 'ihahoho pwaiya, ma meIsileli Itipita 'alona siyada hedada pwaiya, <sup>18</sup> eema kini hauhauna 'ihegaina ma 'iloina pa'aledi, kiniina Yosepa geya 'isanapu, <sup>19</sup> ma 'i'abowediya, weyahina tubudaowedi 'iloinaedi ma natudiyao 'i'iudi siuledi 'atamana ma si'amasa. <sup>20</sup> Ta gwama Mosese 'ili'uwa tuta nage 'alona, tauna 'ana 'ita bwebwe'ana, ma tamana ma sinana 'idi hada si'itayahi dahweya wai'ena 'etoi. <sup>21</sup> Ma muliyetega 'idi hadega silagu latuheya, ta Pelo natuna mewahinena 'ilobeya, ta 'itoeya 'ina hada ma 'abehega tauna natuna, ma 'i'itayahiya.

<sup>22</sup> “Ta Mosese meItipita 'idi sanapu mabwaiyana sihe'iteya, ma 'isanapudiya, ta 'ina gwae'ya ta 'ina paihowao 'oidiya 'ihewaiwai hedada.

<sup>23</sup> “Ma tutaina 'ana bolime poti 'ilobeya, Moseseina nuwanuwana ma tasinao meIsileli 'ihabo'enedi. <sup>24</sup> Coinega 'ina habo'enaina 'alona gwama Itipita 'aigeda 'ilobeya gwama Isileli 'ihunu bwagebwageya, 'oinaga Mosese tasinao 'ilemeya ma gwama Itipitaina 'ilohe'amasiya. <sup>25</sup> Ta Mosese 'inuwatuhuya 'abehega tasinaowedi sida sanapu 'abehega tauna nimanega Yehoba 'ida 'abihetedi, ma hesi geya sisanapu.

<sup>26</sup> “Ma hali sabwelo ta Mosese tasinao 'eluwa 'ilobediya sihehe'upwa, ma nuwanuwana ma 'i'eto'ausidi ma silolagu ma 'igwae, 'Ciyagwao, 'omi susu 'aigeda, ma togidega ma 'imi miya wagihegala?”

<sup>27</sup> “Ma tohe'upwaowedi 'aigeda 'oidiyega Mosese 'ina gwae 'ihemaiseya, ma 'igwae, 'Taiya 'owa 'utoho ma 'uhetoloina 'oima? <sup>28</sup> Togidega? Nuwanuwau ma 'ulohe'amasigau gidemusa boi gwama Itipitaina 'ulohe'amasiya?”

<sup>29</sup> “Gwae bewa Mosese 'ihesagoheya ma 'i'ateyohowa ta 'idena, ma 'ihetaumana tupwa Midiyani 'oina, ma nobwa 'ihaiya ma natunao loheloheyadi 'eluwa 'ihenatunediya. <sup>30</sup> Bolime poti mulina Mosese yoho 'awawa, 'oya Sainai deina, 'iyawayawala, ma anelose 'ilatuwa 'aiwe 'ala'alata ma ninininiminega, 'aiwe manabaina 'alonga. <sup>31</sup> Ta Mosese 'i'iteya, 'oinega nuwana 'ihewpanopwanowa, ma 'inaonao deina sabi 'ita, ma Yehoba 'igwaeya, <sup>32</sup> 'Taugu tubumwao, taudi Ebalahamo ma Aisake ma Yakobo, 'idi Yehoba.’

“Ma Mosese 'ina matautega 'idededela, ma genuwana 'i'ebubuna.

<sup>33</sup> “Ta Badaina 'igwaeya, 'Caheu 'ana butu 'uhalolo, weyahina tupwa beno 'oina 'utotoholo beno bale'u hehe'asisina, ta 'igu gwae 'uhesagohe. <sup>34</sup> Cigu tomotaiyao Itipita 'alona 'idi miya galana yasanapuya, ta 'idi 'ahwanoi 'atemuyamuya yahesagoha pwaiya, 'abehega yasuluma sabi lemedi. Ta 'owa 'utoholo ma yahewasego Itipita 'oina, paihowa bewa weyahina.’

<sup>35</sup> “Moisa, Moseseina mwalo silogwahateya, sigwaeya, 'Cowa hene taiya ma 'utoho ma 'uhetoloina 'oima?” Ma hesi tauna Yehoba 'ihesinuweya ma 'abehega 'iloinedi, ma wete 'ilemedi, anelose 'ina lemega, tutaina 'aiwe 'ala'alata 'oina 'ilatuwa 'oina.

<sup>36</sup> “Coinega Mosese 'ila'ilala waiwai ma paihowa 'ebe henainaida 'ipaihowediya, Itipita 'oina ma wete hola bwehabwehalina ma tupwaina yoho 'awawa 'oidiya, tutaina Itipitega 'i'ewa latuhedima ma 'ihenugetediya tupwaina yoho 'awawa bolime poti 'oidiya.

<sup>37</sup> “Bewa Moseseina meIsileli 'ihewgaediya 'igwae, 'Yehoba 'abwa tasimiyao 'oidiyega 'aigeda palopita 'ihesinuwe weyahimi, gide mwalo 'ihesinuwegauwa.’

<sup>38</sup> “Ma wete Moseseina yoho 'awawa tubudao mabwaiyadi ba'idanao 'oya Sainai 'oina simiyamiya, ma anelose Mosese loina bwebwe'ana yawasida weyahina 'i'ebwaeya.

<sup>39</sup> “Ma tubudaowedi Mosese sihe'idi'idiyeya ta 'ina loina silogwahateya, ma nuwanuwadi ma sihila Itipita 'oina, <sup>40</sup> ma tasina Eloni sihegwae, sigwae, 'Cida 'ebe 'etuluha 'upaihowadi ma sihanugetegita, weyahina Mosese tauna mwalo Itipitega 'ihanugetegitama, geya tasanapu ta'eha nana 'itauya?” <sup>41</sup> Coinega 'idi 'ebe 'etuluha tala bulumakau si'abiya, ma 'oina sipwaopwaoli, ma weyahina siyaliyaya madouna.

<sup>42</sup> “Coinega Yehoba 'ilogwahatediya ta 'abehega siboi 'idi nuwatuhu sida paihowa, beno 'wadima 'oidiya sida 'etuluha, gidemusa palopitao 'idi buki 'alona Yehoba 'ina gwae 'imiyamiya, 'igwaeya,

'Comi meIsileli bolime poti tupwaina yoho 'awawa

wamiyamiya, hebahebaiyao wahunudi ma geya 'oiguwa wada pwaolidiya. <sup>43</sup> Ma hesi hali 'ebe 'etulahaina sanina Moloke 'oina wapwaopwaoliyedi ma Molokeina 'ina hada wa'aha'ahali ba'idamiu, ma wete Lipani 'ina 'wadimaina 'oina watulutuluha, ma wete ginaulaedi wa'abidiya matadiya wa'ahwa'ahwanoi, 'oinega yada pa'igomi ma watauya hali 'asa Babiloni papalina.’ ”

<sup>44</sup> Sitibeni wete 'igwaeya, “Tubudaowedi Yehoba 'ina hada si'abiya 'ana 'ita gidemusa Yehoba Mosese 'ihewgaeya ma 'ida 'abi'ese. Coinega si'abiya, ma mwalo tutaina yoho 'awawa sitautauya, Yehoba 'ina hadaina wete si'aha'ahala dadane.

<sup>45</sup> “Loheloheyaedi si'amasa ma mehau hadaina si'eweyama, taudi tubudao Yosua ba'idanao. Mwalo hali bodao tupwa bewa 'ebwa simiyamiya, ma hesi Yehoba Yosua ba'idanao 'ilemedi ma sihewaiwaiya bodaedi sipa'idiya, sidena, ta Yosua ba'idanao bale'u bewa si'eweya, ta 'ebwa hadaina 'imiyamiya ma 'ana siga Debida 'ihetoloina.

<sup>46</sup> Ma Debida weyahina Yehoba 'iyaliyaya, tauna tubudai Yakobo 'ina Yehoba, ma Debida Yehoba 'oina 'i'ahwa'ahwanoi ma 'eguma sowasowahina 'abehega Yehoba 'ina

hada hauhauna 'ida 'abi. <sup>47</sup> Ma hesi Debida natuna Solomoni hadaina 'i'abiya. <sup>48</sup> Ma hesi wanuwatuhu 'abehega Yehoba tauna tomiya tabwana hedada geya'abwa hada tomota nimadiyega si'abi'abi 'oina 'imiyamiya, weyahina palopita 'aigeda Yehoba 'ina gwae mwalo 'ihewaila pwaiyeya, 'igwae,

<sup>49</sup> 'Galewa 'igu wagahata wasawasa, ma bale'u 'ahegu 'adi 'ebelagu. Coinega to hada sowasowahimi ma weyahigu wada 'abi, ma hadaina 'oina ya'aiyawasi? <sup>50</sup> Weyahina ginaulaedi bewa mabwaiyadi taugu yapaihowediya.' ”

<sup>51</sup> Ma Sitibeni 'ihewgaediya wete 'igwae, “Moisa, 'omi tonuwa potapota, 'oinega Yehoba 'ina 'ila'ilala 'upwa 'wapimimo 'oina, ma geya 'atemiyege ma wete geya tenamiya, 'oinega tuta baibaiwana Yaluyaluwa Tabuna 'ina lina walologwahate, gide-musa tubumiyao silogwahateya. <sup>52</sup> Ma wete, tubumiyao palopita mabwaiyadi simumuga galagalaediya ma silohe'amasidiya, palopitaowedi taudi Todumwalu 'ina latuma sihepwaila nugeteya, 'oinega 'omi wete Todumwaluina watebaeya ma walohe'amasiya. <sup>53</sup> Ta 'omi mwalo aneloseyao Yehoba 'ina lina si'ebwaegomiya, ma hesi geya wada muliyeya.”

#### *Sitibeni silohe'amasiya*

<sup>54</sup> Sitibeni 'ina gwae bewa toloinao sihesagoheya ta sigamwasowala madouna, ma sihesala'i'ita 'idi gamwasowala weyahina. <sup>55</sup> Ma hesi Yaluyaluwa Tabuna Sitibeni 'ilo-hemaheya, ma galewa 'i'e'ebubuya ta 'i'iteya Yehoba ma'ina wasawasa maemaedanina, ma Yesu 'ina 'ebeulega 'itotoholo, <sup>56</sup> ma 'igwaeya, “Wa'ita, galewa 'i'eso'eya, ta ya'iteya Loheyaina Yehoba 'ina 'ebeulega 'itotoholo.”

<sup>57</sup> Ma Sitibeni 'ana 'alehao siwuiwui 'enadi madounega, ma tenadi si'ausidiya ta 'abehega Sitibeni 'ina gwae sahena sihehesagohe, ma mabwaiyadi sipiliya, ta si'abiyahiya, <sup>58</sup> ma 'asega siula latuheya, ma da'uleyega si'ahuhe 'amasiya. Ma Sitibeni 'ana tohe'ewa 'abo'abowao 'adi 'ale'owao silolodiya ta 'abehega da'uleyega Sitibeni sida hunu. Ma 'adi 'ale'owedi hewali sanina Saulo 'i'itayahidiya. <sup>59</sup> Eema Sitibeni siloloda'uleyeya, ma hesi 'ibwau haneya 'igwae, “Bada Yesu, yaluyaluwagu 'u'eweyawa.” <sup>60</sup> Ta 'i'ahetulasa, 'ibwau 'enana madounega, 'igwaeya, “Bada yo, 'idi mumuga galana bewa geya'abwa 'uhehemaise 'oidiya.”

Cina gwaeina 'igumwala, ta yawasina 'igumwala.

## 8

<sup>1</sup> Ma Saulo bodaedi 'i'ahwa bwebwe'enediya, Sitibeni 'ana lohe'amasa weyahina.

#### *Saulo tohekalesiyao 'ilo'alehediya*

Sabwelo nage 'oina tohekalesiyao tupwa Yelusalema 'oina 'adi 'alehaowedi sihegaina ma silo'alehedi, 'oinega sisawala Yudiya ma Sameliya tupwaedi 'oidiya, ma Yesu 'ana tohepwailao site tuwelomo Yelusalema 'oina simiyamiya.

<sup>2</sup> Ma tupwana tomota, taudi Yehoba 'ana tohe'asisiyao, Sitibeniina sigaliheya ma'idi dou madouna. <sup>3</sup> Ma Saulo hesi tohekalesiyao 'imutumutudi ta weyahidi 'iluhuluha hada 'aigeda 'aigeda 'oidiya, ma 'eguma tohekalesiyao loheloheya ma wete wahiwahine 'ilobalobadi, tuwa 'i'abiyahidi, ma deliya 'ilagu luhuwedi.

#### *Pilipi 'ina guguya tupwa Sameliya 'oina*

<sup>4</sup> Ma tohekalesiyao sisawala, ma 'eguma to tupwa 'oina sitautauya, tetela bwebwe'ana siloguguyaeya tomota 'oidiya. <sup>5</sup> Coinega Pilipi 'isulu 'aigeda Sameliya 'asaina 'oina, ma nobwa To'abihetenaina tetelina 'iguguyaeya 'oidiya, <sup>6</sup> ta mabwaiyadi Pilipi 'ina gwae sihesagoheya, ma 'ina paihowa waiwaiidi si'iteya. <sup>7</sup> Ceguma taiyawedi silohala hi'ahi'a\* 'oidiyega 'iula latuhedi, ma hi'ahi'aedi siwuiwui ma sihapwesa, ma wete topeuyao ma tohasagesageula 'i'abihe bwebwe'enediya. Coinega bodaedi sitagwatagwala mahemahetena Pilipi 'ina loguguya 'oina, <sup>8</sup> ma 'oinega 'ebe yaliyaya madouna gogoina 'oina.

<sup>9</sup> Ma toni'asa 'aigeda, sanina Saimoni, tauna Pilipi 'ina gwae 'ihemiseya. Saimoniina tauna mwalo 'i'oba'oba madouna gogoina 'oina, <sup>10</sup> ma meSameliya mabwaiyadi

sihainainaida Saimoni 'ina paihowa waiwai weyahidi, eema tauna sanina madouna. Coinega tomota mabwaiyadi, nuwana babadao, nuwana bubutumao, Saimoniina si-hemisaeya ma sigwaegwae, “Tauna Saimoniina 'ina waiwai Yehoba 'oinega madou hedadena.”

<sup>11</sup> Coinega Saimoni 'ina gwaeyao sihesagohediya, weyahina 'ina 'obega 'i'abihenuwa pwanopwanowediya tuta mabwaiyana.

<sup>12</sup> Ma muliyetega Pilipi 'ihapwesama ma tetela bwebwe'ana, To'abihetena Yesu sanina ma Yehoba 'ina loina weyahidi 'iloguguya, ma sihemisaeya, ma sibabitaosowa, loheloheya ma wete waiwahine. <sup>13</sup> Ma Saimoni wete Yehoba 'ihemiseya, ta 'ina babitaoso mulina Saimoni Pilipi 'i'wayabuya ma Saimoniina 'i'iteya Pilipi 'ina 'ila'ilalao ma 'ina paihowa waiwai, ta 'oinega 'ihainainaida moisa.

<sup>14</sup> Eeta Yesu 'ana tohepwailao taudi Yelusalema 'oina simiyamiya, tetela sihesagoheya 'abehega meSameliya sitagwala pwaiya Yehoba 'ina gwae 'oina, 'oinega Pita ma Yoni sihwesedima, <sup>15</sup> ta siteluwaedi sisuluwa Sameliya 'oina, ma tohemisao hauhaudi weyahidi si'ahwa'ahwanoi ma 'abehega Yaluyaluwa Tabuna 'iluhu 'oidiya. <sup>16</sup> Weyahina 'abwa geya 'iluhu 'oidiya. Beno tuwa Bada Yesu saninega sibabitaosowa, <sup>17</sup> 'oinega Pita ma Yoni nimadi silagudiya 'oidiya ta Yaluyaluwa Tabuna 'oidiya 'iluhuwa. <sup>18</sup> Ta Saimoni paihowa bewa 'i'iteya 'abehega Yesu 'ana tohepwailao nimadi silagudiya tomota 'oidiya, ma Yaluyaluwa Tabuna 'oidiya 'iluhuwa, 'oinega mane 'i'eweya ma 'abehega Pita ma Yoni 'i'ebwaedi, <sup>19</sup> ta 'igwaeya, “Cimi waiwai beno nuwanuwagu wa'ebwaegau, ma 'oinega 'eguma nimagu yalagu taiyawedi 'oidiya, Yaluyaluwa Tabuna 'iluhu 'oidiya.”

<sup>20</sup> Ma Pita Saimoni 'iheliyeya 'igwae, “Cino mane ba'idau wahesilae hataya, weyahina 'abehega Yehoba 'ina 'ehela 'ino maneyega 'ugimwane. <sup>21</sup> Cowa geya 'ima boda, ma hesi 'ateu 'imumuga galagala Yehoba matana. <sup>22</sup> Coinega 'ilobwainegowa ma 'ino pui bewa 'oinega 'unuwabui, ma 'u'ahwa'ahwanoi Yehoba 'oina, ma nuwana 'ino nuwatuhu galadi bewa 'inuwasamudi. <sup>23</sup> Weyahina yasanapugowa 'ateu bi'ibi'ina, he'ipi'ipi ma mumugau galadi 'oidiyega.”

<sup>24</sup> Ma Saimoni 'igwaeya, “Wa'ahwanoi Bada 'oina ma ginaulaedi galadi wahepwailediya, sahena 'oiguwa sinaonaoma.”

<sup>25</sup> Coinega Pita ma Yoni 'idi Bada weyahina sihepwaila latuwa, ma 'ina gwae siguguyaeya, ma muliyetega sihila Yelusalema 'oina, ta 'idi tauya 'alona tetela bwebwe'ana sihepwailaya Sameliya 'asanao 'aigeda 'aigeda 'oidiya.

#### *Pilipi gwama Idiopiya 'aigeda 'i'abi hebabitaosoya*

<sup>26</sup> Ma Yehoba 'ina anelose Pilipi 'ihewgaeya, “Cutoholo ma 'asudibwalala 'edaina Yelusalemega ma 'asa Gasa 'oina 'utauya.” Cedaina tupwa yoho 'awawa 'alona 'itautau. <sup>27</sup> Coinega Pilipi 'itoholowa ma 'itauya, ma gwama Idiopiya 'ina waga lisilisi 'oinega 'itautauya 'ilobeya, tauna 'awana bo'i si'ewa yahuleya, ma sanina madouna, ta 'idi kuini Kanidesi weyahina 'ipaipaihowa, beno 'ina wasawasa mabwaiyana 'i'ita'itayahidi, ma tauna 'itauya pwaima Yelusalema sabi tapwalolo, <sup>28</sup> ta 'ina waga lisilisi 'ihilahila 'ina 'asai, waga lisilisiina 'oina 'igeluwa ma Buki He'asisi 'ihasihasila, palopita Aiseya 'ina lele 'ihasihasili.

<sup>29</sup> Ma Yaluyaluwa Tabuna Pilipi 'ihewgaeya, “Culomwayamwayau ma 'utauya waga lisilisi 'oina.” <sup>30</sup> Coinega Pilipi 'ipiliya, ma loheyaina 'enana 'ihewgaeya palopita Aiseya 'ina lele 'ihasihasili. Ta Pilipi 'igwaeya, “Togidega, gwaeyedi 'uhasihasili 'usanapudiya?”

<sup>31</sup> Ta loheyaina 'igwaeya, “Geya. Weyahina geya wete 'igu tohe'itamo.” Coinega loheyaina Pilipi 'ibwauweyama wagai, ma Pilipi 'igeluwa ta deina 'imiyatoiya, ta Buki He'asisiina 'ihasihasili, <sup>32</sup> ta hasiliina 'ihasila pwaiya bewa gide 'ina gwae, “Tauna gide sipi nata sihunu, nuwana gidemusa lami, hunuhunuwana 'ana to'upwa matana 'itotoholo, geya 'aigeda wete 'enana 'igwae latu. <sup>33</sup> Ma wete 'ina yatala 'oina si'aboweya, ma 'idebamwadina. Coinega natunao tetelidi geya 'aigeda taiya 'ihewaila latu weyahina yawasina bale'uwa 'igumwagumwala.”

<sup>34</sup> Ta gwama Idiopiyaina Pilipi 'ihewaeya, “Taiya weyahina palopita bewa 'igwaega-waeya? Tauna weyahina bo hali loheya weyahina?”

<sup>35</sup> Coinega Pilipi 'igwaeya, “Yesu weyahina,” ma 'ihewaina hasilaina 'ana lihasa weyahina ta Yesu tetelina 'ihe'itaeya.

<sup>36</sup> Ta 'edaina sitautau ta we'aha si'ita lobeya, ma loheyaina 'igwaeya, “Nage we'aha! Togidega, sowasowahina ma 'u'abihe babisogau, 'awa?” <sup>37</sup> (-)

<sup>38</sup> Coinega 'ina topaihowao 'iloinaediya ma waga lisilisi si'abi henonoya, ma siteluwa Pilipi mahetena sisuluwa ta sigayo suluwa we'aha, ma Pilipi loheyaina 'i'abihe babisogau. <sup>39</sup> Ma we'ahaga sigayohanema ta Yehoba Yaluyaluwana Pilipi 'itoeya, ma loheyaina geya Pilipi 'i'ita'ita hila, ta ma'ina yaliyaya 'itauya 'ina 'asa.

<sup>40</sup> Ma Pilipi hesi silobeya tupwa Asota 'oina, ma 'oinaga 'itautau, ma tetela bwebwe'ana 'iloguguyaeya 'asa 'aigeda 'aigeda 'oidiya, ma 'ana siga 'ilatu Sisaliya.

## 9

### *Saulo 'inuwabui*

<sup>1</sup> Ma Saulo 'abwa tuwa Bada Yesu 'ana tomuliyao 'oidiya 'ilolo'alehedi, nuwanuwana 'ilohe'amasidi. Coinega 'itauya Topwaoli Madouna 'oina, <sup>2</sup> nuwanuwana 'ina letao 'ileledi ma 'itauyedi meYudiya 'idi 'eto'autaina Damasiko 'oina, ma letaedi 'oidiyega 'abehega 'eguma Yesu 'ina 'eda 'ana tomuliyao 'ilobadi loheloheya ma wahiwahine, 'i'abiyahidi ma 'i'ewedima Yelusalema, sabi heyatalaedi. Eema letaedi 'i'ewediya ma 'itauya. <sup>3</sup> Citautauya ta Damasiko 'oina 'i'iunamo 'ilatu, ma maedana galewega 'i'asilalama, <sup>4</sup> ta 'ibe'uwa bale'uwa, ma 'aigeda 'enana 'ihewagaeya 'igwaega, “Saulo, Saulo, to'aha weyahina 'ulolo'alehedi?”

<sup>5</sup> Ma Saulo 'igwaeya, “Bada taiya hede 'owa?” Ma 'enanaina 'igwaeya, “Taugu Yesu 'ulolo'alehedi. <sup>6</sup> Ma hesi 'utoholo ma 'uluwu 'asai ma nobwa 'a hemataluwa 'uhewaga ma 'abehega 'upaihowa.”

<sup>7</sup> Ma tomatiyedi Saulo ba'idanao sitautauya nuwadi 'ihewapwanowanowa ta sitoholo henonowa, ma 'enanamo sihesagaeya, ma geya 'aigeda wete taiya si'ita.

<sup>8</sup> Coinega Saulo bale'uwega 'itoholo hilama ta nuwanuwana ma matana 'iyahali, ma hesiyage geya sowasowahina to'aha 'i'ita, weyahina matana sihogahoga, ma hesi Saulo si'abinimeya ma siluhweya Damasiko 'oina. <sup>9</sup> Ta nobwa sabwelo 'etoi geya to'aha 'ida 'iteya, ma geya 'ida 'aiya ma wete geya 'ida numa.

<sup>10</sup> Ma Damasiko 'oina, Yesu 'ana tomuliyao 'aigeda 'imiyamiya, sanina Ananaiyasi, ta 'ina 'enomata'ite'itega Yehoba 'ihewaeya, 'igwaega, “Ananaiyasi.” Ma Ananaiyasiina 'igwaeya, “Taugu Bada.”

<sup>11</sup> Coinega Yehoba 'igwaeya, “Cutoholo, ma 'asa gamwagamwanega 'utauya 'eda sanina Dumwaluna 'oinaga, ma Yudasa 'ina hada loheya 'aigeda 'uhesilala, tauna gwama Tasisi sanina Saulo, ma sauga bewa 'i'ahwa'ahwanoi, <sup>12</sup> ma 'aigeda loheya sanina Ananaiyasi 'i'iteya 'itautauyama sabi 'abitohoina ma 'oinaga matana si'asilala hila.”

<sup>13</sup> Ma Ananaiyasiina 'igwaeya, “Bada, loheyaina tetelina tomota baibaiwadi sihegwaega 'abehega loheya galana, ta 'ino tohemisao Yelusalema 'oina 'ilolo'aleha hedadadi, <sup>14</sup> ma wete topwaoli madoudi sitagwaleya ma sauga bewa 'itauyama ma 'a bodao mabwaiyama sabi paimai, 'eguma saniuwega 'a'ahwa'ahwanoiwa.”

<sup>15</sup> Ma Badaina 'ihewaeya, “Tuwa, ma 'utauya 'oina. Weyahina Sauloina yahesinuwa pwaiya ma teteligu 'ihewaiwe tomiya ganamuli 'oidiya, ma toloinao madoudi matadiya ma melsileli wete 'oidiya. <sup>16</sup> Ma 'abwa taugu yahe'itae muyao madoudi nata 'ilobadi 'agu hepwaile weyahina.”

<sup>17</sup> Coinega Ananaiyasi 'itoholowa ma 'itauya Yudasa 'ina hada, 'iluhewa ta Saulo 'i'abidebeya, ma 'igwaeya, “Tasigu Saulo, Badaina Yesu 'edai 'ilatuwa 'oiuwa, tauna bewa 'ihewesagaewa matau 'ana 'abihe'asilala weyahina, ma wete 'abehega Yaluyaluwa Tabuna 'oinaga 'ilohemahego.” <sup>18</sup> Coinega Saulo matanega gide 'wenahi sibe'uwa



mwayamwayauwa ta 'i'ebubuna hila. Ma 'itoholoma, 'ibabitaisowa, <sup>19</sup> ma wete 'e'ahai 'i'eweya ta 'ilohepa'ala.

#### *Saulo 'iguguya Damasiko 'oina*

Ma tupwana sabwelo 'oidiya Saulo Yesu 'ana tomuliyao ba'idanao simiyamiya Damasiko 'oina. <sup>20</sup> Ma meYudiya 'idi hada tapwalolo 'oidiya Sauloina 'ihegaina 'i-loguguya 'abehega Yesu tauna Yehoba natuna moisa. <sup>21</sup> Ma 'ana tohesagohao nuwadi 'ihenainaida madouna ma sigwaeya, “Ciya, 'ina guguya bewa wada hesagohe? Tauna mwalo Yesu 'ana tomuliyao Yelusalema 'oina 'ilolo'alehedi, ta wete bewa 'ina tauyama huhuna 'abehega Yesu 'ana tomuliyaeadi 'ebwa simiyamiya 'i'abiyahidi ma 'ipaidi ma 'ihiledi Yelusalema, topwaoli madoudi 'oidiya, ma togidega 'ina nuwabui 'iloba 'eseya?”

<sup>22</sup> Ma Saulo 'ina guguya nage 'oina 'ihewaiwai hedadeya, ma meYudiyaedi Damasiko 'oina simiyamiya 'ihe'itidiya 'abehega Yesu tauna To'abihetenaina, ma geya wete 'idi 'ebe gwaemo.

#### *Saulo meYudiya 'idena sinediya*

<sup>23</sup> Saulo Damasiko 'oina 'imiyamiya, ma meYudiya siloiloina ma sida lohe'amasi, <sup>24</sup> ma Saulo hesi 'idi loina dahwana 'ihesagoheya 'abehega 'asa 'ana 'ahwa'edao silomatayahidi ma 'ane to tuta Saulo 'ilatu sida lohe'amasi. <sup>25</sup> Coinega hinuwana Saulo 'ana tomuliyao kodo madouna 'oina sido'oya, ma 'asa 'ana 'abwalu tabwanega sihedawedaweya gwahunega, ma 'itauya.

#### *Saulo 'ina tauyama Yelusalema*

<sup>26</sup> Ta Sauloina 'ihila Yelusalema ma 'itoho ma 'iluhu Yesu 'ana tomuliyao 'oidiya, ma simatauteya, weyahina geya sihemise 'abehega 'inuwabui pwaiya. <sup>27</sup> Ma Banaba 'iboimo 'ilemeya Saulo, ma 'itoeya Yesu 'ana tohemisao 'oidiya, ma 'ihe'ote'otetela 'abehega Saulo 'edai 'idi Badaina 'ilobeya ma 'enana 'ihesagoheya, 'oinega Damasiko 'oina ma'ina 'atepatu Yesuina weyahina 'iguguya.

<sup>28</sup> Coinega sitagwala Saulo 'oina ta 'iluhuwa 'adi boda 'oina. Ma 'idi paihowa mabwaiyana Yelusalema 'oina tauna ba'idanao simiyamiya. Ma Sauloina ma'ina 'atepatu 'ihewaiwai Bada Yesu 'ana loguguya weyahina.

<sup>29</sup> Ma meYudiya taudi to'ena Gilisi Saulo ba'idadiu sihegwaegwae ma sihe'oh'e'ohena, 'oinega taudimo siloiloina ma togidega ma silohe'amasi 'ese. <sup>30</sup> Ta 'idi loinaina tohekalesiyao sihesagoheya ta Saulo sitauyeya Sisaliya, ma nage 'oinega sihewasaeya, 'itauya Tasisi.

<sup>31</sup> Nage 'oina tohekalesiyao meYudiya ma meGalili ma meSameliya 'asaedi 'oidiya simiya daumwala, ma sipa'ala, ma'idi he'asisi 'idi Badaina 'oina, ma Yaluyaluwa Tabuna 'ina 'itayahina 'oinega 'adi boda 'imadouwa.

#### *Pita 'ina sakowasi Lida ma Yopa 'oidiya*

<sup>32</sup> Ma Pita 'isakosakowasi tohekalesiyao 'oidiya ma 'idobi 'aigeda 'asa sanina Lida 'oina, <sup>33</sup> ta 'aigeda loheya topeu 'ilobeya, sanina Iniya, tauna bolime 'eit 'ina 'ebe'eno 'oina 'i'eno'eno ma geya sowasawahina ma 'iyawala. <sup>34</sup> Ma Pita 'ihewae, 'igwae, “Iniya, Yesu Keliso 'igihe bwebwe'anego, 'oinega 'utoholo ma 'ino sita 'u'atububudi.” Ta 'itoholo mwayamwayauwa. <sup>35</sup> Ma tomotaedi Lida ma Seloni 'adi tomiyanao si'iteya, ta sinuwabuiya, ma 'oinega Bada Yesu sihemiseya.

<sup>36</sup> Ma 'asa Yopa 'oina, Yesu 'ana tomuliyao 'aigeda wahine 'imiyamiya, sanina Tabita, ta 'ana bui Dokasa, 'ana bui hebai sanina diya, ma wahineina 'abihetena ta helau huhuna. <sup>37</sup> Ma 'ilohala ma 'i'amasana. Coinega wawaninamo si'eweya ma sihehatuiya, ma hada tabwana 'alona silaguya.

<sup>38</sup> Ta 'asaina Yopa, Lida 'oinega geya bwaga, ma tohekalesiyao sihesagoheya 'abehega Pita 'asa Lida 'oina 'imiyamiya, 'oinega tomota 'eluwa sihewasaediya Lida 'oina Pita sabi toeina, ma Lida 'oina silatuwa, ma Pita si'ahwanoiyeya, sigwae, “Bada, 'unaoma talomwayamwayau 'ima 'asa.”

<sup>39</sup> Ma Pita 'igogona ma ba'idanao sitauyama Yopa 'oina, ta tohekalesiyao Pita sitoeya hadaina 'alona. Ma hiwapeyao baibaiwadi Pita sitoholo 'wabu'wabuya ma sidoudou ta 'adi 'ale'o sihe'itaeya, weyahina mwalo Dokasa tutaina mayawasina 'adi 'ale'owedi 'ipai-howediya, ma 'i'ebwaediya, ma sigwae, “Cale'owedi bewa tauna Dokasa 'ana sahisahilao mwalo mayawasina ba'idamai 'amiyamiya.”

<sup>40</sup> Ma Pita 'iloinaediya ta hadega sihapwesa, ma taunamo 'imiyamiya ma 'i'ahetulasa ma 'i'ahwanoi Yehoba 'oina, 'oinega 'i'ita hila ma wawanina 'ihewgaeya, 'igwae, “Tabita 'utoholo.” Ta Tabita matana 'iyahaliya ma Pita 'i'iteya, 'oinega 'eno'enowega 'imiyatoiya. <sup>41</sup> Ta Pita nimana 'i'abiyahiya ma 'i'abihe toholoya. Ci'abihe toholoya ma hiwahiwape ta tohekalesiyaowedi 'ibwauwedima, ma Tabita mayawasina 'ihe'itaeya 'oidiya. <sup>42</sup> Ma wasaina 'i'elewana tupwa Yopa mabwaiyana 'oidiya, ta tomota mabwaiyadi Bada Yesu 'oina sihemisa. <sup>43</sup> Ma Pita Yopa 'oina 'imiya 'amana, loheya sanina Saimoni 'ina hada, tauna 'ina paihowa hebai 'wapidi 'oidiyega tobwatobwa 'ipaipaihowadi.

## 10

### *Pita 'ina bo'ena Konilio 'oina*

<sup>1</sup> Ma 'asa Sisaliya 'oina 'aigeda loheya sanina Konilio 'imiyamiya, tauna meLoma tolo'alehao 'adi baibaiwa handeledi 'adi tohanugeta, boda Itali 'oinega, <sup>2</sup> ma tauna loheya bwebwe'ana, ta ma'ina susuwao Yehoba sihe'asisiyeya, ma tuta baibaiwana wewelohedi 'ilemelemedi, ma 'i'ahwa'ahwanoi Yehoba 'oina. <sup>3</sup> Ma sabwelo 'aigeda 'oina 'ilahilahiya, Konilioina 'ina 'enomata'ite'itega Yehoba 'ina anelose 'aigeda 'itautauyama 'oina, ma 'i'ita bwaibwainiya, ma aneloseina 'igwaeya, “Konilio!”

<sup>4</sup> Ma Konilio aneloseina 'i'ebubuya, ta ma'ina matauta, ma 'igwae, “Bada to'aha?”

Ma anelose 'igwaeya, “Yehoba 'ino 'ahwanoiyao ma 'ino 'abihetenao taudi wewelohedi 'oidiya 'isanapudiya, ma weyahidi 'inuwatuhugowa. <sup>5</sup> Coinega 'ino topaihowao tupwadi 'uhetunedi ma sitauya Yopa, ma Saimoni tauna sibwauweya Pita sitoeyama. <sup>6</sup> Ma Pitaina 'aigeda wete Saimoni 'ina hada holai 'oina 'imiyamiya ma Saimoniina 'ina paihowa hebai 'wapidiyega tobwatobwa 'ipaipaihowa.”

<sup>7</sup> Aneloseina 'ina gwae 'igumwala ma 'itauya, ta Konilio 'ina topaihowao 'eluwa 'ibwauwedima ta 'ina tolo'aleha 'aigeda, tauna wete Yehoba 'ana tohe'asisi madouna. Taudi sitetoyedi 'ana tolemao bwebwe'adi. <sup>8</sup> Sitetoyedi sitauyama ma anelose 'ina hepwaile Konilio 'ihe'ote'oteteliya 'oidiya, ma 'ihetunedi Yopa 'oina, ma sitauya.

<sup>9</sup> Mali sabwelo 'asudibwalala 'abwama sitautauya ma 'asa Yopa sihahohoya, ta Pita hadai 'imiyamiya ta 'ihane tabwana sabi 'ahwanoi. <sup>10</sup> Ci'ahwa'ahwanoi ta ma'ina gomale madouna. Cabwama hadai 'e'ahai sigibugibubu ma Pita 'i'eno mata'ita'ita, <sup>11</sup> ma galewa 'i'iteya 'i'egegeya, ma 'aigeda ginaula 'i'iteya 'isuluma, 'ana 'ita gidemusa 'ale'o madouna papalina matadiyao powa 'oidiyega sihedawedawe suluheyama bale'uwa, <sup>12</sup> ma 'alona hali hebai ma hali hebai ta hebai 'awa'awalidi ma hali bwasumo ma hali bwasumo. <sup>13</sup> Ta 'aigeda 'enana Pita 'oina 'igwaeya, 'igwae, “Pita 'utoholo ma 'a hebai 'uhunudi ma 'u'ai.”

<sup>14</sup> Ma Pita 'ilogwahata, 'igwae, “Bada tuwa, weyahina geya 'aigeda wete hebai 'eto'etobodana bewama gidemusa yada 'aidi.”

<sup>15</sup> Ma 'enanaina 'igwae hila, 'igwae, “Yehoba hebai beno 'igihe bwebwe'ana pwaiya, ma gesowana 'u'ahwa'ahwa galagalaedi.”

<sup>16</sup> Ginaula bewa matoi Pita 'oina 'ihapwesa ma 'enanaina matoi gidemusa 'ihewgaeya, ma muliyetega ginaulaina 'ihila galewa. <sup>17</sup> Ma Pita 'inuwanuwa 'eda'edadama 'abehega to'aha 'enomata'ita'ita bewa 'i'ita pwaiya, ta tomota sitetoyedi Konilio 'ihetunedima sihapwesa hadai, weyahina 'asai silatu pwaima, ma Saimoni 'ina hada tomota 'oidiya sihesilaleya. <sup>18</sup> Coinega silobeya ma hada mata 'ahwaina sitoholo ma sibwau, “Ciyamayao, Saimoniina sihesaniyeya Pita, beno hadai 'imiyamiya, bo geya?”

<sup>19</sup> Ma hadaina tabwanina Pita ma'ina nuwa 'eda'edadama 'imiyamiya ma Yaluyaluwa Tabuna 'oina 'igwaeya, “Pita, loheloheya 'etoi si'ebe'ebesego, ma sitauya pwaima gabula.

<sup>20</sup> Coinega 'utoholo ma 'usulu 'oidiya, ma ba'idamwao watauya, ma geya sowana 'u'ate'ateyoho, weyahina taugu tomotaiyedi yahetunedima.”

<sup>21</sup> Coinega Pitaina 'isuluwa 'oidiya ma 'igwaeya, “Taugu Pita! To'aha weyahina watauyama?”

<sup>22</sup> Ma sigwaeya, “Konilio 'ihetunemaiya, tauna tolo'alehao 'adi tohanugeta, ma loheya dumwadumwaluna ma Yehoba 'ana tohe'asisi, ma wete Yudiya mabwaiyadi si'ahwa loheya bwebwe'aneya, ta 'ana hemataluwa 'ihesagoheya Yehoba 'ina anelose 'oinega ma 'abehega 'owa 'ibwauwego tauna 'ina hada ma 'ino gwae 'ida hesagohe.”

<sup>23</sup> Coinega Pita loheloheyaedi 'ibwauwediya, ma hadaina 'oina sihetaumana.

Gona 'i'adaleya ma sitoholowa, ta Pita ba'idanao sitauya, ma tupwadi 'iyadiyao Yopa 'oinega ba'idadiyao wete sitauya. <sup>24</sup> Sitautauya ma hali sabwelo sihapwesa Sisaliya. Ma nage 'oina Konilio 'ina susuwao ma 'iyanao 'ibwau hegogonedima, ta 'ina hada siyamwayamwa.

<sup>25</sup> Coinega Pita 'ilatuma hadai, ma Konilio 'ihapwesa Pita matana 'ibe'u suluwa ma 'i'etuluha.

<sup>26</sup> Ma Pita Konilio 'igihetoholoya ma 'igwaeya, “Cutoholo. Taugu loheya tuwa gide 'owa.”

<sup>27</sup> Coinega Pita ma Konilio ba'idana sihehegwaegwae ta siluhuwa hadai, ma Pita boda hada 'alona 'i'itediya, <sup>28</sup> ma 'ihewgaediya, “Comi geya Yudiya, tauma meYudiya 'ama lona wasanasanapu 'abehega geya 'ada bo'enegomi, wete geya ba'idamao tada he'iyayagu. Ma hesi Yehoba 'enomata'ite'itega 'i'itegauwa ma gesowana 'aigeda tomota ya'ahwa galagalae. <sup>29</sup> Coinega tutaina Konilio 'ibwauwegauma geya yalogwahata, ma hesi yatagwalegau ma yatauya pwaima. Ma to'aha weyahina 'ubwauwegauma?”

<sup>30</sup> Ta Konilio 'igwaeya, “Bewa weyahina, sabwelo 'etoi sigumwala 'oina lahilahiya, gidemusa bewa 'ana tuta 'ahwanoi Yehoba 'oina, ma 'aigeda loheya ya'iteya mataguwa 'itotoholo, ma'ana 'ale'o 'asilalaina. <sup>31</sup> Ma 'ihewgaegau, 'igwaeya, 'Konilio, Yehoba 'ino 'ahwanoi 'ihesagoha pwaiya ma wete 'ino lema wewelohe 'oidiya 'inuwatuhu yahiya.

<sup>32</sup> Coinega 'ino hewaliyao 'uhetunedi Yopa 'oina ma Saimoni sibwauweyama, tauna sihesaniyeya Pita, ma hali Saimoni 'ina hada, Yopa 'oina gadowa, 'imiyamiya, ma hali Saimoniina 'ina paihowa hebai 'wapidiyega tobwatobwa 'ipaipaihowadi.’ <sup>33</sup> Ma yalomwayamwayau ta 'igu hewahewaliyedi yahetunediwa ta sibwauwegoma, ma 'utagwalegowa 'utauyama, ta yawwedo. Coinega bewa tuwa mabwaiyama Yehoba matana 'adeli 'autama ma to'aha Badaina 'iloinegowa 'uhegwaemai ma 'ahesagohe.”

#### *Pita 'ina gwae Konilio ma'ina bodao 'oidiya*

<sup>34</sup> Ta Pita 'ihewgaediya 'igwae, “Moisa! Bewa nuwagu 'isabwalena 'abehega tomota mabwaiyadi Yehoba matana mahemahetena, ma geya meYudiyamo 'ihelauwedi, <sup>35</sup> ma hesi hali tupwa ma hali tupwa tomoteninao 'eguma sihe'asisiye ma simumuga dumwalu, 'iyaliyaya weyahidi. <sup>36</sup> Ma To'abihetena Yesu tauna mabwaiyada 'ida Bada, ta Yehoba 'ina wasa bwebwe'ana 'i'ebwaeya Yesuina 'oina, tauma meIsileli 'ima 'ebe yaliyaya weyahina. Ma 'omi wasaina wasanasanapu, <sup>37</sup> weyahina Yoni wasaina 'ihegaineya Galili 'oina tutaina 'iloguguya, ma tomota 'igihe babisowediya, ma muliyega Yesu wasaina 'i'elelewaneya Yudiya tupwanao mabwaiyana 'oidiya. <sup>38</sup> Wasaina 'abehega Yehoba Yesu gwama Nasaleta 'igihe waiwaiyeya Yaluyaluwa Tabuna 'oinega, ma 'isakowasi ma tomota 'ilemelemedi, ta 'eguma taiyawedi Tomudulele 'igihe lohaleidiya Yesu 'i'abihe bwebwe'aneidi, weyahina Yehoba 'ina waiwai 'oina 'imiyamiya. <sup>39</sup> Ma tauma Yesu 'ana tohepwailao, weyahina 'ina paihowa 'a'itediya Yudiya tupwanao mabwaiyadi 'oidiya, ma wete Yelusalema 'oina, ta 'ana 'ebelolagu 'aiwe 'oina situtu hepa'ineya ma 'i'amasa, <sup>40</sup> ma sabwelo hetoina 'oina Yehoba 'i'abihetoholo hileya ma 'igihelatuheya, <sup>41</sup> ma geya tomota mabwaiyadi 'oidiya, beno tuwa tauma Yehoba 'ihesinuwemaiya 'ana tohepwailao tauma matamega 'a'iteya, 'a'ai'ai ta 'anumanuma Yesuina ba'idamai.

<sup>42</sup> Ma 'iloinemaiya ma tomota 'oidiya 'aloguguya 'abehega Yehoba Yesu 'ihésinuweya ta 'abehega tuta 'ana 'ebelolagu 'oina tauna lolina 'ida paihowa tomota taudi si'amasa weyahidi ma wete tauda mayawasida weyahida.”

<sup>43</sup> “Palopitao wete mwalona sihepwaila nugeteya 'abehega 'eguma taiyawedi Yesu 'oina sihemisa, nata 'idi puiyao Yehoba 'inuwasamudi Yesu tauna saninega.”

#### *Yaluyaluwa Tabuna 'isuluma taudi geya meYudiya 'oidiya*

<sup>44</sup> Pita 'abwa 'igwaegwae ma Yaluyaluwa Tabuna 'isuluma taudi sihenono 'oidiya, <sup>45-46</sup> ta taudi hali 'enana ma hali 'enana 'oidiyega sigwaegwae ta Yehoba sihehpwatuwe. Ma hesi meYudiya taudi Yesu 'ana tohemisaedi Pita ba'idanao Yopa 'oinega sitauyama, sinuwa pwanopwanowa weyahina si'iteya Yehoba tauna Yaluyaluwa Tabuna 'iebwaeaya tomiya ganamuli, taudi geya meYudiya 'oidiya.

Ma Pita 'ihégwaediya, 'igwae, <sup>47</sup> “Ciyagwao, wa'ita Yaluyaluwa Tabuna si'ewa pwaiya, gidemusa mwalo tauda. Coinega geya sowasowahina 'idi babitaiso we'ahega ta'etobode 'awa?” <sup>48</sup> Ta Pitaina 'iloina ma To'abihetena Yesu saninega sibabitaiso. Muliyega tomotaedi Pita si'ahwanoiyeya ma sabwelo hisa wete ba'idadiu simiyamiya, ta 'itagwala.

## 11

#### *Paihowa bewa weyahina Pita 'ihehpwaila*

<sup>1</sup> Ma Yesu 'ana tohepwailao ma wete tohekalesiyao, taudi Yudiya 'ana tomiyanao, wasa sihesagoha pwaiya 'abehega tupwadi tomiya ganamuli Yehoba 'ina gwae sihemisaeya. <sup>2</sup> Coinega tutaina Pita 'ihane hila Yelusalema 'oina, tohekalesiyao taudi Mosese 'ina lolinao 'ana tomuliyao Pitaina silomugiyeya, <sup>3</sup> sigwae, “Togidega ma 'owa 'ululuwa taudi geya meYudiya 'idi hadai ma ba'idamwao wa'ai?”

<sup>4</sup> Ta Pita 'ihégaina ma paihowaina mabwaiyana 'ihewasa bwaibwainiya, 'igwaeya, <sup>5</sup> “Mwalo taugu Yopa 'oina yamiyamiya ta ya'ahwa'ahwanoi Yehoba 'oina, ma 'enomata'ite'itega 'aigeda ginaula ya'iteya gide 'ale'o madouna ma papalina matadiyao powa 'oidiyega galewega sihedawedawe suluheyama 'oiguwa. <sup>6</sup> Ginaulaina 'alona ya'e'ebubuya, ma ya'iteya hebaiyao, ma hebai bosasa ma mwata ma wete kwasumowao 'ale'oina 'alona simiyamiya. <sup>7</sup> Ma 'aigeda gwae yahesagoheya 'ihégwaegauwa, 'igwae, 'Pita, 'utoholo ma 'a hebai 'uhunudi ma 'u'ai.’

<sup>8</sup> “Ma taugu yagwaeya, 'Bada tuwa! Weyahina geya 'aigeda wete ginaula hehe'asisina yada 'aidiya.’

<sup>9</sup> “Ta 'enanaina galewega 'igwae hila, 'igwaeya, 'Yehoba hebai beno 'i'abihe bwebwe'anediya, 'oinega gesowana 'u'ahwa'ahwa galagalae.’

<sup>10</sup> “Ginaulaina matoi 'oiguwa 'ilatuma, ma 'enanaina wete matoi 'ihégwaegauwa, ta muliyega mabwaiyana 'ihaneya ta 'i'waiha galewa. <sup>11</sup> Ma nage tutaina 'oina loheloheya 'etoi silatuma hadaina 'oina yamiyamiya, Sisaliya 'oinega sitauyama weyahigu.

<sup>12</sup> “Ma Yaluyaluwa Tabuna 'ihégwaegauwa 'igwae, 'Cutoholo ma sahena 'uhenuwanalua, ma tuwa hesi taudi ba'idamwao watauya.’ Ma 'iyadao site sikisi bewa si'wayabugauwa, ma 'atauya Konilio 'ina hada 'aluluwa.

<sup>13</sup> “Ma loheyaina 'oima 'ihe'ote'otetela, 'igwaeya, 'Mwalo 'aigeda anelose ya'iteya 'igu hada 'alona 'itotoholo ma 'igwaeya, “Konilio, 'ino 'ali'eyao 'uhetunedi Yopa 'oina ma Saimoni tauna sihesaniyeya Pita, sitoeyama, <sup>14</sup> ma tauna wasaina 'abwa 'ihégwaegomi ma 'oinega 'omi ma'imi susuwao helau waloba.” ’

<sup>15</sup> “Coinega yahegaina ma yahehégwae, ta Yaluyaluwa Tabuna 'oidiya 'isuluwa gidemusa mwalo tauda 'oida 'isuluma.

<sup>16</sup> “Ma Bada mwalo 'ina gwae yanuwatuhu yahiya 'igwaeya, 'Yoni tomota we'ahega 'i'abihe babitaisowediya ma 'omi 'abwa Yaluyaluwa Tabuna 'oinega wababitaiso.’ <sup>17</sup> Yehoba 'ina 'ebwayaina 'oidiya gidemusa tauda 'oida tutaina tagimi hemisa Bada Yesu Keliso 'oina. Ma taugu geya sosowagu Yehoba 'ina paihowa bewa ya'etobode.”

<sup>18</sup> Pita 'ina gwa'e bewa sihesagoheya ma geya 'idi 'ebe gwaemo, ta Yehoba sihepwatuwe, sigwaeya, “Moisa tuwa, Yehoba tauna 'itagwatagwala taudi tomiya ganamuli 'oidiya 'abehega sinuwabui, ta taudi wete yawasi hataya siloba.”

### *Tohekalesiyao 'asa Anitioki 'oina*

<sup>19</sup> Mwalo tohekalesiyao 'adi 'alehao Sitibeni silohe'amasiya, ma wete sitoho ma tohekalesiyao mabwaiyadi sida mutudi, 'oinega tohekalesiyaowedi sidena hali 'asa ma hali 'asa 'oidiya, ma tupwadi silatuwa Pinisiya ma Saipilosi ma Anitioki 'oidiya, ma wasa bwebwe'ana sihehepwaila meYudiya 'oidiya, ma hesi geya sihepwaila taudi tomiya ganamuli 'oidiya. <sup>20</sup> Ma muliyega tupwadi tohekalesiyao taudi meSaipilosi ma meSailini silatuwa 'asa Anitioki 'oina ma Bada Yesu wasana siloguguyaeya taudi meYudiya ma taudi geya meYudiya wete 'oidiya, <sup>21</sup> ma Badaina 'i'abihe waiwaiyediya ma tomota tupwana baibaiwana 'idi gwa'e sihemisaeya ma sitehinowa Badaina 'oina.

<sup>22</sup> Tupwadi taudi tomiya ganamuli sihemisa Badaina 'oina, 'oinega wasadi 'i'elelewana, ta tohekalesiyao Yelusalema 'oina sihesagoheya, 'oinega Banaba sihewasaeya ma 'ihabo'enedi. <sup>23</sup> Ta tutaina Banaba 'itauyama Anitioki 'oina, Yehoba 'ina helau tohekalesiyaowedi 'oidiya 'i'iteya ma 'iyaliyaya madouna, ta 'ilohatotodiya ma gesowana sihenuwanaluwa, ma hesi sida toholo pa'ala ma'idi hemisa 'idi Bada 'oina. <sup>24</sup> Weyahina Banaba loheya bwebwe'ana, ma Yaluyaluwa Tabuna 'ilohemaheya, ma ma'ina hemisa madouna. Ta 'ina loguguya 'oinega tomota tupwana baibaiwana sihemisaeya, ma tohekalesiyao 'idi boda 'ihehemadou.

<sup>25</sup> Muliyetega Banaba 'itauya Tasisi ma Saulo 'i'ebeseya, <sup>26</sup> ma 'ilobeya, ta ba'idana sihila Anitioki 'oina. Eeta bolime 'aigeda 'alona siloguguya tohekalesiyaedi 'idi 'eto'auta 'oidiya, ma tomota mabwaiyadi sihehe'itadi. Casaina Anitioki 'oina Yesu 'ana tomuliyao tutaina 'oina sihesani nugetediya Kelisitiyanao.

<sup>27</sup> Tuta nage 'oina tupwadi palopitao Yelusalema 'oinega sisuluma Anitioki 'oina, <sup>28</sup> ma 'aigeda 'oidiyega, sanina Agabu, 'idi 'eto'auta 'oina 'itoholo, ma Yaluyaluwa Tabuna 'ina waiwaiyega 'ihewaila nugeta 'abehega 'abwa gomale madouna 'ihapwesa gogo mabwaiyadi 'oidiya, eeta muliyetega Sisa Kalodiu 'ina tuta hetoloina 'oina gomale madouna 'ihapwesa.

<sup>29</sup> Ta tutaina Yesu 'ana tomuliyao Agabu 'ina hepwailaina sihesagoheya taudimo siloina ma 'abehega 'aigeda 'aigeda sitoho ma si'ehele ma lema mane sihewasae 'iyadiyaowedi tupwa Yudiya 'oina simiyamiya. <sup>30</sup> Coinega si'ehele nugeta ta mane silobeya, ma tutaina gomale 'ilatuwa 'oina si'ebwaediya Banaba ma Saulo taudi sitauyeya Yelusalema 'oina, tohekalesiyao 'idi babadao 'oidiya.

## 12

### *Yemesa silohe'amasiya ma Pita deliya silagu luhuweya*

<sup>1</sup> Tuta nage 'oina kini Helodi 'ina loina pa'alina 'ilatuwa, ma 'ina tolo'alehao tupwadi tohekalesiya si'abiyahidiya sabi 'abihegaladi. <sup>2</sup> Coinega Yemesa, tauna Yoni tasina, Helodi 'ina loinega sihunuya 'elepega, ma 'i'amasa.

<sup>3</sup> Ma meYudiya siyaliyaya Yemesa 'ina 'amasa weyahina. Ta Helodi 'iloina hila ma Pita si'abiyahiya. Ta wiki beno meYudiya 'idi he'asisi 'ana tuta ma beledi daisina, geya 'ana 'ebe gihesehamo si'aiya.

<sup>4</sup> Pitaina si'abiyahiya ma deliya silaguya, ma Helodi 'ina tolo'alehao sikisitini 'iloinaedi silomatayahi bwaibwaini, ma Helodi 'inuwanuwatuhu 'abehega Hataona Guyaina mulina Pitaina 'ida lagulatuhe meYudiya 'oidiya ta 'ina yatala sida paihowa. <sup>5</sup> Coinega deliya si'itayahiya ta tohekalesiyao si'ahwa'ahwanoi waiwai Yehoba 'oina Pita weyahina.

### *Anelose Pita 'ilemeya*



<sup>6</sup> Ta Pita tupwana sabwelo 'oina deliya 'imiyamiya, ma hali sabwelo 'oina Helodi Pita 'ida lagulatuhe yatala weyahina, ma hinuwana Pita tolo'alehao 'eluwa gamwagamwani-diya 'i'eno'eno, ma 'ana 'ebepai seni 'eluwa 'oidiyega sipaiya, ma wete deli mata'ahwana tolo'alehao si'ita'itayahi.

<sup>7</sup> Ta Yehoba 'ina anelose 'aigeda mwayamwayau 'ilatuma ma deliina 'alona 'i'asilala, ma aneloseina Pita lesulesuna 'isapiya ta 'ilohanohanoya ta 'igwaeya, “Cutoholo mwayamwayau.” Ta 'ana 'ebepai nimanega sibe'uwa. <sup>8</sup> Ma aneloseina 'ihewgaeya, 'igwae, “Ca 'ale'o 'u'ote ma 'a butu 'u'otedi.” Ta gwaaina Pitaina 'ihematamataneya. Ta aneloseina wete 'igwaeya, “Ca hewanuwega 'u'abobo ma 'umuliwegau.” <sup>9</sup> Ta 'ilatuwa ma Pita 'imuliyeya ma 'inuwatuhuya 'abehega 'inihinihi, ta geya 'isanapu 'abehega aneloseina 'ina paihowa moisa.

<sup>10</sup> Coinega to'itayahina 'aigeda si'ebesineya, ma heluwena wete si'ebesineya. Cahwa'eda madouna pwawatiyega sipaihoweya 'oina sitauyama, ma 'ahwaina 'iboimo 'i'eso'eya, ma sihapwesa 'asai ma 'eda 'oinega sitauya ta mwayamwayau aneloseina Pita 'i'ebesineya.

<sup>11</sup> Ma Pita 'inuwasabwalena ta 'igwae, “Yasanapu pwaiya 'abehega 'ida Bada 'ina anelose 'ihewasaeyama ma 'ilemegauwa Helodi 'ina loina 'oinega, ta gesowana meYudiya 'idi nuwatuwawo sida paihowadi.” <sup>12</sup> Pitaina nuwana 'isabwalena ma 'itauya Meli 'ina hada, tauna Yoni sinana, ta Yoni sanina heluwena Maki, ma hadaina 'alona tomota baibaiwadi bo'i si'autama ta si'ahwa'ahwanoi Yehoba 'oina.

<sup>13</sup> Eeta Pita hada 'ana 'ahwa'eda 'oina 'i'etunatuna'e'eya ma topaihowa mewahinena sanina Loda 'itauyama, <sup>14</sup> ma Pita 'ina gwae 'isanapuya ma 'iyaliyaya madouna, ta geya 'ahwa'eda 'ida so'eya, ma 'ihila mwayamwayau hada 'alona ta 'igwaeya, “Pita 'ahwa'eda 'itotoholo.”

<sup>15</sup> Ma sigwae, “Yauyauleiu!”

Ta wahine 'ahwana 'ipa'ala 'abehega tauna Pitaina.

Coinega sigwae, “Nuwana Pita 'alu'aluwana.”

<sup>16</sup> Ma Pita 'abwama 'atamana, ma 'i'etunatuna'e'eya. Eeta 'ahwa'eda siso'eya, ma si'iteya tauna, ma nuwadi 'ihenainaida moisa. <sup>17</sup> Ma Pita nimanega 'i'etobodediya ma sihenono, ta 'ihe'ote'otetela 'idi Bada deliyega 'itoeyama. Ta 'igwae, “Wasa bewa wahepwaila Yemesa ma'iyanao wete 'oidiya.” Ma 'i'ebesinediya ta 'itauya hali tupwa.

<sup>18</sup> Gona 'i'adaleya ma tolo'alehao nuwadi 'ihenainaida ma si'ateyohowa madouna Pita weyahina, togidega 'ilatu 'esa. <sup>19</sup> Ma Helodi 'iloinaediya ma Pitaina si'ebese. Si'ebe'ebeseya ta geya siloba. Coinega tomatayahinao 'idi yatala 'ipaihoweya, ma 'adi lohe'amasas 'iloinaediya. Eeta silohe'amasidiya ma Helodiina Yudiya 'oinega 'isuluwa Sisaliya, ma nobwa 'imiyamiya.

#### *Helodi 'ina 'amasa*

<sup>20</sup> Helodiina meTaiya ma meSaidoni mwalo 'igamwasowalediya, ta sitofo ma Helodi 'ina to'itayahinaina sanina Bilasito si'abihe yaliyaya. Eeta si'abihe yaliyayeya, ma muliyetega mabodaidi sitauyama Helodi 'oina, ta nuwanuwadi ma ba'idanao sida he'iyayiyagu hila, weyahina taudi 'adi 'e'ahai kiniina 'ina tupwega silobaloba.

<sup>21</sup> Ta Helodi 'aigeda sabwelo 'iupaeya ma ba'idanao sida gwaegwae. Ma sabweloina 'oina 'ana 'ale'o wasawasa 'i'oteya ta 'ina wagahata wasawasa 'oina 'imiyatoiya ma bodaedi 'oidiya 'igwaeya.

<sup>22</sup> Cigwaegwae 'igumwala, ma bodaedi sibwaubwau, sigwae, “Nage 'aigeda Yehoba 'enana, ma geya tomota 'enana.”

<sup>23</sup> Tuta nage 'oina Yehoba 'ina anelose Helodi 'ihunuya, weyahina Yehoba 'ana hepwtu 'ilagu balaheya tauna 'ibo'i 'oina, ta yapwayapwa 'alona si'aiya, ma 'i'amasa.

<sup>24</sup> Ta 'oinega Yehoba 'ina gwae 'ihewaiwai tomota baibaiwadi ma tupwa mabwaiyana 'oidiya. <sup>25</sup> Ta Banaba ma Saulo 'idi paihowa Yelusalema 'oina silohegumwaliya, ma sisulu hilama Anitioki 'oina, ta Yoni sitoeyama ba'idadiu. Yoniina sanina heluwena Maki.

## 13

*Banaba ma Saulo 'idi paihowa*

<sup>1</sup> Casa Anitioki 'oina, tohekalesiyao 'idi palopitao ma tohe'itao bewa: Banaba ma Saimoni (tauna sibwauweya Dubaduba) ma Lusiyasi (tauna gwama Sailini) ma Manaeni (tauna kini Helodi 'ana yaso 'aigeda) ta wete Saulo. <sup>2</sup> Taudi sitapwatapwalolo ma'idi hudi Yehoba 'oina, ta Yaluyaluwa Tabuna 'ihewaediya, 'igwae, “Nuwanuwagu Banaba ma Saulo 'igu paihowa 'aigeda weyahina, 'oinega 'omi watagwaledi paihowaina 'oina.” <sup>3</sup> Ta Yehoba 'oina si'ahwa'ahwanoi hila magomaledi, ma si'abidebediya, ta Banaba ma Saulo sihewasediya 'idi paihowaina weyahina.

*Cidi paihowa tupwa Saipilosi 'oina*

<sup>4</sup> Yaluyaluwa Tabuna 'ihetune pwaidiya ta sidobiya Salusiya, ma wagai sigeluwa ma si'u'e, sihabala bwanabwana Saipilosi 'oina, <sup>5</sup> ma nobwa 'asa sanina Salami 'oina silaga, ta meYudiya 'idi hada tapwalolo 'oina Yehoba 'ina gwae sihepwaileya. Caigeda 'idi hewali ba'idadiu sisakosakowasi, sanina Yoni.

<sup>6</sup> Eeta bwanabwanaina mabwaiyana 'oidiya sisakowasi hegumwaliya, ma 'asa Pepose 'oina silatuwa. Ma nobwa 'aigeda to'oba, sanina Bayesu, gwama Yudiya, tauna palopita 'abo'abo 'aigeda.

<sup>7</sup> Ma Bayesuina 'iyana 'asa 'ana tohanugeta, sanina Sagi Paulosi, loheya sanasana-puina. Eeta Sagi Paulosiina Banaba ma Saulo 'ibwauwedima, ta nuwanuwana ma Yehoba 'ina gwae 'ihesagohe, <sup>8</sup> ma hesi to'oba 'i'ausidiya, weyahina geya nuwana ma toloinaina 'ihemisa Yesu 'oina. To'obaina sanina 'ana bui Elaimasi, beno tobalahu.

<sup>9</sup> Ma hesi Saulo, tauna sanina heluwena sibwauweya Paulo, Yaluyaluwa Tabuna 'ilohemaheya ma to'obaina 'i'e'ebubu, <sup>10</sup> ma 'igwaeya, “Cowa Seitani 'ina boda ma to'abo madouna, 'oinega paihowa dumwaluna 'uhe'aleheya, ma Bada 'ina 'eda dumwaluna tuta mabwaiyana 'utohotoho ma 'abehega 'u'abihepwayo'e. <sup>11</sup> Coinega bewa tuwa Bada 'ina waiwai 'oinega matau 'ihoga tuta to'uto'upanamoo weyahina, ma sahena hala 'ina 'asilala 'u'ita'ita.”

Tuta nage 'oina hogahoga gide 'oinega to'obaina matana 'iguguyouwa, ma 'ibesabesa taiya 'ileme ma 'ihanugete. <sup>12</sup> Ta toloinaina Sagi Paulosi 'i'iteya Paulo 'ina paihowaina, ma Bada tetelina weyahina nuwana 'ihenainaida, 'oinega 'ihemiseya.

*Sitauya Anitioki tupwaina Pisidiya 'alona*

<sup>13</sup> Ta Paulo ma'ina bodao Pepose 'oinega sigeluwa ma si'u'e hila, ma Peliga 'oina siluhuwa, tupwa Pamipiliya 'alona. Ta Yoni 'i'ebesinediya ma 'ihila Yelusalema. <sup>14</sup> Ma hesi Paulo ma'ina bodao Peliga si'ebesineya ma hali Anitioki 'oina silatuwa, beno tupwa Pisidiya 'alona. Eema sabwelo Sabati 'oina siluhuwa meYudiya 'idi hada tapwalolo 'oina, simiyatoiya. <sup>15</sup> Ma tohanugetao Mosese 'ina loina 'ana hasila, ma palopitao 'idi gwae 'ana hasila sihasilidiya, ta tohanugetaowedi 'aigeda loheya sihewasaeya Paulo ma Banaba 'oidiya ma 'abehega 'ihemataluweddi, 'igwaeya, “Ceguma guguya bo he'ita 'oimiya beno wahepwaila tomota 'oidiya.”

<sup>16</sup> Coinega Paulo 'itoholowa ma nimana 'i'abihaneheya, ta 'igwae, “Tasigwao, meIsileli, ma 'omi hali tupwega Yehoba 'ana tohe'asisiyao, 'igu gwae bewa wahesagohe. <sup>17</sup> Yehoba mwalona meIsileli tauda tubudao 'ihesinuweddiya, ta 'idi boda 'i'abihe madouya 'idi miya taumana Itipita 'alona, ta 'ina waiwai madouna 'oinega 'ihanugetediya ta Itipita si'ebesineya. <sup>18</sup> Ma bolime poti 'oidiya 'idi we'ao 'ihe'alama'i'itanediya tupwa yoho 'awawa pwatula.

<sup>19</sup> “Ta muliyetega kini site sebeni ma'idi bodao 'imutudiya tupwa Kenani 'alona, ma tupwaina meIsileli 'i'ebwaediya 'idi bale'u, ma simiyamiya gide bolime powa handeledi ma pipiti 'oidiya. <sup>20</sup> Ma muliyetega 'idi toloinao 'i'ebwaediya ma siloinediya 'ana siga palopita Samuwela 'ilatuwa.

<sup>21</sup> “Samuwela 'ilatuwa ta si'ahwa'ahwanoi ma Yehoba 'idi kini 'i'ebwaedi, 'oinega Saulo 'i'ebwaediya, tauna Kisi natuna, ta 'ina susu Beniyamina 'oinega, ma bolime poti 'oidiya

'iloiloinaedi. <sup>22</sup> Muliyetega Yehoba Saulo 'ilososomaneya ta 'idi kini hauhauna Debida 'ilaguya. Tauna Debida weyahina Yehoba 'igwaeya, 'Desi natuna Debida yalobeya, ma yahemisaeya, weyahina 'igu nuwatuhuwao baibaiwadi 'ipaipaihowadi.' <sup>23</sup> Ta Debida 'ina susuwega, Yehoba tauda meIsileli 'ida To'abihetena Yesu 'i'abilatuheya, gidemusa mwalona 'ihewaila nugeteya.

<sup>24</sup> “Ta mwalo tutaina Yesu geya 'ilatulatuma, Yoni 'iloguguya meIsileli 'oidiya ma 'idi puiyao 'oidiyega sinuwabui ma 'i'abihe babisowedi, <sup>25</sup> ma Yoni 'ina paihowa 'ana 'ebe lolagu 'oina 'igwaeya, 'Comi wanuwatuhuya 'abehega taugu taiya? Taugu geya To'abihetenaina. Ta tauna muliguwega 'inaonaoma Tabwana hedada. Ta taugu geya 'ilobwainegau ma 'ahena 'ana butu yalihalasi.’

<sup>26</sup> “Tasigwao, 'omi Ebalahamo 'ina susuwao, ma wete 'omi hali tupwega Yehoba 'ana tohe'asisiyao wahesagohe 'abehega 'abihetena tetelina bewa 'oida 'ilatu pwaima. <sup>27</sup> Ta Yelusalema 'ana tomiyao, ma 'idi babadao, To'abihetenaina geya sisanapu, ma wete palopitao 'idi hepwaitao Sabati 'aigeda 'aigeda sihasihasi totapwalolo 'oidiya, ma hesiyage geya sisanapanapudi, ta hesi To'abihetenaina sitebaeya, 'oinaga palopitao 'idi hepwaita nugetao mwalona hene 'adi moisa tuta bewa si'abilatuheya. <sup>28</sup> Ta geya 'eta 'ina puimo sida lobeya, ma 'oinaga silohe'amasi, ma tuwa hesi Pailato si'ahwanoyeya ma 'ilohe'amasi.

<sup>29</sup> “Ta gwaeyedi Buki He'asisi 'oina sihepwaila nugeteya To'abihetena weyahina, mabwaiyana nage meYudiya sipaihowa pwaidiya, ta 'ina 'amasa mulina 'ana kelose 'oinaga silagu suluheya ma sigaliheya. <sup>30</sup> Ma Yehoba 'amasa 'oinaga 'i'abihe toholoya, <sup>31</sup> ta sabwelo tupwana baibaiwana 'ilatulatu 'ana to'wayabuwao 'oidiya, taudi mwalo mahetenao Galiliyega ma Yelusalema 'oina sinaoma. Taudi bewa tuwa To'abihetenaina weyahina sihehpwaila tomota 'oidiya. <sup>32</sup> Ma tauma wete tetela bwebwe'ana bewa 'a'ebwaegomi, mwalo Yehoba 'igwae hemisa tubudao 'oidiya, <sup>33</sup> ta sauga bewa 'i'abihe latuya yaso hauhauda 'oida, tutaina Yesu 'amasega 'i'abihe toholoya. Bewa weyahina wali Same heluwena 'oina Yehoba 'ina gwae sihepwaila nugeteya, 'igwae,

'Cowa natugu nige ya'ahwa natunegowa.’

<sup>34</sup> “Ma wete 'i'abihe toholo hileya ma sahena 'i'ama'amasa hila, nuwana 'imwahumwahulu, ma bewa weyahina 'ihewaila nugeteya, 'igwae, 'Ginaulaedi bwebwe'adi yagwae hemisediya Debida 'oina, 'abwa ya'ebwaego.’

<sup>35</sup> “Ma wete 'aigeda wali Same 'oina bo'i 'ihewaila nugeta, 'igwaeya, 'Sahena watagwatagwala ma tauna 'uhesinuwaeya 'imwahumwahulu.’

<sup>36</sup> “Gwae bewa geya Debida tauna weyahina. Debidaina 'ina tuta Yehoba 'ina nuwatuhu 'ipaihowediya, ma 'i'ama ta sigaliheya tubunao mahetediu ma 'imwahumwahulu, <sup>37</sup> ma hesi loheyaina 'amasega Yehoba 'i'abihe toholoya geya 'imwahulu. <sup>38-39</sup> Coinega tasigwao, wasanapu bwaibwaini 'abehega loheyaina 'oinaga 'imi puiyao 'adi nuwasam waloba. Ma 'eguma taiya tauna 'oina 'ihemisa, 'ina puiyao 'oidiyega 'ilihasi. Ta hesi Mosese 'ina lina geya sowasowahina 'ilihalasi.

<sup>40</sup> “Coinega wa'ita yahigomi ma gwaeina palopitao mwalo weyahina sigwaegwae hemisa, sahena 'oimiya 'ilatulatu. Gwaeina 'igwaeya,

<sup>41</sup> 'Comi tolotuyenao, 'igu paihowa bewa wa'ita ma weyahina nuwami 'ihenainaida, ma muliyetega wahesilae, weyahina 'imi tuta 'oina 'igu paihowaina nata sihepwaila 'oimiya, ma hesi geya wahemisa.’ ”

<sup>42</sup> Ta Paulo ma Banaba sihapwesa, ta bodaedi si'ahwanoyediya ma hali Sabati wete he'ita bewa 'oidiya sihepwaila hila.

<sup>43</sup> Ta boda hada tapwalolowega sihapwesama, ma tupwadi meYudiya, ma tupwadi Yehoba 'ana tohemisao hali tupwa ma hali tupwa 'oidiyega, Paulo ma Banaba sihemuli tabubudiya, 'oinaga Paulo ma Banaba 'oidiya siloguguya ta 'abehega Yehoba 'ina helau si'abiyahi.

*Paulo ma Banaba siguguya taudi tomiya ganamuli 'oidiya*

<sup>44</sup> Ma hali Sabati 'oina, 'asaina 'ana tomiyao baibaiwadi si'eto'autama Yehoba 'ina gwae sabi hesagoheina. <sup>45</sup> Ma hesi meYudiya, boda madouna si'iteya, 'oinega sihe'ipi'ipiyeya, ma Paulo 'ina guguya si'ahwa 'abo'aboweya, ma si'ahwa galagalaeya. <sup>46</sup> Ta Paulo ma Banaba ma'idi 'atepatu sigwae latuwa meYudiyaedi 'oidiya sigwaeya, “Cilobwaineya ma Yehoba 'ina gwae 'ahepwaila nugete 'oimiya, ma bewa tuwa walogwahateya, nuwana 'omi waboi waloinaegomi 'abehega geya sowasowahimi ma yawasimi hataya waloba, 'oinega 'alogwahategomiya, ma tomiya ganamuli 'oidiya 'aloguguya, taudi geya meYudiya 'oidiya.

<sup>47</sup> “Weyahina Bada 'iloinemaiya, 'igwae, 'Cimi paihowa ya'ebwaya pwaigomiya ma 'abehega 'omi taudi tomiya ganamuli 'idi mayale, ma tupwa mabwaiyadi 'oidiya 'adi 'abihetena watauye.’”

<sup>48</sup> Eeta taudi tomiya ganamuli Paulo ma Banaba 'idi gwae bewa sihesagoheya, ma siyaliyaya madouna, ta Yehoba tetelina si'ahwa bwebwe'aneya, ta taudi taiyewedi Yehoba 'ihesuwanediya ma yawasi miyamiya hatayana siloba, taudi gwaeina si-hemisaeaya. <sup>49</sup> Ma Yehoba tetelina silelewaneya tupwaina mabwaiyana 'oidiya.

<sup>50</sup> Ta hesi meYudiya Paulo ma Banaba silo'alehedi, ma silolomugiyedi wahiwahine 'alawatao taudi totapwalolo 'oidiya, ma wete 'asa 'ana babadao 'oidiya, ta taudi wete silolo'aleha Paulo ma Banaba 'oidiya, ta sipa'idiya, ma tupwaina si'ebesineya. <sup>51</sup> Ma 'i'iuna ma 'asaina si'ebesine, 'ahedi nenegwalina silohutuhutu yahuleya 'idi tupwa, beno 'ebe'ita toni 'asaedi 'oidiya, ta muliyetega sitauya Ikoniyaami. <sup>52</sup> Ma hesi Yehoba 'ana tohemisao siyaliyaya madouna, ta Yaluyaluwa Tabuna 'ina waiwai 'ilohemahediya.

## 14

### *Paulo ma Banaba 'idi loguguya Ikoniyaami 'oina*

<sup>1</sup> Paulo ma Banaba silatuwa Ikoniyaami 'oina, ta 'idi paihowa Anitioki 'oina wete gidemusa Ikoniyaami 'oina sipaipaihowa 'esa, beno meYudiya 'idi hada tapwalolo 'oina siluhuwa, sihe'ita, ta 'idi he'ita waiwai 'oinega boda sinabwana sihemisaediya, bodaedi tupwadi meYudiya ma tupwadi tomiya ganamuli 'oidiyega. <sup>2</sup> Ta tupwadi meYudiya he'itaina geya sihemisae, ta sisinaliya, ma si'ahwa galagalaeya, ta silomugi taudi tomiya ganamuli 'oidiya ma taudi wete Yesu 'ana tohemisao silolo'alehedi.

<sup>3</sup> Ma 'iyamo tuta dudulena Paulo ma Banaba simiyamiya tupwaina 'oina ta ma'idi 'atepatu silologuguya Bada weyahina. Ma Badaina 'ina waiwaiyega paihowa 'ebe henainaida ta hedehedede sipaihowediya, ma 'oidiyega Badaina 'ina helau wasana 'ana moisa tauna 'ihe'itediya tomota 'oidiya.

<sup>4</sup> Ma melkoniyaamiyedi siwataha, ma tupwadi meYudiya si'ahwa moisaediya, ma tupwadi Yesu 'ana tohepwailao si'ahwa moisaediya. <sup>5</sup> Coinega taudi ganamuli, geya meYudiya, ta meYudiya wete ma'idi babadao siloina hehogona ma Paulo ma Banaba sida gihemuyadi, ta da'uleyega sida lohe'amasidi. <sup>6</sup> Ma hesiyage wasana sihesagoheya, ma sidena sitauya Lakeoni gogonao 'oidiya, beno Lisitila ma Dabi 'oidiya. <sup>7</sup> Ma tetela bwebwe'ana sihepwaila latuhea, ta 'asanao deidiya wete.

### *Paulo ma Banaba 'idi paihowa Lisitila 'oina*

<sup>8</sup> Lisitila 'oina 'aigeda tolopegoi silobeya, 'ina tuta li'u 'oinega ma 'iheloheya madouna, ma 'imiyamiyamo tuwa, ta geya 'ida toholowa ma 'ida yawala, weyahina ma'aena lopolopogoina 'itoleya. <sup>9</sup> Eeta tolopegoiina 'imiyamiyatoiya, ma Paulo 'ina loguguya 'ihesoheya, 'oinega Paulo tolopegoiina 'i'ebubuya, ma 'isanapuya 'abehega ma'ina hemisa Yesu 'oina ta sowasowahina 'ida 'abihe bwebwe'ane. <sup>10</sup> Coinega Paulo 'enana madouna 'oinega 'ibwau naowa 'oina 'igwaeya, “Cutoholo.” Ma tolopegoiina 'itoholo mwayamwayauwa ma 'iyawala.

<sup>11</sup> Ma tomota mabwaiyadi Paulo 'ina paihowa bewa si'iteya, ma Lakeoni 'enadiyega sibwaubwau, sigwaeya, “Yehobao sisuluma, 'adi 'ita gide tomota.” <sup>12</sup> Ma bodaedi Banaba

sibwauweya Yupita ma Paulo sibwauweya Mekiuli, weyahina tauna 'idi togwae. Saniyedi bewa 'idi yehobao sanidiyao, beno Yupita ma Mekiuli.

<sup>13</sup> Ta 'idi yehoba Yupita 'ina topwaoli 'asaina 'oina 'imiyamiya, ta 'ina hada 'ebe pwaoli 'asa 'atamanina. Ta topwaoliina 'abehega bulumakau ma 'aiwe didina sulasulana 'i'ewedima 'asa 'ana 'ahwa'eda 'oina, ma nuwanuwana 'abehega boda ba'idanao sida pwaoli Paulo ma Banaba 'oidiya.

<sup>14</sup> Ta siteluwaedi topwaoliina 'ina nuwatuhi sisanapuya ma geya nuwadi. Coinega 'adi 'ale'o sibo sigisabuya ma sipili latuma, boda 'oidiya sigwaegwae, <sup>15</sup> “Ciyamayao gesowana tauma 'oima wapwaopwaoli. Tauma tomota tuwa gidemusa 'omi, ma wasa bwebwe'ana 'a'eweyama 'oimiya, ta 'abehega 'omi 'ebe hemisa besobeso wada logwahatedi ma wada 'itahila Yehoba mayawasina 'oina, tauna galewa ma bale'u ma ni'u ta wete ginaula mabwaiyadi 'alodiya 'adi tohemasaleha. <sup>16</sup> Yehobaina mwalo tupwa mabwaiyana tomotainao 'itagwalediya ma taudimo 'idi nuwatuhi ta 'idi mumuga sida muliyedi, <sup>17</sup> ma 'ebe he'itao 'oidiya simiyamiya, ta 'abehega 'oidiyega Yehobaina sida sanasanapu. Ma 'ebe he'itaowedi 'ina helauwedi 'oidiya ta 'omi 'oimiya, beno 'wesu galewega ma wete siwaloha bwebwe'ana ma 'oidiyega 'eli'eli bwebwe'ana walobaloba, ta 'oinega wa'ai'ai ma weyahina wayaliyaliyaya.”

<sup>18</sup> Ta Paulo ma Banaba tomotaedi si'etoboda 'asaediya, eema 'ebelosaloha 'oina sihewaiwai, ma geya 'oidiya sipwaoli.

<sup>19</sup> Ta meYudiya 'asa Anitioki ma Ikoniya 'oidiyega sitauyama, ma siluhu bodaedi Paulo ma Banaba 'adi tohesagohao 'oidiya, ta silohetu hetunediya ma Paulo da'uleyega sihunuya. Cigumwala, ta 'asa 'alonga silisi latuheya, ta 'idi nuwatuhi 'i'amasu pwaiya.

<sup>20</sup> Ta muliyetega Yesu 'ana tomuliyao sitauyama, ma Paulo sitoholo sakowasiyeya, ma Pauloina 'itoholo ta 'iluhuhila 'asai. Ta gona 'i'adaleya, ma Banaba ba'idana sitauya Dabi.

#### *Sihila Anitioki, beno Sisaliya 'alona*

<sup>21</sup> Dabi 'oina wasa bwebwe'ana siloguguyaeya ma tomota tupwana baibaiwana sihemisaeya, ta simuliyeya, 'oinega Paulo ma Banaba sihilahila Lisitila ma Ikoniya ma Anitioki 'oidiya.

<sup>22</sup> Ta 'idi lohihilaina 'oina Yesu 'ana tohemisao sigihe pa'alidiya 'asa 'aigeda 'aigeda 'oidiya, ta siguguyediya ma gesowana 'idi hemisa 'ida we'awe'a, ma sigwaeya, “Moisa 'abwa 'ida muya baibaiwadi 'oidiyega taluhu Yehoba 'ina 'ebeloina 'oina.” <sup>23</sup> Ma wete 'asa 'aigeda 'aigeda Paulo ma Banaba tohekalesiyao 'idi tohanugetao sihe'asediya, ta 'adi 'abilagata bewa gidemusa, sihudihudi ta 'idi Badaina sihemisaeya 'oina si'ahwa'ahwanoi, ma 'ane 'ida gihewaiwaiyedi 'idi paihowaina weyahina.

<sup>24</sup> Ta Pisidiya 'alonga sitauyama ma Pamipiliya 'oina silatuwa, <sup>25</sup> ta 'asa Peliya 'oina siloguguya, 'oinega sidobiya Atalaya, <sup>26</sup> ma wagega sigeluwa, ta sihila Anitioki tupwaina, mwalo 'oinega 'idi paihowaina sihe'aleneya, ma 'oina wete mwalo Yehoba 'ina helau silobeya paihowaina silosalohiya weyahina.

<sup>27</sup> Eeta tutaina Anitioki 'oina siluhuwa, tohekalesiyao sibwau 'autedima, ma ginaula baibaiwadi Yehoba 'ipaihowediya 'idi sakowasiina 'alona sihe'ote'otetelediya, beno hemisa 'ana 'ahwa'eda 'iso'eya 'asa ganamuli taudi geya meYudiya weyahidi, ma siluhulu.

<sup>28</sup> Coinega Paulo ma Banaba Yesu 'ana tohemisao tupwaina Anitioki 'oina ba'idadiyao simiyamiya tuta dudulena.

## 15

#### *Yelusalema 'oina siloiloina*

<sup>1</sup> Ma tupwadi loheloheya Yudiya 'oinega sisuluma, ta sihehe'ita tohekalesiyao meAnitioki 'oidiya, sigwaegwae, “Mosese mwalo 'iloinaemaiya 'wapima 'ana 'upwa weyahina. Ma 'eguma 'omi 'wapi 'upwaina geya wa'ewa, nata geya 'abihetena walobaloba.” <sup>2</sup> Ma hesi Paulo ma Banaba geya si'ahwa moisaedi, 'oinega mahetediyao sihe'ohe'oheya



madouna. Ta tohekalesiyao Anitioki 'oina Paulo ma Banaba, ma tupwadi wete tomuliya 'oidiyega sihesinuwediyaya ma 'abehega sihane Yelusalema, ma nuwatuwu bewa weyahina sigwaegwae, nuwana siloina, Yesu 'ana tohepwailao site tuwelo ma wete tohanugetao ba'idadiyao.

<sup>3</sup> Ta tohekalesiyao siloyauwedowediyaya ma sitauya. Sitautauya tupwa Pinisiya ma Sameliya sibui di'waediya, ta sihepwaileya 'idi sakowasi mwalo weyahina, beno 'asa ganamuli, taudi geya meYudiya 'idi nuwabui Yehoba 'oina sihepwaileya, ta Yesu 'ana tohemisao 'asa 'aigeda 'aigeda 'oidiya hepwailaina sihesagoheya, ma siyaliyaya madouna.

<sup>4</sup> Eeta silatuwa Yelusalema, ma tohekalesiyao ma Yesu 'ana tohepwailao ma tohanugetao sitoediya 'idi hada, ta Paulo ma Banaba sihe'ote'otetela 'oidiya to'aha 'idi paihowaedi Yehoba 'ina waiwaiyega sipaihowediya.

<sup>5</sup> Ma tupwadi Yesu 'ana tohemisao Palisi bodaedi 'oidiyega sitoholowa, ma sigwaeya, “Ceguma 'asa ganamuli 'adi tomiyao sihemihemisa, 'ilobwainediya ma 'wapi 'upwa si'ewa, ma wete taloinedi ma Mosese 'ina loinao simuliya nugetedi, ta 'oinega sowa-sowana sihekalesiya moisa.”

<sup>6</sup> Coinega Yesu 'ana tohemisao site tuwelowedi ma tohanugetao 'eto'auta sipaihoweya, ma nuwatuwu bewa weyahina sigwaegwae. <sup>7</sup> Ta tupwana sihe'ohe'oheya dudulena. Cigumwala ma Pita 'itoholowa ma 'igwaeya, “Tasigwao, wasanasanapu 'abehega tuta mwalo Yehoba 'oidega taugu 'ihesinuwegauwa, ma 'ahwaguwega tomiya ganamuli tetela bwebwe'ana sihesagoheya, ma sihemisaeya. <sup>8</sup> Ta Yehoba to'aha 'ateda simiyamiya 'isanasanapudi, ma taudi tomiya ganamuli 'oidiya 'itagwala pwaiya, ma Yaluyaluwa Tabuna 'i'ebwaediya gidemusa tauda meYudiya 'i'ebwaya 'esegita, <sup>9</sup> ma geya 'aigeda wete wataha 'i'abi'abi latuhe, ta 'abehega taudi hagahagadi ma tauda hagahagada, ma hesi taudi sihemiseya gide tauda tahemiseya, ma 'oinega mabwaiyada 'ateda 'i'abihe 'ehaudi.

<sup>10</sup> “Sahena Yesu 'ana tohemisao hauhauwi tupwa ganamuliya 'oidiyega 'adi 'aha'ahala mwauna wa'ebwa'ebwaedi, tabu ma Yehoba wa'abihe gamwasowali, weyahina 'aha'ahalaina tubudao meYudiya geya sowasowahidi ma si'ahali, ta tauda wete geya sowa-sowahida. <sup>11</sup> Ma hesi 'ida hemisa 'abehega 'ida Bada Yesu 'ina helauwega 'i'abihetegita, ma taudi wete Yesu 'ihelauwediya, ta 'oinega wete 'i'abihetediya.”

<sup>12</sup> Ta mabwaiyadi simiya henonowa, ma Banaba ma Paulo sihe'ote'otetela hedehed-edeyao ma 'ebe henainaidao Yehoba 'ipaihowediya tupwa ganamuli 'oidiya siteluwaedi 'idi paihowega, beno taudi geya meYudiya 'oidiya.

<sup>13</sup> Cidi gwae 'igumwala ma muliyetega Yemesa 'itoholowa, 'igwaeya, “Tasigwao, 'igu gwae bewa wahesagohe. <sup>14</sup> Saimoni 'oida bo'i 'ihepwaila 'abehega Yehoba 'ihagaina pwaiya, ma taudi geya meYudiya 'oidiyega tupwana 'ina tomotaiyao 'ihesinuwediyaya.

<sup>15</sup> Ginaula bewa weyahina mwalo palopitao Yehoba 'ina gwae sihepwaila nugeteya, 'igwae,

<sup>16</sup> 'Muliyetega yahilama ma Debida 'ina hada 'ilotaligehe ya'abihila. Bewa tuwa 'imiya gala ma hesi ya'abihe bwebwe'ane hila. <sup>17</sup> Ta 'oinega hali bodao Bada si'ebese, ma 'agu sihesinuwa tomiya ganamuli 'oidiyega, taudi wete si'ebesegau.

<sup>18</sup> Bewa Bada 'ina gwae, tauna mwalo hene nuwatuwu bewa 'i'abilatuheya.’ ”

<sup>19</sup> Ta Yemesa wete 'igwaeya, “Cigu loina bewa, taudi tomiya ganamuli Yehoba 'oina si'ita'itahila, 'abehega sahena 'adi mwau talagulagu, <sup>20</sup> ma hesi 'idi leta talele ma 'etoboda 'ehatamo talagudi beno, 'e'ahaiina hali 'ebe tuluha 'oidiya tomota si'ebwaediya geya'abwa si'ai'aidi, ta sahena ganawala, ma hebai 'ani'o didididi hesiyodi ma wete bweyaha geya'abwa si'ai'aidi. <sup>21</sup> Weyahina mwalonga hene 'ana siga nige Mosese 'ina loina 'ana tologuguyao 'asa 'aigeda 'aigeda 'oidiya simiyamiya, ta wete meYudiya 'idi hada tapwalolo 'oidiya 'etobodaedi bewa sihasihasilidi, ta tomota sihesagohedi Sabati 'aigeda 'aigeda 'oidiya.”

*Tohemisa taudi geya meYudiya 'adi loina*

<sup>22</sup> Coinega Yesu 'ana tohepwailao site tuwelo ma tohanugetao ma tohekalesiyao mabwaiyadi sinuwanuwatuhu mahemahetena, ta tupwadi 'oidiyega sihesinuwanediya ma sihewasediya, ta 'abehega Paulo ma Banaba mahetediya sitauya Anitioki. Ma 'eluwa tohekalesiyao 'adi tohanugetao 'oidiyega sihesinuwediyaga, beno Yudasa, tauna sihesaniyeya Basaba, ma wete Sailasa, <sup>23</sup> ta tohemisaowedi tupwa ganamuli 'oidiya 'idi leta si'eweya, ma 'ana lele 'igwae, “Yauwedo tasimao 'omi tohekalesiyao tupwa ganamuliya Anitioki ma Siliya ma Silisiya 'oidiya wamiyamiya. Tauma Yesu 'ana tohepwailao ma tohanugetao 'imi leta 'aleleyawa. <sup>24</sup> Mwalo tetelimi 'ahesagoheya 'abehega tupwadi loheloheya tauma 'oimega sinaowa ma hali tetela 'oinega si'abihe 'wanigomiya, beno sibo 'idi nuwatuhuega, ta geya tauma 'ima hemataluwa. <sup>25</sup> Ma tauma bewa 'a'eto'auta pwaima, ta 'ima nuwatuhu 'aigeda 'oinega tupwana 'ima loheloheyao 'ahesinuwediyaga, ta 'iyadao Banaba ma Paulo mahetediya 'ahewasaediya 'oimiya. <sup>26</sup> Taudi Banaba ma Paulo siboimo sitagwalediya ma tuta baibaiwana sitautauya 'ebe hesilae 'alodiya, 'ida Bada Yesu Keliso 'ina paihowa weyahina.

<sup>27</sup> “Ta 'ima loheloheyaedi 'ahesinuwa pwaidiya, sanidiyao Yudasa ma Sailasa, ma 'omi lina si'ebwaegomi 'imi leta 'oinega, ma wete taudi 'idi gwae 'oinega. <sup>28</sup> Cami lina Yaluyaluwa Tabuna ba'idamai 'anuwatuhuya 'abehega bewa lina bwebwe'ana ma 'etobodaedi 'ehata bewa madoudimo wamuliyedi, ta geya 'eta to'aha wete weyahina wanuwatuhu. <sup>29</sup> Cetoboda beno, to'aha tomota sipwaopwaoli hali 'ebe tuluha 'oidiya, sahena wa'ai'ai, wete hebai mabweyahidi, ma hebai dididimagaidi hesiyodi sahena wa'ai'aidi, ta wete sahena waganaganawala. Ceguma 'etobodaedi bewa 'oidiyega wa'itayahigomi, mumugami bwebwe'ana. Yauwedo.”

<sup>30</sup> Coinega site 'ehataedi sitoholowa, sisuluwa Anitioki, ma tohekalesiyao nobwa sibwau 'autedima, ta 'idi letaina si'ebwaediya. <sup>31</sup> Eeta letaina sihasiliya, ta 'ina hepweyahina siyaliyaya madouna. <sup>32</sup> Ta Yudasa ma Sailasa taudi wete palopitao, ta 'idi guguya baibaiwana 'oidiyega tohekalesiyao si'abihe waiwaiyediya.

<sup>33</sup> Ma siteluwaedi nobwa simiyamiya, 'ana siga 'idi tuta 'ilatuwa ma sitau, ta tohekalesiyaedi siloyauwedowediya, ma silokaiyoniyedi, ta sihila taudi 'adi tohewasaowedi 'oidiya. <sup>34</sup> (-) <sup>35</sup> Ma hesi Paulo ma Banaba Anitioki 'oina simiya hila, ma Badaina 'ina gwae sihehe'ita ta siguguguguya, ma tupwana baibaiwadi wete mahetediya sipaipaihowa.

#### *Paulo ma Banaba sitauya wasiwasiya*

<sup>36</sup> Ta sabwelo hisa sigumwala ma Paulo Banaba 'ihewaga, 'igwae, “Ciyagu, tahila ma gogowedi mwalo 'ida Bada tetelina 'aguguyaediya 'oidiya tahabo'enedi wete, ma tasidaowedi ta'itadi, togidega 'idi miyamiya.”

<sup>37</sup> Ta Banaba 'igwae, “Bwebwe'ana, ma Yoni tauna sihesaniyeya Maki tatoe ma mahetediya tatauya.”

<sup>38</sup> Ma Paulo 'igwae, “Nuwana sahena tauna 'i'waya'wayabugita, weyahina mwalo Pamipiliya 'oina 'i'ebesinegita, ma 'ihila 'asai, ta geya nuwana ma 'i'wayabugita 'ida sakowasi 'oina.”

<sup>39</sup> Coinega Paulo ma Banaba sihe'ohe'oheya madouna Maki weyahina, ta Banaba Maki 'itoeya ta sigeluwa wagai ma sidobi bwanabwana Saipilosi 'oina.

<sup>40</sup> Ma Paulo Sailasa 'ihesinuweya ma 'i'wayabu 'ina sakowasiina 'oina. Coinega tohekalesiyao Yehoba 'oina si'ahwa'ahwanoi, nuwanuwadi ma 'ina helauwega siteluwaedi 'ida 'abihewaiwaiyedi. Ta sitauya, <sup>41</sup> ma silohihila Siliya ma Silisiya 'asaidiyao 'oidiya, ta Paulo tohekalesiyao 'i'abihetedi, ma 'i'abihe waiwaiyedi.

## 16

#### *Timoti Paulo ma Sailasa 'i'wayabudiya*

<sup>1</sup> Paulo ma Sailasa 'idi sakowasi 'oina sitauya Debi ma Lisitila, ma Lisitila 'oina Yesu 'ana tomuliya 'aigeda silobeya, sanina Timoti, tauna sinana wahine Yudiya. Sinanaina Yesu 'ana tohemisa, ma tamana hesi gwama Gilisi. <sup>2</sup> Ma tohekalesiyao 'asa Lisitila

ma Ikoniya 'oidiya, Timotiina si'ahwa bwebwe'aneya <sup>3</sup> ma Paulo nuwanuwana ma Timoti mahetedi sisakowasi, 'oinega 'ibwauweya ma 'wapina 'i'upweya Mosese 'ina lona gidemusa, ma 'abehega meYudiya Timotiina sihe'asisiyane, weyahina meYudiya tupwaina Lisitila 'oina sisanapuya 'abehega Timoti tamana gwama Gilisi.

<sup>4</sup> Ta sisakosakowasi 'asa 'aigeda 'aigeda 'oidiya, ma lona Yesu 'ana tohepwailao ma tohanugetao mwalo Yelusalema 'oina siloinaeya sihepwaleya 'asa mabwaiyadi 'oidiya, ma 'abehega lona simolimuliye. <sup>5</sup> Coinega tohekalesiyao 'idi hemisa 'ihewaiwaiya, ma sabwelo 'aigeda 'aigeda 'oidiya 'adi boda 'imadomadou.

*Paulo 'ina nihiyega gwama Masidoniya 'i'iteya*

<sup>6</sup> Coinega Paulo ma 'iyanao tupwa Piligiya ma Galetiya 'alodiyega sitautau, ma Yaluyaluwa Tabuna 'i'ausidiya ma sahena Yehoba tetelina tupwa Esiya 'oina siloguguguyae. <sup>7</sup> Ma sinaoma Misiya ma sitohoya ma 'abehega Bitiniya 'oina siluhu, ta Yesu yaluyaluwana geya 'itagwaledi. <sup>8</sup> Coinega Misiya si'ebsineya ma sidobiya Tilowasi.

<sup>9</sup> Eeta hinuwana si'eno'eno ma Paulo 'inihiya, ta 'ina nihiina beno loheya 'aigeda gwama Masidoniya 'i'iteya, 'itoholowa ma 'i'ahwa'ahwanoi Paulo 'oina, 'igwaegwae, "Cuhabalama Masidoniya 'oina ma 'u'abihetamai."

<sup>10</sup> Paulo 'ina nihiina 'oinega 'asanapuya 'abehega Yehoba 'ibwauwemaiya ma tetela bwebwe'ana 'aguguyae meMasidoniya 'oidiya, 'oinega 'eda 'abesa sabi habala Masidoniya.

*Wahine sanina Lidiya 'ihemisa Yesu 'oina*

<sup>11</sup> Coinega waga 'alobeya ma Tilowasi 'oinega 'a'u'e, ma dumwaluna Samotilesi, ma nobwa 'a'enowa. Gona 'i'adaleya 'a'u'e hila ma Niyapoli 'oina 'asuluwa, <sup>12</sup> ma Niyapoli 'oinega 'atauya Pilipai, tauna 'asa madouna tupwa Masidoniya 'alona, ma gogoina 'alona meLoma taumana baibaiwadi simiyamiya, nage 'oina 'amiya hila sabwelo tupwana 'oidiya.

<sup>13</sup> Ma Sabatiya 'asega 'alatuwa 'atauya 'aigeda we'aha papalina, tupwaina 'anuwatuhuya 'ebe lotapwalolo, ma 'oina 'amiyatoiya, ta wahiwahine si'eto'utama wete ba'idamayao 'ahehewaegwaeya.

<sup>14</sup> Ma 'aigeda wahine 'oidiyega sanina Lidiya, 'asa Tayataila wahineina, ma Yehoba 'ana tohemisa, ta 'ina paihowa beno 'aigeda 'ale'o wasawasa 'ana tohegimwane. Ma wahiwahineyedi 'ima gwae sihehesagohedi, ma Yehoba hemisa Lidiya 'atena 'ilaguya, ma Paulo 'ina guguya 'ihemiseya, <sup>15</sup> ma tauna ma'ina susuwao 'i'abihe babitaisowediya. Ta muliyetega 'i'ahwanoyemaiya, 'igwae, "Babadao, wasanapugauwa 'abehega Yesu yahemisaeya moisa, 'oinega sowasowahina wanaoma ma wahetaumana 'igu hada?" Ta 'i'ohenemaiya, ma 'oinega 'atauya 'ina hada.

*Paulo ma Sailasa 'adi lagu deli*

<sup>16</sup> Hali sabwelo 'oina 'atautau tupwaina lotapwaloloina 'oina, ma babada tupwadi 'idi hewali gumalaulau 'alobeya, tauna hi'ahi'a 'iluhuwa solana ma 'oinega sowasowahina 'ihepwaila nugeta to'aha 'abwa 'ilatu, ta 'ina paihowa bewa 'oinega gumalaulauina 'ina babadao mane madouna si'ewa'ewa tomota 'oidiyega. <sup>17</sup> Ta wahineina 'imulimuliyemai, ma 'iwuiwui, 'igwaeya, "Bewa tomotaedi Yehoba Tomiya tabwana hedada 'ina topaihowao, ma 'abihetena 'ana 'eda 'ana tohepwailao."

<sup>18</sup> Gumalaulauina bewa gidemusa 'iwuiwui sabwelo baibaiwana 'oidiya, 'oinega Paulo wahina 'ilo'wata'wata, ma 'i'itehinowa, ma yaluyaluwaina 'ihewaeya, 'igwae, "Yesu Keliso saninega yaloinago ma gumalaulau beno 'oinega 'ulatu." Ma nage 'oina 'ihapwesa.

<sup>19</sup> Ma gumalaulauina 'ina babadao sigamwasowalemaiya, weyahina 'idi mane madouna 'ana 'ebeloba tauna gumalaulauina, ta Paulo 'i'abihe bwebwe'aneya. Coinega Paulo ma Sailasa si'abiyahidiya ma silisi dadanediya, ta sitauyediya 'ebehegimwane 'oina, ma sitoediya tolinao 'oidiya sabi yatalaedi, <sup>20</sup> ta sihegwaediya, sigwae, "Bewa loheloheyaedi taudi meYudiya, ma sitauyama 'ida 'asa ta 'ada wahi'wata'wata silagulagu,

<sup>21</sup> weyahina hali mumuga sihehe'ita, beno tauda meLoma 'ida 'etoboda, ma sahena mumugaina tapaipaihowa.”

<sup>22</sup> Ta bodaedi wete bewa gidemusa sihe'ewediya, 'oinega toloinao siloinaediya, ma Paulo ma Sailasa 'adi 'ale'o 'oidiyega silolodiya, ta 'aiwe 'oidiyega sisapi dadanediya. <sup>23</sup> Sihunu geyogeyoidiya 'igumwala, ma deliya silagu luhuwediya, ma deli 'ana to'itayahina siloinaeya ma 'ilomatayahi bwaibwaini. <sup>24</sup> Coinega to'itayahinaina 'ana loina 'ihesagoheya, ta 'ilagu lughediya deli 'alona moisa, ma wete 'ahedi 'i'ahuyahidiya 'aiwe madoudi 'oidiyega.

*Paulo ma Sailasa sihapwesa ma deli 'ana to'itayahi 'inuwabuiya*

<sup>25</sup> Ma hinuwana Paulo ma Sailasa si'ahwa'ahwanoi ta siwaliwali Yehoba 'oina, ta 'oinega toluhu deliyao mabwaiyadi sihehesagohedi, <sup>26</sup> ma mwani'ini'i madouna 'ipiliya ta sisalutuwama, ma hada deli 'ana wahuwahu 'inihuwa, ta deliina 'ana 'ahwa'edao si'eso'ediya, ma 'oinega toluhuwedi 'ahedi 'adi paiyao si'eliasidiya siboidimo.

<sup>27</sup> Ta deli 'ana to'itayahina 'eno'enowega 'isalutuwama, ta 'ahwa'eda so'eso'edi 'i'itediya, ta 'ina nuwatuhi toluhuwedi siden pwaiya, 'oinega 'ina 'elepa 'aleha 'i'eweya ta 'abehega 'iboi 'ida lohe'amasi hile.

<sup>28</sup> Ta Paulo 'i'iteyama, ma 'iwuiya, 'igwae, “Ciyagu, sahena 'uboi 'ulohelohe 'amasigo. Mabwaiyama bewa 'amiyamiya.”

<sup>29</sup> Coinega to'itayahinaina 'ina topaihowao 'oidiya 'ibwauwa ma mayale si'eweyama, ta mayale 'i'eweya, ma 'ipili ta 'iluhuwa ma'ina dedela, weyahina 'imatauta, ta 'ibe'u talutalubu'iya Paulo ma Sailasa matadiya. <sup>30</sup> Ma muliyetega 'itoholo ta 'itoe latuhedima, ta 'igwae, “Babadao, wahegwaegau to'aha yapaihowa ma 'oinega Yehoba 'i'abihetega?”

<sup>31</sup> Ma Paulo ma Sailasa sigwaeya, “Ceguma Bada Yesu 'oina 'uhemisa, nata 'owa ma'ino susuwao wete 'abihetena waloba.” <sup>32</sup> Ta Badaina tetelina sihe'ote'oteteliya tauna ma'ina susuwao 'oidiya.

<sup>33</sup> Hinuwana nage 'oina 'itoe latuhediya ma 'adi gane ma bweyaha sapiyega silobeya 'ibuyodiya, ta tauna ma'ina susuwao sibabitaiso. <sup>34</sup> Sibabitaiso ta 'itoediya tauna 'ina hada, ma 'oinega 'adiwa 'i'atububuya, ma si'aiya. Ta deli 'ana to'itayahinaina ma'ina susuwao siyaliyaya madouna, weyahina 'ina hemisa hauhauna Yehoba 'oina 'ilobeya.

<sup>35</sup> Gona 'i'adaleya ma toloinao 'idi topaihowao, gide polisi, sihewasediya deli 'ana to'itayahi 'oina ma siloineya 'abehega, “Loheya 'eluwaedi deliya 'alagu luhuwediya 'ulihasi ma sitauya.” <sup>36</sup> Coinega to'itayahiina deli 'alonga 'iluhuwa ma wasaina 'ihewawaleya Paulo 'oina, 'igwae, “Toloinao wasa sihewaseyama 'abehega yalihakigomi, 'oinega wahapwesama ma ma'imi yaliyaya watau.”

<sup>37</sup> Ma Paulo 'ilogwahata, 'igwaeya, “Sahena 'atautau. Weyahina geya 'aigeda 'ima puimo yatala 'oina siloba, ma boda matadiya sihunu dadanemaiya, ta deliya silagu luhuwemaiya, ma tauma hesi mwalo 'ahe Loma. To'aha weyahina 'abehega silihasimai ma sitoe latuhemai dahwanega? Ma 'ilobwainediya hesi taudi tuwa sinaoma ma sitoe hapwesemai.”

<sup>38</sup> Coinega polisyedi sihila toloinao 'oidiya ma Paulo 'ina gwae sihewawaleya 'oidiya. Ta toloinaowedi sideba mwadina madouna, weyahina hepwaile bewa 'oinega sisanapuya 'abehega Paulo ma Sailasa sihe Loma. <sup>39</sup> Coinega sinaoma deliya, ma 'atemuyemuyega sigwae helauwa Paulo ma Sailasa 'oidiya, ma deliyega sitoe hapwesediya, ta si'ahwanoiya 'oidiya, nuwanuwadi ma si'ebesinedi, sitauya hali 'asa.

<sup>40</sup> Ta Paulo ma Sailasa deliyega sitauya Lidiya 'ina hada, ma tohekalesiyao mahetediyao sihe'iyaliyagu ma siguguya 'oidiya, ma muliyetega sitauya.

17

*Paulo ma Sailasa galana silobeya 'asa Tesalonaika 'oina*

<sup>1</sup> Eeta sitauya Amipipoli ma Apoloniya 'oidiya, ma Tesalonaika 'oina silatuwa, ta Tesalonaika 'oina meYudiya 'idi hada tapwalolo 'imiyamiya. <sup>2</sup> Ta Paulo 'idi lotapwalolo

'oina 'iluhuwa, gidemusa tupwa mabwaiyana 'oidiya 'ipaipaihowa 'esa, ma nobwa Sabati 'etoi 'oidiya Buki He'asisi 'oinega 'ihe'ih'e'ita ma ba'idanao sihehe'ohe'ohe,<sup>3</sup> ta Pauloina sanapu 'i'ebwaediya, 'igwae, "To'abihetenaina 'ilobwaineya ma muya 'iloba ma 'i'amasa ta wete 'amasega 'itoholo hila." Ma wete 'igwaeya, "Yesuina yahehepwaile 'oimiya tauna tuwa To'abihetenaina."

<sup>4</sup> Coinega tupwadi si'ahwa moisaeya, ma Paulo ma Sailasa 'idi boda 'oina siluhuwa, ta wete Yehoba 'ana tohe'asisiyao taudi tupwa ganamuli 'oidiyega ma wahiwahine sanidi madoudi 'oidiyega tupwana baibaiwadi wete sihemisa.

<sup>5</sup> Ta meYudiya Paulo ma Sailasa sihe'ipi'ipiyediya ma si'ahwa galagalaediya, ma tupwana toyawala besobeso galadi siloinedi ma boda madouna sihegogonediya ta nuwanuwadi silo'alehedi. Coinega Yesoni 'ina hada sihaneiya, 'idi nuwatuhu 'abehega Paulo ma Sailasa hadai simiyamiya, ma 'abehega sida 'abiyahidi, si'ewa latuwedi boda 'oidiya. <sup>6</sup> Ma si'ebesa 'asaediya, ta Yesoni ma tupwana tohekalesiyao ba'idanao si'abiyahidiya, ma 'oinega sitoedima 'asa 'ana toloinao 'oidiya sabi heyatalaedi, ta sibwaubwau sigwae, "Loheloheyaedi taudi tupwa mabwaiyadi 'adi to'abihegalao sitauya pwaima 'ebwa,<sup>7</sup> ma Yesoni 'ina hadai sihetaumana, ta 'idi he'ita 'oinega Sisa 'ina loina siligehiya, weyahina sigwaegwae 'abehega kini hauhauna 'ilatuma, sanina Yesu."

<sup>8</sup> Casa 'ana toloinao ma bodao he'ewa bewa sihesagoheya ta si'ateyohowa,<sup>9</sup> 'oinega siloina Yesoni ma'iyanao 'oidiya ma 'abehega 'idi mane 'oinega sida hemaisa, ta wete sida miya daumwala. Ma sihemaiseya ma silihasidiya, ta sitauya.

#### *Paulo ma Sailasa 'idi paihowa tupwa Beliya 'oina*

<sup>10</sup> Ma hinuwana tohekalesiyao Paulo ma Sailasa sihewasaedi ma sida tauya Beliya, 'oinega sitauya, ma tutaina silatuwa Beliya siluhuwa meYudiya 'idi hada tapwalolo 'oina, ta Yesu wasana sihe'ita. <sup>11</sup> Mwalo Tesalonaika 'oina meYudiya genuwadi wasaina, ma hesi meYudiya Beliya 'oina 'idi tagwala bwebwe'ana, ma wasaina nuwadi 'i'eweya, 'oinega sabwelo 'aigeda 'aigeda Buki He'asisi sihasihisili ta 'abehega wasa bewa 'ana moisa sida sanapu. <sup>12</sup> Coinega meYudiya tupwana baibaiwadi sihemisaeya, ma wete taudi geya meYudiya 'oidiyega wahiwahine, taudi sanidi madouna, ta wete loheloheya tupwana baibaiwadi.

<sup>13</sup> Ta meYudiya Tesalonaika 'ana tomiyanao sihesagoheya 'abehega Paulo Yehoba wasana 'iloguguya 'asa Beliya 'oina, ma silomwayamwayau ma bodao sihenywa lagudiya ta 'abehega Paulo ma Sailasa sida lo'alehedi.

<sup>14</sup> Coinega tohekalesiyao siloina mwamwayau, ma Paulo sihetuneya ma 'isuluwa gogo holai 'oina, ta Sailasa ma Timoti 'ebwa ba'idadiyao simiyamiya. <sup>15</sup> Ta tupwana tohekalesiyao Paulo si'wayabuya ta sitauya Ateni, ma 'oinega Paulo loina 'i'ebwaedi ta 'abehega Sailasa ma Timoti silomwamwayauma Ateni 'oina, ta to'wayabuvedi sihila Beliya.

#### *Paulo 'ina miyamiya Ateni 'oina*

<sup>16</sup> Ma Paulo Ateni 'oina Sailasa ma Timoti weyahidi 'abwa 'iyamwayamwana, ta 'inu wagala madouna weyahina 'i'iteya meAteni geya Yehoba 'oina sihemihemisa ta hesi 'idi 'ebe hemisa hagana ma hagana, ma baibaiwa hedada. <sup>17</sup> Coinega ba'idanao sihe'ohe'ohe nuwatuhu bewa weyahina, meYudiya ma tupwadi Yehoba 'ana tohemisao wete ba'idadiyao sigwaegwae, meYudiya 'idi hada tapwalolo 'oina, ma wete toni'asa, 'eguma 'ihalobadi 'ebe gimwane 'oina, ba'idadiyao sigwaegwae sabwelo 'aigeda 'aigeda 'oidiya.

<sup>18</sup> Ta tupwadi tosinasinapu wete, taudi sihesaniyediya Epikulo, ma tupwadi Sitoike wete, Paulo ba'idadiu sihehegwaegwae ta tupwadi taudimo 'oidiya sihe'ote'otetela, sigwaeya, "Ciya! Toheyauyaule to'aha 'igwaeneya?" Ma tupwadi sigwae, "Nuwana hali Yehoba weyahina 'iloguloguguya," weyahina sihesagoheya Yesu 'ina toholohila 'amasega weyahina 'iloguloguguya. <sup>19</sup> Coinega Pauloina sitoeya hada 'eto'auta sanina Aliyopago 'oina ma sihegwaeya, "Cino he'ita bewa hauhauna,<sup>20</sup> ta 'oima 'ana hesagoha



'abehega 'ebe henainaida, 'oinega 'ana sanapu 'uda lihasi ma 'ada sanapu.” <sup>21</sup> Ta meAteni ma'adi taumanao mabwaiyadi 'idi 'ebe nuwa'ewa beno sanapu hauhaudi 'adi he'ita ma 'adi hesagohamo.

<sup>22</sup> Coinega Paulo hada 'eto'auta 'alona 'itoholowa ma 'iloguguya 'oidiya, 'igwaeya, “MeAteni, 'omi yasanapugomi 'abehega wahehetapewa 'imi tapwalolowao 'oidiya, <sup>23</sup> weyahina 'igu yawalao 'oidiya 'omi 'ebe tuluha baibaiwadi ya'itediya ma 'oidiyega 'aigeda 'ebe pwaoli ma'ana lele ya'ita lobeya, ta 'ana lele bewa gidemusa 'igwaegwae, ‘Yehoba tauna geya tada sanapuya 'ina 'ebe pwaoli bewa.’ Ma Yehoba 'ina 'ebe pwaoli beno 'oina watulutuluha ta geya wada sanapuya, tauna 'iboi yahehepwaila 'oimiya.

<sup>24</sup> “Tauna bale'u mabwaiyana ma ginaula mabwaiyana 'oina simiyamiya 'adi tohe-masaleha, ta galewa ma bale'u 'adi Bada. Coinega geya hadao tomota nimadiyega si'abi'abidi 'alodiya Yehobaina 'ida miya. <sup>25</sup> Ma tomota tauda geya sowasowahida ma 'aigeda to'aha nimadega tauna Yehobaina ta'ebwae, 'eguma tanuwatuhu 'abehega nuwanuwana, ta tauna hesi yawasida ma yaluyaluwada ma 'ida tobwatobwa mabwaiyana 'i'ebwaegita. <sup>26</sup> Ta 'aigeda loheya sanina Adama 'oinega hali tupwa ma hali tupwa tomotenidi Yehobaina 'ibubugita, ma 'abehega tomota si'elelewana bale'u mabwaiyana 'oidiya, ma boda 'aigeda 'aigeda 'idi sauga ta 'idi tupwa Yehoba 'iloina pwaidiya. <sup>27</sup> Cina nuwatuhu 'abehega tauna si'ebese, ma nuwana 'abwama silotoho, bo nuwana siloba. Ta hesi Tohemasalahaina mabwaiyada deida 'imiyamiya. <sup>28</sup> Weyahina 'Tauna 'oinega yawasida ta'ewa'ewa ma ba'idadai tatautauya ma wete tamiyamiya.’ Ma 'omi wete 'imi wali tobui tupwadi Yehobaina weyahina sigwaeya, 'Tauda moisa tauna natunao.’

<sup>29</sup> “Coinega gesowana tanuwatuhu 'abehega Tamadaina gidemusa ma'ama'ayau, beno tomota 'idi nuwatuhuega ma goula bo siliba bo da'ule 'oidiyega sibubuya.

<sup>30</sup> “Tutaina mwalo tomota Yehoba sihemwage mwageyeya, 'oinega geya 'ida gamwasowalediya, ma hesi bewa tuwa tauda tomota tupwa mabwaiyana 'oidiya 'iloinaegita ma 'ida pui 'oidiyega tanuwabui. <sup>31</sup> Weyahina 'ida sabwelo bwa'omatana 'abwama 'iupaeya ma mebale'u mabwaiyada 'ada loina dumwadumwaluna 'ida 'ebwaegita loheyaina 'ihesinuweya 'oinega, ma loheyaina 'amasega 'i'abihetoholo hileya ma 'oinega tomota mabwaiyada wasa bewa tada 'ahwa moisa.”

<sup>32</sup> Ma bodaedi to'amasa 'idi toholo hila wasana sihesagoheya, ma tupwana sihenameya, ta tupwadi sigwaeya, “Nuwanuwama ma 'abwama nuwatuhu bewa weyahina 'uhe'ote'otetela hila ma 'ada hesagoha.”

<sup>33</sup> Eeta Paulo bodaedi 'oidiyega 'ilatuwa. <sup>34</sup> Ma tupwadi tomota Paulo 'ina gwae sihemiseya ta 'ina boda 'oina siluhuwa, 'aigeda loheya sanina Dionisiyo, tauna toloina 'aigeda boda Aliyopago 'oidiyega, ma 'aigeda wahine sanina Damali, ma tupwadi wete.

## 18

### *Paulo 'ina paihowa 'asa Kolinita 'oina*

<sup>1</sup> Muliyetega Paulo Ateni 'i'ebesineya ta 'inaowa Kolinita 'oina, <sup>2</sup> ma gwama Yudiya 'ilobeya, sanina Akuila, ta 'ina 'asa Ponitio, ma mamwanena Pilisila nige tuwa Italiyega sinaoma, weyahina kini Kolodiya meYudiya mabwaiyadi 'iloinaediya ma Lomega sihapwesa. Ma Paulo Akuila mamwanena 'ihabo'enediya, <sup>3</sup> ma taudi 'idi paihowa hebai 'wapidi 'oidiyega sisahisahila yoheyohe, gidemusa Paulo 'ina paihowa. Ta 'ihetaumana 'idi hada, ma mabwaiyadi yoheyohe sipaihowediya. <sup>4</sup> Ma Sabati 'aigeda 'aigeda 'oidiya meYudiya 'idi hada tapwalolo 'oina 'igwaegwae toluhuwao ba'idanao, 'itotoho nuwanuwana ma sida hemisa, ma tupwadi meYudiya ma tupwadi wete ganamuli, taudi geya meYudiya, sihemisaeya.

<sup>5</sup> Ta tutaina Sailasa ma Timoti Masidoniyege sihapwesama, Paulo 'ina loguguya 'oina 'ihetapewa waiwai, ma meYudiya 'oidiya 'ihehepwaila 'abehega To'abihetenaina tauna Yesu. <sup>6</sup> Taudi hesi sihe'ohe'oheya, ta si'ahwa 'abo'aboweya, ta 'oinega Paulo 'ana 'ale'o 'ilohutuhutuiya matadiya, beno 'idi logwahata 'ana 'ebe'ita 'ipaihoweya, ma 'ihewaediya, “Comi 'abwa wahesilae 'imi logwahata bewa weyahina, ta beno waboi 'imi

loinega, ta geya taugu 'igu loinega. Coinega ya'ebesinegomi ma tetela yatauye tomiya ganamuli 'oidiya.”

<sup>7</sup> Ma 'idi hada tapwalolo 'oinega 'ihapwesa, ta 'iluhu Taito Yusito 'ina hada, tauna Yehoba 'ana tohe'asisi 'aigeda, ta 'ina hadaina meYudiya 'idi hada tapwalolo deina.

<sup>8</sup> Ma hada tapwalolo 'ana tohanugeta, sanina Kalisipo, ma'ina susuwao, Bada Yesu 'oina sihemisa, ma meKolinita tupwana baibaiwadi wete Paulo 'ina guguya sihesagoheya, ta Yesu 'oina sihemisa, ma sibabitaosowa.

<sup>9</sup> Ta hinuwanega Paulo 'ina 'enomata'ite'itega Bada Yesu 'i'iteya, ta Yesu 'igwaeya, “Paulo, sahena 'u'ate'ateyoho, ma tuwa hesi tetela 'uhewaila latuwe, ma sahena 'ulololagu. <sup>10</sup> Ma taugu hesi ba'idau tamiyamiya, weyahina 'asa bewa 'oina tomota baibaiwadi 'abwa sihemisegau ma 'igu bodao taudi, ma sahena 'aigeda taiya sowa-sowahina 'ilo'alehego, nuwana 'i'abi hegalago. Geya!” <sup>11</sup> Ta bolime 'aigeda ma tupwana 'oidiya Kolinita 'oina Paulo 'imiyamiya, ta Yehoba 'ina gwae 'ihehe'itae.

<sup>12</sup> Eeta muliyetega Galiyo 'ihetoloina madouna tupwaina Akaya 'oina, 'oinega meYudiyaedi siloina ta Paulo si'abiyahiya sitauyeya sabi yatala Galiyoina matana, <sup>13</sup> ma sigwae, “Loheyaina bewa tomota 'itebatebaedi ta 'abehega hali tapwalolo Yehoba 'oina sipaihowa, ma bewa 'ida loina 'iligelighi.”

<sup>14</sup> Ma Paulo 'i'iuna ma 'igwae hila, ta Galiyo hesi 'igwae nugeta meYudiya 'oidiya, 'igwaeya, “MeYudiya, 'omi 'igu gwae wahesagohe: Ceguma loheya bewa 'imumuga galagala, nuwana pui 'ipaipaihowadi, 'ilobwaineya ma 'imi he'ewa yahesagohe, <sup>15</sup> ma hesi nuwatuha bewa, waboi tuwa 'imi gwaegwae ma saniyao ma loinao 'imi 'asega, 'oinega waboi tuwa waloina. Taugu yalogwahata.” <sup>16</sup> Ta 'ebe yatala 'oinega 'ipa'idiya.

<sup>17</sup> Ma bodaedi Sositeni si'abiyahiya, tauna meYudiya 'idi hada tapwalolo 'ana to'i-tayahina, ma sihunu dadaneya Galiyo 'ina 'ebe yatala matana, ma Galiyoina geya wete weyahidi 'ida nuwatuha.

#### *Paulo 'ihila Anitioki*

<sup>18</sup> Lo'aleha bewa mulina Paulo nobwa 'imiyamiya sabwelo hisa 'oidiya, 'oinega muliyetega tohekalesiyaedi 'iloyauwedowediya ta wagai 'igeluwa sabi 'adau Siliya weyahina. Ma Akuila ta Pilisila wete mahetenao sigeluwa. Ta 'aigeda ginaula, beno 'abwa ma sigelu, 'abwa 'asa Kenikiliya 'oina simiyamiya, Paulo 'ina gwae hemisa 'ipaihoweya Yehoba matana, ta gwae hemisaina 'ana 'ila'ilala beno Paulo debana si'oliya.

<sup>19</sup> Cidi 'adauina 'oina nugeta siluhuwa Epeso, ma Akuila mamwanena sisuluwa simiyamiya, ta Paulo wete 'isuluwa, 'iluhuwa meYudiya 'idi hada tapwalolo 'oina, ma 'itohotoho ma 'abehega 'ilididima ma Keliso 'oina sihemisa, ta mahetenao sihegwae. <sup>20</sup> Coinega si'ahwanoyeyaya ma tuta dudulena mahetediu simiyamiya, ta 'ilogwahata.

<sup>21</sup> Cigwaeya, “Cabwa yahilama, 'eguma Yehoba 'itagwalegau.” Coinega Epesowedi 'iloyauwedowediya, ta 'igelu hila, <sup>22</sup> ma 'itauya Sisaliya 'oina 'isuluwa, ta 'ilaga Yelusalema ma tohekalesiyao mahetenao sihe'iyayaguwa, ta muliyetega 'itauya Anitioki.

<sup>23</sup> Anitioki 'oina 'imiya 'amana, ta muliyetega 'itoholo ma Galetiya ma Piligiya 'asanao 'aigeda 'aigeda 'oidiya 'isakosakowasi, ma Yesu 'ana tohemisao 'i'abihe pa'alidi.

#### *Apolosa 'iguguya Epeso ma Kolinita 'oidiya*

<sup>24</sup> Tutaina 'oina, 'aigeda gwama Yudiya sanina Apolosa 'inaoma Epeso. Tauna 'asa Aleksanidela loheyaina, ta tauna guguya 'ana, ma Buki He'asisi 'isanapu bwaibwainiya.

<sup>25</sup> Ta wete he'itao Yehoba 'ina 'eda weyahina 'isanapudiya, ma 'ihetahetapewa Yesu tetelina 'ihehe'ita. Cina he'itaina moisa, ta hesi tupwanamo, weyahina to'aha Yoni 'iguguyaeya 'ina babitaoso weyahina Apolosaina 'isanasanapu, ta Yesu tetelina 'ana 'ebe losaloha geya 'isanapu.

<sup>26</sup> Ta tutaina Epeso 'oina 'ilatuma, 'iluhuwa meYudiya 'idi hada tapwalolo 'oina, ta ma'ina waiwai 'iloguguya. Ma Akuila ma Pilisila 'ina guguya sihesagoheya 'abehega 'ina sanapu tupwanamo tuwa, 'oinega sitoeya, ta Yehoba 'ina 'eda mabwaiyana sihe'itaeya.

<sup>27</sup> Muliyetega Apolosa nuwanuwana ma 'ihabala Akaya, ta tohekalesiyao silemeya, ta Yesu 'ana tohemisao Akaya 'oina 'idi leta sileleya, ma Apolosa si'ebwaeya ta 'eguma to tuta Akaya 'oina 'ilatu 'idi leta 'i'ebwaedi ma sitoe 'idi hada.

Coinega Apolosa 'ihabala ta 'iluhuwa Akaya 'oina, ma taudi meAkaya, mwalo Yehoba 'ina helauwega Yesu sihemisaeya, ma 'iyamo Apolosaina 'ina guguyega 'ilemedi madouna, <sup>28</sup> ta 'ina he'ita meYudiya 'idi he'ita 'ihewaiwai sineya, weyahina Buki Tabu 'oinega 'ihe'itadi 'abehega To'abihetenaina tauna tuwa Yesu.

## 19

### *Paulo 'ina paihowa Epeso 'oina*

<sup>1</sup> Apolosa 'abwama Kolinita 'oina 'imiyamiya, ma Paulo 'isakowasiya tupwa pwatula 'oidiya, ma Epeso gadowa 'oina 'ilatuma. Epeso nage 'oina, Yesu 'ana tomuliyao tupwadi 'ilobediya, <sup>2</sup> ma 'ihesilalediya 'igwae, “Ciyagwao, tutaina Yesu wahemisaeya Yaluyaluwa Tabuna 'ina waiwai walotohoya bo geya?” Ma sihegwaeya sigwae, “Geya. Geya 'asanapu 'abehega Yaluyaluwa Tabuna 'imiyamiya.”

<sup>3</sup> Ma Paulo 'igwaeya, “To babitaiso hede 'oinega wababitaiso?” Ta sigwae, “Yoni 'ina babitaisowega.”

<sup>4</sup> Ta Paulo 'ihewgaediya, “Yoni 'ina babitaiso beno nuwabui mumuga galana weyahina, ma 'ihemataluwegomiya ta 'abehega Yesu wahemisaeya, tauna 'abwa 'imulimuliyama.”

<sup>5</sup> Gwae bewa meEpesowedi sihesagoheya ma sinuwa sabwalena moisa, 'oinega Bada Yesu saninega sibabitaiso. <sup>6</sup> Ma Paulo 'i'abi debediya, ma Yaluyaluwa Tabuna 'iluhuwa 'oidiya, ta 'ina waiwaiyega hali 'enana ma hali 'enana 'oinega sigwae latuwa, ma Yehoba 'ina gwae sipalopisai latuweya. <sup>7</sup> Ta mabwaiyadi 'adi baibaiwa gide tuwelo.

<sup>8</sup> Ma wai'ena 'etoi 'oidiya meYudiya 'idi hada tapwalolo 'alona Paulo 'iluhuluhu, ma Yehoba 'ina hetoloina weyahina ma'ina 'atepatu 'igwaegwae, ta 'i'oh'e'oh'e 'i'i'i'imidi.

<sup>9</sup> Ma tupwadi deba pa'apa'alidi ma geya sihemihemisa, ta Yesu 'ina 'edaina si'ahwa galagalaeya tohegogonaowedi matadiya. Coinega Paulo 'itoholowa ta 'ana tomuliyao ba'idanao silatuwa, ma siluhuwa Tilano 'ina hada 'ebe se'ulu 'oina, ma nobwa sabwelo 'aigeda 'aigeda 'oidiya Paulo 'ilologuguya.

<sup>10</sup> Cina paihowaina bewa gidemusa tuwa 'ipaipaihowa bolime 'eluwa 'oidiya, ma tupwa Esiya 'ana tomiyanao mabwaiyadi, meYudiya ma taudi geya meYudiya, Bada Yesu wasana sihesagoheya.

### *Sikiba natunao*

<sup>11</sup> Ta Yehoba hedehedede hagadi 'i'abi latuhediya Paulo 'ina paihowega, <sup>12</sup> ta 'ana 'amweyahi 'ana 'ebe sauwao ta 'ana 'ale'owao si'ewediya ma tolohalao 'oidiya si'abihe pa'idiya, ta 'adi lohala sigumwagumwala, ma wete hi'ahi'a siula latuhediya. <sup>13-14</sup> Ma tupwadi meYudiya 'adi to'obao nobwa simiyamiya, ma taudi sisakosakowasi, ma 'oba 'oinega hi'ahi'a siulaula latuhedi. Ta tupwadi Yudiyaedi Paulo 'ina paihowa wasana sihesagoheya, taudi Topwaoli Madouna, sanina Sikiba, natunao site sebeni. Ma site sebeniyedi sitohe 'abehega Bada Yesu saninega hi'ahi'a tolohalao 'oidiyega sida ulalatuheidi, ta 'aigeda buwa sihegwaeya sigwae, “Yesuina Paulo 'iloguguyaeya, tauna saninega 'aloinago ma loheya 'u'ebesine ma 'utauya.”

<sup>15</sup> Ma hi'ahi'aina 'ihewgaediya, “Yesu ma Paulo yasanasanapudi, ma taiyawedi 'omi?” <sup>16</sup> Coinega loheyaina 'igihebuweya, 'isopila ma to'obaedi 'ilo'alehediya, ta 'adi 'ale'o 'isabu yahulediya, ma 'ihunudiya, ta 'wahi daisidi hadega sideni.

<sup>17</sup> Ma wasa bewa Epeso 'ana tomiyanao mabwaiyadi sihesagoheya ta simatauta, taudi meYudiya, ma taudi geya meYudiya, ta Bada Yesu sanina si'ahwa waiwaiyeya.

<sup>18</sup> Ma tohemisa hauhaudi baibaiwadi sitauyama ta boda matadiya 'idi mumuga guguyou sihepwalediya, 'abehega taudi wete si'oba'oba. <sup>19</sup> Ta 'idi 'obao bukidi sihegogonedima, ma boda matadiya sigabu yahulediya, ma bukiyedi 'adi maisa sisahwa hegogonediya, ma pipiti tausani kina gidemusa.

<sup>20</sup> Nage 'oinega Yehoba 'ina gwae 'idabalala ta 'ihewaiwai tomota baibaiwadi 'oidiya.

*MeEpeso silo'aleha*

<sup>21</sup> Muliyetega Yaluyaluwa Tabuna Paulo 'ihenuwa laguweya 'abehega Masidoniya ma Akaya 'oidiyega 'ida tauya ma Yelusalema 'oina 'ida latu, ma 'igwaeya, “Yanugenugeta Yelusalema, ma 'abwa muliyetega yatauya Loma. Gide 'igu nuwatu.”

<sup>22</sup> Ta hesi Pauloina 'imiyamiya Esiya tuta to'uto'upana 'oina, ta 'ana tolemaowedi Timoti ma Elasio 'ihewasa nugetediya, ma sitauya Masidoniya. <sup>23</sup> Ma tuta nage 'oina he'ohe'ohe madouna 'ilatuwa Yesu 'ina 'eda weyahina, ta bewa gidemusa 'ilatu 'esa.

<sup>24</sup> Loheya 'aigeda sanina Dimitilo, tauna dayagi 'ana topaihowa siliba 'oinega, ma meEpeso 'idi yehoba wahinena sanina Dayana 'ina hada tapwalolo 'alu'aluwana 'i'iudi 'ipaihowediya, ma 'ihehegimwaneyedi tomota 'oidiya. Ma 'ina topaihowao 'idi wasawasa madouna dayagiyedi 'oidiyega silobaloba. <sup>25</sup> Ma Dimitilo 'ina topaihowao 'ibwau 'autediya, ma tupwadi wete 'idi paihowa tauna gidemusa, ta 'ihewaediya 'igwae, “Ciyagwao wanuwatuhuyahi 'abehega paihowa bewa 'oinega 'ida wasawasa talobaloba. <sup>26</sup> Ma Paulo 'ina he'ita 'oinega tomota baibaiwadi 'ihe'itediya 'igihe nuwabuidiya, ma 'ina gwaegwae 'abehega Yehoba tomota nimadiyega si'abidi geya Yehoba moisa. Ta bewa gidemusa geya Epesomo 'oina ma hesi tupwa baibaiwadi Esiya 'alona. Ta 'omi wasanapu pwaiya, ma wa'iteya Pauloina 'ina paihowa, 'awa?

<sup>27</sup> “Bewa 'oinega yamatauta, 'abwama nuwana tomota gesowana 'ida tobwatobwao sigimwanedi, ma 'abwa wete 'ida Yehoba madouna Dayana 'ana he'asisi ta 'ina hada tapwalolo siheginaula besobesowe. Weyahina meEsiya ma mebale'u mabwaiyada Dayana 'ana to'etuluhao.”

<sup>28</sup> Ma bodaowedi Dimitilo 'ina gwae sihesagoheya, ta Paulo 'ina paihowa weyahina sigamwasowala madouna, ta sibwaubwau, “Tauda meEpeso 'ida yehoba Dayana tabwana moisa.”

<sup>29</sup> Coinega tomota baibaiwadi sipili 'autama ma siwuiwui, ma hedagadaga besobeso sipaipaihowa, ta meMasidoniya 'eluwa si'abiyahidiya, taudi Paulo 'ina sakowasi 'oidiya 'ana to'wayabuwo, sanidi Geyo ma Alisitako, ta sipilihediya hada 'ebe 'eto'auta 'oina.

<sup>30</sup> Ma Paulo nuwanuwana ma tohedagadagaowedi 'oidiya 'itautauya ma tohekalesiyao si'etobodeya, <sup>31</sup> ta tupwadi wete Paulo 'iyanao, taudi meEsiya babadao, gwae sihewasaeya ta Paulo si'ahwanoiyeya ma 'abehega gesowana 'ida luhu hada 'ebe 'eto'autaina 'oina.

<sup>32</sup> Ma bodaedi gide sibuwu ma sibwaubwau, ta mabwaiyadi 'idi wui hagana, ma hedagadaga huhuna baibaiwadi geya sisanapu.

<sup>33</sup> Ta meYudiya 'aigeda loheya sanina Alekisana silohetu hetuneya, ma 'ida laga 'oidiya ma 'ida gwae. Coinega 'itoholowa matadiya ma tupwadi tomota 'idi nuwatuwedidi sibwau latuhediya 'oina, 'oinega nimanega 'ihewaediya 'abehega hedagadaga sida lolagu, ma meYudiya 'idi gwae 'ida hepwailla latuhe. <sup>34</sup> Ma bodao si'inaneya 'abehega tauna gwama Yudiya, 'oinega sibwauwa madouna, ma 'idi hedagadaga tuta dudulena geya silolagu, ma sibwaubwau mahemahetena, sigwaegwae, “Tauda meEpeso 'ida yehoba Dayana tabwana moisa.”

<sup>35</sup> Coinega 'asaina 'ana tohanugeta 'itauyama, ta hedagadaga 'igihelolaguya, ta 'ihewaediya, 'igwae, “MeEpeso yo, mabwaiyada tasanapuya 'abehega Dayana tabwana hedada 'ina hada tapwalolo 'ana to'itayahina tauda, ma wete 'ina da'ule tabu galewega 'ibe'uma. <sup>36</sup> Ta gesowana wete taiya 'isinasingita 'ida tapwalolo bewa weyahina. Coinega 'ilobwainegomiya ma wahrenonomo ta sahena wahedagadaga besobeso, nige gidemusa.

<sup>37</sup> “Ma wa'ita loheloheyaowedi watoedima, taudi geya 'ida hada he'asisi 'oinega sida yagaha, bo nuwana 'ida Yehoba mewahinena sida 'ahwa galagalae, 'awa?

<sup>38</sup> “Ta 'eguma Dimitilo ma'iyanao nuwanuwadi ma taiya siheyatalae, beno bwebwe'ana. Cebe yatala ma toloinao simiyamiya, ma sosowahidi 'imi yatala sihesagohe ma

sinuwanuwatuhu weyahimi. <sup>39</sup> Ma 'eguma wete hali nuwatuhu weyahina 'abehega wada yatala, delihegogona madouna 'oina nuwatuhuina 'abwa weyahina taloina.

<sup>40</sup> “Ta nige 'imi hedagadaga besobeso weyahina 'ana 'ita nata lolina taloba, weyahina geya 'ida huhumo.”

<sup>41</sup> Cina gwae 'ilosalohiya, ta bodao 'ihewasaediya, ma siliya sawala 'idi hada.

## 20

### *Paulo 'ina sakowasi Masidoniya ma Gilisi 'oidiya*

<sup>1</sup> Ma dagadaga 'igumwala pwaiya, ta Paulo tohekalesiyao 'ibwauwedima ta 'iguguyediya, 'oinega 'iloyauwedowediya, ta 'itauya Masidoniya. <sup>2</sup> Ma Masidoniya tupwainao 'oidiya 'isakowasiya, 'iloguguya tohekalesiyao 'oidiya, 'i'abihe pa'alidiya, ta muliyetega tupwa Gilisi 'oina 'ihapwesa, <sup>3</sup> ta nobwa wai'ena 'etoi 'imiyamiya, ta 'i'unamo wagega si'adau, Siliya weyahina, ta tupwana gwaegwae 'ihesagohediya meYudiya siloiloina tauna weyahina sabi 'abiyahina, ma 'oinega 'ina 'eda 'ibuiya ta 'abehega Masidoniya 'alonega 'ihila.

<sup>4</sup> Ma loheloheya tupwana ba'idanao sitauya, 'aigeda gwama Beliya, tauna Pilo natuna sanina Sopeta, ma meTesalonaika siteluwa, taudi Alisitako ma Sikanido, ta gwama Dabi sanina Gayo, ta Timoti wete, ta meEsiya siteluwa, sanidiyao Tikiko ma Tilopimo.

<sup>5</sup> Taudi bewa sitauya nugeta wagega ma Tilowasi 'oina siyamwayamwa. <sup>6</sup> Ta tauma Pilipai 'oina 'amiyamiya 'ana siga pwalawa daisinamo 'ana guyai 'apaihowa. Cigumwala ta tauma wete 'ageluwa, ma sabwelo nima 'ai'aigeda 'a'ada'adau, ma 'asohota Tilowasi, ma 'iyamayaowedi 'alobediya, ta sabwelo sebeni wete 'amiyamiya.

### *Paulo 'ina paihowa Tiloasi 'oina*

<sup>7</sup> Wiki 'ana sabwelo nugenugetaina 'oina mabwaiyama 'a'eto'utama beledi 'ehisihisi 'ana 'ebe nuwatuhuyahina sabi paihowaina, ma Paulo 'iguguya, weyahina hali sabwelo 'ina tuta tauya. Ta 'ina gwae guguyaina 'iloheduduleya ta 'ana siga hinuwana gamwana, ma tuwa 'abwa 'iguguguguya. <sup>8</sup> Ta hada 'ana hane gidemusa hada 'etoi, ma hetoina 'oina 'ahaneya, ta mayale baibaiwadi 'agabudiya.

<sup>9</sup> Ma hewali 'aigeda, sanina Yutiko, 'imiya haneya hada papalina 'oina 'imiya-toiya, ta mata'eno'enowega 'ilolosaduduna. Ta Paulo 'abwa 'igwaegwae, ta Yutikoina 'i'enosineya, ma papalinaina 'oinega 'ibe'uwa bale'uwa, ma sisuluwa ta si'abilagasiya, ta si'iteya 'i'amasu pwaiya.

<sup>10</sup> Ta Paulo 'isuluwa, ma 'oina 'ituluha ma 'i'atusapwaliya, ta 'igwae, “Sahena wa'ate'ateyoho. Yawasina 'imiyamiya.” <sup>11-12</sup> Ta hewaliina siteo haneheya mayawasina, ma weyahina siyaliyaya madouna. Coinega Paulo 'ihane hila ma beledi 'i'ehisihisiya ta si'aiya, ma 'oinega mahetenao sihehegwaegwae ta 'ana siga gona 'i'adaleya, ta 'itoholowa ma 'i'ebesinediya.

### *Tilowasi 'oinega 'a'adau Milito weyahina*

<sup>13</sup> Ma tauma wagega 'ageluwa ma 'a'u'eya Asosi, ta 'abehega nage 'oina Paulo 'ado'o, weyahina 'ihewpaila 'oima, 'igwaeya, “Wagega watauya, ma taugu 'aheguwegu yatau Asosi, ma nage 'oina wado'ogau.”

<sup>14</sup> Ta Asosi 'ilatu pwaiya ma 'ahelobaloba, 'oinega 'ado'oya ta 'a'u'e hila, ma Mitiline 'oina 'asohota. <sup>15</sup> Eeta Mitiline 'a'ebesineya, ta gona 'i'adaleya Kiyo matana 'apilipili. Eeta gona 'i'adaleya ma Samo 'oina 'asohota. Ci'adaleya wete, Milito 'oina 'asohota.

<sup>16</sup> Paulo 'ihewgae pwaimaiya ta 'abehega Epeso 'a'ebesine, ma 'abehega sahena wete tuta 'iuleule Esiya tupwainao 'oidiya, weyahina nuwanuwana ma 'ilomwayamwayau, 'eguma sowasowahina Yelusalema 'iloba Penitikosi Guyaina 'ana sabwelo 'oina.

### *Paulo 'ina gwae loyauwedo meEpeso 'oidiya*

<sup>17</sup> Ta Mitilo 'oinega 'ihewasa Epeso hekalesiya 'ana tohanugetao 'oidiya ma sinaoma. <sup>18</sup> Ta sitauya pwaima 'oina ma Paulo 'ihewgae, 'igwae, “Comi wasanasanapu



mumugagu tutaina tamiyamiya ba'idagwao Esiya 'oina, 'igu latu hohau 'oinega 'ana siga nige, <sup>19</sup> beno 'ida Bada weyahina yapaipaihowa, hohobigega, ta ma'igu dou, ma muyao wete yalobediya meYudiya 'idi loinega, <sup>20</sup> ta hesi geya 'aigeda to'aha 'ida Bada tetelina bwebwe'ana 'ana hepweila yanuwahi, ma hesi mabwaiyami yahe'itegomiya 'imi tapwalolo 'oidiya, ta wete 'imi hada 'aigeda 'aigeda 'oidiya, <sup>21</sup> ta 'igu he'ita 'oimiya tuwa mahemahetena, 'omi meYudiya, ma 'omi hali tupwa tomotaiyao, mabwaiyami yaguguya 'oimiya ta 'abehega mumugami galadi 'oidiyega wanuwabui Yehoba 'oina ma Bada Yesu wahemise.

<sup>22</sup> “Ma bewa tuwa Yaluyaluwa Tabuna 'ina loinega yatautau Yelusalema, ta geya tasanapu to'aha nata nobwa 'oiguwa 'ilatu. <sup>23</sup> Beno tuwa 'asa 'aigeda 'aigeda 'oidiya, Yaluyaluwa Tabuna 'ihehepwaila 'oiguwa 'abehega 'abwa Yelusalema 'oina pai ma muya yalobadi.

<sup>24</sup> “Ta geya hene yawasigu weyahina yanuwatuwatu ma yanuwahi. Beno tuwa 'igu 'eda nuwana 'igu paihowaina Bada Yesu 'i'ebwaegauwa weyahina yanuwatuwatu ta 'abehega yalosalohi, beno 'ada helau Yehoba 'oinega 'ana hepweila.

<sup>25</sup> “Wanuwatuhuyahi mwalo tuta baibaiwana 'oidiya 'asakosakowasi 'oimiya, ta Yehoba 'ina hetoloina tetelina weyahina yalologuguya. Ma bewa wahesagohe, 'abwa nata geya wete wa'ite'ite hilegau.

<sup>26-27</sup> “Coinega bewa tuwa yahepwaila 'oimiya 'abehega Yehoba 'ina loinao mabwaiyadi ya'ebwaya pwaigomiya, ta geya 'aigeda yadahwa. Ta 'eguma tupwami 'oimiyega wahesilae hataya, beno taugu geya 'igu puiyega, ta hesi waboi 'imi pui.

<sup>28</sup> “Coinega tohanugetao 'omi waboi wa'itayahigomi, ta 'imi sipiyao wete wa'itayahidi, weyahina Yaluyaluwa Tabuna 'imi paihowaina 'i'ebwaegomiya ma tohekalesiyao walo-mata yahidi, weyahina 'ida Bada Yesu tomotaiyedi taudi bweyahinega 'igimwanediya.

<sup>29</sup> “Yasanasanapu wete nata 'igu tauya mulina tohe'itao galadi, gide 'edewa sasasa-saidi, sinaoma ma 'imi sipiyao si'abihe galadi. <sup>30</sup> Ta wete 'omi nata 'oimiyega tupwadi sihegaina ma sihe'ita 'abo'abo 'oimiya, ta tupwana tomota silisidi taudi 'idi bodao 'oidiya.

<sup>31</sup> Coinega walomatayahi ta wete 'igu guguya wanuwatuhuyahi, 'abehega bolime 'etoi geya ya'aiyawasi, sabwelo ma hinuwana 'oidiya, ma hesi mamataneugu yaguguguguya 'aigeda 'aigeda 'oina.

<sup>32</sup> “Wete yahenuwa lagugomi tuta sinaonaoma weyahidi, 'abehega Yehoba tauna 'i'ita yahigomi, ma wete tauna 'ina helau tetelina 'i'abihe pa'aligomi, ma 'oinega 'ina bodao, taudi 'i'abihe 'ehaudiya 'oidiya, 'omi wete waluhu.

<sup>33</sup> “Mwalo taugu ba'idamiu tamiyamiya, geya nuwanuwagu 'imi wasawasao, nuwana mane, nuwana 'ale'o 'ausaladi, <sup>34</sup> ma hesi wasanapu pwaigauwa 'abehega taugu 'igu paihowega 'aguwa ta 'igu tobwatobwa yalobedi, ta 'igu 'ali'eyao wete ya'abi'abihetedi.

<sup>35</sup> Mumugagu bewa 'oidiyega yahe'ita pwaigomiya 'abehega 'ilobwainegita ma tauda 'ida paihowega towe'a ta'abihetedi. Gidemusa Bada Yesu 'ina gwae wanuwatuhuyahi, beno 'igwaeya, 'Cewamo geya yaliyayenamo, ma 'ebwaya hesi mayaliyayaina madouna.’ ”

<sup>36</sup> Paulo 'ina gwae bewa 'igumwala ta 'ahena 'itulaseya, ma mahetenao si'ahwa'ah-wanoi Yehoba 'oina. <sup>37</sup> Ta mabwaiyadi sidouwa, ma Paulo si'atusapwaliya, <sup>38</sup> ta sin-uwagala madouna weyahina 'ihewaediya, 'igwae, “Cabwa gesowana wa'ita'ita hilegau.” Coinega sidobiheya wagai, ta sihegeluya.

## 21

### *Paulo 'ina tauya Yelusalema*

<sup>1</sup> Ma Paulo mahetemi, 'iyamayaowedi 'aloyauwedowediya ma 'a'u'e dumwaluna ta Kesa 'oina 'asohota. Gona 'i'adaleya 'a'u'e hila ta Lodi 'oina 'asohota, ta hali sabwelowa 'asohota Patala. <sup>2</sup> Ta Patala 'oina waga 'alobeya sabi habala Pinisia, ma wagaina 'oina 'agelubala ta 'apilipili ni'uwa. <sup>3</sup> Ta Saipilosi 'alatuwa, ma 'oinega 'ima 'ebeulega 'apili hataya, ta Siliya weyahina 'apilipili, ma Taiya 'oina 'asohota ma 'abehega waga 'ana do'odo'ona tupwana sihegubalidi. <sup>4</sup> Ta tupwana Yesu 'ana tohemisao 'alobediya ta

mahetemai 'amiyamiya sabwelo sebeni, ma Yaluyaluwa Tabuna sanapu 'iyamayaowedi 'i'ebwaediya, 'oinega Paulo sihegwaeya, sigwae, “Sahena 'ulagalaga Yelusalema.”

<sup>5</sup> Ta 'oinega 'ima sabwelo nobwa sigumwala, ma 'agogona 'adobiya wagai, ma taudi mamwanediyao ma manatudiyao sidobihemaiya 'asa papalina, ta holai 'ahema 'atulaseya ma Yehoba 'oina 'ahwa'ahwanoi. Coinega 'aloyauwedowediya, <sup>6</sup> ma 'ageluwa wagai, ta taudi sihila 'asai.

<sup>7</sup> Ma Taiya 'a'ebesineya ta 'a'u'e hila, ta Tolimei 'oina 'asohota, ma 'asuluwa, ta 'oinega tohekalesiyao 'alobediya ma 'aloyauwedowediya, ta sabwelo 'aigeda mahetemai 'amiyamiya. <sup>8</sup> Ta gona 'i'adaleya 'atauya Sisaliya, ma 'aluhuwa Pilipi 'ina hada, tauna mwalo tologuguya site sebeni 'aigeda 'oidiyega, ta mahetemai 'amiyamiya. <sup>9</sup> Ma Pilipi natunao site hata mewahinedi, ta geya sihai, ma 'idi paihowa gide palopita ma Yehoba 'ina nuwatuhi sihepwaila nugeta tomota 'oidiya.

<sup>10</sup> Ta sabwelo tupwana 'oidiya 'amiyamiya, ta 'aigeda palopita, sanina Agabu, Yudiyege 'isuluma, <sup>11</sup> ta 'oima 'inaoma, ta Paulo 'ana gadiwana 'i'eweya, ta 'ahena ma nimana 'iboi 'ipaidiya, ta 'igwae, “Yaluyaluwa Tabuna 'igwae gide: Toni gadiwana bewa meYudiya Yelusalema 'oina nata sipai, ma si'ebwae taudi ganamuli 'oidiya.” <sup>12</sup> Tauma ma 'asaina 'ana tomiyao gwae bewa 'ahesagoheya ma Paulo 'a'ahwanoiyea, 'agwae, “Sahena 'uhanehane Yelusalema.”

<sup>13</sup> Ta Paulo 'ihewgaemaiya, “Sahena wadoudou ma wahehe 'ateyohogau. Yatagwala pwaigauwa ma silagugau deliya, nuwana silohe 'amasigau Yelusalema 'oina, Bada Yesu weyahina.”

<sup>14</sup> Ta 'a'etobode 'asaeya ta 'alolaguwa, ma 'agwae, “Causala beno, to'aha 'ida Bada 'ina nuwatuhi gidemusa 'ida paihowa.”

<sup>15</sup> Sabwelowedi sigumwala, ta 'ima tobwatobwa 'a'atububuwa, ma 'ahane Yelusalema. <sup>16</sup> Ta tupwadi Yesu 'ana tohemisao Sisaliya 'oinega mahetediyao 'atauya, ma sitauyemaiya Nesoni gwama Saipilosi 'ina hada, tauna Yesu 'ana tohemisa nugenugetaina 'aigeda, ta 'abehega 'oina 'amiyamiya.

#### *Paulo ma Yemesa sihelobaloba*

<sup>17</sup> Ma Yelusalema 'oina 'alatu pwaima, ta totapwalolowao siloyauwedomaiya ma'idi yaliyaya. <sup>18</sup> Ta gona 'i'adaleya ta Paulo ba'idamai 'atauya Yemesa 'ina hada, ta nobwa tohekalesiyao 'idi tohanugetao 'alobediya. <sup>19</sup> Ma Paulo 'igwae helauwediya, ta 'ina guguya ma Yehoba 'ina paihowa tomiya ganamuli 'alodiya weyahina 'ihe'ote'otetela bwaibwaina 'oidiya. <sup>20</sup> Ta mabwaiyadi sihesagoheya ma Yehoba sihepwatuweya, ta sihegwaeya, sigwae, “Tasimai, 'u'ita tausani baibaiwana Yesu 'oina sihemisa pwaiya, ta baibaiwadi tohemisaedi meYudiya, ma Mosese 'ina lina simulimuliya. <sup>21</sup> Ta wasau sihesagoheya 'abehega 'owa 'ino he'ita meYudiya 'oidiya, taudi 'asa ganamuli 'adi tomiyao ba'idadiyao simiyamiya 'abehega 'uhehe'itadi meYudiyaedi ma Mosese 'ina lina silogwahate, ma sahena natudiyao meloheyadi 'wapidi si'upwa'upwa, ma tubudao mumugadi sahena simulimuliye. <sup>22</sup> Nata sihesagohe 'abehega 'utauya pwaima, ta sigamwasowalego. Coinega to'aha tapaihowa 'ese?

<sup>23</sup> “Cima nuwatuhi bewa gide: Loheloheya site hata 'ima boda 'oinega Yehoba 'oina sigwae hemisa pwaiya. <sup>24</sup> Coinega 'owa mahetediu wa'abihe 'ehaugomi ma watauya Hada He'asisi 'oina, 'abehega debadi si'oli ma sipwaoli Yehoba 'oina, ta 'imi paihowaina 'ana maisa mabwaiyana 'owa 'ulagu, ma bewa 'oinega tomota mabwaiyadi sisanapugo 'abehega 'owa Mosese 'ina lina 'umulimuliya, ta hesi 'ahwa galagalaedi weyahiu sihesagohediya, mabwaiyana gwae bwagabwaga.

<sup>25</sup> “Ta Yesu 'ana tohemisao tupwa ganamuli 'oidiya, taudi geya meYudiya, 'idi leta 'ahetune pwaiya ta 'abehega to'aha gide tomota sipwaopwaoliyedi hali 'ebe hemisao 'oidiya sahena si'ai'ai, ta wete hebai mabweyahidi ma hebai 'ani'o didididi sahena si'ai'aidi, ta wete sahena siganaganawala.”

<sup>26</sup> Coinega Paulo 'idi gwae 'ihesagoheya, ta hali sabwelowa site hataedi mahetenao sitauya ma si'abihe 'ehaudiya. Cigumwala ma Hada He'asisi 'oina 'iluhuwa, ma Pauloina

topwaoli 'ihewgaeya, 'igwae, “Tauma 'agwae hemisa pwaiya Yehoba 'oina ta sabwelo sebeni 'ima 'abihe'ehau 'igumwala, ta 'oinega 'ahilama ma yapwaoli tauma weyahima.”

*Paulo si'abiyahiya*

<sup>27</sup> Ta 'idi sabwelo sebeni 'i'iuna ma sigumwala, 'oinega meYudiya taudi mwalo tupwa Esiya 'oinega sinaoma, Paulo si'iteya Hada He'asisi 'alona, ma boda sihenywa laguwedya, ta si'abiyahiya, <sup>28</sup> ta siwuiwui, sigwaegwae, “MeIsileli he, wanaoma ma loheya bewa wa'ita, tauna tomota tupwa mabwaiyana 'oidiya 'ihe'ita puidiya, 'abehega 'ida boda sisinasinaligita, ta 'ida loinao ma 'ida Hada He'asisi sisinalidi, ma wete Hada He'asisi bewa 'i'abihe ginaula bwagebwageya, weyahina tupwa ganamuliyega, taudi geya meYudiya, 'i'ewedima 'alona.”

<sup>29</sup> Cidi gwae bewa weyahina mwalo gwama Epeso, sanina Tilopimo, Paulo mahetena 'asai si'iteya, ta sinuwatuhuya 'abehega Paulo Tilopimoina 'i'eweyama Hada He'asisi 'alona.

<sup>30</sup> Bewa weyahina meYelusalema mabwaiyadi sigamwasowala, ma sihedagadaga, sipili hegogonama, ta Paulo si'abiyahiya, ma Hada He'asisiyega silisi latuweya, ta 'ana 'ahwa'eda siguduya, <sup>31</sup> ta sitohotoho sabi lohe'amasina. Coinega boda 'aleha 'ana tohanugeta wasa 'ihesagoheya 'abehega meYelusalema mabwaiyadi sihedagadaga be-sobeso. <sup>32</sup> Ta 'ilomwayamwayauwa, ma tolo'alehaowedi ma 'adi tohanugetao 'i'ewedya, ma boda 'oidiya sipili suluwa. Tutaina boda si'itediya tolo'alehao ma 'adi tohanugetao sinaonaoma, ta Paulo 'ana hunuwa silolaguwa.

<sup>33</sup> Coinega boda 'aleha 'ana toloinaina 'idobima ma Paulo 'i'abiyahiya, ta 'iloina ma balae seni 'eluwa 'oidiyega sipaiya, ma 'ihesilala boda 'oidiya, 'igwae, “Taiya tauna? Ma to'aha 'ipaihoweya?” <sup>34</sup> Ta boda siwui, 'idi gwaeyao hagadi ma hagadi, ma geya sowasowahina ma 'ihesagoha bwaibwaini, wui sinabwana weyahina, ta 'iloina 'abehega tolo'alehao 'idi hada sitauye.

<sup>35-36</sup> Sitauyeya, ta boda sigamwasowala hedada ta simulimuliyedi, ma siwuiwui, “Walohe'amasiyamo.” Coinega tolo'alehao Paulo si'ahaliya tete 'oinega ta hada 'alona, tomota 'idi 'ohe weyahina.

*Paulo 'ina gwae boda 'oidiya*

<sup>37</sup> Ci'iunamo ma sitoe hada 'alona, ta Paulo boda 'aleha 'ana toloina 'i'ahwanoyeya, 'igwae, “Sowasowahina gwae 'aigeda 'oiuwa yagwaene?” Ta toloinaina 'isalutuwa, ta 'igwae, “Ca! Tomada! Cena Gilisi 'usanapuya?” <sup>38</sup> Cigu nuwatuhu 'owa gwama Itipitaina, tauna mwalo 'inaoma ta tolohe'amasa powa tausani 'ihogonediya 'aleha weyahina, ta 'ihanugetediya yoho 'awawa.”

<sup>39</sup> Ta Paulo 'igwae, “Geya. Taugu gwama Yudiyaigu, ta 'igu 'asa Tasisi, tupwa Silisiya 'alona, 'asaina 'asa madouna. Ma sowasowahina 'utagwalegau ma tomota 'oidiya yagwae?”

<sup>40</sup> Citagwaleya, ta Paulo teteya 'itoholo, ma nimana 'i'abilagasiya ma silolagu, ta 'oinega mabwaiyadi silolaguwa, ta Paulo 'ena Ibeliuega 'ihewgaediya, 'igwae.

## 22

<sup>1</sup> “Tasigwao ma tamagwao, wahehenono ma matamiya yada mwehihi he'ewa bewa weyahina.”

<sup>2</sup> Ma sihesagoha 'ena Ibeliuega 'igwaegwae, 'oinega si'alachenono bwaibwaini ma 'ihewgaediya: <sup>3</sup> “Taugu gwama Yudiya. Tasisi, Silisiya 'asana 'oina yatoleya, ma 'ebwa Yelusalema 'oina yase'uluwa. Cigu tohe'ita sanina Gameliyela, 'ihe'itegauwa tubudao 'idi loinao ma yasanapu bwaibwainidiya, ma Yehoba 'ina paihowa 'oina yatagwalegauwa moisa, gidemusa bewa tuwa 'omi 'imi tagwala.

<sup>4</sup> “Ma hemisa hauhauna bewa 'ana tomuliyao yalo'alehedya. Ma loheloheya ma wahi-wahine deliya yalagu luhuwediya, ta tupwadi yalohe'amasidiya. <sup>5</sup> Topwaoli Madouna ma 'imi babadao mabwaiyadi 'igu paihowa bewa sisanasanapu, weyahina taudi leta si'ebwaegauwa tasidiyao Damasiko 'oina weyahidi, ma 'abehega yada tauya, ma 'oidiyega

tagwala yada 'ewa nugete, ma 'oinega tohemisao yada 'abiyahidi, ma yada tauyedima Yelusalema, ma sida gihemuyedi.

<sup>6</sup> “Ta 'asudibwalala 'abwa yatautauya ma Damasiko 'i'iunamo 'oina yalatu, ma 'asilala madouna galewega 'ilatu mwayamwayauwa, ta 'isae sakowasiyegauwa.

<sup>7</sup> “Ta bale'uwa yabe'uwa, ma 'ena 'aigeda yahesagoheya 'ihewgaegauwa 'igwae, ‘Saulo, Saulo, to'aha weyahina 'ulolo'alehegau?’

<sup>8</sup> “Ma yahesilala, ‘Bada taiya hede 'owa?’ Ma 'ihewgaegauwa, 'Taugu Yesu, gwama Nasaleta, 'ulolo'alehegau.’

<sup>9</sup> “Ta taudi tuta nage 'oina ba'idagwao 'asilalaina si'iteya, ma hesi tauna 'ihewgaegauwa geya sihesagohe.

<sup>10</sup> “Ta yagwae, 'Bada, to'aha nata yapaihowa?’ Ma 'ihewgaegauwa 'Cutoholo, ma Damasiko 'oina 'utauya, ma nage 'oina 'a lolina 'uhesagohe.’

<sup>11</sup> “Ta 'asilala 'ina waiwaiyega matagu 'igihegaleya ma geya sosowana ma ya'ebubuna, 'oinega taudi ba'idagwao si'abi nimegauwa ma 'atauya Damasiko.

<sup>12</sup> “Ma Damasiko 'oina 'aigeda loheya sanina Ananaiyasi 'imiyamiya. Tauna Yehoba 'ana tohemisa moisa, ma Mosese 'ina lolina 'ana tomuliya, ta meYudiya tupwaina 'ana tomiyao si'ahwa bwebwe'aneya. <sup>13</sup> Ta Ananaiyasiina 'itauyama ta deiguwa 'itoholowa ma 'ihewgaegauwa, 'Tasigu Saulo, matau 'i'asilala.’ Ta nage 'oina matagu sibwebwe'ana hila ma loheyaina ya'iteya.

<sup>14</sup> “Ta 'ihewgaegauwa, 'Tubudao 'idi Yehoba 'ihesinuwegowa, 'abehega 'ina nuwatuhu 'usanapu ma Tobwebwe'anaina 'u'ita, ta 'ina gwae 'uhesagohe, <sup>15</sup> ma tauna weyahina 'uda hetohewwaila ta wete to'aha 'u'iteya ma 'uhesagoheya weyahina tomota baibaiwadi 'uda hegwaeadi. <sup>16</sup> Ta to'aha hede 'uyamwayamwa, 'utoholo ma saninega 'ubwauwe ma 'ubabitaiso ma 'abehega 'ino puiyao 'ibuyodi.’

<sup>17</sup> “Ta muliyega yahila Yelusalema ma Hada He'asisi 'oina ya'ahwa'ahwanoi, ta gide-musa yanihiya, <sup>18</sup> ta Badaina ya'iteya 'igwaegwae 'oiguwa, 'igwaeya, 'Culomwayamwayau ma Yelusalema 'u'ebesine, weyahina nata 'ino hepweaila weyahigu gesowana sihehe-sagohe.’

<sup>19</sup> “Ta yahegwae, 'Bada taudi sisanasanapu 'abehega 'idi hada tapwalolo 'aigeda 'aigeda 'oidiya 'a tohemisao yahunu dadanediya ma deliya yalagudiya. <sup>20</sup> Ta tutaina 'a tohepwaila Sitibeni silohe'amasiya, taugu wete deina yatotoholo, ta 'ana hunu 'oina yatagwala, ma wete tohunuwaedi 'adi 'ale'o ya'itayahidiya.’

<sup>21</sup> “Ta Badaina 'ihewgaegauwa, 'Bewa 'oinega 'ulatu, ma nata yahewasaego ma 'utauya gogo bwaga 'asa ganamuli, taudi geya meYudiya 'oidiya.’”

#### *Paulo 'igwae boda 'aleha 'ana toloina 'oina*

<sup>22</sup> Paulo 'ina gwae mabwaiyana bewa sihesagohe bwaibwainiya ta 'ana laba taudi 'asa ganamuli weyahidi 'igwae, ma 'oinega silolagata ma gwae madounega sibwauwau, “Loheya bewa 'ilobwaineya bale'uwega tada 'ewayahule, ma gesowana 'ida miyamiya.”

<sup>23</sup> Ma gidemusa sibwauwau ma'idi gamwasowala, ta 'adi 'ale'o siulaula haneheddi, ma nenegwala wete siulaula haneheddi.

<sup>24</sup> Ta boda 'aleha 'ana toloina 'ina tolo'alehao 'iloinediya, 'igwae, “Loheya beno watauye hadai, ma sapi baibaiwana wa'ebwae ma 'ana laba 'ihewwaila latu to'aha tomota 'idi gamwasowala 'oina huhuna.”

<sup>25</sup> Coinega sitauyeya hadai ta sipaiya sabi sapina, ma tolo'aleha 'idi tohanugeta deina 'itoholowa, 'oinega Paulo tohanugetaina 'ihewgaeya, “Taugu yaheLoma pwaiya ma geya 'aigeda lolina 'imiyamiya ma wada sapigau weyahina geya 'aigeda to'aha 'igu pui walobaloba yatala 'oina.”

<sup>26</sup> Ta tohanugetaina Paulo 'ina gwae 'ihesagoheya, 'oinega 'ilomwayamwayau ta 'itauya 'idi boda 'aleha 'ana toloina 'oina, ma 'ihewgaeya, “To'aha 'abehega 'uda paihowa? Loheya bewa tauna gwama Lomaina!”

<sup>27</sup> Ta toloinaina 'itauyama ta Paulo 'ihegwaeya, “Cugwae moisa, 'owa 'uheLoma?” Ta Paulo 'igwaeya, “Cehe, gidemusa.”

<sup>28</sup> Ta toloinaina 'igwaeya, “Taugu mane madouna 'oinega 'igu heLoma ya-hegimwaneya.” Ta Paulo 'igwaeya, “Tamagu 'iheLoma, ma 'oinega taugu yatoleya gwama Lomaigu.”

<sup>29</sup> Ma taudi 'abehega sisapi silolaguwa, ta toloinaina 'isanapu pwaiya 'abehega Paulo gwama Lomaina, ta 'imatata weyahina tauna Paulo nige 'ipaiya.

*Paulo 'ina yatala meLoma 'idi toloinao matadiya*

<sup>30</sup> Gona 'i'adaleya ma boda 'aleha 'ana toloinaina 'inuwanuwatuhu ma 'abehega wasa moisa si'ebese, to'aha weyahina meYudiya Paulo sihe'eweya, 'oinega Paulo 'itoelatueya ma 'iloina 'abehega topwaoliyao madoudi ma meYudiya 'idi babadao mabwaiyadi sitauyama, ma 'oinega toloinaina Paulo 'itoeyama ma matadiya 'ihetoholoya.

## 23

<sup>1</sup> Ta Paulo meYudiya 'idi babadaowedi 'i'e'ebubudiya, ta 'ihewaediya, “Babadao ma tasigwao, mwalona ma nige to'aha yanuwatuhuya 'abehega Yehoba 'ina loinao beno yamuliya bwaibwainidiya.”

<sup>2</sup> Ma Ananaiyasi, tauna Topwaoli Madouna, 'ihewaediya taudi Paulo deina sitotoholo 'abehega Paulo 'ahwana sisapi.

<sup>3</sup> Ta Paulo 'ihewa hileya, 'igwae, “Yehoba wete 'isapigo, weyahina 'owa tuwa 'a 'ita bwebwe'ana, ma solauwa gala madouna! Cabehega beno 'oina 'umiyatoi ma 'uloinegau Mosese 'ina loinega, ta 'owa hesi loina 'uligehiya, weyahina 'ugwae 'abehega sisapigau?”

<sup>4</sup> Ta taudi sitotoholo Paulo deina sigwaeya, “Togidega ta Yehoba 'ina Topwaoli Madouna 'oina 'u'ahwa'ahwa pa'ala, 'awa?”

<sup>5</sup> Ta Paulo 'igwaeya, “Yauwedo tasigwao! Geya yasanapu 'abehega tauna Topwaoli Madouna. Moisa tuwa Buki He'asisi 'ina hepwaile gidemusa 'igwae, 'Sahena 'imi toloina 'oina 'u'ahwa'ahwa pa'ala.”

<sup>6</sup> Bewa tuwa Paulo 'i'iteya 'abehega to'eto'autaedi boda 'eluwa 'oidiyega, 'aigeda Sadusiyao, ma 'aigeda Palisiyao, ma 'oidiya 'ibwau latuwa, 'igwae, “Tasigwao, taugu 'aigeda Palisi 'idi boda, weyahina tamagu wete Palisi 'idi boda, ta 'igu yatala bewa lamuna yahemisa 'abehega to'amasa sitoholo hila.” <sup>7</sup> Ta Paulo 'ina gwae bewa weyahina Palisiyao ma Sadusiyao sihe'ohe'ohena, ta hegogonaina siwatahiya. <sup>8</sup> Weyahina Sadusiyao sigwae to'amasa geya sowasawahina ma sitoholo hila, ta wete sigwae, 'abehega aneloseyao nuwana yaluyaluwao geya 'aigeda wete 'imiyamiya, ma hesi Palisiyao sihemisa 'abehega nata moisa to'amasa sitoholo hilama, ma wete sisanapuya 'abehega moisa Yehoba 'ina aneloseyao ma yaluyaluwao simiyamiya.

<sup>9</sup> Nage 'oina yatala bahobaho 'ilatuwa, 'oinega Palisiyao 'idi loinao 'adi tohe'itao tupwadi sitoholowa ma sigwaeya, “Loheya bewa, geya 'eta wete 'ina pui 'oinega 'aloba. Ma hesi 'ina nuwatuhu bewa, nuwana Yehoba 'ina anelose bo yaluyaluwa 'oinega 'i'eweya.”

<sup>10</sup> Nage 'oina si'ohe'ohe madouna, ta 'aleha 'ana toloina 'imatata. Cina nuwatuhu 'abehega nata Paulo si'abiyahi ma 'abwa hesi si'abi hegala bwaibwaini. Coinega tolo'alehaedi 'iloinaediya ma Paulo bodaedi 'oidiyega sitoeya, sitauyeya hadai.

<sup>11</sup> Eeta hadai 'imiya heboiya, ma nihuwanega 'ina Bada 'ilatuma Paulo deina, 'itoholowa ma 'ihewaeya, 'igwae, “Paulo, sahena 'u'ate'ateyoho, weyahina Yelusalema 'oina 'uhepwaile pwaigauwa. Ma Loma 'oina wete gidemusa 'abwa 'uhepwaile 'esegau.”

*Cidi loina dahwana Paulo 'ana lohe'amasa weyahina*

<sup>12</sup> Hali sabwelowega meYudiya si'eto'autama, 'idi nuwatuhu si'atububudiya, ma wete sigwae hemisa ma geya'abwa si'ai'ai bo sinumanuma 'ana siga Paulo silohe'amasi.



<sup>13</sup> Bodaedi bewa si'eto'auta ma nuwatuhi bewa gidemusa silaguya, 'adi baibaiwa gide poti 'i'ebesineya.

<sup>14</sup> Muliyetega, sitauya topwaoliyao ma babadao 'oidiya, sigwaeya, “Tauma bewa 'agwae hemisa pwaiya ma 'abehega geya'abwa 'eta to'aha 'a'apu'aputoho 'ana siga Paulo 'alohe'amasi. <sup>15</sup> Coinega 'omi ma babadao mahetemiya watauya boda 'aleha 'ana toloina wa'abowe, ma Paulo 'itoeyama, ta 'ina pui ta'ebese bwaibwaini. Ma 'oinega tauma 'a'atububuwa, ma saugaina 'eguma 'eda 'oina sitautauyama 'alohe'amasi.”

<sup>16</sup> Ta Paulo 'ina hewali, tauna wahana, tolohe'amasaedi 'idi teba tetelina 'ihesoheya, ta 'iluhuwa hadai, ta Paulo 'oina 'ihewaila. <sup>17</sup> Ta Paulo tolo'alehao 'idi tohanugeta 'aigeda 'ibwauweyama, ta 'ihewaya. “Hewali bewa 'utauye boda 'aleha 'ana toloina 'oina ma to'aha 'ina nuwatuhi 'ihewaila 'oina.” <sup>18</sup> Ta 'itoeya toloina 'oina, ta 'ihewaya, “Paulo deliya 'imiyamiya 'ibwauwegauwa ma 'ihewagaewa 'abehega hewaliina bewa yatoeyama, ma to'aha 'ina nuwatuhi 'ihewaila 'oiuwa.”

<sup>19</sup> Ta toloina hewaliina 'i'abi nimeya ma sihanaowa tupwana, ma siboidimo ma 'ihesilaleya, 'igwae, “To'aha 'abehega 'oiguwa 'uhewaille?” <sup>20</sup> Ta hewaliina 'igwaeya, “MeYudiya siloina ma 'abehega si'ahwanoiyego 'abehega gona Paulo 'usuluheyawa 'idi 'eto'auta 'oina, ma 'abehega 'ina puiyao sibese bwaibwaini. <sup>21</sup> Ta 'idi 'ahwanoi sahena 'uhehesagohe, weyahina gide site poti si'edahwana 'edai Paulo weyahina, ta sigwaehemisa pwaiya 'abehega nata geya si'ai'ai bo sinumanuma 'ana siga Paulo silohe'amasa nugete. Ta siyamwayamwamo tagwala 'oiuwega siloba Paulo weyahina.”

<sup>22</sup> Ta toloina 'igwaeya, “Yauwedo 'owa, 'utauya ma sahena 'aigeda taiya 'oina 'uhewaila 'abehega 'idi nuwatuhi dahwanaina 'uhewaila pwaiya 'oiguwa.”

*Paulo sihewasaeya Sisaliya 'oina gabana Pilikesa 'ona*

<sup>23</sup> Ta boda 'aleha 'ana toloina 'ibwauwediya 'ina tolo'alehao 'adi tohanugeta 'eluwa ma 'iloinaediya, “Nata hinuwanega tolo'aleha tu handeledi, ma togelu hosi sebeniti ma to'ahala gita tu handeledi wete wahe'atudima, ma sitauyegomi Sisaliya 'oina. <sup>24</sup> Ma hesi tupwana hosi wete wa'ewadi ma 'oinega Paulo 'igelu, ta ma'ina bwebwe'ana watauye gabana Pilikesa 'oina.”

<sup>25</sup> Ta wete leta 'ileleya bewa gide, 'igwaeya, <sup>26</sup> “Yauwedo 'owa gabana 'uhane hedada Pilikesa 'oiuwa, taugu Kolodiu Lisiyasi 'oiguwega. <sup>27</sup> Loheya bewa meYudiya si'abiyahiya ma 'i'iuna silohe'amasi, ta wasana yahesoheya 'abehega tauna gwama Lomaina, ta tolo'alehao ba'idagwao 'atauya 'oidiya, ma nimadiyega 'alemeya. <sup>28</sup> Nuwanuwagu 'idi he'ewaina huhuna yada sanapu, ta 'idi hehogona 'oina ya'eweyama, <sup>29</sup> ma yalobeya 'idi he'ewa huhuna beno sigwaegwae taudi tuwa 'idi tapwalolo 'ana loina weyahina, ta 'idi he'ewa geya lohe'amasa bo lagu deli 'ilobwaine.

<sup>30</sup> “Wasa wete yahesagoha pwaiya 'idi loina dahwana Paulo 'ana lohe'amasa weyahina, 'oinega yalomwayamwayau ma yahewasaeyawa 'oiuwa, ma 'ana tohe'ewao wete yahegwaediya ma sitauyawa 'oiuwa, ma nobwa sihewaila to'aha 'idi he'ewa huhuna loheya bewa weyahina.”

<sup>31</sup> Tolo'aleha 'adi loina gide simulimuliyeya, ma Paulo hinuwanaina 'oina sitoeya Anitipatili 'oina. <sup>32</sup> Gona 'i'adaleya, ma tupwadi tolo'alehaowedi sihila 'idi tupwa, ta togelu hosimo Paulo sitauyeya Sisaliya, <sup>33</sup> ta gabana 'ina leta si'ebwaeya, ta wete Paulo sitoeyama gabana matana.

<sup>34</sup> Ta gabana 'ina leta 'ihesilaleya, ma Paulo 'ihesilaleya, “To'eha 'ino 'asa?” Ta Paulo 'igwaeya, “Cigu 'asa Silisiya 'alona.”

<sup>35</sup> Ta gabana 'igwaeya, “Ca tohe'ewao hesi sinaoma ma 'oinega 'imi yatala yapaihowa.” Ma tolo'alehao 'iloinaediya ma Pauloina silomatayahi hada wasawasaina, mwalo Helodi 'ina hada, 'oina.

<sup>1</sup> Ma sabwelo nima sigumwala ta Ananaiyasi, tauna Topwaoli Madouna, ma tupwadi meYudiya 'idi babadao, ma 'aigeda wete loheya, tauna togwaegwae, sanina Telitulo, ta tauna mahetediu sidobima, ta gabana Pilikesa 'oina 'idi he'ewa Paulo weyahina si'eweyama.

<sup>2</sup> Ta Paulo sitoe latuweyama, ma Telitulo 'itoholo, ma he'ewa Paulo weyahina 'ihewailediya, 'igwaegwae, "Yauwedo 'owa tohane hedada Pilikesa, 'oiuwa 'ayaliyaya weyahina 'owa 'ino lina bwebwe'ana 'oinega mumuga galana 'u'abihe bwebwe'enediya 'ebeloina bewa 'alona, ma bewa tuwa 'amiya daumwala, <sup>3</sup> ta weyahina 'ayaliyaya madouna tuta baibaiwana, ma tupwa mabwaiyadi 'oidiya. <sup>4</sup> Ma genuwagu wete 'igu gwae 'oiuwa ya'abi'abi hedudule, ma hesi ya'ahwanoiyego ma'ino helau 'uda hesagohegau, ta 'ima gwae to'uto'upana tuwa yahepwaledi, loheya bewa weyahina.

<sup>5</sup> "Moisa, loheya bewa 'a'italobeya 'ilasi geyogeyoina, ma meYudiya 'ihe'ita puidiya tupwa mabwaiyana 'oidiya, 'oinega si'ale'aleha, ma tauna boda Nasaleta 'idi to'ahala bihali. <sup>6</sup> Tauna wete 'itohoya 'abehega 'ima Hada He'asisi 'i'abihebi'ie, ta 'a'abiyahiya ma 'abehega 'aloine tauma 'ima loinega. <sup>7</sup> Ma Lisiyasi, tauna boda 'aleha 'ana toloina 'inaoma, ta nimamega 'i'wayemaiya, <sup>8</sup> ta 'iloina 'abehega 'ana tohe'ewao tauma 'anaoma 'oiuwa ma 'ayatala. Ma 'eguma 'uboi 'uhesilala, 'ina pui 'uda 'italoba, gide nige yahepwaileya."

<sup>9</sup> Ta meYudiya wete he'ewaina si'ahwa moisaeya.

<sup>10</sup> Ta gabana nimanega Paulo 'ihewae'ya ma 'ida gwae. Ta Paulo 'i'apulagata, 'igwaeya, "Yasanapuya 'owa 'ebeloina bewa 'oina bolime baibaiwana 'uloiloina, ma'igu yaliyaya matauwa yada gwae hila 'agu he'ewa bewa weyahina.

<sup>11</sup> "Ceguma tomota 'uhesilaladi, sihepwaila 'oiuwa 'abehega sabwelo tuwelomo sigumwala 'oidiya, tutaina yahane Yelusalema 'oina sabi tapwalolo, <sup>12</sup> ta geya wete si'ite'itegau tomota ba'idagwao 'ahe'ohe'ohe, nuwana boda yaloinaediya ma simuliye-gau, Hada He'asisi 'oina, bo hada tapwalolo 'oidiya, bo Yelusalema 'asaina 'alona. <sup>13</sup> Ma paihowaedi nige 'oidiyega sihe'ewegauwa geya sowasowahidi ma 'oiuwa si'ahwa moisaedi.

<sup>14</sup> "Ta 'idi gwae 'aigeda tuwa ya'ahwa moisaeya, beno 'edaina sihesaniyeya Wataha 'oinega yalotapwalolo tubumao 'idi Yehoba 'oina. Ma wete Mosese 'ina loinao ma palopitao 'idi lele mabwaiyadi yahemisaediya. <sup>15</sup> Ta wete yahemisa 'abehega Yehoba to'amasao 'i'abi'abi hetoholo hiladi, tobwebwe'adi ma togala, gide taudi wete 'idi hemisa.

<sup>16</sup> "Ta tuta mabwaiyana 'oidiya yatohotoho waiwai 'abehega yamumuga bwebwe'ana, Yehoba matana, ma wete tomota 'oidiya.

<sup>17</sup> "Ta bolime baibaiwana sigumwala pwaiya 'oinega yahila Yelusalema, ma helau ya'eweyama 'igu boda 'oidiya, ma wete sabi pwaoli Yehoba weyahina. <sup>18</sup> Ma ya'abihe'ehau pwaigauwa, ma pwaoliina yapaipaihowa Hada He'asisi 'alona, ma geya boda mahetegwao, ta geya hedagadaga, <sup>19</sup> ma hesi tupwana loheloheya si'itegauwa, taudi Esiya 'ana tomiyao, ta 'ilobwaineya taudi matauwa bewa sinaoma, 'eguma nuwanuwadi ma sihe'ewegau, ta geya sitauyama.

<sup>20</sup> "Ma taudi bewa sitauya pwaima matauwa 'ilobwainediya ma to'aha 'igu puiyao si'ita lobeya, tutaina 'idi toloinao siyatalegauwa, sihepwale 'oiuwa. <sup>21</sup> Ta 'aigeda tuwa gwae yabwau latuheya, tutaina gamwagamwanidiya yatotoholo, ta weyahina sihe'ewegauwa, beno moisa. Ta 'igu gwaaina 'abehega 'Bewa tuwa matamiya yayatala, weyahina yahemisa 'abehega to'amasao sitoholo hila."

<sup>22</sup> Ta 'edaina weyahina Paulo 'igwaegwae Pilikesa wete 'isanapu bwaibwainiya, ta 'iupahila, 'igwaeya, "Tuta 'eguma boda 'aleha 'ana toloina Lisiyasi 'isuluma, 'oinega 'imi yatala weyahina yahesinuwa, nuwana Paulo 'ina gwae dumwaluna bo geya."

<sup>23</sup> Ta Pilikesa tolo'alehao 'adi tohanugeta 'ihewae'ya, "Loheya bewa wahile deliya, ma sahena waloiloina pa'ale, ma 'eguma 'iyanao nuwanuwadi ma sinaoma 'ana lema si'ebwae, sahena wa'au'ausidi."

*Paulo deliya*

<sup>24</sup> Ta sabwelo tupwana sigumwala, ta Pilikesa mwanena Dalusila mahetena sinaoma, ta mwanenaina wahine Yudiya, ma Pilikesaina Paulo 'ibwauweyama, ta 'ina guguya sihesagoheya Yesu Keliso 'ana hemisa weyahina. <sup>25</sup> Ta Pilikesa 'atena 'iyohowa, tutaina Paulo 'ina guguya 'ihesagoheya, mumuga dumwaluna, ma toholopa'ala, ma bwa'omatana 'inaonaoma weyahidi, ta Pilikesa 'igwaeya, “Tuwa! Ma 'uhila, ma to tuta malamalaina 'oiguwa ee wete yabwau hilego.” <sup>26</sup> Ta Pilikesaina nuwanuwana mane 'iloba Paulo 'oinega 'ana lihasa weyahina, ta nage huhuna 'ibwaubwau hileyama ma mahetena sihegwaegwae, <sup>27</sup> ta 'ana siga bolime 'eluwa sigumwala, ta Posiu Pesito Pilikesaina 'ihemiyalaeneya. Ta Pilikesa nuwanuwana meYudiya tauna si'ahwa bwebwe'ane, 'oinega 'iloina ma Paulo deliya tuwa 'imiyamiya.

## 25

### *Paulo 'i'ahwanoi ma Sisa 'oina 'iyatala*

<sup>1</sup> Pesitoina 'inaoma Sisaliya, ma 'ihagaineya 'ina loina, ma sabwelo 'etoi sigumwala ta 'ihaneya Yelusalema. <sup>2</sup> Ta topwaoli madoudi ma meYudiya 'idi babadao sinaoma, ta 'idi he'ewa Paulo weyahina sihepwaileya, <sup>3</sup> ta Pesito 'oina si'ahwa'ahwanoi waiwai sigwae, “Sowasowahina ma Paulo 'uhewasaeyama Yelusalema, ma 'ebwa 'iyatala?” Ta 'idi nuwatuhu moisa beno 'abehega Paulo silohe'amasi 'edai, tutaina 'eguma 'itautauyama.

<sup>4</sup> Ta Pesito 'igwae hilediya, 'igwae, “Geya, ma hesi Paulo Sisaliya deliya tuwa 'imiyamiya, ma 'i'iunamo taugu yahila Sisaliya, <sup>5</sup> ta 'eguma nuwanuwami, 'imi toloinao mahetegwao 'asulu, ma to'aha 'imi he'ewa Paulo weyahina nobwa wayatala.”

<sup>6</sup> Ta wiki 'aigeda ma tupwana 'oidiya 'imiyamiya, ta 'oinega 'isuluwa Sisaliya, ta gona 'i'adaleya, ta yatala 'ana wagahata 'oina 'imiyatoiya, ta 'iloina ma Paulo si'eweyama. <sup>7</sup> Ma Paulo 'inaoma ta meYudiyaedi taudi Yelusalemega sisuluma, sitoholo sakowasiyeya, ta 'idi he'ewa Paulo weyahina sihepwailedi, ma'idi gamwasowala, ma hesi mabwaiyadi 'idi hepwailedi geya 'adi moisamo.

<sup>8</sup> Ta Paulo 'idi gwae 'i'elagu bodediya, 'igwae, “Taugu geya meYudiya 'idi loina, nuwana Hada He'asisi 'ana loina, bo nuwana Sisa 'ina loina yaligeligehi.”

<sup>9</sup> Ta Pesito hesi nuwanuwana ma meYudiya 'i'abihe yaliyayadi, 'oinega Paulo 'ihewgae hileya, 'igwae, “Togidega, nuwanuwau ma Yelusalema 'oina 'uhane ma 'a tohe'ewao bewa weyahidi wayatala mataguwa?”

<sup>10</sup> Ta Paulo 'igwaeya, “Genuwagu 'igu yatala weyahina meYudiya siloinegau. Geya 'aigeda to'aha 'oidiya ya'abi pui, ma bewa 'usanapu pwaiya. Ma hesi meLoma 'imi 'ebe yatala 'oina yatotoholo, ma bewa 'ilobwainegau. <sup>11</sup> Ceguma gide taugu 'abehega toloina ligehe ma 'oinega pui bewa weyahina 'ilobwaineya ya'amasa, bwebwe'ana. Camasa geya yamataute. Ta 'eguma geya 'aigeda 'igu pui waloba 'idi he'ewa 'oidiyega, geya 'ilobwaine ma 'u'ebwayaegau 'oidiya, ma hesi kini madouna, tauna Sisa, 'ina yatala nuwanuwagu.”

<sup>12</sup> Ta Pesitoina 'iluhuwa ta 'ina tosanapuwo mahetena sihegwaegwae. Sihegwaegwae 'igumwala, ta 'ihilama, ma 'igwae, “Bwebwe'ana, nuwanuwau kini 'ina yatala, 'oinega kini Sisa 'ina yatala 'oina yahetunego.”

### *Kini Agalipa mamwanena sihapwesama*

<sup>13</sup> Sabwelo hisa sigumwala, ta kini Agalipa mamwanena Belinisi ba'idana Sisaliya 'oina silatuwa, sabi gwae loyauwedo Pesito 'oina. <sup>14</sup> Cidi miya sabwelo tupwana baibaiwana 'oina, Pesitoina kini Agalipa 'oina Paulo 'ana he'ewao 'ihewwailediya, 'igwaegwae, “Loheya 'aigeda nage deliya Pilikesa 'i'ebesineya. <sup>15</sup> Mwalo Yelusalema 'oina yamiyamiya, tauna loheyaina weyahina meYudiya 'idi topwaoli madoudi ma babadao 'oiguwa sihepwaileya, ma si'ahwa noiyegauwa 'abehega yaloinae 'ina pui weyahina. <sup>16</sup> Ta yahewwaediya yagwae, 'Geya meLoma mumugama gide 'abehega tomota 'oimiya 'atagwala 'imi loinao weyahidi, ma hesi 'ilobwaineya nugeta yatala tapaihowa ma 'imi he'ewao ma tauna 'ina uhala wahewwaila latuhedi.’

<sup>17</sup> “Ta si'eto'autama bewa 'oina, ta geya yaheboi, ma gona 'i'adaleya ta yatala 'ana wagahata 'oina yamiyatoiya, ma yagwae ta loheyaina sitoeyama. <sup>18</sup> Ta 'ana tohe'ewaowedi sitoholo, ma yanuwatuhuwa nata to'aha 'aigeda 'ina pui weyahina sihepwaila. Ta geya hene, <sup>19</sup> ma taboidimo 'idi tapwalolo weyahina sigwaegwae, ta 'aigeda loheya 'i'amasapwaiya, sanina Yesu, ta Paulo 'ihehepwaila 'abehega Yesuina mayawasina 'imiyamiya. <sup>20</sup> Ta taugu yahenuwanaluwa, togidega ma ginaula bewa weyahidi yaloina 'esa, ma Pauloina yahesilaleya 'eguma sowasowahina 'ihane Yelusalema ma nobwa siheyatalae.

<sup>21</sup> “Ta Pauloina 'ilogwahata, ma Sisa 'ina yatala weyahina 'i'ahwanoiyeya. Ta yatagwaleya ma hesi deliya 'imiyamiya, 'ana siga 'eda yaloba ma yahewasae Sisa 'oina.”

<sup>22</sup> Ta Agalipa Pesito 'ihewgaeya, “Taugu wete nuwanuwagu ma loheyaina 'ina gwae yahesagohe.”

Ta Pesito 'igwaeya, “Bwebwe'ana, gona yabwauweyama ma 'igwae.”

<sup>23</sup> Ta gona 'i'adaleya, ta Agalipa ma Belinisi sinaoma, ma'adi 'ale'o wasawasa, ta hada 'ebe delihogogona 'oina siluhuwa ma boda 'aleha 'ana toloinao ma gogoina 'ana babadao sihelatudiya ma'idi he'asisi. Ta Pesito 'iloina ma Paulo siluhweya.

<sup>24</sup> Ta Pesitoina 'igwaeya, “Cowa kini Agalipa, ma 'omi wa'eto'autama mabwaiyami, loheya bewa wa'ita. Tauna weyahina meYudiya mabwaiyadi Yelusalema 'oinega, ta wete tupwa bewa 'oinega, si'ahwanoiyegauwa ma sigwae waiwai 'oiguwa sigwaeya, 'Loheya beno tuwa 'amasa 'ilobwaineya.’ <sup>25</sup> Ta geya 'eta wete 'ina pui yalobaloba ma weyahina 'ida 'amasa, ma tauna nuwanuwana ma 'ida kini madouna Sisa 'oina 'ida yatala, 'oinega yaloina pwaiya ma yahewasae Sisaina 'oina.

<sup>26</sup> “Ta geya 'aigeda 'ina pui weyahina, 'abehega 'ida bada Sisa 'oina yalele. Bewa 'oinega yatoeyama matauwa kini Agalipa, ma 'omi wete mabwaiyami, ta 'oinega 'abehega yatala bewa mulina 'ina pui 'aigeda taloba, ma weyahina yalele Sisa 'oina. <sup>27</sup> Weyahina geya 'ana 'ita bwebwe'ana 'eguma paipaina 'aigeda tahewasae, ma geya 'aigeda to'aha he'ewa weyahina tagwae.”

## 26

### *Paulo 'ina hepweaila kini Agalipa matana*

<sup>1</sup> Ma Agalipa Paulo 'ihewgaeya, 'igwae, “Bwebwe'ana Paulo, 'uboi weyahiu 'ugwae.”

Ma Paulo nimana 'i'ahala lagasiya, ma 'ihewgaeya bewa gide, 'igwae, <sup>2</sup> “Kini Agalipa yo, nige yayaliyaya madouna weyahina 'owa matauwa yatoholowa, ma 'igu uhala meYudiya 'idi he'ewao 'oiguwa weyahidi yagwae, <sup>3</sup> weyahina tauma meYudiya mumugama ta 'ima he'ohe'oheyao 'usanasanapudi. Ta ya'ahwanoiyego, ma 'u'alama'i'ita ma 'igu gwae 'uhesagohe.

<sup>4</sup> “MeYudiya mabwaiyadi sisanasanapugau, mumugagu, 'igu tuta sedaseda 'oina yahegaineya taugu 'igu 'asa, ta muliyetega Yelusalema 'oina, <sup>5</sup> ma tuta dudulena 'oina sisanasanapugau 'abehega tauma boda Palisi, ma Palisiyao 'ima loina waiwaina yamuliyeya moisa, ta 'eguma 'uhesilaladi, ma nuwanuwadi ma sihemaisa, nata si'ahwa moisa.

<sup>6</sup> “Ta bewa 'igu yatala huhuna matauwa, beno Yehoba 'ina gwae hemisa tubumao 'oidiya yahemiseya. <sup>7</sup> Gwae hemisaina 'ima susu site tuwelowedi sinuwatuhu yahiya ma 'abehega sida loba, ta ma'idi hemisa Yehoba 'oina sitapwatapwalolo, sabwelo ma hinuwana 'oidiya. Ta nuwatuhuyahina bewa weyahina meYudiya sihe'ewegauwa. <sup>8</sup> Ta togidega 'imi nuwatuhu 'abehega geya sowasowahina ma Yehoba to'amasana 'i'abihe toholo hiladi, 'awa?

<sup>9</sup> “Moisa, taugu mwalo 'igu nuwatuhu 'abehega 'eda mabwaiyadi 'oidiyega, Yesu gwama Nasaleta sanina ya'ausi. <sup>10</sup> Bewa weyahina Yelusalema 'ana tohekalesiyao tupwana baibaiwadi deliya yalagudiya, gidemusa topwaoli madoudi siloinaegauwa, ma 'eguma silohe'amasidi, taugu wete yatagwatagwala. <sup>11</sup> Ta wete hada tapwalolo 'oidiya ya'abi'abi hemuyamuyadi ma yahe'ohe'ohenedi ma Yesu silogwahate, ma yagamwasowala moisa 'oidiya, ma yamutumutudi hali 'asao 'oidiya.

<sup>12</sup> “Ta topwaoli madoudi siloinaegauwa ma Damasiko 'oina yatauya. <sup>13</sup> Ta kini 'u'ita, sabweloina yatautau Damasiko, 'asudibwalala ta galewega 'asilala madou hedada 'isaema, ta geya gidemusa hala maedanina, ta ya'iteya ba'idagwao 'isae sakowasiye-maiya.

<sup>14</sup> “Ta mabwaiyama 'abe'u talutalubu'iya bale'uwa, ma 'enana 'aigeda yahesagoheya 'ena Ibeliuwega 'ihewegaegauwa, 'igwae, 'Saulo, Saulo, to'aha weyahina 'ulolo'alehegau? Cana 'ita gide si'wa 'usi'wa ta 'utohotoho ma 'u'etopele ma 'uboi 'ulihasio, ma hesi 'aheu 'imomomosi ma 'i'abi'abi hemuyemuyego hedada.’

<sup>15</sup> “Ma yagwaeya, 'Bada taiya hede 'owa?” Badaina 'igwaeya, 'Taugu Yesu 'ulolo'alehegau. <sup>16</sup> Ma hesi 'utoholoma. Coiuwa yalatu pwaima ma 'abehega yaloinaego, ta 'igu latu bewa weyahina ma wete 'igu latuwedi 'abwa weyahidi, 'uhepwailegau. <sup>17</sup> Ma 'eguma meYudiya bo nuwana taudi tomiya ganamuli sito'ho ma si'abi hemuyemuyego, nata ya'abihetego nimadiyega. <sup>18</sup> Weyahina taudi tomiya ganamuli 'oidiya 'abwa yahewasaego, ma matadi 'u'abi he'asilaladi, ma guguyou 'oinega si'ita hila 'asilala 'oina, ta wete Tomudulele 'ina 'ebeloina waiwaina 'oinega sihapwesama, ma Yehoba 'idi puiyao 'inuwasamudi, ma siluhu taudi 'agu tohemisao 'oidiya, beno taudi 'oiguwega si'ehauwa.’

<sup>19</sup> “Kini Agalipa, bewa weyahina he'itaina galewega geya yalogwahate, <sup>20</sup> ma hesi Damasiko 'oina yahepwaila nugeta, ma muliyetega Yelusalema wete 'oina, ma Yudiya 'asanao mabwaiyana 'oidiya, ma taudi geya meYudiya 'asa ganamuli wete 'oidiya yahepwaila, ta 'abehega mumugadi galana 'oidiyega sinuwabui Yehoba 'oina, ta mumuga bwebwe'ana 'oidiyega 'idi nuwabui sihe'itae.

<sup>21</sup> “Cigu paihowa bewa weyahina meYudiya si'abi yahigauwa Hada He'asisi 'oina, ma 'abehega silohe 'amasigau. <sup>22</sup> Ma tuta nage 'oina ma 'ana siga nige Yehoba 'ileleme-gau, ma 'ane yatoholo ma yahehpwaila, 'omi toloinao ma tomota mabwaiyami 'oimiya, geya hali nuwatuhu weyahina, ma tuwa tauna 'iboi palopitao ma Mosese sihepwaila nugeteya, <sup>23</sup> beno 'abehega To'abihetenaina muya 'iloba ma 'amasa 'oinega 'itoholo nugeta, ta 'asilala 'ilelewane meYudiya ta taudi geya meYudiya wete 'oidiya.”

#### *Pesito Paulo 'i'ahwa buwaeya*

<sup>24</sup> Ma Paulo bewa gide 'ihehe'ote'otetela ta Pesito 'itala'asona, 'igwaeya, “Ciya, yauyauleiu! nuwana se'ulu hedada 'i'abihe yauyaulegowa.”

<sup>25</sup> Ta Paulo 'igwaeya, “Bada Pesito, geya yabuwa, ma hesi to'aha yahehpwailedi, beno gwae moisa ma dumwaluna, <sup>26</sup> ma nuwatuhuwedi bewa kini Agalipa 'isanasanapudi, ta matana bewa yagwaegwae geya ma'igu debamwadina, ma yasanasanapu ginaula bewa geya 'eta wete 'i'wai'waiha, weyahina bewa geya paihowa dahwana. <sup>27</sup> Togidega 'owa kini Agalipa, palopitao 'idi gwaeyao 'uhemisaedi, 'awa? Yasanapuya 'uhemisaeya.”

<sup>28</sup> Ta Agalipa Paulo 'ihewegaeya, “Cunuwatuhuya 'abehega tuta to'uto'upana 'oina 'u'abi hekalesiyegau!”

<sup>29</sup> Ma Paulo 'igwae hila, “Nuwana tuta to'uto'upana, bo nuwana tuta dudulena 'oina, 'owa ma taudi wete bewa 'oiguwa sihehesagoha, 'eguma mahetemwao wahe'wau'wau naowegau, beno 'ebe yaliyaya. Beno tuwa genuwagu ma balae bewa nimaguwa simiyamiya walobalobadi.”

<sup>30</sup> Ta kini mamwanena Belinisi ma gabana ma tomiyatoi mabwaiyadi sitoholowa ta silatuwa, <sup>31</sup> ta sihehewagwae siboidimo, sigwaeya, “Loheya bewa geya 'eta to'aha 'ina pui ma weyahina 'amasa bo lagudeli 'ilobwaine.”

<sup>32</sup> Ta kini Agalipa Pesito 'ihewegaeya, 'igwae, “Loheya bewa 'eguma geya Sisa 'ina yatala weyahina 'ida 'ahwanoiya, sowasowahina ma talihasi.”



<sup>1</sup> Ta siloina pwaiya 'abehega Itali 'oina 'atauya, 'oinega Paulo ma tupwadi paipaidi wete ba'idanao sitagwalediya Sisa 'ina tolo'alehao 'adi tohanugeta 'oina, sanina Yuliyasi, ma 'ane 'ima 'adau 'oina 'i'itayahidi.

<sup>2</sup> Eeta Adilamitio 'oina wagega 'agelu, tauna wagaina 'i'iuna 'ipili Esiya 'asaidi gadowaidi 'oidiya, ma 'a'u'e, Alisitako ba'idamai, tauna gwama Masidoniya, tupwa Tesalonaika 'oinega. <sup>3</sup> Gona 'i'adaleya ta Saidoni 'oina 'asohota, ta Yuliyasi Paulo 'i'ate-muyamuyaeya ta 'itagwaleya ma 'itauya 'iyanao 'oidiya, ma si'itayahi. <sup>4</sup> Ta Saidoniyege 'a'u'e hila ta Saipilosi gwahunega 'apili sakowasiya, weyahina Saipilosi matanega yaumai 'itowa bodemaiya. <sup>5</sup> Ta Silisiya ma Pamipiliya 'idi bwagabwaga 'a'ebesinediya ta Maila 'asohota, tupwa Lisiya 'oina.

<sup>6</sup> Nage 'oina tolo'alehao 'adi tohanugetaina 'ilobeya 'aigeda Alekisanidela wagana, 'i'iuna ma 'i'u'e Itali weyahina, ta 'oina 'agelubala. <sup>7</sup> Ta sabwelo baibaiwana 'ima 'adau mwauna, ta Nidasi deina 'alatuwa, ta geya sowasowahina ma Nidasi matanega 'adumwalu, weyahina yaumai madouna matamega, 'oinega 'asuluwa Kiliti ma Salimoni gamwagamwanidiyega 'asola, ta Kiliti guinega 'asakowasiya. <sup>8</sup> Ta 'oye'oyega 'a'u'eya, ma yaumaina tuwa 'i'ewe'ewemai ta tuwa 'atauyama 'alo 'aigeda sanina Calo Daumwala 'oina, gogo Lasiya holaina deina.

<sup>9</sup> Ma tuta dudulena 'auleya, ta hudi 'ana tuta 'igumwala, ma yaumai 'ana tuta galana 'ihagaina pwaiya, 'oinega Paulo 'ihenuwa laguwediyaga, <sup>10</sup> 'igwae, "Babadao 'ilobwaineya ma ta'aiyawasi 'alo bewa 'oina. Sahena tatohotoho ma ta'ada'adau hila, tabu ta tahesilae, ma tobwatobwa ma waga tamudalidi, ma wete tauda ta'amasa."

<sup>11</sup> Ma tolo'alehao 'adi tohanugeta 'ihesagohediya toniwaga ma waga 'ana to'eyaisa 'enadi, ta geya Paulo 'ina gwae weyahina 'ida nuwatuwuwa. <sup>12</sup> Ma 'aloinaina 'oina simiyamiya geya 'ilobwaine bolibolime 'ana tuta, ta baibaiwadi sigwae, "Tuwa tatoho, ma 'eguma sowasowahina Pinikisa 'oina taluhu, weyahina tauna 'alo bwebwe'ana, ma 'oina ta'aiyawasi." Ta Pinikisa 'oina 'alo 'aigeda, beno bwanabwana Kiliti 'oina, ma 'ebesola yalasi ma yalata 'ilobediya.

### *Wediliya silobeya*

<sup>13</sup> Ma yalasi 'i'iuna 'itowama, ta sinuwatuhuya 'abehega nata si'adau bwaibwaina ma Pinikisa siluhu, ta 'idi loho sitabeiya ta Kiliti deinega sipiliya 'oye'oyega. <sup>14</sup> Ta tuta 'i'iuna ma yaumai madou hedadena sanina Bomatu 'itowadobima, <sup>15</sup> ta waga geya sowasowahina ma 'ipili, weyahina yaumai matamega 'itowatowama, ta tuwa 'ibibini hilemai, <sup>16</sup> ta bwanabwana sanina Kiloda gwahunega 'a'ada'adau, ta 'ahewaiwaiya ta waga 'ebe talalaga 'alisi lagasiya, <sup>17</sup> ta balae si'eweya ma waga madouna simomosiya, ma simatauta, nuwana nenegwala sanina Silitisa 'oina siduna, ta 'ole'ole siulisiya ma tuwa 'a'aha'ahai.

<sup>18</sup> Ta wediliya madouna waga 'i'ahu'ahu buibui hedadeya, ta gona 'i'adaleya ta waga 'ana do'odo'ona si'eula suluhediya. <sup>19</sup> Ma sabwelo hetoina 'oina waga 'ana tobwatobwao si'ewediya ta siula suluhediya.

<sup>20</sup> Ma sabwelo baibaiwana 'oidiya geya hala bo 'ipwala 'ada 'itediya, ta wediliya madouna 'imutumaiya, 'oinega 'asanapuya 'abehega nata 'a'amasa.

<sup>21</sup> Ma sabwelo baibaiwana 'oidiya waga 'ana togeluwao geya si'ai, ta Paulo gamwagamwanidiya 'itoholowa, ma 'igwaeya, "Tasigwao, 'eguma 'igu gwae wada hesagoheya, ma sahena Kilitiyega tada gelugelu, gesowana mwau ma hesilae bewa talobaloba. <sup>22</sup> Ta bewa yaguguyegomi wa'atepatu, sahena 'aigeda 'oimiyega 'i'ama'a-masa, ma wagamo hesi 'abwa 'idamana, <sup>23</sup> weyahina hinuwana 'igu Yehobaina, tauna yahemiseya, 'ina anelose 'inaoma ma deiguwa 'itoholowa, <sup>24</sup> ta 'ihewagaewa, 'Paulo, sahena 'u'ate'ateyoho; 'abwama Sisa matana 'utoholo, weyahina 'ino 'ahwanoi 'oinega waga 'ana togeluwao mabwaiyadi mahetemwao Yehoba 'i'abihetegomi." <sup>25</sup> Ma tasigwao, sahena wa'ate'ateyoho, weyahina Yehoba yahemiseya, ma nata 'ipaihowa gide tuwa 'ihe'itegauwa. <sup>26</sup> Eema bwanabwana 'aigeda 'oina taduna."

*Waga 'iduna*

<sup>27</sup> Wiki 'eluwa sigumwala, 'abwa hene Ediliya ni'una 'idoedoe dadanemai, ma nihuwana gamwana waga 'ana topaihowao sinuwatuhuya 'abehega 'oya'oya deina 'alatulatu. <sup>28</sup> Ma ni'u siloho tohotohoya ta silobeya 'ana saliyana gide tuweniti lihe 'ana saliyana. Ta tupwana 'ahedoe naowa ta wete siliheya ta silobeya ni'u saliyana gide pipitini lihe. <sup>29</sup> Ta simatauta tabu ma da'ule 'oina 'aduna, ta waga yiuwega loho 'ehata siulediya, ma si'ahwa'ahwanoi gona 'ada'adale weyahina.

<sup>30</sup> Ta tupwadi wagaina 'ana topaihowao nuwanuwadi ma wagega sidena, ta waga 'ebe talalaga siulasuluheya holai, ta si'abowa 'abehega loho wete siule waga matanega. <sup>31</sup> Ta Paulo tolo'alehao ma 'adi tohanugetao 'ihewgaediya, "Ceguma loheloheya nage wagega sidena, nata geya'abwa tabwebwebwe'ana." <sup>32</sup> Ta tolo'alehaowedi waga 'ebe talalaga 'ana balae si'upwa yahuleya ta 'idoeya.

<sup>33</sup> Ta 'i'iuna ma gona 'i'adale, ta Paulo 'ihewgaediya ma si'ai, 'igwae, "Sabwelo potini 'ateyoho weyahina ta geya wete 'e'ahai wada lotohoya. <sup>34</sup> Coinega 'ilobwainegita ma talohepa'ala, weyahina sahena hesi 'aigeda 'ihehesilae."

<sup>35</sup> Ma gwae bewa 'igwaeneya ta beledi 'i'eweya ta weyahina 'iloyauwedo Yehoba 'oina, mabwaiyama matama, ma 'ihisiya, ma tauna 'i'ai nugeta. <sup>36</sup> Ta 'oinega mabwaiyama nuwana 'ibwebwe'ana, ta wete 'a'aiya. <sup>37</sup> Ta 'ama baibaiwa wagaina 'oina 'ageluwa beno tu handeledi ma sebeniti sikisi. <sup>38</sup> Eema 'amwauwuwa, ta pwalawa waga 'alonga siuleya holai, ma 'abehega waga 'imalamalai.

<sup>39</sup> Ta gona 'i'adale pwaiya ta 'oya'oya si'iteya, ta geya si'inana to 'asa, ma 'alo namonamoina si'ita lobeya, 'oinega sinuwatuhuhu 'eguma sowasowahina wagaina silagahe 'aloina 'oina. <sup>40</sup> Ta loho si'upwa yahuleya ma ni'uwa si'abi sinediya, ma wete 'eyaisi 'ana balaeyao silihasidiya ma si'eyaisa, ma 'ole'ole 'ai matana si'u'eya ma si'u'eya 'oya'oya weyahina.

<sup>41</sup> Ma 'alusa 'idoemaiya ta waga 'aheduneya namonamo 'oina, ta waga 'abusuna 'iduna ma geya sowasowahina 'ilonihu, ma gwahuna bagodu 'idi lasa hilehilega ta 'ipisaliya. <sup>42</sup> Ta tolo'alehao sinuwatuhuhu 'abehega paipaidi silohe'amasidi tabu ma tupwadi situbehane 'oya'oya ma sidena. <sup>43</sup> Ta 'adi tohanugetaina nuwanuwana ma Paulo 'i'abihete, 'oinega 'i'ausidiya, 'abehega sahena silolohe 'amasidi. Ma hesi 'iloinaedi taudi sowasowahidi ma sitube nugeta ma 'oya'oya weyahina sitube, <sup>44</sup> ma tupwama wagaina tupwatupwana 'oidiyega 'atube laga, ta mabwaiyama ma'ima bwebwe'ana 'atube haneya 'oya'oya.

## 28

*Cima miya Melita 'oina*

<sup>1</sup> Ta 'agayo haneya 'oya'oya, ma bwanabwanaina 'ana tomiyao sihepwaila 'oima 'abehega bwanabwana sanina Melita. <sup>2</sup> Ma bwanabwanaedi sihelauwemaiya madouna, ta 'aiwe siholeya, ma mabwaiyama sibwauwemaiya ta 'amwaimwailu, weyahina 'i'wesu'wesu ma gogai wete.

<sup>3</sup> Ma Paulo 'aiwe 'idomweyama, ta 'aiwe 'oina 'ilagu balediya, ma yahiyahi weyahina ta mwata newanewalina 'ilatuma, ta Paulo nimana 'inaliya.

<sup>4</sup> Ta bwanabwanaedi si'iteya Paulo nimana mwata 'isanasanana, ta sihehegwaegwae siboidimo, sigwaeya, "Moisa tuwa, loheya nage tolohe'amasida, ma geya sowasowahina loinega 'iboi 'i'abihete. Bwagana damanega 'idenama 'oya'oya, ma wa'ita mwata 'inaliya."

<sup>5</sup> Ta Paulo mwataina 'ilosepaleya 'aiwe ninininimina 'alona, ma geya muya 'ilolotoho. <sup>6</sup> Ta bwanabwanaedi Paulo si'e'ebubuya ta 'idi nuwatuhuhu nata nimana 'iseseha, nuwana 'itai ma 'i'amasida, ma siyamwayamwa, ta Paulo geya wete 'aigeda to'aha 'i'ewa'ewa, 'oinega 'idi nuwatuhuhu sibuiya, ta sigwae, "Loheyaina 'aigeda yehoba."

<sup>7</sup> Bwanabwanaina 'ana bada sanina Pubiliyasi, ta 'ina 'asa tupwaina deina 'aluhuwa, ta Pubiliyasiina sabwelo 'etoi 'oidiya 'i'itayahi bwaibwainimaiya.

<sup>8</sup> Ma tutaina 'oina Pabilyasi tamana hadai 'i'eno'eno ma'ina lohala, ta 'ina lohala yahiyahi ma gamwa pilipili. Ta Paulo 'iluhuwa 'oina, ma weyahina 'i'ahwanoiya Yehoba 'oina, ta wahina 'i'abi tohoya ta 'i'abihe bwebwe'anya.

<sup>9</sup> Ta bwanabwanaedi mabwaiyadi taudi ma'adi lohala sinaoma Paulo 'oina, ma taudi wete 'i'abihe bwebwe'enediya. <sup>10</sup> Coinega helau baibaiwana si'ebwaemaiya, ta 'ima tuta gelu 'oina, 'ama 'alai sowsawahima sido'oya.

#### *Melitega ta Loma*

<sup>11</sup> Ta wai'ena 'etoi sigumwala ma Melitega 'agelu Loma weyahina, ta 'ima waga Alekisanidela wagana, matana 'ana tosamala didiluwaluwa loheyadi. Ma wagaina, mwalo wai'ena gogaiyedi 'oidiya bwanabwanaina 'oina 'iyamwayamwana 'ana siga yaumai madouna 'ilolaguwa.

<sup>12</sup> Ta 'a'u'e ma Sailakiusa 'oina 'asohota, ta sabwelo 'etoi 'amiyamiya. <sup>13</sup> Nage 'oina 'asakowasiya Legiyami ta 'asohota. Ci'adaleya, ta yalasi 'itowama, 'oinega 'a'u'e hila, ta 'apilipili, ta sabwelo 'eluwa tuwa ma 'aluhuwa Putioli.

<sup>14</sup> Putioli 'oina tupwana tohekalesiyao 'alobediya, ta sitoemaiya 'idi hada, ta 'oidiya 'amiyamiya sabwelo sebeni 'oidiya. Ta nage 'oinega 'atauya Loma weyahina.

<sup>15</sup> Ma tohekalesiyao Loma 'oina tetelima sihesagoheya, ta sitauyama 'edai siheso-hotemaiya tupwa Cebegimwane, sanina Apio ma Hada Taumana 'etoi 'oidiya. Ta tutaina Paulo 'iyanaowedi 'ilobediya, Yehoba 'oina 'iloyauwedowa, ma 'i'atepatu. <sup>16</sup> Nage 'oinega 'atauya ta Loma 'oina 'alatuwa, ta tolo'alehao Paulo sitagwaleya ma 'imiya wasi, ma 'ana to'itayahina tolo'aleha 'aigeda tuwa.

#### *Paulo 'ina paihowa Loma 'oina*

<sup>17</sup> Ma sabwelo 'etoi sigumwala, ta Paulo meYudiya 'idi tohanugetao 'ibwau 'autedima. Sihapwesama ta 'ihewgaediya, 'igwae, "Tasigwao, taugu geya 'eta to'aha galana 'ida boda 'oidiya yapaihowa, nuwana mumugada tubudao 'oidiyega yaligeligehi, ma hesi Yelusalema 'oina si'ebwayaegauwa meLoma 'oidiya, ta deliya silagugauwa. <sup>18</sup> Ta 'igu yatala mulina meLomaedi nuwanuwadi ma silihasigau, weyahina geya 'aigeda 'igu pui siloba, ma 'abehega sida lohe'amasigau. <sup>19</sup> Ta meYudiya si'oheya gabana 'oina 'abehega sahena silihalihasigau. Bewa huhuna ya'ahwanoiya Sisa 'ina yatala weyahina, ta geya 'abehega 'ida bodao yahe'ewadi. <sup>20</sup> Ma hesi taudi 'idi he'ewa 'oiguwa weyahina yab-wauwegomiya ma 'ane tahegwaegwae. Moisa tuwa tauda me'sileli tahehemisa 'abehega 'ada lema Yehoba 'oinega 'ilatuma, ta hemisaina bewa weyahina deliya silagugauwa."

<sup>21</sup> Ta meYudiyaedi sigwaeya, "Tauma geya 'aigeda Yudiyega leta weyahiu 'alobaloba, ma wete 'iyadao 'ebwa sinaonaoma geya sihepwailego 'abehega 'owa galau. <sup>22</sup> Ta hesi nuwanuwama 'ahesagohamo 'oiuwega to'aha 'ino nuwatuhuwedi, weyahina tupwa baibaiwadi tomota 'ino boda hekalesiya si'ahwa galegaleya."

<sup>23</sup> Ma sabwelo siupaeya, ma boda madouna si'eto'utama Paulo 'ina hada, ma gonegonega 'ana siga 'iboi 'oidiya 'iguguya, Yehoba 'ina hetoloina weyahina, ta Mosese 'ina loina 'oinega, ma palopitao 'idi gwaeyao 'oidiyega, 'ihe'itediya Yesu weyahina, ta 'itohoya ma 'abehega 'i'abihe 'asilaladi. <sup>24</sup> Ta tupwadi sihemiseya ma tupwadi sipa'ala. <sup>25</sup> Weyahina 'idi nuwatuhuwao hagana ma hagana, 'oinega sisawala.

Ta Paulo 'ina gwae 'ana 'ebelosaloha 'oidiya 'igwaeya, "Yaluyaluwa Tabuna 'ina gwae tubumiyao weyahidi gwae moisa, beno palopita Aiseya 'ahwanega 'igwaenediya:

<sup>26</sup> 'Cutauya ma tomotaedi 'uhegwaedi: Cabwa wahehesagoha, ma sahena nuwami 'isab-wasabwalena. Ta wete tuwa wa'e'ebubuna, ma nata geya wa'ita'ita. <sup>27</sup> Weyahina tomota bewa sinuwapota, ma tenadi si'elotuiya, ta matadi si'elogibuwa, tabu ta matadiyega si'ita ma tenadiyega sihesagohe, ma sinuwa sabwalena, ma 'oiguwa si'ita hila, ma ya'abihe bwebwe'enedi.'"

<sup>28</sup> Ta Paulo 'ina gwaeina wete 'iloheposeyaneya, 'igwae, "Wasanapu Yehoba 'ina hepwaile 'ada 'abihetena weyahina 'abehega 'ihewaseya taudi 'asa ganamuli geya meYudiya 'oidiya, ma taudi hesi sihesagohe." <sup>29</sup> (-)

<sup>30</sup> Ta Paulo 'ina hada nage 'ihehemaisa eeta 'oina 'imiyamiya bolime 'eluwa 'oidiya, ta tomota baibaiwadi 'ina hadaina siluhuluhu ma mahetenao sihe'iyaiyagu, <sup>31</sup> ta Yehoba 'ina lina weyahina 'iguguguyae ma 'ihehe'itae Bada Yesu Keliso weyahina, ta geya 'aigeda taiya 'itoho ma 'ina guguyaina 'i'ausi.

## LOMA MeLoma 'idi leta Paulo 'ileleya

Paulo meLoma 'idi leta 'ileleya ta 'abehega tapwalolo 'ana wahuwahu sisanapu, beno tauda tomota mabwaiyada mumugada galana, 'oinega 'ilobwaineya ma loina galana Yehoba 'oinega taloba, ta hesi Yesu 'ina 'amasa 'oinega 'i'abihe bwebwe'anegita ta sowasowahina taluhu 'ina 'ebeloina bwebwe'ana 'oina, taudi meYudiya ma wete tauda ganamuli. Geya 'ana watahamo. Ceda 'aigeda tuwa, beno hemisa Yesu 'oina. Gidemusa mwalona hene Ebalahamo Yehoba 'ihemisaeya, 'oinega Yehoba Ebalahamoina 'i'ahwa bwebwe'aneya. Loina miyamiyana Mosese 'oinega ma 'abehega 'ida puiyao tasanapudi, ta 'eguma Yesu tahemisae, Yehoba 'ina Yaluyaluwa Tabuna ta'ewa, ma 'i'abihe bwebwe'anegita.

Laba 9 'oinega ma laba 11 'oina, Yehoba 'ina loina meYudiya weyahidi, to'aha 'abwa siloba, eema leta 'ana 'ebelolagu 'oina, tauda Yesu 'ana tohemisao mumugada bale'uwa wete weyahina.

### *Loyauwedo*

<sup>1</sup> Taugu Paulo, Yesu Keliso weyahina yahetopaihowa. Yehoba 'ihesinuwegauwa 'abehega tetelina bwebwe'ana weyahina yahetohewpaila. <sup>2</sup> Tetela bwebwe'ana Yehoba mwalo 'igwae hemisaeya 'ina palopitao 'oidiya, ma sileleya Yehoba 'ina Buki 'oina. <sup>3</sup> Tetelaina beno Yehoba natuna Yesu Keliso he'ote'otetelina. Tauna 'iheloheya masiha Debida 'ina susu 'alonega, <sup>4</sup> ma muliyetega Yehoba yaluyaluwana 'ina waiwaiyega 'amasega 'i'abi hetoholo hileya 'ida Badaina, ta 'i'abi hemasaleheya 'abehega Yesuina Yehoba natuna.

<sup>5</sup> Yesu Kelisoina tauna 'ihelauwegauwa ma 'ihesinuwegauwa 'abehega yahepwaila weyahina 'asa ganamuli mabwaiyadi 'oidiya, eema 'abehega sitagwala 'oina ma saninega sihemisa. <sup>6</sup> Ma 'omi meLoma Yehoba 'ihelau pwaigomiya ta 'ihesinuwegomiya 'abehega weteyage Yesu Keliso 'ina bodaina 'oina wamiyamiya. <sup>7</sup> Tamadai Yehoba ma 'ida Bada Yesu Keliso 'idi helauwega tuwa wamiya daumwala.

### *Paulo nuwanuwana meLoma 'ibo'enedi*

<sup>8</sup> Nugeta, yaloyauwedo Yehoba 'oina Yesu Keliso saninega, weyahina baibaiwami 'omi 'imi hemisa tetelina 'i'edadana 'asa mabwaiyana 'oidiya.

<sup>9</sup> Yehoba 'isanapugauwa, tuta mabwaiyana yanuwauwa tuhugomi 'igu 'ahwanoi 'oidiya. Yehobaina 'ina paihowa 'oina yaguibiga hedada, Natuna tetelina 'ana hepweila weyahina. <sup>10</sup> Cigu 'ahwanoi Yehoba 'oina tuta mabwaiyana 'eguma togidega 'ida malamalai, ma yatauyawa yahabo'enegomi, 'eguma bewa gide 'ina nuwatuhu. <sup>11</sup> Weyahina nuwanuwagu ya'itegomi ma ya'abihetegomi eema Yaluyaluwa Tabuna 'ina 'ebwaya 'oinega wahewaiwai. <sup>12</sup> Bewa 'oinega 'omi ma taugu tahe'abi 'abihetena, 'aneyage 'omi 'imi hemisega wa'abihetegau, ma taugu wete 'igu hemisega ya'abihetegomi.

<sup>13</sup> Tasigwao, wanuwatuhuyahi tuta baibaiwadi 'oidiya yanuwauwatuhu madouna togidega ma yahabo'enegomi, ma geya 'ida malamalaiya 'oiguwa, weyahina nuwanuwagu ma 'igu habo'ena 'e'enina 'ida hapwesa. Gide 'ane 'igu habo'enaedi taudi hali tupwa ganamuli 'oidiya bewa sauga 'e'enidi silagulagu. <sup>14</sup> Weyahina 'ilobwainegauwa gide ma boda mabwaiyadi 'oidiya yapaihowa, taudi 'asa baibaiwadi 'adi tomiyao, taudi wete pwatula 'adi tomiya, ma tonuwa sonosonogao ma tohemwagemwageyao. <sup>15</sup> Eeta 'igu nuwatuhu madouna ma meLoma 'omi wete 'oimiya tetela bwebwe'ana yaloguguyae.

<sup>16</sup> Tetelaina 'ana loguguya weyahina geya yada debamwadina, weyahina Yehoba 'ina waiwai 'oina 'imiyamiya, eeta 'eguma taiyawedi sihemisa 'i'abihetedi, beno tauma meYudiya 'oima ma muliyetega 'omi tomiya ganamuli 'oimiya. <sup>17</sup> Ta moisa tuwa tetela



bewa 'ihe'itegita 'abehega 'ida hemisamo tuwa 'oinega Yehoba 'i'ahwa bwebwe'anegita. Weyahina Yehoba 'ina buki 'ihewwaila, 'igwaeya, "Todumwalu 'idi hemisega yawasidi siloba."

*Tomota mumugadi galana*

<sup>18</sup> Yehoba wetenuge 'ina gamwasowala 'ihe'itaeyama galewega taudi mumugadi galadi mabwaiyadi 'oidiya, weyahina 'idi mumuga galana 'oinega mumuga dumwaluna sihegagaleya. <sup>19</sup> Ma Yehoba 'ana nuwatuhi 'i'abi hemasaleheya 'oidiya ta sisanapu pwaiya. <sup>20</sup> Yehoba geya tada 'iteya, mwalo hene bale'u 'ipaihoweya ma 'ana siga nige 'ina waiwai miyamiya hatayana tasanasanapu, beno ginaulaedi 'ipaihowediya 'oidiyega, 'abehega tauna Yehoba. Coinega tutaina mebale'u 'ihe'ewadi geya wete 'idi 'ebe gwaehilamo.

<sup>21</sup> Ma sisanapuya tauna tuwa Yehoba, ma geya sida he'asisineya bo sida loyauwedowa 'oina, ma nuwatuhi besobeso 'oina sihwaiwai, 'oinega 'eda'eda guguyou 'atedi 'ilohemaheya. <sup>22</sup> Cabehega siboi si'ahwa'ahwa sonosongaedi, ta sibuwu. <sup>23</sup> Weyahina Yehoba miyamiya hatayana si'ita guipaileya, ma tauna miyalaena beno 'idi 'ebe hemisao ginaula hagadi silagudiya, leleleidi sitagidiya 'adi 'ita gide tomota bo bwasumo bo hebahebai bo hebai 'awa'awalidi. Ginaulaedi sihemisaediya eeta sitapwatapwalolo 'oidiya.

<sup>24</sup> Coinega Yehoba 'oidiya 'itagwala ma 'idi nuwatuhi dahwadahwanidi 'atediya simiyamiya sipaihowadi, eema nage 'oinega mahetediyao wahidiyega si'etala biyabiyaunedi 'eda'eda galana 'oidiyega. <sup>25</sup> Weyahina Yehoba 'ana he'ita moisa siguipaileya, ma 'e'abo'abo 'oinega sihemiyalaeneya, ta Yehoba ginaulaedi 'ipaihowediya 'oidiya si'etala he'asisi, ma hesi topaihowaina silogwahateya, tauna 'ana hepwtu miyamiya hatayana. Emeni.

<sup>26</sup> Bewa 'oinega Yehoba 'itagwalediya ma 'idi nuwatuhi dahwanedi sipaihowadi. Cidi wahiwahineyao sipaihowa galagala, geya pui 'ana moisega, beno ma'idi 'ehewahiwahineyao silogwali hilediya. <sup>27</sup> Loheloheyaedi wete geya wahiwahine mahetediyao sida puiya, ma loheloheya daisidimo nuwanuwadi madouna, 'oinega mahetediyao pui 'ebe debamwadina sipaihoweya. Coinega 'eda galanaina 'ana maisa galana siboimo wahidiya silobaloba.

<sup>28</sup> Bewa 'oinega Yehoba 'ana nuwatuhi geya nuwadi, eeta Yehoba 'itagwalediya ma nuwatuhi galadi 'ilohemahadi, ma ginaulaedi geya 'adi lobwaina tuwa sipaihowadi.

<sup>29</sup> Ta gala mabwaiyana 'ilohemahediya, gide tobwatobwa 'ana henuhenuwa, ma mumuga galagala ma he'ipi'ipi ma lohe'amasa ma he'alagwaegwae ma 'e'abo'abo ma sosomane ma hetalapili, <sup>30</sup> ma taudi 'iyadiyao sigwaegwae galagalaedi, ma taudi Yehoba silolo'alehe, ma todebapa'ala ma tonuwa hanehane ma togagasa ma taudi mumuga galana 'ana to'abi hemadouwao, ta weteyage taudi sinadiyao ta tamadiyao geya sida he'asisiyenediya. <sup>31</sup> Ta moisa geya 'i'iuna mumugadi 'ida bwebwe'ana, 'oinega geya wete 'adi hemisamo, ta geya 'eta wete helau nuwana 'atemuyamuya 'oidiya.

<sup>32</sup> Ma hesi tomotaedi Yehoba 'ina lolina sisanasanapu, 'abehega 'eguma taiyawedi bewa gide simumuga 'esa, 'amasamo tuwa 'ilobwainediya. Ma tuwa mumuga galaedi sipaipaihowedi, ta 'eguma 'iyadiyao wete sihe'au'aunedi beno si'ahwa bwebwe'enedi.

2

*Yehoba 'ina bwa'omatana*

<sup>1</sup> Tasigwao, sahena 'iyamiyao mumugadi weyahina wahehetalapili, weyahina 'eguma 'iyamiyao wahehetala piliyedi ma 'omi wete mumuga 'aigedaina wapaipaihowa, beno waboi tuwa wahehetala piliyegomi. <sup>2</sup> Ma tasanapuya 'abehega Yehoba tauna 'ana lobwaina ma topaihowa galagalaedi 'iloinaedi. <sup>3</sup> Ma 'iyagwao, 'omi hali tomota wahehetala piliyedi, 'imi nuwatuhi 'abehega nata geya Yehoba 'ina bwa'omatana walobaloba, ma hesiyage nata wete 'iloinaegomi, weyahina mumugaedi 'omi gide wete wapaipaihowadi.

<sup>4</sup> Ma geya sowana Yehoba 'ina helau wasinasinali, weyahina 'i'atemuya muyaegomiya ta 'i'alama'i'itana ma 'abehega 'imi pui 'oidiyega 'i'abi lohilihlegomi. <sup>5</sup> Ma tuwa debami sipa'ala hedada, 'oinega 'eguma tutaina Yehoba 'ina lolina dumwaluna 'i'abi hemasalaha, 'igamwasowalegomi tuwa, <sup>6</sup> weyahina mabwaiyada 'aigeda 'aigeda 'ihemaisegita to'aha gidemusa 'ida paihowa.

<sup>7</sup> Ma 'eguma tuta mabwaiyana tapaihowa bwebwe'ana ma'ida he'alama'i'ita, ma gide tuwa tapaipaihowa 'esa, ma 'abehega 'ahwa bwebwe'ana ma nata yawasi miyamiya hatayana ta'ewa Yehoba 'oinega, beno moisa tuwa 'abwa yawasida miyamiya hatayana 'i'ebwaegita, <sup>8</sup> ma tupwadi tomota sihe'ahwa pa'ipa'i'i hedada, ta mumuga bwebwe'ana silogwahateya, ta mumuga galana sipaipaihowadi, ee 'oinega Yehoba 'abwa 'igamwasowaledi ma 'iloinaedi.

<sup>9</sup> Coinega taiyawedi sipaipaihowa galagala, lolina mwauna ta muya madouna silobadi, meYudiya nata 'ihenugetedi ee 'abwa 'asa ganamuli. <sup>10</sup> Ma taiyawedi mumugadi ta 'idi paihowao bwebwe'adi, Yehoba nata hep watu ma he'asisi ma miya daumwala 'i'ebwaedi, nugeta meYudiya 'oidiya 'i'ebwaya, ee 'abwa 'asa ganamuli 'oidiya.

<sup>11</sup> Yehoba nata mabwaiyada 'iloinaegita mahemahetena. <sup>12</sup> Ma taiyawedi Mosese 'ina lolina geya sisanapu ma sipaipaihowa galagala, 'iloinaedi 'idi puiyedi weyahidi. Wete gide taudi meYudiyaedi Mosese 'ina loina sisanapuya, 'eguma sipuiya, 'abwa loina 'oinega 'iloinaedi.

<sup>13</sup> Geya 'abehega loina 'ana hesagohamo 'oinega Yehoba 'i'ahwa dumwaluwegita, ma hesiyage 'ina lolina 'ana paihowa 'oinega. <sup>14</sup> Ma taudi ganamuli Mosese 'ina lolina geya 'oidiya, ma tuwa siboi 'idi nuwatuwegaga sipaipaihowa to'aha bwebwe'ana, beno tuwa siboi 'idi lolina. <sup>15</sup> Coinega 'idi paihowega tasanapu 'abehega 'atediya lolina bwebwe'ana 'imiyamiya. Ma 'oinega siboidimo mumugadi sisanapuya, 'eta tuta galana, nuwana 'eta tuta bwebwe'ana.

<sup>16</sup> Gide tuwa tetelaina bwebwe'ana yaloguguyaeya 'oimiya, 'abehega bwa'omatana 'ana tuta 'oina Yehobaina Yesu Keliso nata 'ihe'abeiye ma tauna 'ida nuwatu dah-wadahwaidi weyahidi 'iloinaegita.

### *MeYudiya weyahidi*

<sup>17</sup> Ma 'omi togidega? Waboi wa'abi'abi lagasihilegomi ma wagwaeya, “Tauma meYudiya, Yehoba 'ina lolina 'i'ebwaemaiya Mosese 'oinega.” <sup>18</sup> Coinega Yehoba 'ina nuwatu wasanapu pwaya, weyahina loina 'i'abihe sanapuwegomiya mumuga bwebwe'ana hedada weyahina.

<sup>19</sup> Ma waboi wa'ahwa tosanapuwegomiya 'abehega tomata gibugibu 'adi tohanugetao, ma taudi tomiya guguyou wa'atuhe 'asilalediya, <sup>20</sup> ma toheyauyaule ta gwagwama 'oidiya wahetohe'ita, 'abehega 'omi Mosese 'ina lolina 'oinega sanapu moisa wa'eweya.

<sup>21</sup> Taiya 'owa hali tomota 'oidiya 'uhehe'ita, ma togidega 'owa? Ceguma 'oidiya 'ugwae, “Sahena yagaha”, ma 'owa toyagaha 'aigeda. <sup>22</sup> Bo nuwana 'uhegwaedi, “Sahena lowahine dadana,” ma 'owa 'abwa tolowahineina 'aigeda. Ta 'owa 'ugwaeya, “Taugu 'ebehemisa 'abo'abowedi yagui'ailediya”, ma hesiyage 'ebehemisaedi 'idi hadega 'uya-gayagaha.

<sup>23</sup> Comi moisa wagagasa hedadeya ta wagwaeya, “Mosese 'ina lolina 'oima”, ma hesi loina geya wada muliyeya, 'oinega tupwadi tomota Yehoba si'ahwa 'abo'aboweya.

<sup>24</sup> Gide Yehoba 'ina Bukiina 'igwaeya,

“Comi meYudiya mumugamiyega tomiya ganamuli Yehoba si'ahwa galegaleya.”

<sup>25</sup> Ta moisa tuwa 'omi meYudiya Ebalahamo 'ina 'ila'ilala 'wapi'upwa\* wahimiya, ma 'eguma Mosese 'ina loinaedi wamulimuliyedi, 'ila'ilalaina ginaula 'ausalana 'oimiya, ta 'eguma loinaedi geya wada muliya bwaibwainidiya, 'ila'ilalaina 'wapimiya beno 'iheginaula besobeso. <sup>26</sup> Ma taudi tomiya ganamuli Ebalahamo 'ina 'ila'ilalaina geya wahidiya, ma 'eguma loinaedi sihe'asisiyedi, taudi 'adi 'ita gide 'abwa 'ila'ilalaina 'oidiya.

<sup>27</sup> Coinega 'omi meYudiya 'abwa tomiya ganamuli sibwa'omategomi, weyahina Mosese 'ina loina ta Ebalahamo 'ina 'ila'ilalaina 'wapimiya simiyamiya, ma geya

loinaedi wada muliyediya, ma hesi taudi geya meYudiya bwagana Ebalahamo 'ina 'ila'ilala 'wapidiya geya 'ida miya, ma tuwa hesi loinaedi simulimuliyedi.

<sup>28-29</sup> Ma gwama Yudiya moisa 'ana 'ila'ilala geya 'abehega ginaula hapwehapwesana wahidiya, ma hesi ginaula dahwadahwanina 'atediya Yehoba Yaluyaluwana 'oinega ma geya tomota 'oidiyega, ta wete 'adi 'ahwabwebwe'ana geya wete tomota 'oidiyega, ma hesi Yehoba 'oinega.

### 3

<sup>1</sup> Ceguma gide, to'aha hede 'ana bwebwe'ana tauda sigwaegwaenegita sigwaeya meYudiya? Ma wetenuge to'aha Ebalahamo 'ina 'ila'ilalaina 'ana bwebwe'ana wahida si'upwa'upwa?

<sup>2</sup> Ta ginaula bwebwe'adi baibaiwadi 'oida simiyamiya. Ma ginaula nugenugetaina beno Yehoba 'ina gwae 'oida 'ilaguyama.

<sup>3</sup> Ma togidega, 'eguma tupwadi Yehoba siguipaileya, wanuwatuhuya 'abehega Yehoba wete nata 'iguipailegita, bo geya? <sup>4</sup> Nata geya! Weyahina bwagana tauda mabwaiyada to'e'abo'abo, ma Yehoba tuwa 'iboimo dumwadumwaluna. Yehoba tauna weyahina 'ina Buki gide 'ihewaiwai 'esa, 'igwaeya Cabehega 'ina gwaeyega si'ahwamoisae, ma 'ina yatala 'oina 'ihewaiwai.

<sup>5</sup> Ma 'eguma 'ida mumuga galana 'oinega Yehoba mumugana bwebwe'ana 'imasaleha bwaibwaina, to'aha nata tagwaene? Bo nata tagwae, “Yehoba yo, 'ima mumuga galana weyahina sahena 'uloiloinaemai.” Moisa bewa yahegwaegwae besobeso tuwa gide tupwadi tomota sigwaegwae 'esa.

<sup>6</sup> Ma wanuwatuhuyahi 'abehega Yehoba tauna toloina dumwadumwaluna, 'oinega bwa'omatana 'ana tuta 'oina nata 'ina loina dumwadumwalunega mabwaiyada 'iloinaegita.

<sup>7-8</sup> Coinega tupwadi to'e'abo'abo sigwaegwaenegau, sigwaeya, “Cino loguguya 'oina 'ugwaeya 'abehega 'igu 'abo 'oinega Yehoba mumugana dumwadumwaluna 'i'abihe-latuya tomota 'oidiya ta Yehoba sihepwatuweya, ta nata Yehoba geya sowana 'i'ah-wa'ahwa galagalaegau. Coinega 'ilobwainemaiya tauma wete 'apaihowa galagala, ma 'ane ginaula bwebwe'adi silatu.” Taudi tomotaedi gwaenigu sigwaegwaene 'ilob-wainediya Yehoba 'iloinaedi.

#### *Geya 'eta taiya mumugana bwebwe'ana*

<sup>9</sup> Ma togidega tauda meYudiya 'ida miya 'ibwebwe'ana hedadeya, ta taudi tomiya ganamuli 'idi miya geya bwebwe'ana? Geya! Weyahina yahe'ita pwaigita 'abehega mabwaiyada topui. <sup>10</sup> Gide Yehoba 'ina Buki 'ihewaiwai, 'igwaeya, “Geya 'eta taiya mumugana dumwadumwaluna.

<sup>11</sup> Ma geya 'eta wete taiya Yehoba 'isanapu, bo nuwanuwana ma 'ida sanapu. Tuwa geya uleulena!

<sup>12</sup> Moisa tuwa, tomota mabwaiyadi sitauya puiya, ta pui 'ana 'eda 'oina silatuwa. Geya 'eta wete taiya 'ina paihowa bwebwe'ana.

<sup>13</sup> Cahwadi gide galiha so'eso'ena, ma 'oinega 'e'abo'abowedi galadiyedi silatulutuma, Ma wete 'idi gwaeyao galadi gide mwata, nuwanuwadi 'oidiyega tomota silohe 'amasidi.

<sup>14</sup> Ma tuta mabwaiyana heliya galadi 'ahwadiyega silatulatu.

<sup>15</sup> Ma he'upwa ta lohe'amasa nuwadi 'i'eweya.

<sup>16</sup> Ma to tupwa 'oina siha'esa 'idi 'abihegala leleyana 'imiyamiya.

<sup>17</sup> Geya 'eta nuwadaumwala bo he'ahwa'iyaiyagu sisanapu.

<sup>18</sup> Ma wete geya Yehoba 'ana matauta 'oidiya 'imiyamiya.”

<sup>19</sup> Ma tasanapu pwaiya 'abehega Mosese 'ina loinao beno meYudiya 'ada loina 'oinega geya sowana 'eta taiya 'igwaegwae hila tutaina Yehoba 'ina bwa'omatana 'ana tuta 'oina, weyahina tomiya bale'u mabwaiyada togala. <sup>20</sup> Yehoba 'ina 'ahwamoisa geya Mosese

'ina lolina 'ana guibiga 'oinega tada lobeya, weyahina lolina 'ina paihowa beno 'ida pui 'ihehepwailedi.

*Ceguma Yesu tahemise Yehoba 'i'ahwa bwebwe'aneqita*

<sup>21</sup> Coinega bewa tuta Yehoba 'ada 'ahwabwebwe'ana 'i'abihelatuya, 'abehega geya lolina 'oinega, ma hali 'eda'eda 'oinega hesiyage. Ma 'eda'edainaina Mosese 'ina lolina ta palopitao sihepwaila pwaiya, <sup>22</sup> 'abehega Yehoba mabwaiyada 'i'ahwa dumwaluwegita Yesu Keliso 'ana hemisa 'oinega, ma geya sowana 'eta taiya wete wataha 'i'abi'abihelatu tauda meYudiya ma tomiya ganamuli gamwagamwanida. <sup>23</sup> Weyahina mabwaiyada togala, ma tamiya bwagabwaga Yehoba 'ina 'asilala 'oinega. <sup>24</sup> Ma hesi Yehoba 'ina 'atemuyamuya ma 'ihelauwa 'oida, ta Yesu Keliso 'ina paihowega 'ilihasigita 'ida pui 'oidiyega, ma 'oinega Yehoba 'i'ahwa dumwaluwegita.

<sup>25</sup> Moisa tuwa, Yehoba natuna 'itagwaleya ma 'abehega 'ina 'amasega 'itoehilegita Yehoba 'oina, ma mahetedai tahe'iyayagu, beno 'eguma Yesu tahemisae. Bewa 'oinega Yehoba mumugana bwebwe'ana 'ihe'itegita, weyahina mwalo heneyage mumugada galana geya 'ida hemaisediya, ma tuwa 'i'alama'i'itana 'ana siga Yesu Keliso 'ihe-wasaeyama, 'isuluma 'oida.

<sup>26</sup> Eeta tuta bewa 'ina mumuga bwebwe'ana 'ihe'itegita 'abehega tauna todumwalu, weyahina Yesu 'ana tohemisao tauda 'i'ahwa bwebwe'aneqita. <sup>27</sup> Ma togidega, sowa-sawahida bewa ginaulina weyahina tagwae hanehane? Geya! Weyahina 'ida hemisa tuwa 'oinega 'i'ahwa'ahwa dumwaluwegita, ma geya lolina 'ana hematamatana 'oinega. <sup>28</sup> Eeta nuwatuhu bewama 'ana lohegogona 'abehega tauda tomota 'ida hemiseqa Yehoba nata 'i'ahwa bwebwe'aneqita, ma geya lolina 'ana hematamatana 'oinega.

<sup>29-30</sup> Bo hedeyage Yehoba tauda meYudiyamo 'ida Yehoba, ma hali 'asa geya? Geya taboi damo! Casa mabwaiyadi mahetedao 'ida Yehoba 'aigeda tuwa. Yehoba nata tauda meYudiya ma tomiya ganamuli wete 'i'ahwa dumwaluwegita 'ida hemiseqa.

<sup>31</sup> Coinega togidega bewama 'ana sanapu, loinaina 'abehega tabuiyahule ta hemisa tada 'abiyahi, 'awa? Sahena! Ma hesi sawasawahina lolina tahe'asisiye ma 'oida 'ihemadou.

4

*Ebalahamo 'ida 'ebe'ita*

<sup>1</sup> Coinega to'aha nata tagwaene Ebalahamo weyahina, 'iboi tuwa tubudaina mabwaiyada 'oinega tamasalehama? <sup>2</sup> Ebalahamo ginaula bwebwe'adi 'ipaihowediya ta debanega sowasawahina 'igwae hanehane, ma geya 'ida gwae haneya Yehoba matana, ma 'ina hemisamo weyahina Yehoba 'i'ahwa bwebwe'aneqita ma geya 'ina paihowa bwebwe'adi weyahina. <sup>3</sup> Ma Yehoba 'ina Buki gide 'igwaeya, 'igwae, "Ebalahamo Yehoba 'ihemisaeya, bewa weyahina Yehoba 'ahwa bwebwe'ana Ebalahamo 'i'ebwaeya."

<sup>4</sup> Gide tuwa 'eguma loheya 'ipaihowa ma 'ana maisa 'iloba, beno geya helau, ma hesi 'ina paihowaina huwaina. <sup>5</sup> Ma 'eguma taiya 'ina pui 'adi nuwasam weyahina geya 'ida paihowa, ma 'ihemisamo tuwa Yehoba 'oina, tauna tohemisaina 'ana hemiseqa nata 'ahwa bwebwe'ana Yehoba 'oinega 'iloba.

<sup>6</sup> Ma Debida wete gide 'igwaeya mwalo, 'abehega taiyewedi Yehoba 'i'ahwa bwebwe'aneqita beno geya 'idi paihowa 'oinega, ma hesiyage 'idi hemiseqa 'i'ahwa bwebwe'aneqita. Ta wete 'idi yaliyaya weyahidi 'ihepwaiyaya, <sup>7</sup> 'igwaeya, "Toyaliyaya moisa taudi 'eguma 'idi puiyao Yehoba 'inuwasamudi ma 'ideulidi. <sup>8</sup> Ma nata geya wete 'i'ahwa'ahwa galagalaedi."

<sup>9</sup> Ta yaliyayaina weyahina Debida 'igwae nugeteya, togidega tauda meYudiya 'wapida si'upweya taudamo weyahida. Geya taudamo. Taudi geya meYudiya mahetedao ta'ewa. Yehoba 'ina Buki 'ihepwaila pwaiya beno, "Ebalahamo 'ina hemiseqa 'ahwa bwebwe'ana 'ilobeya."

<sup>10-11</sup> Ma Yehoba Ebalahamo 'i'ahwa dumwaluweya tutaina 'abwa Ebalahamoina geya 'wapina si'upwa. Bewa sanina 'ila'ilala tuwa, ma 'ihe'itegita 'abehega Ebalahamo 'ina hemisega 'ahwadumwalu 'i'ewa nugeteya Yehoba 'oinega, muliyetega 'ila'ilalaina si'upweya 'wapina. Eeta taiyawedi geya 'ila'ilalaina wahidiya ma tuwa sihemisa, beno 'idi hemisaina weyahina nata Yehoba 'i'ahwa dumwaluwedi, ma 'oinega taudi Ebalahamo natunao moisa.

<sup>12</sup> Ma tauda wete Ebalahamo tamadai 'eguma 'ila'ilalaina ta'eweya 'wapida, ta geya 'abehega 'ila'ilala tuwa weyahina. Ma 'ida hemisa gide tuwa mwalo Ebalahamo 'ina hemisa, tutaina geya 'ila'ilala si'upwa wahina.

*Ebalahamo 'ina hemisega gwae hemisa bwebwe'ana 'ilobeya*

<sup>13</sup> Ma Yehoba Ebalahamo 'igwae hemisaeya 'abehega tauna ma'ina susuwao bale'u mabwaiyana 'abwa siloinae. Ta 'ina gwae hemisa bewa geya 'abehega Ebalahamo 'ina guibiga lolina weyahina, ma hesi 'ina hemisa weyahina, 'oinega Yehoba 'i'ahwa bwebwe'aneya.

<sup>14</sup> Moisa tuwa Yehoba 'ina helau 'oida geya 'abehega lolina 'ana guibiga 'oinega, ma hesi 'ina gwaehemisa 'oida 'ana hemisa weyahina. Ceguma tagwae 'abehega Yehoba 'ihelauwegita lolina 'ana guibiga weyahina, beno 'ana 'ita gide hemisa ta'ita sinaliya, ma wete Yehoba 'ina gwaehemisa 'oida taheginaula besobesoweya.

<sup>15</sup> Ma lolina 'oinega Yehoba 'ina gamwasowala 'oida 'ilatuwa, weyahina lolinaina taligehiya. Ma hesiyage 'eguma Mosese 'ina lolinaedi geya 'ilagudi, geya sowana taligehidi.

<sup>16</sup> Bewa 'oinega tasanapu 'abehega hemisa tuwa 'oinega gwae hemisaina 'ana bwebwe'ana 'abwa taloba. Ma bewa Yehobaina 'ina helau tuwa ma geya 'abehega 'ida paihowa 'ana maisa. Ta gwaehemisaina Ebalahamo tubunao mabwaiyada talobeya, geya 'abehega lolina 'ana toguibigao siboidimo, ma weteyage taiyawedi 'idi hemisa gide Ebalahamo 'ina hemisa ee taloba. Ebalahamoina tauna gide mabwaiyada tamadai.

<sup>17</sup> Gidemusa Yehoba 'ina Buki 'oina 'igwaeya,  
 “Cowa yahesani pwaigowa 'abehega 'asa mabwaiyadi tamadiu.”  
 Ta Ebalahamo 'ina hemisa 'ilaguya Yehoba 'ina gwae hemisaina 'oina, tauna Yehobaina sowasowahina to'amasana 'i'abihe toholohiladi, ma weteyage to'aha geya sida 'elomasaleha sowasowahina 'igwae ma si'elomasaleha. <sup>18</sup> Ma Ebalahamo 'inuwatuhu yahiya madouna gwae hemisaina 'abehega tauna 'asa mabwaiyadi tamadiu, ma 'abehega tuta 'inaonaoma 'abwa 'ilatu gide, ma bwagana tuta gala hedadena 'ilobeya tuwa 'i'alama'i'itana, weyahina bewa gide Yehoba 'ihewgae 'eseya,  
 “Cabwa muliyetega tubumwao baibaiwadi silatu.”

<sup>19</sup> Ebalahamo 'i'iunamo ma 'ana bolime handeledi 'iloba, ta wahina mabwaiyana si'elowe'a, ta 'ihetautubada seheya, ma mwanenaina Sela wetenuge wahine 'aga'agalina, ma Ebalahamo bewa geya weyahidi 'ida nuwatuhuwa, ma 'ina hemisa beno 'ina 'ebetuhila madouna. <sup>20</sup> Cina hemisaina geya 'iguipaille, ma hesiyage Yehoba 'ina gwae hemisa 'i'abiyahi momosiya, ta 'ina hemisaina 'ihewaiwaiya ma 'ihewpawu Yehoba 'oina. <sup>21</sup> Weyahina 'isanapuya moisa Yehoba sowasowahina 'ina gwae hemisaedi 'ipaihowadi. <sup>22</sup> Bewa 'oinega Ebalahamo 'ina hemisa weyahina Yehoba 'i'ahwa dumwaluweya.

<sup>23</sup> Ma 'ahwa dumwaluina Yehoba 'ina Bukiya geya 'abehega Ebalahamo 'iboimo weyahina, <sup>24</sup> ma tauda weteyage weyahida sileleya, 'ida hemisa Yehoba 'oina talaguya, tauna Bada Yesu Keliso 'amasega 'i'abihetoholo hileya.

<sup>25</sup> Tauda tuwa 'ida pui weyahina Yesu 'i'amasana, ma Yehoba 'i'abihetoholo hileya, ta beno 'oinega 'ideuligita ma 'i'ahwa dumwaluwegita.



<sup>1</sup> Coinega bewa tuta 'ida hemisega Yehoba 'i'ahwa bwebwe'anegita ta Yehobaina mahetedai ta'ahwa 'iya'iyagu, beno 'ida Bada Yesu Keliso 'oinega. <sup>2</sup> Weyahina Yesu 'i'abihetegita ta Yehoba 'ina helau 'ilatuwa 'oida, ma 'oina tamiya bwebwe'ana. Coinega tanuwatuhuyahi ma'ida yaliyaya Yehoba 'ina wasawasa weyahina, tuta 'inaonaoma 'i'ebwaegita.

<sup>3</sup> Ma wete tayaliyaya tuta mwau 'oidiya, ma 'eguma ta'alama'i'itana bewa mwauwedi 'oidiyega, <sup>4</sup> nata 'oidiyega yaluyaluwada sihewaiwai. Nage 'oinega tanuwatuhuyahi 'abehega 'abwa Yehoba 'ihelauwegita. <sup>5</sup> Nuwatuhuyahina bewa geya 'ida 'abihenuwa galegita, weyahina Yehoba Yaluyaluwana 'itagwaleya 'oida. Yaluyaluwanaina 'ina helau madou hedadena 'oinega 'ateda 'ilohemahediya. <sup>6</sup> Weyahina Keliso 'ina tuta 'ilobeya ma 'i'amasa, ma tauda 'abwaulena tawe'awe'a dadana, ee 'oinega Keliso 'i'amasa 'ida pui weyahidi.

<sup>7</sup> Tauda tomota geya tuta mabwaiyana tatagwalegita ma ta'amasa 'iyadao todumwalu weyahidi, ma tupwadi 'abwa sihewaiwai ma 'ane si'amasa tobwebwe'adi weyahidi. <sup>8</sup> Ma Yehoba 'ina helau 'ihe'itegita tutaina tauda togala, beno Keliso 'i'amasa weyahida, <sup>9</sup> ta bweyahinega 'ideuligita, ma 'i'ahwa dumwaluwegita, ta sowasowahina 'i'etolemegita Yehoba 'ina gamwasowala 'oinega.

<sup>10</sup> Ta moisa mwalo Yehoba talo'aleheya, ma bewa tuta Natuna 'ina 'amasa 'oinega mahetedai ta'ahwa 'iya'iyagu, ma 'abwa Natunaina yawasinega 'i'etolemegita moisa. <sup>11</sup> Ma ginaula 'aigeda bwebwe'ana wetenuge beno Yehoba mahetedai tayaliyaliyaya, weyahina 'ida Bada Yesu Keliso tauna 'itoegitama ta Yehoba mahetedai tahe'iya'iyagu hila.

*Keliso ma Adama 'idi paihowa geya sihemahemahetena*

<sup>12</sup> Mwalo heneyage pui bale'uwa 'ilatuma loheya 'aigeda 'oinega, ta mumuga galana 'amasa 'itoeyama ee 'oinega 'amasa 'iyada tomota mabwaiyada 'oida, weyahina tomota mabwaiyada togala. <sup>13</sup> Ma mwalo Mosese 'ina loinao geya bale'uwa simiyamiya, ma pui 'imiyamiya, ma hesi Yehoba geya tomota 'i'ahwa galagalaedi, weyahina geya 'eta wete loina 'oidiya. <sup>14</sup> Ta moisa Adama 'ina tutega ma Mosese 'ina tuta 'oina 'amasa 'ihewaiwai hedada tomota mabwaiyadi 'oidiya. Adama 'ipuiya beno Yehoba 'ina loina 'iligehiya, ma hesi tupwadi 'idi pui hagadi, geya gide Adama, ma tuwa si'elo'amasa. Ta Adamaina tauna tuwa 'ebe'ita loheyaina mulinega 'itautauyama weyahina, loheyainaina sanina Yesu Keliso.

<sup>15</sup> Weyahina mwalo Adama 'ina puiyao 'oinega 'amasa 'i'abi latuheya tomota mabwaiyadi 'oidiya, ma muliyetega Yehoba 'ina 'atemuyamuya 'oinega 'ina helau 'i'abi latuheya tomota mabwaiyadi 'oidiya, beno loheya heluwena 'oinega, tauna Yesu Keliso. Ma ginaula 'eluwaedi geya sihemahemahetena, weyahina galana 'amasa 'i'abi latuheya tomota mabwaiyadi 'oidiya, ma hesi helau 'ihewaiwai sineya.

<sup>16</sup> Weyahina loheya 'aigeda tuwa 'ina pui 'oinega tomota mabwaiyadi sihetogala ma Yehoba 'i'ahwa galagalaediya, ma hesi 'ina helau bwebwe'ana hedada 'oinega tomota mabwaiyadi 'idi pui 'inuwasamudiya ma 'i'ahwa bwebwe'aneidiya.

<sup>17</sup> Ta loheya 'aigeda tuwamo 'ina pui 'oinega 'amasa 'ilatuma, ta tomota mabwaiyadi 'i'abi hegalediya. Ma loheya heluwena hesi 'ina paihowa waiwai hedadena, tauna Yesu Keliso, Yehoba 'ina helau 'i'ebwaya daisidiya tomota mabwaiyadi weyahidi, eema 'ane taiyewedi sitagwala si'ewa helauina ma 'i'ahwa bwebwe'aneidi, ma yawasidi bwebwe'ana 'i'ebwaedi.

<sup>18</sup> Ma tasanasanapu 'abehega loheya 'aigeda 'ina puiyega tomota mabwaiyada 'ahwagala talobeya. Ta gide weteyage, loheya 'aigeda tuwa 'ina paihowa dumwalunega sowa-sowana 'i'etolihasingita, ta Yehoba 'i'ahwa bwebwe'anegita ma yawasida 'i'ebwaegita.

<sup>19</sup> Ma wete 'aigeda loheya loinaligeha 'oinega galanaina 'ilatuma ta tomota mabwaiyadi sigala, ma wete 'aigeda loheya bwebwe'ana 'ina tagwalega tomota mabwaiyadi 'ideulidiya, ma Yehoba 'i'ahwa dumwaluwediya. <sup>20</sup> Ta tutaina Mosese 'ina loina 'ilatuma pui tuwa 'ihehewaiwai, ma 'iyamo Yehoba 'ina helau 'ihewaiwai hedadeya.

<sup>21</sup> Coinega tasanapuya 'abehega pui huwaina beno 'amasa, 'ihewaiwaiya tomota 'oidiya, ma Yehoba 'ina helau huwaina 'ihewaiwai hedadeya, beno 'etolihasa ma yawasi miyamiya hatayana 'ida Bada Yesu Keliso 'ina paihowa bwebwe'ana 'oinega.

## 6

### *Tauda ma Keliso tahemahemahetena*

<sup>1</sup> Bo to'aha hede nata tagwaene? Cabehega 'ilobwainegita 'ida mumuga galadiyedi 'oidiya tuwa tamiya hataya, ma 'ane Yehoba 'ina lemaina 'oida 'ihemadou? <sup>2</sup> Caa nata geya! Weyahina mumuga galana 'oidega 'igumwala pwaiya, ta geya nata wete 'oida 'imiyamiya.

<sup>3</sup> Wanuwatuhuyahi mwalo tutaina tababitaishowa Yesu Keliso saninega, beno Yesu 'ina 'amasa 'oina tauna mahetedai tahemahemahetena pwaiya, <sup>4</sup> weyahina 'ina babitaishoina 'oina gide tauda ma Yesu Keliso ba'idadai ta'amasa, ma sigalihegita, ma wete tatoholohila ba'idadai. Kelisoina Tamana 'ina waiwaiyega 'itoholo hilama, ma tauda wete gidemusa 'igihetoholo hilegita, 'oinega yawasida 'ehauna talobeya. <sup>5</sup> Weyahina 'eguma 'ina 'amasaina tauda gidemusa ta'amasa, eema 'ane tatoholo hila gidemusa tauna 'amasega 'itoholo hila.

<sup>6</sup> Ta wanuwatuhuyahi beno mumugada miyamiyaidi 'ana kelose 'oina 'ilohe'amasa pwaiya, ma 'ane tauda 'ida lona 'igumwala, ma 'oinega geya'abwa wete mumuga galana 'ina lona 'alona tamiyamiya, <sup>7</sup> weyahina tutaina 'oina ta'amasa, geya sowana wete puiina 'ina lona 'oida 'imiyamiya. <sup>8</sup> Ma 'eguma tasanapuya 'abehega ta'amasa pwaiya Keliso mahetedai, ee tahemisae ma 'ane mayawasida mahetedai tamiya hataya.

<sup>9</sup> Weyahina tasanapuya Keliso 'amasega 'itoholo pwaiya, ma geya sowana wete 'i'ama'amasa hila, weyahina tauna 'amasa 'ihewaiwai sineya. <sup>10</sup> Kelisoina ma'aigeda 'i'amasa 'ida pui weyahina, ta bewa tuta mayawasina Yehoba 'oina 'imiyamiya.

<sup>11</sup> Eeta 'omi wete gide wasanapu 'abehega Yesu Keliso mahetedai ta'amasa pwaiya, 'oinega mumuga galana 'oidega 'ilolaguwa, ma mayawasida Yesu Keliso mahetedai Yehoba 'oina tamiyamiya.

<sup>12</sup> Coinega bewa tuta pui geya sowana yahumi 'iloiloinaedi, ma geya'abwa 'imi nuwatuhi dahwana wamulimuliyedi. <sup>13</sup> Geya sowana 'eta wete to'wehimi, nimami nuwana matami, watagwatagwaledi paihowa galadi weyahidi, ma hesiyage watagwalegomi Yehoba 'oina, weyahina 'i'abihetoholo hilegomiya, ta bewa tuta mayawasimi, ee 'oinega wahimi mabwaiyana watagwale Yehoba 'ina paihowa dumwaluna 'oina. <sup>14</sup> Coinega bewa tutaina pui nata geya wete 'iloiloinaegomi, weyahina Yehoba 'ina 'atemuyamuya 'alona wamiyamiya, ma geya Mosese 'ina lona 'alona.

### *Mumuga bwebwe'ana 'ana topaihowao*

<sup>15</sup> Coinega togidega tamumuga 'esa? Mwalo loinaina taligehiya ma muliyetega Yehoba 'ida puiyedi 'inuwasamudiya, togidega, sowaswahina pui tuwa tapaipaihowa? Caa nata geya! <sup>16</sup> Ma hesiyage wanuwatuhuyahi 'eguma taiya 'eta 'ina lona 'oina watagwalegomi, tauna tuwa 'enana wahematamatane. Ceguma pui wahematamatane nata 'amasa waloba, ma 'eguma Yehoba 'ana hemisa wahematamatane, beno mumuga bwebwe'ana waloba.

<sup>17-18</sup> Ma 'amo'isamo tuwa, 'omi mwalo mumuga galana 'ana topaihowao, ma tetela bwebwe'ana wahesagoheya, ta 'atemi watagwalediya 'oina, ta 'imi puiyedi 'i'ewa yahulediya. Ma Yesu 'ilihasigomiya ma 'abehega mumuga bwebwe'ana weyahina wahetopaihowa. Coinega 'ilobwainegita taloyauwedo madouna Yehoba 'oina, yaliyaya bewa weyahina.

<sup>19</sup> Bewa, bale'u nuwatuhiidi 'oidiyega yahe'itegomiya, weyahina nuwami 'abwa potapotadi. Ta mwalo to'wehimi watagwalediya ma 'abehega simumuga galagala, ma weteyage 'abehega 'imi paihowa galadi sihemadou bwaibwaina. Coinega tuta bewa sowasowana to'wehimi watagwaledi ma sipaihowa dumwalu, ma 'imi paihowa wete 'ibwebwe'ana bwaibwaina.

<sup>20</sup> Weyahina mwalo 'omi galana 'ana topaihowao, ma geya mumuga dumwaluna wada paihoweya, <sup>21</sup> ee 'oinega bewa tutaina 'imi puiyedi weyahidi wadeba mwadina. Weyahina geya 'eta to'aha bwebwe'ana 'oidiyega wada lobeya, ma hesiyage 'ana maisa 'amasamo.

<sup>22</sup> Eeta bewa tutaina pui 'ina loina 'oimiyega 'igumwala, ta 'omi bewa tutaina Yehoba 'ina topaihowao. Coinega maisa bwebwe'ana walobeya, beno mumuga bwebwe'ana ma muliyetega yawasimi miyamiya hatayana. <sup>23</sup> Weyahina pui 'ana maisa 'amasa, ma hesi Yehoba 'ina helau beno yawasida miyamiya hatayana, 'ida Bada Yesu Keliso 'oinega.

## 7

### *Hai 'oinega 'igwae hegehegediya*

<sup>1</sup> Ciyagwao, Mosese 'ina loina wasanapuya loheya yawasina 'ina tautauya weyahina. Tutaina loheyaina 'i' amasa loinaina geya 'abwa wete 'oina 'imiyamiya.

<sup>2</sup> Cebe'ita bewa 'aigeda ta'ita hai weyahina. Mosese 'ina loina 'igwaeya gide, 'abehega 'eguma wahine 'ihai mamwanena simiyamiya ee 'ana siga 'amasa, ma 'eguma mwanenaina 'i' amasa nata geya 'eta wete loina 'oinega 'ilobaloba. <sup>3</sup> Ma 'eguma wahineina mwanena 'imiyamiya ma 'ihaibala hali loheya 'oina, beno pui 'ipaihoweya. Ma 'eguma mwanenaina 'i' amasa ma hali loheya 'oina 'ihaibala, beno geya pui, weyahina mwanena nugenugetanaina 'ina loina 'oinega 'igumwala.

<sup>4</sup> Ciyagwao, he'ita bewa 'ilobwainegomiya, weyahina Keliso 'ilihasingomiya Mosese 'ina loina 'oinega. Weyahina Kelisoina wahina mahetemiwa wa' amasa, ta mahetemiwa wete watoholo hila 'amasega. Ma tauna totohologo hilmaina beno 'ida Bada 'ehauna, ma 'ane mahetedai Yehoba 'ina paihowa 'oina taguibiga bwaibwaina.

<sup>5</sup> Weyahina mwalo tauda mumugada gide gogo gabulena mumugana, bwagana Mosese 'ina loina tasanapuya, ma nuwatuhi galadiyedi 'oida sihewaiwaiya ma yahuda mabwaiyadi simumuga galagala, ta 'ana maisa 'amasa 'abwa nata taloba. <sup>6</sup> Ma bewa tuta loinaina 'oida 'igumwala, weyahina mwalo loinaina 'oinega gide 'ipaigita ma ta' amasa Keliso mahetedai, 'oinega Kelisoina 'ada paina 'oidega 'ilihasiya, ma bewa tutaina sowasowahida tapaihowa bwaibwaina. Weyahina Yehoba Yaluyaluwana 'ina waiwai 'oida 'imiyamiya, ma hesi Mosese 'ina loina leleleinaina geya 'ina waiwaimo, geya sowasowahina 'i'abi hedumwalugita.

### *Cida pui weyahidi*

<sup>7</sup> To'aha nata tagwaene Mosese 'ina loinaina weyahina? Cabehega 'ina loinaedi galadi bo geya? Geya galadi. Ma hesi 'eguma geya loinaedi sida latulatu, geya sowana wete pui 'ilatulatu. Ta nuwana 'eguma geya 'eta loina 'igwae gide, "Sahena matalolo", beno geya sowasowahina wete tasanapu to'aha matalolo. <sup>8</sup> Ta loinaina 'oinega 'igu pui 'i'abi hemadouya, ee 'abwa hesi yamatalolo ginaula baibaiwadi weyahidi. Ta 'eguma loina geya, 'igu pui wete geya.

<sup>9</sup> Taugu wete gide, mwalo mayawasigu yamiyamiya, geya 'eta wete loina 'oiguwa, ma tuta loina 'oiguwa 'ilatuwa, ee pui 'oiguwa 'ihewaiwaiya, <sup>10</sup> eeta loinaina 'ilohe' amasigauwa. Loinaina bwebwe'ana ma wete yawasi lamuna, ma hesi yaboi tuwa loinaina geya yaguibiga bwaibwaini. <sup>11</sup> Weyahina pui 'i' abowegauwa, eeta loinega 'ilohe' amasigauwa.

<sup>12</sup> Loinaina tasanapuya 'abehega 'ausalana, ma 'ana lohatotowedi mabwaiyadi wete 'ausaladi, ma dumwaludi, ta mabwaiyadi bwebwe'adi, geya 'eta galana. <sup>13</sup> Ma togidega hede ta loinaina 'ausalanaina 'ilohe' amasigauwa? Ma hesi geya! Geya sowasowahina ginaula bwebwe'ana 'ilohe' amasi daidaisigita, ma hesi to'aha galana 'ateguwa loina 'ausalana 'ihe' abeyeya, ma 'oinega 'ilohe' amasigauwa. Coinega tasanapuya 'abehega mumuga galadi 'ateda simiyamiya, ma loina 'oinega tasanapanu 'abehega gala hedadena.

### *Yaluyaluwada ma wahida 'idi paihowa*

<sup>14</sup> Tasanapuya 'abehega Mosese 'ina loinaina Yehoba 'oinega 'i' eweya, ma taugu mumuga bale'u 'iloinegauwa eeta yagala. <sup>15</sup> Ma hesi geya yada sanapuya to'aha

weyahina ginaula galadi yapaipaihowadi, weyahina to'aha gide 'abehega yaguipailedi beno yapaipaihowadi, ma weteyage ginaulaedi nuwanuwagu yapaihowadi ma geya yada paihowediya.

<sup>16</sup> Ta moisa, Mosese 'ina loinaedi ya'ahwa moisaediya, weyahina galanaina yapaihoweya geya bwebwe'ana 'oiguwa, <sup>17</sup> ta geya taugu tuwa 'igu paihowa, ma hesiyage lotohona galana 'ateguwa 'ina paihowa.

<sup>18</sup> Yasanapuya 'abehega geya 'eta mumuga 'ausalana wahiguwa, weyahina mumuga bwebwe'ana nuwanuwagu, ma hesi geya sowasowahigu yapaihowa. <sup>19</sup> Nuwanuwagu madouna ma mumugagu 'ibwebwe'ana, ma 'iyamo geya gide yada 'esa, weyahina galanaina yalolowahi'wate ma tuwa yapaipaihowa.

<sup>20</sup> Bewa 'oinega tasanapuya 'abehega puiina yapaihoweya geya yaboi tuwa 'oiguwega, ta hesi lotohona galanaina 'ateguwa 'ina paihowa. <sup>21</sup> Ginaula bewa 'oidiyega sihe'ita bwaibwainigauwa 'abehega 'eguma to'aha bwebwe'ana nuwanuwagu ma yapaihowa, nata galanaina mane gide tuwa ma yapaihowa.

<sup>22</sup> Ta yasanapuya 'abehega yaluyaluwagu nuwanuwana ma Yehoba 'ina nuwatuhu yapaihowa, <sup>23</sup> ma hesi hali loinao taudi wahiguwedi 'oidiya siloinaegauwa. Tuta mabwaiyana lotohona galana 'ateguwa 'ihewawaihedade ma 'igu nuwatuhu bwebwe'ana 'i'abi'abihewe'a, ma wahigu 'ina paihowa galana 'oinega pai ma 'amasa yalobediya.

<sup>24</sup> Ta moisa, nuwalagalalaigu! Weyahina geya 'eta taiya sowasowahina ma wahigu 'ina paihowa galana 'oinega 'i'abihetega. <sup>25</sup> Ma hesiyage yaloyauwedo Yehoba 'oina, weyahina 'ida Bada Yesu Keliso 'ilemegauwa. Ta bwagana 'ateguwa yatagwala moisa Yehoba 'ina loina 'oina, ma 'iyamo wahigu nuwanuwana loina galana.

## 8

### *Yehoba Yaluyaluwana yawasida lamuna*

<sup>1</sup> Coinega 'eguma Yesu Keliso mahetedai, nata geya 'eta taiya 'ina gwae mwauna 'oida 'ilagulagu.

<sup>2</sup> Yesu Keliso mahetedai, 'oinega Yehoba Yaluyaluwanaina 'ilihasigita pui ma 'amasa 'idi loina 'oidiyega, ma yawasida 'ehauna talobeya. <sup>3</sup> Ta lihasaina Mosese 'ina loina geya sowasowahina, weyahina tauda tomota mumugada we'awe'ana, ma hesi Yehoba lihasaina 'ipaihoweya, beno Natuna moisa 'itagwaleya, 'idobima bale'uwa tauda togala wahida 'isoheya, ta 'ida pui weyahina 'ipwaoliyeya 'iboi, ta 'ida puiyedi 'ihewawai sinediya. <sup>4</sup> Ma bewa tutaina sowasowahida loina bwebwe'ana tamuliye, beno Yehoba Yaluyaluwana 'ina 'abihetenege, ma geya tomota mumugadiyega.

<sup>5-6</sup> Weyahina 'eguma taiyewedi mumuga bale'u simulimuliye, beno siboi weyahidi sinuwanuwatuhu, nata mumugainaina 'oinega 'amasa siloba, eeta taiyewedi Yehoba Yaluyaluwana sihematamatane, taudi Yehoba 'ina nuwatuhuina sipaipaihowa, ma 'ane yawasi bwebwe'ana ta miya daumwala siloba.

<sup>7</sup> Ta 'eguma bale'u mumugana tahematamatane beno Yehoba talolo'aleha, eema geya wete sowasowahida ma Yehoba 'ina loina tamuliye, <sup>8</sup> ma geya sowasowahina Yehoba ta'abihe yaliyaya.

<sup>9</sup> Ma 'omi Yehoba Yaluyaluwana 'iloiloinegomi, ta 'oimiya wete 'imiyamiya, eeta waboi 'imi nuwatuhu geya 'ida loinegomiya. Weyahina 'eguma taiya Keliso Yaluyaluwana geya 'oina, tauna geya Keliso 'ina boda.

<sup>10</sup> Ta moisa wahidaedi 'ama'amasidi mumuga galana 'ina loinega, ma 'eguma Keliso 'oida beno yaluyaluwada geya sowana si'amasa, ma hesi mayawasidi simiya bwebwe'ana, weyahina 'i'abi hedumwalu pwaigita.

<sup>11</sup> Ma Yehoba Yaluyaluwanega Yesu 'amasega 'i'abi hetoholo hileya, ma 'eguma 'oimiya 'imiyamiya, nata 'omi Yehoba Yaluyaluwanaina 'oinega yawasi 'ehauna 'i'ebwaya wahimi 'ama'amasidi 'oidiya.

<sup>12-13</sup> Coinega 'iyagwao, geya 'ilobwainegita ma mumuga tomotai tamuliye, nata gide ta'amasa. Ma hesiyage 'eguma mumuga bale'uwa talogwahate ma Yehoba Yaluyaluwana

tamuliye, beno nata Yaluyaluwanaina 'oinega wahida mumugana talohe'amasi, ma yawasida bwebwe'ana taloba. <sup>14</sup> Ma 'eguma Yehoba Yaluyaluwana tamuliye, beno nata 'i'ahwa natunegita. <sup>15</sup> Eeta Yehoba sahena tamatamataute weyahina 'i'ahwa natunegita, ta tauda geya gide 'ina topaihowao, ma hesi gide natunao ma ma'ida 'atepatu tagwaegwae 'oina, "Tamagu!" <sup>16</sup> Ma weteyage Yaluyaluwanaina 'oinega sanapu 'i'ebwaya yaluyaluwada 'oida, ma 'abehega tasanapu tauda Yehoba natunao.

<sup>17</sup> Eema helauwedi 'i'atububuya natunaina Yesu Keliso weyahina, nata Yesu mahetedai helauwedi talobadi Yehoba 'oinega. Weyahina 'eguma Keliso mahetedai muya ta'ahali, nata wete mahetedai wasawasa taloba. <sup>18</sup> Ma muyaedi bewa tuta talobalobadi yasana-puya geya ginaula madouna, weyahina 'abwa muliyetega miya bwebwe'ana hedada taloba, <sup>19</sup> weyahina ginaula mabwaiyana Yehoba 'ipaihowediya siyamwayamwana, ma nuwanuwadi madouna 'abehega tauda natunaowedi 'i'abihe latuhegita ma si'itegita.

<sup>20</sup> Ma Yehoba 'ina paihowao geya galadi, ma hesiyage 'igwaeya ta bewa tuta sihegin-aula besobesowa, ma hesi ma'idi hemisa wete, <sup>21</sup> weyahina 'abwa weteyage Yehoba 'i'abi'ehau hiladi, ma geya sowasawahina simwahulu, ma hesiyage 'idi miya bwebwe'ana 'i'ebwaedi, gide tauda natunaowedi.

<sup>22</sup> Ta moisa, Yehoba 'ina paihowaedi siwelawelaha tuta mabwaiyana muya 'oidiyega, gide wahine 'ana muya henatuna 'oina. <sup>23</sup> Ma tauda Yehoba Yaluyaluwana lotohona bwebwe'ana 'i'iuna 'i'ebwaegita ee 'abwa muliyetega miya bwebwe'anaina taloba moisa. Coinega bewa tuta ma'ada muya tawelawelaha, ma tayamwayamwa tolahisa 'abwa wahida 'i'abi'ehau hila, ma 'i'ahwa natunegita moisa.

<sup>24</sup> Ma 'abihetenaina hemisega talobaloba, weyahina bewa tuta wahida 'idi 'ehau geya tada lobeya, eeta ma'ida hemisa tayamwayamwa 'ana siga 'ida hemisaina huwaina taloba, ma 'ane 'ida hemisaina 'ilolagu. <sup>25</sup> Ma 'eguma 'ida hemisaina 'e'enina geya tada lobeya, tuwa 'alama'i'itanega tayamwayamwana ee 'ana siga taloba.

<sup>26</sup> Ta Yehoba Yaluyaluwana 'ida we'a 'oidiyega, tauna 'i'abi 'abihetegita, weyahina 'ida 'ahwanoi 'oidiya geya tasanapu togidega ta'ahwanoi 'esa, ma Yehoba Yaluyaluwana hesiyage weyahida 'ihetahetapewa ta ma'enana ma'ina welaha 'i'ahwa'ahwanoi waiwai Yehoba 'oina.

<sup>27</sup> Yehoba tauna 'ida nuwatuhu 'isanapudiya, ma weteyage 'iboi Yaluyaluwana 'ina nuwatuhu 'isanasanapudi, weyahina Yaluyaluwanaina Yehoba 'ina tomotai weyahida 'i'ahwa'ahwanoi, weyahina Yehoba Yaluyaluwanaina mahetena 'idi nuwatuhu 'aigeda.

<sup>28</sup> Eeta tasanapuya 'eguma Yehoba tahelauwe nata ginaula mabwaiyadi 'i'abihe dumwaludi weyahida, beno tauna 'ina nuwatuhu gide ta 'ibwauwegita. <sup>29</sup> Eeta taiyawedi tauda 'ibwauwe pwaigita, beno 'igwae hemisegita ta tauda natunao, gide tuwa natunaina, eeta tauna 'ada tautuwa ma tauda 'ana 'alomauwao. <sup>30</sup> Ta Yehobaina 'ihesinuwegita, ta 'ibwauwegita, ta 'i'ahwa bwebwe'anegita, ma weteyage 'ida 'ebemiya wasawasa 'i'ebwaegita.

### *Yehoba 'ina helau*

<sup>31</sup> Ma moisa Yehoba 'ina helau 'imadou hedadeya. Ta 'eguma Yehoba mahetedai, nata 'i'abihetegita, eeta geya sowana 'eta taiya 'ilolo'alehegita. <sup>32</sup> Weyahina Yehoba natuna moisa geya 'ida nuwahiya, ma hesiyage 'itagwaleya weyahida, 'abwa ginaula mabwaiyadi wete 'i'ebwaegita.

<sup>33</sup> Coinega nata geya wete taiya 'ihehe'ewegita, weyahina tauda Yehoba 'ihesinuwegita ta 'i'ahwa dumwaluwegita. <sup>34</sup> Geya wete nata 'eta taiya 'ina gwae pa'alina 'oida 'ilagulagu, weyahina Yesu Keliso tauna weyahida 'i'amasa pwaiya ta wete 'itoholohila, 'oinega bewa tuta Yehoba 'ina 'ebeulega 'imiyamiya ma weyahida 'i'ahwa'ahwanoi.

<sup>35</sup> Coinega geya 'eta ginaula sowasawahina ma Keliso 'ina helauina 'oidega 'i'ewa yahule, mwauwedi gidemusa muya bo woya bo gomale bo hewewelohe bo hesilae ma wete 'amasa. <sup>36</sup> Mwauwedi weyahina Yehoba 'ina Bukiya 'aigeda gwae gide 'igwaeya, "Sauga mabwaiyana 'ebe 'amasa 'oina 'amiyamiya, gide guyai bawedi sabi lohe'amasi-mai, beno 'ino paihowa weyahina."



<sup>37</sup> Ma hesi ginaula mabwaiyadi bewa 'oidiyega tahewaiwaiya, weyahina Yesu 'ina helau ma 'ina 'abihetena 'oida 'imadou hedada.

<sup>38-39</sup> Moisa yasanapu bwaibwainiya 'abehega geya 'eta ginaula wete sowasowahina ma Yehoba 'ina helau 'i'ewayahule 'oidega, nuwana mayawasida, nuwana ta'amasa, nuwana 'eta anelose bo 'eta Tomodulele 'ina boda 'idi paihowega, bewa tutaina nuwana tuta 'inaonaoma 'oina, bo tolainao galewa nuwana bale'uwa 'idi waiwaiyega. Weyahina Yehoba 'ina helauina, 'ida Bada Yesu Keliso 'oinega, geya 'eta taiya sowasowahina ma 'i'ewayahule 'oidega.

## 9

### *Yehoba 'ina bodao meIsileliyedi*

<sup>1-2</sup> Ciyagwao, geya ya'abo, nuwagu 'igala moisa 'igu susuwao meIsileli weyahidi, ma tuta mabwaiyana 'ategu 'imuyamuya weyahidi, weyahina Keliso geya sida hemisaeya. Cigu gwae bewa Keliso ma Yaluyaluwana Tabuna sisanasanapu 'abehega yagwaegwae moisa. <sup>3</sup> Ma weyahidi yanuwatuhutu madouna 'eguma togidega ma Yehoba 'ina helauina 'i'ebwaegauwa, beno Yesu Keliso, 'oiguwega 'i'ewa ma 'i'ebwaedi 'igu bodaedi, ma taugu 'ana mwau yaloba, taudi weyahidi. <sup>4-5</sup> Ta moisa 'igu bodaedi beno mwalo Yehoba 'ihesuwa pwaidiya ta 'i'ahwa natunediya. Cina wasawasa ma 'ina gwae hemisao eema 'ina loinao bwebwe'adi 'i'ebwaediya. Ma wete tapwalolo ta ginaula 'ausaladi 'igwae hemisaeya babada nugenugeti 'oidiya. Taudi gide Ebalahamo ma Aisake ma Yakobo, eeta muliyetega Ebalahamo 'ina susuina 'oinega Keliso 'ilatuma. Tauna Yehobaina tahepwatuwe tuta mabwaiyana 'oidiya, 'iboi 'ihane hedadeya. Emeni.

<sup>6</sup> Yehoba 'ina gwaeyedi bewa geya 'ehetete, ma hesiyage huwaina 'i'abihelatuya susu Isileli moisa 'oidiya, ta geya wete susu Isileli mabwaiyadi 'oidiya, ma tuwa hesihesinuwadimo. <sup>7</sup> Ta 'ana moisa beno Ebalahamo 'ina susuwao mabwaiyadi Yehoba geya 'ida 'ahwa natunedi, weyahina Yehoba Ebalahamo 'ihewgae pwaiya, 'igwaeya, "Cino susuwao beno natuina Aisake natunao," ma geya wete taiyawedi tasina natunao 'oidiyega. <sup>8</sup> Gwae bewa 'ana sanapu 'ihe'ita pwaigita moisa, beno Yehoba natunao geya Ebalahamo 'ina susu 'oinega, ma hesiyage taiyawedi taudi Yehoba 'igwae hemisaediya. <sup>9</sup> Weyahina mwalo Yehoba Ebalahamo 'oina 'igwae hemisa, 'igwaeya, "Cabwa tuta yahesinuwaneya matada 'oina yahilama ma natuu loheyana ya'ebwaego mwaneu Sela 'oinega."

<sup>10-12</sup> Ta gide wete tubumai Aisake 'iheloheya ma Libeka 'ihaiya, ta natudiyao didiluwaluwa 'i'elagatediya, ta 'abwa 'ina tuta 'ahalaina ma Yehoba Libekaina 'ihewgae, 'igwaeya,

"Ceguma natumwaowedu 'uhenatunedi, 'alomau 'abwa tolugetainaina 'iloinae."

Eeta bewa Yakobo ma Iso 'oidiyega tasanapu bwaibwainiya 'abehega gwagwamaid-iyedi geya 'idi paihowa bwebwe'ana nuwana galana 'oidiyega 'ihesinuwedu, ma hesi 'iboi 'ina gwae hemisa 'oinega. Weyahina Yehoba 'ihesihesinuwa geya tomota 'idi paihowega ma hesi 'iboinamo 'ina nuwatuhwega. <sup>13</sup> Yehoba gide wete 'ihewpaila 'ina Bukiya 'igwaeya,

"Yakobo yahelauweya madouna, geya Iso."

<sup>14</sup> Cabwa to'aha hede nata tagwaene Yehoba 'ina paihowa bewa gidemusa, galana bo geya? Geya galana! <sup>15</sup> Weyahina Mosese 'ina loina 'oina Yehoba 'igwaeya, "Ceguma taiya nuwanuwagu yahelauwe nata yahelauwe, ma 'eguma taiya wete ya'ate-muyamuyae, nata wete ya'abihete."

<sup>16</sup> Ma bewa 'ihe'itegita 'abehega Yehoba 'ina helau geya 'ida latu daitama tauda 'ida nuwatuhwao nuwana paihowao 'oidiyega, ma hesiyage tauna tuwa 'ina 'atemuyemuyega.

<sup>17</sup> Ma bewa wete 'aigeda 'ebe'ita Pelo 'oinega, weyahina mwalo Yehoba 'ina gwae Peloina weyahina, 'igwaeya,

“Cebe lolina ya'ebwae pwaigowa 'abehega 'ulo'alehegau, eema 'ane taugu 'igu waiwai 'u'ita, eema 'ane sanigu 'i'edadana bale'u mabwaiyana 'oina.”

<sup>18</sup> Eeta, 'eguma Yehoba nuwanuwana taiya 'ihelauwe, nata 'ihelauwe tuwa, ma 'eguma nuwanuwana wete taiya 'i'abihedeba pa'ali, nata tuwa 'ideba pa'ala sehe.

*Yehoba 'ina gamwasowala ma 'ina 'atemuyamuya*

<sup>19</sup> Nuwana tupwami nuwatuhu bewa weyahina wunuwanuwatuhu 'abehega 'eguma mabwaiyada mumugadaina Yehoba 'ina hesinuwega, to'aha hede weyahina 'ihe'ewegita? <sup>20</sup> Ciyagwao, tauda geya 'ilobwainegita ma Yehoba 'oina tagwae hila, eema 'ebe'ita gide towalata'abi, 'aigeda tuta loheyainaina walata 'i'abidiya, ma 'aigeda walataina 'ihewgaeya to'abiina, 'igwaeya, “To'aha weyahina geya 'u'abigau gide 'iyaguina?”

<sup>21</sup> Ta 'ana dumwalu hesi beno to'abiina 'iboi 'ina 'abi 'iloinae, 'eguma nuwanuwana bale'u 'aigedaina 'oinega walata 'eluwa 'i'abidi, ma 'aigeda 'ana 'ita 'ausalana, ta 'aigedaina geya. Bewa bwebwe'ana!

<sup>22</sup> Ta Yehoba wete gidemusa 'ina paihowa 'iboi 'iloinae, weyahina tuta mabwaiyana togala 'oidiya 'ihe'alama'i'ita madouna 'abehega 'idi pui weyahina sahena 'ida hemahe-masedi, ma tuwa geya sida hemamataneya, ma 'inuwatuhuwa 'abehega sowaswana tuwa 'iloinaedi, 'ina gamwasowala ta 'ina waiwai matadiyega si'ita. <sup>23</sup> Ma nuwanuwana wete 'ina wasawasaedi mwalo 'i'atububudiya tauda 'ihelauwegita weyahida, 'ihe'itae. <sup>24</sup> Coinega boda 'eluwa 'oidiyega 'ibwauwegita, tauma boda Yudiya ma 'omi tomiya ganamuli. <sup>25</sup> Gidemusa palopita Hoseya 'ina bukiya 'ihewwaila, 'igwaeya,

“Tomotaiyedi taudi geya 'igu bodao taudi nata yabwauwedima 'igu boda 'oina siluhuma, weyahina mwalo taudi geya 'igu helau 'alona sida miya, ma bewa tuta yahe-lauwediyu. <sup>26</sup> Mwalo Yehoba 'ihewgaediya, 'igwaeya, ‘Comi geya 'igu bodao’, nata bewa sibuihila ta sibwauwedi, sigwae, ‘Taudi Yehoba miyamiya hatayana natunao.’”

<sup>27</sup> Aiseya gidemusa wete meIsileli weyahidi 'igwaeya,  
“Cabwa, susu Isileli sihenatuna yadayada gide namonamowedi hola lasalasa, ma 'iyamo 'oidiyega nata tupwatupwadimo Yehoba 'i'etolemedi. <sup>28</sup> Weyahina Yehoba nuwanuwana gogo gabulena mabwaiyana 'iloina mwamwayauwe.”

<sup>29</sup> Ma Aiseya wete gide 'ina hepwaila 'igwaeya,  
“Yehoba 'iboimo Tohewaiwai, 'oinega 'eguma geya 'eta 'ina boda tupwatupwadi 'i'ate-muyamuyaedi, nata mabwaiyada 'ilamanigita, gide 'aneyage Sodoma ma Gomola, mabwaiyadi 'imutudiya.”

*MeIsileli geya sihemisa*

<sup>30</sup> Bewa 'oinega tasanapu 'abehega taudi tomiya ganamuli geya sitohotoho ma Yehoba 'i'ahwa dumwaluwedi, ma hesi 'idi hemisa tuwa 'oinega 'i'ahwa dumwaluwediya. <sup>31</sup> Ma Isileliyedi hesiyage si'ai'aipate ma 'abehega lolina 'ana muliya 'oinega Yehoba 'i'ahwa dumwaluwedi, ta si'aipate 'asaya.

<sup>32</sup> Taudi 'idi nuwatuhu 'abehega 'idi paihowa weyahina Yehoba 'i'ahwa dumwaluwedi, ma geya sihemisa 'oina, eeta beno 'idi pui gidemusa da'ule 'oina sihetupediya. <sup>33</sup> Ma Yehoba 'ina Buki 'oina da'ule 'ebe tupaina weyahina 'ihewwaila, 'igwaeya,  
“Wa'itayahi bwaibwainigomi, weyahina da'uleina nata Saiyoni 'oina yalagu, ma tomota nata 'oina situpa ma sibe'u, ma 'eguma taiyawedi tauna tuwa da'uleinaina sihemisaeya nata geya'abwa siwe'awe'a.”

## 10

<sup>1</sup> Ma 'iyagwao, moisa 'igu bodaoedi yanuwunuwa tuhuyahidi madouna togidega ma 'etolema siloba, ee 'oinega tuta mabwaiyana weyahidi ya'ahwa'ahwanoi waiwai Yehoba 'oina. <sup>2</sup> Ta yasanapu bwaibwainidiya Yehoba weyahina sihemamatana madouna, ma hesiyage geya 'ana 'eda moisa 'oinega sida tauya. <sup>3</sup> Cedaina sihemata hwadiyeya, 'oinega siboidimo 'idi nuwatuhu simuliyediya ma 'abehega 'oidiyega Yehoba 'i'ahwa

dumwaluwedi, ta si'aipate 'asaya, weyahina Yehoba 'ina nuwatuhuina 'adi 'ahwadumwalu weyahina geya sihemise. <sup>4</sup> Ma Keliso 'ina paihowega Mosese 'ina loina 'oidega 'igumwala, eeta bewa tutaina tauna 'ina loina 'ihegaineya ma 'eguma taiya Kelisoina 'ihemisae, nata Yehoba 'i'ahwa dumwaluwe.

*Yehoba 'ina 'etolema mabwaiyada weyahida.*

<sup>5</sup> Bewa gide Mosese 'igwae 'esa 'ada 'ahwadumwalu weyahina ma 'ilelediya, 'igwaeya, “Ceguma taiya loina mabwaiyana 'imuliyedi, nata yawasi bwebwe'ana 'iloba, bewa tutaina ma wete tuta 'inaonaoma 'oidiya.”

<sup>6</sup> Ma bewa tutaina tauda 'ida hemisa 'abehega Yehoba tauna 'i'abi 'ehaugita, ma tauna weyahina Yehoba 'ina Buki 'oina 'ihewpaila, 'igwaeya, “Geya sowana 'eta taiya 'oimiyega 'inuwatuhu ma 'igwae, ‘Taiya nata 'ihane Galewa?’ ” Bewa gwaeina 'ana sanapu 'abehega, “Taiya nata Keliso 'itoeyama.”

<sup>7</sup> “Ta wete geya sowana 'eta 'oimiyega 'igwae, ‘Taiya nata 'idobi bale'u dudunina?’ ” Gwae bewa 'ana sanapu 'abehega “Taiya nata Keliso 'amasega 'i'abihetoholo hileyama?”

<sup>8</sup> Ma he'ita moisa Yehoba 'ina Buki 'oina bewa gide, “Gwaeina deimiya tuwa 'imiyamiya beno 'ahwamiya ma wete 'atemiya.”

Gwaeinaina beno hemisa weyahina 'alologuguyae 'oimiya, <sup>9</sup> ma 'abehega Yehoba 'i'etolemegita 'eguma 'ahwadega tatagwatagwala ma tagwae, “Yesu 'owa 'igu Bada”, ma 'atedega tahemisae 'abehega Yehoba Yesu 'i'abihe toholohileya 'amasega. <sup>10</sup> Weyahina 'atedega tahemiseya eeta Yehoba 'i'ahwa dumwaluwegita. Ta wete tahetohewpaila weyahina, ma 'i'etolemegita. <sup>11</sup> Gide Yehoba 'ina Bukiya 'ihewpaila, 'igwaeya, “Ceguma taiyawedi sihemisa, nata geya'abwa siwe'awe'a.”

<sup>12</sup> Ta geya 'eta wataha 'omi tomiya ganamuli ma tauma meYudiya gamwagamwanida, weyahina mabwaiyada tauna 'ida Bada, 'oinega 'eguma ta'ahwanoi 'oina, nata 'ihelau bwaibwainigita. <sup>13</sup> Weyahina 'eguma taiya Badaina 'oina 'i'ahwanoi, nata 'etolihasa 'iloba.

<sup>14</sup> Moisa, tomota geya sowasowahina ma 'etolihasa weyahina si'ahwanoi 'oina, 'eguma geya sihemisae. Geya sihemisae weyahina geya Badaina sanina sihesagohe. Ma geya sihesagohe weyahina geya 'idi tologuguyamo. <sup>15</sup> Ta 'eguma Bada tologuguya 'ihewasaedi sitauya 'oidiya, nata Yesu wasana sihesagohe ma sihemisae, eema 'eguma saninega si'ahwanoi nata 'i'abihetedi, weyahina Yehoba 'ina Buki 'oina gide wete 'ihewpaila pwaiya, 'igwaeya, “Tologuguyaowedi taudi tetela bwebwe'ana si'eweyama weyahidi tayaliyaya.”

<sup>16</sup> Ma tupwadi geya sihemisa, weyahina Aiseya 'ihewpaila pwaiya weyahidi, 'igwaeya, “Bada yo, 'ino gwaeina weyahina geya si'ahwa moisaegau.”

<sup>17</sup> Eeta 'eguma Keliso weyahina taloguguya, nata hisahisadimo sihesagohe ma sihemisa. <sup>18</sup> Ma togidega meYudiyaedi 'ina gwaeina sihesagoheya, bo geya? Cehe sihesagoheya, ta Yehoba 'ina Buki 'oina 'ihewpaila pwaiya, 'igwaeya, “Cidi loguguyaina 'asa mabwaiyadi sihesagoheya, weyahina gogo gabulena mabwaiyana 'oidiya 'i'edadana.”

<sup>19</sup> Ta gwae bewama togidega weyahina meIsileli sinuwa sabwalena, bo geya? Cehe, sinuwa sabwalena, weyahina Yehoba mwalo Mosese 'oina 'ihewpaila 'igwaeya, “Comi meIsileli nata 'igu paihowega hali tomota matahwadi wahe'ipi'ipiyedi, ma nata wete wagamwasowaledi weyahina 'abehega taudi geya 'igu bodao moisa.”

<sup>20</sup> Ma Aiseya Yehoba 'ina gwaeina wete 'igwae waiwaiya, 'igwaeya, “Tomotaiyedi taudi geya si'ebesegau, nuwana sihesilalegau, 'oidiya yalatuwa, ma ba'idagwao 'ahe'iyaiyaguwa.”

<sup>21</sup> Ma 'ina gwae wete pa'alina meIsileli weyahidi 'igwaeya, “Tuta mabwaiyana yabwauwawedi eema 'abehega sitauyama 'oiguwa, ma hesi si'ita'ita guipailegau, weyahina taudi tuwa mumugadi gide, toheguipaila.”

## 11

*MeIsileli tupwadimo 'abwa simiya bwebwe'ana*

<sup>1</sup> Ta bewa 'igu hesilala, togidega Yehoba 'ina boda meIsileli 'iguipalediya, bo geya? Geya! Weyahina taugu 'aigeda gwama Isileli, susu Beniyamina 'oinega, ma 'ima susu madouna 'ima babadega, sanina Ebalahamo.

<sup>2</sup> Coinega yasanapuya 'abehega tauma Yehoba 'ina tomotaiyao, mwalo hene 'ihesinuwanemaiya ma 'abehega 'ina bodao, ee 'oinega nata geya 'ilolososomanemai. Ma mwalo heneyage, Ilaitiya meIsileli 'ilomugiyediya Yehoba 'oina, ta 'ina Bukiya 'ileleya, 'igwaeya, <sup>3</sup> “Bada yo, 'ino palopitao mabwaiyadi silohe'amasidiya, ma 'ino pwaoli bwasa si'abihegaleya, ma yaboigumo yatupwa, ma nuwanuwadi bewa tuta wete silohe'amasigau.”

<sup>4</sup> Ma Yehoba Ilaitiya 'ihewgaeya, “Geya 'abehega 'uboimo 'umiyamiya, beno wete 'igu bodao site sebeni tausani simiyamiya, taudi Ba'ala\* 'oinega yahahegagaledi, eeta geya 'oina sida tuluha.”

<sup>5</sup> Bewa sauga wete gide Yehoba 'ina bodao meYudiya, 'ai'aigedamamo 'ihesinuwanemaiya 'ina helauwega, eeta tauma bewa 'atupwa 'amiyamiya. <sup>6</sup> Cetolihasa 'alobeya, geya 'abehega 'ima paihowa 'oidiyega ma hesi Yehoba 'ina helau 'oinega, weyahina 'eguma helau ma'ana maisa, beno geya helau moisa.

<sup>7</sup> Bewa lamuna 'oinega meIsileli mabwaiyadi 'etolihasa si'ebesa 'asaeya, ma tauma tupwatupwamamo hesiyage Yehoba 'ina bodao hesihesinuwanemai 'etolihasa 'alobeya, weyahina meIsileliyadi mabwaiyadi deba pa'apa'alidi eeta geya siloba.

<sup>8</sup> Ma Yehoba 'ina Buki wete gide 'ihewwaila 'esa, 'igwaeya, “Nugeta hene 'ana siga nige bewa Yehoba 'idi nuwatuhi 'i'e'abi buidiya, ta matadi 'igihetuidiya, ma tenadi 'igihetuidiya.”

<sup>9</sup> Ma Debida wete gide 'ina hepwaila 'igwaeya, “Sawasawahina 'idi guyai 'oidiyega 'adi loina siloba, ma gide si'wa 'oidiyega sisi'wediya, ma wete gide sa'e 'oidiya sibe'uwa.

<sup>10</sup> Ta 'ilobwainediya tuwa simata gibugibu, ma 'ane geya sowana to'aha si'ita'ita, ma wete tuta mabwaiyana 'adi 'aha'ahala mwauna 'oidiyega tuluhadi silotayohu hataya.”

*Cetolema taudi geya meYudiya weyahidi*

<sup>11</sup> Taudi Yudiyaedi situpa eeta togidega 'adi loina? Cabehega nage sibe'u hataya ma nata geya wete sitohotoholo hila, bo? Nata geya! Cabwa sitoholo hila! Ma hesiyage wanuwatuhuyahi 'abehega taudi sipuiya, eeta 'omi tomiya ganamuli 'etolema walobeya, ma meIsileliyadi nata sihe'ipi'ipiyegomi. <sup>12</sup> Ta moisa, 'omi geya meYudiya 'etolemanaina walobeya, weyahina meYudiyaedi si'elobe'uwa, ma 'eguma sitoholo hilama beno 'ebe yaliyaya madouna mabwaiyada 'oida.

<sup>13</sup> Cigu hegwagwae bewa 'omi tomiya ganamuli weyahimi. Taugu Yesu Keliso 'ana tohepwaila mabwaiyami 'oimiya, eeta 'igu paihowaina weyahina yagwae hane, <sup>14</sup> ma 'omi tomiya ganamuli nata taudi meYudiya sihe'ipi'ipiyegomi, ma 'ane 'idi he'ipi'ipiina weyahina nuwadi sibuidi ma 'etolema siloba Yehoba 'oinega. <sup>15</sup> Ma Yehoba meYudiya 'iguipalediya ma 'abehega 'omi tomiya ganamuli 'i'ahwa 'iya'iyaguwegomi, eeta tolaha 'eguma meYudiyaedi si'auta hilama, beno 'ausala hedade, ma 'ana 'ita nata gide 'abwa taudi 'amasega sitoholo hila.

<sup>16</sup> Ma tubudiuina Ebalahamo moisa Yehoba 'ina loheya, eeta taudi wetenuge Yehoba 'ina tomotaiyao. Eema 'ebe'ita 'aigeda bewa ya'ebwaegomi. Ceguma 'wateya ma'ehauna wa'ita ma 'ausalana, beno wasanapu pwaiya 'abehega 'e'etahi nata bwebwe'ana. Gide wete 'eguma 'aiwe 'eta lamuna wa'ita ma 'ausalana, beno wete wasanapu pwaiya 'abehega lalahanaowedi bwebwe'adi.

<sup>17</sup> Eeta taudi meYudiya gide tuwa Yehoba 'ina 'aiwe lahanao tupwadi silotalasa, ta 'omi 'oimiyega 'ihemiyalaenediya, weyahina 'omi hali 'aiwe lahanao ma 'ihesinuwegomiya, ta 'ina 'aiweina 'oina 'ilagu hepa'igomiya, ma 'ina 'aiweina 'oinega 'ana we'ahaga

wanumanuma, beno Yehoba 'ina helau walobeya. <sup>18</sup> Ma hesiyage 'ina helauina sahena weyahina wagwaegwae hanehane, weyahina laha geya sawasawahina lamu 'iloinae, ma lamu hesiyage sawasawahina laha 'iloinaedi.

<sup>19</sup> Weyahina 'eguma wanuwahane, ma wagwae, “Yehoba 'ina 'aiwe lahanao 'ilasa pwaidiya, eema tauma 'oimega 'ihemiyalaediya.” <sup>20</sup> Beno moisa. Ma hesiyage wanuwatuhuyahi beno lagalagaedi 'ilasediya weyahina geya sida hemisa, ma 'omi 'imi hemisege yawasimi bwebwe'ana walobeya. Eeta 'ami lobwaina Yehoba wamataute ma sahena wanuwanuwa hanehane. <sup>21</sup> Nata gide lahalahaedi 'ane Yehoba 'ina 'aiwe moisa 'oinega 'ilasalasa yahulediya, 'i'ewahiladi ma 'ihemiyalaenegomi, ma 'omi 'i'ewa yahulegomi.

<sup>22</sup> He'ita bewama ta'iteya Yehoba 'ina helau ta 'ina lolina pa'ala, weyahina tobe'u 'oidiya 'ina lolina pa'alina 'ilagulagu, ma hesi 'omi 'ihelauwegomiya, ma 'eguma 'ina helauina walogwahate, 'omi wete 'ilasa yahulegomi. <sup>23</sup> Ta 'eguma meYudiyaedi sinuwabui ma sihemisa hila, nata wete Yehoba 'oina 'ilaguhepa'i hiladi, weyahina Yehoba sawasawahina ma gide 'ipaihowa 'esa.

<sup>24</sup> Ma 'omi geya meYudiya wanuwatuhuyahi 'abehega mwalo 'omi hali 'aiwe lahanao, ta geya Yehoba 'ina 'aiwe 'oina wada miya, ma 'ina paihowa 'ebe henuwanainaida madouna 'oimiya 'ipaihoweya, weyahina 'ina 'aiwe 'oina 'itubwegomiya, ma meYudiyaedi taudi Yehoba 'ina 'aiwe lahanao moisa sawasawahina wete 'ilagu hepa'ihiladi 'ina 'aiweina 'oina.

#### *Meisileli 'adi 'abihetena*

<sup>25</sup> Ciyagwao, nuwanuwagu ginaula 'aigeda dahwadahwaina meisileli weyahidi yahepwaile 'oimiya ma 'ane sahena wanuwanuwa hanehane, ma ginaula bewa wasanapu 'abehega nata meisileliyedi sidebapa'ala 'ana siga 'omi tomiya ganamuli hesihesinuwami mabwaiyami 'abihetena wa'ewa.

<sup>26</sup> Ma 'ane meisileli mabwaiyadi 'abihetena 'abwa siloba. Weyahina Yehoba 'ina buki 'oina 'ihepwaila, 'igwaeya, “To'abihetenaina, gwama Saiyoni, 'abwa 'ilatuma, ma susu Yakobo 'idi puiyedi 'i'ewayahuledi. <sup>27</sup> Ma tutaina 'eguma 'idi puiyedi ya'ewayahuledi, nata gwae hemisa 'ausalana ya'ebwaedi.”

<sup>28</sup> Ma bewa tutaina moisa meYudiyaedi Yehoba silolo'alehe, weyahina tetela bwebwe'ana siguipaileya, 'oinega 'omi tomiya ganamuli 'abihetena wa'eweya, ma hesiyage wanuwatuyahi 'abehega meYudiyaedi Yehoba 'ihelauwediya, weyahina mwalona tubudiyaowedi Yehoba 'ihesinuwediya 'ina bodao. <sup>29</sup> Ma geya sawasawahina Yehobaina mumugana, ma 'ina hesinuwa, nuwana 'ina helau, 'oidiyega 'ibui.

<sup>30</sup> Ma 'omi geya meYudiya hesiyage mwalo geya Yehoba wada muliyeya, ma bewa tutaina Yehoba 'ina 'atemuyamuya walobeya, weyahina meYudiyaedi Yehoba siguipaileya.

<sup>31</sup> Wete gide taudi 'abwa Yehoba 'ina 'atemuyamuya siloba, gide 'omi tuta bewa walobeya. <sup>32</sup> Eema tologuipaila mabwaiyada bewa gide Yehoba 'imumuga 'esegita ma 'abehega 'ina 'atemuyamuya 'ihe'itegita.

<sup>33</sup> Ma moisa, Yehoba 'ina lolina ta 'ina sanapuwo sihemadou hedada, ta geya 'eta wete taiya 'oidega sawasawahina Yehoba 'i'epatei ma 'ina nuwatuhuwao ta 'ina paihowao 'isanapudi, nata tahiya'asae. <sup>34</sup> Cina sanapuina 'imadou hedada, ta geya sawasawahida tahututao ma 'abehega 'eta to'aha nata 'oina tahe'ita, <sup>35</sup> nuwana 'eta to'aha weyahina 'ana haga talagu ma 'ihemaisa 'oida.

<sup>36</sup> Weyahina tauna ginaula mabwaiyana 'adi topaihowa, ma tauna wete 'ina waiwaiyega 'iboi weyahina 'ipaihowediya. Eeta Yehobaina tauna tahepwatu hatae. Emeni.



<sup>1</sup> Tasigwao, wanuwatuhuyahi 'abehega Yehoba 'ina 'atemuyamuya 'oida 'imadou hedada, ee 'oinega bewa 'igu loguguya 'oimiya, tuta bewa mayawasimi wamiyamiya wapwaoliyegomi Yehoba 'oina, weyahina Yehoba nuwanuwana wahimi mabwaiyadi watagwaledi 'ina paihowa 'oina. Bewa gide paihowa 'esaina beno tapwalolo moisa 'ina 'eda Yehoba matana.

<sup>2</sup> Sahena bale'u mumugana 'oina watagwa tagwalegomi, ma hesi wahimi mabwaiyana watagwaledi Yehoba 'oina. Coinega 'imi nuwatuwao Yehoba 'i'abi hehauhaudi, ma 'ina nuwatuwu bwebwe'adi ta yaliyaliyayadi ma dumwadumwaludi wasanapudi.

<sup>3</sup> Camo'isamo tuwa Yehoba 'oinega 'atemuyamuya yalobeya, ma sawasawahigu wete ya-loguguya 'oimiya eema sahena wanuwanuwa hane, ma hesi ma'imi sanapu wanuwatuhu bwaibwaina, weyahina Yehoba 'ina heguheguyai 'oida 'ida hemisa talobediya, <sup>4</sup> eeta wahidaina 'aigeda tuwa, ma yahudi 'idi paihowa hagana ma hagana.

<sup>5</sup> Tauda gidemusa Yesu Keliso yahunao, ma 'aigeda 'aigeda 'ida paihowao hagana ma hagana, ma hesiyage mabwaiyada Keliso 'oina taheboda 'aigeda ma tahe'abi 'abihetena.

<sup>6</sup> Tauda 'aigeda 'aigeda sanapu ma waiwai Yehoba 'iheguyaigita, eeta tupwadi 'adi heguheguyai hagana 'iyadiyao 'oidiyega. Weyahina 'eguma taiya ma'ina hemisa, ma Yehoba 'ina nuwatuwu 'igwaehapwese, beno tuwa 'ana lobwaina ma gidemusa 'ipaihowa 'ese.

<sup>7</sup> Ma 'eguma taiya 'abihetena 'isanapuya, nata 'iyanao 'i'abihetedi. Ma 'eguma taiya he'ita 'isanapuya, 'ihe'ita tuwa. <sup>8</sup> Eema 'eguma taiya tuta baibaiwana 'iyanao 'i'abi'abi hewaiwaiyedi, ee 'ipaihowa gidemusa. Ma taiya wete tuta baibaiwana 'i'ehe'ehele, beno ma'ina 'atetagwala 'i'ehele. Ma 'eguma taiya 'ihetohanugeta, 'ida paihowa bwaibwaina. Ma 'eguma taiya ma'ina 'atemuyamuya, ee 'iyanao 'i'abi'abihetedi ma'ina yaliyaya.

#### *Helau 'eda moisa.*

<sup>9</sup> Wahelau moisa. Pui waguipaille, ma mumuga bwebwe'ana hesiyage wa'abiyahi. <sup>10</sup> Ciyamiyao wahelau bwaibwainidi, ma wete wahe'asisyanedi, <sup>11</sup> ma Yehoba 'ina paihowa 'oina sahena walologuipaila, ma hesi ma'imi 'atetagwala wapaihowa.

<sup>12</sup> Ma wanuwatuhuyahi 'abehega tuta 'inaonaoma Yehoba 'ina 'abihetena 'ilatuma, ma weyahina wayaliyaya, 'oinega 'imi miyamwau 'oidiyega wa'ahwa'ahwanoi Yehoba 'oina, ma'imi 'alama'i'ita. <sup>13</sup> Ma 'eguma tasimiyao 'eta to'aha mwau 'ilatu 'oidiya, beno 'imi tobwatobwega wa'abihetedi, ma wete wabwauwedi 'imi hada.

<sup>14</sup> Ma 'eguma taiyawedi siguipailegomi geya sowana waheheliyedi, ma hesi wagwae helau 'oidiya. <sup>15</sup> Ma 'eguma toyaliyaya wa'itadi, mahetemiyaoy wayaliyaya. Wete gide 'eguma tohedoudou wa'itadi, mahetemiyaoy wahedoudou, <sup>16</sup> eema 'ane waboi wahelau hilegomi. Ma sahena wanuwanuwa hanehane, nuwana watohotoho ma wahetoloina, ma hesi taudi geya sanidimo wa'ahwa 'iya'iyaguwedi.

<sup>17</sup> Ma 'eguma taiyawedi silo'alehegomi, sahena mumuga galana 'oinega wahehe-maisedi, ma hesi wahemaisedi mumugaedi gide tomotai mabwaiyadi si'ahwa'ahwa bwebwe'ane 'oidiyega. <sup>18</sup> Eema wete watoho waiwai ma mumuga bwebwe'ana 'oinega tomotai mabwaiyadi mahetemiyaoy wamiya daumwala. <sup>19</sup> Ma sahena wahehetoloina togala 'oidiya ma 'abehega 'idi pui wahemaisedi, weyahina bewa ginaulaedi Yehoba tauna 'ana toloinaina, ta Yehoba 'ina buki 'oina gide 'ihewaila 'esa, 'igwaeya, “Tomotai 'idi pui weyahina yaboigumo 'abwa yaloinae.’ Yehoba 'ina gwae gide.”

<sup>20</sup> Ma 'eguma 'ami 'alehao sigomale 'e'ahai wa'ebwaedi, bo 'eguma tani'odi 'iyahala we'aha wa'ebwaedi, eema 'ane 'idi puiyedi weyahidi sideba mwadina ma sinuwabui.

<sup>21</sup> Eeta sahena pui watagwatagwale ma 'oimiya 'ihewaiwai, ma 'omi hesiyage wahewaiwai sine mumuga bwebwe'ana 'oinega.

#### *Toloinao tahe'asisiyedi*

<sup>1</sup> Mabwaiyada 'ilobwainegita ma 'ada tolinoao tahe'asisyanedi, weyahina 'idi pai-howaina Yehoba 'i'ebwaediya. Ma 'eguma 'idi paihowaina geya Yehoba 'oinega,

geya sawasawahidi sihetoloina 'oida. <sup>2</sup> Eeta 'eguma taiya toloinaedi 'isinalidiya beno Yehoba 'ina paihowa 'isinaliya, eeta 'abwa maisa galana 'iloba Yehoba 'oinega. <sup>3</sup> Ta toloinaedi 'idi paihowa geya 'abehega tobwebwe'adi si'ehematautedi, ma topui hesiyage si'ehematautedi 'idi puiyao weyahidi. Ta 'eguma geya nuwami toloinaedi wamatautedi, mumugami hedeyage sidumwalu, eema 'ane si'ahwa bwebwe'anegomi.

<sup>4</sup> Weyahina taudi Yehoba 'ina topaihowao ma 'ane si'abihetegomi. Ma 'eguma mumugami galana, nata wa'ateyoho, weyahina taudi toloinao 'abwa siloinegomi. Weyahina Yehoba loina 'i'ebwaediya ma topui siloinaedi. <sup>5</sup> Eeta 'ilobwaineya ma toloinao tahe'asisiyanedi, tabu ta loina taloba, beno 'eguma mumuga bwebwe'ana nuwanuwada.

<sup>6</sup> Sawasawahina wete 'ida takesi ta'ebwaedi, weyahina taudi Yehoba 'ihesuwedidiya ta 'ina paihowa sipaipaihowa. <sup>7</sup> Coinega takesi 'adi tuta 'ewa 'oina ma'ida tagwala tataksei, ma weteyage toloinao ma babada tahe'asisiyanedi ma weyahidi tayaliyaya.

### *Helau*

<sup>8</sup> Cami buki wahemaisa hegunwalidi, eema 'ane buki 'aigeda tuwa weyahina wanuwanuwatuhu beno helau, tauna geya sawasawahida tahemaisa hegunwali, weyahina 'eguma 'iyadao tahelauwedi beno loina mabwaiyadi tapaihowediya, <sup>9</sup> loinaedi 'ane gide sigwaeya, sahena logwali, sahena lohe'amasa, sahena yagaha, sahena matalolo, eema tupwadi wete. Ma loinaedi 'adi bwagila, bewa gide 'igwaeya, "Ciyamwao 'uhelauwedi gide 'uboi 'uhehelauwego."

<sup>10</sup> Ceguma loina bewa 'upaihowa, 'ana gwae gide beno Mosese 'ina loina mabwaiyadi 'upaipaihowadi, weyahina 'eguma taiya 'atena helau 'imiyamiya, nata geya sowana 'iyanao 'idi miya 'i'abihegala.

<sup>11</sup> Ee 'oinega bewa tutaina sawasawahina tuwa 'eguma gide wapaihowa 'esa, weyahina 'ida tuta 'i'iunamo ma 'igumwala. Yesu bo'i wahemiseya, ee 'oinega sahena wa'eno'eno ma hesi wa'o'oyatola, weyahina 'ida tuta 'i'iunamo ma 'ada To'abiheteina 'ilatuma.

<sup>12</sup> Ta moisa tuwa 'i'iunamo gona 'i'adale, eema 'ane nihuwana 'ana paihowa ta'ebesine, ma ta'atububugita sabwelo 'ana paihowa weyahina. <sup>13</sup> Coinega ta'ita yahigita ma sahena we'aha waiwaina tanumanuma ma taheyauyaule, sahena wete talologwali, ma sahena wete tahe'ahwa panapanawa, nuwana tahe'upwa besobeso.

<sup>14</sup> Sahena bale'u mumugana weyahina tanuwanuwatuhu, ma hesiyage 'ida Bada Yesu Keliso mumuganega tatauya.

## 14

### *Lomuqi weyahina*

<sup>1</sup> Tupwadi tomota 'idi hemisa we'ana, sawasawahina tatagwala ma 'ida boda 'oina siluhuma ma tahe'iyaiyagu, ma hesi sahena mahetedao tahe'ohe'ohe. <sup>2</sup> He'ohe'oheina gide 'eguma tupwami wagwae, "Ce'ahai mabwaiyadi sawasawahina ta'aidi." Ma tupwami 'imi hemisa we'awe'ana wagwae, "Cuibai ta'etala he'asisiye, sahena ta'ai'ai."

<sup>3</sup> Sahena taudi to'e'uibai sisinasinala to'etala he'asisiyedi 'oidiya, eema to'etala he'asisiyedi wete, sahena to'e'uibaiyedi si'ahwa'ahwa galagalaedi, weyahina Yehoba 'ihesuwedidiya 'abehega tauna natunao, <sup>4</sup> ma wete tauna 'ina topaihowao, eeta tauna tuwa 'adi to'itayahina, ma 'owa geya. Coinega 'eguma 'i'ahwa bwebwe'aneidi bo 'i'ahwa galagalaedi 'iboi 'ina 'ebeloina, weyahina tauna sawasawahina 'i'abihe waiwaiyedi ma geya sowana siwe'awe'a.

<sup>5</sup> Tupwadi tomotai 'idi nuwatuhu wete gide 'abehega sabwelo tupwadi ma'adi he'asisi madouna, ma 'iyadiyao tupwadi 'idi nuwatuhu 'abehega sabwelowedi mabwaiyadi tuwa mahemahetena. Ceguma nuwatuhu bewa gide talobeya, 'ilobwaineya ma 'aigeda 'aigeda taunamo 'eguma to'aha 'eta 'isanapuya 'abehega bwebwe'ana, beno 'imuliye tuwa. <sup>6</sup> Ma 'eguma 'eta taiya sabwelo tupwadi 'ihe'asisiyanedi, tauna 'ipaipaihowa gidemusa Yehoba weyahina. Wete gide 'eguma 'eta taiya 'e'ahai mabwaiyana 'i'ai'ai besobeso, tauna 'iboi 'ina nuwatuhu beno 'abehega 'ina 'aiyega Yehoba 'ihe'asisiye, eema 'e'ahaiyedi

weyahidi 'iloloyauwedo Yehoba 'oina. Wete gide 'eguma 'eta taiya 'e'ahai tupwadi 'i'etala he'asisiyanedi, tauna 'iboi 'ina nuwatuhu ma 'abehega Yehoba 'ida he'asisiye, ma weyahina 'iloyauwedo 'oina.

<sup>7</sup> Ma geya 'eta taiya 'oidega sawasawahina ma 'iboi 'iloinae yawasina bo nuwana 'ina 'amasa weyahina.

<sup>8</sup> Ma 'ida Badaina hesiyage tauna yawasida mabwaiyana ma 'ida 'amasa 'iloiloinaedi, weyahina tauda 'ina bodao. <sup>9</sup> Bewa weyahina Keliso 'i'amasa ma 'itoholohila, ta 'abehega to'amasaedi ma tauda mayawasida mabwaiyada 'oida 'ihetoloina.

<sup>10</sup> Coinega wanuwatuhuyahi ma sahena wagwaegwae hesinuwa bo tasimiyao walolomugiyedi, weyahina tuta 'inaonaoma 'abwa mabwaiyada Yehoba matana tatoholo ma 'iloinaegita, <sup>11</sup> gide Yehoba 'ina Bukiya 'ihewpaila, "Yehoba 'igwaeya: Taugu miyamiya hatayagu, eeta 'abwa tomota mabwaiyadi si'etuluha 'oiguwa, ma si'ahwa Badaegau."

<sup>12</sup> Eema 'aigeda 'aigeda nata taboi mumugada tahepwaledi Yehoba 'oina.

#### *Sahena 'iyadao tagihegihe galadi*

<sup>13</sup> Coinega sahena 'iyadao ta'ahwa'ahwa galagalaedi, ma hesiyage taboi mumugada ma 'ida paihowa ta'itayahi, ma 'ane gesowana 'iyadai 'aigeda ta'abi'abi hewe'a 'ina 'etala he'asisi weyahina. <sup>14</sup> Cida Badaina Yesu nuwagu 'i'abi hemaedanya moisa, ta yasanapuya 'abehega geya 'eta 'e'ahai 'eto'etobodana, ma 'eguma 'eta loheya 'ina nuwatuhu 'abehega 'e'ahai tupwadi 'eto'etobodadi, beno 'etobodaina tauna tuwa 'iboi weyahina.

<sup>15</sup> Bo nuwana 'eguma tupwadi 'iyadao sigwaeya 'abehega 'uibai tupwadi he'ah'e'asisidi, ma 'eguma 'u'ai nata tomotaedi sinuwagala. Beno geya helau 'ana 'eda. Ma 'unuwatuhuyahi hesiyage 'abehega tomotaedi weyahidi Keliso 'i'amasa, ee 'oinega sahena ginaulaedi he'ah'e'asisinidi matadiya 'u'ai'ai, nata gide 'u'abi hewe'adi.

<sup>16</sup> Ta 'owa 'oiuwa 'e'ahainaina bwebwe'ana, ma hali tomota 'oidiya galana, eeta 'eguma si'itago 'u'ai'ai nata si'ahwa yaliyego. <sup>17</sup> Ma hesi wanuwatuhuyahi beno Yehoba 'ina 'ebeloina geya 'e'ahai nuwana we'aha weyahidi, ma hesi mumuga bwebwe'ana, ma nuwadaumwala ma yaliyaya, beno Yaluyaluwa Tabuna 'oinega.

<sup>18</sup> Ta 'eguma mumugaedi 'oidiyega Keliso 'ina paihowa tapaipaihowa nata Yehoba weyahida 'iyaliyaya, ma tomota weteyage si'ahwa bwebwe'anegita. <sup>19</sup> Eeta tatoho ma tamiya daumwala eema 'ane tahe'abi 'abihetena mahetedao. <sup>20</sup> Sahena 'e'ahai 'oinega Yehoba 'ina paihowa wa'abi'abi hegala, weyahina 'e'ahai mabwaiyana 'ausalana, ma 'eguma 'eta 'e'ahai 'oinega 'iyadaina tagihégala, 'e'ahainaina sahena ta'ai'ai hila.

<sup>21</sup> Coinega bewa tutaina 'ilobwainegita ma ginaulaedi 'iyadaowedi sihehe'asisiyanediya, beno 'uibai bo nuwana bwasi waiwaina, sahena ta'abi'abi tohodi, 'amuge 'iyadaowedi tagihégala. <sup>22</sup> Ta moisa 'imi paihowaedi wahemisediya 'abehega 'ausaladi Yehoba matana, ma 'aigeda tuwa, 'eguma sahena 'iyamiyao wagihegihe galadi beno 'ebe yaliyaya 'oimiya.

<sup>23</sup> Ma 'eguma ma'ida henuwanaluwa 'e'ahaiyedi ta'aidi, beno tapuiya Yehoba matana, weyahina geya tahemisa. Eeta tasanapu pwaiya 'abehega 'eguma to'aha 'eta tapaihowa ma geya tahemisa, beno pui.

## 15

#### *Tohemisa we'awe'adi ta'abihetedi*

<sup>1</sup> Taiyawedi tauda 'ida hemisa waiwaina sawasawahina ma 'iyadao taudi 'idi hemisa we'awe'ana ta'abihetedi. Gesowana taboidamo weyahida tanuwanuwatuhu. <sup>2</sup> Eeta 'aigeda 'aigeda sawasawahina 'iyadao ta'abihetedi ma 'ane 'idi hemisa 'ihewaiwai. <sup>3</sup> Weyahina Keliso wete gide geya 'iboinamo weyahina 'inuwatuhu, ma hesi 'ana mwauwedi Yehoba 'ina Buki 'oina 'ihewpailediya 'igwaeya, "Tomotaiyedi si'ahwa'ahwa galegalegowa, beno taugu 'oiguwa gwaeina si'ina'inana."

<sup>4</sup> Ma wete 'ebe'itao baibaiwadi Yehoba 'ina Buki 'oina 'ihepwailediya Yehoba 'ina 'abihetenaedi weyahidi, 'eguma 'ebe'itaedi tahemisaedi, ta'alama'i'itana ma'ida nuwatuhuyahina 'ane 'etolema 'abwa ta'ewa.

<sup>5</sup> Coinega tanuwatuhuyahi 'abehega Yehoba 'iboi to'alama'i'ita ma to'abihepa'ala, 'oinega tauna sawasawahina 'i'abihe pa'aligita, ma 'ida nuwatuhu talo'aigede gide Yesu Keliso 'ina nuwatuhu. <sup>6</sup> Eema 'ane mabwaiyada nuwatuhu 'aigeda 'oinega Yehoba tahepwatuwe, tauna 'ida Yehoba ma wete 'ida Bada Yesu Keliso Tamana.

*Bewa tetela bwebwe'ana 'omi geya meYudiya 'oimiya.*

<sup>7</sup> Coinega 'iyamiyao wabwauwedi 'imi he'iyayagu 'oidiya, gide Yesu Keliso tauda 'i'ahwa 'iyayaguwegita, ma 'ane Yehoba 'ana hep watu 'ihemadou. <sup>8</sup> Ma wanuwatuhuyahi 'abehega Keliso wete meYudiya 'oidiya 'ihetopaihowa, 'abehega Yehoba 'ina gwae hemisaedi babada nugenugetaidi 'oidiya 'igwaeneya, 'adi moisa 'ida latu, <sup>9</sup> ma wete 'abehega taudi geya meYudiya gogo mabwaiyana 'oidiya simiyamiya, Yehoba sihepwatuwe 'ina 'atemuyamuya 'oidiya weyahina. Weyahina Yehoba 'ina Buki 'oina 'aigeda lele 'imiyamiya, 'igwaeya,

“Bewa lamuna 'oinega tomiya ganamuli mahetegwao nata 'ahepwatuwego, ma wete Saniu weyahina ma'ima hep watu 'awaliwali 'oiuwa.”

<sup>10</sup> Ma wete 'ina gwae 'aigeda 'igwaeneya,  
“Comi tomiya ganamuli Yehoba 'ina tomotaiyao mahetemiyao 'abwa wayaliyaya.”

<sup>11</sup> Ma wete 'igwae hila, 'igwaeya,  
“Comi geya meYudiya, Badaina wahepwatuwe, ma wete mabwaiyami wa'ahwa bwebwe'ane.”

<sup>12</sup> Wete gide Aiseya 'ina Buki 'oina 'igwaeya,  
“Ci'iunamo Desi 'ina bodao 'oinega loheya 'aigeda 'itayama, ma gogo mabwaiyana 'iloinaedi, ma taudi tomiya ganamuliyedi nata sihemisa 'abehega tauna 'adi To'abihetena.”

<sup>13</sup> Ta Yehoba 'iboinamo ma'ana hemisa, weyahina 'iboi tuwa 'oinega lema bwebwe'adi talobaloba, 'oinega nuwanuwagu ma ma'imi yaliyaya wahemisa eema 'ane 'imi miyamiya sibwebwe'ana, ma wete Yehoba Yaluyaluwanega 'i'abihe waiwaiyegomi, ma 'imi hemisaina 'ihemadou bwaibwaina.

*Paulo 'ina loguguya weyahina*

<sup>14</sup> Ciyagwao, yasanapu bwaibwainigomiya 'omi tomota bwebwe'ami ma sanasana-pumi, sawasawahimi wete 'iyamiyao 'oidiya 'eda'eda bwebwe'ana wahe'ita. <sup>15</sup> Ma 'imi leta bewa ma'igu 'atepatu ya'etoladiyawa ma 'ane tupwadi ginaula wanuwatuhu yahidi, weyahina 'igu paihowaina Yehoba 'i'ebwaegauwa, <sup>16</sup> ta 'abehega Yesu Keliso weyahina yahetohalewasa 'omi tomiya ganamuli 'oimiya. Cigu paihowa Yehoba 'oina gide pwaoli, ma 'oinega Yesu wasana wahesagohe, 'abwa muliyetega ya'ebwayaegomi Yehoba 'oina, weyahina Yaluyaluwa Tabuna 'ideuligomiya, ta weyahimi Yehoba 'iyaliyaya madouna.

<sup>17</sup> Ta moisa ma'igu yaliyaya Yehoba 'ina paihowa yapaipaihowa weyahina Yesu Keliso mahetegu 'apaipaihowa. <sup>18</sup> Coinega taugu yaboigumo 'igu paihowa weyahidi tuta bewa yahepwaileidi 'oimiya, ta geya hali tomota 'idi paihowa weyahidi. Ma yahepwaila dumwalu 'oimiya, beno 'igu loguguya tomiya ganamuli sihesagohediya eeta sihematamatanaediya, weyahina Yesu Keliso 'ina waiwai 'oiguwa 'imiyamiya. <sup>19</sup> Ma wete 'igu paihowaedi waiwai ma 'ebenuwa henainaida si'itediya, weyahina Yehoba Yaluyaluwana 'ina waiwaiyega Keliso wasana yaloguguya sakowasiyeya Yelusalemege ta 'ana siga Ililikomi.

<sup>20</sup> Nuwanuwagu tupwa 'ehaudimo 'oidiya yaloguguya nugeta, 'asaedi taudi geya Keliso wasana sihesagohe, weyahina geya nuwagu hali tologuguyao 'idi paihowa yalohep-oseyane. <sup>21</sup> Yehoba gide 'ina Bukiya 'ihepwaila 'esa, 'igwaeya,  
“Taiyawedi To'abihetenaina tetelina geya sihesagohe, ee 'abwa sihesagohe ma sisanapu.”

*Paulo nuwanuwana meLoma 'ibo'enedi*

<sup>22-23</sup> Bewa lamuna 'oinega geya yada habo'enegomiya. Ma moisa bolime baibaiwa hedade 'oidiya nuwanuwagu ma yahabo'enegomi, ma hesi geya sawasawahigu. Ma 'asa bewa 'oina 'igu paihowao yalosalohiya, <sup>24</sup> ee 'oinega bewa tutaina nuwana yabo'ene nugetegomi ma tupwana tayaliyaya toyawa, ee 'abwa wahegelugau ma yatauya Sipeini.

<sup>25</sup> Hesi muliyetega 'abwa yatauyawa 'oimiya, nuwanuwagu ma yatauya nugeta Yelusalema, ma tohekalesiya 'adi lema ya'ebwaedi, beno meEsiya 'idi helau. <sup>26</sup> Weyahina meMasidoniya ma meGilisi nuwanuwadi 'idi helauina yatauye tohekalesiyao wewelohedi Yelusalema 'oina. <sup>27</sup> Weyahina bewa 'idi nuwatuhi madouna. Ta moisa tuwa lemaina sawasawahina meYelusalema siloba meEsiya 'oidiyega, weyahina nugeta meYelusalema 'oidiyega Esiyaedi Keliso tetelina sihesagoheya, yaluyaluwadi 'ana lema weyahina, ee 'oinega taudi wete bale'u tobwatobwaidi 'oidiyega si'e'ehele meYelusalema 'oidiya.

<sup>28</sup> Ee 'eguma 'igu paihowaina yalosalohi, beno helauina mabwaiyana meYelusalema ya'ebwaedi, 'abwa yatauyawa 'oimiya, eema 'oimiyega yagelu hila yatauya Sipeini. <sup>29</sup> Ma yasanapuya 'abwa 'igu habo'enaina 'oimiya bwebwe'ana weyahina Keliso 'ina helau madouna 'oiguwa 'imiyamiya, eeta 'abwa tayaliyaya mahemahetena.

<sup>30</sup> Ciyagwao, 'ida Bada Yesu Keliso saninega ma Yehoba Yaluyaluwana 'ina helauwega ya'ahwanoi 'oimiya, ma 'omi mahetegwao Yehoba 'oina ta'ahwanoi waiwai, <sup>31</sup> ma 'ane taudi Yesu 'ana tologwahataedi Yudiya 'oina geya sowana si'abi'abi hegalegau, eema tohekalesiyao wewelohedi Yelusalema 'oina wete weyahidi, eema helauina yatauye 'oidiya 'ane siyaliyaya weyahina, ma sahena siguiguipaila.

<sup>32</sup> Ta 'eguma Yehoba 'ina nuwatuhi gide, nata ma'igu yaliyaya yatauyawa 'oimiya, ma nobwa tupwana ya'aiyawasi.

<sup>33</sup> Yehoba mahetemi, tauna nuwadaumwala moisa lamuna. Emeni.

## 16

*Paulo 'ina gwae helau*

<sup>1</sup> Nuwamiya yalagu nuhudai Pibe weyahina, tauna 'i'abi'abihetena 'asa Kenikiliya 'idi hekalesiya 'oina, <sup>2</sup> ma 'eguma to tuta 'itauyawa 'oimiya nuwanuwagu watoe 'imi hada 'ida Bada saninega, weyahina mumuga bewa gide Yehoba 'ina topaihowao 'ilobwainediya, ma wete Pibeina 'eguma to'aha 'oinega 'ito'uto'upa wa'abihete, weyahina tauna gide 'ipaipaihowa 'esedi tohekalesiyao baibaiwadi 'ihelauwedi, taugu gide 'lemegauwa.

<sup>3</sup> Cigu helau wete wahepwaile Pilisila ma Akuila 'oidiya, taudi mahetegwao mwalo Yesu Keliso weyahina 'ahetopaihowa, <sup>4</sup> ma wete yawasidi sitagwaleya weyahigu saugaina 'ebe hesilae 'oidiya. Ta weyahidi yaloyauwedo madouna, ma geya 'abehega taugumo 'igu loyauwedo, ma tohekalesiya 'asaidi 'atamanega wete mahetegwao 'ima loyauwedo siteluwaedi weyahidi. <sup>5</sup> Ta 'igu helau wete wahepwaile tohekalesiyaedi si'eto'eto'auta Akuila 'ina hada. Ma 'iyagu Epinito weteyage 'oina yahelauwa, tauna Yesu Keliso 'ana tohemisa nugenugeta Esiya 'ina 'ebeloina 'oina.

<sup>6</sup> Meli wete 'oina yahelauwa, tauna weyahimi 'i'ala'i'iwasa madouna. <sup>7</sup> Ciyagwao Anidaloniko ma Diuniya wete 'oidiya yahelauwa, taudi meYudiya, mwalo mahetegwao deliya 'amiyamiya, siteluwaedi ma'adi 'amayaba Yesu 'ana tohepwaile 'oidiyega, weyahina taudi tohekalesiya nugenugeta 'abwa muliyega taugu.

<sup>8</sup> Ta wete 'iyagu moisa Amipiliya 'oina yahelauwa, tauna 'ida Bada 'ana tohemisa 'aigeda. <sup>9</sup> Ma wete 'igu helau Ulibano 'oina, tauna mahetedai Keliso weyahina tapaihowa. Ta wete 'iyagu Sitakisi 'oina yahelauwa. <sup>10</sup> Cigu helau wete Apeli 'oina, tauna Keliso 'ana tohemisa moisa. Ma Alisitobulo ma'ina susuwao 'oidiya wete yahelauwa, <sup>11</sup> Ta Helodiyami weteyage, tauna 'igu susu gwama Yudiya 'aigeda, eema tohekalesiyaedi taudi Nakiso ma 'ina susuwao wete 'oidiya yahelauwa.

<sup>12</sup> Cigu helau wete Talipina ma Taliposa, taudi 'ida Bada 'ina topaihowao 'oidiya. Ta 'iyagu Pelisi wete 'oina yahelauwa, tauna Bada 'ina paihowa weyahina 'i'ala'i'iwasa madouna.



<sup>13</sup> Ta wete Lupuso 'oina yahelauwa, tauna topaihowa bwebwe'ana 'ida Bada weyahina, ma sinanaina weteyage 'oina yahelauwa, tauna 'agu tohelau, gide 'abwa taugu natuna moisa. <sup>14</sup> Cigu helau weteyage Asinikilito ma Pilegoni ma Helimi ma Pataloba ma Helimasi, ta tohekalesiyaedi mahetediyao wete 'oidiya.

<sup>15</sup> Weteyage yahelauwa Pilologo ma Diuliya 'oidiya, ta wete Neliusa manuhuna 'oidiya. Wete Olimipasi ma Yehoba 'ina tomotaiyedi mahetediyao 'oidiya yahelauwa.

<sup>16</sup> Caigeda 'aigeda 'iyamiyaowedi mahetemiya he'iyaiyagu 'ana moisege wa'atusapwalidi. Ta wete tohekalesiyao mabwaiyadi tupwa baibaiwana 'oidiyega, 'idi helau tohekalesiyao tupwa Loma 'oimiya.

*Paulo 'ina henuwalagu 'ana 'ebe losaloha*

<sup>17</sup> Tasigwao bewa 'igu 'ahwanoi madouna 'oimiya, beno wa'itayahigomi towatahao 'oidiyega, weyahina he'itaedi wa'ewediya taudi 'adi wahi'wata, 'oinega ta si'ahwa'ahwa galegale ma weteyage tomota 'idi hemisa si'abi'abi hewe'adi. <sup>18</sup> Ceguma taiyawedi 'idi paihowa bewa gidemusa taudi geya 'ida Bada Yesu Keliso weyahina sida paihowa, ma beno siboi tuwa 'idi nuwatuhu si'e'epaihowadi, weyahina 'idi gwaeyao hoto hedada, ma tomota we'awe'adi si'e'e'abo'abowedi ma silisilisi hiledi. <sup>19</sup> Ma 'omi hesiyage tomota mabwaiyadi sisanapugomi 'abehega tetela bwebwe'ana 'ana tohematamatanao, ta weyahimi yayaliyaya madouna. Eema nuwanuwagu mumuga bwebwe'ana mabwaiyana wasanapu bwaibwainidi ta mumuga galadi walogwahatedi.

<sup>20</sup> Moisa Yehoba tauna daumwala huhuna, ta nata Seitani 'i'ahusepale mwayamwayauwe 'oimiyega.

Cida Bada Yesu Keliso 'ina helau 'oimiya.

<sup>21</sup> Bewa Timoti ma taugu 'ima helau 'oimiya, Timoti tauna mahetegu 'apaipaihowa, ma tupwana wete 'iyamayao meYudiya taudi Lukiyo ta Yesoni, ta Sosipateli.

<sup>22</sup> Leta bewa taugu Talitiyasi yalele, Paulo weyahina, ma yahelauwa 'oimiya 'ida Bada saninega. <sup>23</sup> Ma loheyaina bewa 'ina hada 'amiyamiya, sanina Geyo, 'ihelauwa 'oimiya, hada bewama tohekalesiyao 'idi 'ebe 'eto'auta. Ma Elasito wete, 'asa madouna bewa 'ana mane 'ana to'itayahina, ta tasidai Kwatasi sihelauwa 'oimiya. <sup>24</sup> (-)

<sup>25</sup> Coinega tuta bewa Yehoba tahepwatuwe, weyahina tauna sawasawahina 'i'abihe waiwaiyegomi, 'igu loguguyaina 'oinega, Yesu Keliso tetelina weyahina. Mwalona tetelaina dahwadahwaina, <sup>26</sup> ta bewa tutaina 'i'abi latuheya 'oida, palopitao 'idi leleyao 'oidiyega, ma wete Yehoba miyamiya hatayana 'igwaeya 'abehega tetela bewa 'asa mabwaiyadi 'ana tomotaiyao sida sanapu, ma 'ane sihemisa ma simuliye. <sup>27</sup> Yehoba taunamo tosanapu moisa, 'oinega sawasawahina Yesu Keliso saninega tahepwatuwe tuta mabwaiyana 'oidiya. Emeni.

Taugu Paulo.

## 1 KOLINITA MeKolinita 'idi leta 'aigeda Paulo 'ileleya

Paulo 'ina sakowasi nugenugeta Kolinita 'oina tomota baibaiwadi Yesu sihemiseya, ta 'i'ebesinediya, 'oinega mumuga galana silatuwa meKolinita 'idi hekalesiya 'alona. Muliyetega Paulo tetelidi 'ihesagoheya, ta 'idi leta bewa 'ileleya ma 'abehega 'i'abihe dumwaludi. Cidi galaowedi bewa: Siwatahidi hali boda ma hali boda 'oidiya, ma 'aigeda loheya ganawala galana 'ipaihoweya, ta siyatayatala siboidimo, toloinaina matana, tauna geya Yesu 'ana tohemisa, ma tupwana loheloheya 'idi yaubada nugenugetaidi 'adiwa si'ai'aidi, ma wete Yesu 'ana tohepwailao geya si'itayahi bwaibwainidi, ta 'idi Badaina 'ina Cai Tabu geya sihe'asisiyane.

Paulo wete 'ilihasiya Yaluyaluwa Tabuna 'ina heguyai tohekalesiyao 'oidiya, taudi 'oidiyega sigwaegwae hali 'enanega, ma tupwana wete ginaula sipaihowediya Yaluyaluwa Tabuna 'ina waiwaiyega. Leta 'ana 'ebelolagu 'oina Paulo 'ilihasiya toholo-hila ta helau weyahidi.

### *Loyauwedo*

<sup>1-2</sup> Taugu Paulo, Yehoba 'ihesinuwegauwa 'abehega Yesu Keliso tetelina 'ana tohepwaila. Cimi leta bewa tasidai Sositeni 'ilemegauwa ma yaleleyawa 'omi meKolinita tohekalesiyao 'oimiya. Weyahina 'omi Yesu Keliso 'i'abihe 'ehaugomiya, ta 'ina boda hesihesinuwadi 'oidiya waluhuma ma wamiyamiya, taudi wete Yesu Keliso saninega mahetemiya wa'ahwa'ahwanoi, taudi tupwa mabwaiyana 'oidiyega mahetedao 'ida Bada 'aigeda tuwa, tauna Keliso. <sup>3</sup> Cida Badaina Yesu Keliso ma Tamada Yehoba 'idi helauwega tuwa wamiya daumwala.

<sup>4-5</sup> Moisa, Yehoba 'ihelauwegomiya ma ginaula mabwaiyana bwebwe'ana 'i'ebwaegomiya, gidemusa 'imi gwae bwebwe'adi ta 'imi sanapu bwebwe'adi Yesu Keliso 'oinega. Eeta tuta mabwaiyana weyahimi yaloyauwedo Yehoba 'oina. <sup>6</sup> Ta wete yaloyauwedoweya weyahina Kelisoina wa'ahwa moiseya ma tetelina wahemisaeya. <sup>7</sup> Ta wete Yehoba 'ina 'ebwaya bwebwe'adi mabwaiyadi 'oimiya simiyamiya, tuta bewa wayamwayamwana 'ida Bada Yesu Keliso 'ina latu hilama weyahina. <sup>8</sup> Ma tauna 'i'abi'abi hepa'aligomi, ta geya 'eta 'imi puimo, ma 'ana siga sabweloina 'ilohihilama.

<sup>9</sup> Yehobaina ma'ana hemisa madouna eeta 'ibwauwegomiya ma natunaina tauna 'ida Bada Yesu Keliso ba'idamiu wahe'iyaiyagu.

### *Sahena wataha silatulatu tohekalesiyao 'oidiya*

<sup>10</sup> Tasigwao, bewa 'igu lohatoto 'oimiya 'ida Bada Yesu Keliso saninega ma 'abehega wanuwatuhu hegogona ma wagwae hegogona, ma hesi sahena wahehe'ohe'ohe nuwana wawatawahigomi. <sup>11</sup> Weyahina tupwadi Kiloe 'ina bodao sihegwae pwaigauwa 'imi he'ohe'ohe weyahidi. <sup>12</sup> Eeta tupwami wagwae, "Tauma Paulo 'ina boda." Ma tupwami wagwae, "Tauma Apolosa 'ina boda." Ma tupwami wagwae, "Tauma Pita 'ina boda." Ma tupwami wagwae, "Tauma Keliso 'ina boda."

<sup>13</sup> Sahena Keliso wahina tahwatahwatahidi, weyahina 'iboinamo weyahimi si'abi hekeloseya, geya taugu weyahimi. Wete Keliso tauna saninega wababaitaisowa, ma geya saniguwega. <sup>14</sup> Cigu loyauwedo Yehoba 'oina bewa, weyahina geya mabwaiyami ya'abi'abihe babitaisogemi. Beno tuwa Kilisipo ma Geyo. <sup>15</sup> Sahena wanuwatuhu ma wagwae, "Tauma Paulo 'ina boda, weyahina Paulo 'i'abihe babitaisomaiya." <sup>16</sup> Geya! Kilisipo ma Gayo, eema wete Sitipana 'ina susu ya'abihe babitaisowediya, nuwana siboidimo. <sup>17</sup> Weyahina 'igu paihowa Keliso 'i'ebwaegauwa tetela bwebwe'ana 'ana lohatotomo weyahina, ta geya 'abihebabitaiso. Ma wete loguguyaina geya 'igu sinasi-napuwega, tabu ma Keliso 'ina 'amasa kelose 'oina tetelina ya'abihewe'a.

*Yesu 'ina 'amasa kelose 'oina*

<sup>18</sup> Kelose tetelinaina tomota tupwadi si'ahwa 'abo'aboweya, taudi yaluyaluwadi 'ama'amasidi, ma hesi tauda tahemisaeya 'abehega Yehoba 'ina waiwai tetelaina 'oina 'imiyamiya, ma 'oinega 'ilemegita. <sup>19</sup> Yehobaina Buki He'asisi 'oina 'ihewaiweya 'igwae, “Taudi tosanapuwao ma tosonogao 'idi nuwatuhi yalogwahatediya ma ya'abihe galediya.”

<sup>20</sup> Coinega togidega taudi tosanapuwao bo nuwana tohe'itao? bo nuwana taudi tologuguyao bewa tuwa bale'uwa simiyamiya? Moisa, Yehoba 'idi sanapuina 'i'ahwa ginaula bwagabwagaediya. <sup>21</sup> Weyahina sanapu bale'uwa gesowana 'oinega Yehoba tasanapu, ma hesi Yehoba 'ina nuwatuhi ta 'ina tetela 'ana lohatotomo 'oinega 'ana tohemisao tauda 'ilemegita. Tetelinaina mebale'u siheginaula bwagabwagaeya. <sup>22</sup> Weyahina meYudiya nuwanuwadi 'ila'ilalao sida 'itadi, ma taudi geya meYudiya, sanapu sibesebese. <sup>23</sup> Ma tauda hesiyage tetelinaina talohatotoweya, Keliso 'ina 'amasa kelosemo 'oina weyahina, eema meYudiya silogwahateya ma wete tomiya ganamuli si'ahwa ginaula bwagabwagaeya. <sup>24</sup> Ma hesi tauda Yehoba 'ana tohemisao 'ihesinuwanegita boda Yudiya ma hali bodao 'oidiyega, ma Keliso 'oinega Yehoba 'ina waiwai ta 'ina sanapu 'i'ebwaegita. <sup>25</sup> Weyahina to'aha Yehoba 'ina paihowa we'awe'ana bo 'i'iuna, tomota tauda 'ida waiwai madouna 'ihewaiwai sineya.

<sup>26</sup> Ma tasigwao, wanuwatuhuyahi 'abehega taudi Yehoba 'ihesinuwanediya 'oimiyega, baibaiwadi geya bale'u 'ana tosanapuwao, nuwana tohewaiwaiyao, nuwana 'ana babadao. <sup>27</sup> Ma hesiyage baibaiwadi yauyauleidi 'ihesinuwediyaya ma yauyauleidiyedi bale'u 'ana tosanapuwao si'abihedeba mwadinidiya, ma wete bale'u 'ana tobeluwao Yehoba 'ihesinuwediyaya ma taudi wete tohewaiwaiyao sihewaiwai sinediya. <sup>28</sup> Ta wete gogo gabulena Yehoba 'ina paihowa si'ahwa ginaula bwagabwagaediya, ma hesi Yehoba 'ina paihowao 'oidiyega 'idi ginaula mabwaiyana 'i'ahu sepalediya. <sup>29</sup> Coinega geya 'eta wete loheya sowasowahina ma 'igwae hane Yehoba matana. <sup>30</sup> Weyahina Yehoba tauna 'ina paihowega Yesu Keliso mahetedai tahe'aigeda, 'oinega Yehoba 'ina sanapu Yesuina 'ilagu balaheya 'oida, weyahina Yesu tauna wahina 'ipwaoliyeya weyahida, ta 'oinega 'i'abihe 'ehaugita ma 'i'abihe dumwalugita.

<sup>31</sup> Buki He'asisi 'ina hepwaile ginaula bewa weyahina 'igwaeya, “Ceguma taiya nuwanuwana ma 'ihewatu, 'ida Badamo 'ida hepwaile.”

## 2

### *Paulo 'ina guguya*

<sup>1</sup> Tasigwao, wanuwatuhi tutaina mwalo Yehoba tetelina ya'eweyawa ma yahepwaiweya 'oimiya, geya 'igu gwae waiwaiyega, gide 'abehega taugu tosanapu moisa. <sup>2</sup> Ta hesi nuwanuwagu ma Yesu Kelisomo weyahina yada guguya 'oimiya tauna silohe'amasiya kelose 'oina. <sup>3</sup> Coinega 'igu latuma 'oimiya gide towe'a, ma'igu dedela ta ma'igu 'ateyoho. <sup>4</sup> Ma wete 'igu guguya 'oimiya geya gwae waiwai nuwana sanapu 'oidiyega, ta hesi Yaluyaluwa Tabuna 'ina waiwaiyega. <sup>5</sup> Coinega 'igu guguyaina wahesagoheya ma wada hemisae 'abehega geya tomota 'idi sanapu 'oinega, ta hesi Yehoba 'ina waiwaiyega.

### *Sanapu moisa*

<sup>6</sup> Sanapu moisa Yehoba 'oinega yahehpwaile tohemisa pa'alidi 'oidiya, ma hesi geya gogo gabulena bewa 'ana sanapu bo toloinao bewa tuwa 'idi sanapu, taudi simiyamiya tuta to'uto'upana tuwa. <sup>7</sup> Ma hesi sanapuina Yehoba 'oinega mwalo dahwadahwaina, ta bewa tuwa 'i'abilatuheya, weyahina muliyetega ma gogo gabulena 'ihemasaleheya, nugeta nuwanuwana ma 'ida 'ebyaliyayaina 'ida 'ebwaegita. <sup>8</sup> Ta gogo gabulena bewa 'ana toloinao sanapuina geya sisanasanapu, ma 'eguma nuwana sida sanapu nugeteya, sahena 'ida Bada galewega silolohe'amasi kelose 'oina.

<sup>9</sup> Ta hesi 'ida yaliyayaina weyahina Buki He'asisi 'ina hepwaile 'igwaeya,

“Sahena tagwaegwae Yehoba 'ana tohelauwao 'adi lema bwebwe'ana hedadena 'i'atububuya. Geya 'eta loheya 'ida 'iteya bo 'ihesagohe ma 'ida nuwasabwalena lemaina, weyahina bwebwe'ana hedada.”

<sup>10</sup> Ta hesi Yaluyaluwa Tabuna 'oinega Yehoba sanapuina 'i'abilatuheya 'oida, weyahina Yehoba Yaluyaluwana ginaula mabwaiyana 'isanapudiya. Coinega Yehoba 'ina nuwatuhi dahwadahwaidi wete 'isanapudiya. <sup>11</sup> Tanuwatuhuyahi tauda tomota weyahida, 'eguma taiya loheya ma'ina nuwatuhi dahwadahwaina loheyaina tauna yaluyaluwana 'isanasanapu hile. Gidemusa wete Yehoba Yaluyaluwana 'iboinamo 'ina nuwatuhi 'isanasanapu hile. <sup>12</sup> Yehoba Yaluyaluwana geya gogo gabulena yaluyaluwadi gide, ma hesi Yehoba 'i'ebwaegita Yaluyaluwanaina, 'oinega tanuwa sabwalena 'ina helauwedi taudi 'iheguyaiyediya.

<sup>13</sup> Coinega 'ida gwae, nuwana 'ida he'ita, geya gogo gabulena 'idi sanapu 'oinega, ta hesi Yehoba Yaluyaluwanega. Coinega taiyewedi taudi Yaluyaluwanaina 'oidiya 'imiyamiya sowasowahidi ma gwaeyedi sihesagohedi ma wete sisanapudi. <sup>14</sup> Ta hesi 'eguma geya, geya'abwa wete sisanasanapu, weyahina 'oidiya 'abehega ginaula yauyauledi tuwa. Coinega geya sowasowahidi ma ginaulaedi sisanapudi, weyahina Yehoba Yaluyaluwana geya 'i'abihenuwa sabwalenidi. <sup>15</sup> Ta hesi tauda ginaula mabwaiyadi tasanasanapudi, to'aha bwebwe'ana ma to'aha galana, 'oinega geya 'eta taiya sowasowahina ma 'i'ahwa galagalaegita.

<sup>16</sup> “Moisa, geya 'eta taiya Yehoba 'ina nuwatuhi 'isanapu ma 'abehega 'ida he'ita,” ma tauda hesi Keliso 'ina nuwatuhi 'oinega tanuwanuwa.

### 3

#### *Yehoba 'ina topaihowao*

<sup>1</sup> Ma tasigwao, geya sowasowahina ma sanapu moisa yahehepwaile 'oimiya, weyahina yaluyaluwami geya simatuha, ta 'imi nuwatuhi 'abwa tuwa gogo gabulena 'idi nuwatuhi gidemusa. Weyahina 'omi wahegaina tuwa Keliso 'ana hemisa 'oina, gide sedaseda 'i'iudi. <sup>2</sup> Coinega geya sowasowahimi ma 'e'ahai ya'ebwaegomi ma hesi susumo 'oinega yahe'aigomiya, weyahina mwalona ma nige geya sowasowahina 'e'ahai wa'ai. <sup>3</sup> Moisa, mumugami 'abwa tuwa gogo gabulena gidemusa, weyahina 'abwa wahe'ohe'ohe ma wahe'ipi'ipi tuwa. <sup>4</sup> Ta tupwami wagwae, “Tauma Paulo 'ina boda.” Ta tupwami wete wagwae, “Tauma Apolosa 'ina boda.” Cimi gwaeyedi gidemusa gogo gabulena 'idi gwae.

<sup>5</sup> Togidega taugu ma Apolosa weyahima wahehe'ohe'ohe? Tauma topaihowa tuwa, 'ida Bada weyahina. Cida Badaina 'ima paihowa 'i'ebwaemaiya hagadi ma hagadi 'apaipaihowadi, ma 'oinega 'omi Keliso wahemisaeya. <sup>6</sup> Taugu 'igu paihowa todauna tuwa, ma Apolosa to'itayahi. Ma Yehoba hesi 'iboimo 'ina waiwaiyega 'e'ahai 'iyada. <sup>7</sup> Coinega Yehoba 'iboimo tahepwatuwe, ma tauma sahena. Weyahina tauma todauna ma to'itayahina. <sup>8</sup> Ma hesi 'abwa tauma tanoha 'ana topaihowao 'ama maisa 'aigeda 'aigeda 'ada loba gidemusa 'ima hetapewa 'ana madou. <sup>9</sup> Bewa tuwa Yehoba ba'idamai 'ina tanoha 'apaipaihowa, ta 'ina tanohina beno 'omi tomota tuwa. Ma wete 'omi Yehoba 'ina hada.

<sup>10</sup> Weyahina Yehobaina 'ihelauwegauwa ma 'ihesumanegauwa ma 'abehega 'ina to'abi hada, 'oinega 'ohola yalagu bwaibwainidiya ma 'oinega tupwadi topaihowa 'oholaedi 'oidiya ma si'abi, 'ilobwainidiya ma sida 'abi bwaibwaina.

<sup>11</sup> Cida 'oholaina 'imiyamiya, tauna Yesu Keliso, 'oinega geya sowasowahina ma hali 'ohola tahetoholo. <sup>12</sup> Ma hesi 'oholaina tabwanina 'ida yowayowana talagudi. Tupwadi tomota 'idi yowayowana bwebwe'adi si'ewedima, gidemusa 'ulabwa nuwana sagumo nuwana kasikasi, ma tupwadi 'idi yowayowanedi we'adi si'ewe'ewedima, gidemusa keipoki bo 'aulaha bo mulumulu. <sup>13</sup> Coinega 'abwa bwa'omatana 'ana sabwelo 'oina 'ida Badaina hadaedi 'ihadadadi ma 'ida tohodi, nuwana bwebwe'adi bo galadi.

<sup>14</sup> Taudi si'abi bwaibwaina 'adi maisa si'ewa. <sup>15</sup> Ma taudi 'idi 'abi galadi, 'idi hadaedi 'igabu yahuledi ma loheloheyamo 'i'abihetedi, ma gesowana 'eta wete 'idi

toawatobwa 'itupwatupwa. <sup>16</sup> Eema wanuwatuhuyahi 'abehega tauda Yehoba 'ina Hada He'asisi, weyahina Yehoba Yaluyaluwana 'oida 'imiyamiya. <sup>17</sup> Ceguma taiyawedi Yehoba 'ina hadaina si'abihegaleya, Yehoba wete 'ida 'abihegaladi. Weyahina 'ina hadaina 'asi'asilalana ma taudi si'abi hegaleya. Cina hadaina tauda.

<sup>18</sup> Gesowana taiya 'owa 'uboi 'u'abowego 'abehega 'owa 'aigeda tosanapu, weyahina 'eguma bale'u bewa 'ana sanapumo 'usanapuya, 'ilobwainegowa ma sanapuina 'ulogwahate ma 'oinega sanapu moisa Yehoba 'oinega 'uloba. <sup>19</sup> Weyahina sanapu bewa bale'uwa gide yauyaule Yehoba matana. Weyahina Buki He'asisi 'oina 'ihepwaila gidemusa 'igwaeya,

“Yehoba tosanapuwo 'i'onediya ma sida hesilae siboi 'idi gomanega.”

<sup>20</sup> Ma wete 'igwaeya,

“Badaina tosanapuwo 'isanasanapudi 'abehega sinuwatuhu besobeso.”

<sup>21</sup> Ma sahena wagwaegwae hanehane 'imi tohanugetaowedi bale'uwa weyahidi, weyahina Keliso ginaula mabwaiyadi 'i'ebwae pwaigomiya. <sup>22</sup> Gidemusa taugu ma Apolosa ma Pita wete 'ilagumaiya 'ami to'abihetenao, ma bale'u wete mabwaiyana 'i'ebwaegomiya, ma wete yawasimi ta 'imi 'amasa, wete ginaula mabwaiyana tuta bewa 'oina ma tuta sinaonaoma 'oidiya 'i'ebwaegomiya. <sup>23</sup> Weyahina 'omi Keliso 'ina tomotaiyao, ta Kelisoina Yehoba 'oinega.

## 4

### *Keliso 'ana tohepwailao 'idi miya mwau weyahina*

<sup>1</sup> Sowasowana ma wasanapumai 'abehega tauma Keliso 'ina topaihowao, weyahina tetelaina Yehoba 'oinega mwalo dahwadahwaina ma bewa tuwa 'ahehepwaille 'oimiya.

<sup>2</sup> Cima paihowaina 'oina 'ilobwaineya ma 'apaihowa bwaibwaina. <sup>3</sup> Cigu paihowa bewa weyahina, 'eguma wa'ahwa bwebwe'anegauwa bo nuwana wa'ahwa galagalaegau, 'imi nuwatuhuwedi bo hali tomotaiyao 'idi nuwatuhu weyahigu, geya to'aha 'oiguwa. <sup>4</sup> Ta wete taugu 'igu nuwatuhu 'abehega 'igu paihowaina bwebwe'ana, ma hesi geya yasanapu bwaibwaini, nuwana bwebwe'ana bo galana, Yehobamo 'isanasanapu.

<sup>5</sup> Bewa tuwa sahena 'eta taiya 'iyanao 'oidiya 'ihesihsinuwa 'abehega bwebwe'adi bo galadi, weyahina 'abwa 'ida Bada 'inaoma ma 'iboinamo 'iloinaegita. Ta 'ina loinaina dumwaluna weyahina 'ida nuwatuhu galadi 'ateda Yehoba 'i'abilatuhedi ma 'iloinaegita, eema 'ida nuwatuhu bwebwe'adi 'i'abilatuhedi, ma weyahidi 'i'ahwa bwebwe'anegita.

<sup>6</sup> Cebe'ita bewa taugu ma Apolosa 'oimega wa'ita, ma 'oinega 'eda'eda bwebwe'ana sahena wa'ebe'ebesine, ma sahena wagwaegwae hanehane 'imi tohanugetao weyahidi, 'abehega 'aigeda 'imi tohanugeta 'ibwebwe'ana hedada. <sup>7</sup> Sahena wanuwanuwa hanehane ma 'abehega 'iyamiyao wabwebwe'ana sinediya, weyahina to'aha bwebwe'ana 'oimiya simiyamiya mabwaiyana Yehoba 'oinega walobeya, 'oinega sahena wagwaegwae hanehane.

<sup>8</sup> Cana 'ita geya bwebwe'ana weyahina wagwaegwae 'abehega wahewaiwai pwaiya, ma ginaula mabwaiyadi sowasowahimi, 'oinega wala'wemaiya. Moisa, nuwanuwagu ma wada hewaiwai ma tapwalolo 'oinega wada hewasawasa, ma 'oinega 'omi ma tauma tada hemahemahetena.

<sup>9</sup> Ta hesi bewa tuwa 'ana 'ita gide Yehoba 'ana tohepwailao tauma miya mwauna 'i'ebwaemaiya, gidemusa taudi paipaidi sabi lohe'amasidi, ma 'oinega aneloseyao ma lo'heloheyao ma ginaula mabwaiyana si'e'ebubumai. <sup>10</sup> Ta 'ama 'ita gidemusa yauyauleima Keliso weyahina, ma hesi 'ami 'ita gidemusa taudi Keliso 'ana tosanapuwo, weyahina tauma we'awe'aima ma 'omi waiwaimi, ta ma'ami he'asisi, ma tauma hesi ma'ima debamwadina. <sup>11</sup> Tuta baibaiwana ma'ama gomale ta ma'ama tani'o yahala, ta geya 'ama 'ale'omo, ma wete geya 'ima hadamo, 'oinega 'ama 'ita gide tomiya nanaewa.

<sup>12</sup> Tauma nimamega 'apaipaihowa, ma 'eguma taiyawedi si'ahwa galagalaemai gwae helauwega 'ahemaisadi, ma wete 'eguma si'abi hemuyamuyaemai tuwa 'a'alama'i'ita.



<sup>13</sup> Ta wete 'eguma sigamwasowalemaiya, ma'ima nuwa bwebwe'ana 'ahe'iya'iyaguwedi. Moisa, tauma gide mohomoho, 'oinega tomota silogwahatemaiya.

<sup>14</sup> Gwae bewa yaleleyawa geya 'abehega ya'abihedebea mwadinegomi, ma hesiyage sabi hedumwalugomi gide natugwao moisa 'omi. <sup>15</sup> Moisa, 'imi tohe'itao boda hedada Keliso 'ina 'eda'edao weyahina, ma yaboigumo tuwa tamamiu, weyahina tetela bwebwe'ana 'ana guguya 'oinega ya'ewegomiya Yesu Keliso 'oina. <sup>16</sup> Coinega natugwao, ya'ahwanoi 'oimiya ma wahe'au'aunawegau.

<sup>17</sup> Ma natugu Timoti yahewasaeyawa ma 'ane 'ihepwaile 'oimiya, 'igu hemisa Keliso 'oina weyahina, gidemusa tohekalesiyao yahe'itediya 'asa mabwaiyana 'oidiya, ta 'oinega sahena wanuwauwa naidedi. Timotiina yahelauweya ma yahemiseya, weyahina 'ida Bada 'ina paihowa 'oina 'ihetapewa hedada, ma bewa tuwa 'inaonaowa 'oimiya.

<sup>18</sup> Ta hesi tupwadi 'oimiyega sinuwatuhuya 'abehega taugu sahena yanaonaowa. Coinega sinuwauwahane ma sigagagagasa. <sup>19</sup> Geya! Ma hesi 'eguma 'ida Bada 'itagwala, 'abwa yalomwayamwayau ma yanaowa 'oimiya, ma taudi togagasaedi yatohodi geya 'abehega 'idi gwaemo 'oidiyega ma 'idi paihowao wete ya'itadi, waiwaiidi bo we'awe'adi. <sup>20</sup> Weyahina Yehoba 'ina 'ebeloina 'oina geya gwae namo, ma hesi waiwaiyega.

<sup>21</sup> Togidega 'imi nuwatuhu? Ma'igu loina pa'alina yanaowa, bo ma'igu helau ma ma'igu nuwabiga yanaowa? Waboi wahesinuwa.

## 5

### *MeKolinita 'idi pui*

<sup>1</sup> Cimi pui yahesagoheya weyahina 'aigeda loheya 'oimiyega tamana mwanena mahetena sipuiya. Pui beno gala hedada. Taudi tomiya ganamuli gogo baibaiwana 'oidiya geya gidemusa sida mumuga 'esa. <sup>2</sup> Sahena wanuwauwahane, ma hesi mumuga bewa weyahina wadou, ma topuiina 'imi boda 'oinega wapa'i.

<sup>3</sup> Bewa tuwa taugu yamiya bwagabwaga, ma hesi 'igu nuwatuhu 'oimiya 'imiyamiya, gidemusa taugu mahetemi, 'oinega topuiina 'ana loina 'oimiya yahepwaileyawa, beno 'ida Bada Yesu saninega.

<sup>4</sup> Cana loina bewa gidemusa, miya hegogona wapaihowa 'ida Bada Yesu saninega, ta 'igu nuwatuhu wete mahetemi ma Badaina Yesu 'ina waiwaiyega. <sup>5</sup> Topuiina wa'ebwae Seitani 'oina ma 'abehega wahina 'i'abihegala ma 'oinega muliyetega 'ida Bada 'ina sabweloina 'oina loheyaina yaluyaluwana 'ida 'abihete.

<sup>6</sup> Ma sahena wanuwauwahane, ma hesi wanuwatuhuyahi 'abehega 'eguma puiina muhemuhena 'oimiya 'imiyamiya nata mabwaiyami 'i'abihe galegomi. <sup>7</sup> Coinega puiina 'oimiyega wapa'i ma waheboda bwebwe'ana, weyahina Keliso 'ina 'amasa 'oinega 'ideuligemi ma Kelisoina tauna gidemusa 'ida Hataona Guyaina bawaina, tuwa weyahida silohe'amasiya. <sup>8</sup> Eeta 'ida guyai tapaihowa, geya ma'ida 'eda'eda miyamiyana galana 'oinega, ta hesi 'eda'eda bwebwe'ana ma dumwadumwaluna 'oidiyega.

<sup>9</sup> Mwalona 'imi leta 'aigeda 'oina yahepwaila 'abehega geya'abwa topuiyedi mahetemiya wa'ahwa 'iya'iyagu, <sup>10</sup> ma hesi geya yaloiloina 'abehega tologwaliyedi ma tobwatobwa 'ana tohamwao ma toyagahao ma tolonabwasuwao walogwahatedi, weyahina bale'u bewa 'oina taudi gidemusa baibaiwa hedade, geya sawasawahida ta'ebesinedi.

<sup>11</sup> Ma bewa tuwa 'igu loina 'oimiya gide, 'eguma taiya 'ihekalesiya ma 'ilogwali, 'eguma tomata tobwatobwa, bo tolonabwasuwa, bo toheliya, bo tonuma bwasi waiwai, bo toyagaha, geya'abwa wa'ahwa 'iya'iyaguwe bo nuwana mahetemi wa'ai.

<sup>12</sup> Ta 'igu 'ebeloina tohekalesiyaomo 'oidiya, ma geya'abwa hali boda 'oidiya. <sup>13</sup> Weyahina taudi muliyetega Yehoba 'iloinaedi, ma hesi tologwaliina 'aigeda 'omi 'imi boda, 'oinega 'ilobwaineya ma waloinae, ma 'oimiyega wapa'i.

## 6

### *Yatala weyahina*

<sup>1</sup> Caigeda wete ginaula 'ebedeba mwadina 'oimiya 'imiyamiya, beno 'imi yatala 'oidiya toloinaedi taudi geya totapwalolo 'oidiya watautauya, ma hesiyage 'ilobwainegomiya tohekalesiyaowedi 'oidiya watauya.

<sup>2</sup> Wanuwatuhuyahi 'abehega tauda Yesu 'ana tohemisao muliyetega ginaula baibaiwadi tada loinaedi, 'oinega sawasawahimi ma ginaula 'i'iudi yatala 'oidiya waloinaedi.

<sup>3</sup> Cabwa galewa aneloseyedi wete taloinaedi, 'oinega bewa tuwa sawasawahida ma paihowa bale'uwa taloinaedi.

<sup>4</sup> Geya'abwa watautauya toloinao taudi geya sihekalesiya 'oidiya. <sup>5</sup> Beno ginaula 'ebedeba mwadina. Ma hesi 'eguma taiya 'oimiyega nuwanuwana ma 'iyana mahetena siyatala, 'ilobwainediya ma 'aigeda tosanapu boda hekalesiya 'oinega si'ebesa ma tauna yatalaina 'iloina. <sup>6</sup> Comi 'imi paihowa geya bwebwe'ana, weyahina taudi geya Keliso 'ana tohemisao matadiya wayatayatala.

<sup>7</sup> Comi tohekalesiyao 'eguma wayatala, 'ana 'ita geya bwebwe'ana, ma hesi 'eguma mwau 'oimiya sihapwehapwesa, 'ilobwainegomiya ma 'ami to'e'abo'abowedi wahe'alamai'itanedi ma geya'abwa waheheyataladi. <sup>8</sup> Ma hesiyage 'omi tohekalesiyao tasimiyao wa'abo'abowedi ta 'oidiyega wayagayagaha. <sup>9</sup> Ceguma mumugami gidemusa geya'abwa Yehoba 'ina 'ebeloina 'oina waluhuluhu, weyahina topuiyedi mabwaiyadi Yehoba 'i'etobodediya, gidemusa tolonabwasuwaedi ma tologwaliyedi, toganawalaedi wahiwahinedimo matasidiyao sipaipaihowa, loheloheyadimo wete mahetediyao sipaipaihowa, <sup>10</sup> ma toyagahao ma tomata tobwatobwaedi, ma tonuma bwasi waiwai, ma tolomugiyao ma to'e'abo'abowao.

<sup>11</sup> Weyahina tupwami mwalona mumugami gidemusa, ta hesi tuwa Yehoba 'ideuli pwaigomiya, ta wa'ehauwa, weyahina 'ida Bada Yesu Keliso saninega ma Yaluyaluwa Tabuna 'ina paihowa 'oinega 'i'abihedumwalu pwaigomiya.

#### *Ganawala weyahina*

<sup>12</sup> Gwae 'aigeda yahesagoheya tomota tupwadi sigwaeya 'abehega, "Mumuga mabwaiyana sawasawahina yapaihowadi." Moisa tuwa, sawasawahida ginaula mabwaiyana tapaihowadi, ma beno tuwa 'abehega mumugaedi geya sida lemegita, ta hesi ma'idi waiwai ma sawasawahina sipaigita.

<sup>13</sup> Wanuwatuhuyahi 'e'ahai weyahina. Moisa, 'e'ahai gamwada weyahina, ma wete gamwada 'e'ahai weyahina, ma hesi muliyetega 'e'ahai ma gamwada Yehoba 'ilohegumwalidi. Ma wahida Yehoba 'i'ebwaegita geya ganawala weyahina, ma tauna hesiyage weyahina, ma tauna tauda weyahida, <sup>14</sup> ta wete tauna 'ina waiwaiyega 'amasega 'i'abihe toholo hilegita, gidemusa 'ida Bada Yesu 'amasega 'i'abihe toholo hileya.

<sup>15</sup> Wahida beno Keliso yahuna, 'oinega geya'abwa taiya 'owa toganawala maheteu wamumuga galagala. <sup>16</sup> Weyahina 'eguma taiya loheya toganawala mahetena sipui, beno silo'aigeda pwaiya, gidemusa Buki He'asisi 'igwaeya, "Siteluwa silo'aigeda, gidemusa tuwa wahidi 'aigeda."

<sup>17</sup> Ta hesi 'eguma 'ida Bada maheteu walo'aigeda, yaluyaluwami wete silo'aigeda.

<sup>18</sup> Sahena waganawala, weyahina ganawala geya gidemusa hali mumuga galadi. Moisa, hali mumuga galadi geya wahida si'abihe galadi, ma ganawala hesi wahida 'i'abihe galadi.

<sup>19</sup> Coinega wanuwatuhuyahi 'abehega wahida Yaluyaluwa Tabuna 'ina hada, weyahina Yaluyaluwa Tabuina Yehoba 'oinega 'itauyama ma 'aloda 'imiyamiya, ma geya'abwa taudamo taloiloinegita, ma hesi Yehoba 'ida loinegita. <sup>20</sup> Weyahina 'ihemaisa pwaigita, 'oinega 'ilobwainegita ma wahida 'oidiyega sanina ta'abihe madou.

## 7

#### *Hai weyahina*

<sup>1</sup> Nuwatuhuina hai weyahina 'igu leta 'oina wahesilaleya. Cigu hemaisa bewa: Bwebwe'ana tuwa 'eguma meloheyadi geya'abwa sihaihai. <sup>2</sup> Ma hesi geya sawasawahimi ma mabwaiyami gidemusa wamiyamiya, weyahina baibaiwa hedade taudi

wewelohe sipaipaihowa besobeso. Nuwana 'ilobwainegomiya wa'elohai ma 'aigeda 'aigeda mamwanena, ma geya'abwa paihowa besobeso 'imadomadou 'oimiya.

<sup>3</sup> Ma 'oinega loheloheyaemi mwanemiyao 'idi nuwatuhu wamuliyedi. Wete gide 'omi wahiwahine mwanemiyao 'idi nuwatuhu wamuliyedi. <sup>4</sup> Weyahina 'eguma wahine 'ihai, geya sawasawahina ma tauna wahina 'iloinae ma hesiyage loheya 'iloinae. Wete loheya, geya sawasawahina ma tauna wahina 'iloinae ma hesiyage wahine 'iloinae.

<sup>5</sup> Ma wete geya'abwa wa'eno'eno wasiwasi mwanemiyao 'oidiyega. Beno tuwa 'eguma tohai siteluwaedi 'idi nuwatuhu mahemahetena ma sabwelo tupwadimo 'oidiya sida 'ahwa'ahwanoi Yehoba 'oina ma muliyetega wete si'enoluwa hila, ta geya'abwa wamiyamiya wasiwasi hedade tabu ta nuwatuhu dahwanaedi 'oimiya sihapwesa ma 'oidiyega Seitani 'itoho ma 'imi hai 'i'abihegaladi.

<sup>6</sup> Ceguma nuwanuwami ma wahi, bwebwe'ana, ta geya'abwa yaloinaegomi 'abehega mabwaiyami wahi, <sup>7</sup> weyahina nuwanuwagu 'abehega geya'abwa waihai, gidemusa taugu geya yahai, ma hesi mabwaiyada 'ada lina hagana ma hagana Yehoba 'i'ebwae pwaigita, ma tupwama 'amiyamiya wewelohe ma'ima yaliyaya, ta tupwami waihai.

<sup>8</sup> Coinega 'omi wewelohe ma hiwahiwape 'ami henuwalagu bewa, 'eguma geya wahi, nuwana bwebwe'ana tuwa gide wamiyamiya, taugu gidemusa. <sup>9</sup> Ma 'eguma geya sawasawahimi wa'alama'litanegomi, ta nuwanuwami wahi, beno bwebwe'ana wete, wada hai tuwa, ma 'oinega geya'abwa nuwatuhu dahwana 'i'abi'abihe galegomi.

<sup>10</sup> Ma 'omi tohai yahepwaila 'oimiya geya taugu 'igu lina, ma hesi Badaina 'ina lina 'abehega sahena wahine mwanena 'isa'isa'ile. <sup>11</sup> Ma hesi 'eguma taiya wahine mwanena mwalona 'isa'ileya 'ana 'eda 'eluwa bwebwe'adi simiyamiya, beno 'abwa wahineina 'iboi 'imiyamiya ma sahena 'ihaihai, ta bwebwe'ana wete 'eguma 'ihila mwanenaina 'oina. Ma hesi loheloheya mwanediyao sahena sisa'isa'iledi.

<sup>12</sup> Bewa wete nuwatuhu tupwana taugu 'oiguwega, geya 'ida Badaina 'ina loinega, beno 'eguma taiya 'owa loheya mwanu geya 'ihemisa Yehoba 'oina, ta 'ina nuwatuhu gidemusa ma maheteu wamiyamiya tuwa, geya'abwa 'usa'isa'ile. <sup>13</sup> Wete gidemusa 'eguma 'aigeda wahine 'owa mwanu geya 'ihemisa Yehoba 'oina, ma nuwanuwana maheteu tuwa wamiyamiya geya'abwa 'usa'isa'ile.

<sup>14</sup> Ceguma taiya loheya bo wahine mwanena geya 'ihemisa Yehoba 'oina, ma hesi mahetena tuwa simiyamiya, nata tohemisaina mwanena 'i'abihe bwebwe'ane, ma 'oinega natudiyao tupwa 'asi'asilalaina 'oina simiyamiya. Ta 'eguma sisa'ila beno natudiyao 'idi miya 'igala. <sup>15</sup> Ta 'eguma taiya 'owa mwanu geya Yehoba 'oina 'ihemisa ma nuwanuwana ma 'isa'ilego, 'u'abisine ta sahena 'unuwanuwahi. Weyahina Yehoba nuwanuwana wamiya daumwala, ta genuwana he'ohe'ohe. <sup>16</sup> Cowa loheya bo wahine 'abwa togidega mwanu 'u'abihe nuwabui 'ese, 'eguma 'u'abiyahi? Geya tasanapu, 'awa?

#### *Cida 'ebemiya ma 'ida 'ebe paihowa Yehoba 'iloiloinaedi*

<sup>17</sup> Cida paihowa Yehoba 'iheguyai pwaiya 'aigeda 'aigeda 'oida, 'oinega 'ebe paihowaedi 'oidiya tada miyamiya. Bewa gidemusa 'igu lina tohekalesiyao tupwa mabwaiyana 'oidiya.

<sup>18</sup> Ceguma taiya 'owa gwama Yudiya ma meYudiya 'ida 'ila'ilala mwalo si'upweya 'wapiu ma muliyetega Yesu Keliso 'oina 'uhemisa, sahena 'unuwanuwagala meYudiya 'ida 'ila'ilalaina weyahina. Ta wete 'eguma geya 'ila'ilalaina 'oiuwa, geya'abwa 'upwaina 'u'ewa, <sup>19</sup> weyahina 'upwaina geya ginaula madouna, ta ginaula madouna hesi Yehoba 'ina lina 'adi hematamatana. <sup>20</sup> Sahena 'imi miya bo 'imi paihowa bale'uwa weyahidi wanuwauwagala ma 'abehega waluhu hali paihowa 'oina. <sup>21</sup> Ceguma taiya 'owa 'aigeda loheya madouna weyahina 'upaipaihowa tutaina 'uhekalesiya, sahena 'unuwanuwagala 'ino paihowaina weyahina, ma hesi 'eguma 'ino taubadaina 'abwa 'itagwalego ma 'uhila 'ino 'asa, bwebwe'ana tuwa 'uhila. <sup>22</sup> Moisa, topaihowa bale'uwa 'eguma Keliso 'oina sihemihemisa, Yehoba sawasawahina 'idi puiyao 'oidiyega 'ilihasidi, ta wete loheya

madoudi 'eguma Keliso 'oina sihemisa, sihe'ali'e tauna weyahina. <sup>23</sup> Weyahina Kelisoina 'ihemaisegita ma tauda 'ina bodao. Gesowana watagwalegomi hali taubadao 'oidiya.

<sup>24</sup> Ciyagwao, gesowana 'imi 'ebe miyaina walogwahatedi. Ceguma to'aha 'imi 'ebemiya tutaina Yehoba 'ibwauwegomiya ma wahekalesiya, 'ebemiyaedi tuwa 'oidiya wada miyamiya, Yehoba mahetemi.

*Taudi gumalaulau ma hiwahiwape 'adi loina*

<sup>25</sup> Geya 'aigeda wete loina Yehoba 'i'ebwaegauwa gumalaulau taudi geya sihai weyahidi, ta hesiyage 'ihelauwegauwa ma nuwatuhu dumwalunega 'i'ebwaegauwa loina weyahina. <sup>26</sup> Bewa tuwa tuta 'ebe hesilae 'ida miya 'oina, tuwa 'abwa 'oina tamiyamiya. <sup>27</sup> Ma 'eguma taiya 'owa 'uhaiya, mamwaneu tuwa wamiyamiya. Ta 'eguma taiya 'owa geya 'uhai, gesowana wete wahine 'u'ebe'ebese. <sup>28</sup> Ma hesi 'eguma loheya 'ihai beno geya pui, wete 'eguma gumalaulau 'ihai beno geya pui, ta hesi haihainidi 'idi paihowa madouna, 'oinega nuwanuwagu ma ya'abihe malamalaiyegomi.

<sup>29</sup> Weyahina tuta mwauna bale'u 'ihahoho pwaiya, ma 'omi mehahai 'ilobwainegomiya mumugami gidemusa taudi geya sihai. <sup>30</sup> Ta 'omi todou wamumuga gidemusa taudi geya sida douwa, ta wete 'omi toyaliyaya wamumuga gidemusa tonuwagala. Wete 'omi tohegimwane wamumuga gidemusa wewelohedi, <sup>31</sup> ma wete gesowana bale'u bewa ginaulaedi weyahidi wanuwatuhu hedade, weyahina tuta 'i'iuna sisawala ma bale'u bewa 'igumwala.

<sup>32</sup> Nuwanuwagu ma gesowana ginaula bale'u weyahidi wanuwatuhu hedade, ma hesi mumugami gide taudi geya sihai. Weyahina taudi geya sihai Yehoba 'ina paihowamo weyahina sinuwanuwatuhu madouna, ma nuwanuwadi Badaina si'abihe yaliyaya.

<sup>33</sup> Ta taudi haihainidi bale'u ginaulaedi nuwanuwadi ma 'abehega 'oidiyega mwanediyao si'abihe yaliyayadi. <sup>34</sup> Coinega geya sawasawahina ma 'eda 'eluwaedi 'oidiyega sitautauya. Ta wete gumalaulau ma wahiwahine taudi geya sihai sawasawahidi ma Yehoba weyahina sinuwatuhu madouna, ma 'oinega wahidi ma yaluyaluwadi si'abi he'ehaudi, ma hesi haihai nidi sinuwanuwatuhu ginaula bale'u weyahidi ma 'abehega 'oidiyega mwanediyao si'abihe yaliyayadi.

<sup>35</sup> Cigu hepwailla bewa 'oinega geya hai ya'ausi, ma hesi sabi 'abihetegomi, ma Yehoba 'ina paihowa 'oidiya wada paihowa bwaibwaina, ta gesowana hali ginaula ma hali ginaula weyahidi wanuwatuhu.

<sup>36</sup> Ceguma taiya loheya natuna gumalaulauina 'i'ausi ma sahena 'ihaihai, ma hesi 'eguma natunaina 'inuwapala, weyahina 'ihewahine pwaiya ma nuwanuwana ma 'aigeda loheya ba'idana sihai, tamana 'itagwala tuwa 'idi hai weyahina, weyahina hai geya ginaula galana.

<sup>37</sup> Ta hesi 'eguma loheya nuwana 'ipa'ala ma 'abehega natunaina sahena 'ihaihai ta 'eguma natunaina sawasawahina ma 'i'alama'i'itana ma geya 'ihai ta wete 'eguma geya taiya 'oidiyega 'inuwapala 'etobodaina weyahina, beno bwebwe'ana hedada, 'eguma gumalaulauina geya 'ihai. <sup>38</sup> Ceguma taiya 'ina gumalaulau 'itagwale ma 'ihai, beno bwebwe'ana, ta 'eguma 'i'etobode beno wete bwebwe'ana hedada.

<sup>39</sup> Ma 'eguma taiya wahine haihainina mwanena ba'idana sihe'aigeda pwaiya ta 'eguma loheya 'i'amasa, wahineina sawasawahina ma 'ihai hila. Ta hesi 'ilobwaineya Yehoba 'ina loheya 'aigeda mahetena sihai. <sup>40</sup> Ta yanuwatuhuya 'abehega 'eguma wahine 'iboi namo 'imiyamiya, ma sahena 'ihaihai hila, beno bwebwe'ana hedada. Nuwana Yehoba Yaluyaluwana 'ina nuwatuhu bewa gidemusa.

8

*Ce'ahaiina tomota si'ebwa'ebwae 'ebe hemisa 'abo'abo 'oidiya*

<sup>1</sup> Caigeda wete hesilala 'igu leta 'oina wahepwaiya pwaiya, beno pwaoliyedi nuwana 'e'ahaiyedi tomota si'ebwa'ebwaya 'idi 'ebe hemisa da'ule bo 'aiwe 'oidiya. Ginaulaedi 'idi 'abo wasanasanapu, ma hesi sahena wanuwatuhane 'imi sanapuina 'oina, ma

'ilobwainegomiya ma 'iyadao mabwaiyadi 'atemiyega wahelauwedi, weyahina helau ginaula madouna, ma sanapu hesi geya ginaula madouna.

<sup>2</sup> Ceguma tanuwatuhu 'abehega tauda tosanapu, beno geya tasanapu bwaibwaini, <sup>3</sup> ma hesiyage 'eguma Yehoba tahelauwe, tauda Yehoba 'isanapugita ma 'ihesinuwanegita.

<sup>4</sup> Ma 'e'ahaiina tomota si'ebwa'ebwae 'idi 'ebe hemisa 'abo'abowao 'oidiya, sowa-sowana ta'ai, bo geya? Cebe hemisa 'abo'abowedi geya 'ebe hemisa moisa, weyahina Yehoba 'iboimo 'imiyamiya, ma hali 'ebe hemisao ginaula besobeso.

<sup>5</sup> Ta tomota baibaiwadi sinuwatuhuya 'abehega 'ebe hemisao bo nuwana yabowahine baibaiwadi galewa ma bale'uwa simiyamiya. <sup>6</sup> Ma tauda Yehoba tasanapuya 'abehega Tamadaina, ma 'iboinamo, ma ginaula mabwaiyadi 'ipaihowediya, ma wete tauda 'ipaihowegita, tauna weyahina. Ta wete 'ida Bada Yesu Keliso tasanapuya 'abehega tauna 'iboimo, ma Kelisoina Yehoba 'ilemeya ma 'ipaihowegita, ma wete ginaula mabwaiyadi 'ipaihowediya.

<sup>7</sup> Tauda ma'ida sanapu, ma hesi tupwana tohekalesiyao 'idi sanapu we'awe'aidi, weyahina sihenualanaluwa 'abehega hali 'ebe hemisao wete 'ebe hemisa moisa, 'oinega 'eguma tomotaedi 'ebe hemisa 'abo'abowao 'adi pwaoli si'ai nata simatauta 'oidiya.

<sup>8</sup> Ma hesi wanuwatuhuyahi 'abehega geya 'e'ahai 'oinega Yehoba 'ida 'abihe bwebwe'anegita, weyahina geya 'eta 'e'ahai yaluyaluwada 'ida 'abihe bwebwe'aneya, bo 'ida 'abihegaleya. <sup>9</sup> Coinega 'e'ahai mabwaiyana sawasawahina ta'aidi, ma hesi wanuwatuhuyahi ma sahena 'ami he'ahe'asisiina wa'ai'ai tohekalesiyao we'awe'aidi matadiya, ma 'oinega wa'abi'abi hebe'udi.

<sup>10</sup> Weyahina 'eguma taiya 'owa 'usanasanapu 'abehega hali 'ebe hemisaowedi ginaula besobeso, ma geya 'aigeda 'idi waiwaimo, 'oinega 'eguma 'adiwa he'ahe'asisiina 'u'ai, ma tasiu 'aigeda 'ina hemisa we'awe'ana 'i'itago, nata tauna wete 'i'ai, ma hesi ma'ina 'ateyoho. <sup>11</sup> Moisa tuwa, 'owa ma'ino sanapu, ma hesi 'ino sanapu 'oinega 'abwa tasiuina we'awe'ana 'u'abihegala. Coinega wanuwatuhuyahi 'abehega Keliso 'i'amasa tasimiu we'awe'ana sabi 'abiheteina. <sup>12</sup> Ta 'eguma tasimiu we'awe'ana wa'abihebe'u beno 'imi pui Keliso 'oina.

<sup>13</sup> Ma taugu hesi genuwagu ma 'aigeda tasida ya'abihebe'u, 'oinega 'e'ahaiyedi yaguiपालेदिya moisa, ma sahena yalolotohodi, tabu ta 'oidiyega tasidao ya'abihebe'udi.

## 9

### *Keliso 'ana tohepwailao mumugadi*

<sup>1</sup> Sahena tomota sitohotoho ma siloinaegau, nuwana silomugiyegau, ma hesi wanuwatuhu 'abehega taugu Bada Yesu 'ina topaihowa 'aigeda, ma Badaina ya'ita pwaiya, ta he'ote'otetelina wete 'oimiya yahepwaiya, ma wahemisaeya. <sup>2</sup> Coinega wasanapugauwa taugu Yesu 'ana tohepwaila moisa. Ma tupwana tomota silomugiyegauwa 'abehega taugu geya Yesu 'ana tohepwaila. Ma geya! Comi wanuwatuhuyahi taugu 'igu lohatotowega 'ida Badaina 'oina 'imi hemisa walaguya.

<sup>3</sup> Ta bewa gide yagwae 'esa 'agu tolomugiyedi 'oidiya, <sup>4</sup> 'abehega taugu gidemusa taudi Keliso 'ana tohepwaila moisa. Weyahina tohepwailaedi taudi 'adiwa ta 'adi we'aha wa'ebwa'ebwaedi, 'oinega 'ilobwaineya ma taugu wete gidemusa wada 'ebwaegau.

<sup>5</sup> Ma wete taudi tohepwailaedi ta 'ida Bada Yesu tasinao ta Pita wete, 'idi sakowasi 'oidiya mwanediyao sitoetoedi ma wa'itayahidi. Coinega taugu wete 'eguma yahai ma mamwanegu 'ada sakowasi, 'ilobwaineya ma ba'idagu wa'itayahimai. <sup>6</sup> Taugu ma Banaba geya hesi 'oima gidemusa wada paihowa 'esa. Tauma 'aboi 'a'ita'ita yahimai, 'ima paihowa 'ana maisa 'oidiyega.

<sup>7</sup> Caigeda hesilala yahesilalegomi ma wanuwatuhu weyahina. Hesilalaina bewa: Tolo'alehao ta'eha 'oinega 'adi maisa silobalobadi? Gabemani 'oidiyega, bo siboidimo tuwa 'oidiyega? Wete 'aigeda 'igu hesilala: Ceguma loheya 'e'ahai 'ibeguli, ma 'eli'eli 'ana tuta, togidega nata 'e'enina 'i'ai bo geya? Caigeda wete 'igu hesilala: Togidega 'eguma



loheya ma'ina baweyao 'litayahinamo, ma geya 'aigeda 'ida hunuya 'ina guyai weyahina, to'aha 'ina 'itayahina 'ana bwebwe'ana?

<sup>8</sup> Cebe'ita bewa 'ida gogowega, <sup>9</sup> ma Mosese 'ina loina ba'idana sihemahemahetena, 'igwaeya,

“Ceguma bulumakau witi 'alona 'ipaipaihowa 'ilobwaineya ma witiyedi 'oidiyega 'ida 'ai.”

Yehoba geya 'inuwanuwatuhu madouna bulumakau weyahidi, <sup>10</sup> ta hesi 'igwaegwae 'ina topaihowao tauda weyahida. Loina bewa 'ilaguya ma tada hemisa ma 'abehega 'ima paihowa 'oidiyega 'ama 'e'ahai 'ada loba, gidemusa taudi todauna ta wete to'eli'eli sihehemisa ma 'e'ahaiyedi 'idi tanohega sida 'ai.

<sup>11</sup> Tauma wete gide yaluyaluwami 'adiwa 'adauna pwaiya, 'oinega 'ilobwainegomiya ma 'wapima 'adiwa wa'ebwaemai. <sup>12</sup> Hali tohepwailao wahe'aidi, 'oinega 'ilobwainegomiya ma wete wahe'aimai. Tuwa 'a'alama'i'ita madouna, weyahina tabu ta 'ahopala 'oimiya ma Keliso tetelina walogwahate.

<sup>13</sup> Ta wete Hada He'asisi 'ana topaihowao wanuwatuhuyahi tomota 'idi helauwao 'oidiyega 'adiwa silobaloba. Topwaoliyedi 'adiwa hebahebaiyedi 'ebepwaoli 'oina sihunuhunudi 'oidiyega si'ewa'ewadi, ma si'ai'aidi. <sup>14</sup> Yehoba 'ina loina bewa gide 'abehega Yesu Keliso tetelina 'ana tohepwailao 'adiwa sida lobadi 'idi paihowao 'oidiyega. <sup>15</sup> Ma hesi geya yahegwaegomi ma wahe'aigau, ma wete sahena 'imi letaedi yaleledi ma 'abehega wahe'aigau. Sahena yagwaegwae 'e'ahai weyahina. Ceguma gomaleyega ya'amasa, beno bwebwe'ana, weyahina genuwagu ma 'ami ya'ewadi. <sup>16</sup> Cigu paihowa bewa tetela bwebwe'ana 'ana hepwaile weyahina, ma geya 'abehega paihowaina 'oinega 'agu hepwaile yaloba, weyahina bewa tuwa 'igu paihowaina, ta 'ilobwainegauwa ma yapaihowa. Ma 'eguma yaguipaila nata mwau madouna 'oiguwa 'ilatu.

<sup>17</sup> Yehoba 'agu loina bewa 'ilaguya 'igu paihowa weyahina, ta geya taugu 'igu nuwatuhuwega, 'oinega sahena maisa yada 'ewa'ewa paihowaina weyahina.

<sup>18</sup> Beno tuwa yayaliyayamo weyahina tetela bwebwe'ana helauwega ya'ebwaegomi, ma hesi sahena yanuwatuhuhu maisa weyahina. <sup>19</sup> Ta sahena wete tomota 'agu loina silagulagu ma hesi tomota mabwaiyadi weyahidi yapaihowa ma yada 'abihetedi. <sup>20</sup> Yamumuga meYudiya 'idi mumugega ma 'oinega 'abehega meYudiya yada 'abihetedi, ma taudi Mosese 'ina loina simulimuliye, 'eguma mahetegwao 'amiyamiya yamumuga 'esa taudi gidemusa, ta 'abehega yalemedi. Ma hesi geya sowana loina yada tagwalegau.

<sup>21</sup> Ta wete taudi Mosese 'ina loinao geya 'oidiya 'eguma ba'idagwao 'amiyamiya yamumuga 'esa taudi gidemusa ma 'abehega yalemedi. Ta hesi geya'abwa 'agu loina Keliso 'oinega yaligeligehi. <sup>22</sup> Ma wete 'eguma taudi 'idi hemisa we'awe'ana ba'idagwao 'amiyamiya, yamumuga 'esa taudi gidemusa ma 'abehega ya'abihetedi. Coinega tomota mabwaiyadi ba'idagwao weyahidi yatoho waiwai ma yamanasamwedi, ma 'oinega tupwadi 'oidiyega 'abihetena siloba Keliso 'oinega.

<sup>23</sup> Cigu paihowaina tetela bwebwe'ana weyahina, ma 'abehega 'omi mahetegwao 'abihetena taloba tetelaina 'oinega. <sup>24</sup> Wanuwatuhuyahi 'eguma hepili 'oina mabwaiyadi sihehepili, ma hesi 'aigeda tuwa 'oidiyega 'inugeta, 'oinega 'ilobwainegita ma tatoho waiwai ma tanugeta. <sup>25</sup> Ma taudi tohepiliyedi bale'uwa sitohe waiwai ma si'alama'i'itana 'idi tohoina 'oinega ma 'abehega maisa sawasawalina siloba. Ta hesi tauda tatoho waiwai ma maisa miyamiya hatayana galewa taloba.

<sup>26</sup> Bewa weyahina yapili waiwai, nuwana yahetapewa waiwai, ma sahena yahehetapewa besobeso. <sup>27</sup> Coinega wahigu yaloina pa'ale ma 'oinega sahena yamumuga besobeso, tabu ta 'igu guguya hali tomota 'oidiya mulina taugu yabe'u.

<sup>1</sup> Ciyagwao, tubudao wanuwatuhu yahidi 'abehega nugeta tutaina tupwa yoho 'awawa sitautauya ma yaloha 'oinega Yehoba 'ihanugetediya, ta wete hola 'alonega 'idi 'eda 'ipaihoweya ta 'oinega sihabala hali tupwa. <sup>2</sup> Ma yaloha ta hola 'oidiyega 'idi babitaiso silobeya 'abehega Mosese 'ana tomuliyao. <sup>3-4</sup> Ta wete 'adiwa ma 'adi we'aha mabwaiyana galewega silobeya yaluyaluwadi weyahina, ta 'adi we'aha si'ewa'ewa da'ule 'aigeda 'oinega, ma da'uleina galewega mahetedi sitautauya, sanina Keliso.

<sup>5</sup> Ta hesi Yehoba geya 'iyaliyaya tubudaowedi weyahidi, 'oinega pwatulaina 'oina baibaiwadi si'amasa. Ma wawanidi nobwa si'ebesinediya. <sup>6</sup> Ma taudi 'ebe'ita 'oida ma 'abehega sahena galana weyahina tanuwanuwatuhu. <sup>7</sup> Wete sahena ta'e'etuluha hali 'ebe hemisao 'oidiya, gide taudi yoho 'awawa 'oina sipaihoweya. Buki He'asisi 'oina taudi weyahidi 'ihewaila 'igwaeya,

“Tomotaedi simiyatoiya ta si'ai'ai, sinumanuma, muliyetega sitoholo ma siyaliyaya besobeso.”

<sup>8</sup> Ta wete silologwali, 'oinega sabwelo 'aigeda 'oina site tuweniti teli tausani 'oidiyega Yehoba 'ilohe'amasidiya. Bewa 'ebe'ita 'oida ta 'abehega sahena taganaganawala.

<sup>9</sup> Ma wete Yehoba 'ana wahi'wata silaguya ta mwata 'oinega 'ilohe'amasidiya. Bewa 'ihe'itegita 'abehega sahena tauda gide tapaipaihowa 'esa.

<sup>10</sup> Wete Yehoba silomugiyeya, ta 'oinega 'aigeda anelose 'ihesumaneya ma 'i'abihe galediya 'idi lomugiyedi weyahidi.

Cebe'ita bewa 'oida ma 'abehega sahena talolomugi.

<sup>11</sup> Cebe'itaedi bewa mabwaiyadi Buki He'asisi 'oina silelediya 'abehega bewa tuwa mehau tauda hemisaedi mwaudi tanuwatuhu yahidi ma sahena puiyedi tapaipaihowadi.

<sup>12</sup> Ceguma taiya 'owa 'unuwatuhuya 'abehega ma'ino waiwai 'utotohoho, 'u'itayahigo ma sahena 'uwe'awe'a. <sup>13</sup> Weyahina 'ebe tohowedi 'oidiyega Seitani 'itohotohogomi, mabwaiyada wete 'itohotohogita, ta hesi Yehoba tahemisaeya weyahina 'ina loina 'ilaguya ma sahena Seitani 'itohotoho hedadegita. Eema 'eguma tahe'alama'i'itana nata 'eda bwebwe'ana 'ihe'itegita ma 'oinega 'ebe tohowedi tahewaiwai sinedi.

<sup>14</sup> Ciyagwao nuwanuwagu madouna ma hali 'ebe hemisao waguipaledi. <sup>15</sup> Comi ma'imi sanapu, 'oinega 'igu gwae bewa weyahina wanuwatuhuyahi madouna. <sup>16</sup> Ceguma sakalemeni weyahina taloyauwedo Yehoba 'oina ma tanuma, beno Keliso bweyahinega 'i'abihe bwebwe'anegita ma Keliso mahetedai tahe'aigeda. Gide beledi 'eguma tahisi ma ta'ai, belediina 'oinega Keliso mahetedai tahe'aigeda, weyahina tauna wahina ta'ai'ai.

<sup>17</sup> Belediina 'aigeda 'oinega mabwaiyada ta'ai'ai, 'oinega Keliso wahina 'oina taheboda 'aigeda. <sup>18</sup> Gidemusa tuwa me'Isileli baibaiwadi 'idi pwaoliyao sihunudi Yehoba weyahina ma si'aidi, 'oinega Yehoba ba'idadiu siheboda 'aigeda.

<sup>19</sup> Moisa, 'e'ahaiyedi taudi tomiya ganamuli si'ebwa'ebwaya hali 'ebe hemisao 'oidiya, ma wete 'idi 'ebe hemisaowedi, nuwana 'aiwe bo dimwa, tuwa ginaula besobeso, ma geya 'idi waiwaimo. <sup>20</sup> Ta wete paihowaedi taudi tomiya ganamuli ginaulaedi weyahidi sipaipaihowa, geya Yehoba weyahina sinuwanuwatuhu, ta hesi Tomudulele ma'iyanao weyahidi. Ma hesi 'omi genuwagu ma hali 'ebe hemisao weyahidi wapaipaihowa, tabu ta Tomudulele 'iyanao mahetemiya waheboda 'aigeda.

<sup>21</sup> Cana 'ita geya bwebwe'ana 'eguma Bada 'ana biyo 'oinega wanumanuma ta 'ina 'ebe'ai 'oinega wa'ai'ai, ma wete Tomudulele 'ina paihowa wapaipaihowadi. <sup>22</sup> Weyahina 'ida Badaina 'atena wa'abi hedohedou. Badaina tohewaiwai hedade, 'oinega sahena ta'abi'abi hegamasowali, tabu ta 'imutugita.

### *Ce'ahaiyedi hali 'ebe hemisao weyahidi*

<sup>23</sup> Ginaula mabwaiyadi sawasawahida ma tapaihowadi, ma tupwana ginaula nata geya si'abi 'abihetegita. <sup>24</sup> Cilobwainegita ma paihowaedi tapaihowadi 'iyadao 'adi lema weyahina ma hesi sahena taboidamo 'ada lema weyahina. <sup>25</sup> Ceguma hebahebai hesiyona hali tomota 'oidiyega wagimwane, sahena wahehesilala hesiyoina weyahina ma hesi

tuwa wa'ai, ma sahena wanuwauwagala to'aha mwalo 'e'ahaiina 'oina sipaihoweya. <sup>26</sup> Weyahina bale'u mabwaiyana ta ginaula mabwaiyana bale'uwa Yehoba 'ina 'ebeloinao.

<sup>27</sup> Ta hesi 'eguma tomiya ganamuli 'aigeda 'ibwauwego ma 'utautauya 'ina hada ma 'au 'ilagu weyahu, tuwa 'u'ai, ma sahena 'uhesilala to'aha mwalo 'ipaihoweya 'e'ahaiina 'oina, ta sahena wanuwauwagala weyahina. <sup>28</sup> Ma hesi 'eguma taiya 'ihepwaila latu 'e'ahaiina weyahina ma 'oimiya 'igwae, "Taudi 'idi paihowa Tomudulele weyahina 'e'ahai beno 'oinega sipaihoweya," sahena 'e'ahaiina 'u'ai'ai, tabu ta tohepwailaina 'inu wagala, nuwana 'imatauta, 'oinega 'owa wete 'unuwagala, <sup>29</sup> geya 'uboi 'ino matautega, weyahina 'owa geya Tomudulele 'uda matauteya, ma hesi tohepwailaina 'ina matautega.

Ta tomota tupwana sigwaeya, "Sahena 'agu loina walagulagu taudi towe'a 'idi nuwatuwe weyahina, <sup>30</sup> ta wete sahena taudi silolomugiyegau. Caguina weyahina yaloyawedo pwaiya Yehoba 'oina, ta geya 'aigeda wete 'ana galamo 'oiguwa."

<sup>31</sup> Taudi 'idi gwaeina 'adi maisa bewa, 'abehega 'ilobwainegita ma 'ida paihowa mabwaiyana, 'ada 'e'ahai, 'ada numa, bo to'aha wete, eema mabwaiyana 'oidiyega Yehoba sanina ta'abi hemadou. <sup>32</sup> Sahena hali tomota wa'abi'abi henuwagaladi, nuwana meYudiya, bo tomiya ganamuli, bo nuwana Yehoba 'ina tohekalesiyao.

<sup>33</sup> Gidemusa taugu yatohotoho ma 'abehega sahena taugu 'igu nuwatuweya ya-paipaihowa, ma hesi to'aha tomota 'idi nuwatuwe gide tuwa yapaihowa 'esa, ma siyaliyaya, ta 'oinega 'adi lema siloba Yehoba 'oinega.

## 11

<sup>1</sup> Cilobwainegomiya ma 'igu mumuga bewa wahe'au'aunaowe, gide taugu Keliso mumugana yahehe'au'aunaoweya.

### *Wahiwahine 'idi pasa tapwalolo 'oina*

<sup>2</sup> Yauwedo 'iyagwao, weyahina he'itaowedi ya'ebwae pwaigomiya wanuwatuwe yahidiya ma wa'abiyahidi. <sup>3</sup> Nuwanuwagu ma wasanapu 'abehega Keliso loheloheya 'ida Bada, ma hesi wahiwahine 'idi badao beno mwanediyao. Ta Keliso 'ina Bada Yehoba.

<sup>4</sup> Ceguma loheya debana ma'ana hewanu 'i'ahwa'ahwanoi bo 'ipalopisai Yehoba 'ina nuwatuweya, beno 'ebe debamwadina 'ina Bada Keliso 'oina.

<sup>5</sup> Ma 'eguma wahine deba daisinamo tapwalolo 'oina 'i'ahwa'ahwanoi bo 'ipalopisai, beno 'ebe debamwadina 'ina badaina, tauna mwanena, 'oina. Moisa tuwa, 'ana 'ita galana, gide 'eguma debana mabwaiyana sino'i. <sup>6</sup> Weyahina 'eguma wahine sahena debana 'i'ahu'ahusam debana wa'upwa, ma 'imwadina debana no'ino'ina weyahina, 'oinega 'ida 'ahusam ta 'ana 'ita 'ibwebwe'ana tapwalolo 'oina. <sup>7</sup> Tapwalolo 'alona loheya geya sawasawahina debana 'i'ahusam, weyahina loheya 'ana 'ita Yehoba gidemusa, ta wete 'ana hepwtu Yehoba 'ana hepwtu gidemusa. Wahine wete 'ana hepwtu loheya 'ana hepwtu gidemusa. <sup>8</sup> Ma loheya nugenugeta geya wahine 'oinega 'ihapwesama, ma hesi wahine loheya 'oinega 'ihapwesama. <sup>9</sup> Wete Yehoba loheya 'ihemasaleheya geya wahine weyahina, ma hesi wahine loheya weyahina 'ihemasaleheya. <sup>10</sup> Coinega wahiwahine 'ilobwainediya ma debadi sisamudi tapwalolo 'ana tuta 'oina, ma wahiwahineyedi 'idi hemamatana mwanediyao 'oidiya aneloseyao si'ita.

<sup>11</sup> Ma hesi 'eguma Bada 'ina 'eda tamulimuliye geya sawasawahina ma wahine 'iboi 'iloiloina. Wete gesowana loheya 'iboi 'iloiloina.

<sup>12</sup> Weyahina wahine loheya 'oinega 'ilatuwa ta loheya wahine 'oinega 'ili'uwa, ta mabwaiyada Yehoba 'oinega talatuwa.

<sup>13</sup> Wanuwatuhuyahi, 'eguma wahine debadaisinamo 'i'ahwa'ahwanoi Yehoba 'oina, togidega 'ana 'ita bwebwe'ana bo galana? Galana 'awa?

<sup>14</sup> Mabwaiyada bale'uwa tamiyamiya, 'eguma loheya ta'ita debana dudulena, 'ana 'ita wahine gidemusa, beno 'ebe debamwadina, <sup>15</sup> ma 'eguma wahiwahine debadi dudulena beno 'adi 'ebe hepwtu ma wete 'ana 'ebe 'ahusam. <sup>16</sup> Cada loina bewa gide, ma geya 'eta wete hali loina tohekalesiyao mabwaiyada 'oida, 'oinega sahena 'eta taiya loina weyahina 'igwaegwae hila.

*Bada 'ina Cai He'asisi*

<sup>17</sup> Caigeda wete mumugami weyahina geya yada yaliyaya, beno geya bwebwe'ana. <sup>18</sup> Weyahina tupwana tomota sihegwaegauwa 'abehega 'imi 'eto'auta 'oidiya wawatawatahigomi hali boda ma hali boda 'oidiyega, ma tupwana 'idi gwae yahemisaeya. <sup>19</sup> Ta hesi 'imi 'ewatawatahaina 'ana bwebwe'ana beno 'abehega taiyewedi taudi tohekalesiyao moisa ta'inanadi.

<sup>20</sup> Ma wete 'imi 'eto'auta 'oidiya 'eguma 'ida Badaina 'ina Cai He'asisi wa'ai, 'ana 'ita geya bwebwe'ana. <sup>21</sup> Weyahina tupwami waboi 'amiwa wa'ai'ai, ma tupwadi 'iyamiyao ma'adi gomale, ta wete tupwami wa'ai'ai ma wanumanuma hedada 'oinega waheheyauyaule. <sup>22</sup> Cilobwainegomiya ma waboi 'imi hada 'oidiya wa'ai ma wanuma ta sahena Yehoba 'ina tapwalolo wa'abi'abi hegala ma wete taudi wewewewelohedi wa'abi'abihe debamwadinedi. Bewa weyahina gesowana yahehepwatuwegomi. <sup>23</sup> Cida Bada Yesu 'ina 'ai 'ana sanapu 'ihe'ita pwaigauwa ta taugu yahe'itegomi, beno nihuwanaina 'oina Yudasa 'itebaeya, Yesuina beledi 'i'eweya, <sup>24</sup> ta 'iloyauwedowa Yehoba 'oina ma 'ihisiya, ta 'igwaeya "Bewa wahigu 'omi 'ami 'abihetena weyahina. Coinega bewa gide 'agu 'ebe nuwatuhuyahina wapaihowa 'ese." <sup>25</sup> Si'aiya 'igumwala, ma biyo wete Yesu 'i'eweya ta 'igwaeya, "Biyo bewa lolina 'ehauna weyahina, ma loinaina hauhauna bweyahiguwega ya'abihe latuheyama. Ceguma 'abwa to tuta 'oidiya wanuma wanuwatuhu yahigau."

<sup>26</sup> Belediina 'ana 'ai ma biyoina 'ana numa 'oidiyega Badaina 'ina 'amasa weyahina tahehe'ita tuta mabwaiyana ma 'ana siga 'ihilama.

<sup>27</sup> Ma hesi 'eguma taiya 'e'ahaiina 'i'ai besobeso, nuwana Badaina 'ina biyoina 'oinega 'inuma besobeso, loheyaina beno 'ina pui, weyahina 'ida Bada wahina ma bweyahina 'oidiya 'ipaihowa besobesoweya. <sup>28</sup> Ceguma nuwanuwada ma Bada 'ina 'ai ta'ai, nugeta mumugada weyahina tanuwatuhu, ma wete tada 'abihe dumwalugita, ma muliyetega 'e'ahaiina ta'ai, ma wete biyoina 'oinega tanuma. <sup>29</sup> Weyahina 'eguma taiya 'i'ai besobeso nuwana 'inuma besobeso, ma geya 'inuwatuhu Keliso wahina weyahina, 'abwa 'ana lolina 'iloba.

<sup>30</sup> Bewa lamuna 'oinega 'ami lohala ta 'imi we'ao tupwana baibaiwana silatulatu 'oimiya, ma wete tupwana 'ami boda si'amasa pwaiya. <sup>31</sup> Cilobwainegita ma mumugada tauda ta'abihe bwebwe'enedi tabu ta Yehoba 'iloinaegita. <sup>32</sup> Ma hesi 'eguma tuta bewa 'oina Yehoba 'iloinaegita, beno 'i'abi'abihe dumwaluwegita, ma 'abwa bwa'omatana 'oina mebale'u 'iloinaedi ma tauda geya.

<sup>33</sup> Ciyagwao, 'eguma tutaina Bada 'ina 'ai wa'ai, 'iyamiyao wayamwadi. <sup>34</sup> Ma 'eguma taiya 'igomale, 'ina hada nobwa 'i'ai nugeta, ta 'oinega gesowana 'i'ai'ai hedade tapwalolo 'alona, tabu ma Yehoba 'igamwasowalegomi 'imi tapwalolo 'ana 'ita galana weyahina. Beno tuwa, loinaina weyahina. Ma hesi tupwana 'ami lolina wete simiyamiya. Ceguma tutaina yanaowa lolinaedi wete ya'abihe dumwaludi 'oimiya.

## 12

*Yehoba 'ina heguyai yaluyaluwada weyahidi*

<sup>1</sup> Ciyagwao, nuwanuwagu ma Yehoba 'ina heguyai yaluyaluwada weyahidi yalihasi ma wasanapu. <sup>2</sup> Weyahina mwalo tupwa guguyou 'oina wamiyamiya ta hali 'ebe hemisao 'oidiya watagwalegomiya, taudi geya sawasawahidi ma sigwae, ma hesi si'abowegomiya. <sup>3</sup> Ta bewa tutaina 'eguma taiya Yehoba yaluyaluwana 'oina 'imiyamiya, geya Yesu 'ida heliyeya, ma hesi 'i'ahwa Badae; weyahina geya 'eta taiya sawasawahina ma Yesu 'i'ahwa Badae, 'eguma geya Yaluyaluwa Tabuna 'oina 'imiyamiya.

<sup>4</sup> Yaluyaluwa Tabuina 'aigeda tuwamo, ma hesi 'ina heguyai 'oida hagana ma hagana. <sup>5</sup> Cida Badaina wete 'aigeda tuwa, ma hesi 'ina paihowa tapaipaihowadi hagana ma hagana, <sup>6</sup> ma lamudi 'aigeda tuwamo, beno Yehoba, weyahina tauna 'ina heguyaiyedi 'adi paihowa 'i'abihe latuwediya.

<sup>7</sup> Ma Yaluyaluwa Tabuna 'ina 'ehela 'aigeda 'aigeda 'oida beno mabwaiyada 'ada lema weyahina, <sup>8</sup> ta hesi hagadi, weyahina loheya 'aigeda 'ana heguheguyai nuwatuhu, ma

'aigeda sanapu, ginaula dahwadahwaina weyahina,<sup>9</sup> ta 'aigeda hemisa, ma 'aigeda to'abi hebwebwe'ana,<sup>10</sup> ta 'aigeda ginaula 'ebe nuwahrenainaida 'ana paihowa, ma 'aigeda Yehoba 'ina nuwatuhi 'ana palopisai, ma 'aigeda yaluyaluwao 'adi 'inana 'abehega bwebwe'ana bo galana, ma 'aigeda wete hali 'enana 'oidiyega 'ihewagwae, ta 'aigeda wete 'enanaedi 'ana tobui.<sup>11</sup> Hегuheguyaiyedi Yaluyaluwa Tabuna tauna 'ana hesinuwa, ma 'ihewagwae 'aigeda 'aigeda 'oida, ta 'i'ebwagwae ma gide tapaihowa 'ese.

*Wahi 'aigeda ma yahunao baibaiwadi*

<sup>12</sup> Tauda gide wahi 'aigeda weyahina tasanapuya 'abehega wahi 'aigeda, ma yahunao baibaiwadi. Wahiina beno Keliso, ma yahunaowedi tauda.<sup>13</sup> Weyahina mabwaiyada tababitaiso, Yaluyaluwa 'aigeda 'oinega eeta taheboda 'aigeda. Tauma meYudiya ta 'omi hali tupwao 'oidiyega, ta tomiya mwau ma tomiya bwebwe'ana, ta mabwaiyada taheboda 'aigeda pwaiya Yaluyaluwa Tabuina 'oinega, tauna 'oida 'imiyamiya.

<sup>14</sup> Eeta wahi yahunao geya 'aigeda, ma hesi baibaiwadi hagadi ma hagadi.<sup>15</sup> Ceguma 'ahe 'igwae, “Taugu geya wahi 'ina boda 'oina yamiyamiya, weyahina taugu geya nima,” 'ina gwaeina geya gwae moisa.

<sup>16</sup> Wete gide 'eguma tena 'igwae, “Taugu geya wahi 'ina boda, weyahina taugu tena, ta geya mata,” tena 'ina gwaeina geya gwae moisa.<sup>17</sup> Weyahina 'eguma matamo beno geya sawasawahina ma 'ihesagoha, ma wete 'eguma tenamo geya sawasawahina ma mahai 'iniso,<sup>18</sup> ta Yehoba bewa gide 'inuwatuhuya ta yahu baibaiwadi 'idi paihowa 'i'ebwaeidiya.

<sup>19</sup> Weyahina 'eguma yahu 'aigeda tuwa, beno geya wahi mabwaiyana.<sup>20</sup> Coinega wahi 'aigeda 'ipaihoweya, ma hesi yahunao baibaiwadi.

<sup>21</sup> Geya sawasawahina ma mata nima 'oina 'igwae, “Genuwagu 'owa.” Ma wete geya sawasawahina ma deba 'ahe 'oina 'igwae, “Genuwagu 'owa.”<sup>22</sup> Ta tupwadi wete wahi yahunao 'adi 'ita gide we'adi, ma hesi 'idi paihowa madouna wahi 'ana lema weyahina.<sup>23</sup> Tupwana wete yahudao geya tahepwatuwedi, ma weyahidi tahedeba mwadina, ma hesi ta'itayahidi ta ta'ahusamudi,<sup>24</sup> ta geya yahudao mabwaiyadi 'adi 'itayahina gide. Weyahina Yehoba wahida 'ihemasaleheya ma 'abehega yahunaowedi taudi geya 'adi hepdatumo ta'itayahi bwaibwainidi.

<sup>25</sup> Ma 'oinega sahena wataha 'ilatulatu wahida yahunao 'oidiya. Ma hesi mabwaiyadi sihemahemahetena ma mabwaiyadi sihelemalema 'idi paihowao 'oidiya.<sup>26</sup> Weyahina 'eguma yahuda 'aigeda 'imuya, beno wahida mabwaiyana simuya. Wete 'eguma wahida 'aigeda ma'ina yaliyaya, beno wahida mabwaiyana siyaliyaya.<sup>27</sup> Coinega 'aigeda 'aigeda tauda Keliso yahunao,<sup>28</sup> weyahina 'ida paihowao hekalesiya 'alona hagana ma hagana. Yehoba 'ihewagwaeidiya 'oida, nugeta tauma Keliso 'ana tohepwailao, ta muliyetega palopitao taudi Yehoba 'ina nuwatuhiwao sihehpwaile nugete, muliyetega tohe'itao, ma ginaula 'ebe henainaida 'adi topaihowao, ma to'abi hebwebwe'ana, ma to'abihetenao, ma tohanugetao, ta taudi hali 'enana 'adi tohepwagwae.

<sup>29</sup> Weyahina geya sawasawahina ma mabwaiyada paihowa 'aigeda tuwa 'oina tahetopaihowa Keliso weyahina, nuwana Yesu tetelina 'ana tohepwailao, nuwana palopitao, nuwana tohe'itao, nuwana ginaula 'ebe henainaida 'adi to'abihelatuwao,<sup>30</sup> nuwana to'abihe bwebwe'ana, nuwana hali 'enana 'ana togwae, nuwana hali 'enanaedi 'adi tobui.<sup>31</sup> Paihowaedi mabwaiyana Yehoba 'ihewagwaeidiya 'oida, 'oinega 'ilobwainegomiya ma heguheguyai bwebwe'adi nuwami 'i'ewa, ma wete 'eda 'ausalana moisa yahe'itegomi, beno helau.

## 13

*Helau*

<sup>1</sup> Ceguma 'igu gwae bwebwe'adi, gide tologuguyao ma aneloseyao 'idi gwae, ta 'eguma helau geya 'ateguwa 'imiyamiya, 'igu guguyaedi ginaula bwagabwaga, gide sinaha silahulahusi besobeso, nuwana yoguli simu'amu'a besobeso.

<sup>2</sup> Ta wete 'eguma taugu Yehoba 'ina palopita, ta ma'igu sanapu ma sawasawahigu yahepwaila ginaula dahwadahwanidi, ma 'eguma yahemisa moisa Yehoba 'oina ma



'oinega yagwae 'oya 'oidiya, sawasawahina sitau hali tupwa, ta 'eguma geya helau 'ateguwa, taugu tuwa loheya bwagabwaga.

<sup>3</sup> Ta 'eguma 'igu tobwatobwa mabwaiyana yaheguyaiye tomota 'oidiya ma wahigu wete yatagwale ma sigabu 'idi pwaoli weyahina, ta 'eguma geya helau 'ateguwa 'imiyamiya, 'igu paihowaedi huwaidi geya'abwa yalobaloba.

<sup>4</sup> Moisa, helau ginaula madouna, weyahina 'eguma helauina 'ateda 'imiyamiya, sawasawahina ma tahe'alama'i'itana ma tomota ta'ate muyamuyaedi, ta sahena tahe-he'ipi'ipiyedi. Ta sahena wete tanuwanuwahane, nuwana tagagagagasa, <sup>5</sup> ma hesiyage 'iyadao tahe'asisyanedi, ma sahena 'enuwanuwaha bo hegawagawagu bo 'aleha 'oidega si'ita'ita. <sup>6</sup> Ta sahena mumuga galana weyahina tayaliyaliyaya ma hesi mumuga dumwaluna weyahina tayaliyaya. <sup>7</sup> Ceguma helau 'ateda 'imiyamiya sauga baibaiwana ta'alama'i'itana moisa, eeta tahemisa moisa, ma'ida nuwatuhyahina 'ada 'abihetena Yehoba 'oinega 'abwa taloba, ma tuta mabwaiyana tatoholo pa'ala.

<sup>8</sup> Helau sahena 'igumwagumwala, ta hesi taudi Yehoba 'ina palopitao 'abwa 'idi hepwaitao sigumwala. Wete taudi hali 'enana ma hali 'enana 'oidiyega sigwaegwae, 'abwa 'enadiyedi sigumwala. Ma tosanapuwo 'abwa 'idi sanapu sisawala. <sup>9</sup> Weyahina bewa tuwa 'ida sanapu tupwana tuwa, 'oinega 'ida hepwaita tupwana wete, <sup>10</sup> ta tuta sinaonaoma 'oidiya sanapu hauhauna mabwaiyana 'ilatuma, ma sanapu miyamiyana tanuwanaide. <sup>11</sup> Gidemusa taugu mwalo hene gwama tuwa, ma hesi bewa tuwa yaheloheya pwaiya ta gwagwama 'idi gwaeyao ta 'idi paihowao ta 'idi nuwatuhyawao 'oiguwega sigumwala pwaiya. <sup>12</sup> Bewa tuwa 'ida sanapu geya madouna, gide 'alu'aluwa nuwana 'ainuwadawada gidemusa, ma hesi 'abwa 'ana moisa 'ida hapwesa 'oida. Ma taugu sanapu tupwana tuwa yasanapuya, hesi 'abwa mabwaiyana yasanapu, gidemusa bewa tuwa Yehoba 'isanapu bwaibwainigauwa.

<sup>13</sup> Ginaula madouna 'etoi simiya hataya, 'aigeda tahemisa, 'aigeda tanuweya, 'aigeda tahelau, ma mabwaiyadi 'oidiyega helau 'imadou hedadeya.

## 14

### *Hali 'enana 'adi togwaeyao ma topalopisai weyahidi*

<sup>1</sup> Coinega 'ilobwainegita ma tatoho waiwai ma tahelau moisa, ma wete tatoho waiwai ma Yehoba Yaluyaluwana 'ina heguyai 'oida talobadi, ma hesi heguheguyai 'aigeda bwebwe'ana hedada, beno palopisai Yehoba 'ina nuwatuhyu sowasowana tahepwaita nugete.

<sup>2</sup> Ta 'aigeda wete heguyaiina tomota 'oidiya, beno hali 'enanao 'adi tala weyahidi. Ceguma hali 'enana 'oidiyega tagwaegwae, beno tuwa Yehoba 'oina tagwaegwae, ta geya tomota 'oidiya, 'oinega gwaeyedi 'adi sanapu tomota 'oidiya palipalina, ma bewa Yaluyaluwa Tabuna 'ina waiwaiyega sanapu dahwadahwaina tahehegwaegwae, eeta tomota geya sida nuwasabwalena. <sup>3</sup> Ta 'eguma tapalopisai tomota 'oidiya, eema 'ida gwaeyega sinuwa sabwalena, beno 'adi lema, ma 'ane 'atepatu ta yaliyaya siloba. <sup>4</sup> Ta 'eguma taiya hali 'enana 'oinega 'ihegwaegwae, beno 'iboinamo tuwa 'i'abi'abihete hila, ma hesi 'eguma palopitaedi sigwae hekalesiyao 'enadiyega beno mabwaiyadi 'adi lema.

<sup>5</sup> Taugu nuwanuwagu ma mabwaiyami hali 'enana 'oidiyega wagwaegwae. Ta wete nuwanuwagu madouna ma wapalopisai Yehoba 'ina nuwatuhyu, weyahina palopitao 'idi paihowa ginaula madouna. Ta gwae hali 'enanao 'oidiyega geya ginaula madouna, ma hesi 'eguma 'aigeda tobui 'imiyamiya, ma gwaeyedi tauna 'igibuidi, beno ginaula bwebwe'ana tohekalesiyao 'adi lema weyahina.

<sup>6</sup> Ciyagwao, wanuwatuhyahi 'eguma yanaowa 'oimiya, ma hali 'enana 'oinega yagwaegwae 'oimiya, gesowana lema waloba. Ma hesi 'eguma yanaowa 'oimiya ma lotohona 'ehauna bo sanapu bo palopisai bo he'ita ya'ebwaegomi, bewa 'ami lema. <sup>7</sup> Gidemusa 'eguma sinaha tomota silahusa besobeso bo gita sihunu besobeso, geya sawasawahina ma siwali bwaibwaina.

<sup>8</sup> Ma wete 'eguma taiya yoguli 'imu'amu'a besobeso, 'enana 'ana sanapu geya hene tada sanapuya, nuwana 'aleha, bo nuwana to ginaula 'ana bwau weyahina.

<sup>9</sup> Tauda wete gidemusa, 'eguma geya tagwaegwae dumwalu nata gesowana wete tomota 'ida gwaeyedi sinuwa sabwalenidi, weyahina 'ida gwaeyedi gide hedagadaga bwagabwaga. <sup>10</sup> Ta moisa, bale'uwa 'enana baibaiwa hedada simiyamiya, ma tupwa 'aigeda 'aigeda toni'asa taudi 'enadi sisanasanapudi.

<sup>11</sup> Ceguma hali tupwa 'enadi geya yasanapu, taugu gide taumana yahenainaida, ta geya sowasowahigu ma 'enadi yasanapudi. Ta taudi wete geya sawasawahidi 'enagu sisanapu.

<sup>12</sup> Yauwedo 'iyagwao, nuwanuwami ma Yehoba Yaluyaluwana 'ina heguyai 'oimiya wa'ewadi, 'oinega 'ilobwainegomiya ma watoho ma 'ami heguheguyaiyedi 'oidiyega tohekalesiyao wa'abihe waiwaiyedi.

<sup>13</sup> Ceguma taiya 'oimiyega hali 'enana 'oidiyega 'igwaegwae, 'ilobwaineya ma 'i'ah-wanoi Yehoba 'oina ma sanapu 'ida loba, ta 'oinega 'ina gwae 'ibui.

<sup>14</sup> Weyahina 'eguma hali 'enana 'oinega ya'ahwa'ahwanoi, 'enanaina 'ana sanapu geya yasanapu, weyahina yaluyaluwagumo 'i'ahwa'ahwanoi, ma hesi 'igu gwaeyedi geya yasanapudi, to'aha weyahina yagwaegwae. <sup>15</sup> Cilobwainegauwa ma ma'igu sanapu ta wete yaluyaluwaguwega ya'ahwa'ahwanoi, ma weteyage yawali hep watu Yehoba 'oina yaluyaluwaguwega ta wete ma'igu sanapu. <sup>16</sup> Ceguma taiya 'owa yaluyaluwamo 'oinega 'uhehepwatu hali 'enanega, ma geya 'usanapu, ma 'iyamwao wete geya sinuwa sabwalena, taudi sahena silolo'emeni. <sup>17</sup> Hepwatuina bwebwe'ana, ta hesi 'iyadao geya 'ida lemediya.

<sup>18</sup> Taugu yaloyauwedo Yehoba 'oina weyahina hali 'enana 'oidiyega yagwaegwae hedada. <sup>19</sup> Ta hesi tapwalolo 'oina, nuwanuwagu ma gwaeina yasanasanapu 'oinega yada hep waila to'uto'upana tuwa, ma tomota yahe'itadi. Ta geya nuwagu hali 'enana 'oidiyega tapwalolo 'oina yagwaegwae hedada, weyahina gwaeyedi tomota geya sisanapu.

<sup>20</sup> Ciyagwao, sahena 'imi nuwatuhi gwagwama gidemusa, ma hesi wanuwauwa loheya madouna gide. Ta sahena mumuga galana weyahina wanuwauwatuhi ma 'abehega wasanapudi.

<sup>21</sup> Buki He'asisi 'alona Yehoba 'ina loina 'aigeda 'imiyamiya, 'igwaeya, “Taumanao 'abwa sinaoma ma hali 'enanao 'oidiyega 'igu bodao 'oidiya 'igu gwae sida hep wailedi, ma hesi sahena wete 'igu gwaeyedi simulimuliyedi.’ Yehoba 'ina gwae bewa gidemusa.”

<sup>22</sup> Ceguma hali 'enana 'oinega tagwaegwae, beno 'ila'ilala geya taudi tohemisao weyahidi ma hesiyage taudi geya sihemisa weyahidi. Ta Yehoba 'ina nuwatuhi 'ana palopisai beno tohemisao 'adi lema weyahidi. <sup>23</sup> Coinega tauda tohekalesiyao 'eguma tapwalolo weyahina tadeli 'autama ma hali 'enanao 'oidiyega tagwaegwae, ma tupwadi taudi geya Yesu 'ana tohemisao siluhu ma 'enada palipalidi sihesagohedi, nuwana sinuwatuhi 'abehega taheyauyauleya, 'awa?

<sup>24</sup> Ta 'eguma mabwaiyada Yehoba 'ina nuwatuhi tapalopisai ma tupwadi taudi geya Yesu 'ana tohemisao siluhuma, ma taudi 'enadiyega sihesagoha, nata sinuwabui ma si'ahwa moisa. <sup>25</sup> Ma 'oinega 'idi nuwatuhi dahwana weyahina sinuwagala ma'idi deba mwadina, ma Yehoba matana sibe'u talutalubu'i ma 'oina si'etuluha ma si'ahwa moisa, ma 'oinega sigwae, “Moisa, Yehoba ba'idamiu wamiyamiya.”

### *Lotapwalolo 'ana 'eda*

<sup>26</sup> Ciyagwao, 'eguma tapwalolo weyahina waluhuluhi, 'aigeda tomota wali 'i'ahala lagasi, 'aigeda 'ihe'ita, 'aigeda lotohona hauhauna 'ihepwaila hapwese; ma 'aigeda hali 'enana 'oinega 'igwae, ma 'aigeda gwaeina 'igibui, eeta paihowaedi 'oidiyega boda silemedi. <sup>27</sup> Ta 'eguma hali 'enanao 'adi togwaeyao simiyamiya, bwebwe'ana 'eguma siteluwa nuwana sitetoimo 'aigeda 'aigeda 'oidiyega sigwae. Ta wete tobuiyao sida miyamiya ma gwaeyedi sida buidi.

<sup>28</sup> Ta 'eguma 'enanaedi geya 'adi tobuimo, sahena 'aigeda taiya hali 'enana 'oinega 'igwaegwae latu tapwalolo 'ana tuta, ma hesi 'iboinamo 'oina ma wete Yehoba 'oina sowasowana 'igwae.

<sup>29</sup> Ta wete palopitao 'eluwa nuwana 'etoi sida gwae ma 'oinega mabwaiyami 'idi gwaeyedi wada hesagohedi ta weyahidi wanuwatuhu ma wahesinuwa. <sup>30</sup> Ma 'eguma 'aigeda tomota tapwalolo 'alona 'imiyamiya ma lotohona 'ehauna 'iloba, 'ida toholo ma ginaulaina 'ida hepwaita hapwese, ta tologuguyaina 'ida 'alahenono. <sup>31</sup> Ta mabwaiyami sawasawahimi ma 'aigeda 'aigeda wapalopisai ma wa'abihe pa'aligomi, ma nuwami 'ibwebwe'ana. <sup>32</sup> Ta palopitaedi sowasowana yaluyaluwadi siboidimo siloiloinaedi, <sup>33</sup> weyahina Yehoba 'iloiloina dumwaluwegita, 'oinega ma'ida yaliyaya talotapwalolo.

<sup>34</sup> Ta wahiwahine 'omi, 'ilobwainegomiya ma 'ebe tapwalolo baibaiwadi 'oidiya wa'ala henono tuwa, ma gwae wahesagohedi. Weyahina Buki He'asisi 'oina Mosese 'ina lolina wahiwahine weyahidi bewa gidemusa, ta wete gidemusa tohekalesiyao 'adi lolina tupwa mabwaiyana 'oidiya. <sup>35</sup> Ta 'eguma wahiwahine nuwanuwadi ma to'aha sisanapu, sowasowahidi siboi 'idi hadao 'oidiya sihesilala mwanediyao 'oidiya, ma taudi sihe'itadi. Weyahina 'eguma wahiwahine sigwae tapwalolo 'oina, 'ebe debamwadina 'oida. <sup>36</sup> Ma geya'abwa wanuwawahane 'abehega waboi 'oimiya Yehoba 'ina gwae 'ihapwehapwesa, nuwana waboimo 'oimiya 'imiyamiya.

<sup>37</sup> Ma wete 'eguma taiya 'inuwatuhuya 'abehega tauna palopita ma Yehoba yaluyaluwana 'oina 'imiyamiya, nugeta 'ida sanapu 'abehega 'igu gwae leta bewa 'oina, beno Yehoba 'ina lolina 'oimiya. <sup>38</sup> Ta 'eguma taiya gwaeyedi genuwana, tuwa hede ma'ina henainaida 'ida miyamiya. <sup>39</sup> Coinega 'iyagwao, 'ilobwainegomiya ma watoho waiwai ma Yehoba 'ina nuwanuwa wapalopisai, ta hali 'enana 'adi gwaeyao weyahidi sahena wa'au'ausi tapwalolo 'oina. <sup>40</sup> Ma wete ginaula mabwaiyana dumwaludi ta bwebwe'adi 'imi tapwalolo 'oidiya wada paihowadi.

## 15

### *Keliso 'ina toholo hila weyahina*

<sup>1-2</sup> Ciyagwao, tetelaina yahepwaila pwaiyeya 'oimiya, wanuwatuhuyahi 'abehega mwalo 'atemi watagwaleya tetelaina 'oina, ma 'i'abihe pa'aligomiya ta 'oinega 'ami 'abihetena walobeya, 'eguma tetelina wa'abiyahiya. Ta 'eguma geya wa'abiyahi pa'alina, 'imi hemisaowedi gide ginaula bwagabwaga.

<sup>3</sup> Tetelaina lamuna ya'ita lobeya 'oinega yahepwaile 'oimiya 'abehega Keliso 'ida puiyao weyahidi 'i'amasa, gidemusa Buki He'asisi 'ina hepwaita, <sup>4</sup> ta galiha silaguya, ma sabwelo hetoina 'oina 'itoholo hila, gidemusa Buki He'asisi 'ihepwaita 'esa.

<sup>5</sup> Citoholo hila ma Pita 'i'iteya ta wete 'ana tohepwailao site tuwelo si'iteya. <sup>6</sup> Caigeda tuta 'oina 'iyadao wete site paibi handeledi si'iteya. Bodaedi 'oidiyega baibaiwadi bewa tuwa simiyamiya, ma tupwadi si'amasa.

<sup>7</sup> Yemesa wete 'i'iteya, ta wete Keliso 'ana tohepwailao mabwaiyadi si'iteya. <sup>8</sup> Ta 'ebe losaloha taugu wete ya'iteya, ma hesi taugu 'igu tole 'ebe henainaida, geya gidemusa taudi 'idi tuta silobeya ta sitoleya. <sup>9</sup> Ta wete taugu loheya galagu. Weyahina Yehoba 'ana tohemisao ya'abihe muyemuyediya, 'oinega Keliso 'ana tohepwailao mabwaiyadi sibwebwe'ana sinegauwa. <sup>10</sup> Ma hesi Yehoba 'i'atemuya muyaegauwa ta 'ilemegauwa. Coinega geya 'i'abihete daidaisigau, weyahina yahemisa bwaibwaina ma tohepwailao mabwaiyadi 'idi paihowa ya'ebesineya, geya taugu 'igu waiwaiyega, ta Yehoba 'ina helau 'oinega.

<sup>11</sup> Coinega tohepwailaedi 'oimiya siloguguya pwaiya, ma taugu wete 'oimiya ya-loguguya pwaiya, ta Keliso wahemiseya.

### *Toholo hila weyahina*

<sup>12</sup> Cima guguya 'oimiya 'ahepwaileya 'abehega Keliso 'amasega 'itoholo hila, ta wahemiseya. Ma to'aha weyahina tupwami wagwae 'abehega tomota geya sawasawahidi ma 'amasega sitoholo hilama?

<sup>13</sup> Weyahina 'eguma tomota sahena 'amasega sitotoholo hila, Keliso wete 'amasega gesowana 'itoholo hila. <sup>14</sup> Coinega 'ima loguguyaedi tuwa ginaula bwagabwaga, eeta 'imi hemisaina Keliso 'oina beno hemisa bwagabwaga. <sup>15</sup> Wete tauma Yehoba 'ana tohepwailao 'a'abowegomiya 'ima gwaeyedi 'oidiyega, weyahina 'agwaeya, "Yehoba Keliso 'amasega 'i'abi hetoholo hileya," ta to'amasaedi geya sida toholo hila. <sup>16</sup> Coinega Keliso wete gesowana 'itoholo hila. <sup>17</sup> Ta Kelisoina wete wahemisa bwagabwaga, ma 'oinega 'imi puiyao tuwa 'abwa simiyamiya 'oimiya.

<sup>18</sup> Ma 'iyadaowedi taudi mwalo Keliso sihemisaeya ta si'amasa pwaiya, beno ta'eha simiyamiya?

<sup>19</sup> Ta wete tauda Keliso 'ana tohepwailao nuwa'ole'oleda, 'eguma Keliso 'ina 'abihetena 'oida tuta bewa bale'umo weyahina, ta geya tuta 'inaonaoma 'ida 'amasa mulina weyahina.

<sup>20</sup> Ta 'ana dumwalu hesi beno Keliso 'amasega 'itoholo hila, tauna 'ihanugeta ma muliyetega to'amasao mabwaiyadi.

<sup>21</sup> Weyahina loheya 'aigeda tuwa 'oinega 'amasa 'ilatuwa bale'uwa, beno Adama, ta wete gidemusa loheya 'aigeda 'ina paihowega toholo hila 'i'abilatuheya. <sup>22</sup> Tasanapu pwaiya 'abehega Adama 'ina pui 'oinega tauda 'amasa 'oida 'ilatuwa, ma hesi Keliso 'oinega yawasida hataya talobeya.

<sup>23</sup> Ta yawasi hataya 'ina tauya bewa gidemusa, nugeta Keliso 'itoholo hila, ma 'abwa tutaina 'ihilama tauda taiyawedi 'ina bodao wete tatoholo hila. <sup>24</sup> Ma muliyetega Kelisoina nata toloinao mabwaiyadi 'ihewaiwai sinedi gide welabana ma hi'ahi'a ma yaluyaluwa galadi mabwaiyadi 'ihewaiwai sinedi, ma tuta 'ana 'ebe losaloha 'oina Keliso 'ina 'ebeloina 'i'ebwae Tamana 'oina.

<sup>25</sup> Weyahina Kelisoina nata ma'ina waiwai 'iloiloina eema 'ana siga 'ana 'alehaowedi mabwaiyadi 'ihewaiwai sinedi, <sup>26</sup> eeta 'ana 'ebe losaloha 'amasa 'ihewaiwaisine ma 'igumwala.

<sup>27</sup> Weyahina Yehoba loina mabwaiyana Keliso 'i'ebwae. Beno tuwa Keliso gesowana To'ebwayaina 'iloiloinae. <sup>28</sup> Coinega 'abwa tutaina Keliso ginaula mabwaiyadi 'iloinaedi, muliyetega tauna 'itagwala Tamana 'ina loina 'oina, weyahina Tamana Keliso 'ina loina mabwaiyana 'ana to'ebwaya, 'oinega Yehobaina 'ihane hedade.

<sup>29</sup> Ta 'eguma to'amasa sahena sitohotoholo hila, to'aha weyahina tomota sibabitaeso to'amasao weyahidi? <sup>30</sup> Ma wete togidega taugu? Ceguma gesowana 'amasega yatoholo hila to'aha weyahina 'ebe hesilae 'oina tuta mabwaiyana yapaipaihowa Keliso weyahina?

<sup>31</sup> Moisa, sabwelo 'aigeda 'aigeda 'oidiya gide ya'ama'amasa, ma hesi ma'igu yaliyaya 'omi 'imi toholo pa'ala weyahina, 'ida Bada Yesu Keliso 'oina.

<sup>32</sup> Ta wete mwalo Epeso 'oina loheloheya gamwagamwasowalidi totopwatula gide silolo'alehegau, ma hesi lo'alehaina geya 'ana bwebwe'anamo 'oiguwa 'eguma geya 'amasega yatoholo hila! Coinega tupwana tomota sigwae 'abehega 'ilobwainegita ma tuta bewa bale'uwa tayaliyaya 'ida 'ai ta 'ida numa 'oidiyega, weyahina nata 'amasa 'ana tuta, gesowana 'aigeda wete to'aha talobaloba.

<sup>33</sup> Ta hesi gwaeyedi beno 'abo tuwa, 'oinega sahena 'oidiyega si'abowegomi, tabu ta mumugadi galana wahe'au'aunaowedi. <sup>34</sup> Nuwana tupwami Yehoba wahrenainaideya. Bewa 'ebe debamwadina 'oimiya, 'oinega 'ilobwainegomiya ma wada sanapu, ma mumuga galana walolagu.

#### *Wahi hauhauna*

<sup>35</sup> Ma tupwami geya wanuwanuwa sabwalena toholo hila weyahina, 'oinega wagwae. "To'amasaedi to 'wapi 'oinega sitoholo hila?" <sup>36</sup> Coinega 'ilobwainegomiya ma wada sanapu 'abehega 'eguma patu ta'uma ma 'ibwala 'abwa patuina 'imwahulu.

<sup>37</sup> Wasanapuya 'abehega 'eguma pegapega nuwana 'aigeda patu tadauni, 'wapina 'oinega

'ibwala, geya patu nugenugetaina 'ana 'ita gidemusa, ma hesi hagana, <sup>38</sup> weyahina toloina tauna Yehoba, ma 'aiwe ta pwatula 'aigeda 'aigeda 'adi 'ita 'ina nuwatuhu gidemusa, ta 'ilagudiya.

<sup>39</sup> Ta wete wahi Yehoba 'iloinaeya, tomota wahida hagana ma hagana, hebahebai wahidi hagana, bwasumo wahidi hagana, ma silahana wete wahidi hagana. <sup>40</sup> Ta wete megalewa wahidi hagana ma gogo gabulena wahida hagana, wete 'adi 'ebe hepwtu hagana tauda 'oidega. <sup>41</sup> Ta wete hala 'ana hepwtu hagana, ma wai'ena 'ana hepwtu hagana, ma 'ipwala wete 'adi hepwtu hagana ma hagana.

<sup>42</sup> Cida toholo hila wete gidemusa, wahida mwahumwahuludi sigaligalihedi, ma 'abwa 'eguma tatoholo hila wahida gesowana simwahumwahulu. <sup>43</sup> Moisa, wahida 'ebe debamwadina ma we'awe'aidi sigaligalihedi ma 'iyamo wahida galewa tatotoholo hila, ma wahidaedi ma'adi hepwtu ta waiwaidi, <sup>44</sup> weyahina wahi bale'uwa sigaligalihedi ta wahi galewa sitotoholo hila, weyahina wahi bale'u hagana ma wahi galewa hagana.

<sup>45</sup> Buki He'asisi 'ina hepwaile wete gidemusa 'igwaeya, "Loheya nugenugetaina, Adama wahina mayawasina; ma loheya heluwena yaluyaluwana 'oinega sowasowana yawasida 'i'ebwaegita."

<sup>46</sup> Loheya yaluyaluwana geya 'ilatu nugeta, ma hesi wahida 'ihapwesa nugeta ma yaluyaluwa muliyetega. <sup>47</sup> Weyahina loheya nugenugeta Yehoba 'ipaihoweya bale'u 'oinega, ta loheya heluwena galewega 'isuluma. <sup>48-49</sup> Mabwaiyada Adama tubunao bale'uwa tamiyamiya, 'ada 'ita mebale'u gidemusa, ma wete wahida hauhaudi galewega 'abwa ta'ewadi, 'adi 'ita gidemusa Keliso wahina hauhauna.

<sup>50</sup> Ciyagwao wanuwatuhuyahi 'abehega wahida bale'uwa 'imwahumwahulu gesowana 'iluhu galewa, weyahina wahi bale'uwa mwahuluna, ta wahi galewa geya 'ida mwahuluwa. <sup>51</sup> Ma wete sanapu hauhauna yahe'itegomi 'abehega gesowana tohekalesiyao mabwaiyada ta'ama'amasana, ma hesi tupwada 'abwa mayawasida tamiyamiya ma Yehoba wahida 'ida buidi. <sup>52</sup> Weyahina tuta 'ana 'ebe losaloha 'oina yoguli 'ida mu'a madouna, ma Yehoba wahida 'ida bui mwayamwayauwedi, ma wete to'amasao mawahi hauhaudi sito-holo hila, ta tauda mayawasida wahida wete 'ibuidi. <sup>53</sup> Weyahina Yehoba sawasawahina wahi mwahumwahuludi ma 'ama'amasidi 'ibuidi ma si'ehau ta miyamiya hatayadi. <sup>54</sup> Ma 'abwa tuta nage 'oina Buki He'asisi 'ana 'ahwa moisa 'ilatu, beno 'igwaeya, "Tauna 'abwa 'ihewaiwai moisa ma 'amasana 'igumwala.

<sup>55</sup> Weyahina gesowana 'amasana 'ihewaiwai, ma hesi 'amasana 'ina gala 'oida 'igumwala."

<sup>56</sup> Camasaina 'ina waiwai 'ilatuwa mumuga galana 'oinega, eeta mumuga galagala 'ina waiwai beno Mosese 'ina loinao 'adi ligehe 'oidiyega. <sup>57</sup> Ma hesi 'ida Bada Yesu Keliso 'i'abihetegita ma galanaina 'oinega tahewaiwaisine, eeta Yehoba 'oina taloyauwedo madouna.

<sup>58</sup> Ma wete 'iyagwao yaloyauwedo madouna 'oimiya ta yaguguyegomi ma watoholo pa'ala ma tuta mabwaiyana wada hetapewa Bada 'ina paihowa 'oina, weyahina 'abwa Bada 'ina paihowaina 'oinega huwaina taloba.

## 16

### *Helau weyahina*

<sup>1</sup> Ginaula 'aigeda wete, helau Yehoba 'ina tomotaedi Yelusalema 'oina 'adi lema weyahina. Mwalo meGaletiya 'idi helau weyahina yahegwaediya, 'oinega 'omi wete gidemusa wada paihowa 'esa, <sup>2</sup> beno Sabati 'aigeda 'aigeda 'oidiya 'imi helau mabwaiyana walagulagu. Ceguma 'imi mane madouna, helau madouna, ta 'eguma 'imi mane 'i'iuna 'imi helau 'i'iuna wete, ma tutaina yatauyawa, 'imi helauina 'imiyamiya.

<sup>3</sup> Coinega tutaina yanaowa 'oimiya tupwadi 'iyamiyao wahesinuwedi ma 'imi helauina sitauye Yelusalema 'oina, ta wete meYelusalema 'idi leta yada lele ma helauina mahetena sitauyedi. <sup>4</sup> Ceguma nuwanuwami, taugu wete taudi mahetegwao 'atauya Yelusalema.

<sup>5</sup> Bewa tuwa nuwanuwagu ma yatau Masidoniya ma muliyetega yanaowa 'oimiya, <sup>6</sup> ta nobwa ya'aiyawasi ma tupwana yamiya 'amana, nuwana 'ana siga gogai 'ana tuta



'igumwala, ma wahegelugau to tupwa 'oina nuwanuwagu yatau. <sup>7</sup> Weyahina genuwagu tuta to'uto'upana tuwa ba'idami tamiyamiya, ma hesi 'eguma Yehoba 'itagwala, ma tuta tupwana dudulena ba'idami nobwa tamiyamiya.

<sup>8</sup> Bewa tuwa Epeso 'oina yamiyamiya 'ana siga Penitikosi Guyaina 'igumwala, muliyetega yatauyawa. <sup>9</sup> Weyahina 'asa bewa 'oina sawasawahina ma Yesu 'ina paihowa madouna yapaihowa, bwagana 'agu sahiyao baibaiwadi simiyamiya.

<sup>10</sup> Ta Timoti wete 'eguma 'inaowa 'oimiya wabwauwe 'imi hada ma wahelauwe madouna, weyahina tauna 'ida Bada weyahina 'ipaipaihowa, taugu wete gidemusa. <sup>11</sup> Ma sahena taiya Timotiina 'ilohesohesoie, ta tutaina 'ihilama 'oiguwa wa'abi-hete ma ma'ina yaliyaya 'ida hilama, weyahina tauna ma tupwadi wete 'iyadao yayamwayamwadi.

<sup>12</sup> Apolosa wete tauna tasidai 'aigeda, ma mwalo Apolosaina ya'ahwanoiyeya ma 'abehega 'iyadao mahetenao sinaowa 'oimiya, ta 'iguipaila, ma 'abehega 'eguma to tuta 'oina bwebwe'ana 'itauyawa.

*Gwae 'ana 'ebe losaloha*

<sup>13</sup> Ciyagwao wa'itayahigomi, ma ma'imi hemisa moisa watoholo pa'ala ma wahewai-wai, <sup>14</sup> ta wete 'imi paihowa mabwaiyana 'oidiya wahehelau hilegomi.

<sup>15</sup> Sitipana 'ina bodao wasanapudiya 'abehega taudi Keliso 'ana tohemisa nugenuge-tadi tupwa Akaya 'oina, ma sitagwala pwaidiya Yehoba 'ina tomota 'adi 'abihetena weyahina, <sup>16</sup> 'oinega yahenuwa lagugomi ma 'idi gwaeyao wamuliyedi, ma taiyawedi wete mahetediyao Keliso weyahina sipaipaihowa taudi wete wamuliyedi.

<sup>17</sup> Tuta bewa yayaliyaya madouna weyahina Sitipana ma Potuneto ma Akeiko sitauya pwaima, ta taudi gide 'omi 'ami miyalaena, taudi si'abi'abihe yaliyayegomi. <sup>18</sup> Gidemusa 'omi mwalo wete si'abihe yaliyayegomiya, 'oinega bewa tuwa 'ada lotohona bwebwe'ana hedada. Loheloheyaedi wahe'asisiyanedi, ta wete taiyewedi taudi gidemusa.

<sup>19</sup> Tohekalesiyao mabwaiyadi tupwa Esiya 'oinega 'idi loyauwedo 'inaonaowa 'oimiya. Ma wete Akuila ma Pilisila, ta wete tohekalesiyao taudi 'idi hada sitapwatapwalolo 'ida Badaina saninega, 'idi helau 'oimiya. <sup>20</sup> Tohekalesiyao mabwaiyadi wete 'idi helau 'oimiya. Ciyamiyao helauwega wa'atusapwalidi.

<sup>21</sup> Bewa 'igu loyauwedo 'oimiya taugu nimaguwega yaleleyawa. <sup>22</sup> Ceguma taiya geya Bada 'ihelauwe nata 'imiya mwau. Bada yo, nuwanuwagu ma 'unaoma. <sup>23</sup> Cida Bada Yesuina 'ina helau 'oimiya 'ida miyamiya. <sup>24</sup> Ta wete 'igu helau Yesu Keliso saninega 'inaonaowa mabwaiyami 'oimiya.

Taugu Paulo

## 2 KOLINITA

### MeKolinita 'idi leta heluwena Paulo 'ileleya

Paulo 'ina leta nugenugetaina meKolinita 'oidiya mumugadi galana weyahina, ma 'oinega sinuwabuiya, ta 'idi mumuga bwebwe'ana tetelina Taito 'itauyeya Paulo 'oina. Coinega Paulo 'iyaliyaya, ma 'idi leta heluwena bewa 'ileleya. Leta bewa 'alona 'ihe'ote'otetela tauna 'ina paihowa weyahina, ma wete helau weyahina, ta wete 'ana tolomugiyao weyahidi. Pauloina 'ina miya 'ana mwau Keliso 'ina paihowa 'oina 'ihe'ote'oteteleya, ta wete meKolinita tupwadi 'iguguyedi ma 'oinega nuwatuhu galadi 'oidiyega sida nuwabui.

#### *Loyauwedo*

<sup>1</sup> Yauwedo meKolinita 'omi Yehoba 'ina tohekalesiyao ma 'omi wete Yehoba 'ana tohemisao tupwa Akaya mabwaiyana 'alona, 'imi leta bewa tasidai Timoti 'i'abihetegauwa ma 'aleleyawa, taugu Paulo 'oiguwega, weyahina Yehoba 'ina hesinuwega yahetohewaila Yesu Keliso weyahina. <sup>2</sup> Tamadai Yehoba ma 'ida Bada Yesu Keliso 'idi helauwega tuwa wamiya yaliyaya.

#### *Paulo 'ina miyamwau 'alona 'iloyauwedowa Yehoba 'oina*

<sup>3</sup> Yehoba tauna 'ida Bada Yesu Keliso Tamana 'oina taloyauwedo weyahina 'iboinamo tauna 'atemuyamuya huhuna, <sup>4</sup> ma 'ima miyamwau 'oidiyega 'i'abihe yaliyayemaiya, 'oinega sowasowahima taudi tomiya mwau wete 'a'abihe yaliyayadi, weyahina 'ima 'ebe yaliyayaina Yehoba 'oinega 'alobeya sowasowahina 'alagubale 'oidiya ma taudi wete siyaliyaya. <sup>5</sup> Moisa, Keliso 'ana muyao tauma 'alotohodiya, ma 'oinega Keliso 'ina yaliyaya 'i'ebwaemaiya, tauna 'ina yaliyaya gide.

<sup>6</sup> Ma 'eguma tauma muya 'aloba, beno 'omi 'ami 'abi he'atepatu ma 'ami 'abihetena weyahidi. Ma wete 'eguma 'ama 'ebe 'abihe'atepatu 'aloba, beno 'omi 'imi 'atepatu weyahina, 'eguma 'imi miyamwau gide tauma 'ima miyamwau, ma wete 'eguma 'oidiyega wa'alama'i'ita nata 'omi wa'atepatu. <sup>7</sup> Coinega 'ima hemisa 'omi weyahimi 'ihewaiwai pwaiya, weyahina 'asanapugomiya 'abehega wamuyamuya tauma gide, ma wete wa'atepatu gide tauma.

<sup>8</sup> Ciyagwao, nuwanuwagu ma wasanapu 'ima muyamuyao weyahidi, tutaina Esiya 'oina 'amiyamiya, beno 'ima nuwagala madou hedade 'anuwatuhuya 'abehega nata 'a'amasana. <sup>9</sup> Cana 'ita gide 'ama 'alehaowedi sida lohe'amasimai, ma hesi Yehoba tuwa sowasowahina ma to'amasana 'i'abihe toholodi, ta miyamwauina 'alobeya, 'oinega 'anuwatuhu yahiya 'abehega geya tauma 'ima waiwai, ma hesi Yehoba 'ina waiwai 'oinega 'i'abihetemaiya.

<sup>10</sup> Ma 'i'abihete pwaimaiya 'ebe hesilaeina 'oinega, ma wete 'anuwatuhu yahiya 'abehega 'abwa 'i'abihetemai tuta mabwaiyana 'oidiya.

<sup>11</sup> Comi wete 'imi 'ahwanoiyega walememai ma 'oinega maisa bwebwe'ana Yehoba 'oinega nata 'aloba, mabwaiyada 'ida 'ahwanoi 'oidiyega, 'oinega mabwaiyada taloyauwedo 'abihetenaina 'alobeya weyahina.

#### *Paulo nuwanuwana ma 'ihabo'ena meKolinita 'oidiya*

<sup>12</sup> Caigeda nuwatuhu weyahina yayaliyaya madouna, beno yasanapuya moisa 'ima mumuga 'ausalana ma dumwaluna tomota 'oidiya, geya sanapu bale'u 'oidiyega, ma hesi Yehoba 'ina helau 'oima 'oinega, ma gide 'apaihowa madouna 'oimiya. <sup>13</sup> Cimi leta bewa 'aleleyawa mabwaiyana sowasowahina wahasilidi ma wasanapudi, 'oinega nuwanuwagu ma wanuwa sabwalena, <sup>14</sup> gide wasanapu pwaiya tupwana, ma 'abwa Bada Yesu 'ina sabwelo madouna 'oina wayaliyaya tauma weyahima, ma tauma wete 'ayaliyaya weyahimi.

<sup>15</sup> Comi yasanapugomiya 'imi hemisa 'oima, 'oinega mwalo nuwanuwagu yahabo'enegomi maluwa ma 'ane yaliyaya waloba. <sup>16</sup> Caigeda 'igu 'adau Masidoniya weyahina 'ana sauga, ma heluwena beno Masidoniyege yada hilama 'oimiya, ma 'oinega 'igu 'adau weyahina wada lemegau ma yada tauya Yudiya.

<sup>17</sup> Sahena wanuwatuwatu 'abehega 'igu gwaeina mwalo weyahina yahenuwa naluwa. Geya. Sahena yatagwatagwala 'abo'abo gide taudi mumuga bale'u 'ana tomuliyao. <sup>18</sup> Gide tuwa Yehoba 'ina gwae moisa, taugu wete 'igu gwae 'oimiya gwae moisa, ma sahena yatagwatagwala 'abo'abo.

<sup>19</sup> Gidemusa Yehoba Natuna Yesu Keliso, tauna weyahina Silibenosi ma Timoti ba'idagwao 'alohatotowa 'oimiya, 'abehega Yesuina geya 'itagwala 'abo'abo, ma hesi tuta mabwaiyana 'itagwala bwaibwaina. <sup>20</sup> Weyahina Yehoba 'ina gwae hemisa mabwaiyadi talobaloba Yesu 'iboimo 'oinega. Coinega Yesuina saninega tatagwalegita, ma Yehoba tahepwatuwe. <sup>21</sup> Cida miya bwebwe'ana Keliso ba'idadai Yehoba 'i'ebwaegita, 'omi ma tauma, ta tauma 'ima paihowa 'i'ebwaemaiya, <sup>22</sup> ma 'ina 'ila'ilala 'oida 'ilaguya, beno Yaluyaluwana 'ateda, ma 'oinega tasanapugita 'abehega tauda 'ina tomotaiyao.

<sup>23</sup> Bewa Yehoba 'isanapuya yagwaegwae moisa 'abehega mwalo geya yabo'enegomi 'imi tupwa Kolinita 'oina weyahina geya nuwagu ma yaloina pa'alegomi 'imi mumuga galana weyahina. <sup>24</sup> Geya 'abehega 'ahetoloina pa'alina 'oimiya 'imi hemisa ta 'imi tapwalolo weyahidi, weyahina 'imi hemisege watoholo pa'ala pwaiya, ma hesi sabi lemegomi 'imi yaliyaya weyahina.

## 2

<sup>1</sup> Moisa, tutaina mwalo yanuwatuhuya 'abehega sahena yabo'ebo'enegomi ma ya-heheliyegomi ta debamwadina ya'ebwa'ebwaegomi 'iyamiuina 'ina mumuga galana weyahina. Beno namo 'imi leta yaleleyawa. <sup>2</sup> Coinega yanuwatuhuya 'abehega 'eguma 'igu gwaeyega ya'abihenuwa galegomiya, 'oimiyega taiya 'i'abihe yaliyayegau? <sup>3-4</sup> Ma 'imi letaina yaleleyawa ma'igu 'atemuya ma ma'igu nuwagala ma 'igu dou, ma 'oinega tutaina 'eguma yabo'enegomi wa'abihe yaliyayegau, ma sahena yanuwatuhuya, ma hesi mabwaiyami yahemisaegomiya ma yanuwatuhu yahiya 'abehega taugu 'igu yaliyayega 'omi wete wayaliyaya. Coinega 'imi letaina yaleleyawa, geya 'abehega ya'abihe nuwa galegomi ma hesi 'igu helau madou hedade 'oimiya wasanasanapu.

### *Caigeda loheya 'ina pui sinuwasam*

<sup>5</sup> Ma 'iyamiu galanaina 'i'abihenuwa galegauwa tupwana tuwa, ma hesi 'omi nuwagala madouna 'i'ebwaegomiya, ma geya nuwagu ma yaheliye, <sup>6</sup> weyahina galana 'ana maisa 'ilobeya mabwaiyami 'oimiyega, tuwa sowasowahina. <sup>7-8</sup> Sahena mwau madou hedade talagulagu 'oina, 'oinega 'oimiya ya'ahwanoi ma 'ina puiina wanuwasam ma wa'abihe yaliyaya hila ma wete ba'idamiu wahe'iyayagu hila.

<sup>9</sup> Bewa weyahina 'imi leta yaleleyawa ma 'abehega yatohogemi, nuwana loina mabwaiyana wamuliyedi, bo geya. <sup>10</sup> Ceguma taiya 'ina pui wanuwasam taugu wete yanuwasam, ma to'aha taugu yanuwasamuya beno 'omi 'imi bwebwe'ana weyahina, Keliso matana, <sup>11</sup> 'amuge ma Seitani 'ihewaiwai 'oida, weyahina 'ina nuwatuhu galana tasanapu pwaiya.

### *Loina hauhauna 'ana tohepwailao*

<sup>12</sup> Mwalo yatauya Tilowasi, Keliso tetelina sabi lohatotoina, ma Yehoba 'eda bwebwe'ana 'iso'eya, 'igu lohatotoina weyahina, <sup>13</sup> ma hesi yanuwatuhuya madouna weyahina tasigu Taito geya yaloba. Coinega meTilowasi ya'ebesinediya ma yatauya Masidoniya. <sup>14</sup> Coinega Yehoba 'oina yaloyauwedo, weyahina Keliso 'ina waiwaiyega tuta baibaiwana 'i'abi'abi hewaiwaiyemai ma 'ima paihowega Keliso 'ana sanapu tupwa mabwaiyana 'oidiya 'idabalala gide hoyo mahaina 'ausala hedade 'idabalala ma tomota sinisoniso, <sup>15</sup> beno Keliso 'ina paihowa Yehoba 'oina, ta weyahina 'alolohatoto gide hoyo mahaina 'ausalana 'alelewane taudi Yehoba 'i'abi'abihetedi 'oidiya, ta wete taudi nata sihesilae

hataya 'oidiya. <sup>16</sup> Taudi tohesilae 'oidiya mahainaina 'ana lotohona tuwa gide to'ama mwahuluna, ma hesi taudi Yehoba 'i'abihetediya mahainaina 'ana lotohona tuwa gide yawasi 'ausalana mahaina gide. Hisa tomota sowasowadi paihowa bewa? Geya baibaiwana. <sup>17</sup> Ma tauma geya gide tolohatoto 'abo'abowao, taudi 'idi wasawasa tuwa weyahina silolohatoto, ma hesi tauma ma'ama hemisa, gide Yehoba 'iloinemaiya, 'oinega tauna matana Keliso tetelina 'agwaegwaene moisa.

### 3

#### *Loina hauhauna weyahina*

<sup>1</sup> Togidega, 'abehega 'agwae gagasa mumugama 'ausalana weyahina? Geya'abwa. Ma hesi tomota tupwadi nuwanuwadi 'idi leta 'igwaeya, "Leta bewa 'ana to'ewa'ewa mumugana 'ausalana."

Genuwama 'ima letaina walele gidemusa, bo nuwana tomota hagadi 'ima letao sileledi gidemusa. <sup>2</sup> Weyahina 'omi tuwa 'ima letaowedi, ma tomota mabwaiyadi 'oimiyege sihasili, ma 'oinega 'imi mumuga 'ausalana si'ita ma 'ima paihowa 'oimiya sida sanapu 'abehega 'ausalana, <sup>3</sup> ma nage 'oinega wahe'itadi 'abehega 'omi tuwa leta Keliso 'oinega, Yehoba tauna mayawasina Yaluyaluwanega 'ileleya, geya 'ebelele 'oinega, nuwana dimwa tabatabadi 'oidiya, ma hesi tomota 'atena, ma 'omi gide leta, ta 'a'ebwayaegomiya tomota mabwaiyadi 'oidiya.

<sup>4</sup> Bewa weyahina Keliso 'ina 'abihetenega 'atepatuwa Yehoba matana. <sup>5</sup> Geya 'abehega tauma weyahima 'agwaegwae hanehane ma 'agwae, "Tauma 'ima bwebwe'ana 'oinega paihowa 'apaipaihowadi," ma hesiyage Yehoba 'iboimo 'i'abi'abi hewaiwaiyemai, <sup>6</sup> ma sowasowahina 'ina loina hauhauna weyahina 'ahehetopaihowa. Loinaina hauhauna geya lelelelena, ma hesi Yaluyaluwa Tabuna 'oinega, weyahina loina lelelelena 'ama 'i'ebwaegita, ma tuwa loina Yaluyaluwa Tabuna 'oinega yawasida miyamiya hatayana 'i'ebwaegita.

<sup>7</sup> Ma loina miyamiyana 'ama weyahina, ma dimwa tabatabadi 'oidiya silelediya ta Yehoba Mosese 'i'ebwaeya, 'asilala madouna 'alona, ta Mosese manina 'oinega 'asilala 'isaesae ma tupwana 'imiya 'amana, ma 'oinega wete 'isawala, ma tutaina Mosese manina 'isaesae meIsileli geya sowasowahina ma si'ebubu. <sup>8</sup> Coinega tasanapuya 'abehega loina hauhauna Yaluyaluwa Tabuna 'oinega 'ina wasawasa madou hedade 'asilalaina. <sup>9</sup> Loina miyamiyana 'oinega tomota yatala siloba ma hesi loina ma'ina wasawasa 'asi'asilalana. Loina hauhaunaina mumuga dumwaluna 'i'ebwaegita ta 'ina wasawasa 'asilala hedade. <sup>10</sup> Wete loina miyamiyana 'ina 'asilala 'ana 'ita gide sawasawalina, ma hesi loina hauhauna 'ina 'asilala bwebwe'ana hedade. <sup>11</sup> Loina miyamiyana geya 'ida miyahataya, ma hesi 'asi'asilalana, 'oinega tasanapuya 'abehega loina hauhauna tauna miyamiya hatayana ma 'asilala hedade.

<sup>12</sup> Tanuwatuhu yahiya 'abehega loina hauhauna 'oinega tabwebwe'ana hataya, ma weyahina ta'atepatu, <sup>13</sup> ma Mosese geya gide tauda, weyahina Mosese manina 'asilalana nata 'isawala, ma 'i'ahu 'au'ausiya ta 'abehega sahena meIsileli si'ita'ita.

<sup>14</sup> Moisa, meIsileliyedi nuwa potapotadi, mwalohene ta nige, weyahina 'abwa tuwa bewa 'eguma loina miyamiyana 'ana hasila sihesagohe, nuwadi sitala 'au'ausidi 'idi nuwa potepotega, ma sahena sinuwanuwa sabwalena, ma Keliso 'iboimo sowasowahina tala'ausina 'i'ewa yahuledi.

<sup>15</sup> Moisa, mwalohene ta nige 'eguma Mosese 'ina loinao sihesagohedi, nuwadi sitala'au'ausidi ma geya sinuwa sabwelenidi, <sup>16</sup> ma hesi 'eguma 'aigeda taiya 'i'itahila 'ida Badaina 'oina 'ihemisa, beno tala'au'ausina 'i'ewayahule. <sup>17</sup> Ma Bada tauna Yaluyaluwa, ma Badaina Yaluyaluwana 'ada tolihasa. <sup>18</sup> Coinega geya 'aigeda 'ahubodaboda manida 'imiyamiya, ma Bada 'ina wasawasa 'asi'asilalana 'oina ta'e'ebubuna, ta tupwana ma tupwana 'ibuibuigita tauna 'ana 'ita 'asi'asilalana gide. Paihowa bewa Badaina 'oinega, tauna yaluyaluwa tuwa.

## 4

*Casilala weyahina*

<sup>1</sup> Cima paihowa bewa Yehoba 'ina 'atemuyemuyega 'i'ebwaemaiya, 'oinega sahena 'awe'awe'a. <sup>2</sup> Mumuga galadi ta 'abo'abowedi 'alogwahata pwaidiya, ma wete sahena Yehoba 'ina gwae 'abuibui 'abehega he'ita 'abo'abo 'oinega 'ahehe'ita, ma hesi he'ita moisa 'agwaegwae latuwe, ma 'omi mabwaiyami tauma 'ima mumuga 'ausalana Yehoba matana wa'ita. <sup>3</sup> Ma 'eguma tupwana tomota 'ima he'itao geya sisanapu, siboidimo hesilae 'ina 'eda 'oinega sitautauya. <sup>4</sup> Taudi geya sihemisa, weyahina bale'u bewa 'ina bada 'i'abihegibu pwaidiya, ma 'oinega 'asilala sahena si'ita'ita, beno Keliso 'ina wasawasa tetelina, tauna 'ana 'ita Yehoba gidemusa.

<sup>5</sup> Cima lohatoto geya tauma weyahima, ma hesi Yesu Keliso tauna 'ida Badaina weyahina, ma tauma 'imi topaihowao tuwa Yesu weyahina. <sup>6</sup> Weyahina Yehobaina 'igwaeya, "Guguyou 'oina 'asilala 'ida saehane," ma Yehoba 'atema 'isaesaehane, 'oinega tauna 'ina 'asilala Keliso manina 'a'ita'ita.

*Yehoba 'ina wasawasa wahida we'awe'adi 'alodiya*

<sup>7</sup> Cima wasawasa galewega 'wapima we'awe'adi 'oidiya 'imiyamiya, gide tobwatobwa wasawasa walata miyamiyana 'alona, 'oinega tomota sisanapumai 'abehega 'ima waiwai madouna geya tauma 'oimega, ma hesi Yehoba 'oinega. <sup>8</sup> Tomota 'ama mwau baibaiwadi si'ebwaemaiya ta hesi geya sowasowadi ma si'abihe galemai, 'oinega 'ima nuwatuhu baibaiwana ta geya 'abe'u. <sup>9</sup> Cama mwau loheloheya si'ebwaemaiya, ma tuwa Keliso 'abwa ba'idamai 'amiyamiya. Wete sihunuhunumai, ma hesi geya silohe'amasimai. <sup>10</sup> Tuta mabwaiyana 'oidiya 'ana 'ita gide wahima si'ama'amasa, gidemusa Yesu 'i'amasa, ma 'oinega tomota si'ita Yesu yawasina 'oima 'ipaipaihowa.

<sup>11</sup> Moisa, mayawasima tuta bewa bale'uwa, ma Yesu weyahina tuta mabwaiyana 'oidiya 'ama 'alehao silolohe 'amasimai ma hesi Yesu yawasina 'wapima we'awe'adi 'alodi 'ihehetapewa.

<sup>12</sup> Gide tuwa 'amasa tauma 'aloma 'ipaipaihowa, ma 'oinega 'omi yawasi bwebwe'ana 'oimiya 'ipaihowa.

<sup>13</sup> Mwalo 'aigeda loheya 'ileleya 'igwaeya, "Taugu yahemisaeya, 'oinega yagwae latuweya." Tauma wete 'ima hemisa tauna gide, ta 'oinega 'ima hemisega 'ahehpwaila, <sup>14</sup> ma Yehoba 'asanapuya 'abehega 'ida Bada Yesu 'amasega 'i'abihe toholo hileya, ma tauma wete Yesu ba'idamai 'i'abihe toholo hilemai, ma 'omi wete ba'idamayao 'itoegita tauna matana.

<sup>15</sup> Bewa mabwaiyana 'omi weyahimi, ma 'oinega Yehoba 'ina helau 'ilelelelewana tomota mabwaiyadi 'oidiya, taudi ba'idadao taloyauwedo madouna, ma wete Yehoba 'ana hep watu ta 'ina wasawasa 'imadou hedada.

<sup>16</sup> Coinega geya 'awe'a. Bwagana wahida siwe'awe'a, ma hesi tuwa 'aloda tahehe'ehau sabwelo 'aigeda 'aigeda 'oidiya. <sup>17</sup> Muyamuyaedi bewa meyameyahadi tuwa, ma tuta to'uto'upanamo 'oidiya talobalobadi, ta hesi si'abihe waiwaigita ma 'abehega 'ida wasawasa bwebwe'ana hedade ma miyamiya hatayana 'abwa ta'ewa. <sup>18</sup> Weyahina 'ida 'ebemasi ginaulaedi geya ta'ita'itadi 'oidiya. Moisa, ginauledi ta'ita'itadi sawasawalidi tuwa, ma hesi ginaulaedi geya tada 'itediya taudi ginaula miyamiya hatayadi.

## 5

*Cida hada galewa*

<sup>1</sup> Wahida gide 'ida hada bale'uwa, tasanapuya 'eguma 'ilotaligeha, 'ida hada hauhauna taloba galewa, geya tomota nimadiyega sipaipaihowa, ma hesi miyamiya hatayana Yehoba tauna 'oinega. <sup>2</sup> Bewa bale'uwa ma'ida nuwagala tayamwayamwa, nuwanuwada 'ida hada galewa ta'ewa, <sup>3</sup> gide 'ada 'ale'o hauhauna ma 'ausalana ta'ote, ma sahena talolobugewa.



<sup>4</sup> Moisa, 'abwa hada bale'uwa 'oina tamiyamiya ma'ida muyamuyao, ta 'ida nuwatuhu baibaiwadi tuwa, ma geya 'abehega 'ada 'ale'owao tahalolodi, ma hesi 'abehega 'ada 'ale'o hauhauna ta'ote, ma 'oinega wahida talatala sawalidi sibui yawasida hauhauna 'oina.

<sup>5</sup> Bewa mabwaiyana Yehoba 'i'atububuya ma 'i'ebwaegita, ta 'ila'ilala 'i'ebwaegita ma 'oinega 'ana moisa tasanasanapu beno Yaluyaluwa Tabuna. <sup>6</sup> Coinega tuta mabwaiyana 'oidiya ta'ate'atepatu, ma tasanapuya 'abehega 'eguma 'ida hada bale'uwa 'oina tamiyamiya beno geya Bada 'ina tupwa, <sup>7</sup> weyahina 'ida hemisa 'oinega tatautauya ma geya 'ebubunega.

<sup>8</sup> Coinega ta'ate'atepatu, ma nuwanuwada ta'amasa ta wahida ta'ebesinedi, ma Bada 'ina tupwa talatu. <sup>9</sup> Ma 'eguma wahida tamiyamiya bo nuwana 'eguma ta'amasa, 'ida 'ebemasi tuwa to'aha Badaina nuwanuwana.

<sup>10</sup> Weyahina 'abwa 'eguma tutaina Keliso 'ina wagahata wasawasa 'oina 'imiyatoi sabi loinegita, mabwaiyada 'ada maisa 'oinega taloba, nuwana 'ausalana nuwana galana, gide 'ida paihowao bale'uwa.

### *Tomota hauhaudi*

<sup>11</sup> Bewa weyahina tauna Badaina 'amatauteya ta tomota 'oidiya 'alohatotowa. Yehoba 'ima mumuga 'isanasanapu ma yanuwatuhu yahiya 'omi wete wasanasanapumai 'abehega bwebwe'ama. <sup>12</sup> Geya 'a'ahwa bwebwe'anemai tauma 'ima gwae bewa 'oidiyega, ma hesi taudi sinuwanuwatuhu hewasawasa weyahina, ma geya 'atedi weyahina, 'eguma wagwae hila 'oidiya wahe'itadi 'abehega tauma 'ima mumuga 'ausalana.

<sup>13</sup> Ceguma 'ima gwae bewa gide gwae yauyaule beno Yehoba weyahina, ma hesi 'eguma 'ima gwae dumwaluna beno 'omi weyahimi. <sup>14</sup> Keliso 'ina helauwega 'agwaegwae, weyahina tauna tuwa 'ama toloina. Moisa tuwa, tauna mabwaiyada weyahida 'i'amasa, 'oinega mabwaiyada gide to'amasao. <sup>15</sup> Ta 'ina 'amasa mabwaiyada weyahida huhuna, 'abehega 'abwa mayawasida, geya tauda 'ida paihowao sabi paihowaidi, ma hesi Keliso weyahina, tauna weyahida 'i'amasa ta wete 'itoholo hila.

<sup>16</sup> Mwalo, 'igu nuwatuhu 'abehega Keliso loheya galana ma hesi yanuwabui pwaiya, 'oinega sahena tahesihsinuwa tomota 'oidiya 'abehega bwebwe'adi bo galadi, beno mebale'u 'idi nuwatuhu gide, <sup>17</sup> ma hesi wanuwatuhuyahi 'abehega taiya Keliso 'oina 'imiyamiya, tauna 'ihetomota hauhauna. Cina mumuga miyamiyaina 'igumwala pwaiya, ma hauhauna 'ilatuwa.

<sup>18</sup> Cehele bewa Yehoba 'oinega, tauna Yehobaina Keliso 'ina paihowega 'itoegita tauna 'oina ta ba'idadai tahe'iyayiyagu hila, ma wete 'ida paihowa 'i'ebwaegita ma tomota ta'ewedima he'iyayiyaguina 'oina. <sup>19</sup> Moisa, Yehoba gide Keliso 'alona 'imiyamiya, ta mebale'u 'itoegita tauna 'oina sabi he'iyayiyagu hila, ma 'ida puiyao 'inuwasamudiya ma sahena tahehemaisadi, 'oinega he'iyayiyagu hila tetelina 'i'ebwaegita ma tahehpwaila tomota 'oidiya.

<sup>20</sup> Tauma Keliso 'ana tohepwailao ta Yehoba 'oimega 'ilolohatoto 'oimiya, ma Keliso weyahina 'a'ahwanoiyegomi ma Yehoba 'oina wahe'iyayiyagu hila. <sup>21</sup> Yehobaina tauda weyahida Keliso 'iloineya, tauna geya 'eta 'ina pui, ma hesi Yehoba 'itagwaleya ma Kelisoina weyahida 'ihetogala, ma 'ane tauna ba'idadai Yehoba 'ina mumuga bwebwe'ana ta'ewa.

## 6

### *Paulo 'ina muyamuyao*

<sup>1</sup> Coinega Yehoba ba'idamai 'apaipaihowa, ta 'oimiya 'a'ahwanoi ma sahena 'ina helauwa'ahwa ginaula bwagabwagae, <sup>2</sup> weyahina 'igwaeya, "Tuta bwebwe'ana 'oina 'enau yahesagoheya, 'oinega 'abihetena 'ana tuta 'oina ya'abihete pwaigowa." Moisa, bewa tuta bwebwe'ana ma 'ami 'abihetena waloba.

<sup>3</sup> Cabihetena bewa tomota mabwaiyadi weyahidi, genuwama ma 'aigeda taiya 'ilolo-mugiyemai 'ima paihowao weyahidi. Geya 'aigeda wete 'ebe'etoboda 'alagulagu, <sup>4</sup> ma hesi 'ima paihowao mabwaiyana bwebwe'ana 'ahe'itaeya 'abehega Yehoba 'ina topaihowao bwebwe'ama. Cima paihowa bewa: 'alama'i'ita madouna, muyamuya, miyamwau, hesilae, <sup>5</sup> sapi, 'ebepai, 'aleha, paihowa, 'oyatola masala, gomale, <sup>6</sup> mumuga 'asilalana, sanapu, 'atemuyamuya, he'iya'iyagu, Yaluyaluwa Tabuna 'ateda, ta wete helau moisa, <sup>7</sup> ta 'ima gwae moisa, ma wete Yehoba 'ina waiwai 'oima, ma 'ima 'ebe'aleha 'ebeulaulamega ma 'adigegeyemega, beno 'ima mumuga bwebwe'ana.

<sup>8</sup> Tuta tupwana tomota si'ahwa bwebwe'anemai ma tuta tupwana si'ahwa galagalae-mai. Wete si'ahwa 'abo'abowemai ma hesi geya 'a'abo. <sup>9</sup> Tomota geya sisanapumai ma hesi Yehoba 'isanapumaiya. Tauma gide 'ama'amasima ma hesi yawasima 'ausalana. Si'abi'abi hegalemaiya ma geya silohe'amasimai. <sup>10</sup> Tauma ma'ima nuwagala ma hesi 'atema 'ayaliyaliyaya. Tauma gide wewelohe, ma hesi wasawasa 'aheheguyai tomota baibaiwadi 'oidiya. Geya wete 'ima tobwatobwamo ma hesiyage ginaula mabwaiyana 'oima simiyamiya.

<sup>11</sup> Ciyagwao meKolinita 'omi, 'agu lotohona mabwaiyana yahepwaila latuwa 'oimiya, <sup>12</sup> ta 'ateguwa yahelauwegomiya, ma hesi geya wayaliyaya 'oiguwa. <sup>13</sup> Coinega natugwao, 'ilobwaineya ma 'atemiyega wahelauwegau.

#### *Sahena guguyou tupwaina 'oina waluhulu*

<sup>14</sup> Sahena watubwetubwegomi taudi geya sihemisa Keliso 'oina ba'idamiyao, weyahina geya sowana mumuga bwebwe'ana ma galana ma'aigeda wapaihowa. Wete geya sowana 'asilala ma guguyou ba'idana sihe'iya'iyagu. <sup>15</sup> Wete geya sowana Keliso ma Tomudulele ba'idana sihe'iya'iyagu. Ceguma Kelisoina 'uhemiseya, geya sowasowahina tomota taudi geya sihemisa ba'idamwao wapaihowa mahemahetena. <sup>16</sup> Wete geya sowasowahina hali 'ebe hemisao talagu luhuwedi Yehoba 'ina hada 'alona. Yehoba tauna mayawasina ta 'ina hada tauda, ma 'igwaeya,

“Taugu taudi 'oidiya yalo'asa ma 'alodiya yayawala dadana ma taugu 'idi Yehoba ma taudi 'igu tomtao!’ <sup>17</sup> Coinega Yehoba wete 'igwaeya, ‘Hali boda 'oidiyega walatu ma wa'ebesinedi, ma sahena ginaula bi'ibi'idi wa'abi'abitohodi, ma yatoegomi 'igu tupwa, <sup>18</sup> ma 'oiguwa wa'ahwa tamana ma 'omi natugwao meloheyami ma mewahinemi.’ Bewa Yehoba Tohewaiwai tauna 'ina gwae.”

## 7

<sup>1</sup> Ciyagwao, Yehoba 'ina gwae hemisaedi tahesagohediya, 'oinega wahida ma yaluyaluwada ta'abihe 'asilaladi ginaula bi'ibi'idi 'oidiyega, ma tahe'ehau moisa ta ma'ida he'asisi Yehoba 'oina.

#### *Paulo 'iyaliyaya meKolinita weyahidi*

<sup>2</sup> Ciyagwao wahelauwemai, weyahina 'ima mumuga mabwaiyana 'ausalana. Geya 'aigeda wete nuwami 'ada 'abihe galey, bo 'a'abihe 'wanigomi, bo 'a'abowegomi. <sup>3</sup> Cigu gwae bewa geya sabi heliyegomi, weyahina nuwama wa'ewa pwaiya, mwalo gide yahegwagomiya ma 'abehega 'omi ba'idagwao tamiya 'ama'amasa. <sup>4</sup> Yayaliyaya pwaiya weyahimi ma yahehpwatu, ta 'igu nuwatuhu 'ibwebwe'ana pwaiya weyahimi. Bewa tuwa 'ima miyamwau, ma hesi tuwa weyahimi yayaliyaya madouna. <sup>5</sup> Mwalo 'atauyama 'ebwa Masidoniya, geya 'aigeda wete 'ebe'aiyawasi 'aloba, ma wete tuwa miyamwau mabwaiyana, beno 'aleha, tupwa mabwaiyana 'oidiya, ma matauta 'atema. <sup>6</sup> Ma Yehoba, tauna tonuwagala 'adi to'abiheyaliyaya, tauma 'i'abihe yaliyayemaiya ginaula 'eluwa 'oidiyega, beno Taito 'ina tauyama 'oinega, <sup>7</sup> ma wete tetelimi 'oinega, weyahina Taito 'ihewagauwa, 'igwaeya, “MeKolinitaedi nuwanuwadi ma 'utauya 'uhabo'enedi. Ma 'ino gwae weyahina sitagwala pwaiyediya, ta 'idi pui 'oinega sinuwabuiya ma'idi dou. Bewa ya'iteya ta yayaliyaya madouna.”

<sup>8</sup> Mwalo 'imi leta yaleleya, ta 'i'abihenuwa mwauwegomiya, ma taugu wete weyahimi yanuwagala, ma tuwa sahena yanuwanuwasagala letaina weyahina, weyahina 'omi 'imi nuwagala tuta to'uto'upanamo 'oina. <sup>9</sup> Coinega taugu yayaliyaya, geya 'imi nuwagala weyahina, ma hesi weyahina 'imi nuwagala 'oinega wanuwabuiya 'imi puiyao 'oidiyega. Cimi nuwagalaina walotohoya 'abehega Yehoba 'oinega 'inaoma, ma geya 'eta wete 'oimiya galana yapaihowa. <sup>10</sup> Moisa, nuwagala Yehoba 'oinega ginaula 'ausalana ma 'i'abihe nuwabuigita, ma 'oinega 'abihetena taloba. Coinega sahena nuwagalaina talologwahate. Ma hesi hali nuwagala bale'u 'oinega 'abwa 'ilohe'amasigita.

<sup>11</sup> Wa'ita, 'imi nuwagala bewa 'oinega Yehoba bo'i 'i'abihetegomiya, ma wahetapewa, ta wahewaiwaiya ta 'imi mumuga 'ibwebwe'ana mabwaiyana, 'oinega galanaina weyahina wagamwasowala pwaiya, ma wamatauta, ma nuwanuwami yatauyawa 'oimiya, ma wahewaiwaiya ma togalaina 'ana lolina wa'ebwaeya. Ginaula mabwaiyana 'oidiyega 'imi paihowa 'ausalana wahe'itaeya.

<sup>12</sup> Cimi leta mwalo yaleleyawa geya 'iyamiu topuimo weyahina, ma geya loheyaina 'ipuiya 'oina weyahina, ma hesi 'omi mabwaiyami weyahimi, ma 'abehega Yehoba matana wahe'itae 'igu gwae 'ana hematamatana bwebwe'ana. <sup>13</sup> Coinega yayaliyaya pwaiya madouna. Wete Taito 'ina yaliyaya tauma 'ima yaliyaya 'ilohepoiya, weyahina Taitoina 'imi mumuga 'ausala 'oinega 'iyaliyaya. <sup>14</sup> Mwalo Taito 'imiyamiya ta yahepwatuegomiya, ma Taito matanega 'i'ita pwaiya, 'oinega geya wete 'ebe debamwadina 'oiguwa. Ma hesi 'igu gwae mabwaiyana 'omi weyahimi 'ana moisa 'ilatu pwaiya.

<sup>15</sup> Taito 'imi hematamatana mabwaiyana 'inuwatuhu yaahiya, tutaina tauna 'oina watagwalegomiya ma'imi 'ateyoho, 'oinega nuwana wa'ewa bwaibwainiya.

<sup>16</sup> Ma taugu wete yayaliyaya 'imi mumuga mabwaiyana 'ausalana weyahina.

## 8

### *Cehle 'awawa weyahina*

<sup>1</sup> Ciyagwao, nuwanuwama ma tohekalesiyao Masidoniya 'alona wasanapudi 'abehega Yehoba 'i'abihetediya 'ihenuwa laguwediya ta 'ehle 'awawa 'ausalana silaguya. <sup>2</sup> Taudi towewelohe gide tuwa 'ebetohona silobeya 'idi miya 'ana mwau 'oinega, ma hesi tuwa ma'idi yaliyaya helau bwebwe'ana hedade silaguya.

<sup>3</sup> Yagwaeya moisa, meMasidoniyaedi 'atedi sitagwalediya ta 'idi ginaulao si'ehle 'awawediya ma'ana loheposeyana. <sup>4</sup> Ma si'ahwa'ahwanoi waiwai 'oima ma 'eguma sowasowahina sihelau Yelusalema 'ana tohekalesiyao 'adi sagu weyahina.

<sup>5</sup> Tauma 'ima nuwatuhu ma sihelau, ma'iyamo 'idi 'ehle madou hedade, weyahina Bada 'oina sitagwala nugetediya, 'oinega wete sitagwalediya tauma 'oima, gide Yehoba 'ina nuwatuhu.

<sup>6</sup> Coinega Taito 'ahewae, 'agwaeya, "Mwalo 'uhegaina ma meKolinita 'u'abihetediya 'idi 'ehle 'ana paihowa weyahina, 'oinega 'u'abihetedi wete ma silosalohi."

<sup>7</sup> Comi wamumuga 'ausala pwaiya 'imi paihowa baibaiwana 'oidiyega, beno hemisa ma hepwaile ma sanapu ma hepwaile ma wete 'imi helau 'oima, 'oinega sowasowahimi ma 'ehle 'ausalana wete wapaihowa.

<sup>8</sup> Bewa 'igu gwae tuwa ma geya 'abehega yaloinegomi, ma yanuwatuhuya tohekalesiyao tupwana sihetapewa 'ehle 'awawa weyahina, 'oinega 'ebetohona bewa yalaguya ma ta'ita nuwana wa'ehle bwaibwaina, bo geya.

<sup>9</sup> Comi 'ida Bada Yesu Keliso 'ina helau wasanapuya, tauna 'ina wasawasa madouna 'i'ebesineya ma 'iheweweloheya sabi 'abihetegomi, ta 'abehega 'ina hewewelohe 'oinega 'omi wahewasawasa.

<sup>10</sup> Coinega nuwatuhu ya'ebwaegomi. Bolime 'igumwala nuwanuwami ma wahelau, 'oinega wahelau nugeta, ta hali boda mulimiya. <sup>11</sup> Coinega sowasowahina ma walosalohi. Mwalo wahetapewa ta wahegaineya, 'oinega nata wete 'imi 'atetagwalega to'aha 'oimiya simiyamiya 'oidiyega helauina walosalohi. <sup>12</sup> Sahena wagwaegwae ma wagwae, "Geya 'eta ginaula 'oima ma 'oinega 'ahelau." Hesi tuwa wahetapewa ma to'aha 'oimiya

'imiyamiya 'oidiyega wahelau, ma Yehoba wa'abihe yaliyaya. <sup>13</sup> Bewa geya 'abehega 'omi 'imi helau 'ana mwau madouna ma hali 'asa 'idi helau 'ana mwau muhemuhena, ma hesiyage mahemahetena tuwa. <sup>14</sup> Ceguma bewa tuwa 'imi tobwatobwa baibaiwana, sowasowahina ma hali 'asa wa'abihetedi 'idi miyamwau 'oidiyega, ma 'eguma to tuta taudi 'idi tobwatobwa baibaiwana si'abihetegomi wete, 'eguma wamiya mwau. Coinega wada hemahemahetena. <sup>15</sup> Gidemusa gwae 'imiyamiya Buki He'asisi 'oina 'igwaeya, “Taudi sihe'auta madouna 'adi 'e'ahai geya 'ana tupwamo, ma taudi sihe'auta 'i'iuna 'adi 'e'ahai tuwa sowasowahidi, eeta sihemahemahetena.”

*Taito ma'iyanao sitautauya Kolinita*

<sup>16</sup> Yehoba 'oina yaloyauwedo, weyahina Taito 'ina nuwatuhi madouna 'i'ebwae pwaiya, ma tauna 'i'abihetegomi, gide tauma wete 'ima nuwatuhi. <sup>17</sup> Coinega tutaina 'ahegwaeya ma 'ihabo'enegomi 'itagwala bwaibwaineya, weyahina beno tauna 'ina nuwatuhi madouna.

<sup>18</sup> Coinega wete tasidai 'aigeda Taito ba'idana 'ahetunediwa, tauna tologuguya 'aigeda wasa bwebwe'ana weyahina, ma sanina madouna tohekalesiyao 'oidiya, <sup>19</sup> ma tohekalesiyao 'ina paihowa si'ebwaeya ta tauna ba'idamai 'asakosakowasi 'ehele weyahina sabi 'abihetegomi, ma 'oinega tomota Yehoba sihepwatuwe.

<sup>20</sup> Geya nuwama ma 'eta taiya 'ilomugiyemai 'igwae, “Helau 'awawaina madouna ma geya sida 'itayahi bwaibwainiya.” <sup>21</sup> Ma hesi nuwanuwama tuta baibaiwana 'oidiya 'ada paihowa dumwalu Yehoba matana, ma wete tomota matadiya.

<sup>22</sup> Tasidai wete 'aigeda ba'idadiu 'ahesumaneyawa, tauna 'asanapuya 'abehega tohemisa moisa 'ina paihowa baibaiwana 'oidiyega, ma bewa tuwa 'omi 'imi muga bwebwe'ana 'ihesagoha pwaiya ta 'ihemiseya, 'oinega nuwanuwana madouna 'ihabo'enegomi sabi 'abihetegomi wete.

<sup>23</sup> Taito wasanapuya 'abehega ba'idagu 'apaihowa mahemahetena 'ami lema weyahina, ma tasidaowedi taudi tohekalesiyao weyahidi sipaipaihowa, ta weyahina tomota Keliso sihepwatuweya. <sup>24</sup> Coinega 'ilobwainegomiya ma tasidaowedi wahelau bwaibwainidi, ma boda hekalesiya baibaiwadi si'ahwa moisaegomi, ma wete si'ahwa moisaemai 'ima hepwtu 'imi helauina weyahina.

9

*Cehele tohekalesiyao wewelohedi weyahidi*

<sup>1</sup> Sahena leta 'oinega yahenuwa laguwegomi 'imi 'ehele tohekalesiyao weyahidi, weyahina wasanapu pwaiya, <sup>2</sup> ma wete yasanapugomiya 'abehega 'eheleina weyahina wayaliyaya, 'oinega 'omi ya'ahwa bwebwe'anegomiya meMasidoniya 'oidiya, yagwaeya, “Tupwa Akaya 'oina taudi meKolinita sihetapewa pwaiya ta 'idi helau si'atububuya bolime 'igumwala 'oina.” Coinega baibaiwadi 'oidiyega wete gide sipaipaihowa 'ese.

<sup>3</sup> Geya nuwagu ma 'igu hepwtu weyahimi tomota si'ahwa 'abo'abowegau, 'oinega tasidaowedi yahesumanediwa sabi 'abihetegomi ma 'imi helauina wa'atububu, gide 'imi hetapewa yahepwaiya 'oidiya. <sup>4</sup> Ceguma 'abwa tupwana meMasidoniya ba'idagwao 'atauyawa ma si'italobegomi 'imi helau geya wa'atububu, bewa 'ebedeba mwadina 'oiguwa ma wete 'oimiya, 'igu hepwtu nugetaina weyahina.

<sup>5</sup> Coinega yanuwatuhuya 'abehega 'ilobwaineya ma tasidaowedi sida tauyawa nugeta sabi 'abihetegomi 'imi helauina wagwae hemisaeya 'ana 'atububu weyahina, ma tauyu tuta muliyetega wete yatauyawa. Weyahina sahena lohesuhesumana 'oinega wahelau ma hesi 'atetagwalega.

<sup>6</sup> Chehele 'ana nuwatuhi gide tanoha. Tauna 'idauna 'i'iuna 'i'etahi 'i'iuna, ma tauna 'idauna madouna 'i'etahi madouna.

<sup>7</sup> Coinega 'omi 'aigeda 'aigeda tauna 'ina nuwatuhi 'oinega 'i'ehele, geya 'abehega lohesuhesumanega nuwana he'i'imega, ma hesi 'atetagwalega, ta bewa Yehoba 'ina 'ebe yaliyaya.

<sup>8</sup> Ma Yehobaina sowasowahina ma 'ehete mabwaiyana 'ida losiwa 'oimiya, eema tuta baibaiwana sowasowahimi, ma wete ma'ana tupwa madouna 'imi 'ehete weyahina.

<sup>9</sup> Caigeda gwae lelelelena Buki He'asisi 'oina Yehoba weyahina 'igwaeya, “Ceheleyao 'isaweyaneya towewelohe hali tupwa ma hali tupwa 'oidiya, tauna mumugana dumwaluna ta miyamiya hatayana.”

<sup>10</sup> Tauna hewana ma 'e'ahai 'adi To'ehete 'imi ginaulao 'i'ebwaegomi ma simadou bwaibwaina, ma mumugami bwebwe'ana 'oinega 'etahi madouna waloba, <sup>11</sup> ma 'imi wasawasa 'oinega sowasowahimi tobwatobwa madouna waheguyaiyedi, ma wete 'imi helauina tauma 'abwa 'a'ehete tohewewelohe 'oidiya, ta 'oinega taudi siloyauwedo madouna Yehoba 'oina. <sup>12</sup> Cimi helau bewa 'oinega tohekalesiyao wewelohedi 'adi lema silobaloba, ma wete Yehoba 'ana hepwtu madouna 'ilatu.

<sup>13</sup> Ma toweweloheyedi sida yaliyaya 'adi lema weyahina, ma hali boda wete 'adi lema 'ausaladi 'oimiyega weyahina, ma 'imi hematamatana Keliso wasana 'oina weyahina sida 'ahwa moisa, ma wete Yehoba sida hepwtuwe, <sup>14</sup> ma wete sida 'ahwa'ahwanoi ma'idi nuwa'ewa weyahimi, Yehoba 'ina helau madouna 'atemiya 'ilaguya weyahina.

<sup>15</sup> Moisa, Yehoba 'oina taloyauwedo 'ina helau madou hedade weyahina.

## 10

### *Paulo 'ina paihowa*

<sup>1</sup> Taugu Paulo ya'ahwa'ahwanoi 'oimiya, gide Keliso 'ina mumuga nuhana 'oinega, weyahina 'omi wagwaeya, “Paulo 'ina mumuga nuhana 'eguma ba'idadai tada hegwae, ma hesi bwagega 'iheliyegita.” <sup>2</sup> Coinega ya'ahwanoi 'oimiya ma wamumuga dumwalu, 'amuge ma 'igu tauyawa 'oimiya 'oina yaheliyegomi, gidemusa nata yaheliyedi taudi sigwaeya, “Paulo tauna 'ina nuwatuhi 'ipaipaihowa gide tuwa me bale'u 'idi paihowa.”

<sup>3</sup> Moisa, bale'uwa tamiyamiya, ma hesi 'ida paihowa geya me bale'u gide. <sup>4</sup> Wete 'ida tobwatobwa geya me bale'u 'idi tobwatobwa 'aleha gidemusa, ma hesi 'ida tobwatobwa hagana ta 'oidiyega Tomodulele 'ina 'ebeloinao tahewaiwai sinedi, Yehoba 'ina waiwaiyega. <sup>5</sup> Cida tobwatobwaedi 'oidiyega sowasowahida tahewaiwaisine mumuga galana, he'ohe'ohe, ma gwae hane, beno ginaulaedi Yehoba 'ana hemisa si'etobodeya, ma hesi tomota 'idi nuwatuhiwao tagibuidi ma Keliso 'ina gwae sida hematamatani. <sup>6</sup> Coinega 'eguma tutaina wahematamatana bwaibwaina, taudi tologwahataowedi 'adi loina 'oidega siloba.

<sup>7</sup> Comi tomota 'adi 'itamo 'oina wa'e'ebubuna, ma to'aha 'atediyega geya wasanapu. Ceguma taiya 'igwae hane 'abehega tauna Keliso 'ina boda, sowasowana 'inuwatuhi yahimai 'abehega tauma wete Keliso 'ina bodao, <sup>8</sup> ta loina Yehoba 'i'ebwaemaiya sabi 'abihetegomi ma hesi geya sabi 'abihegalegomi, ma 'eguma yagwaehane hedade 'igu loina weyahina, sahena wete 'ebedeba mwadina yalobaloba.

<sup>9</sup> Sahena leta waiwai 'oidiyega ya'abi'abihe matautegomi, <sup>10</sup> gide tupwana tomota sigwae, “Paulo 'ina leta 'oidiyega 'iheliyegita ma hesi 'eguma matada 'igwaegwae, 'ana 'ita we'ana tuwa, ma 'ina gwae geya bwebwe'ana.” <sup>11</sup> Coinega togwaeyedi sowasowana sinuwatuhuyahi 'abehega to'aha bwagega 'igu leta 'oidiyega yahehegwae nata yapaihowa tuwa, 'eguma to tuta yatautauyawa 'oimiya.

<sup>12</sup> Sahena yahehegwae gomi yagwae, “Taugu Paulo 'igu mumuga 'ausalana,” gide tupwana tomota sigwae, “Tauma 'ima mumuga bwebwe'ana hedada, ta 'iyamayao geya bwebwe'ana.” Cidi gwaeyedi gide tuwa yauyauledi 'idi gwae.

<sup>13</sup> Ma taugu sahena yagwaegwae hane ginaula baibaiwadi weyahidi, beno namo 'igu paihowaina Yehoba 'i'ebwaegauwa weyahina yagwae hanehane, ma 'igu paihowaina 'asa tupwana 'oidiya ma 'omi wete 'oimiya. <sup>14</sup> Coinega sowasowagu ma 'oimiya yaloina. Moisa, 'omi 'igu 'ebeloina 'alona, weyahina taugu wasa bwebwe'ana Keliso weyahina ya'ewa nugeteya 'oimiya.



<sup>15</sup> Geya 'abehega hali tomota 'idi paihowa 'oimiya weyahina yagwae hane, taugu tuwa 'igu paihowa weyahina, ma yanuwatuhu yahiya 'abehega 'eguma 'imi hemisa 'imadou, nata 'igu paihowa 'oimiya wete 'imadou hedade, <sup>16</sup> 'oinega nuwanuwagu wasa bwebwe'ana yalohatotowe taudi 'asa bwagabwaga 'oidiya, ma hesi gesowana yagwaehane 'eguma yapaihowa tuwa taudi wasa bwebwe'ana sihesagoha pwaiya 'oidiya. <sup>17</sup> “Ceguma taiya nuwanuwana ma 'igwae hanehane, 'ilobwaineya ma Bada namo weyahina 'ida gwae,” <sup>18</sup> Wete 'eguma taiya taunamo 'i'ahwa bwebwe'ane, Yehoba geya'abwa 'iyaliyaliyaya weyahina. Ma hesi 'eguma Yehoba tomota 'i'ahwa bwebwe'ane, nata 'ebeyaliyaya.

## 11

### *Paulo 'ina paihowa*

<sup>1</sup> Cigu gwae bewa gide yauyaule yagwaegwae, ma hesi 'eguma wa'alama'i'ita, 'igu nuwatuhu yahepwaila latuwe 'oimiya.

<sup>2</sup> Weyahina nuwanuwagu 'omi, gidemusa Yehoba nuwanuwana tauda, 'oinega yagwae hemisaegomiya Keliso 'oina, 'omi gidemusa gumalaulau 'aigeda 'ina mumuga bwebwe'ana mabwaiyana, ma loheya ba'idana sihai. <sup>3</sup> Ma hesi ya'ateyohowa weyahimi, 'amuge ma 'imi nuwatuhu si'wani ma 'imi 'atetagwala Keliso 'oina wa'ebesine, gide mwalo mwata Ibe 'i'aboweya 'ina gwae hotohoto 'oinega, ta Ibeina 'iwe'a.

<sup>4</sup> Coinega 'eguma taiya 'itautauyawa ma Yesu tetelina 'oimiya 'ilohatotowe ma geya tauma 'ima lohatoto gide, tauna 'oina watagwa tagwalegomi. Comi wasa bwebwe'ana 'oina watagwala pwaiyegomiya ta Yaluyaluwa Tabuna 'oimiya walotohoya, ma tuwa hali tetela ma hali yaluyaluwa 'oidiya watagwa tagwalegomi.

<sup>5</sup> Cimi tologuguyao hauhauidiyedi 'omi wanuwatuhuya 'abehega sihane sinegauwa, ma hesi geya sowasowahidi. <sup>6</sup> Ceguma geya yada gwae bwaibwaina, ma hesi yasanapu moisa ma tuta mabwaiyana 'igu sanapuina yahe'ita pwaidiya 'oimiya.

<sup>7</sup> Mwalo Yehoba wasana 'oimiya yalohatotoweya, ma geya 'eta maisa weyahina yagwaegwae 'oimiya, 'oinega wanuwatuhuya yalopuiya weyahina taugu ya'abi suluhegauwa ma 'abehega 'omi wahane. <sup>8</sup> Cana 'ita gide yayagayagaha hali hekalesiyao 'oidiyega, weyahina mane si'ebwaegauwa ma 'abehega 'omi weyahimi yapaihowa.

<sup>9</sup> Wete tutaina 'imi tupwa yamiyamiya ma yagomagomale geya yada 'ahwanoiya 'oimiya, ma hesi tupwana tasidao Masidoniya 'oinega sitauyama ta lema si'ebwaegauwa; weyahina geya nuwagu ma mwau 'oimiya yalagu 'agu 'e'ahai weyahina. Mwalo geya 'aigeda mwau 'oimiya yalagu, ma tuta sinaonaoma 'oidiya wete sahena yalagulagu. <sup>10</sup> Cigu gwae hane bewa gwae moisa Keliso 'oinega, ma sahena 'aigeda taiya 'igu gwae bewa 'i'eto'etobode Akaya tupwano mabwaiyadi 'oidiya.

<sup>11</sup> Ma to'aha huhuna? Nuwana 'igu gwae bewa weyahina ta yalogwahategomiya? Sahena! Yehoba 'isanapu bwaibwainigauwa yahelauwegomiya.

<sup>12</sup> Wete 'igu paihowa weyahimi tuwa 'abwa yada paipaihowa, ma 'oinega ya'abihe lolagudi taudi togwae gagasa sigwaeya 'abehega 'idi paihowa 'oimiya gide taugu 'igu paihowa. <sup>13</sup> Weyahina to'abowedi 'adi 'ita gide Keliso 'ana tohepwailao ma hesi galana sipaipaihowa. <sup>14</sup> Taudi gide Seitani, mumugana galana, ma hesi 'ana 'ita 'ibuiya gide anelose 'asi'asilalana. <sup>15</sup> Coinega sahena nuwami 'ihehenainaida 'eguma Seitani 'ina topaihowao wete 'adi 'ita sibuidi ma topaihowa dumwaludi gide. Ma tuwa, tuta 'ebelosaloha 'oina 'idi mumuga galadi weyahidi taudi nata sigala hedade.

### *Paulo 'ina muyamuyao*

<sup>16</sup> Yada hegwaegomi wete sahena wa'ahwa'ahwa yauyaulegau, ma 'eguma wa'ahwa yauyaulegau tuwa, 'ausala, ma 'igu gwae yauyaule wahesagohe, ma 'oinega tupwana yada gwae gagasa.

<sup>17</sup> Cigu gwaegagasa bewa geya 'ida Bada 'ina loinega, ma hesi yauyaulegu tuwa.  
<sup>18</sup> Weyahina tomota mabwaiyadi sigwaegwae gagasa ginaula bale'u weyahidi, 'oinega taugu wete yada gwaegagasa taudi gide.

<sup>19</sup> Ma 'omi hesi sanasanapumi ta tomota yauyauleidi 'oidiya wa'atetagwala, <sup>20</sup> 'eguma paihowa mwaudi si'ebwaegomi, ma 'oinega 'oimiyega siyagayagaha, ma si'abowegomiya, ma ma'idi nuwahane manimiya sisapi. <sup>21</sup> Ma taugu we'awe'agu, 'oinega geya yada sapigomiya, ta bewa 'ebedeba mwadina 'oiguwa.

Ta 'eguma 'imi tologuguyaedi to'aha weyahidi sigwaegwae gagasa, hesi tuwa taugu yahetohe yauyaule ma yagwae gagasa ginaulaedi weyahidi.

<sup>22</sup> Ceguma taudi me'beliu, taugu gide.

Ceguma taudi Isileli 'ina susuwao, taugu gide.

Ceguma taudi Ebalahamo tubunao, taugu gide.

<sup>23</sup> Ceguma taudi Keliso 'ina hewahewaliyao bwebwe'adi, taugu 'ina hewali bwebwe'ana hedade.

Cigu gwaegagasa bewa gide yauyauleigu. Cigu guibiga 'oinega yanugeta sinediya, 'igu luhu deliya baibaiwa hedade, 'agu sapiyao wete baibaiwana ta tuta mabwaiyana 'oidiyega 'abehega tuwa nata ya'amasa.

<sup>24</sup> MeYudiya balaeyega sisapigauwa, 'ana baibaiwa teti naini, ta sapiina bewa gide ma nima 'ai'aigeda yalobediya. <sup>25</sup> Matoi wete sihunugauwa 'aiwe 'oidiyega, ma'aigeda dimwega sihunu dadanegauwa, matoi waga 'oinega yadamana ni'u 'awawa, ma sabwelo 'aigeda ma nihuwana 'aigeda 'idoegauwa.

<sup>26</sup> Ma wete 'igu 'adau 'oidiyega 'ebehesilae yalobediya we'aha madoudi ma toyagahao 'oidiyega, ma 'igu bodao meYudiya 'oidiyega, ma taudi geya meYudiya 'oidiyega, ta 'asa madoudi 'oidiyega, ta pwtatula 'oidiya, ta wete ni'u 'awawa, ma wete tasidao 'abo'aboidi 'oidiyega, <sup>27</sup> 'ima paihowa madouna, ma miyamwau 'adi tuta 'oidiya, nihuwana geya yada 'enowa, ma gomale ta tani'oyahala, wete tuta tupwana baibaiwana geya 'agumo, ta geya 'igu hadamo, ma geya 'agu 'wamamo tuta gogai 'oidiya. <sup>28</sup> Ma wete sabwelo mabwaiyana 'oidiya yanuwatuhutu madouna tohekalesiyao tupwa baibaiwadi weyahimi. <sup>29</sup> Coinega 'eguma taiya 'iwe'a, taugu wete gide yawe'a, ma 'eguma taiya 'ebetupa 'oina 'ibe'u, beno 'igu 'ebe nuwagala.

<sup>30</sup> Ma wa'ita, 'igu gwaegagasa 'igu we'aomo weyahidi. <sup>31</sup> Yehoba tauna 'ida Bada Yesu tamana tada hep watuwe hataya, ma tauna 'isanasanapugau 'abehega 'igu he'ote'otetela bewa gwaegagasa moisa. <sup>32</sup> Mwalo, kini Alesitasi 'ina tuta toloina 'aigeda 'asa Damasiko 'oina 'itoho waiwai ma 'abehega ma'ina tolo'alehao si'abiyahigau, <sup>33</sup> ma hesi 'iyagwao si'abihetegauga, ta 'ali 'ana 'ahwa'eda tabwaninega siso'eya, ta 'oinega silagu suluhegauga kodowega bale'uwa, ta 'agu 'alehaowedi 'oidiyega yadena.

## 12

### *Paulo 'ina 'eno'ita'ita*

<sup>1</sup> Sowasowahigu ma yagwae gagasa, ma gagasa geya wete 'eta 'ina lemamo, ma hesi tuwa yagwae gagasa 'igu 'eno'ita'ita weyahina 'ida Bada 'oinega.

<sup>2</sup> Caigeda Keliso 'ina loheya yasanapanu, tauna bolime potini sigumwala 'oina Yehoba 'itoeya galewa, nuwana 'wapina bo yaluyaluwanamo, 'iyamuge, Yehobamo 'isanapanu. Citoeya ta 'ihaneya galewa 'aigeda 'oina, ta 'ihaneya wete galewa heluwena, ma wete 'ihaneya galewa hetoina 'oina. <sup>3</sup> Yasanapuya 'abehega Yehoba loheyaina 'itoeya 'ina tupwa bwebwe'ana ta wasawasaina 'oina, ma nuwana 'wapina bo yaluyaluwanamo, geya yasanapanu. Yehobamo 'isanapanu. <sup>4</sup> Ma loheyaina megalewa 'idi gwaegagasa tupwana 'ihesagohediya, ma geya sowasowahina ma 'igwae latuwedi weyahina he'ahe'asisidi.

<sup>5</sup> Sanapuina weyahina yagwae gagasa, ma sahena taugu weyahigu yagwaegwae gagasa. Beno namo 'igu we'ao weyahidi yada gwaegagasa.

<sup>6</sup> Ma hesi 'eguma to tuta yagwae gagasa, beno gwae moisa ma geya gwae yauyaule. Ma tuwa sahena yagwaegwae gagasa, weyahina nuwanuwagu ma wanuwawanuwatuhu to'aha 'igu paihowa wa'itediya, nuwana 'igu gwae wahesagohediya, bewa namo weyahidi, ma sahena to'aha wete weyahigu.

<sup>7</sup> Ma Yehoba geya nuwana ma yanuwahane 'igu 'eno'ita'ita bwebwe'adi weyahidi. Coinega ginaula 'aigeda Seitani 'oinega 'i'ebwaegauwa, ta 'alogu 'ana lotohona gide ma'ana 'aliliya, ta yanuwawanuwagala, ma geya sowasowahigu yanuwahane. <sup>8</sup> Mwauina bewa weyahina matoi Yehoba ya'ahwanoiyeya ma 'i'ewayahule. <sup>9</sup> Ma 'igu 'ahwanoiina 'ihemaiseya 'igwaeya,

“Sahena. Ma hesi 'igu helaumo sowasowahiu, ta 'ino we'a 'oina 'igu waiwai 'ulotohoya 'abehega sowasowahina.”

Coinega 'igu we'ao weyahidi yayaliyaliyaya ma yada gwae gagasa, weyahina 'igu tuta we'a 'oidiya Keliso 'ina waiwai 'oiguwa 'imiyamiya. <sup>10</sup> Coinega Keliso weyahina yatagwatagwala mwau baibaiwana 'oidiya, gide we'a 'ahwa galagala, tuta mwau, 'aleha, hesilae. Weyahina 'eguma yawe'a bewa 'igu 'ebehewaiwai!

#### *Paulo 'ina nuwatuhu meKolinita weyahidi*

<sup>11</sup> Moisa, 'omi 'imi gwae weyahina yahepwaila pwaiya gide yauyauleigu. Cilob-wainegomiya wa'ahwa bwebwe'anegau, ma hesi wa'ahwa galegalegauwa, eeta 'imi tohepwailao hauhaudi wa'ahwa bwebwe'anediya. <sup>12</sup> Cila'ilalaeidi matamiya ma'igu he'alama'i'ita yapaihowediya, beno ginaula 'ebehenainaida ma paihowa waiwai, ma 'oidiyega wada sanapugau 'abehega taugu Keliso 'ana tohepwaila moisa. <sup>13</sup> Wete 'igu paihowa weyahimi tuwa gide 'igu paihowa hekalesiyao mabwaiyadi weyahidi, ma 'aigedamo ginaula geya 'oimiya yapaihowa, 'agu lema mane ya'ewa'ewa hekalesiyao baibaiwadi 'oidiyega, ma 'omi 'oimiyega geya. Ciyagwao, ya'ahwanoi 'oimiya ma 'igu pui bewa wanuwasam.

<sup>14</sup> Tuta 'i'iuna ma yatauyawa 'oimiya. Mwalo sauga 'eluwa yahabo'enegomiya, ma bewa nata hetoina yatauya, ma sahena 'aigeda wete mwau yalagulagu 'oimiya 'agu lema weyahina, ma hesi 'omi tuwa nuwanuwagu, ma geya nuwagu 'imi tobwatobwa. Gwagwama geya lema sida 'ebwaediya tamadiyao 'oidiya, ta tamadiyao hesi si'e'ehel natudiyao 'oidiya, 'oinega taugu 'ilobwainegauwa ma 'omi natugwao 'oimiya yada 'e'ehel. <sup>15</sup> Yatagwala pwaiya ma 'igu tobwatobwa ma 'igu tuta mayawasigu wete yada 'eheloya yaluyaluwami sabi 'abihetedi. Taugu 'igu helau 'oimiya madouna, 'oinega togidega ta 'oinega 'omi 'imi helau 'oiguwa 'i'iuna tuwa?

<sup>16</sup> Ma tupwami wagwae, “Paulo 'ima tobwatobwa geya 'ida 'ewediya, ma hesi 'ina sanapu madouna 'oinega 'i'abowemaiya.”

<sup>17</sup> Geya! Loheloheyaedi yahesumanediwa, 'igu loinega togidega si'abo 'esa? Geya, 'awa?

<sup>18</sup> Mwalo Taito yaloiniya ta tasidai 'aigeda ba'idana yahesumanediwa 'oimiya. To'aha Taito 'ina 'abo 'oimiya? Taito ma taugu 'ima nuwatuhu ta 'ima mumuga 'oimiya mahemahetena 'awa?

<sup>19</sup> Ciyagwao, sahena wanuwawanuwatuhu 'abehega 'igu gwae bewa 'oidiyega ya'ahwa bwebwe'anegau matamiya. Geya, ma hesi mabwaiyana Yehoba matana Keliso 'ina gwae yagwaegwaeneyawa sabi 'abihe waiwaiyegomi.

<sup>20</sup> Moisa, ya'ateyohowa, ta geya nuwagu yatauyawa ma 'imi mumuga ya'ita lobeya 'abehega geya bwebwe'ana, ma 'igu tauyawa weyahina wanuwagala, 'eguma taumimo wahe'ohe'ohena ma wahe'ipi'ipi ma wagamwasowala, nuwana walotobwatobwa hedade, ma 'iyamiyao wa'ahwa galagalaedi, ma wanuwahane, nuwana wapaihowa bwagabwaga.

<sup>21</sup> Cigu 'ateyohoina 'abehega 'eguma yatauya hilawa 'oimiya ma Yehoba 'ebedeba mwadina 'i'ebwaegau matamiya, ma taudi mwalo sipuiya, ma 'idi mumuga bi'ibi'ina ta pui ta ganawala 'oidiyega geya wanuwabui, taudi si'abihenuwa mwauwegau, ma weyahidi yada dou.

## 13

*Cebelosaloha*

<sup>1</sup> Nata yahabo'enegomi, beno hetoina 'igu habo'ena 'oimiya. Ceguma taiyawedi nuwanuwadi ma 'iyadaina 'aigeda 'oina siyatala, 'ilobwaineya ma tomota 'eluwa bo 'etoi sihepwaila mahemahetena 'ina pui weyahina.

<sup>2</sup> Mwalo 'igu habo'ena heluwena 'oina 'imi topuiyedi ma baibaiwami yalohatogomiya, gidemusa tuwa bewa bwaga yamiyamiya ma yahenuwa laguwegomi 'abehega 'eguma yatauya hilawa 'oimiya loina mwauna ya'ebwaedi topuiyedi mwalo ma tupwadi wete ba'idadiyao. <sup>3</sup> Beno 'ebe'ita 'oimiya ma 'oinega wasanapugau 'abehega Keliso 'oiguwega 'igwaegwae. Tauna Kelisoina 'ina paihowa 'oimiya geya we'ega ma hesi waiwaina. <sup>4</sup> Moisa si'abi hekeloseya gide loheya we'awe'ana, ma hesi Yehoba 'ina waiwaiyega mayawasina 'imiyamiya. Tauma wete wahima we'adi tauna wahina gide, ma Keliso yawasina 'oinega sowasowahima 'aloinegomi, Yehoba 'ina waiwaiyega.

<sup>5</sup> Coinega waboi watohogemi, togidega Keliso 'ana hemisa wa'abiyahiya, bo geya. Togidega, wasanapuya 'abehega Keliso 'atemiya 'imiyamiya, ma 'eguma geya, beno weyahina geya 'imi hemisamo. <sup>6</sup> Yahemisa wete ma 'eguma watohomai wasanapumai 'abehega geya 'ada we'a.

<sup>7</sup> Tauma 'a'ahwa'ahwanoi Yehoba 'oina ma 'abehega sahena wapuiyedi, geya 'abehega wa'ahwa tohepwaila moiseumai, ta 'eguma tomota geya si'ahwa tohepwaila moiseumai, 'ada yaliyaya tuwa 'omi 'imi mumuga dumwaluna weyahina. <sup>8</sup> Weyahina tauma geya sowasowahima mumuga dumwaludi 'a'etobodedi, ma hesi ginaula dumwaludi weyahidi 'apaipaihowa.

<sup>9</sup> Coinega 'ima we'ao 'oidiya 'ayaliyaliyaya 'eguma 'omi wahewaiwai, ma wete 'a'ahwa'ahwanoi Yehoba 'oina ma watoholo pa'ala bwaibwaina.

<sup>10</sup> Cimi leta bewa bwagega yalelediwa ma 'eguma tutaina yatauyawa sahena yaloiloina pa'ala 'oimiya, weyahina loina 'ida Badaina 'i'ebwaegauwa geya sabi 'abihegalegomi, ma hesi sabi 'abihe waiwaiyegomi.

<sup>11</sup> Ciyagwao kaiyoni. Cigu lohatoto wada hesagohe ma wanuwabui. Wete 'imi nuwatuhu 'aigeda 'oinega wada miya siwaloha, ma Yehoba tauna helau ma nuwadaumwala huhudi ba'idamiu wada miya yaliyaya. <sup>12</sup> Ciyamiyao ba'idamiyao wa'atusapwaligomi lotohona bwebwe'ana 'oinega. <sup>13</sup> Keliso 'ana tohemisao 'ebwa 'idi helau 'oimiya.

<sup>14</sup> Bada Yesu Keliso mabwaiyami 'i'atemuyemuyegomi ma Yehoba 'ihelauwegomi ma Yaluyaluwa Tabuna wete ba'idamiu wahe'iyaiyagu moisa. Taugu Paulo.

## GALETIYA MeGaletiya 'idi leta Paulo 'ileleya

Mwalo tupwa Galetiya 'oina Paulo 'iguguya Yesu weyahina, beno 'ina 'amasa kelose 'oina ta 'ina toholohila weyahidi, 'oinega meGaletiya baibaiwadi sihemisaeya ta muliyetega Paulo 'i'ebesinediya, ta 'iguguya sakowasi tupwana wete 'asa 'oidiya.

Muliyetega tupwana meYudiya sitauya Galetiya ma sihe'ita, sigwaeya, “Cana lobwaina ma 'wapi'upwa\* wa'ewa, 'ane wahe meYudiya, ma 'ima loinao wamuliyedi, ta muliyetega 'eguma wahemisa Keliso 'oina, nata Yehoba 'iyaliyaya weyahimi; ta hesi 'eguma geya waheYudiya geya'abwa 'iyaliyaya weyahimi.

Coinega Paulo wasa 'ihesagoheya, ta nuwana 'igala meYudiya 'idi 'abo weyahina, ta meGaletiya 'idi leta bewa 'ileleya, ma 'oidiya 'ihewasaeya ma 'abehega sihasili, ma sisanapu 'abehega hemisamo Yesu Keliso 'oina sowasowahina ma 'oinega Yehoba 'iyaliyaya 'oida, ta geya meYudiya 'idi loinao 'adi muliya weyahina.

Wete 'eguma Yesu tahemisa, Yaluyaluwa Tabuna huwainao 'ausaladi 'ateda silatu; ma 'eguma geya, nata 'wapi huwainamo galadi silatu.

### *Loyauwedo*

<sup>1</sup> Taugu Paulo Yesu Keliso 'ana tohepwaila 'aigeda, ta 'igu hetohepwaila geya tomota 'idi hesinuwege ma hesi Yesu 'ina hesinuwege, ma Tamada Yehoba wete 'ina hesinuwa. Tauna Yesu Keliso 'amasega 'igihetoholo hileya. <sup>2</sup> Ma baibaiwadi tasidaowedi mahetegwao 'ebwa 'amiyamiya, 'imi leta 'ahewasaeyawa 'omi totapwalolo, boda 'aigeda 'aigeda tupwa Galetiya 'alona, 'oimiya.

<sup>3</sup> Tamada Yehoba ta 'ida Bada Yesu Keliso 'idi helauwege tuwa wamiya bwebwe'ana. <sup>4</sup> Weyahina Tamada Yehoba 'ina nuwatuhi bewa gidemusa, eeta Yesu tauna 'itagwaleya ta 'i'amasana 'ida puiyao weyahidi, ma 'oinega tuta bewa galana 'ina waiwaiyega sowasowana 'i'abihetegita. <sup>5</sup> Eeta weyahina Yehoba 'oina tada hepwtu hataya. Emeni.

### *Tetela bwebwe'ana 'aigeda tuwa*

<sup>6</sup> Cebe nuwahrenainaida bewa 'oiguwa, weyahina mwalo Yehoba 'ihesinuwegomiya ma 'abehega helau Keliso 'oinega waloba, 'oinega tetelinaina wahemisaeya, ma hesi walomwayamwayauwa bewa tuwa ta walogwahateya, ta hali tetela wahemisaeya. <sup>7</sup> Moisa, Tetela Bwebwe'ana 'aigeda tuwa, ma geya wete 'eta tetela 'imiyamiya, ma hesi tupwana tomota sigihe'wanigomiya weyahina nuwanuwadi ma Keliso tetelina sigibuidi ma 'oinega si'abowegomi. <sup>8</sup> Keliso tetelina wahesagohe nugeteya beno moisa, 'oinega geya'abwa 'aigeda taiya hali tetela 'ida 'ebwa'ebwaegomi. Tauma, bo aneloseyao galewega geya'abwa hali tetela 'a'ebwa'ebwaegomi. Ma 'eguma taiya tetela bwebwe'ana 'ilagubui nata mwau 'iloba Yehoba 'oinega. <sup>9</sup> Mwalo 'ahepwaila pwaiya 'oimiya, ma bewa wete yahepwaila hila 'abehega 'eguma taiya hali tetela 'i'ebwaegomi, nata muya 'iloba Yehoba 'oinega.

<sup>10</sup> Togidega, tomota 'adi hepwtu weyahina yanuwatuhi, bo Yehoba 'ana hepwtu? Ta 'eguma tomota 'idi nuwatuhi yapaipaihowa, geya sawasawahigu ma Keliso weyahina yahetopaihowa.

### *Paulo 'ina nuwabui*

<sup>11</sup> Ciyagwao, wanuwatuhuyahi 'abehega tetela bwebwe'ana yahepwaileyawa geya tomota 'oidiyega, <sup>12</sup> weyahina geya tomota 'idi hepwaileo, nuwana 'idi he'itao 'oidiyega, ma hesi Yesu Keliso 'ina he'ita 'oiguwa 'oinega. <sup>13</sup> Ta 'igu mumuga mwalo, tutaina meYudiya 'idi boda 'alona yamiyamiya, wahesagoheya, 'abehega Yehoba 'ina tohekalesiyao ya'abihemuya hedadediya ta nuwanuwagu yamutudi. <sup>14</sup> Coinega 'iyagwao Yudiya 'alona yahewaiwai sinediya, weyahina tubudao 'idi mumuga weyahina yahetapewa madouna ta 'iyagwao 'idi hetapewa tupwana tuwa.



<sup>15</sup> Tutaina geya yatole, ma mwalo hene Yehoba 'ina helauwega 'ihesinuwa nugete-gauwa, <sup>16</sup> eeta tauna 'ina nuwatuwega Natuna 'oiguwa 'ihe'itaeya, ma yahetohepwaila weyahina tupwa ganamuli 'oidiya. Coinega geya yatautauya tomota 'oidiya sabi hesilala tetela bewa weyahina. <sup>17</sup> Geya yatauya Yelusalema Keliso 'ana tohepwaila nugenugeti 'oidiya, ma hesi yatauya Alebiya, eeta nobwa yamiyamiya 'ana siga yalohihila Damasiko 'oina.

<sup>18</sup> Coinega bolime 'etoi mulina yahaneya Yelusalema ta Pita yahabo'eneya, eeta nobwa mahetegu sabwelo pipitini 'amiyamiya. <sup>19</sup> Ma Keliso 'ana tohepwailao baibaiwadi geya ya'itadi. Beno tuwa Yemesa, tauna 'ida Badaina tasina. <sup>20</sup> Cigu gwae bewa Tamada matana yaleleyawa, geya 'aigeda wete 'abo.

<sup>21</sup> Coinega Yelusalema ya'ebesineya ma yatauya Siliya ma Silisiya 'idi tupwa 'oidiya. <sup>22</sup> Ta tutaedi 'oidiya Keliso 'ina tohekalesiyao Yudiya tupwanao 'oidiya manigu geya sida sanapuya. <sup>23</sup> Beno tuwa teteligu sihesagoheya 'abehega “Tauna mwalo 'igihegihe muyegita, ma 'inuwabui pwaiya, ta tetelina mwalo 'i'etobodeya tuta bewa 'iloguguyaeya.” <sup>24</sup> Coinega tohekalesiyaowedi Yehoba sihepwatuweya 'igu nuwabui weyahina.

## 2

### *Keliso 'ana tohepwailao sitagwala Paulo 'ina loguguya 'oina*

<sup>1</sup> Coinega bolime potini sigumwala, Banaba mahetegu 'ahanehila Yelusalema, ta wete Taito yatoeya, ba'idamai 'ahaneya.

<sup>2</sup> Ta 'igu tauya lamuna weyahina Yehoba 'ihe'itegauwa 'abehega 'ilobwainegauwa ma yahane Yelusalema, ee yahaneya, yatauya tohekalesiyao 'idi tohanugetao 'oidiya, eeta 'aboimamo 'ahehegwaegwae, ta tetelaina yaloguguyaeya tupwa ganamuli toguguyou 'oidiya yahepwaileya tohanugetaowedi 'oidiya, weyahina genuwagu ma 'igu guguyaina mwalo gide loguguya besobeso, eeta tohanugetaedi sitagwala 'igu loguguyaina 'oina.

<sup>3</sup> Ma Taito 'i'wayabumaiya ta 'ahaneya Yelusalema, tauna gwama Gilisi 'aigeda, geya gwama Yudiya, ma hesi tohanugetaowedi geya Taitoina siloinae ma 'abehega 'wapina si'upwa 'ana 'ila'ilala gidemusa meYudiya taudi. <sup>4</sup> Ma 'iyadao tupwadi 'abo'abodi silugu pwaima, nuwanuwadi si'ita 'ida miya bwebwe'ana Yesu Keliso mahetamai, ta taudi geya tohemisa moisa, weyahina nuwanuwadi ma lolina mwauna si'ebwaemai. <sup>5</sup> Coinega 'idi lolina mabwaiyana 'alogwahatediya, ma geya 'eta to'aha 'oina 'atagwala. Geya'abwa 'ida tetelaina moisa weyahimi silagulagubui. <sup>6</sup> Ma wete taudi tohekalesiyao sihesaniyediya 'abehega 'idi tohanugetao, taudi geya 'eta wete loheposeyana silagulagu 'igu guguya 'oina. Ma taugu 'igu nuwatuwu 'abehega geya ginaula madouna 'eguma taudi sihesaniyediya tohanugetao bo to'aha, weyahina tomota mabwaiyada mahemahetena Yehoba matana.

<sup>7</sup> Moisa, tohanugetaedi Yehoba 'ina heguheguyai 'oima si'ita lobeya 'abehega taugu tetela bwebwe'ana yaloguguyae taudi toguguyou 'oidiya, ma Pita hesi meYudiya daisidimo 'oidiya 'ilologuguya. <sup>8</sup> Weyahina Yehoba Pita waiwai 'i'ebwaeya 'ina paihowa meYudiya weyahidi, ma taugu wete gidemusa waiwai 'i'ebwaegauwa 'igu paihowa toguguyou weyahidi.

<sup>9</sup> Coinega tohanugetaedi, Yemesa ma Pita ma Yoni, taudi Yehoba 'ina helau 'oiguwa si'ita lobeya, eeta sitagwala Banaba ma taugu 'oima, ta mahetemayao 'anima'abiya. Ee, sitetoiyedi tohekalesiyao si'ahwa tonugetaediya, sitetoiyedi sitagwala 'oima ma 'abehega taugu ma Banaba 'atauya tomiya ganamuli 'oidiya, ma taudi hesi sitauya meYudiya dimo 'oidiya. <sup>10</sup> Ta 'aigeda nuwatuwu weyahina sihenuwatuwu yahimaiya, beno wewelohe 'adi lema, ma to'aha 'oinega sito'uto'upa 'a'ebwaedi. Nuwatuwu bewa 'ibwebwe'ana hedadeya eeta tuta mabwaiyana yahetahetapewa waiwai weyahina.

<sup>11</sup> Ta muliyetega tutaina Pita 'itauyama Anitioki 'oina, ma nobwa 'ina mumuga geya 'idumwalu, 'oinega yagwae debeya 'ina mumuga galana weyahina. <sup>12</sup> Moisa, 'ina tauya nugetama 'oina 'ina mumuga bwebwe'ana, eeta tohekalesiyao taudi 'asa ganamuli tomotaedi 'i'ahwa 'iya'iyaguwediya ma ba'idanao si'ai'ai, ma hesi muliyetega tupwadi

Yemesa 'ina bodao meYudiya sinaoma, ta Pita meYudiyaedi 'imatautediya, eeta 'oinega 'ina 'ai'ai taudi 'asa ganamuli tomotaedi mahetenao 'ilogwahateya, ta 'i'ebesinediya. Beno Pita 'ina pui. <sup>13</sup> Coinega meYudiya baibaiwadi wete si'abowa, ta Banaba wete 'idi 'aboina 'imuliyeya, beno 'abehega tohekalesiyao taudi 'asa ganamuli 'oidiyega geya'abwa sida 'ai'ai mahetediyao.

<sup>14</sup> Coinega taugu yasanapuya 'abehega Pita ma bodaedi Keliso tetelina geya simuliya moisa, eeta mabwaiyadi matadiya Pita yahesilaleya, yagwaeya, “Ciyagu, 'owa Yudiya gwamaina ma tupwana tuta meYudiya 'idi mumuga wa'ebe'ebesine, ma 'asa ganamuli mumugadi 'umulimuliyedi, 'oinega togidega ma taudi hali 'asa tomotaedi 'ugilohihili 'esedi 'abehega Yudiya mumugaina simuliye?”

*Yehoba 'i'ahwa bwebwe'anegega 'idi hemisamo 'oinega*

<sup>15</sup> Taudi geya meYudiya 'asa ganamuli 'oidiya togala tuwa, ma hesi tauda meYudiya, <sup>16</sup> eeta tasanapuya 'abehega Yehoba sowasowana mabwaiyada 'i'ahwa bwebwe'anegega geya Mosese 'ina loina 'ana hematamatana 'oinega, ma hesi Yesu Keliso 'ana hemisa 'oinega. Weyahina tauda 'ida hemisa Yesu Keliso 'oina talaguya ma 'oinega Yehoba 'i'ahwa bwebwe'anegega. Ma hesi 'ida hemisa geya Mosese 'ina loina 'ana hematamatana 'oina talagulagu, weyahina Yehoba geya 'eta tomota 'i'ahwa'ahwa bwebwe'ane Mosese 'ina loina 'ana hematamatana 'oinega.

<sup>17</sup> Mabwaiyada meYudiya nuwanuwada ma Keliso 'ina paihowa 'oinega Yehoba 'i'ahwa bwebwe'anegega. Ma 'eguma 'eta tuta tawe'a bo tapui, togidega bewa, nuwana Keliso 'i'abihe puiyegita? Geya!

<sup>18</sup> Taugu 'eguma yalohihila ta 'igu hemisa Mosese 'ina loinao 'oidiya yalagu, beno yagala. <sup>19</sup> Weyahina Mosese 'ina loina 'ilohe'amasi pwaigauwa, eeta muliyetega 'ina waiwai 'oiguwega 'igumwala, ma 'abehega yawasi moisa yaloba Yehoba weyahina.

<sup>20</sup> Moisa, Keliso mahetegu si'abihe kelose pwaimaiya, 'oinega 'ama'amasigu, ma geya taugu yawasiguwega ma hesi Keliso yawasina 'oiguwa 'imiyamiya. Beno tuwa yamiyamiya, yawasiguina lamuna beno 'igu hemisa Yehoba Natuna 'oina. Weyahina Yesuina 'ina helauwega tauna 'itagwaleya ta weyahigu 'i'amasa.

<sup>21</sup> Coinega geya'abwa Yehoba 'ina helauina yalologwahate. Geya'abwa tanuwanuwatuhu 'abehega Mosese 'ina loinao 'adi hematamatana 'oinega Yehoba 'ida 'ahwa bwebwe'anegega. Beno gide Keliso 'ina 'amasaina 'iheginaula besobeso.

### 3

*Hemisa Keliso 'oina*

<sup>1</sup> Comi meGaletiya yauyauleimi! Taiya hede 'obega 'i'abihe 'wanigemiyaya? Mwalo 'ahe'itegomiya ta nuwami 'isabwalena moisa Yesu Keliso weyahina, 'abehega keloseya 'i'amasa, ma 'iyamo wanuwanaideya! Coinega wanuwanuwatuhu 'abehega Mosese 'ina loina 'ana hematamatanegega 'abihetena waloba? <sup>2</sup> Coinega 'aigeda hesilala yahesilalegomi, “To 'eda 'oinega Yaluyaluwa Tabuna wa'eweya? Mosese 'ina loina 'ana paihowao 'oinega? bo Keliso tetelina wahesagoheya ta wahemisaeya?” <sup>3</sup> Yauyauleimi! Cimi tapwalolo 'ina hegaina wasanapuya 'abehega Yaluyaluwa Tabuna 'oinega, 'oinega geya'abwa watohotoho ma 'imi tapwalolo wada losalohi waboi 'imi paihowamo 'oinega! <sup>4</sup> Nata togidega ginaula mabwaiyana waloba 'asaediya, eeta Keliso 'ana hemisa 'oina wa'aipate 'asaeya?

<sup>5</sup> Caigeda wete hesilala: Yehoba tauna Yaluyaluwa Tabuna 'i'ebwa'ebwaya 'oimiya ta 'ina waiwaiyega 'imi paihowa waiwai wapaipaihowadi. Togidega 'ina 'ebwayaedi 'oimiya Mosese 'ina loinao 'adi paihowa 'oinega bo Keliso tetelina 'ana hemisa 'oinega?

<sup>6</sup> Wanuwatuhuyahi Ebalahamo 'abehega tauna Yehoba 'ihemisaeya, 'oinega Yehoba 'i'ahwa bwebwe'anegega, <sup>7</sup> eeta wasanapu Yehoba 'ana tohemisao 'abehega taudi gidemusa Ebalahamo natunao.

<sup>8</sup> Mwalo hene Yehoba Ebalahamo 'ihewaeya, 'igwae, “Cowa 'oiguwega 'abwa taudi hali 'asa tomotaedi 'idi 'ebe yaliyaya siloba.”

Ma Yehoba 'ina gwae bewa Buki He'asisi 'alona 'ihewwaila nugeteya, 'asa ganamuli baibaiwadi 'adi 'abihebwebwe'ana weyahina, 'eguma Yehoba 'oina sihemisa.

<sup>9</sup> Coinega tasanapuya tohemisao mabwaiyadi 'abehega tohemisaina Ebalahamo ba'idadiyao 'idi 'ebe yaliyaya siloba.

<sup>10</sup> Ma hesi 'eguma taiyawedi sinuwatuhuya 'abehega Mosese 'ina loina 'ana hematamatana 'oinega sibwebwe'ana, 'ahwa galagalamo nata siloba, weyahina Buki He'asisi 'igwaeya,

“Loina mabwaiyadi buki bewa 'alona 'eguma taiya geya 'imuliya bwaibwainidi, nata 'ahwa galagala 'iloba.”

<sup>11</sup> Moisa, geya sawasawahina ma Yehoba tomota 'i'ahwa bwebwe'anegita 'eguma Mosese 'ina loinamo tahematamatane. Weyahina 'ina gwae 'igwaeya,

“Todumwalu 'idi hemisege yawasidi siloba.”

<sup>12</sup> Ma hesi Mosese 'ina loina 'ana 'eda hagana, ta hemisa 'ana 'eda hagana. Loina 'ana 'eda Buki He'asisi 'oina bewa gide sileleya, 'igwaeya,

“Ceguma taiya loina mabwaiyana 'ihematamatedi yawasina bwebwe'ana 'iloba.”

<sup>13</sup> Ta geya sawasawahina loina mabwaiyana tahematamatedi, 'oinega Kelisoina 'ihemiyalaenegita ta 'i'abihetegita loina 'ana mwau 'oinega. Loina 'ana mwau bewa, 'eguma geya tada hematamatediya ta'amasa, 'oinega Keliso tauda weyahida 'i'amasa gidemusa taudi togala madoudi 'adi lohe'amasa kelose 'oidiya. Buki He'asisi mwalo 'ina gwae bewa weyahina 'igwaeya,

“Ceguma taiyawedi kelose 'oidiya silagudi ma si'amasa, to'amasaedi 'ahwa galagala siloba Yehoba 'oinega.”

Eeta Keliso tauda weyahida mwauina 'ilobeya.

<sup>14</sup> Ma Yesu Keliso 'oinega taudi hali boda 'asa ganamuli tomotaedi yaliyaya siloba, gidemusa yaliyayaina Yehoba 'igwae hemisaeya Ebalahamo 'oina, 'abehega mabwaiyada 'ida hemisege to'aha Yehoba 'igwae hemisaeya 'i'ebwaegita, beno Yaluyaluwa Tabuna.

#### *Bobolohe weyahina*

<sup>15</sup> Ciyagwao, 'aigeda 'ebe'ita 'ida mumuga 'oinega ya'ebwaegomi, bewa gidemusa: Ceguma loheya 'i'iunamo 'i'amasa, ta 'ina tobwatobwa nuwana 'ina 'ebeloina 'i'ebwae wahana 'oina, 'ina gwaeyedi geya sowasowana 'eta taiya wete weyahina 'igwae.

<sup>16</sup> Gidemusa wete Yehoba 'ina gwae Ebalahamo ma 'ina susu 'i'ebwaediya 'imiya hataya. Geya 'abehega Buki He'asisi 'igwaeya “Susuwao 'oidiya,” ma hesi 'ina susu 'aigeda tuwamo, beno Keliso.

<sup>17</sup> Cana sanapu bewa Yehoba 'ina gwae hemisa 'ilagu nugeteya Ebalahamo 'oina, 'oinega bolime powa handeledi ma teti muliyetega Mosese 'ina loina 'ilatuwa. Ma geya sawasawahina ma gwae hemisaina 'iligehi bo nuwana 'ibui loina 'oinega, ma hesi gwae hemisaina 'ina waiwai 'abwa 'imiyamiya.

<sup>18</sup> Wanuwatuhuyahi 'eguma 'ida 'ebe yaliyaya taloba Mosese 'ina loinega, beno 'abehega geya Yehoba 'ina gwae hemisa 'oinega. Geya! Weyahina mwalo Yehoba 'igwae hemisa Ebalahamo 'oina.

<sup>19</sup> Ma to'aha weyahina loina 'ilatuwa? Loinaina 'i'abilatuheya 'oida 'ida puiyao weyahidi, ma 'oida 'imiyamiya 'ana siga Ebalahamo 'ina susu tauna Yehoba 'igwae hemisaeya 'ilatuma. Ma loina 'aneloseyao 'oidiyega Yehoba Mosese 'i'ebwaeya, ta Mosese 'i'ebwaeya tomota 'oidiya. <sup>20</sup> Ta Yehoba 'ina gwae hemisaina 'ina 'ebwaya hagana, weyahina Yehoba tauna 'i'ebwaeya dumwaluweya Ebalahamo 'oina.

#### *Cida hemisege Yehoba 'i'ahwa natunegita*

<sup>21</sup> Geya'abwa wanuwatuhuyahi 'abehega Mosese 'ina loina 'ilo'aleheya Yehoba 'ina gwae hemisa. Geya. Weyahina geya 'eta wete loina sawasawahina ma yawasida 'i'ebwaegita, bo 'ida mumugao 'ida 'abihe bwebwe'enedi. Geya. <sup>22</sup> Ma hesi Buki He'asisi mabwaiyada 'i'ahwa galaegita, 'oinega Yesu Keliso 'ana tohemisaomo Yehoba 'ina gwae hemisa siloba.

<sup>23</sup> Mwalo tutaina 'oina hemisa geya tasanapu, tauda Mosese 'ina loina 'ipaigita eeta tamiyamwauwa, ma 'ana siga Yehoba hemisa 'igihelatuheya 'oida. <sup>24</sup> Cana 'ita gide loina 'i'itayahigita ta 'ana siga Keliso 'ilatuwa, eeta 'eguma tahemisa Keliso 'oina, nata Yehoba 'i'ahwa bwebwe'anegita. <sup>25</sup> Bewa tuwa Keliso 'inao pwaima, 'oinega loina 'ana 'itayahi 'oida 'igumwala, <sup>26</sup> ma hesi 'ida hemisega Yehoba mabwaiyada 'i'ahwa natunegita, Yesu Keliso mahetedai. <sup>27</sup> Weyahina taiyawedi 'omi wababitaiso Yesu Keliso saninega Keliso ina mahetemi wamiya pwaiya.

<sup>28</sup> Weyahina mabwaiyada Keliso mahetedai, ma geya 'eta wete wataha solada 'imiyamiya. Coinega meYudiya ma hali bodao mahemahetena, ma babadao ma 'idi topaihowao mahemahetena, ma wete meloheyadi ma mewahinedi mahemahetena, weyahina mabwaiyada Yesu Keliso 'oina taheboda 'aigeda, <sup>29</sup> ma mabwaiyada Ebalahamo 'ina susuwao, weyahina mabwaiyada Keliso 'ina bodao, 'oinega ta'eweya Yehoba 'ina gwae hemisa, beno Ebalahamo 'oina mwalo 'i'ebwaeya.

#### 4

<sup>1</sup> Coinega wanuwatuhuyahi 'eguma taiya 'ina tuta gwama 'oina ma tamana 'ina 'ebeloina 'i'ebwaeya, gwamaina geya'abwa 'ihetoloina, ma hesi 'ihetopaihowa, <sup>2</sup> ma 'oinega tohe'itao 'enadi 'ida 'ihematamatana nugetedi, ee 'ana siga to tuta tamana 'itagwale ee natuna 'ihetoloina.

<sup>3</sup> Tauda gidemusa, weyahina mwalo 'ida 'ebe hemisao nugenugetaidi weyahidi tapaipaihowa, <sup>4-5</sup> ma muliyetega Yehoba natuna 'ina tuta bwebwe'ana 'ilobeya, eeta natuna 'ihewaseyama, ta sinana 'ihenatuneya ta 'iheloheya masiha 'oima, beno tauma Mosese 'ina loinao sipaipaimai, ma 'oidiyega 'ililhasimai, ma 'omi wete 'ililhasigomi, ma Yehoba mabwaiyada 'i'ahwa natunegita. <sup>6</sup> Coinega wete Yehoba Natuna Yaluyaluwana 'ateda 'ilaguya ma Yehobaina 'i'ahwa tamaneya 'igwae, "Tamagu!" <sup>7</sup> Moisa, 'omi geya 'abehega 'ina topaihowamo, ma hesi natunao, 'oinega 'abwa 'ina tobwatobwa 'i'ebwaegomi, gidemusa 'ina gwae hemisa.

#### *MeGaletiyaedi Paulo nuwanuwana*

<sup>8</sup> Comi mwalo Yehoba geya wasanapu, ta 'imi 'ebe hemisao taudi gidemusa Yehoba 'abo'abodi. <sup>9</sup> Ma bewa tuwa Yehoba wasanapuya, nuwana tagwae Yehoba 'isanapugomiya. Coinega to'aha weyahina Yehobaina walogwahateya ma wanuwahila 'imi 'ebe hemisaowedi belubeluidi 'oidiya, ta nuwanuwami weyahidi wapaihowa hila. <sup>10</sup> Coinega wapaipaihowa hemisa miyamiyaina weyahina, tupwana sabwelo bo wai'ena, bo bolime, bo hali tuta ma hali tuta weyahidi 'idi paihowao wapaipaihowadi. <sup>11</sup> Bewa weyahina ya'ateyohowa, nata gide 'igu paihowaedi 'oimiya waheginaula besobesowedi.

<sup>12</sup> Tasigwao, 'ami boda 'oina yaluhu pwaiya eeta taugu gidemusa 'omi, 'oinega 'ilobwainegomiya ma wamumuga gide taugu. Geya 'eta gala 'oiguwa wapaihowa. <sup>13</sup> Ma wanuwatuhuyahi 'abehega mwalo yatauya nugetawa 'oimiya ma'igu lohala, ma tuwa tetela bwebwe'ana yaloguguyaeya 'oimiya. <sup>14</sup> Ma geya walososomanegauwa wahigu 'ina we'a weyahina, ma hesi watagwalegomiya 'oiguwa ma watoegauwa gidemusa Yehoba 'ina anelose 'aigeda, nuwana gide Yesu Keliso.

<sup>15</sup> Eeta wa'ahwa 'iyaguwegauwa moisa, ma 'eguma sawasawahina matamiyega wada 'iwayahuledi ma wa'ebwaegau, matagu hogahogadi 'adi miyalae. Ma bewa tuwa togidega 'ida 'ahwa 'iya'iyaguina? <sup>16</sup> Cana 'ita walo'aleha pwaigauwa weyahina hepwaile moisa ya'ebwaegomiya.

<sup>17</sup> Cimi nuwabui lamuna 'imi tohe'itao hauhaudi bo'i sipaipaihowa waiwai weyahimi, ma hesi si'abo'abowegomi. Taudi nuwanuwadi ma 'igu loina walogwahatedi ta 'idi loina nuwami si'ewa.

<sup>18</sup> Cigu loina bewa 'eguma taugu mahetemi tamiyamiya, bo 'eguma bwaga yamiya 'oimiyega, loina 'aigeda tuwa, beno 'ilobwainegomiya ma wahetapewa waiwai paihowa 'ausala weyahina.

<sup>19</sup> Natugwao, tuta mabwaiyana 'imi 'italohihila weyahidi 'ategu 'imuyamuya, eema 'ana siga Keliso 'oimiya 'ilatu hila, ma 'atemiya 'ida miya, ma 'oinega 'agu lotohona 'ida bwebwe'ana hila.

<sup>20</sup> Ceguma 'omi mahetegwao tamiya, ma 'oinega wanuwabui ma 'agu lotohona 'ibwebwe'ana, ma hesi yanuwawutuhu madouna 'imi pui weyahina.

### *Hega ma Sela tetelidi*

<sup>21</sup> Comi nuwanuwami ma Mosese 'ina loinao wamuliyedi, ma hesi soladiya 'adi nuwasabwalena geya wasanapu. <sup>22</sup> Wanuwatuhuyahi Ebalahamo tetelina leleleleina, beno natunao meloheyadi 'eluwa, 'aigeda 'ina 'ali'e mewahinena 'oinega, ma heluwena mwanena moisa 'oinega. <sup>23</sup> Cina 'ali'eina sanina Hega, ta mwanena Sela, ma Hega 'ina gamwa mumuga bale'u 'oinega, ta Sela 'ina gamwa Yehoba 'ina gwae hemisa 'oinega, eeta Selaina natuna sanina Aisake. Ma hesi Hega natuna sanina Isimeli. <sup>24</sup> Ta wahiwahineyedi tetelidi 'oinega 'ebe'ita taloba bewa: Hega natunao 'ihenatunediya topaihowa paipaidi, <sup>25</sup> ta 'idi 'asa Alebiya 'alona, 'oya 'aigeda, sanina Sainai, ta Sainai 'ana sanapu 'abehega gide taudi meYelusalema sauga bewa, weyahina taudi paipaidi Mosese 'ina loinao 'oidiyega.

<sup>26</sup> Ma hesi tauda geya paipaida, eeta 'ida 'asa Yelusalema galewa, gide sinadai 'ihenatunegita Yehoba 'ina gwae hemisa 'oinega. <sup>27</sup> Ginaula bewa weyahina Buki He'asisi 'oina sileleya 'igwaeya:

“Wahine 'owa 'aga'agalaiu 'uyaliyaya. Mwalo geya 'uda gamwa ma nata hesi 'uhenatuna, ma wete 'uyaliyaya madouna natunwao baibaiwa hedada weyahidi, ma hesi wahineina mamwanena simiyamiya manatudiyao, ta geya baibaiwadi.”

<sup>28</sup> Ciyagwao, tauda Yehoba 'ina gwae hemisa weyahina 'ihenatunegita, Aisake gide-musa, weyahina Aisake sinana me'aga'agalina, ta muliyetega Yehoba 'ina gwae hemisa weyahina ta 'ihenatuna.

<sup>29</sup> Ta Isimeli Aisake 'ilo'aleheya. Cebe'ita bewa, tauna mumuga bale'u 'oinega 'itoleya 'ilo'aleheya tauna gwae hemisa 'oinega 'itoleya. Mwalo taudi siteluwaedi gidemusa, eeta nige wete gidemusa tomota 'iyadiyao simumuga 'esedi.

<sup>30</sup> Ma Buki He'asisi 'alona loina leleleleina 'igwaeya, “Cali'eina manatuna 'upa'i latuhedi. Geya'abwa 'ali'e natuna ma natuu moisa siloiloina mahemahetena.

Ma hesi Aisakemo 'ebeloina 'i'ewa.”

<sup>31</sup> Tauda geya Isimeli gidemusa, weyahina topaihowa paipaina natuna, ma tauda Aisake gidemusa eeta tamiya bwebwe'ana.

## 5

<sup>1</sup> Tamiya bwebwe'ana weyahina Keliso 'ilihisigita 'ada paiyao 'oidiyega, 'oinega watoholo pa'ala ma geya'abwa watagwatagwala hilegomi Mosese 'ina loina paipaina 'oina.

### *Keliso 'ina loina bwebwe'ana*

<sup>2</sup> Taugu Paulo yaloguguya 'oimiya, ma 'eguma Mosese 'ina loinao 'oidiya watagwalegomi, nuwana 'eguma meYudiya 'idi 'ila'ilala 'wapimiya si'upwa, beno Keliso 'ina lema 'oimiya walohe'wadaleleya. <sup>3</sup> Weyahina 'eguma taiya 'oimiyega 'itagwale ma 'wapina si'upwa, 'ilobwaineya Mosese 'ina loinao mabwaiyadi wete 'ihematamatani, <sup>4</sup> ma 'eguma taiya 'owa nuwanuwau ma Mosese 'ina loinao 'adi hemamatana 'oinega 'ahwa bwebwe'ana 'uloba, beno Keliso 'ina helau 'oiuwa 'uhebe'u pwaiya, eeta tauna 'u'ebesineya.

<sup>5</sup> Weyahina tauda Yehoba tahemisaeya ma 'abehega 'i'ahwa bwebwe'anegita. Bewa 'ida nuwatuhuyahina Yaluyaluwa Tabuna 'oinega, eeta tauna weyahina tayamwayamwa.

<sup>6</sup> Moisa, Yesu Keliso 'oina meYudiya 'adi 'ila'ilala geya 'i'abihe dumwaluwegita, beno 'wapidi si'upwa'upwa, ma wete 'eguma 'wapi 'upwaina talogwahate geya'abwa 'ada



'ahwadumwalu talobaloba. Beno tuwa 'eguma Yesu tahemise ma tahelauwe, tauna 'ada to'abihedumwalu.

<sup>7</sup> Comi mwalo wapili waiwaiya hemisa 'ina 'eda moisa 'oinega, ma taiya 'ilagu bodegomiya? <sup>8</sup> Cetobodaina geya Yehoba 'oinega, weyahina mwalo Yehoba 'ibwauwegomiya tauna 'ina 'eda 'oina, ma hesi 'etobodaina hali tomota 'oidiyega. <sup>9</sup> Bewa gide 'aigeda ginaula muhemuhena, ma hesi galana, ma sawasawahina 'igihegala madouna.

<sup>10</sup> Taugu Bada yahemisaeya ma 'igihenuwa sabwalenigomi, ma 'igu loinamo wamuliya, ma 'eguma loheyaina 'ami tolohe'wadalele 'ana maisa galana 'abwa Yehoba 'oinega 'iloba.

<sup>11</sup> Ciyagwao, geya'abwa wanuwatuhuhu yaloguguya 'abehega 'wapimi si'upwadi ma 'ane meYudiya 'idi loina wamuliyedi, ma hesi 'igu loguguyaina Keliso 'ina 'amasa kelose 'oina weyahina. Cigu loguguya bewa weyahina meYudiya sinuwamwauwa ta silo'alehegauwa. <sup>12</sup> Moisa, 'ilobwaineya ma taudi 'ami tolohe'wadalele siboimo si'elo'ewa yahuledi ma 'ewa'ewaidi.

<sup>13</sup> Ciyagwao, Yehoba 'ihesuwa pwaigomiya ta lihalihasimi. Lihalihasimi ma hesi geya'abwa mumuga bale'u wamulimuliyedi. Mumugami hesi helau 'ina loinega watauya, ma waboimo wahelemalema hilegomi.

<sup>14</sup> Weyahina loina mabwaiyana 'adi 'uina loina 'aigeda bewa 'igwaeya, "Ciyamwao 'uhelauwedi gidemusa 'uboi 'uhehelauwego."

<sup>15</sup> Ceguma loina bewa wa'ebesine ma waboi 'oimiya walo'aleha, 'abwa 'ami boda walohesawali.

#### *Yaluyaluwa huwaina hagana ma wahi huwaina hagana*

<sup>16</sup> Coinega sowasowana Yaluyaluwa Tabuna 'ihanugetegomi ma 'oinega geya'abwa nuwa'ubuna siloiloinigomi. <sup>17</sup> Weyahina nuwa'ubunao Yaluyaluwa Tabuna silo'aleheya, ma 'iyamo Yaluyaluwa Tabuna 'ida nuwa'ubunao 'ilo'alehediya. Coinega 'aloda silolo'aleha, eema to'aha bwebwe'ana nuwanuwada tapaihowa geya sawasawahina ma tapaihowa. <sup>18</sup> Beno tuwa 'eguma Yaluyaluwa Tabuna 'ihanugetegomi, Mosese 'ina loinao sigumwala 'oimiyega.

<sup>19</sup> Wahida 'ina paihowa tasanapudiya, beno pui, ma loyawe, ganawala, <sup>20</sup> 'oba, balahu, he'ahwa panapanawa, lo'aleha, he'ipi'ipi, gamwasowala, 'aiduma, wataha, sinala, <sup>21</sup> lohesohesi, ma wete 'ebe yaliyaya galana bwasi waiwai 'ana numa 'oinega, ma wete tupwana mumuga galadi. Mumuga bewa mwalo yahemataluwegomiya, ma nige yahemataluwe hilegomi 'abehega 'adi topaihowao geya'abwa Yehoba 'ina 'ebeloina 'oina siluhuluhu.

<sup>22</sup> Ma 'iyamo Yaluyaluwa Tabuna huwaina bwebwe'ana 'ateda bewa: helau, yaliyaya, miya daumwala, toholo pa'ala, lema, mumuga dumwaluna, hemisa, <sup>23</sup> mumuga nuhana, 'alama'itana. Ma geya 'eta wete loina 'imiyamiya ma ginaulaedi 'i'ausidi. <sup>24</sup> Ta wete 'eguma Yesu Keliso 'iloinegita, wahida 'ina mumuga galadi ma nuwa'ubunao 'ilohe'amasidiya 'ana kelose 'oina. <sup>25</sup> Ma yawasida bwebwe'ana 'i'ebwaegita Yaluyaluwa Tabuna 'oinega, ta sowasowana ma Yaluyaluwaina 'ihanugetegita.

<sup>26</sup> Ma geya'abwa tanuwawahane bo 'iyadao talowahi'watedi, bo tahe'ipi'ipiyedi.

## 6

### *Tahelemalema*

<sup>1</sup> Ciyagwao, 'eguma tasidai 'aigeda 'ina pui 'oinega 'ibe'u, 'omi yaluyaluwami pa'alidi watoho ma tasidaina wa'abihedumwalu hila, ma hesi ma'imi mumuga nuhana, ma waboimo wa'itayahigomi nata gide 'omi wete wabe'u.

<sup>2</sup> Cami 'aha'ahalao 'oidiya wahelemalema ma'iyamiyao, weyahina bewa gide 'ada loina Keliso 'oinega, eeta 'ilobwaineya tapaihowa.

<sup>3</sup> Ceguma taiya wewelohe, ma 'inuwatuhuya 'abehega tohewasawasa, 'iboinamo 'i'abo hileya. <sup>4</sup> Coinega 'ilobwainegomiya ma 'aigeda 'aigeda 'iboi 'ina paihowa 'ida toho ma 'isanapu mane paihowa bwebwe'ana ma mane galana, 'oinega 'eguma bwebwe'ana, 'ana

hepwatu 'iboi 'ina nuwatuhu 'ana lotohona 'oinega, ma geya 'iyana 'aigeda 'ina gwae 'oinega. <sup>5</sup> Ta 'ada 'aha'ahalao 'aigeda 'aigeda taboidamo ta'ahalidi.

<sup>6</sup> Tapwalolo 'ana tohe'itao, 'eguma sinasinapu sihe'itegita, 'ilobwainegita ma tobwa-tobwa ta'ebwaedi, 'eguma to'aha 'oidiya 'ito'uto'upa.

<sup>7</sup> Geya'abwa 'uboi 'u'abo'abowego, weyahina geya sawasawahida ma Yehoba ta'abowe. To'aha loheya 'ibeguliya, muliyetega 'ida 'eli. <sup>8</sup> Ceguma mumuga wahi 'oinega 'idauna 'abwa 'eli'eli 'oina galana 'iloba, ma hesi 'eguma Yaluyaluwa Tabuna 'oinega 'idauna, 'abwa yawasina miyamiya hatayana 'i'elidi.

<sup>9</sup> Geya'abwa 'ida paihowa bwebwe'adi 'oidiyega ta'ala'ala 'i'iwasa, weyahina 'eguma geya'abwa tawe'a, 'abwa 'eli'eli bwebwe'ana taloba. <sup>10</sup> Coinega 'ilobwainegita ma tuta mabwaiyana 'oidiya tomota baibaiwadi talededi, ma hesi Yehoba 'ana tohemisao talededi madouna.

<sup>11</sup> Lele bewa matana madouna taugu nimaguwega yaleleya. <sup>12</sup> MeYudiya 'idi 'ila'ilala 'wapidiya 'ana to'upwao geya nuwadi 'igu loguguyaina bewa: 'ada 'abihebwebwe'ana taloba Keliso 'ina 'amasamo 'oinega, ma geya 'wapi 'upwa 'oinega. Coinega sihe'i'imigomiya ma 'idi 'wapi 'upwaina wa'ewa, ta 'adi boda 'ida hemadou, ma wete lo'aleha Keliso 'ina 'amasa kelose 'oina weyahina 'igumwala. <sup>13</sup> Ma hesi wanuwatuhuyahi 'abehega 'wapi 'upwaina 'ana to'ewao 'ilobwainediya ma Mosese 'ina loinao mabwaiyana simuliyedi, ma hesi geya sida muliyediya. Beno tuwa nuwanuwadi 'wapimi wa'upwadi ma bewa 'idi 'ebe gagasa 'imi luhu 'adi boda 'alona weyahina. <sup>14</sup> Ma taugu hesi geya'abwa yagwaegwae hane. Beno tuwa 'ida Bada Yesu Keliso 'ana kelose weyahina yagwaehane, weyahina Keliso 'ana kelose 'oinega mumuga bale'u 'ilohe'amasiya ta 'ina loina 'oiguwa 'igumwala, ma wete taudi mumuga bale'u 'ana tomuliyao silogwahategauwa, tuwa gide taugu to'amasa.

<sup>15</sup> Moisa, 'wapi 'upwa geya ginaula madouna, ma 'eguma geya ta'upwa beno wete geya ginaula madouna. Ginaula madouna 'aigeda tuwamo, 'eguma Yehoba Yaluyaluwana 'igihe'ehaugita. <sup>16</sup> Ma mabwaiyada 'eguma loina bewa tamulimuliye, eema Yaluyaluwa Tabuna 'igihe'ehaugita, tauda Yehoba 'ina susu meIsileli moisa, ta 'ina helauwega tamiya daumwala.

<sup>17</sup> Bewa tuwa ma tuta 'inaonaoma 'oidiya geya'abwa wete 'eta taiya 'igihe 'wate'wategau, weyahina wahiguwa Yesu 'ina 'ila'ilala simiyamiya, beno weyaedi yalobediya 'ina paihowa 'oina.

<sup>18</sup> Tasigwao 'ida Bada Yesu Keliso 'ina helau yaluyaluwami 'oidiya. Emeni.  
Taugu Paulo.

## EPESO MeEpeso 'idi leta Paulo 'ileleya

Paulo 'ina leta bewa 'oina Yehoba 'ina helau madouna 'ihe'ote'oteteliya, beno Yesu 'ina paihowega tupwa 'asi'asilalaina 'oina 'ilagugita; ma geya wataha, ta hesi meYudiya ma hali tupwa loheloheyainao mabwaiyada taheboda 'aigeda, ta Yaluyaluwa Tabuna 'i'ebwaegita. Ta wete 'iteteliya tohekalesiyao mumugada weyahina, ta 'ida lo'aleha Seitani, beno Tomodulele ma 'ina yaluyaluwao galadi weyahidi.

### *Loyauwedo*

<sup>1</sup> Yauwedo tohekalesiyao 'omi Yesu Keliso 'ana tohemisao, 'imi leta bewa taugu Paulo 'oiguwega. Yehoba 'ina nuwatuhi 'oinega yahotohepwaila To'abihetena Yesu weyahina.  
<sup>2</sup> Tamada Yehoba ma Bada Yesu Keliso 'idi helau 'oimiya, ma 'oinega wamiya yaliyaya.

### *Cabihetena Keliso 'oinega*

<sup>3</sup> Ciyagwao, taloyauwedo Yehoba 'oina, tauna 'ida Bada Yesu Keliso Tamana, ma Keliso 'oinega yaluyaluwada 'ihelauwediya beno wasawasa galewa mabwaiyadi 'i'ebwaegita. <sup>4</sup> Weyahina mwalo hene 'abwa bale'u geya lihemasalehe ma 'ihesinuwa nugetegita ma 'abehega taheboda 'aigeda Keliso mahetedai, ta Yehobaina matana mumugada 'ehauna, ma geya 'ada 'ebe he'ewamo.

<sup>5</sup> Ma 'oinega Yehoba nuwanuwana ta 'ina helauwega 'ihesinuwegita ma Yesu Keliso 'oinega 'i'ahwa natunegita, <sup>6</sup> ma Yehoba tahepwatuwe bewa helau bwebwe'ana hedada weyahina, tauna Natuna moisaina 'i'ebwae daisiya weyahida. <sup>7-8</sup> Eeta Natuna bweyahinega 'ilihasigita 'ida puiyao 'oidiyega ta Yehoba 'inuwasamudiya, beno tauna 'ina helau madou hedada 'i'ebwaegita. Ta 'ana madou geya 'ana lihemmo.

<sup>9</sup> Wete sonoga ma sanapu mabwaiyadi 'i'ebwaegita, eeta tauna 'ina nuwatuhi dahwadawanidi tasanapudiya weyahina bewa 'iloina nugeteya ma 'abehega Keliso 'oinega 'ilosalohidi, <sup>10</sup> ta 'ina loina bewa 'abehega tuta 'ana 'ebelosaloha 'oina Keliso ginaula mabwaiyadi 'ihogogonedi ma sihe'aigeda, beno ginaula galewa ma wete ginaula bale'uwa mabwaiyadi 'ilagu hehogonedi tauna matana.

<sup>11</sup> Ma Yehobaina tauna 'ina nuwatuhiwega 'iloiloina, ta 'ina paihowa mabwaiyana 'ipaipaihowadi, <sup>12</sup> ta tauda 'ihesinuwegita ta 'iloinaegita 'abehega Keliso 'ana tohemisa nugetao, ta sabwelo 'aigeda 'aigeda 'oina 'ida paihowao weyahidi tomota sida hep-watuwe, ma sida 'ahwa bwebwe'ane.

<sup>13</sup> Ma wete 'omi Keliso 'oinega tetela moisa ma bwebwe'ana beno 'ami 'abihetena weyahina wahesagoheya eeta tauna wahemisaeya, ma wete Yaluyaluwa Tabuna tauna 'igwae hemisaeya ta 'i'ebwaegomiya, <sup>14</sup> gide 'ila'ilala, ma 'oinega tasanapuya 'abehega 'ada maisa galewa Yehoba 'oinega 'abwa ta'ewa, ma weyahina tahepwatuwe, ta wete ta'ahwa bwebwe'ana.

### *Paulo 'ina 'ahwanoi*

<sup>15-16</sup> Coinega tuta mabwaiyana 'oidiya 'omi weyahimi yaloloyauwedo Yehoba 'oina, ma ya'ahwa'ahwanoi weyahimi, weyahina tetelimi yahesagoheya 'abehega Bada Yesu wahemisaeya, ta wete 'ana tohemisao mabwaiyadi 'atemiyege wahelau 'oidiya. <sup>17</sup> Ma 'igu 'ahwanoi weyahimi 'abehega 'ida Bada Yesu Keliso 'ina Yehoba, tauna Tamada ta Tohewasawasa madouna, 'igihesanapugomi, ma tauna wada sanapu bwaibwaini, <sup>18</sup> ma wete 'atemiyege ginaulaedi bwebwe'adi weyahidi 'ibwauwegomiya wada sanapudi, ma wahemisa 'abehega 'abwa walobadi, ma wada sanapu wete 'ina heguyai madouna 'ina tomatiyao tauda 'oida, beno tauna 'ina wasawasa 'oinega, <sup>19</sup> ma wete wada sanapu Yehoba 'ipaipaihowa waiwai tauda 'ana tohemisao weyahida.

<sup>20</sup> Cina waiwaiina Keliso 'oinega 'ihe'itaeya tutaina 'amasega 'igihetoholo hileya, ta 'ina 'ebemiya galewa 'i'ebwaeya, Yehobaina 'ina 'ebeulega, <sup>21</sup> 'oinega Keliso 'ina loina,

loinao mabwaiyadi 'ihane sinediya, nuwana aneloseyao 'idi loina bo yaluyaluwa bi'iyao 'idi loina, bo taudi sanidi madoudi 'idi loinao, bewa tuta ma tuta sinaonaoma 'oidiya. <sup>22</sup> Weyahina Yehoba Keliso 'ina 'ebeloina 'i'ebwaeya ginaula mabwaiyadi 'abehega 'iloinaedi, ma tohekalesiyao tauda wete mabwaiyada 'iloiloina 'oida, <sup>23</sup> weyahina tohekalesiyao tauda gide Keliso wahina yahunao, weyahina Kelisoina ginaula mabwaiyana sawasawahina tupwa mabwaiyadi 'oidiya.

## 2

### *Camasa ta'ebesine ma yawasi bwebwe'ana taloba*

<sup>1</sup> Ma 'omi mwalo gide 'ama'amasimi 'imi puiyao 'oidiyega ma Yehoba 'igihetoholo hi-legomiya. <sup>2</sup> Moisa, mwalo mumuga bale'u wapaipaihowadi, weyahina yaluyaluwa galadi ma waiwaidi 'idi bada, tauna tomiya 'atamana 'awawa wahematamataneya. Ma tauna yaluyaluwaina taudi loina 'ana tolige hao simulimuliye ma 'atediya 'imiyamiya. <sup>3</sup> Mwalo wete tauda gidemusa, ta wahida 'ina nuwa'ubuna tamulimuliyedi, ma to'aha tauda 'ida nuwatuhowega tapaipaihowadi. Coinega 'ana lobwaina ma Yehoba 'igamwasowalegita, weyahina mumugada tauda galagalaina, gidemusa mebale'u mabwaiyadi.

<sup>4-5</sup> Eema 'oinega 'ida puiyao silohe'amasigita, ma hesi Yehoba 'ina 'atemuyamuya tomadou hedada, ta 'ina helau 'oida madouna wete, ma 'oinega 'igihetoholo hilegita, Keliso mahetedai. Yehoba tauna 'ina 'ehelaina 'oinega 'i'abihetegita, <sup>6</sup> ma wete Keliso mahetedai, 'igilagasigita, eeta 'ebemiya galewa Yesu Keliso 'oinega 'i'ebwaegita, tauna Yehobaina mahetedai. <sup>7</sup> Bewa 'ipaihoweya ma 'abehega tuta sinaonaoma 'oidiya 'ina 'ehel madou hedadana 'ihe'itae, beno 'ina 'atemuyamuya ma 'ina 'abihetena Yesu Keliso 'oinega.

<sup>8</sup> Moisa, 'ina 'ehelaina 'oinega 'i'abihetegomiya 'imi hemisa weyahina ma geya waboi 'imi paihowa 'oidiyega, ma hesi Yehoba 'ina helau 'oinega. <sup>9</sup> Cida 'abiheteina geya hene 'ida paihowa 'oinega taloba, nata gide tanuwahane 'abehega tauda tuwa 'ida waiwaiyega. <sup>10</sup> Ma hesi Yehoba 'iboimo 'ina paihowa 'ateda 'i'atububudiya Yesu Keliso 'oinega, ma 'abehega tapaipaihowa paihowaedi bwebwe'adi Yehoba mwalo hene 'ihesuwediyaya weyahida.

### *Keliso 'oinega taheboda 'aigeda*

<sup>11</sup> Comi geya meYudiya ta 'asa ganamuli tomotainao, ma meYudiyaedi taudi natudiyao loheloheyadi 'wapidi si'upwa'upwadi, 'adi 'ila'ilala sipaipaihowa, ma sisinaligomiya, weyahina geya wahimi 'adi 'ila'ilalamo. <sup>12</sup> Wanuwatuhuyahi 'abehega tutaina mwalo Keliso 'oinega wamiya wasiya, ma Isileli 'ina 'ebeloina 'oinega wamiya ganamuliya, ma ginaula bwebwe'adi Yehoba 'igwae hemisaeya Buki He'asisi 'alona geya 'eta to'aha 'omi weyahimi 'i'inana, 'oinega geya'abwa 'eta to'aha bwebwe'ana 'abwa walobaloba ma 'abehega tauna weyahina wada hemisa, geya wete 'imi Yehobamo tutaina bale'uwa wamiyamiya.

<sup>13</sup> Mwalo wamiya wasiya, ma bewa tuwa Yesu Keliso 'oinega, beno Kelisoina bweyahinega 'itoegomiya deina. <sup>14</sup> Tauna weyahida daumwala 'ipaihoweya, weyahina 'aliupa sanina lo'aleha 'ihwategita ma Keliso 'aliupaina 'ilige ha yahuleya eeta 'ina 'amasa 'oinega taheboda 'aigeda pwaiya. <sup>15</sup> Tauna wahina 'ana lohe'amasa 'oinega Mosesi 'ina 'etobodao mabwaiyadi 'igibodeya, eeta tauna 'ihogogonegita ma taheboda 'aigeda tauna mahetedai, ta geya gidemusa mwalo boda 'eluwa simiyamiya, eema bewa tuwa tamiya daumwala, <sup>16</sup> ma wete 'ida wataha 'oidiyega 'iliasigita ta 'itoegitama Yehoba 'oina, ma tauna mahetedai tahe'iyai'yagu hila; ee 'ina paihowaina, tauna wahina 'aigeda tuwamo kelose 'oina situtu hepa'ineya, eeta 'oinega lo'alehaedi sigumwala.

<sup>17</sup> Coinega Yesuina 'itauyawa ta daumwala 'iloguguyaeya 'omi tomiya bwagabwaga 'oimiya, ma tauna wete deina 'amiyamiya 'oima. <sup>18</sup> Eeta tauna 'oinega, 'omi ma tauna Yaluyaluwa 'aigeda 'oinega 'itoegita Tamada 'oina.

<sup>19</sup> Comi mwalo taumanao wamiyawasiya, ma sauga bewa hesi wahetoni'asa pwaiya Yehoba 'ina bodao mahetemiya, ta waheboda 'aigeda Yehoba 'ina susu 'oina. <sup>20</sup> Comi wete si'abigomiya, 'oinega tauda gide tuwa hada, ma Yesu Keliso tauna 'ida wahuwahu, tauna 'oina logidi madoudi beno Yesu 'ana tohepwailao ma palopitao, <sup>21</sup> ma 'oinega tauda mabwaiyada tahehada 'ana yowayowana, ma Yesu 'i'abigita ma tahehada madouna ma 'ehauna, <sup>22</sup> ma wete 'omi geya meYudiya gide wahe yowayowana, ta 'oimiyega hadaina 'i'abi'abi, ma 'abehega hadaina 'oina Yehoba Yaluyaluwana 'ilo'asa.

### 3

#### *Paulo 'ina paihowa tomiya ganamuli 'oidiya*

<sup>1</sup> Bewa weyahina taugu Paulo ya'e'etuluha ma ya'ahwa'ahwanoi Yehoba 'oina, tauna 'igu paihowa 'i'ebwaegauwa 'omi tomiya ganamuli 'oimiya, ma bewa tuwa Keliso 'ina paihowa weyahina deliya silagu luhuwegauwa ta yamiyamiya. <sup>2</sup> Nuwana mwalo 'igu paihowa tetelina wahesagoheya, ta 'igu paihowaina Yehoba 'i'ebwaegauwa, ma 'abehega tauna 'ina helauwega 'omi 'ami lema waloba.

<sup>3</sup> Ma 'igu paihowa bewa sanapu mwalo dahwadahwaina weyahina, ma hesi 'ana sanapu Yehoba 'ihe'ita pwaigauwa, gidemusa yaleleyawa 'imi leta to'uto'upana bewa 'oina, <sup>4</sup> ma 'eguma wahasili wada sanapu 'abehega sanapuina dahwadahwaina Keliso weyahina beno yasanapu pwaiya. <sup>5</sup> Ma sanapuina tomota nugenugeti geya sisanapu, eeta bewa tuwa Yaluyaluwa Tabuna 'igihelatuheya 'ina tohepwailao hesihesinuwadi ma palopitao 'oidiya, <sup>6</sup> 'abehega 'omi geya meYudiya sawasawahina ma Yehoba 'ina 'abihetena waloba, tauma meYudiya gidemusa. Cina 'abihetenaina mwalo 'igwae hemisaeya, eeta Yesu Keliso tetelina 'oinega talobeya, ta taheboda 'aigeda.

<sup>7</sup> Ma Yehoba 'ina waiwaiyega ta 'ina helauwega paihowa bewa 'i'ebwaegauwa, ta 'abehega tetela bwebwe'ana Keliso weyahina yahepwaila latuwe. <sup>8</sup> Ma taugu gide wewelohe tohekalesiyao 'alodiya, ma tuwa 'ina helauwega paihowa bewa 'i'ebwaegauwa, 'omi tomiya ganamuli 'oimiya Keliso tetelina yaloguguyae, ma 'oinega 'ina wasawasa madou hedade wada 'italoba, <sup>9</sup> ma wete tomota mabwaiyadi sida sanapu 'abehega Yehoba tauna ginaula mabwaiyadi 'adi to'abihemasalaha, ma tuta dudulena 'oidiya 'ina nuwatuhu 'idahweya, ta sauga bewa 'igihe hapwesa pwaiya, <sup>10</sup> 'abehega 'ebe'ita tauda tohekalesiyao, ma 'oidega Yehoba 'ina sanapu mabwaiyana 'ihe'itae galewa 'ana yaluyaluwa waiwai 'oidiya.

<sup>11</sup> Bewa Yehoba 'ina nuwatuhu mwalo hene ta nige, ma bewa sauga 'igihelatuheya 'ida Bada Yesu Keliso 'oinega, <sup>12</sup> ma 'eguma Kelisoina tahemisa'e ta'atepatu, 'ane sawasawahina taluhu Yehoba tauna matana, ma ta'ahwanoi 'oina. <sup>13</sup> Coinega 'igu 'emuyamuyao bewa weyahimi sahena weyahidi 'atemi siwe'awe'a, ma hesi wada sanapu 'abehega 'igu 'emuyamuyaowedi 'omi 'imi bwebwe'ana weyahina.

#### *Keliso 'ina helau madouna*

<sup>14</sup> Coinega taugu ya'ahetulasa Tamada matana, <sup>15</sup> tauna susu mabwaiyadi galewa ma bale'uwa lamudi, <sup>16</sup> ta ya'ahwa'ahwanoi 'oina ma 'abehega 'ina wasawasa ma 'ina waiwai 'itagwala 'oimiya, ma 'ane Yaluyaluwana 'atemi 'igihewaiwaiyedi, <sup>17</sup> ma 'ane wete 'imi hemisega Keliso 'atemiya 'ida miyamiya, ta mumugami mabwaiyana helau tuwa, <sup>18-19</sup> 'oinega tohekalesiyao mabwaiyadi mahetemiya sawasawahimi Keliso 'ina helau wada sanapu bwaibwaini, 'ana tabataba, 'ana dudula, 'ana hane, 'ana sulu, geya 'ana lihemo, Keliso 'ina helau madou hedade, ma wete Yehoba tauna Tohewaiwai hedada 'ina mumugega 'ida lohemaha bwaibwainigomi.

<sup>20</sup> Moisa, 'ina waiwai solada 'ipaipaihowa, ma 'eguma to'aha weyahina ta'ahwa'ahwanoi ma'ida hemisa, tauna sawasawahina ma 'ipaipaihowa, ma 'ana loheposeyana madouna weyahida. <sup>21</sup> Coinega tohekalesiyao mabwaiyada Yesu Keliso saninega tahepwatu hatae, sauga mabwaiyana 'oidiya. Emeni.



## 4

*Wahi 'aigeda tuwamo*

<sup>1</sup> Coinega ya'ahwanoi 'oimiya ma mumugami wa'itayahi, bewa tuwa taugu deliya silagugauwa Badaina 'ina paihowa weyahina, ma 'omi Badaina 'ibwauwegomiya tauna 'ina paihowa weyahina, 'oinega 'ilobwainegomiya ma to'aha 'ina paihowaina 'ana lobwaina wamuliye, <sup>2</sup> ma ma'imi nuwadobi, ta ma'imi 'ate tagwala, ta ma'imi 'alama'i'ita, ma mahetemiyo wahelau hilegomi, ma wa'atemuyamuya 'iyamiyao 'oidiya, <sup>3</sup> ma wahetapewa waiwai, ma 'oinega Yaluyaluwa Tabuna 'i'uinigomi, ma ma'imi nuwadaumwala wamiya yaliyaya. <sup>4</sup> Moisa, wahida 'aigeda, Yaluyaluwa Tabuna wete 'aigeda tuwamo, ma 'ibwauwegitama 'omi ma tauma, ma tanuwanuwatuhu 'ada lema 'aigeda tuwamo 'abwa taloba weyahina. <sup>5</sup> Cida Bada wete 'aigeda tuwamo, 'ida hemisa 'aigeda tuwamo, 'ida babitaiso wete 'aigeda tuwamo. <sup>6</sup> Tamada Yehoba 'aigeda tuwamo, ma ginaula baibaiwana tabwanidiya ma 'oidiya, ma wete 'oida 'imiyamiya. <sup>7</sup> Ma Keliso 'ina wasawasa 'oinega 'ada heguheguyai 'i'ebwaegita. <sup>8</sup> Bewa weyahina Buki He'asisi 'ina gwae 'igwaeya:

“Tutaina 'ihaneya tabwana 'ana 'alehao 'ihewaiwai sinediya, eema tomota 'adi heguheguyai 'i'ebwaedi.”

<sup>9</sup> Gwae bewa “Cihaneya tabwana.” 'ana sanapu bewa nugeta 'idobi hedada bale'u duduna. <sup>10</sup> Ma tauna tosuluina 'ihaneya wete ta galewa 'ihanesineya, ma 'oinega tauna tupwa mabwaiyadi 'oidiya 'imiyamiya.

<sup>11</sup> Ta 'ina heguheguyai bewa gidemusa, 'abehega tomota tupwadi sihetohewaila, ma tupwadi sihepalopita, ta tupwadi sihetologuguya, ma tupwadi sihetohanugeta, ma tupwadi sihetoh'e'ita. <sup>12</sup> Ma mabwaiyada 'ida paihowa 'aigeda 'aigeda beno tohekalesiyao 'adi lema ma sihewaiwai, beno Keliso wahina 'ina sinasinabwa weyahina, <sup>13</sup> ma 'ane mabwaiyada tahemisa mahemahetena, ta wete Yehoba Natuna tada sanapu, ma 'ida mumuga matuhadi, gidemusa Keliso 'ina mumuga matuhana, ma bwebwe'ana mabwaiyana.

<sup>14</sup> Bewa 'oinega gwama mumugana 'oidega ta'ebesinedi, weyahina mwalo 'ida sanapu we'awe'ana 'oina he'ita hagadi ma hadagi si'abinihu nihuwegita, beno tupwadi to'abowao 'idi he'itao hotohotodi ma galadi 'oidiyega. <sup>15</sup> Ma hesi 'ilobwainegita ma helauwega tagwaegwae moisa, eeta 'ida mumuga mabwaiyadi sida sinasinabwa debada Keliso 'ina mumuga gidemusa. <sup>16</sup> Weyahina tauda Keliso wahina yahunao ma 'igihewaiwaiyegita gide wahinaina 'ana walowalowao, ma 'ana tubweyao mabwaiyadi 'idi paihowega sihelemalema ma helauwega simadomadou ta sihewaiwai.

*Mumuga miyamiyana ta mumuga hauhauna*

<sup>17</sup> Bewa wete Bada saninega yaloguguya 'oimiya 'abehega mumuga tomiya ganamuli gidemusa walolagu, weyahina 'idi nuwatuhu besobeso 'oidiyega, <sup>18</sup> 'idi sinasinapu siguguyouwa, ma geya Yehoba yawasina 'oidiya 'imiyamiya, weyahina 'idi debapa'ala 'oinega siheyauyaule pwaiya. <sup>19</sup> Coinega sigala moisa, eeta sitagwalediya mumuga sogala weyahina, ma mumuga galadi baibaiwadi nuwadi si'eweya.

<sup>20</sup> Ma 'omi Keliso mumugana wasanapu pwaiya 'abehega hagana, <sup>21</sup> weyahina mwalo he'ita moisa Yesu weyahina wahesagoheya Kelisoina 'oinega.

<sup>22</sup> Coinega mumuga miyamiyana walogwahatedi, beno paihowaedi mwalo wapaipaihowadi tutaina nuwatuhu dahwana sigihe galegomiya, <sup>23</sup> ma hesi 'imi nuwatuhuwao ma 'atemi si'ehau hila, <sup>24</sup> ma 'oinega mumuga hauhauna wa'ewa Yehoba 'ina mumuga gide, weyahina tauna 'ateda mumuga bwebwe'ana ma 'ehauna 'ilaguya.

*Ceda hauhauna ta bwebwe'ana*

<sup>25</sup> Coinega 'abo walogwahate ma mabwaiyami wagwae moisa 'aigeda 'aigeda 'oimiya, weyahina mabwaiyada Keliso wahina yahunao. <sup>26</sup> Ma 'eguma waganwasowala, geya'abwa wamumuga galana, ma hesi watoho ma wanuwa daumwala mwayamwayau, <sup>27</sup> ma geya'abwa Tomudulele 'ina tuta wa'ebwa'ebwae ma 'ihetoloina 'oimiya.

<sup>28</sup> Toyagaha 'ilobwainediya ma silolagu, ma hesi paihowa bwebwe'ana nimadiyega sida paihowadi ma paihowaina 'ana maisa 'oinega lema sida 'ebwa'ebwaya towewelohe 'oidiya.

<sup>29</sup> Sahena wete 'eta gwaegwana wa'ina'inana, ma hesi gwaegwana bwebwe'anamo to-mota 'adi lema weyahina, to'aha tuta 'aigeda 'aigeda 'ana lobwaina weyahina wa-hegwaegwae, ma 'oinega taiyawedi taudi sihesagohegomi, 'imi gwaeyega nata lema siloba. <sup>30</sup> Geya'abwa Yaluyaluwa Tabuna nuwana wagihegihegala, weyahina Yaluyaluwa Tabunaina gide 'ila'ilala 'oida, 'abehega 'abwa 'ada gihe'ehau taloba.

<sup>31</sup> Ma wete galaedi bewa gide walogwahatedi: he'ipi'ipi, gamwasowala, 'asona, 'ahwa galagala, ma wete gwaegwana sinala, <sup>32</sup> ma hesi wahelau hilegomi, 'atemuyemuyega 'iyamiyao 'idi pui wanuwasamudi 'aigeda 'aigeda 'oina, gidemusa Yehoba 'imi puiyao Keliso 'oinega 'inuwasamudiya.

## 5

<sup>1</sup> Yehoba 'ina helauwega 'i'ahwa natune pwaigomiya, 'oinega tauna 'ina mumugaina wamuliye, <sup>2</sup> ma wahelau hilegomi gidemusa Keliso 'ihelau 'esegita, ta tauna 'itagwaleya ta 'iboi 'ipwaoliyeya Yehoba 'oina weyahida, ta 'i'amasana, gide pwaoli mahaina Yehoba 'inisoya 'abehega 'ausalana.

<sup>3</sup> Comi Yehoba 'ana tohemisao, 'oinega 'ilobwaineya pui ma ganawala ma wasawasa 'ana hamwa wa'ebesinedi, ma geya'abwa weyahidi to'aha 'eta wagwaegwaene. <sup>4</sup> Wete geya'abwa 'ahwasewa bo 'ahwa galagala bo gwaegwana besobeso, weyahina gwaeyedi geya 'adi lobwaina solamiya, ma hesi 'imi gwaeyega Yehoba wahepwatuwe.

<sup>5</sup> Moisa, togalaedi geya'abwa wete silugulugu Keliso ma Yehoba 'idi 'ebeloina 'oina taudi gidemusa topuiyao bo tosogala bo tobwatobwa 'adi tohamwao, weyahina tobwatobwa 'ana hamwa 'ana sanapu 'abehega 'ida hemisa talagu tobwatobwa 'oina, ma geya Yehoba 'oina.

### *Casilala weyahina*

<sup>6</sup> Mumugaedi bewa weyahidi Yehoba toligeha lina 'igamwasowalediya, 'oinega geya'abwa 'aigeda taiya 'ina gwaegwana besobesowega 'i'abo'abowegomi, <sup>7</sup> ta wete geya'abwa toligeha linaedi ba'idamiyao wa'ahwa 'iya'iyagu, <sup>8</sup> weyahina 'omi guguyou mwalo 'oinega wahabala pwaima Yehoba 'ina 'asilala 'oina, 'oinega ma'imi mumuga 'asi'asilalaina wapaipaihowa, <sup>9</sup> ma mumugaedi bwebwe'adi ma dumwaludi ma moisaedi silat-  
ulatu 'asilala 'oinega.

<sup>10</sup> Ta wete watohotoho ma to'aha Bada nuwanuwana wada sanapudi ma wapaipaihowadi, <sup>11</sup> ma guguyou 'ana paihowa besobeso 'oidiyega wadena, ma hesi wahelau'adi 'abehega galadi. <sup>12</sup> Moisa tuwa, 'ebe debamwadina, 'eguma taudi 'idi paihowa dahwadahwanidi weyahidi tagwaegwae, <sup>13</sup> ma 'eguma 'aigeda paihowa galana 'ilohapwese 'asilala solana, sawasawahina ma ta'ita, <sup>14</sup> ma 'eguma ta'ita pwaiya, tauna hesi 'asilalaina. Bewa weyahina Buki He'asisi 'oina 'igwaeya,

“Cowa to'eno'eno 'amasega 'utoholo ma Keliso 'ina 'asilala 'oinega 'u'asilala.”

<sup>15</sup> Cilobwainegomiya ma 'imi mumuga wa'ita'ita bwaibwainidi ma geya'abwa wapaipaihowa besobeso ma hesi wada sanasanapu moisa, <sup>16</sup> ma geya'abwa 'imi tuta wamudamudali, weyahina bewa tuwa sauga gala hedada. <sup>17</sup> Coinega geya'abwa waheyauyaule, ma hesi nuwami 'ida sabwalena, to'aha Yehoba gidemusa 'ina nuwanuwa weyahimi.

<sup>18</sup> Geya'abwa bwasi waiwaina 'oinega wanumanuma yauyaule, beno ginaula 'ebe hesilae, ma hesi Yaluyaluwa Tabuna 'ida lohemahegomi ma <sup>19</sup> wawaliwali ma'iyamiyao, wali tapwalolo ma Same walinao, ma wete hedale walinao 'oidiyega, ma'imi yaliyaya 'atemiyega wawali Bada 'oina, <sup>20</sup> ma tuta mabwaiyana waloyauwedo ginaula mabwaiyadi weyahidi, 'ida Bada Yesu Keliso saninega, Tamada Yehoba 'oina.

### *Taudi haihainidi 'adi lina*

<sup>21</sup> Cimi he'asisi Keliso 'oina gidemusa wete 'omi waboi wahe'asisi hilegomi, ma lolina wahematamatedi. <sup>22</sup> Comi wahiwahine haihainimi mwanemiyao 'idi gwae wahematamatedi, gidemusa 'imi hematamatana Keliso 'oina, <sup>23</sup> weyahina wahine 'ana tohanugeta beno mwanena, gidemusa Keliso tauda tohekalesiyao 'ada Tohanugeta ta 'ada To'abihetena, ma tauda gide wahina yahunao, <sup>24</sup> eeta tohekalesiyao tauda Keliso 'ina gwae tahematamatedi, 'oinega gide wete wahiwahine 'ilobwainediya ma mwanediya 'idi gwae ginaula mabwaiyadi weyahidi sida hematamatedi.

<sup>25</sup> Haihainimi meloheyami 'ilobwainegomiya ma mwanemiyao wahelauwedi, gidemusa Keliso 'ina tohekalesiyao 'ihelauwegita, eeta tauna 'itagwaleya ta weyahida 'i'amasana, <sup>26</sup> 'ada gihe'ehau weyahina, beno 'ida pui 'ana 'ebe deula we'ahaina 'ina gwae 'oinega, <sup>27</sup> 'oinega tohekalesiyao tauda 'ihetohologita 'abehega 'ina bodao 'ehauda, ma geya 'abehega bi'i bo to'aha galana 'oida, ma hesi mabwaiyana tuwa bwebwe'ana, ta 'ehauna. <sup>28</sup> Coinega tauda meloheyada 'ilobwainegita ma mwanedao tahelauwedi, tauda wahida gide. Weyahina 'eguma taiya mwanena 'ihelauwe beno 'iboimo 'ihelau hileya.

<sup>29</sup> Weyahina geya 'eta wete loheya taunamo wahina 'oina 'ida lo'aleha, ma hesi 'i'itayahi ma 'ana 'i'ai wahina 'ana lema weyahina, gidemusa Keliso tohekalesiyao tauda 'i'itayahigita, <sup>30</sup> weyahina tauda tauna wahina yahunao.

<sup>31</sup> “Bewa weyahina loheya tamana ma sinana 'i'ebesinedi ma mamwanena sida miya 'aigeda, gide wahi 'aigeda tuwamo.”

<sup>32</sup> Gwae bewa gide gwae hegehegedi ma dahwadahwaina, ma 'ana sanapu Keliso ma tohekalesiyao weyahida. <sup>33</sup> Coinega 'ilobwainegomiya, ma 'aigeda 'aigeda mwanena 'ihelauwe 'iboi gide, ma wahine haihaiina sowasowana mwanena 'ihe'asisiye.

## 6

### *Gwagwama 'adi lolina*

<sup>1</sup> Comi gwagwama 'ilobwainegomiya ma sinamiyao ma tamamiyao 'idi gwae wahematamatedi, Bada matana, weyahina bewa 'oinega 'abehega wamumuga bwebwe'ana.

<sup>2</sup> Wete, “Tamau ma sinau 'uhe'asisiyanedi.” Bewa lolina nugenugetaina ma'ana gwae hemisa 'ana tohematamatanao weyahidi, <sup>3</sup> bewa gidemusa 'igwaeya, “Cebe yaliyaya 'uloba ma bale'uwa 'umiya saliyana.” <sup>4</sup> Comi tama wete geya'abwa natumiyao 'adi wahi 'wata'wata walagulagu, nata gide sigamwasowalegomi; ma hesi 'ida Bada 'ina lolinao ta 'ina he'itao waloguguyaedi.

### *Bada ma topaihowao 'adi lolina*

<sup>5</sup> Comi topaihowao 'imi badao bale'uwa wahe'asisiyanedi, ma 'idi gwae wahematamatedi, gidemusa Keliso 'ina gwae wahematamatane 'eseya, ma geya'abwa wete wahenuwanaluwa. <sup>6</sup> Geya'abwa 'abehega 'eguma tutaina 'imi babadao si'ebubugomi ma 'abwa 'oidiya wapaihowa bwaibwaina, ma 'eta tuta geya, ma hesi Yehoba weyahina 'imi guibiga 'atemiyega wapaipaihowa. <sup>7</sup> Comi Keliso 'ina bodao, 'ilobwainegomiya ma 'imi babadao 'oidiya wa'atetagwala gide Yehoba 'oina wa'ate'ate tagwala, ma weyahidi wapaihowa bwaibwaina. <sup>8</sup> Ma wanuwatuhuyahi 'abehega babadao ma 'idi topaihowao mabwaiyadi 'idi paihowa bwebwe'adi 'adi maisa Yehoba 'oinega siloba mahemahetena.

<sup>9</sup> Comi babadao wete wamumuga bwaibwaina 'imi topaihowao 'oidiya, ma geya'abwa wahelihiyedi, ma wanuwatuhuyahi 'abehega mabwaiyami 'omi ma taudi 'imi Bada galewa 'imiyamiya, eeta 'ina lolina 'oimiya mahemahetena mabwaiyami weyahimi, geya hagana ma hagana.

### *Cale'o ma 'aleha tobwatobwaedi Yehoba 'ina paihowa weyahina*

<sup>10</sup> Ciyagwao, Bada 'ina waiwai madounega wahewaiwai, <sup>11</sup> ma Yehoba 'ina tobwatobwa 'aleha mabwaiyana 'oidiyega wa'otena, ma 'oinega geya'abwa wawe'awe'a tutaina 'eguma Tomudulele 'i'abowegomi. <sup>12</sup> Weyahina 'ida lo'aleha geya tomota mahetedao, ma hesi tololina galadi ba'idadao, taudi guguyou bewa tuwa bale'uwa 'adi tololinao, ma galewa 'ana yaluyaluwao galadi.

<sup>13</sup> Bewa weyahina Yehoba 'ina tobwatobwa 'aleha mabwaiyana wa'otedi, ma 'ane geya'abwa wawe'awe'a 'abwa tuta galana 'oina, ma 'oinega ma'imi waiwai watoholo pa'ala. <sup>14</sup> Coinega watoholo ma he'ita moisa walogadiwane ma lumalumami wa'ausidi mumuga dumwaluna 'oinega, <sup>15</sup> ma 'ami butu wa'ote beno nuwa daumwala tetela bwebwe'ana 'oinega walobodabodae. <sup>16</sup> Ma wete 'imi hemisa gide 'imi lobodaboda 'oinega wa'ausigomi, beno sawasawahina Tomudulele 'ina 'aliliya waiwai 'ihabodebodedi. <sup>17</sup> Wete 'ami 'abihetena wa'ewa 'abehega debami 'adi 'ahubodaboda, ma Yaluyaluwa Tabuna 'ina 'elepa 'aleha wa'ewa, beno Yehoba 'ina gwae.

<sup>18</sup> Tuta mabwaiyana Yaluyaluwa Tabuna 'ina lema 'oinega 'ahwanoi baibaiwadi 'oidiyega wa'ahwa'ahwanoi Yehoba 'oina. Sahena wawe'awe'a ma hesi ma'imi toholopa'ala wa'itayahigomi ma wa'ahwanoi tohekalesiyao mabwaiyadi weyahidi, <sup>19</sup> ma taugu wete weyahigu, ma 'oinega ma'igu 'atepatu tetela bwebwe'ana 'ana sanapu 'wai'waihina yahehepwaila. <sup>20</sup> Tetelaina bewa 'ana paihowa weyahina deliya silagu luhuwegauwa, 'oinega wa'ahwanoi Yehoba 'oina ma 'ane tetelaina yada gwae latuhe ma'igu 'atepatu, weyahina bewa gidemusa 'ana lobwaina.

### *Cebe losaloha*

<sup>21-22</sup> Tikiko, tauna tasidai bwebwe'ana, ta 'ihetahetapewa Bada 'ina paihowa 'oina, ma yahewasaeyawa ma 'ane teteligu mabwaiyana 'ida he'ote'oteteli 'oimiya, ma 'abehega 'igu miya ta 'igu paihowa weyahidi wasanapudi, 'oinega 'ima miya weyahina 'ihenuwa lagugomi, ma wete 'ida gihepa'aligomi. <sup>23</sup> Helau ma hemisa ma yaliyaya Tamada Yehoba ma Bada Yesu Keliso 'oidiyega, 'omi 'iyagwao moisa 'oimiya. <sup>24</sup> Ta wete taiyawedi ba'idamiyao, 'eguma 'ida Bada Yesu Keliso sihelau hataeya, tauna 'ina 'atemuyemuyega 'ida helauwedi wete.  
Taugu Paulo.

## PILIPAI MePilipai 'idi leta Paulo 'ileleya

Mwalo Paulo 'iguguya gogo Pilipai 'oina, beno wahine Lidiya 'ina 'asa, ta Yesu 'ana tomuliyao tupwa nage 'oina Paulo nuwana si'eweya. Wete tutaina deliya 'imiyamiya 'ana helau wete sihewasaeyama, ta weyahina 'iyaliyaya, ta leta bewa 'oina 'iloyauwedowa 'oidiya.

Ma 'aigeda ginaula 'ihenuwa laguwediyaya 'abehega sahena wataha, weyahina Yesu nuwanuwana ma sihe'iyaliyagu mahemahetena.

### *Loyauwedo*

<sup>1</sup> Taugu Paulo ma Timoti mahetegu 'apaipaihowa To'abihetena Yesu weyahina, 'aleleleyawa 'omi mePilipai, Yesu Keliso 'ina tohekalesiyao, ta wete 'imi tohanugetao ta 'imi dikoniya mahetemiya, <sup>2</sup> Tamada Yehoba eema Bada Yesu Keliso 'idi helauwega tuwa wamiya yaliyaya.

### *Paulo 'ina 'ahwanoi mePilipai weyahidi*

<sup>3</sup> Tuta mabwaiyana Yehoba 'oina yahelau, 'eguma tutaina yanuwatuhugomi, <sup>4</sup> ma'igu yaliyaya weyahimi, 'igu 'ahwanoiya 'oidiya, <sup>5</sup> ma'igu loyauwedo 'ama lema 'oimiyega 'alobediya, tetela bwebwe'ana 'ana hepwaile hauhawega ta nige, weyahina.

<sup>6</sup> Wete ma'igu hemisa 'abehega Yehoba 'ina paihowa bwebwe'ana 'ihegaineya 'atemiya, 'abwa nata tauna 'ilosalohi Yesu Keliso 'ina sabwelo madouna 'oina. <sup>7</sup> Moisa tuwa, 'ilobwaineya ma to'aha gidemusa weyahimi yalolotoho, eema nuwagu wete wa'eweya, weyahina 'omi mahetegwao Yehoba 'ilemelemegita bewa tuwa deliya yamiyamiya, ma 'ilemelemegita wete wasa bwebwe'ana 'ana he'ita ma 'ana 'abihewaiwai 'oidiya.

<sup>8</sup> Yehoba wete 'isanasanapugau 'abehega Yesu Keliso 'ina helauwega nuwanuwagu 'omi, <sup>9</sup> eeta ya'ahwa'ahwanoi weyahimi ta 'abehega wahehelau hilegomi ma 'oimiyaga helau 'imadou ma'imi sinasinapu ta wete ma'imi sanapu moisa, <sup>10</sup> ee 'oinega nuwatuhu bwebwe'adi wahesinuwanedi, ma 'ane Keliso 'ina sabwelo 'abwa 'oina mumugami bwebwe'ana ma 'ehauna, <sup>11</sup> ma'imi paihowa bwebwe'adi Yesu Keliso 'ina waiwaiyega, ta weyahidi tomota Yehoba sihepwatuwe ma si'ahwa bwebwe'ane.

### *Paulo 'ina 'atetagwala Keliso 'oina*

<sup>12</sup> Ciyagwao, nuwanuwagu ma wasanapu 'abehega mwauwedi yaloba pwaidiya ee 'oidiyega wasa bwebwe'ana 'ilelelewana tomota baibaiwadi 'oidiya. <sup>13</sup> Coinega tupwa bewa 'oina Sisa 'ina tolo'alehao ma tomota mabwaiyadi sihesagoha pwaiya 'abehega Keliso weyahina silagugauwa deliya. <sup>14</sup> Ta wete 'iyadao mabwaiyadi 'igu miya deliya si'iteya ma sihetahetapewa Bada 'ina paihowa 'oina, ta Yehoba 'ina gwae sihehpwaiile ma'idi 'atepatu.

<sup>15</sup> Tupwadi tologuguyao he'ipi'ipiyega silologuguya Keliso weyahina, ma tupwadi wete helauwega silologuguya, <sup>16</sup> sisanapugauwa deliya yamiyamiya wasa bwebwe'ana 'ana he'ita weyahina, <sup>17</sup> ma hesi tohe'ipi'ipiyedi nuwanuwadi ma nuwagu sigihegaladi bewa tuwa deliya yamiyamiya, 'oinega 'idi 'abowega Keliso tetelina siguguyae taudimo 'adi gilagata weyahina.

<sup>18</sup> Ma tuwa Keliso'ina wasana 'ana loguguya baibaiwana weyahina yayaliyaya, 'eguma 'abowega bo nuwana gwae moisega, yayaliyaya tuwa. <sup>19</sup> Ma wete yayaliyaya, weyahina yasanapuya 'abehega Yesu Keliso yaluyaluwana 'ina lema 'oinega ta 'imi 'ahwanoiya weyahigu 'oidiyega nata lema yaloba miyamwau bewa 'oinega.

<sup>20</sup> Taugu wete yahehemisa ma wete yanuwatuhu yahiya 'abehega geya'abwa yadebadeba mwadina, ta hesi yanuwatuhu yahiya 'abehega ma'igu 'atepatu bewa tuwa ma



sauga mabwaiyana Keliso sanina yagihemadouwe, nuwana 'igu miya mayawasigu bale'u 'oina, nuwana 'igu 'amasa 'oina.

<sup>21</sup> Ceguma yamiya bale'uwa beno Keliso ba'idagu, ma hesi 'eguma ya'amasa beno Keliso 'oinega loheposeyana yaloba. <sup>22</sup> Ceguma bale'uwa yamiyamiya 'igu paihowao bwebwe'adi silatulatu Keliso weyahina, 'oinega geya yasanapu to'aha nuwanuwagu ma yahesinuwe. <sup>23</sup> Weyahina ginaula 'eluwa 'oidiyega 'adi hesinuwa 'oiguwa mwau hedada. Nuwanuwagu ma bale'u bewa ya'ebesine ma Keliso mahetegu 'amiya, beno 'ebe yaliyaya madouna. <sup>24</sup> Ta hesi 'ilobwainegauwa ma bale'uwa yamiyamiya eema 'oinega 'ane yalemelemegomi.

<sup>25</sup> Coinega yasanapu bwaibwainiya 'abehega 'omi mahetegwao tamiyamiya, ma yalemelemegomi eema wayaliyaya 'imi hemisa Keliso 'oina weyahina. <sup>26</sup> Eema 'abwa 'igu habo'ena hila 'oina, wayaliyaya madouna, beno Yesu Keliso 'ina lema 'oida. <sup>27</sup> Ta hesi wa'itayahigomi ma 'ane 'imi paihowao 'oidiyega tomota Keliso tetelina si'ahwa bwebwe'ane, eema 'eguma yahabo'enegomi, bo nuwana 'eguma yamiya hila, tuwa wasami bwebwe'ana yahesagohe 'abehega ma'imi 'atetagwala watoholo pa'ala, ta ma'imi nuwatuhu mahemahetena eema 'oinega wahetahetapewa wasa bwebwe'ana 'ana hemisa weyahina, <sup>28</sup> ma geya'abwa wete wamatamatauta 'ami 'alehao 'oidiya. Ma 'eguma 'ami 'alehaowedi 'imi 'atepatu si'ita, beno taudi sisanapu moisa 'abehega sida hesilae, ma 'omi 'abihetena waloba Yehoba 'oinega.

<sup>29</sup> Weyahina Yehoba 'itagwala pwaiya 'oimiya ma Keliso 'oina wahemihemisa, ma tauna wete weyahina wa'emuyamuya, <sup>30</sup> taugu gidemusa 'igu lo'aleha Keliso weyahina 'agu muyao wa'itediya, ta bewa tuta wahesagohediya, ta 'omi wete 'imi lo'aleha ma 'ami muyao gidemusa waloba 'esedi.

## 2

### *Nuwasulu*

<sup>1</sup> Togidega, Keliso sawasawahina 'igihe 'atepatugita, nuwana 'ina helau 'igihe waiwaiyegita? Togidega yaluyaluwa Tabuna sawasawahina 'ihe'iya'iyaguwegita, ma 'oinega tahelau hilegita ma tahe'ate muyamuyaegita? <sup>2</sup> Ceguma gidemusa, 'ilobwainegomiya ma wanuwatuhu mahemahetena ma wahelau hilegomi 'omi, yaluyaluwami ma 'atemi 'idi he'aigeda 'oinega, ta 'imi helauina weyahina, 'ane yayaliyaya moisa. <sup>3</sup> Geya'abwa wanuwanuwa hane, nuwana wahehe'ipi'ipi, ma hesi wanuwasulu ma 'iyamiyao sanidiyao wagilagasidi. <sup>4</sup> Ma geya'abwa waboi 'imi paihowa weyahina wanuwanuwa, ta hesi 'iyamiyao 'idi miya bwebwe'ana weyahina wanuwatuhu.

<sup>5</sup> Cilobwainegomiya ma 'imi nuwatuhuwao Yesu Keliso 'ina nuwatuhu gidemusa. <sup>6</sup> Yesuina Yehoba, ma genuwana ma 'ihetoloina, <sup>7</sup> ta hesi Yehoba 'ina wasawasa 'i'ebesineya, ma 'ili'uwa bale'uwa eema 'iheloheya masiha, hewali 'aigeda gidemusa. <sup>8</sup> Ciheloheya ta 'inuwasuluwa eeta 'itagwaleya 'iboinamo ta 'i'amasa kelose 'oina.

<sup>9</sup> Coinega Yehoba Yesu 'i'abihaneheya, ma wete sanina 'i'abihaneheya sani mabwaiyana tabwanidiya, <sup>10</sup> ta 'oinega tauna sanina weyahina megalewa ma mebale'u ma wete to'amasao eema mabwaiyada ta'etuluha 'oina, <sup>11</sup> ma ta'ahwa moisae 'abehega Yesu Keliso tauna Badaina, ta wete Tamada Yehoba tahepwatuwe.

### *Casilala mebale'u weyahidi*

<sup>12</sup> Ciyagwao 'omi hematamatana lamuna. Mwalo mataguwa wahematamatana, ta bewa tuwa 'oimiyega yamiya bwaga, ma tuwa 'abwa wahematamatana moisa. Coinega 'ilobwainegomiya ma Yehoba wamataute ta wete watoho waiwai ma 'ina 'abihetena waloba, <sup>13</sup> weyahina Yehobaina 'atemiya 'ihetahetapewa, ta 'abehega tauna 'ina nuwatuhuwega 'omi wanuwatuhu ma wapaipaihowa. <sup>14</sup> Eema 'imi paihowa 'oidiya ma'imi tagwala wapaihowa ta geya'abwa ma'imi lowahi'wata walolomugi, <sup>15</sup> ma hesi 'abehega 'omi Yehoba natunao bwebwe'ami ma 'ehaumi, ta geya wete 'imi galamo ma mebale'u 'idi mayale 'omi. Weyahina taudi 'idi mumuga guguyou ma galadi.

<sup>16</sup> Ciyagwao, wasa bwebwe'ana wa'abiyahi momosi ma 'oinega yawasimi miyamiya hatayana waloba, ma tutaina Keliso 'ihilama taugu yayaliyaya weyahimi. Genuwagu ma 'igu paihowa 'oimiya 'adi mudala.

<sup>17</sup> Wete 'eguma 'agu 'alehao 'i'iunamo silohe'amasigau, gide sipwaoliyegau, tuwa yayaliyaya, ma 'omi wete wada yaliyaya. Mwalo tutaina Yesu wahemiseya 'ana 'ita gidemusa wapwaopwaoli Yehoba 'oina, ma 'eguma ya'amasa, 'igu 'amasaina 'omi 'imi pwaoliyedi 'iloheposeyanedi. <sup>18</sup> Coinega 'ilobwainegomiya, ma 'omi ma taugu tayaliyaya hegogona.

<sup>19</sup> Yanuwatuhuyahi 'abehega Bada Yesu 'ina lemega sawasawahina tuta 'i'iuna 'oina Timoti yahewaseyawa, ma 'ane wasami 'itauyeyama 'oiguwa, ma weyahimi yayaliyaya.

<sup>20</sup> Timoti 'iboinamo 'imi miya weyahina 'inuwanuwatuhu madouna, <sup>21</sup> ma 'iyamo 'agu tolemao baibaiwadi taudimo weyahidi sinuwanuwatuhu, ta geya Yesu Keliso 'ina paihowa weyahina sida nuwanuwa. <sup>22</sup> Ta Timoti wasanapuya 'abehega loheya bwebwe'ana, ma tuwa gidemusa natugu mahetegu wasa bwebwe'ana weyahina 'ahehetapewa waiwai. <sup>23</sup> Coinega 'eguma tutaina 'agu loina yahesagohe, nuwanuwagu ma Timotiina yahetuneyawa 'oimiya. <sup>24</sup> Ta wete yahemisa 'abehega Bada 'ina lemega tuta 'i'iuna ma taugu wete yatauyawa yahabo'enegomi.

<sup>25</sup> Ta bewa tuwa 'igu nuwatuhu 'abehega 'ilobwaineya ma Epapilodito yahetune hileyawa 'oimiya, tauna tasigu ta mahetegu 'apaipaihowa, tuwa gide 'alolo'aleha Yesu Keliso weyahina. Epapiloditoina mwalo 'agu lema 'oimiyega 'itauyeyama, <sup>26</sup> eeta bewa tuwa nuwanuwana 'omi, ma tutaina mwalo 'ina lohala wasana wahesagoheya, 'ebwa tauna 'inuwanuwatuhu ma 'abehega geya'abwa 'omi wa'ate'ateyoho 'ina lohala weyahina. <sup>27</sup> Moisa 'ilohala madouna, ma 'iyamo Yehoba 'i'atemuyemuyeya, ma wete taugu 'i'atemuyamuyaegauwa, weyahina 'eguma Epapiloditoina 'i'amasa nata yanuwagala moisa.

<sup>28</sup> Bewa weyahina nuwanuwagu madouna ma yahetuneyawa, ma wa'ita hila 'abehega ma'ina bwebwe'ana, ma tauna weyahina wayaliyaya, ta wete 'abehega taugu 'igu 'ateyoho 'igumwala. <sup>29</sup> Eeta 'eguma to tuta 'ilatuwa 'oimiya, Bada saninega wabwauwe ma'imi yaliyaya 'oina. Ta tupwadi Bada 'ina topaihowao, 'eguma sitauyawa 'oimiya, wahe'asisiyanedi gidemusa Epapiloditoina. <sup>30</sup> Moisa tuwa, Epapilodito Keliso 'ina paihowa 'oina lohalega 'i'iunamo ma 'i'amasa, weyahina 'omi geya sawasawahina ma walemegau, ma Epapiloditoina 'ipasima ta 'ilemegau, eeta 'oinega lohalaina 'ilobeya.

### 3

#### *Mumuga bwebwe'ana weyahina*

<sup>1</sup> Ciyagwao, 'ilobwainegomiya wete ma 'ida Bada 'oina wada yaliyaya. Mwalo 'ami loina yaleleyawa, ta bewa tuwa wete nuwanuwagu ma yalele hilawa, ma 'oinega wamiya bwebwe'ana.

<sup>2</sup> Wa'itayahigomi galagalaidi 'idi mumuga gide tuwa 'edewa 'oidiyega, taudi 'adi 'ila'ilala si'upwa'upwa 'wapidiya. <sup>3</sup> Ma hesi tauda 'ada 'upwa 'ateda, ta geya 'wapida, 'eguma Yehoba 'oina ta'etuluha yaluyaluwanega, eema Yesu Keliso namo tahepwatuwe, ma sahena wasawasa bale'u 'oina tahehemisa. <sup>4</sup> Moisa tuwa, sawasawahigu ma wasawasa bale'u weyahina yagwae hane, weyahina taugu sanigu tomota baibaiwadi sanidiyao 'ihane sinediya, <sup>5</sup> weyahina taugu gwama Isileli moisa, 'igu susu Beniyamina, eeta sabwelo 'eit 'igu li'u mulina 'igu 'ebeselolo 'wapina si'upweya, gide meYudiya 'ima 'ila'ilala, eema wete Palisiyao 'idi loinao yamuliyediya moisa.

<sup>6</sup> Eeta yahetapewa madouna tohekalesiyao yagihe 'am'amnediya, ta geya 'eta wete Mosese 'ina loinao yaligeligehi. <sup>7</sup> Ma hesi saniguina madouna ya'ahwa ginaula besobesoweya, weyahina Keliso namo 'oina yatagwalegauwa. <sup>8</sup> Moisa tuwa, 'igu Bada Yesu Keliso 'ana sanapu bwebwe'ana hedada, eeta wasawasa bale'u 'ibwebwe'ana sinediya, 'oinega wasawasaedi ya'ahwa ginaula besobesowediya, eeta Keliso weyahina ginaula mabwaiyadi yaulediya ta ya'ahwa galaediya, weyahina nuwanuwagu Keliso namo,

<sup>9</sup> ma wete nuwanuwagu Keliso mahetegu 'amiya, geya 'abehega taugu 'igu mumuga dumwadumwalunega, bo Mosese 'ina loinao 'oidiyega, ta hesi hemisa Keliso 'oina weyahina, beno 'ida mumuga dumwadumwaluna Yehoba 'i'ebwaegita 'ida hemisa Keliso 'oina weyahina. <sup>10</sup> Nuwanuwagu wete Keliso yada sanapu ma 'ina toholohila 'ana waiwai yalotoho, ta 'ina muya wete tauna gidemusa yada lotohodi, wete gide 'igu 'amasa gide tauna, <sup>11</sup> ma 'oinega, 'eguma sawasawahina 'amasega taugu wete yatoholo hila.

<sup>12</sup> Geya 'abehega toholo hila yalobeya, geya wete 'igu mumuga mabwaiyana sibwebwe'ana, ta hesi bewa 'igu 'ebe masiina, ma 'abehega ya'abiyahi, weyahina nuwatuhu bewa weyahina Yesu Keliso 'i'abiyahi pwaigauwa. <sup>13</sup> Ciyagwao, geya yagwaegwae 'abehega ya'abiyahi pwaiya, ta hesi 'igu nuwatuhu 'aigeda tuwamo, 'oinega nuwatuhu muliguwa yanuwanaidedi, ma to'aha mataguwa weyahidi yatoho waiwai, <sup>14</sup> beno 'ebe masiina, Yehoba 'ana maisa galewa Yesu Keliso 'oinega. <sup>15</sup> Coinega mabwaiyada bewa gidemusa tada nuwanuwatuhi mahemahetena, 'eguma 'ida nuwatuhi simatuha pwaiya. Ta wete 'eguma to'aha weyahina 'imi nuwatuhi hagana, ginaulaina lamuna Yehoba wete 'abwa 'ihe'ita 'oimiya. <sup>16</sup> Ma 'iyamo 'ilobwainegita ma ginaulaedi talobediya ta'abimomosidi.

<sup>17</sup> Ciyagwao mabwaiyami wahe'au'aunawegau, ma taiyawedi taudi 'idi mumuga gidemusa taugu, 'oidiya wa'ebubuna, ma 'omi wete gidemusa wamumuga 'esa. <sup>18</sup> Ma 'iyamo tomota tupwana baibaiwadi 'idi mumuga 'oinega Keliso silo'aleheya, tauna Kelisoina weyahida 'i'amasa kelose 'oina. Tolo'alehaowedi mwalo yahepwaileidiya 'oimiya, bewa tuwa wete ma'igu dou yalohila, ma galaedi 'oimiya yahepwaileidi. <sup>19</sup> Taudi nata 'abwa 'ebelosaloha 'oina sihesilae, weyahina 'idi hemisa gamwa seseha weyahina, ma nuwatuhi 'ebe debamwadinano sihepewatuwedi, weyahina nuwatuhi bale'umo nuwanuwadi. <sup>20</sup> Ma tauda hesi 'ida tupwa galewa, eema nage 'oinega 'ada To'abihetena, tauna 'ida Bada Yesu Keliso, 'abwa 'ihilama, ta tauna weyahina tayamwayamwa. <sup>21</sup> Ma tutaina 'ihilama wahida 'ida buidi, nige we'awe'adi, ma 'ida buidi gide tauna wahina waiwaina ta 'ehauna gidemusa, ma 'ina paihowaina bewa tauna 'ina waiwaiyega, weyahina tauna sawasawahina ma ginaula mabwaiyadi 'oidiya 'ihetoloina.

#### 4

<sup>1</sup> Ciyagwao nuwagu wa'eweya moisa, ta yahelauwegomiya, ma 'abehega 'omi 'igu 'ebe yaliyaya moisa, nuwanuwagu ma loguguyaedi wamuliyedi, ma 'oidiyega watoholo pa'ala, 'ida Bada weyahina, ta tauna mahetemiu.

#### *Loguguya*

<sup>2</sup> Comi wahiwahine sanimi Yu'odiya ma Sinitiki ya'ahwa'ahwanoi 'oimiya ma wada 'ahwa 'iya'iyagu hila, 'ida Badaina nuwanuwana gidemusa. <sup>3</sup> Cowa wete tohanugeta, 'owa 'iyagu moisa ya'ahwanoi 'oiuwa ma wahiwahineyedi 'ulemedi, weyahina mwalo taudi mahetegwao 'apaihowa mahemahetena, wasa bwebwe'ana 'ana hepwaileidi 'oina, ta wete Kelemeniti ma tupwadi wete 'agu tolemao mahetemayao 'apaihowa, taudi sanidi yawasi bukiina 'alona leleleina.

<sup>4</sup> Tuta baibaiwana 'oidiya wada yaliyaya 'ida Bada weyahina, ta wete yahegwae hilegomi 'abehega wayaliyaya. <sup>5</sup> Cilobwainegomiya ma tomota mabwaiyadi 'imi he'alamal'ita sida sanasanapu, weyahina 'i'iunamo 'ida Badaina 'ina sauga hilama.

<sup>6</sup> Geya'abwa 'aigeda to'aha weyahina wanuwanuwa, ma hesi ma'imi loyauwedo ginaula mabwaiyadi weyahidi, Yehoba 'oina wa'etuluha, ta 'imi nuwatuhiwao weyahidi wa'ahwanoi, <sup>7</sup> ma Yehoba 'ina lemao tomadou hedada 'oidiyega 'abwa 'igihe yaliyayegomi, ma 'oinega Yesu Keliso mahetemiu 'atemi ta 'imi nuwatuhiwao sibwebwe'ana.

<sup>8</sup> Ciyagwao, bewa 'aigeda wete loguguya 'abehega wada nuwatuhi ginaula moisadi ma'adi he'asisi weyahidi, ma ginaula dumwadumwaludi weyahidi, ma ginaula 'ehaudi weyahidi, ma ginaula 'adi 'ita 'ausaladi weyahidi, ma ginaula helahelaudi weyahidi, ta 'eguma to'aha bwebwe'ana 'oidiya bo nuwana 'ebe hepewatu 'oidiya. <sup>9</sup> Comi wada

he'au'aunawegau, 'igu paihowao wa'itediya, ta 'igu gwaeyao ta 'igu he'itao wahesago-hediya ta wasanapudiya. Coinega Yehoba ma'ina nuwadaumwala mahetemiua nata wayaliyaya.

*MePilipai 'idi helau Paulo 'oina*

<sup>10</sup> Cida Badaina 'igihe yaliyaya pwaigauwa, weyahina bewa tuwa wa'atemuyemuyegauwa. Moisa mwalo nuwanuwami ma walemegau, ma 'iyamo geya 'eta 'eda wada lobeya.

<sup>11</sup> Ta hesi geya'abwa yalolomugi 'igu miya mwau mwalo 'oidiya weyahidi, weyahina yasanapu pwaiya sawasawahigu miya mabwaiyadi 'oidiya ma'igu yaliyaya tuwa, <sup>12</sup> nuwana miya mwau 'oidiya nuwana 'ebe yaliyaya 'oidiya, nuwana tuta 'eli'eli, nuwana 'eguma ma'agu gomale, nuwana yahewasawasa, nuwana yahewewelohe, <sup>13</sup> sawasawahigu miya mabwaiyana 'oidiya yada yaliyaya tuwa, weyahina tauna mahetegu 'igihe waiwaiyegauwa. <sup>14</sup> Ma 'iyamo 'igu miya mwau bewa wagihe malamalai pwaiya 'imi lemega, ta weyahina yaloyauwedo madouna 'oimiya.

<sup>15</sup> Comi mePilipai wasanapu pwaiya 'abehega wasa bwebwe'ana 'ana hepwailla nugeta 'oimiya 'oina, tutaina Masidoniya ya'ebesineya, eeta geya 'eta 'asa tohekalesiyao 'idi 'ehelena 'oinega silemelemegau, 'adi lema 'oiguwega 'ana maisa weyahina, ma hesi waboimo mePilipai walemegauwa. <sup>16</sup> Moisa tutaina mwalo Tesalonaika 'oina yamiyamiya 'agu lema ma'aigeda ta muliyetega heluwena wete wa'ebwaegauwa.

<sup>17</sup> Cigu gwae bewa geya 'abehega nuwanuwagu 'ehelena wada 'ebwaegau, ma hesi 'abehega 'imi 'ehelena huwaina 'oimiya 'ida madou, 'ami lema moisa weyahina. <sup>18</sup> Ma 'imi 'ehelena Epapilodito 'itauyeyama, mabwaiyana yalobeya 'imaha tasitasiwa, gide 'ane 'imi pwaoli bwebwe'ana Yehoba 'oina, wagabu pwaiya eeta mahaina bwebwe'ana Yehoba 'inisoya, ta weyahina 'iyaliyaya.

<sup>19</sup> Coinega 'igu Yehobaina 'imi nuwatuhuwao mabwaiyadi nata 'i'ebwaegomi, beno tauna 'ina wasawasa baibaiwa hedada Yesu Keliso 'ina paihowao 'oidiyega. <sup>20</sup> Coinega 'ida Yehoba Tamadaiina tada hepwaatuwe hataya. Emeni.

<sup>21</sup> Cigu helau Yesu Keliso 'ina tohekalesiyao mabwaiyadi 'oidiya. Wete 'iyagwao 'ebwa mahetegwao 'amiyamiya 'idi helau 'oimiya. <sup>22</sup> Ma tohekalesiyao taudi Sisa 'ina hada sipaipaihowa, ma tohekalesiyao mabwaiyadi wete 'idi helau 'oimiya.

<sup>23</sup> Bada Yesu Keliso 'ina helauwega yaluyaluwami sida miya bwebwe'ana.

Taugu Paulo.

## KOLOSE

### MeKolose 'idi leta Paulo 'ileleya

Tohe'ita 'abo'abo meKolose siguguyediya, sigwaeya, “Yesu Keliso geya sowasowahina ma 'i'abihetegita 'ida pui mabwaiyana 'oidiyega. Tauna 'ina waiwai tupwana, ta 'ilobwainegita tupwadi 'ebe hemisao wete tamuliyedi.” Coinega meKolose 'idi leta bewa 'alona Paulo guguya dumwaluna 'i'ebwaediya, 'igwaeya, “Yesu Yehoba Natuna, Tohewaiwai hedada, taboinamo tauna ginaula mabwaiyana sowasowahina.

#### *Loyauwedo*

<sup>1</sup> Taugu Paulo, ma Yehoba 'ina hesinuwega yahetohewaila Yesu Keliso weyahina, ta tasidai Timoti 'i'abihetegauga, 'oinega 'imi leta bewa yaleleyawa, <sup>2</sup> 'omi meKolose, Yehoba 'ina bodao, ma Keliso 'ana tohemisao, 'oimiya. Tamada Yehoba 'ina helauwega tuwa wamiya daumwala.

#### *Paulo meKolose weyahidi 'iloyauwedo*

<sup>3</sup> Sauga mabwaiyana 'ima 'ahwanoi Yehoba 'oina, tauna 'ida Bada Yesu Keliso Tamana, ma 'anuwanuwa tuhugomi ta weyahimi 'aloloyauwedo. <sup>4</sup> Weyahina wasami 'ahesagoheya, 'abehega Yesu Keliso wahemisaeya, ma tohekalesiyao mabwaiyadi wahelauwediya. <sup>5</sup> Weyahina wanuwatuhu yahiya 'abehega 'imi 'ebe yaliyaya 'abwa waloba galewa, gide wasaina moisa mwalo wahesagoheya.

<sup>6</sup> Wasaina wahesagoheya ta sauga bewa tupwa mabwaiyadi 'oidiya 'ihehemadou ma 'ihuwahuwa, 'omi gide saugaina Yehoba 'ina helau wahesagoha nugeteya Epapila 'oinega, ma wa'ahwa moisaeya. <sup>7</sup> Moisa, 'iyada Epapilaina loheya bwebwe'ana, 'oinega wasaina 'ihe'ita nugetegomiya. Weyahina tauma 'ihemiyalaemaiya ta 'ihehetapewa Keliso weyahina 'oimiya. <sup>8</sup> Eeta Epapilaina Yaluyaluwa Tabuna 'ana helau 'atemiya 'ihewaiwai 'oima.

#### *Keliso 'ina paihowa*

<sup>9</sup> Saugaina wasami 'ahesagoha nugeteya 'ana siga bewa, 'ima 'ahwanoi weyahimi geya 'ada lolaguwa. Ma hesi Yehoba 'oina 'a'ahwa'ahwanoi ma 'oinega Yaluyaluwa Tabuna 'i'abihehuwa sabwalenigomi, ta 'ane wasanapu bwaibwaini to'aha 'ina nuwatuhu weyahimi. <sup>10</sup> Ta 'imi paihowaedi 'oidiyega 'ida Badaina wa'abihe yaliyaya. Ma wete mumugami bwebwe'ana 'ihuwahuwa, ta Yehoba 'ana sanapu 'oimiya 'ihemadou.

<sup>11</sup> Ma wete tauna 'ina waiwai madounega 'i'abihe waiwaiyegomi, ma 'imi paihowa mabwaiyadi 'oidiya wahe'alama'i'itanegomi, ma watoholo pa'ala, ta wete ma'imi yaliyaya, <sup>12</sup> waloyauwedo Tamadai 'oina, weyahina tauna 'ina tagwalega tupwa 'asi'asilalaina 'oina tamiyamiya, 'ina tomotaiyao ba'idadao. <sup>13</sup> Moisa, tupwa guguyou 'oinega 'i'etolihasigita ma 'ilagubugita Natuna 'ina 'ebeloina bwebwe'ana 'oina. <sup>14</sup> Weyahina tauna 'oina 'etolihasa talobeya, beno 'ida pui 'oidiyega 'ibuyogita.

<sup>15</sup> Tauda geya sawasawahida ma Yehoba ta'ita, ma hesi 'ana 'ita tuwa Natunaina, ma Yehoba 'ana paipaihowa mabwaiyadi Natunaina 'ihane sinediya. <sup>16</sup> Weyahina Natunaina ginaula mabwaiyadi galewa ta bale'uwa huhudi, ginaulaedi ta'ita'itadi ma ginaulaedi geya tada 'itediya, gide aneloseyao bo toloinao waiwai bo yaluyaluwao, mabwaiyadi Yehoba 'ipaihowediya Natuna 'ina paihowega, ma Natunaina weyahina. <sup>17</sup> Ma tuta nugenugeta 'oina mulina ma ginaula mabwaiyadi geya silatu, ma nugeta Natuna 'imiyamiya. Ta Natunaina 'ina waiwaiyega ginaula mabwaiyadi sipaipaihowa.

<sup>18</sup> Tauda tohekalesiyao gide tuwa yahunao ma tauna debada, ma tauna 'ebehegaina, ta tauna wete totohilo hila nugenugeta 'amasega. Ma 'oinega ginaula mabwaiyadi 'ilohane sinediya. <sup>19</sup> Yehoba 'ina nuwatuhu gide ma 'ina waiwai ta 'ina mumuga mabwaiyadi 'oidiyega Yesu 'ilohemaheya. <sup>20</sup> Ta Yesu kelose 'oina bweyahina 'ina



dauwega ginaula mabwaiyadi bale'uwa ma galewa simiyawasiya 'i'ewedima Yehoba 'oina sabi he'iyaiyagu hila.

<sup>21</sup> Comi wete mwalo wamiya wasiwasiya, ta 'imi nuwatuhuwega Yehoba walo'aleheya, 'oinega wamumuga galagala. <sup>22</sup> Ta Yesu wahina 'ina 'amasa 'oinega 'i'ewegomiya ma 'oinega Yehoba ba'idamiu wahe'iyaiyagu hila, ma'imi mumuga bwebwe'ana ma dumwaluna matana. <sup>23</sup> Beno 'eguma 'imi hemisa sahena 'iwe'awe'a, ma 'eguma watoholo pa'ala wasaina bwebwe'anaina wahesagoheya 'ana hemisa 'oina, ma sahena wa'ebe'ebesine. Wasaina 'ana lohatoto tomota mabwaiyadi bale'uwa sihesagoa pwaiya, ma taugu Paulo 'ana tohepwaila 'aigeda.

#### *Paulo 'ina paihowa tohekalesiyao weyahidi*

<sup>24</sup> Coinega sauga bewa 'agu muya yalobaloba 'omi weyahimi, ma tuwa ma'igu yaliyaya. Taugu wahigu 'ina muya ma Keliso 'ina muya 'ilohegogoneya ta 'imadouwa, tohekalesiyao weyahidi, beno taudi Keliso wahina.

<sup>25</sup> Eeta tohekalesiyao 'omi weyahimi taugu wete Yehoba 'ina loinega yahetopaihowa, ma 'oinega Yehoba 'ina gwae yahehepwaila latuhe. <sup>26</sup> Gwaeina mwalo tubudao 'oidiyega 'idahweya, ma tuta bewa 'ilagu latuheyama 'ina tomotaiyao tauda 'oida. <sup>27</sup> Weyahina Yehoba nuwanuwana ma sanapu bewa mwalo dahwadahwaina ma bwebwe'ana hedade, 'abehega 'ilagulatuhe 'omi ganamuli 'oimiya, beno Keliso nuwamiya 'imiyamiya, ma tauna 'oinega wanuwatuhuyahi 'abehega tupwa wasawasa 'oina waluhu. <sup>28</sup> Tauna Keliso 'ahehepwai, ma'ima sanapu moisa 'aloguguya ta 'ahehe'ita tomota mabwaiyami 'oimiya, ma 'abehega Keliso 'ana tohemisao 'omi ma 'a'abilatuhegomi mamumugami mabwaiyana bwebwe'ana ta matuwana. <sup>29</sup> Bewa weyahina yahehetapewa, ta yahewaiwai, tauna 'ina waiwai nuwaguwa 'i'ebwaegauwa 'oinega.

## 2

<sup>1</sup> Nuwanuwagu ma wanuwa sabwalena 'abehega taugu yahetahetapewa madouna 'omi weyahimi, ma wete Leodisiya weyahidi, ma wete taudi 'abwa geya si'itegau weyahidi. <sup>2</sup> Ma 'ane wete taudi helauwega sihe'iyaiyagu moisa, ma'adi lotohona bwebwe'ana ta ma'idi sanapu moisa, 'oinega siyaliyaya madouna, weyahina sinuwa sabwalena sanapuina mwalo dahwadahwaina, beno Keliso. <sup>3</sup> Ma Keliso 'oina sonoga ma sanapu mabwaiyana simiyamiya, beno 'ida wasawasa madouna.

<sup>4</sup> Bewa yagwaegwae ma 'oinega sahena hali tomota 'idi gwae hotohotodiyega si'abo'abowegomi. <sup>5</sup> Sauga bewa wahigu 'imiya bwaga 'oimiyega, ta 'igu nuwatuhu 'oimiya 'imiyamiya, 'oinega yayaliyaliyaya 'imi miya bwebwe'ana ma'imi hemisa waiwai Keliso 'oina weyahina.

#### *Keliso ba'idadai*

<sup>6</sup> Bada Yesu Keliso 'oina 'atemi watagwala pwaidiya, 'oinega 'ilobwainegomiya ma tauna 'ina waiwaiyega watautauya. <sup>7</sup> Weyahina Keliso 'imi hemisa huhuna, ta 'ana 'abihemadou, ta 'ana 'abihepa'ala, gide 'ahe'itegomiya, ma weyahina waloyauwedo madouna.

<sup>8</sup> Gesowana teya 'i'abowegomi tomota 'idi sanapuwega, weyahina sanapuwedi ginaula bwagabwaga bale'uwega, ma geya Keliso 'oinega. <sup>9</sup> Weyahina Keliso 'iboi 'oina Yehoba 'ina waiwai ta 'ina mumuga mabwaiyana simiyamiya. <sup>10</sup> Ta Keliso 'oinega bwebwe'ana moisa waloba pwaiya, tauna aneloseyao ma hi'ahi'a 'ihewaiwai sinediya ta 'iloina sinediya.

<sup>11</sup> Ma wete Keliso 'oinega 'ami 'ila'ilala walobeya, gide 'upwa, geya 'wapimi 'oina, ma hesi bale'u mumugana 'atemiyega 'i'upwa yahuleya. <sup>12</sup> Coinega Keliso ba'idamiu babitaiso wa'eweya gide 'amasa, ta wete Keliso ba'idamiu 'imi babitaisowega watoholo hila. Weyahina Yehoba 'ina waiwai wahemisae'ya 'abehega Keliso 'amasega 'i'abihetoholo hileya.

<sup>13</sup> Comi mwalo geya 'wapi'upwa\* waloba, ta 'imi puiyao weyahidi gide 'ama'amasimi, ma hesi Keliso ba'idadai yawasi bwebwe'ana Yehoba 'i'ebwaegita, beno 'ida puiyedi 'inuwasamudiya. <sup>14</sup> Eeta 'ida lowaga 'ana lolina mwauna 'i'upwa yahuleya, ma 'ana kelose 'oina 'itutu hepa'iya. <sup>15</sup> Ma wete welabanao ma yaluyaluwa galadi gide hi'ahi'a 'i'abi suluhediya ma 'ana keloseyega 'adi debamwadina 'ilaguya, ta 'ihewaiwai sinediya.

<sup>16</sup> Coinega sahena 'eta taiya 'i'ahwa'ahwa galagalaegomi 'ami bo nuwana 'ami we'aha weyahidi, 'eguma 'omi 'adi bwabwale geya wapaihowadi, nuwana wai'ena 'ehauna 'ana sauga, bo nana Sabati 'oidiya. <sup>17</sup> Ginulaedi ma'ama'ayau tuwa, ma 'adi moisaina Keliso tauna. <sup>18</sup> Coinega sahena 'eta taiya 'i'ahwa'ahwa galagalaegomi weyahina 'omi geya watapwa tapwalolo ma'imi nuwasulu aneloseyao 'oidiya. Weyahina tomotaedi 'adi sanapu nihiyega weyahidi sigagasa, ma sinuwahane mumuga bale'u 'oidiyega. <sup>19</sup> Ma hesi Keliso 'ana nuwatuhi geya 'oidiya, tauna debada, ta tauda yahinao gide nimana nana 'ahena, wahina 'aigeda tuwa. Wahinaowedi sipaipaihowa 'aigeda wahi 'ana bwebwe'ana weyahina ma 'imadomadou, ta 'ana madouina Yehoba 'ina paihowega.

#### *Keliso 'oinega yawasida 'ehauna*

<sup>20</sup> Mwalo wa'amasa Keliso ba'idamiu, 'oinega mumuga gogo gabulena 'ana lolina 'oimiya 'ilolaguwa, ma to'aha weyahina 'abwa wapaipaihowa gide gogo gabulena mumugana. <sup>21-22</sup> To'aha weyahina tomota 'idi he'itao ta 'idi loinao wahehematamatanedi 'abehega gesowana 'e'ahai hehe'asisina wa'abi'abitohodi bo walolotohodi. Ta ginulaedi sawasawalidi ma 'eguma tahepaihowedi, nata sigumwala.

<sup>23</sup> Moisa, lolinaedi 'adi 'ita gide sanapu moisa, weyahina 'adi tomuliyaowedi ma'idi he'asisi ta ma'idi nuwasulu sipaipaihowa, ta wete wahidi sihemuyedi; ma tuwa geya 'eta 'idi waiwaimo, ma hesi wahidi 'idi nuwatuhi dahwana 'iloinaedi.

### 3

<sup>1</sup> Yehoba Keliso ba'idamiu 'ihetoholo hilegomiya, 'oinega galewa ginulaedi wa'ebesedi, nobwa Kelisoina Yehoba 'ina 'ebeulega galewa 'imiyamiya. <sup>2</sup> Wete 'imi nuwatuhiwao walagudi galewa ginulaedi 'oidiya ma sahena gabula ginulaedi 'oidiya. <sup>3</sup> Weyahina bo'i wa'amasa, ma bewa tuwa yawasimi Keliso ba'idamiu Yehoba 'oina. <sup>4</sup> Weyahina yawasida bwebwe'ana Keliso 'oinega ta'eweya, 'oinega 'abwa tutaina Keliso 'ilatuma, 'omi wete Keliso ba'idamiu walatu 'ina 'asilala wasawasa 'oina.

<sup>5</sup> Coinega gogo gabulena mumugana 'oimiya walohe'amasidi, beno logwali, pui, ma henuhenuwa galadi ma hewasawasa, beno hali 'ebehemisao 'adi tuluha. <sup>6</sup> Ma nuwatuhiwedi bewa weyahidi 'abwa Yehoba 'igamwasowalegita. <sup>7</sup> Moisa, mumuga galadiyedi mwalo wapaihowediya. <sup>8</sup> Ma hesi sauga bewa 'oina 'ilobwaineya ma walogwahatedi, beno 'aleha ma gamwasowala ma he'ipi'ipi, ma sinala, ta 'ahwa galagala. <sup>9</sup> Ma wete sahena wa'e'abo'abo 'iyamiyao 'oidiya, weyahina bale'u mumugana walogwahateya. <sup>10</sup> Ta mumuga 'ehauna walobeya, weyahina 'ada topaihowaina sauga mabwaiyana 'i'abihe 'ehaugita, ma 'ane tauna wasanasanapu ma mumugana wahe'au'aunaowe.

<sup>11</sup> Coinega geya 'eta wataha 'imiyamiya ma 'abehega wagwae “Yudiya boda hagadi ma tauma boda hagama,” bo wagwae, “Taudi meYudiya 'adi 'ila'ilala si'upweya 'wapidiya boda hagana, ma taudi geya si'upwa boda hagadi,” nuwana taumanao bo tomiya pwatula boda hagadi, nuwana wete topaihowao ma babadao hali bodao. Ma tuwa Keliso 'ina boda mabwaiyada. Ma 'ateda Keliso 'iboi 'ilohegogonegita.

<sup>12</sup> Ta 'omi Yehoba 'ina helauwega 'ihesuwanegomiya tauna weyahina, 'oinega 'ilobwainegomiya ma wa'atemuyamuya, ma wahehelau hilegomi ma wanuwasulu ma'imi hohobiga ta wete ma'imi 'alama'i'ita. <sup>13</sup> Ma wah'e'abi 'abihetegomi 'aigeda 'aigeda 'oimiya, ta sahena 'iyamiyao wa'ahwa'ahwa yaliyedi, ma hesi 'idi pui wanuwasamudi. Weyahina 'ida Bada tauna wete 'imi pui mabwaiyadi 'inuwasamudiya.

<sup>14</sup> Ma 'ilobwainegomiya mumugami wahehelau hilegomi, weyahina helau 'oinega paihowa mabwaiyana sidumwalu. <sup>15</sup> Ta wete Keliso 'ina nuwadaumwala nuwami

'iloinaedi. Bewa weyahina Yehoba mabwaiyada 'ibwauwegita ma taheboda 'aigeda, ma weyahina taloyauwedo 'oina.

<sup>16</sup> Wete Kelisoina 'ina gwae bwebwe'adi 'atemiya sibwala moisa, ma 'aigeda 'aigeda 'oimiya wahehe'ita ma walolohatoto sanapu moisa 'oinega, ta wete 'ami wali ma Same walinao 'oidiyega, wete walibui 'oidiyega, Yaluyaluwa Tabuna 'oinega, ma'imi loyauwedo Yehoba 'oina 'atemiyege.

<sup>17</sup> Ma mumugami mabwaiyadi, beno 'imi gwaeyao nana 'imi paihowao mabwaiyadi 'ida Bada Yesu saninega wapaihowa ma'imi loyauwedo Yesu saninega, Tamada Yehoba 'oina.

#### *Hali boda ma hali boda 'adi loina*

<sup>18</sup> Cida Bada 'ina tomotaiyao tauda, ta 'ilobwaineya ma wahiwahine haihainimi mwanemiyao 'idi gwae wahematamatedi. <sup>19</sup> Wete gide 'omi loheloheya, mwanemiyao wahelauwedi ta sahena wahelihiyedi. <sup>20</sup> Gwagwama 'omi wete sauga mabwaiyana tamamiyao ma sinamiyao 'enadi wamuliyedi, bewa 'ida Bada 'ina 'ebeyaliyaya. <sup>21</sup> Ma 'omi hehenatunimi, sahena natumiyao wa'abi'abihe gamwasowalidi, nata gide 'adi wahi'wata walagu.

<sup>22</sup> Comi topaihowao wete 'imi babadao bale'uwa 'idi gwae wahematamatedi nuwatuhu mabwaiyadi weyahidi. Ma sahena sigwaegwae yahigomi 'abwa wapaihowa ma'imi hohobiga, ma 'oinega 'abehega wa'abi heyaliyayadi. Ma hesi sauga baibaiwana ma'imi tagwala Yehoba 'ana he'asisiyega. <sup>23</sup> Ta 'imi paihowa mabwaiyana 'oidiyega wagwahubiga, geya 'abehega tomota weyahidi, ma hesi Yehoba weyahina. <sup>24</sup> Ma muliyetega Badaina 'oinega 'ami maisa wa'ewa, weyahina 'ida Bada Keliso weyahina tapaipaihowa. <sup>25</sup> Ma hesi taudi togalaedi nata 'ihemaisedi ginaula galadi 'oidiyega, weyahina 'ina loina 'aigeda tuwa tomota mabwaiyada 'oida.

## 4

<sup>1</sup> Ma 'omi babadao waloina dumwalu 'imi topaihowao 'aigeda 'aigeda 'oidiya, weyahina wanuwatuhuyahi 'abehega 'omi 'imi Bada 'imiyamiya galewa.

#### *Loguguya 'ahwanoi weyahina*

<sup>2</sup> Wa'itayahigomi ma sahena 'imi 'ahwanoi siwe'awe'a, ma hesi waloyauwedo Yehoba 'oina, ma wahe'alama'i'itana 'imi 'ahwanoi 'oidiya. <sup>3</sup> Tauma wete weyahima wa'ahwanoi, ma 'oinega Yehoba 'ima 'eda 'i'abilatuhe 'oima, ma 'oinega Keliso wasana dahwadah-waina 'ahepwaila latuhe tomota 'oidiya. Tauna wasaina bewa 'ana hepweila weyahina silagu luhuwegauwa deliya. <sup>4</sup> Coinega wa'ahwanoi weyahigu, ma wasaina 'ana sanapu ya'abilatuhe ma 'i'asilala, 'igu paihowa gide 'ana lobwaina. <sup>5</sup> Wete taudi geya Keliso 'ana tohemisao 'oidiya wapaihowa dumwalu, ma sahena 'imi sauga wamudamudali. <sup>6</sup> Catemuyemuyega sauga mabwaiyana wagwaegwae ma'imi sanapu moisa, eeta 'eguma 'iyamiyao sihesilalegomi, wahemaise gwae dumwaluwega.

#### *Lokaiyoni*

<sup>7</sup> Cabwa Tikiko 'itauyawa ma 'igu paihowa mabwaiyana 'ihepwailedi 'oimiya. Tauna 'iyadai bwebwe'ana, ma Yehoba 'ina topaihowa dumwadumwaluna, ma ba'idamai mahemahetena 'apaipaihowa. <sup>8</sup> Beno bo'i yahewaseyawa 'oimiya, ma tauma 'ima miyaina 'ihepwaille 'oimiya ma wete 'ina gwaeyega 'i'abihe pa'aligomi.

<sup>9</sup> Ma tasidai Onesimo Tikiko ba'idana sitautauyawa, ta Onesimoina tauna tuwa 'imi 'asa loheyaina, ta loheya bwebwe'ana, ma'ana hemisa. Ma taudi to'aha 'ebwa silatulatuwa sihegwaegwae 'oimiya.

<sup>10</sup> Alisitako ba'idagu deliya 'amiyamiya, ta 'ina loyauwedo 'oimiya bewa yahepwai-leyawa. Ma wete Maki, tauna Banaba nibaina. (Mwalo yahenuwa laguwegomiya Maki weyahina, 'eguma 'itautauyawa wabwauwe 'imi hada.) <sup>11</sup> Ma wete Yesu, tauna sanina heluwena Yusito, taudi sitetoi 'idi loyauwedo 'oimiya. Sitetoyedi meYudiya 'ebwa

ba'idagwao 'apaipaihowa Yehoba 'ina 'ebeloina weyahina. Ma taudi 'igu miya mwauna 'oinega si'abi'abihe waiwaiyegau.

<sup>12</sup> Epapila wete 'ina loyauwedo 'oimiya, tauna 'aigeda 'imi boda 'oimiyega. Ta 'i-paipaihowa To'abihetena Yesu weyahina, ma wete 'ina 'ahwanoi 'oidiya 'i'ahwa'ahwanoi waiwai ma 'ane watoholo pa'ala, ma'imi mumuga mabwaiyana bwebwe'ana, gide Yehoba nuwanuwana. <sup>13</sup> Moisa, Epapilaina bo'i 'ihehetapewa 'omi weyahimi, ma wete taudi Leodisiya ta Hiyelapolowedi weyahidi. <sup>14</sup> Wete 'iyadai Luke, tauna to'abilohala, ma Dimasa 'idi loyauwedo 'oimiya. <sup>15</sup> Ciyadao Leodisiya tupwaina 'oina simiyamiya 'igu loyauwedo wahepwaila 'oidiya, ma wete tohekalesiyaowedi wahineina Nimpa 'ina hada sitapwalolo 'oidiya.

<sup>16</sup> Bewa 'imi leta 'omi tohekalesiyao wahasili nugete, ma muliyetega wahewase tohekalesiyao tupwa Leodisiya 'oidiya, ta wete Leodisiya 'idi leta wete sihwasaeyawa 'oimiya ma wahasili.

<sup>17</sup> Ma Alikipo wahegwae 'abehega, "Paihowaina Badaina 'i'ebwaegowa 'uhetapewa ma 'ulosalohi."

<sup>18</sup> Loyauwedo bewa taugu nimaguwega yaleleya, wanuwatuhu yahigau 'abehega deliya yamiyamiya.

Cigu helau madouna 'oimiya.

Taugu Paulo.

## 1 TESALONAIKA

### MeTesalonaika 'idi leta 'aigeda Paulo 'ileleya

Paulo 'ina sakowasi 'alona 'iguguya gogo Tesalonaika 'oina, ta 'oinega 'itauya tupwana wete 'asa 'oidiya. Muliyetega Timoti 'ihewasaeya, ma 'iguguya meTesalonaika 'oidiya, 'oinega wete 'ihila Paulo 'oina, 'igwaeya, “Taudi meTesalonaika sihemisa pwaiya ta tohelau moisa.” Ta 'oinega Paulo 'iyaliyaya, ma 'idi leta bewa 'ileleya, ta 'abehega Yesu 'ina 'eda simuliya bwaibwaini.

Muliyetega Paulo meTesalonaika tetelidi 'ihesagoheya 'abehega geya sinuwa sabwalena Yesu 'ina hilama bale'uwa weyahina. Bewa weyahina 'idi leta heluwena 'ileleya.

#### *Loyauwedo*

<sup>1</sup> Taugu Paulo ma Sailasa ma Timoti ba'idagwao bewa 'imi leta 'aleleyawa, 'omi tohekalesiyao Tesalonaika 'oina, 'omi Tamada Yehoba ma Bada Yesu Keliso 'adi tohemisao. Taudi 'idi helauwega tuwa wamiya daumwala.

#### *MeTesalonaika simumuga bwaibwaina*

<sup>2</sup> Sauga baibaiwana 'aloloyauwedo Yehoba 'oina, mumugami bwebwe'ana weyahina, ma wete tuta mabwaiyana Tamada Yehoba 'oina 'a'ahwa'ahwanoi weyahimi. <sup>3</sup> Cimi hemisa ma 'imi paihowa bwebwe'adi 'anuwatuhu yahidi, ma wete 'imi paihowao helauwega, ma'imi 'alama'i'ita, wete ma'imi hemisa ma 'ane 'ida Bada Yesu Keliso 'i'abihetegomi.

<sup>4</sup> Moisa tuwa, 'iyamayao, Yehoba bo'i 'ihelauwegomiya ta 'ihesinuwegomiya. <sup>5</sup> Coinega tutaina tetela bwebwe'ana ya'ebwaegomiya, geya 'abehega gwae namo, ma hesi Yaluyaluwa Tabuna gwaeina 'i'abihe pa'aliya 'oimiya, ma 'ane gwaeina wa'ahwa moisa, ta tauma wete 'ima paihowa weyahimi wa'iteya, beno paihowa dumwaluna.

<sup>6</sup> Coinega bo'i wahe'au'aunawemaiya, ma wete 'ida Badaina wahe'au'aunaweya, ta wamiya mwauwa, ma hesi tetelaina wa'eweya ma'imi yaliyaya, ta yaliyayaina Yaluyaluwa Tabuna 'oinega 'itauyama. <sup>7</sup> Coinega 'omi 'ebe'ita bwebwe'ana, ma Keliso 'ana tohemisao tupwa Masidoniya ma Akaya 'oidiya sihe'au'aunawegomiya wete.

<sup>8</sup> Moisa, 'ida Bada tetelina bo'i 'oimiyega 'idabalala Masidoniya ma Akaya 'oidiya, ma wete 'omi 'imi hemisa Yehoba 'oina tetelina bo'i 'idabalala tupwa mabwaiyana 'oidiya, 'oinega 'eguma to tupwa 'oina 'atauya, geya sowasowahima weyahimi 'ahegwaegwae, <sup>9</sup> weyahina taudi 'oima sihegwaegwae, 'omi 'imi tagwala mwalo 'oima weyahina, 'abehega 'imi 'ebe hemisaedi miyamiyaidi walogwahatediya, ma Yehoba 'iboi 'oina watagwalegomiya, weyahina tauna tuwa 'iboi Yehoba moisa ma mayawasina, 'oinega tauna weyahina wapaipaihowa, <sup>10</sup> ma Natuna wayamwayamwa ma to tuta 'oina ma galewega 'isuluma, tauna tuwa Yesuina Yehoba 'amasega 'i'abihetoholo hileya ma 'i'abihetegita, ma 'ane sahena 'ebe yatala 'oina talatulatu.

## 2

#### *Paulo 'ina paihowa Tesalonaika 'oina*

<sup>1</sup> Ciyamayao, wasanapu pwaiya 'abehega mwalo 'ima habo'ena 'oimiya geya 'a-habo'ena besobeso, ma hesi huwaina 'alobeya. <sup>2</sup> Wanuwatuhuyahi wete mePilipai mwalo simumuga geyogeyoiyemaiya ta si'abihedeba mwadinemaiya, ma tuwa Yehoba tauna 'i'abihe'ate patuwemaiya ma tetelina bwebwe'ana 'ahepwaileya 'oimiya, bwagana tomota silolo'alehemai, ma 'alologuguya 'oimiya, <sup>3</sup> sahena 'abowega, wete sahena gwae galana 'oinega, ma hesi gwae moisa 'oinega. <sup>4</sup> Weyahina 'ima paihowa bewa Yehoba 'itagwala 'oima ma tetela bwebwe'ana 'ahepwaila latuweya, 'oinega 'ima hepwaileadi beno geya to'aha tomota nuwanuwadi, ma hesi to'aha Yehoba nuwanuwana. Eeta nuwatuhuwedi 'atema simiyamiya, bwebwe'adi bo galadi, Yehoba 'iboimo 'isanasanapu.



<sup>5</sup> Ma wasanapuya mwalo 'atauyawa 'oimiya, geya 'ima gwae hotohotodi, ma wete Yehoba 'isanapuya geya 'abehega 'agwaegwae 'abo'abo ma 'abehega 'imi tobwatobwa 'a'ewadi. <sup>6</sup> Ma wete ginulaedi 'apaipaihowadi matamiya ma hali tomota matadiya geya tauma 'ama hepwtu weyahina, ma hesi 'omi 'ami lema weyahina. <sup>7</sup> Moisa, tauma Keliso 'ana tohepwailao, sowaswana 'ahetoloina 'oimiya, ma hesi geya. Mumugama 'oimiya ma'ima wahinuha, gide wahine natunao 'oidiya ma'ina wahinuha. <sup>8</sup> Ma nuwama wa'eweya, 'oinega ma'ima tagwala 'oimiya Yehoba tetelina 'ahepwaileya, ma wete taumamo 'atagwalemaiya, ma 'ahe'iyayagu bwaibwainigomiya.

<sup>9</sup> Ciyamayao, wanuwatuhuya mwalo 'ima paihowa 'oimiya, sabwelo ma nihuwana 'oidiya 'apaipaihowa sinabwana, ta 'oinega taumamo 'ahehe'aimai, ma wete Yehoba tetelina 'ahehepwaila 'oimiya, weyahina geya nuwama 'ami mwau 'alagu 'ama 'itayahina weyahina. <sup>10</sup> Comi Keliso 'ana tohemisao, ma tauma mumugama 'oimiya wasanapuya, ma Yehoba wete 'isanapumaiya 'abehega 'ehauma, ma wete dumwaluma, ma bwebwe'ama. <sup>11</sup> Weyahina mabwaiyami 'a'itayahigomiya, gide tuwa loheya natunao 'i'ita'itayahi 'esedi. <sup>12</sup> Ma wete 'alohatotowegomiya ma 'a'abihe waiwaiyegomiya, ta 'ahegwaegomi ma mumugami 'ibwebwe'ana, weyahina Yehoba bo'i 'ihesinuwegomiya 'ina 'ebeloina 'asi'asilalana weyahina.

<sup>13</sup> Ciyamayao tuta mabwaiyana 'aloloyauwedo Yehoba 'oina, weyahina Yehoba 'ina gwae bo'i 'a'ebwaegomiya ta 'oina watagwalegomi, geya 'abehega tomota 'idi gwae, ma hesi Yehoba 'oinega.

Moisa, gwaeina Yehoba 'oinega, ma wahemiseya, ma 'ana waiwai walotoho pwaiya. <sup>14</sup> Ma wete miya mwauna walobeya, gide wete taudi Yesu Keliso 'ana tohemisao tupwa Yudiya 'oina, weyahina tohekalesiyaowedi 'idi miyamwau silobeya taudimo 'idi tomotaiyao 'oidiyega, gide wete 'omi 'imi miyamwau walobeya waboi 'imi tomotaiyao 'oidiyega. <sup>15</sup> Weyahina taudi meYudiya mumugadi bewa gide 'ida Bada Yesu silohe'amasiya, ma wete mwalo hene palopitao silohe'amasidiya, ta tauma wete silo'alehemaiya, 'oinega Yehoba geya nuwana taudi. <sup>16</sup> Eeta hali boda wete si'ausidi, ta 'ima hepwaile 'omi 'asa ganamuli 'oimiya sitohotoho ma si'ausimai, weyahina geya nuwadi ma Yehoba 'i'abihetegomi, 'oinega Yudiyaedi 'idi puiyao sisinabwa hedada, ma 'ana maisa beno muya madouna Yehoba 'i'ebwaedi.

#### *Paulo nuwanuwana ma 'ibo'ene hiledi*

<sup>17</sup> Ciyamayao, mwalo 'a'ebesinegomiya ta sauga to'uto'upanamo geya 'ada 'itahilegomiya, ma hesi geya 'anaidegomi, ma 'atoho waiwai ma 'atauyawa sabi 'itahilegomi.

<sup>18</sup> Moisa, taugu Paulo yatohotoho waiwai ma 'abehega 'atauyawa ma 'abo'enegomi, ta yatoho'asaya, weyahina Seitani 'ima 'eda 'igibodeya. <sup>19</sup> Moisa tuwa 'omi weyahimi 'anuwatuhu yahiya, ma 'ane tutaina 'ida Bada Yesu 'ina latuhilama, <sup>20</sup> nata hepwtu ma yaliyaya weyahimi 'aloba.

### 3

<sup>1</sup> Tutaina Ateni 'oina 'amiyamiya ta 'a'ate'ateyoho weyahimi, 'oinega yalohatotowa ma yagwae, "Timoti 'utauya Tesalonaika ma 'ateluwa 'ebwa 'amiyamiya." <sup>2</sup> Coinega 'iyadaina Timoti yahesumaneyawa, weyahina tauna wete 'aigeda 'ima boda Yehoba 'ina paihowa Keliso tetelina weyahina, 'iyadaina yahesumaneyawa ma 'ane 'i'abihe waiwaiyegomi ma Keliso 'oina wahemisa moisa, <sup>3</sup> ma 'ane sahena 'ami mwauwao 'oidiyega wawe'awe'a. Weyahina miyamwauwedi wasanapudiya 'abehega mabwaiyada talobalobadi. <sup>4</sup> Weyahina mwalo tauma 'amiyamiya ba'idamiyao, ma 'ahepwaile nugeta 'oimiya, nata miyamwauwedi silatu 'oimiya, ta nige bewa silatulatu.

<sup>5</sup> Bewa huhuna 'oinega yanuwatuhutu hedade, ma Timoti yahewasaeyawa ma 'imi hemisa 'i'ita, ma tetelimi 'i'eweyama, weyahina ya'ateyohowa Seitani 'oina, nata gide 'ebetoho madouna 'i'ebwaegomi ma wawe'a, ma nata gide 'ima paihowa mwalo 'oimiya 'i'abihegala.

<sup>6</sup> Coinega Timoti 'itauyawa 'i'itegomiya ma tetelimi 'i'eweyama, 'igwaeya, “Tesalonaikaedi Keliso 'oina sihemisa moisa, ma taudi tohelau moisa, ma tuta mabwaiyana 'ida tauya nugeta 'oidiya sinuwanuwa tuhuyahi ma'idi yaliyaya, ma nuwanuwadi wete si'ita hilegita.” Tauma gide wete nuwanuwama ma 'omi 'a'ita hilegomi. <sup>7</sup> Ciyamayao, bwagana ma'ama mwau, ta 'ama muya, ma hesi 'imi hemisa tetelina 'ahesagoheya ta 'i'abihe yaliyayemaiya. <sup>8</sup> Coinega 'imi toholo waiwai 'ida Bada weyahina 'amnama 'ibwebwe'ana.

<sup>9</sup> Coinega 'ima loyauwedo Yehoba 'oina geya sowasowahina 'alolagu, weyahina Yehoba 'oina 'ima yaliyaya weyahimi 'imadou hedada. <sup>10</sup> Coinega nihuwana ma sabwelo 'oidiya 'a'ahwa'ahwanoi madouna ma 'abehega 'ami 'oleya 'a'itahila, ma wete hisa 'ebewe'a 'oimiya simiyamiya 'oidiyega 'a'abihe pa'aligomi.

<sup>11</sup> Coinega bewa 'igu nuwatuhu 'eluwa. Nugeta Tamada Yehoba ma 'ida Bada Yesu 'ima 'eda siloina ma 'oinega 'atauyawa 'oimiya. <sup>12</sup> Ta heluwena 'abehega Bada helauwega 'ilohemahegomi ma waboi wahelau hilegomi, ma wete tomota hagadi wahelauwedi moisa, gide tauma 'ahehelau 'esegomi. <sup>13</sup> Ma 'ane 'abwa tutaina 'ida Bada Yesu, ma 'ana tohemisao silatuma, 'omi ma'imi waiwai ta nuwami 'ehaudi, Tamada Yehoba matana watoholo.

## 4

### *Yehoba nuwanuwana mumuga 'ausalana*

<sup>1</sup> Ciyamayao, nuwatuhu wete 'aigeda 'ida Bada Yesu weyahina 'ahenuwa lagugomi, ma 'aguguyegomi, beno mwalo mumugaedi 'ahe'itegomiya ta wasanapuya 'abehega bwebwe'adi, ta weyahidi Yehoba 'iyaliyaya, ma bewa tuta 'oidiya wamumuga, sowa-sowana wapaipaihowa hilahladi. <sup>2</sup> Ma wete Bada Yesu 'ina loinaedi 'a'ebwaegomiya wasanapudiya. <sup>3</sup> Yehoba nuwanuwana 'imi miya 'ausaladi, ma sahena wapuipui, <sup>4</sup> ma 'ane 'aigeda 'aigeda wahai mumuga 'ausalana ma dumwalunega, <sup>5</sup> ma sahena nuwadahwana, gide ganamuli taudi Yehoba 'ana tohenainaidao.

<sup>6</sup> Coinega wete sahena tomota hagadi mwanediyao wayagayagahidi, nata gide Bada 'ina gamwasowala waloba. Ginaulaedi bewa weyahidi mwalo 'ahenuwa lagugomiya. <sup>7</sup> Weyahina Yehoba 'ihesinuwegita geya mumuga galana weyahina, ma hesi mumuga 'ehauna weyahina. <sup>8</sup> Ma hesi 'eguma taiya loina 'iligehi, geya 'abehega tomota 'idi loina, ma hesi Yehoba 'ina loina 'iligeligehi, weyahina Yaluyaluwa Tabuna tauna nuwatuhu 'ana to'abihe'ehau, beno Yehoba 'ina 'ehale 'oida.

<sup>9</sup> Ma 'iyadao 'adi helau weyahina nata geya 'alelediwa, weyahina Yehoba bo'i tauna 'ihe'itegomiya 'oinega waboi wahelau hilegomi. <sup>10</sup> Gide wete tomota mabwaiyadi tupwa Masidoniya 'alona wahelauwediya. Coinega 'alohatoto 'oimiya ma 'imi helauwedi 'oidiya 'isinabwa, <sup>11</sup> ma wete watoho ma wamiya daumwala, ma waboi 'imi paihowa wapaihowadi, ta sahena lowahi'wata, gide mwalo 'ahenuwa laguwegomiya. <sup>12</sup> Bewa 'oinega taudi geya Keliso 'ana tohemisao sihe'asisiyegomi, ma hesi 'omi 'ami lema weyahina sahena tomota hagadi 'oidiya wahehemisa.

### *Bada 'ina hilama*

<sup>13</sup> Ciyamayao sahena wahehenainaida to'amasao weyahidi, ma 'oinega 'eguma 'eta tasidai 'i'amasasa, sahena wanuwanuwegala, gide taudi geya 'idi hemisamo toholohila weyahina. <sup>14</sup> Ma tauda Yesu tahemiseya tauna 'amasega 'itoholohila ma gide wete tahemiseya 'iyadaowedi bo'i si'amasasa ma Yehoba tauna nata 'ihiledima, Yesu ba'idanao.

<sup>15</sup> Bewa 'ida Bada 'ina gwaeyao 'ahepewalediwa 'oimiya, 'abehega tutaina 'ihilama taudi 'ama'amasidi nata Keliso siloba nugeta, ma tauda mayawasida muliyetega. <sup>16</sup> Weyahina Badaina ma'enana madouna 'abwa 'ilatuma, ma aneloseyao 'adi tohanugeta wete 'ibwau, ma wete yoguli simu'a madouna, ma 'oinega Badaina galewega 'isuluma, ma to'amasawedi mwalo Keliso 'ana tohemisao sitoholo nugeta, <sup>17</sup> ta tauda wete mayawasida taudi ba'idadao tahane galewa, ta 'ida Badaina ba'idada tamiya hataya. <sup>18</sup> Coinega tetela bewa 'oinega wa'abihe yaliyayegomi.

## 5

<sup>1</sup> Ciyamayao, geya sowasowahina ma 'imi leta bewa 'oinega 'ahegwaegomi to tuta 'oina Kelisoina 'ihilama, <sup>2</sup> weyahina bo'i wasanapuya, 'abehega geya tasanapu, ma hesi 'ina tauyama 'abwa gide toyagaha 'ina tauyama gide nihuwanega, <sup>3</sup> ma 'eguma tomota sigwae, "Cida miya mabwaiyana bwebwe'ana tuwa," ma muliyetega hesilae taudi 'ilohesalutuidi, gide wahine 'ina 'abihelolo 'ina henatuna 'oina. Coinega nage gide hesilaeina, ma geya sowasowahina sidenasine.

<sup>4</sup> Ma 'iyamayao 'omi geya tupwa guguyou 'oina wamiyamiya, 'oinega Bada 'abwa 'ina hilama sahena wa'ate'ateyoho, ma hesi guguyou 'ana tomiyanao 'ilohe'ateyohodi, gide tuwa toyagaha. <sup>5</sup> Weyahina 'omi maedana 'oina wamiyamiya, 'oinega maedanega tatauya, ma sahena guguyou 'ina 'edega. <sup>6</sup> Coinega sahena ta'eno'eno, gide tomota mabwaiyadi si'eno'eno 'esa, ma hesi Yesu tayamwayamwa 'ida nuwatuhi dumwalunega. <sup>7</sup> Ma sahena tauda gide taudi tomata'eno'eno, ma bwasi galana 'ana tonumao, taudi guguyou 'idi 'ebepaihowa.

<sup>8</sup> Ma tauda hesi gide 'asi'asilalada, 'oinega taboi ta'itayahigita, ma yaluyaluwada tahabodebode, Yehoba 'ana hemisa ma 'ana helau 'oidiyega, ma wete 'ida nuwatuhiyahi 'ada 'abihetena 'abwa taloba 'oinega. <sup>9</sup> Weyahina Yehoba geya 'abehega 'iloinegita ma tatauya 'ebeyatala 'oina, ma hesi nuwanuwana 'ida Bada Yesu Keliso 'ina paihowega 'i'abihetegita. <sup>10</sup> Coinega Kelisoina weyahida 'i'amasana, ma nuwana mayawasida bo 'ama'amasida, ta 'eguma 'ihilama 'i'ewegita ma ba'idada tamiya hataya. <sup>11</sup> Coinega 'ilobwainegomiya ma waboi wa'abihepa'ali hilegomi ma wete wahelemalema hilegomi, beno paihowaedi gide sauga bewa wapaipaihowa 'esedi.

*Cina 'ebegumwala*

<sup>12-13</sup> Ciyamayao, 'ima 'ahwanoi 'oimiya sowasowana 'imi tohanugetao wahe'a-sisiyanedi, ma wahelau bwaibwainidi, weyahina 'ida Bada 'ina paihowa sipaipaihowa, beno si'ita'ita yahigomi ma siloguloguguya 'oimiya. Ma wete 'aigeda, sahena he'ahwa lasalasa, ma hesi daumwalega wamiyamiya.

<sup>14</sup> Ma 'iyamayao, sowasowana wete tolowahi'watao walohatotodi, wete to'ateyoho wa'abihe 'atepatuwedi, ma wete towe'a wa'abihetedi, bewa ginulaedi 'alama'i'itega wapaipaihowadi.

<sup>15</sup> Wa'itayahigomi, sahena 'eta 'oimiyega galana 'ihehemaise galana 'oinega, ma hesi tuta mabwaiyana wahelau hilegomi ma wa'abihetena ma wete tomota hagadi wa'abihetedi.

<sup>16</sup> Wayaliyaya tuta mabwaiyana. <sup>17</sup> Wete gide 'ahwanoi Yehoba 'oina sahena walololagu. <sup>18</sup> Ma wete tuta mabwaiyana waloyauwedo Yehoba 'oina, 'eguma 'imi miya bwebwe'adi 'oidiya ma wete miya galadi 'oidiya, 'imi yaliyayaina beno Yehoba 'ina nuwatuhi, tauda Yesu Keliso 'ina bodao weyahida.

<sup>19</sup> Ma sahena Yaluyaluwa Tabuna 'ina paihowa wa'eto'etobode. <sup>20</sup> Coinega 'eguma toguguya 'eta 'ipalopisai, sahena 'ina gwae nugeta walologwahate, <sup>21</sup> ma hesi gwaeina watoho, ma 'eguma bwebwe'ana wa'abiyahi, <sup>22</sup> ma 'eguma galana beno mabwaiyana walogwahate.

<sup>23</sup> Yehoba tauna daumwala huhuna, 'oinega yaluyaluwami ta nuwami ta wahimi 'i'abihe'ehau bwaibwainidi ma si'asilala, ma 'ane mumugami bwebwe'ana wamiyamiya 'ana siga Yesu Keliso 'ihilama. <sup>24</sup> Yehobaina 'ihesinuwegomiya, tauna ma'ana hemisa, eeta to'aha 'ihewagita, nata 'ipaihowa.

<sup>25</sup> Ciyamayao, wa'ahwanoi weyahima Yehoba 'oina.

<sup>26</sup> Ma wete tohekalesiyao mabwaiyadi helauwega wa'atusapwala hiledi.

<sup>27</sup> Ta yaloinaegomi Yehoba saninega leta bewa wahasili 'iyadao matadiya.

<sup>28</sup> Cida Bada Yesu Keliso 'ina helau 'oimiya.

Taugu Paulo.

## 2 TESALONAIKA

### MeTesalonaika 'idi leta heluwena Paulo 'ileleya

Muliyetega Paulo meTesalonaika tetelidi 'ihesagoheya 'abehega geya sinuwa sib-walena Yesu 'ina hilama bale'uwa weyahina. Bewa weyahina 'idi leta heluwena 'ileleya.

#### *Loyauwedo*

<sup>1</sup> Taugu Paulo ma Sailasa ma Timoti ba'idagwao 'imi leta bewa 'aleleyawa 'omi tohekalesiyao Tesalonaika 'oimiya, weyahina 'omi Tamada Yehoba ma Bada Yesu Keliso 'adi tohemisao. <sup>2</sup> Tamada Yehoba ma 'ida Bada Yesu Keliso 'idi helauwega tuwa wamiya daumwala.

#### *Keliso 'abwa 'ihilama tomota 'ada loina weyahina*

<sup>3</sup> Ciyamayao, 'ilobwainemaiya tuta mabwaiyana 'aloyauwedo Yehoba 'oina, 'imi hemisao ma 'imi helauwao waboi 'oimiya 'adi madou weyahina. <sup>4</sup> Coinega tohekalesiyao tupwa mabwaiyadi matadiya 'ahehepwatuwegomi, 'agwae, “Moisa taudi Tesalonaika to'alama'i'ita hedade. Bwagana 'adi 'alehao mwau madouna si'ebwaedi, ma tuwa ma'idi 'alama'i'ita ta wete ma'idi hemisa Yehoba 'oina.”

<sup>5</sup> Bewa 'ebel'ita ma 'oinega Yehoba 'ina loina dumwaluna tasanapu, weyahina 'ami mwauwedi 'oidiyega 'i'abihe pa'aligomi, ma 'ane 'ina 'ebeloina 'ana lugu 'ilobwainegomi. <sup>6</sup> Ma hesi taudi 'ami 'alehaowedi 'adi maisa Yehoba 'i'atububuya ma 'ina gamwasowala siloba.

<sup>7</sup> Yahegwaegomi 'omi tomiya mwau, 'ida Bada Yesu galewega nata 'isulu mwayamwayauma, ma 'ina aneloseyao ta 'aiwe ganinisa wete 'i'eweyama, ma 'omi ma tauma 'ida 'aiyawasi 'i'ebwaegita. <sup>8</sup> Ma taudi 'ida Bada Yesu Keliso tetelina silogwahateya, ta Yehoba sihenainaideya, 'adi maisa mwauna 'i'ebwaedi. <sup>9</sup> Coinega nata simiyawasi, ma sisilahe hataya tupwaina 'ala'alasina 'oina, ma Bada manina ta 'ina waiwai ta 'ana hepwatu nata geya si'ita'ita. <sup>10</sup> Eeta tutaina 'itautauyama, 'ana hepwatu madouna 'iloba 'ina paihowao 'ebenuwa pwanopwanowao weyahidi, 'ana tohemisao 'oidiyega. Ma 'omi mwalo tetelina 'a'ebwaegomiya ta wahemiseya, 'oinega 'abwa 'omi ba'idamayao Yesu 'ina latuma 'oina tahepwatu.

<sup>11</sup> Mwalo Yehoba 'ihesinuwegomiya ta 'ibwauwegomiya, ta 'oinega wahemiseya. Bewa weyahina tauma tuta mabwaiyana 'a'ahwa'ahwanoi weyahimi ma 'ane wamuliya moisa, weyahina 'omi nuwanuwami hemisa moisege wamumuga dumwalu, 'oinega 'ima 'ahwanoi Yehoba 'oina ma 'i'abihe waiwaiyegomi eema paihowaedi wapaihowadi.

<sup>12</sup> Bewa 'oinega ma tomota mabwaiyadi 'ida Bada Yesu sanina sihepwatuwe, 'omi 'imi paihowa bwebwe'adi weyahidi. Ma 'omi wete hepwatu waloba tauna saninega, ta hepwatuwedi mabwaiyadi Yehoba ma Bada Yesu Keliso 'idi helauwega.

## 2

#### *Loheya 'aigeda galana weyahina*

<sup>1</sup> Ciyamayao, nuwanuwama wada sanapu 'ida Bada Yesu Keliso 'ina latuhilama ma 'ida miya'auta 'oina weyahina. <sup>2</sup> Ma 'oinega sahena wa'ate'ateyoho, ta 'eguma tomota sigwae, “Bada 'ina latu hilama 'ana tuta bewa,” sahena wahehemisa, ma 'eguma sigwae 'abehega sanapu silobeya 'idi nihiyega bo Yehoba 'ina gwae 'oidiya, bo nuwana taugu 'idi leta yaleleya 'oidiya weyahina, <sup>3</sup> sahena wete 'idi 'abowedi wahehemisaedi, ma hesi wanuwatuhuyahi 'abehega nugeta tomota baibaiwa hedada Yehoba silo'alehe ma loheya galana 'ilatu, ta mulina 'abwa Yesu 'ihilama. Moisa, loheyaina loheya galana ta guguyou loheyaina, <sup>4</sup> Yehoba 'ana 'aleha ma wete 'ebehemisa mabwaiyadi 'adi 'aleha, 'oinega tauna 'i'abihanehe ma Yehoba 'ina Hada He'asisi 'oina 'imiyatoi, ma 'ihetoloina gide Yehoba.

<sup>5</sup> Wanuwatuhu yahiya taugu mwalo ba'idamiu tamiyamiya ta ginaulaedi weyahidi ya-hegwaegomiya. <sup>6</sup> Ta 'omi loheyaina galanaina 'ina tauyama 'iheheboi lamuna wasanapu pwaiya, 'abehega 'eguma 'ina tauyama 'ana tuta 'iloba ee nata 'ilatuma.

<sup>7</sup> Moisa, bewa tutaina loheyaina galanaina 'ina paihowao silatulatu dahwana bale'uwa, ma loheya hagana paihowaina galanaina 'i'eto'etobode ma 'ana siga to'etobodaina 'itoholo wasi, <sup>8</sup> ta 'oinega topaihowa galanaina 'ilatuma, muliyetega 'ida Bada Yesu Keliso 'ilatuma, ma loheyaina galanaina 'ilohegumwali ginaula 'eluwa 'oidiyega, 'aigeda 'ina waiwai ma heluwenaina 'ahwanega 'aiwe 'iganiganinisa.

<sup>9</sup> Ma tutaina loheyaina galanaina 'ilatu, nata Seitani 'ina waiwai 'oinega ma hede-hedede ma ginaula 'ebehenainaida 'oidiyega tomota 'i'abowedi. <sup>10-11</sup> Ma taudi tetela moisa 'adi tologwahatao 'idi tupwa 'asa 'ala'alatana, Yehoba 'itagwaledi ma Seitani 'ina 'e'abo'abo mabwaiyana sihemisaedi, ma taudi yatala siloba, weyahina geya nuwadi he'ita moisa, ma hesi silogwahateya, <sup>12</sup> ta mumuga galana nuwadi 'i'eweya. Ceguma mwalo tetela moisa sihemisae, Yehoba 'ida 'abihetediya, ma hesi geya.

#### *Yehoba 'ana tohesinuwao*

<sup>13</sup> Ciyamayao, 'ida Bada 'ihelauwegomiya, weyahina tuta nugeta 'oina 'ihesinuwe-gomiya ma 'ane Yaluyaluwa Tabuna 'oinega 'i'abihe 'ehaugomi, ma tetela moisa wa-hemisae 'ami 'abihetena weyahina, 'oinega sowasowana tuta mabwaiyana weyahimi 'aloyauwedo Yehoba 'oina. <sup>14</sup> Tetelina mwalo 'aguguyaeya 'oimiya ta wahemiseya, ma bewa 'oinega 'ida Bada Yesu Keliso 'ina 'asilala 'i'ebwaegomiya. <sup>15</sup> Ciyamayao watoholo pa'ala, ma 'ami he'itaedi, 'ima gwaeyega bo 'ima letao 'oidiyega wa'abiyahidi.

<sup>16</sup> Yehoba Tamada 'ihelau moisa 'oida, 'oinega tuta mabwaiyana 'i'abihe yaliyayegita, weyahina tanuwatuhuya ginaulaedi 'abwa tauda weyahida 'ipaihowadi. <sup>17</sup> Yehoba tauna ta 'ida Bada Yesu Keliso sida 'abihe yaliyayegomi, ma sida 'abihe waiwaiyegomi, ma 'ane waguibiga 'imi paihowa 'oidiya, ta tuta mabwaiyana 'imi hegwaegwae sibwebwe'ana.

### 3

#### *Weyahima wa'ahwanoi Yehoba 'oina*

<sup>1</sup> Ciyamayao, nuwatuhu 'aigeda wete, nuwanuwama ma weyahima wa'ahwanoi Yehoba 'oina, ma Bada tetelina 'ima guguyega 'ihewaiwai tomota baibaiwadi 'oidiya, gide mwalo 'oimiya. <sup>2</sup> Ta wa'ahwanoi ma 'ane togala 'oidiyega Yehoba 'i'abihetemai, weyahina Bada 'ana touhalao baibaiwa hedada. <sup>3</sup> Ma hesi Badaina ma'ana hemisa sowasowahina 'i'abihe pa'aligomi, ma 'i'itayahigomi ma 'ane sahena Seitani 'i'abi'abi tohogomi. <sup>4</sup> Coinega Badaina 'ahemisaeya ma 'ima he'ita 'oimiya nige ma wete 'abwa wahematamatanedi, <sup>5</sup> ma 'abehega wete 'ihenuwa lagugomi, tauna 'ina helau weyahina, ta wete 'imi toholo pa'ala Keliso 'oina weyahina.

#### *Lowahi'wata sahena*

<sup>6</sup> Ciyamayao, wete 'ahenuwa lagugomi 'ida Bada Yesu Keliso saninega, ma 'ane 'iyadao tupwadi tolowahi'wata wa'ebesinedi, weyahina lowahi'wata geya tauma 'ahe'itegomi, ma guibigamo 'ana 'eda hesi. <sup>7</sup> Coinega wasanapu pwaiya 'abehega 'ilobwainegomiya ma tauma wahe'au'aunawemai, weyahina mwalo ba'idamiyao tamiyamiya, geya 'eta tuta paihowa 'oinega 'alowahi'wata. <sup>8</sup> Gide wete tauma 'aboi 'amega 'ahehe'aimaiya, nihuwana ma sabwelo 'oidiya 'apaipaihowa. Weyahina geya nuwama ma 'ami mwau 'alagulagu, 'e'ahai weyahina.

<sup>9</sup> Ma 'iyamo loina 'imiyamiya 'abehega 'omi wahe'aimai, ma tuwa taumamo 'amega 'ahehetapewa, ma 'ane 'omi 'ima paihowa wahe'au'aunawemai. <sup>10</sup> Ma wete mwalo ba'idamiyao tamiyamiya, 'aloinegomiya 'abehega 'eguma taiya geya 'ida paihowa sahena 'i'ai'ai.

<sup>11</sup> Tetelimi 'ahesagoha pwaiya tupwadi 'oimiyega silowahi'wata ma geya simiya hohobiga ma sipaihowa. <sup>12</sup> Coinega 'iyadaowedi 'ahenuwa lagudi, ma 'ida Bada Yesu



Keliso saninega 'aloinaedi, ma 'idi paihowa siboi sipaihowadi, ma simiya hohobiga ma 'ane 'adi siloba.

<sup>13</sup> Ciyamayao, paihowa bwebwe'adi weyahidi sahena wahewahi we'awe'a.

<sup>14</sup> Ceguma taiya he'itaedi 'imi leta bewa 'alonga 'isinalidi, loheyaina wa'ebesine, ma 'oinega 'ina paihowaina 'oina debana 'imwadina, <sup>15</sup> ta watoho, ma sahena walolo'alehe, weyahina tauna tuwa 'iyadai, 'oinega he'ita tuwa wa'ebwae.

*Gwae 'ana 'ebelosaloha*

<sup>16</sup> Cida Bada tauna nuwadaumwala huhuna ma 'i'abihenuwa bwebwe'anigomi, ma 'i'abihe yaliyayegomi tuta mabwaiyana, ma ba'idamiu wamiya hataya.

<sup>17</sup> Leta bewa 'ina 'ebe gumwala taugu tuwa nimaguwega yaleleyawa, gide tuwa 'igu leta mabwaiyadi 'oidiya. <sup>18</sup> Ta 'ida Bada Yesu Keliso 'ina helau mabwaiyami 'oimiya. Taugu Paulo.

## 1 TIMOTI

### Timoti 'ina leta 'aigeda Paulo 'ileleya

Mwalo Paulo Timoti 'ina paihowa 'i'ebwaeya ma tohekalesiyao gogo Epeso 'oina 'i'ita'itayahidi, ta 'ina leta bewa 'ileleya ma 'oinega paihowaina 'ana lolina 'isanapu.

#### *Loyauwedo*

<sup>1</sup> Yauwedo Timoti, 'ino leta bewa 'oiguwega 'itautauyawa. Taugu Paulo, Keliso weyahina yahetohepwaila 'ada To'abiheteina Yehoba ma Yesu Keliso 'idi loinega, weyahina Keliso 'oina tahehemisa 'ida 'abihetena 'abwa weyahina. <sup>2</sup> Cowa mwalo Keliso 'uhemisaeya, 'oinega ya'ahwa natunegowa moisa.

Tamada Yehoba ma 'ida Bada Yesu Keliso sihelauwego, ma wete si'atemuyemuyego, ma 'umiya yaliyaya.

#### *Lohatoto 'abo'abo weyahina*

<sup>3</sup> Mwalo 'ane tutenina ya'ebesinegowa ma yatauya Masidoniya, ma yahenuwa lagugowa, yagwaeya, “Sahena 'utautauya. Cebwa tuwa Epeso 'oina 'umiyamiya, ma 'ane tomota tupwadi 'u'ausidi ma sahena he'itao hagana ma hagana sihehe'itadi. <sup>4</sup> Ma wete sahena sigwaegwae ma mwalo babadaedi sanidi si'ina'inanadi.” Nata gide he'ahwa panapanawa 'ilatu 'oimiya weyahina he'ote'otetela balaina, sahena tomota si'abihetedi, ma gesowana 'idi hemisa Yehoba 'oina si'abi'abi. <sup>5</sup> Bewa 'igu lolina ma 'ane nuwami 'ehaudiyega waboi wahelau hilegomi moisa ma wanuwatuwatuwa bwaibwaini, ma wahemisa moisa Keliso 'oina. <sup>6</sup> Ma hesi tomota tupwadi hemisa bewa silogwahateya, ta gwae besobesowega si'waniya. <sup>7</sup> Nuwanuwadi ma sihe'ita Yehoba 'ina lolinao, ma hesi 'idi gwaeyedi ma 'idi lohatotowedi huhudi geya sisanapudi.

<sup>8</sup> Loinaedi tasanapudiya 'abehega 'ebelema bwebwe'ana, 'eguma tamuliya moisa. <sup>9</sup> Weyahina loinaedi geya Yehoba 'ilagudi todumwalu weyahidi, ma hesi taudi lolina 'ana tolige hao weyahidi ma todeba pa'ala weyahidi, taudi geya Yehoba sihe'asisiyane, ma togala, ma bi'ibi'idi, ma toheliya, ma taudi sinadiyao ma tamadiyao ma hali tomota wete 'adi tolohe'amasao, <sup>10</sup> wete toganawala ma loheloheya 'idi 'eheloheloheyao ba'idadiyao siganaganawala, ma tomota 'adi toyagahao, to'e'abo'abowao, to'eta'wata'walulu 'abo'abodi, ma wete he'ita dumwaluna 'ana tolige hao. <sup>11</sup> He'ita dumwalunaina Yehoba 'oinega, tauna 'iboi 'asilala ma yaliyaya huhuna, ma 'igu paihowa 'i'ebwaegauwa wasana yaguguyae tomota 'oidiya.

#### *Yehoba 'ina helau weyahina*

<sup>12</sup> Ma wete 'ida Bada Yesu Keliso 'i'abihewaiwai yegauwa 'igu paihowa bewa weyahina, 'oinega yaloyauwedo, weyahina 'ihemisaegauwa, ma paihowaina 'i'ebwaegauwa. <sup>13</sup> Mwalo geya gide, ma hesi Keliso ya'ahwa galagalaeya ma 'ina bodao yalohiyediya, ma tuwa Yehoba 'isanapuya 'abehega ginaula galadi taugu yapaihowediya 'igu henuwa potapota 'oinega, ma wete geya yahemisa, 'oinega 'i'atemuyemuyegauwa. <sup>14</sup> Ma 'ida Badaina 'ihelauwegauwa madouna ma hemisa ma helau Yesu Keliso 'oinega 'i'ebwaegauwa.

<sup>15</sup> Gwae bewa gwae moisa, ma 'ilobwaineya ma tahemisa, weyahina Yesu Keliso bo'li bale'uwa 'itauyama togalaedi sabi 'abihetedi, ma hesi togalaedi mabwaiyadi 'oidiyega taugu tuwa gala hedada.

<sup>16</sup> Yehoba 'ina 'atemuyamuya 'oiguwa huhuna bewa gide, 'abehega Yesu Keliso taugu togala madouna weyahigu 'i'alama'i'ita, ma 'ane togala mabwaiyadi si'itegau ma sisanapu taudi wete 'eguma Keliso sihemisa yawasidi hataya siloba. <sup>17</sup> Coinega Yehoba tahe'asisiyane ma tahepwatuwe hataya, weyahina tauna 'aigeda tuwa Yehoba moisa, geya sawasawahina ma 'ana 'ita ta'ita, geya 'ida 'amasa, ma hesi 'ina lolina 'oida nata geya 'igumwagumwala. Emeni.

<sup>18</sup> Natugu Timoti, 'unuwatuhuyahi mwalo Yehoba 'ina topalopisai 'ino paihowa 'oiuwa sihepwaila nugeteya, ma taugu gidemusa yahegwaego ma 'upaihowadi, ma 'oinega 'uhewaiwai, <sup>19</sup> ma ma'ino hemisa ta ma'ino nuwatuwu bwebwe'ana, tuta mabwaiyana 'oidiya. Weyahina 'iyadao tupwadi nuwatuwu bwebwe'adi silogwahatediya, 'oinega 'idi hemisa siwe'a ta sibe'uwa. <sup>20</sup> Tobe'uwedi 'aigeda sanina Aimenio, ma wete 'aigeda sanina Alekisana. Siteluwaedi bo'i Seitani 'oina ya'ebwaediya ma 'ihematasabuwedi ma sisanapu ma 'ane sahena 'ida Badaina si'ahwa'ahwa galagalae.

## 2

### *Cahwanoi Yehoba 'oina*

<sup>1</sup> Bewa 'igu lolina 'imi miya hehogona 'oidiya, nugeta watuluha ma wa'ahwanoi Yehoba 'oina, tomota mabwaiyadi weyahidi, ma'imi loyauwedo Yehoba 'oina. <sup>2</sup> Gide kiniyao ma tolinao weyahidi wa'ahwanoi, ma 'ane 'idi lolina 'idumwalu ma 'oinega tamiya daumwala ma'ida mumuga mabwaiyana bwebwe'ana.

<sup>3</sup> Cada to'abihetenaina Yehoba nuwanuwana bewa gide ta'ahwanoi 'esa, <sup>4</sup> weyahina Yehoba 'ina nuwatuwuina 'abehega tomota mabwaiyadi 'idi pui 'oidiyega 'i'abihetedi, ma he'ita moisa sisanapu.

<sup>5</sup> Yehoba 'aigeda tuwamo, ma wete 'aigeda tuwa loheya sowasowana 'i'ewegita Yehoba 'oina, tauna Yesu Keliso. <sup>6</sup> Weyahina Keliso 'itagwaleya ta 'iboi 'ipwaoliyeya mabwaiyada weyahida, ta wasaina bewa tuta 'ana lobwaina moisa 'oina, Yehoba 'i'ebwaegita.

<sup>7</sup> Coinega 'igu paihowa 'i'ebwaegauwa ma wasaina bewa yahehepwaili ma yaguguguyae ma yahehe'ita taudi tomiya ganamuli 'oidiya, ma 'ane sanapu moisa Yehoba 'oina sihemisae. Bewa gwae moisa, geya 'abo.

<sup>8</sup> Nuwanuwagu loheloheya tupwa mabwaiyadi 'oidiya mumugadi sibwebwe'ana, ma nimadi si'abilagasi ta si'ahwanoi Yehoba 'oina, ma sahena sihehegamwagamwagu ma sihehe'ahwalasalasa.

<sup>9-10</sup> Wahiwahine wete nuwanuwagu siboi sihepasadi mumuga bwebwe'adi 'oidiyega weyahina beno totapwalolo 'ilobwaineya, ma sahena wahidi sipasa hedadedi ma 'oina 'idi tuta siuleule, ma sida pasa moisa, ma sahena sigagagagasa. <sup>11</sup> Ma wete tapwalolo 'alona ma 'idi nuwatagwala he'ita sihesagohe, ma sahena sigwaegwae. <sup>12</sup> Geya yatagwala ma wahiwahine sihe'ita tapwalolo 'oina. Sahena siloiloina loheloheya 'oidiya, ma hesi sida miyehenono ma sihesagoha. <sup>13</sup> Weyahina Yehoba Adama 'ipaihowa nugeteya, ma muliyega Ibe. <sup>14</sup> Ma wete Seitani 'ina 'abo 'oinega Adama geya 'iwe'a, ma wahine hesi 'iwe'a ta 'ipui nugeta. <sup>15</sup> Ma bewa tutaina 'oina wahiwahine 'idi tuta henatuna 'oina, Yehoba sawasawahina 'i'abihetedi, 'eguma ma'idi hemisa, ma wete ma'idi helau, ma mumugadi 'ehauna, ta dumwaluna.

## 3

### *Tohanugetao 'idi paihowa*

<sup>1</sup> Moisa tuwa, 'eguma taiya nuwanuwana ma tapwalolo 'oina 'ihanugeta, beno paihowa bwebwe'ana, <sup>2</sup> ma 'ana lolina bewa: mumugana bwebwe'ana, mwanena 'aigeda tuwa, totoholo pa'ala ma'ina sanapu ta ma'ina he'asisi, ma tauna wete taumanao 'adi to'itayahi, ma wete tohe'ita bwebwe'ana, <sup>3</sup> ma sahena bwasi galana 'inumanuma yauyaule, ma wete sahena 'ihehegamwagamwagu, ma hesi mumugana nuhana, ma geya 'ida 'ahwa panapanawa, wete sahena wasawasa nuwana 'i'ewa'ewa.

<sup>4</sup> Cilobwaineya tauna 'ina hada 'adi tomiyanao 'ihanugete bwaibwainidi, ma 'ane natunao 'ina gwae sihesagohe ma'idi he'asisi. <sup>5</sup> Ceguma loheya geya natunao 'iloina hedumwaludi, tauna geya sawasawahina ma Yehoba 'ina tohekalesiyao 'iloina hedumwaludi, 'awa?

<sup>6</sup> Ma sahena tohemisa hauhauna wahehesinuwe ma 'ihetohanugeta, nata gide 'ina nuwahane 'oinega 'ibe'u, gide mwalo Seitani 'ina nuwahane 'oinega 'ibe'uwa.

<sup>7</sup> Tohanugetaowedi 'ilobwainediya 'adi 'ahwa bwebwe'ana siloba taudi geya totapwalolo 'oidiyega, ma hesi 'eguma tomota tohanugetao si'ahwa galagalaedi mumugadi weyahina, beno gide Seitani 'ina si'wa 'oina tohanugetaowedi sisi'wa.

<sup>8</sup> Dikoniyo wete 'ilobwainediya ma mumugadi 'ausalana ma'idi nuwatuhi dumwaludi, ma sahena bwasi galana sinumanuma hedada, ma sahena wasawasa 'oina sihehemisa. <sup>9</sup> Ma 'idi tapwalolo 'ana sanapu dahwadahwaina si'abiyahi, 'idi nuwatuhi bwebwe'anega. <sup>10</sup> Ma 'eguma taiyawedi loheloheya nuwanuwami wahesinuwedi ma sihedikoni, nugeta wa'ita 'idi hematamatana ma 'eguma mumugadi 'ausaladi taudi beno walagudi, ma sihedikoni.

<sup>11</sup> Mwanediyo wete gide ma'idi nuwatuhi dumwadumwaluna, ma sahena 'iyadiyo si'ahwa'ahwa galagalaedi, sahena bwasi galana sinumanuma hedade, ma hesi siguibiga moisa. <sup>12</sup> Dikoni mwanena 'aigeda tuwa, ma natudiyo ma 'idi susuwo sihanugete bwaibwainidi.

<sup>13</sup> Dikoniyo 'eguma siguibiga, beno nata tomota si'ahwa bwebwe'ani, ma wete Yesu 'ana hemisa 'oina sitoholo pa'ala.

<sup>14</sup> Yanuwatuhuya nata muhemuhena ma yatauyawa 'oiuwa, ma nugeta 'ino leta bewa yaleyawa, <sup>15</sup> ma 'eguma yaheheboi, leta bewa 'oinega 'usanapu to mumuga tauda totapwalolo 'ilobwainegita, beno tauda 'ida Yehoba mayawasina 'ina boda 'alona, weyahina tauda tohekalesiyao 'ina he'ita moisa 'ana to'ita'ita yahinao. <sup>16</sup> Moisa tuwa, 'ida tapwalolo 'ana sanapu dahwadahwaina, ma hesi madouna, beno Keliso weyahina: Tauna 'ihetomotai masiha, ma Yaluyaluwana 'oinega 'ihewaiwaiya, ma aneloseyo si'iteya, ma wasana tupwa mabwaiyadi sihesagoheya, ma gogo gabulena tomiyanao sihemiseya, ma 'ihaneya tupwa wasawasa 'oina.

#### 4

##### *Tohe'ita 'abo'abo weyahidi*

<sup>1</sup> Yaluyaluwa Tabuna 'ihepwaila latuwa 'abehega tuta 'ana 'ebe gumwala 'oina tomota tupwadi nata tapwalolo silogwahate ma yaluyaluwa galadi ma Tomodulele 'idi he'ita 'abo'abowedi sihesagohedi. <sup>2</sup> Tohe'itaowedi tomota 'e'e'abo'aboidi, ma 'idi 'abowedi weyahidi geya sida nuwanuwa.

<sup>3</sup> Cidi 'abowedi bewa gide 'abehega hai ginaula galana, ma wete 'e'ahai tupwadi 'adi 'ai si'ausidiya. Ma 'omi Keliso 'ana tohemisao he'ita moisa wasanapuya 'abehega Yehoba 'e'ahai mabwaiyana 'ipaihowediya 'ai weyahina, ma 'ane ma'ida loyauwedo ta'ai'ai.

<sup>4</sup> Ginaula mabwaiyana Yehoba 'ipaihowediya bwebwe'adi, 'oinega weyahidi taloyauwedo Yehoba 'oina, ma ta'ewedi, <sup>5</sup> weyahina Yehoba 'ina gwaeyega ma tauda 'ida 'ahwanoiyega 'i'abihe'ehau pwaidiya.

##### *Yehoba 'ina topaihowao mumugadi*

<sup>6</sup> Bewa loinaedi 'iyadao 'oidiya 'uhe'itaedi, 'oinega 'owa Yesu Keliso 'ina topaihowa bwebwe'ana, weyahina he'ita dumwaluna Yesu 'ana hemisa weyahina 'umulimuliyedi, ma 'oinega yaluyaluwau 'ihewaiwai. <sup>7</sup> Ma he'ote'otetela besobesowedi geya Yehoba 'oinega, sahena 'uhehesagohedi, ma hesi 'utoho waiwai ma tuta mabwaiyana 'umumuga 'ausala Yehoba matana.

<sup>8</sup> Eema ginauledi tapaipaihowedi wahida 'ana 'abi weyahina, beno ginaula bwebwe'ana, ma hesi yaluyaluwada 'ana 'abi ginaula bwebwe'ana hedada, 'i'abihetegita 'ida tuta bale'uwa weyahina, ma wete tuta 'inaonaoma weyahina.

<sup>9</sup> Gwae bewa gwae moisa, sowasowana tatagwalegita 'oina. <sup>10</sup> Weyahina tuta bewa 'oina ma'ida hetapewa ma ma'ida guibiga, Yehoba tahehemise tauna 'iboimo miyamiya hatayana, tomota mabwaiyadi 'adi To'abihetena, 'eguma sihemisae. Eeta 'ida nuwatuhiyahina 'oina talaguya ma 'ane 'i'abihetegita.

<sup>11</sup> Nuwatuwuwedi 'ulohatotowedi, ma 'uhe'itaedi tomota 'oidiya.

<sup>12</sup> Tomota sahena sisinasinaligo weyahina 'abehega 'owa hewali tuwa, ma hesi 'ino gwae bwebwe'ana, ma 'ino paihowa bwebwe'ana, 'ino helau, 'ino hemisa, ma mumugau 'ehauna 'oidiyega 'owa 'ebe'ita taudi Yesu 'ana tohemisao 'oidiya.

<sup>13</sup> Ma wete tapwalolo 'alona Buki Tabu 'uhasili, ma 'uguguya, ma 'uhe'ita 'ana siga yatauyawa.

<sup>14</sup> Mwalo tapwalolo 'ana babadao si'abidebegowa, ma weyahu sipalopisaiya 'ino paihowa Yehoba weyahina, eeta paihowaina weyahina Yehoba 'i'abihe waiwaiyego.

<sup>15</sup> Coinega 'unuwatuhyahi, ma paihowaina 'oidiya sahena 'ulowahi'wata, eema tomota 'ino hetapewa weyahina 'ane sigwae, "Moisa, Timoti tauna toguibiga."

<sup>16</sup> Timoti, 'u'itayahigo, tuta mabwaiyana 'uhe'ita moisa, ma 'ane Yehoba 'owa ma 'ino tohesagohaowedi ba'idamwao 'i'abihetegomi.

## 5

### *Cida paihowao 'iyadao 'oidiya*

<sup>1</sup> Sahena babadao 'uheheliyedi, ma hesi hohobigega 'ulohatotowedi, gide tuwa tamau 'oina 'uhehegwaegwae, ma wete 'a pateyao 'u'ahwa'ahwa tasinaedi; <sup>2</sup> ma wahiwahine madoudi 'oidiya mumugau gide sinamwao, ma gumalaulau 'oidiya ma'ino nuwatuwu bwebwe'ana ma mumuga 'ausalana 'oidiyega 'u'ahwa nuhuned.

<sup>3</sup> Hiwahiwapeyedi geya 'idi susumo 'u'abihetedi. <sup>4</sup> Ma 'eguma natudiyao nana tubudiyao simiyamiya, beno taudi 'ilobwainediya ma si'itayahidi, ma 'ane mwalo masedesedediya 'adi 'itayahina sihemaise. Lemaedi bewa gide Yehoba 'ina 'ebe yaliyaya.

<sup>5</sup> Ma taudi hiwahiwapeyedi geya 'idi susumo 'ulemedi, 'eguma Yehoba taunamo sihemiseya ma 'oina si'ahwa'ahwanoi sabwelo ma niuwana 'oidiya. <sup>6</sup> Ma taudi hesi yaliyaya besobeso weyahina sinuwanuwatuhu, beno taudi wahidi mayawasidi, ma yaluyaluwadi si'amasa pwaiya. <sup>7</sup> Coinega guguya bewa hiwahiwapeyedi 'u'ebwaedi ma simumuga bwaibwaina ma 'ane sahena hali tomota hiwahiwapeyedi si'ahwa'ahwa galagalaedi. <sup>8</sup> Ma 'eguma taiya 'ina susuwao bo natunao geya 'ida 'itayahidiya, beno tauna Yehoba 'ina he'ita 'ilogwahateya, ma tauna togala hedada 'abwa taudi Yehoba 'ana touhalao.

<sup>9</sup> Hiwahiwapeyedi 'adi lolina bewa: 'eguma 'adi bolime sikisiti nana 'ihane, ta mwanena mwalo 'aigeda tuwa, <sup>10</sup> ma tomota matadiya mumugadi dumwaluna, weyahina natudiyao 'adi 'itayahina 'oina sipaihowa bwaibwaina ma wete taumanao ta tohekalesiyao 'adi 'abihetena 'oina, wete tomiya mwau silemedi ma si'atemuyamuyaedi, beno 'ilobwainediya ma tohekalesiya 'oidiya siluhu, ma tohekalesiyaowedi 'oidiyega 'adi lema, nana 'e'ahai, bo 'ale'o si'ewa. <sup>11</sup> Ma hiwahiwapeyedi taudi geya sihe'ai'aihale, sahena siluhuluhu bodaedi 'oidiya ma sigwaegwae hemisa Keliso 'oina 'abehega nata geya sihaihai hila, weyahina taudi nage gide nata 'idi gwae hemisaina siligehe ma sihai hila. <sup>12</sup> Ma bewa 'oinega Yehoba matana sigala pwaiya. <sup>13</sup> Ma wahiwahineyedi wete si'e'elomiya besobeso ma sitauya hali hada ma hali hada 'oidiya silolomugi ma hali tomota weyahidi sigwaegwae dadanedi.

<sup>14</sup> Coinega yanuwatuhuya hiwahiwapeyedi taudi geya sihe'ai'aihale moisa sawasawahina ma sihai hila, ma sihenatuna ma si'ita'ita yahidi natudiyao ma wete 'idi hadao, ma 'ane sahena 'ada sahiyao si'ahwa'ahwa galagalaegita hiwahiwapeyedi mumugadi weyahina. <sup>15</sup> Weyahina tupwadi hiwahiwape siwe'a, 'oinega Seitani 'ina 'eda 'oina simulimuliya.

<sup>16</sup> Ceguma to wahine Keliso 'ana tohemisa ma 'ina susuwao tupwadi sihiwapeya, 'ilobwaineya ma 'i'itayahidi. Ma tapwalolo 'ana tohanugetao 'idi paihowa hiwahiwapeyedi geya 'idi susumo si'itayahidi.

<sup>17</sup> Ma 'ami tohanugetaowedi 'eguma silema bwaibwainigomi, 'omi wa'ita'itayahidi bwaibwainidi, beno 'idi guguya ma 'idi he'ita maisana bwebwe'ana wa'ebwaedi.

<sup>18</sup> Bewa weyahina Buki He'asisi 'oina Yehoba 'ina lolina, 'igwaeya,



“Ceguma bulumakau 'ipaipaihowa witi huwaina 'oina, sawasawahina ma tupwana wete 'i'ai.”

Ma wete 'igwaeya,

“Topaihowa 'adi 'iluwana 'ilobwainediya ma si'ai.”

<sup>19</sup> Ceguma tomota tupwadi sihe'ewa besobeso 'ami tohanugetao weyahidi, sahena 'uhehesagohe, ma hesi 'eguma tomota 'eluwa bo 'etoi sihegwaego 'aigeda tohanugeta 'ina pui weyahina, beno 'uyatala. <sup>20</sup> Ma 'eguma tohanugeta 'ina pui 'u'italobeya 'uheliye boda matadiya, ma 'ane taudi wete simatauta ma sahena puiina 'oina siluhuluhu.

<sup>21</sup> Bewa 'a hemataluwa 'oiguwega Yehoba ma Yesu Keliso matadiya, ma wete aneloseyao hesihesinuwaiti matadiya, 'abehega loina bewa 'umuliya moisa. Tomota mabwaiyadi 'uloinaedi loina 'aigeda tuwamo 'oinega, ma sahena tupwadimo 'oidiya 'uloina waiwai, ma tupwadi 'oidiyega geya.

<sup>22</sup> Tohanugeta 'ana hesinuwa 'oina sahena 'ulolo mwayamwayau. Nata gide 'ina pui dahwadahwaidi ma hesinuwa 'iloba, ta beno 'ana 'ita gide 'ina puiyao 'oidiya 'u'abi'abihete. Ma 'owa wete, 'uboi mumugau 'u'itayahi bwaibwaini.

<sup>23</sup> Sahena we'ahamo 'unumanuma, weyahina tuta baibaiwana 'uhelolohala ma gamwau 'imuyamuya, ma hesi waini tupwana 'unuma.

<sup>24</sup> Tomota tupwadi 'idi pui 'atamanega silatuwa ma weyahidi 'adi loina nata siloba. Ma tupwadi dahwadahwaidi 'idi pui, ma hesi 'abwa simiya latu. <sup>25</sup> Gide wete paihowa bwebwe'adi tupwadi simiyamiya latu, ma tupwadi 'abwa nata simiya latu, weyahina geya sawasawahina ma simiya dahwana.

## 6

<sup>1</sup> Topaihowao 'adi loina ma 'idi babadao sihe'asisiyanedi, ma sihematamatanedi. Ceguma geya, tomota tupwadi 'idi he'itao si'ahwa galagalaedi, ma sigwae, “Yehoba 'ana tohemisao taudi ma hesi geya sipaihowa bwaibwaina.”

<sup>2</sup> Wete topaihowaowedi 'eguma 'idi babadaedi ba'idadiyao si'ahwa tasina Keliso 'ana hemisa 'oina, ma 'ane sahena 'idi babadaowedi 'adi he'asisi silololagu, ma hesi sowasowana sihetapewa waiwai weyahidi, ma 'ane 'idi paihowa bwebwe'ana 'ihemadou, weyahina 'idi babadaedi taudi Keliso 'ana tohemisao, 'oinega 'idi helauwega ma sida paihowa 'oidiya.

### *Tohe'ita 'abo'abo weyahidi*

Loinaedi 'uhe'itaedi tomota 'oidiya. <sup>3</sup> Ma 'eguma taiya 'ina he'ita hagana, ma 'ida Bada Yesu Keliso 'ina gwae dumwaludi geya 'ida muliyediya, ma he'itaedi mumuga bwebwe'ana weyahina 'ilogwahatedi, <sup>4</sup> tauna 'ina nuwahane 'oinega 'ihenainaida moisa, ma nuwanuwana 'ihe'ahwa panapanawa. Taudi nage gide tohe'ipi'ipi moisa ma tohegamwagamwagu, wete toheliya ma tosiwapa. <sup>5</sup> Coinega 'iyadiyao ba'idadiyao sihe'ahwa panapanawa, ma 'idi nuwatuhu galadi weyahina nata he'ita moisa geya sisanapu, ma hesi 'idi nuwatuhu 'abehega Yehoba 'ana he'asisi 'oinega 'idi wasawasa madouna sida loba bale'uwa.

<sup>6</sup> Ma hesi tauda 'ida wasawasa hagana. Yehoba 'ana he'asisi 'oinega sawasawahina 'iloinaegita, ma hesi wasawasa bale'u 'ana loba sahena weyahina tanuwanuwatuhu. <sup>7</sup> Weyahina tauda mwalo manima daisidamo talatuma bale'uwa, nata wete manima daisidamo bale'u bewa ta'ebesine. <sup>8</sup> Coinega 'e'ahai ma 'ada 'ale'o weyahidi tayaliyaya, ma ginaula mabwaiyadi weyahidi sahena tanuwanuwa hedada.

<sup>9</sup> Ma taudi wasawasa 'ana tohemisao nata Seitani 'ina 'ebetohona 'oina sisi'wa, ma siboi 'idi nuwatuhu besobesowedi 'oidiyega si'abihegala hiledi, ta 'abwa taudi beno hesilae moisa siloba. <sup>10</sup> Weyahina wasawasa 'ana nuwa'ewa beno puiyao huhudi, ma wete 'iyadao tupwadi wasawasa si'ebesa hedadeya, 'oinega tapwalolo moisa si'ebesineya, ma 'ebenuwagala mabwaiyana silobeya.

### *Ceda bwebwe'ana weyahina*

<sup>11</sup> Timoti, 'owa hesi Yehoba 'ina topaihowa, 'oinega bewa mumugaina 'oinega 'u'itayahigo, ma mumuga dumwaluna 'umuliye, bewa gide 'eda'eda bwebwe'ana ma hemisa ma helau ma 'alama'i'ita ma wete hohobiga. <sup>12</sup> Ma wete tapwalolo 'ana paihowa bwebwe'adi 'oidiya 'utoho ma 'uhewaiwai, ma yawasiu miyamiya hatayana wete 'u'abiyahi, weyahina mwalo Yehoba 'ihesinuwegowa, beno tutaina 'ino hemisa 'uhepwaila latuwa tomota mabwaiyadi matadiya.

<sup>13</sup> Cowa Timoti yaloinaego Yehoba matana, tauna ginaula mabwaiyana yawasidi 'ana to'ebwaya, ma wete Yesu Keliso matana, tauna mwalo Ponitio Pailato 'oina gwae moisega 'igwaeya. <sup>14</sup> Ma 'igu loina 'abehega hemataluwaedi 'umuliye bwaibwainidi, ma sahena 'eta 'oina 'uwe'awe'a, ma 'ana siga 'ida Bada Yesu Keliso 'abwa 'ihilama.

<sup>15</sup> Weyahina nata 'abwa tuta hesihesinuwana 'oina, Yehoba Yesu 'i'abilatuhe. Yehobaina toloina 'aigeda tuwa ma 'asi'asilalana, ma toloinao mabwaiyadi 'idi toloina, ma wete babadao mabwaiyadi 'idi bada.

<sup>16</sup> Yehoba 'iboimo miyamiya hatayana, ma geya 'eta taiya gide. Ma 'ina tupwa geya sawasawahida ma ta'ita, weyahina 'asilala hedada, ma geya sawasawahina Yehobaina ta'ita, ta 'ina wasawasa ta 'ina waiwai nata geya sigumwagumwala. Emeni.

<sup>17</sup> Ma bale'u 'ana wasawasao 'uhemataluwedi, ma sahena sinuwanuwahane 'idi wasawasa weyahidi, ma wete sahena sihehemisa 'abehega nata 'abwa 'ebe 'abihetena siloba 'idi wasawasaedi 'oidiyega, weyahina wasawasaedi gumwagumwalidi. Ma hesi tuwa Yehoba 'iboi 'oina sihemisa, weyahina Yehoba 'iboi to'ebwaya bwebwe'ana, ta 'ida 'ebe yaliyaya mabwaiyana tauna 'oinega silatulatuma.

<sup>18</sup> Ma wete wasawasaedi 'uhemataluwedi ma paihowa bwebwe'adi ta helau ta 'ebwaya 'oidiyega sihewasawasa moisa. <sup>19</sup> Bewa 'oinega 'adi maisa bwebwe'ana tuta 'inaonaoma 'oina siloba, beno yawasidi moisa.

<sup>20</sup> Timoti yo, ginaulaedi Yehoba 'i'ebwaegowa 'u'itayahi bwaibwainidi, ma sanapu 'abo'abodi ma he'ahwa panapanawa besobeso sahena 'umulimuliyedi. <sup>21</sup> Weyahina taudi nuwatuhuwedi 'adi tomuliyao 'idi hemisa Yesu 'oina 'iwe'a.

Yehoba 'ina helau 'oiuwa.  
Taugu Paulo.

## 2 TIMOTI

### Timoti 'ina leta heluwena Paulo 'ileleya

Muliyetega Paulo deliya 'asa Loma 'oina 'imiyamiya, ma Timoti 'ina leta heluwena bewa 'ileleya. Paulo 'isanasanapu 'i'iuna ma 'i'amasa, ta hesi 'ina hemisa Yesu Keliso 'oina 'ihewaiwai hedada, ta Timoti 'i'abihe pa'aliya ma tauna wete gidemusa 'ihewaiwai.

Caigeda ginaula 'i'ahwanoiyeya, 'ina tobwatobwa tupwana nuwanuwana ma Timoti 'i'ewedima 'oina.

#### *Loyauwedo*

<sup>1-2</sup> Yauwedo Timoti 'owa natugu moisa, 'ino leta bewa taugu Paulo 'oiguwega. Taugu Yesu Keliso 'ana tohepwaila, Yehoba 'ina nuwatuhu gide ta yahepwaila yawasida bwebwe'ana weyahina, beno Yesu Keliso 'oinega. Tamada Yehoba ma 'ida Bada Yesu Keliso sihelauwego ta si'atemuyamuyaego ma 'oinega 'umiya daumwala.

#### *Timoti 'ina hemisa Yehoba 'oina*

<sup>3</sup> Yehoba 'oina yaloyauwedo, tauna tubugwao mwalo 'idi Yehoba, ma 'oina yahetopai-howa 'igu nuwatuhu 'ehaudi 'oidiyega, gidemusa taudi. Wete 'oina ya'ahwa'ahwanoi weyahiu nihuwana ma sabwelo 'oidiya. <sup>4</sup> Mwalo 'ane ya'ebesinegowa, 'ino dou yanuwatuhu yahiya, 'oinega nuwanuwagu madouna ma to tuta 'oina ma ya'ita hilago, ta 'oinega yayaliyaya.

<sup>5</sup> Ma wete 'ino hemisa moisa Yehoba 'oina yanuwatuhu yahiya, gide sinau Yunisi ma tubuu Loise Yehoba sihemisaeya moisa, ma yasanapugowa 'owa wete Yehoba 'uhemisae moisa. <sup>6</sup> Wete tutaina 'oina ya'abidebegowa ta Yehoba waiwai 'i'ebwaegowa, waiwaiina 'u'itayahi ma 'ane 'oiuwega sahena 'igumwagumwala. <sup>7</sup> Weyahina Yehoba yaluyaluwana 'i'ebwaegita sahena matauta weyahina, ma hesi waiwai ma helau ma nuwatuhu moisa 'i'ebwaegita.

<sup>8</sup> Coinega sahena 'ida Cinapwana tetelina 'ana hepwaila weyahina 'uhedeba mwadimwadina. Taugu wete 'igu luhu deliya Cinapwana 'ina paihowa weyahina sahena weyahina 'udebadeba mwadina. Ma 'owa wete 'abwa Yesu tetelina weyahina tupwana miyamwau 'oiuwa silatu, ma 'ilobwainegowa Yehoba 'ina waiwai 'oinega 'utoholo pa'ala.

<sup>9</sup> Yehoba tauna 'i'abihetegita ta 'ibwauwegita 'ina paihowa bwebwe'adi sabi pai-howadi. Moisa tuwa tauda geya 'ida bwebwe'ana weyahina 'ihesinuwegita, ma hesi mwalo hene tauna 'ina nuwatuhu ma 'ina helau weyahina, ta Yesu Keliso 'ipaihoweya tauda weyahida. <sup>10</sup> Ma bewa tuwa 'ina helauina 'oida 'i'abilatuheya, 'ada To'abihetena Yesu Keliso 'oinega. Ta Kelisoina 'amasa 'ilohesawaliya, ma tetelina bwebwe'ana 'oinega yawasi hataya 'i'eweyama 'oida. <sup>11</sup> Ma Yehoba 'igu paihowa 'i'ebwaegauwa ma 'ane tetelina bwebwe'ana yahehepwaila ma yahehe'ita taudi 'asa ganamuli 'oidiya. <sup>12</sup> Bewa weyahina 'igu miyamwau yalobeya, ma hesi geya weyahina yadeba mwadina, weyahina 'ida Cinapwanaina yahemiseya tauna yasanapuya, ma to'aha 'i'ebwaegauwa sowaswana 'i'itayahiya nimanega, eema sabweloina madouna 'inaonaoma 'oina.

<sup>13</sup> Mwalo guguyaedi bwebwe'adi ya'ebwaegowa, Yesu Keliso 'ana hemisa ma 'ana helau weyahidi, ee 'umuliya bwaibwainidi. <sup>14</sup> Ma Yaluyaluwa Tabuna tauna nuwada 'imiyamiya, ta sanapu moisa 'i'ebwae pwaigowa, 'oinega sanapuina 'unuwatuhuyahi.

<sup>15</sup> Ma 'usanapu pwaiya, taudi meEsiya silogwahategauwa ma si'ebesinegauwa, taudi Paigelio ma wete Elimogini, ma bodaedi.

<sup>16</sup> Ma Onesipolo hesi geya weyahigu 'ideba mwadina 'igu miyamiya deliya weyahina, ma tauna tuta mabwaiyana 'i'abi'abihetegau, 'oinega 'agu lotohona 'i'abi'abihe bwebwe'ani, 'oinega Yehoba 'oina ya'ahwa'ahwanoi ma 'ane Onesipolo ma 'iyanao 'i'atemuyamuyaedi.

<sup>17</sup> Mwalo Onesipoloina 'ilatuma Loma 'oina, ma weyahigu 'i'ebesa waiwaiya eeta 'ilobegauwa. <sup>18</sup> Cowa 'ina paihowa madouna weyahigu Epeso 'oina 'usanasanapu, 'oinega nuwanuwagu, ma Cinapwana 'ina tuta yatala 'oina 'atemuyamuya 'ida loba Cinapwanaina 'oinega.

## 2

### *Cida lo'aleha Yesu Keliso weyahina*

<sup>1</sup> Natugu Timoti, Yesu Keliso 'ina 'abihetenega 'uhewaiwai, ma <sup>2</sup> wasana 'u'itayahi, wasaina 'oiguwega 'uhesagoheya tomota mabwaiyadi matadiya, 'oinega taudi ma'adi hemisa 'oidiya 'u'ebwaedi, ma taudi wete hali boda sihe'itadi.

<sup>3</sup> Mabwaiyada Yesu Keliso weyahina miyamwau talobaloba, 'oinega 'ino miyamwauina 'oinega 'utagwalego, ma 'ane 'owa Yesu Keliso 'ina tolo'aleha bwebwe'ana. <sup>4</sup> Cunuwatuhuyahi 'eguma tolo'aleha tauna nuwanuwana ma 'ina toloina 'ina nuwatuhumo 'ipaipaihowa, nata geya 'ina 'asa 'ana paihowa weyahidi 'inuwanuwatuhu.

<sup>5</sup> Gide tuwa tohepili, 'eguma pili 'ana loina geya 'imuliya, nata maisa geya 'i'ewa.

<sup>6</sup> Gide wete tanoha 'ana topaihowa, 'ina paihowa waiwai 'oinega nata huwaina 'oinega 'i'aputoho nugete.

<sup>7</sup> Cigu lohatoto bewa, 'unuwatuhuyahi, ma 'adi sanapu mabwaiyana Cinapwana tauna 'i'ebwaego.

<sup>8</sup> Ma Yesu Keliso 'unuwatuhuyahi, tauna Debida 'ina susu, ta 'amasa 'oinega 'itoholo hila, gide tuwa yahepwaileya 'igu guguya 'oina. <sup>9</sup> Cigu guguyaina weyahina taugu miyamwau bo'i yalobeya 'oinega deliya sipaigauwa, gide 'abwa taugu topui 'aigeda. Ma hesi Yehoba 'ina gwaena gesowana 'eta taiya 'i'etobode.

<sup>10</sup> Bewa weyahina 'igu miya mwauwedi 'oidiyega ya'alama'i'ita, ma 'abehega Yehoba taudi 'ihesuwedidiya yalemedi, ma 'ane Yesu Keliso 'i'abihetedi, ta yaliyaya miyamiya hatayana siloba.

<sup>11</sup> Gwae bewa gwae moisa 'abehega:

“Ceguma Keliso ba'idada ta'amasa, 'abwa wete ba'idada yawasida bwebwe'ana taloba.

<sup>12</sup> Ceguma Keliso ba'idada ta 'ida miyamwau 'oidiyega ta'alama'i'ita, 'abwa ba'idada tahetoloina. Ceguma Keliso tauhale 'abwa wete 'iuhalegita. <sup>13</sup> Ceguma geya 'ida hemisamo Keliso 'oina, tauna 'ina gwae hemisa geya sawasawahina ma 'ibui, weyahina tauna mumugana tuwa ma'ana hemisa.”

### *Yehoba 'ina topaihowao bwebwe'adi*

<sup>14</sup> Coinega Yehoba matana 'ino tomotaiyao 'ulohatotodi ma 'uhenuwa lagudi ma gwae bewa sahena sinuwanuwanaide, ma wete sahena gwae tupwadi 'adi bui weyahidi sihe'ahwa panapanawa. Weyahina he'ahwa panapanawa besobeso beno taudi tohesagoheya 'oidiya nata geya 'i'abi'abihetedi, ma hesi 'i'abihe galadi.

<sup>15</sup> Coinega wete 'uhetapewa ma tetela bwebwe'ana 'ana he'ita moisa weyahina 'uguibiga ma 'ane 'owa Yehoba 'ina topaihowa bwebwe'ana, wete 'abwa 'eguma matana 'ulatu 'ihewatuwego. <sup>16</sup> Ta togwae besobeso bodaidi sahena 'oidiya 'uluhulu, weyahina gwaeyedi 'oidiyega mumuga galadi silatu, <sup>17</sup> ma gwae besobesowedi 'oidiyega mumuga galana madouna 'ilatu. Togwae besobesowedi siteluwa sanidi Aimenio ma Pileto, <sup>18</sup> ma siteluwaedi he'ita moisaina si'ebesineya ma sigwae, “To'amasa 'idi toholo hila 'ana tuta 'igumwala,” 'oinega 'iyadiyao tupwadi 'idi 'aboina sihesagoheya, ta 'idi hemisa 'iwe'a. <sup>19</sup> Ma hesi Yehoba 'ina gwae 'ana wahuwahu waiwaina 'oina, mwalo silelediya 'igwae:

“Cinapwana 'ina tomotaiyao 'isanapudiya.”

Ma wete 'igwaeya:

“Taudi Cinapwana 'oina sitagwala pwaidiya 'ilobwainediya ma mumugadi galadi silogwahatedi.”

<sup>20</sup> Moisa tuwa, hada wasawasaedi 'alodiya tupwadi gaeba goula ma siliba, ma tupwadi gaeba 'aiwe ma bale'u 'oidiyega sipaihowedi, ta gaebaedi bwebwe'adi taumanao weyahidi silagudi, ma gaeba galadi silagu wasiyedi mohomoho weyahidi. <sup>21</sup> Ma 'eguma taiya mumugana galana 'oinega 'i'abihe'ehau hila, beno 'ihegaeba bwebwe'ana, ma 'ina 'inapwana 'ilagu 'ina paihowa bwebwe'adi weyahidi.

<sup>22</sup> Coinega hewahewali 'idi henuhenuwa 'ulogwahatedi ma mumuga dumwaluna ta hemisa ta helau ta miya daumwala 'umuliyedi, taudi Yesu si'ahwa badaeya ma'ate 'ehaudi ba'idamwao. <sup>23</sup> Ma wete 'ahwa panapanawa besobeso 'u'ebesinedi, weyahina 'ahwa panapanawa 'aleha 'ina 'ebelatu. <sup>24</sup> Ta he'ahwa panapanawa Cinapwana 'ina topaihowao geya 'ilobwainegita, ma 'atemuyamuya ma he'ita ma 'alama'i'ita hesi. <sup>25</sup> Ma wete 'ada 'alehao 'oidiya mumugada nuhana 'oinega ta'abihe dumwaludi, ma 'oinega Yehoba, 'eguma sawasawahina ma 'i'abihetedi ma sinuwabui ta he'ita moisa simuliye, <sup>26</sup> ta wete Seitani 'ina si'wa 'oinega sidena, weyahina taudi mwalo Seitani 'isi'wediya, ma 'oina sihetopaihowa 'ina nuwatuhi weyahina.

### 3

#### *Tuta 'ana 'ebelosaloha weyahina*

<sup>1</sup> Nuwanuwagu ma nuwau 'ida sabwalena tuta 'ana 'ebelosaloha 'inaonama weyahina, 'abehega tutaedi 'oidiya mwau baibaiwana 'abwa silatu. <sup>2</sup> Weyahina tutaedi 'oidiya nata tomota taudimo weyahidi sinuwanuwatuhi, ma wasawasa 'ana hamwa nata 'imadou 'oidiya, ta sinuwa hanehane ta sigagasa ma wete siheliya. Ma sinadiyao ma tamadiyao 'enadi nata geya sihematamatana, ta tomota 'idi paihowa bwebwe'adi weyahidi nata geya siloyauwedo. <sup>3</sup> Mumugadi guguyou 'oinega gesowana si'atemuyamuya, ma hesi sihe'ahwa panapanawa besobeso, ma toganawala hedade. Ma sigamwasowala besobeso wete, ta wete mumuga bwebwe'ana 'ana tologwahatao, <sup>4</sup> to'wayama, ma galana 'oina sihewaiwai, ma gwae hane hedada, ma geya Yehoba sihelauwe, ta hesi taudimo 'idi yaliyaya weyahina sinuwanuwatuhi.

<sup>5</sup> Tomotaedi sitapwatapwalolo tuwa ma Yehoba 'ina waiwai geya sihemisae, 'oinega 'idi tapwaloloina tuwa ginaula besobeso, 'oinega bodaedi taudi sahena 'oidiya 'uluhulu. <sup>6</sup> Weyahina tupwadi 'oidiyega hadai siluhuluhi wahiwahine geya 'idi nuwatuhi pa'alidi sabi 'abowedi, ma wahiwahineyedi sisanasanapu taudi topui, 'oinega 'amna hagana ma hagana silolotoho soladiya ta simulimuliyedi, <sup>7</sup> 'oinega he'ita hagana ma hagana 'ana tohesagohao ta geya sawasawahina ma he'ita moisa sisanapu.

<sup>8</sup> Tomotaedi he'ita moisa silo'aleheya, gide taudi mwalo Yanisi ma Yamilisi Mosese silo'aleheya, ta 'adi 'ita gide taudi tohemisa ma 'atediya 'abo ma nuwatuhi galadi simiyamiya. <sup>9</sup> Ma hesi muhemuhena sibe'u, ma tomota baibaiwadi si'itadi, mumugadi galadi gide mwalo Yanisi ma Yamilisi mumugadi galana, ta tomota si'iteya.

#### *Timoti 'ana loina*

<sup>10</sup> Ma 'owa bo'i 'usanapugauwa, 'igu he'ita, ta mumugagu, 'igu 'edao, 'igu hemisa, 'igu 'alama'i'ita, ta 'igu helau ta 'igu toholo pa'ala. <sup>11</sup> Ma 'asaedi Anitioki ma Ikoniyami ma Lisitila 'oidiya yamiyamwauwa ta 'agu muyaedi tomota 'oidiyega yalobediya wete 'usanasanapu, tupwaedi 'oidiya yamiyamwauwa moisa, ta mwauwedi mabwaiyadi 'oidiyega 'ida Cinapwana 'i'abihetegauwa.

<sup>12</sup> Moisa, 'eguma Yesu Keliso tahemisae, ma tatagwalegita 'ina 'eda bwebwe'adi 'oina, nata miyamwau tomota 'oidiyega taloba. <sup>13</sup> Ta wete taudi togala, ma tomota 'adi to'abowao 'idi puiyao sihemadou moisa, weyahina Seitani bo'i 'i'abowediya.

<sup>14</sup> Ta 'owa hesi he'itaedi 'uhemisa pwaidiya ta 'usanapudiya. He'itaedi 'uda muliyedi, weyahina tauma 'ino tohe'itao bo'i 'usanapumaiya 'abehega 'ima he'itaowedi wete 'amulimuliyedi. <sup>15</sup> Ma 'owa 'uboi wete 'ino tuta gwamega ma nige bewa Buki He'asisi 'ina gwae 'ana tohasila, ta 'ihehe'itego 'abehega 'ida hemisa Yesu Keliso 'oina sowasowana 'i'abihetegita.



<sup>16</sup> Ma weteyage Buki He'asisi 'ina gwae mabwaiyana Yehoba Yaluyaluwanega sitauyama, ta gwaeyedi 'oidiyega 'ada he'ita ma 'ada lohatoto ma 'ada gihedumwalu <sup>17</sup> ta 'ida waiwai talobalobadi Yehoba 'ina paihowao weyahidi, weyahina Buki He'asisi 'ina gwae 'oidiyega Yehoba 'i'atububugita, ta 'ina paihowao bwebwe'adi mabwaiyana sawasawahida.

#### 4

<sup>1</sup> Timoti, yahenuwa laguwego Yehoba matana, ta Yesu Keliso, tauna to'amasao ma mayawasidi 'adi toloina matana, tauna nata 'ilatuna hilama ma 'ihetoloina 'oida. <sup>2</sup> Bewa 'a loina: Tuta mabwaiyana 'uhetapewa waiwai ma tetela 'uhehepwaile, tuta mwau ma tuta yaliyaya 'oidiya, ma tomota 'oidiya 'uguguya ma sihemisa, ta wete 'u'abihe dumwaludi, ma 'u'abihe pa'alidi, ma bewa nuwatuhuwedi 'uhe'ita bwaibwainidi ma'ino 'alama'i'ita.

<sup>3</sup> Weyahina tuta sinaonaoma 'oidiya tomota he'ita dumwaluna nata silogwahate, ma he'ita hagadi ma hagadi 'adi hesagoha 'abehega bwebwe'ana 'oidiya, simuliyedi. <sup>4</sup> Ma he'ita hagadi 'adi muliya 'oidiyega he'ita moisa si'ebesine.

<sup>5</sup> Ma 'owa sahena gide taudi. Sauga mabwaiyana 'utoholo pa'ala, ta 'ino miyamwau 'oidiyega 'u'alama'i'ita, ma wasa bwebwe'ana 'uhehepwaile. Bewa 'oinega ma 'ane 'owa topaihowa waiwaina Yehoba 'ina paihowa 'oina.

<sup>6</sup> Ta taugu nata sihunugau gide pwaoli, ma gogo bewa ya'ebesine. <sup>7</sup> Yalo'aleha pwaiya Yehoba weyahina, ta 'igu hepili yalohe gumwaliya, ta tuta baibaiwana Keliso yahemisaeya.

<sup>8</sup> Coinega 'abwa 'ida Bada 'agu maisa, mumuga dumwaluna weyahina, 'i'ebwaegau. Ta maisaina weyahigu 'igibubu pwaiya ta 'imiyamiya.

Badaina 'ina loina dumwaluna, ma 'eguma to sauga 'ilatuma, tauda ma wete taiyawedi 'ina hilama weyahina siyamwayamwana, mabwaiyada nata 'ada maisa 'i'ebwaegita.

#### *Gwae 'ana 'ebelolagu*

<sup>9</sup> Timoti, nuwanuwagu 'ulomwayamwayauma. <sup>10</sup> Dimasa bo'i 'i'ebesinegauwa weyahina bale'u mumugana nuwana 'i'eweya, ta 'itauya Tesalonaika. Kelesenisi bo'i 'itauya Galetiya, ma Taito wete 'itauya Dalimetiya. Taudi 'agu tolemaedi mabwaiyadi si'ebesinegauwa. <sup>11</sup> Luke 'iboi 'itupwa. Cino tauyama 'oina Maki 'utoeyama, weyahina tauna 'agu tolema bwebwe'ana.

<sup>12</sup> Tikiko yahewasa pwaiya ma 'oinega 'itauya Epeso.

<sup>13</sup> Ceguma 'utautauyama 'igu tobwatobwa tupwana 'u'ewedima, 'agu hewanu mwalo Tilawasi 'oina ya'ebesineya Kalipo 'ina hada, ma wete 'igu bukiyao ma pepa leleleledi, taudi beno nuwanuwagu madouna.

<sup>14</sup> Pwawapwawati 'ana topaihowa sanina Alekisanu mwau madouna 'i'ebwaegauwa, 'oinega 'ana maisa galana 'abwa Cinapwana 'i'ebwae. <sup>15</sup> Alekisanaina 'ida he'ita 'ilo'aleha hedadeya, 'oinega 'owa tauna 'oinega wete 'u'itayahigo.

<sup>16</sup> Cigu yatala nugeta geya 'eta taiya 'i'abihetegau, mabwaiyadi simatauta ta si'ebesinegauwa, ma yaboimo. Yehoba, 'idi pui bewa sahena 'uhehemaise.

<sup>17</sup> Ta 'igu yatalaina 'oina Yehoba 'i'abihetegauwa ta waiwai 'i'ebwaegauwa, ma tetelina mabwaiyana yahepwaileya tomiya ganamuli baibaiwadi 'oidiya, ma Yehoba 'ina 'abihetena 'oinega geya laiyoni 'oidiya siulegau. <sup>18</sup> Mwauwedi 'oidiyega Cinapwanaina nata 'i'abihetegau ma 'ina 'ebeloina galewa 'oina yaluhu, 'oinega tada hepwtuwe hataya. Emeni.

<sup>19</sup> Cigu helau Pilisila ma Akuila, ta wete Onesipolo ma'ina susuyao 'oidiya, 'uhepwaile.

<sup>20</sup> Ilasito 'imiyahila Kolinita, ma Tilopimo 'ilohala ta 'asa Milito 'oina ya'ebesineya.

<sup>21</sup> Culomwayamwayauma weyahina muhemuhena ma gogai 'ana tuta 'ilatuna. Yubulo ma Pudeni ma Lino ma Kalodiya ta wete 'iyadao mabwaiyadi 'idi helau 'oiuwa.

<sup>22</sup> Cinapwana ba'idau ma yaluyaluwau 'i'abihe waiwaiye, ma 'owa ma'ino bodao 'i'abihetegomi.

2 Timoti 4:22

327

2 Timoti 4:22

Taugu Paulo.

## TAITO

### Taito 'ina leta Paulo 'ileleya

Mwalo Paulo Taito 'ina paihowa 'i'ebwaeya ma 'abehega tohekalesiyao bwanabwana Kiliti 'oina 'i'ita'ita yahidi, ta 'ina leta bewa 'ileleya ma 'oinega paihowaina 'ana lolina 'isanapu.

#### *Loyauwedo*

<sup>1</sup> Natugu Taito, 'ino leta bewa taugu Paulo 'oiguwega, taugu Yehoba 'ina topaihowa ta Yesu Keliso 'ana tohepwaila. Cigu paihowaina 'i'ebwaegauwa ma taudi Yehoba 'ana hesihesinuwa ya'abihe waiwaiyedi ma sihemisa moisa ma nuwadi 'isabwalena, ta 'oinega sanapu moisege sipaihowa dumwalu. <sup>2</sup> Wete Yehoba mwalo hene 'igwae hemisaediya ta sihemisaeya 'abehega yawasidi miyamiya hatayana 'i'ebwaedi. Ta geya sowana 'i'abo. <sup>3</sup> Tutaina Yehoba 'ihesinuweya 'oina tauna 'ina gwaehemisega Yesu 'itayama, ta yawasida moisa 'i'abilatuheya, ta Yehoba, tauna 'ada To'abihetena, 'iloinaegauwa ta yaguguguya.

<sup>4</sup> Taito, 'owa ya'ahwa natunegowa moisa 'ida hemisa 'aigeda, 'oinega Tamada Yehoba ma 'ada to'abihetena Yesu Keliso 'idi helauwega si'abihetego ma 'umiya daumwala.

#### *Taito 'ina paihowa Kiliti 'oina*

<sup>5</sup> Bewa weyahina ya'ebesinegowa bwanabwana Kiliti 'oina ma to'aha nobwa hekalesiya 'alona geya bwebwe'ana 'ugihe dumwalu, ma wete 'igu loinega tohanugetao 'uhesinuwedi, 'asa 'aigeda 'aigeda 'oidiya.

<sup>6</sup> Ta 'igu lolina bewa tohanugetao 'adi hesinuwa weyahina, beno gide, to loheya 'eguma 'ina mumuga 'ausalana, ma mwanena 'aigeda tuwamo, ma natudiyao wasadi 'ane geya sida puiya, ta geya sida logwahata, ma hesi taudi ma'idi hemisa Yehoba 'oina. <sup>7</sup> Weyahina tohanugetao Yehoba weyahina sipaipaihowa, 'ilobwainediya ma mumugadi bwebwe'ana, ma sahena sidebadeba pa'ala nana sihehe gamwagamwagu, nuwana bwasi galana sinumanuma yauyaule, nuwana loheya 'ana to'ehunuwa, nuwana wasawasa 'ana tohamwa. <sup>8</sup> Ma hesi 'adi lobwaina ma taumanao si'itayahidi, ma mumugadi tuwa 'ausaladi, ta 'idi nuwatuhu matuhadi. Ma wete mumugadi dumwaludi, ma 'ehaudi, ta taudi to'alama'i'itana.

<sup>9</sup> Ta wete he'itaedi moisaedi sihesagohediya sihemisaedi, ma sinuwatuhu yahidi, ma 'ane tomota tupwadi silemedi he'ita 'oinega, ta 'eguma taiyawedi sihegwae 'abo'abowedi si'abihe dumwaludi. <sup>10</sup> Weyahina toguipaila mabwaiyadi simiyamiya, ta meYudiya 'idi lolina 'ana tomuliyao boda hedada sigwaegwae besobeso ma tomota si'abo'abowedi. <sup>11</sup> Coinega 'idi 'ahwa'abo'abo weyahina 'u'etobodedi, weyahina hali susu ma hali susu si'abihepuidi, ta 'idi he'ita 'abo'aboina 'oinega nuwanuwadi mane siloba.

<sup>12</sup> Bewa 'oinega ta palopita 'aigeda Kiliti loheyaina 'igwaeya, “Kiliti taudi mumugadi to'e'abo'abo ma tologwahata, ma mumugadi gide tuwa hebahebai, weyahina gamwadi 'ina mwausumo weyahina sinuwanuwatuhu.”

<sup>13</sup> Palopitaina 'ina gwae bewa moisa, 'oinega 'uheliyedi ma sinuwabui ma sihemisa moisa. <sup>14</sup> Ma 'u'etobodedi, ma sahena Yudiyaedi 'idi he'ote'otetela sihehesagohedi, ta wete he'ita moisa 'ana towahi'wata'watao sahena simulimuliyedi.

<sup>15</sup> Taudi mumugadi 'ehauna 'oidiya ginaula mabwaiyana 'ehauna, ma hesi taudi wasa bwebwe'ana 'ana tolowahi'wata, ma mumugadi galadi, taudi 'oidiya geya 'eta to'aha 'ehauna, weyahina 'idi nuwatuhu galadi mabwaiyadi. <sup>16</sup> Taudi sigwae 'abehega Yehoba sisanapuya, ta 'idi paihowa 'oinega Yehoba siuhaleya, weyahina taudi togala ma wete lolina 'ana tosinala, 'oinega paihowa bwebwe'ana geya 'eta 'adi lobwaina.

## 2

*He'ita dumwaluna weyahina*

<sup>1</sup> Ma 'owa he'ita dumwaluna 'uhe'itae. <sup>2</sup> Ma babadaedi 'uhegwaedi sahena sinumanuma yauyaule we'aha galana, ma sahena wete siyalialiyaya besobeso, ma hesi Yehoba sihemisa moisa, ma helau ta 'alama'i'ita 'oidiyega simaha.

<sup>3</sup> Cai'aihaleyao wete 'uhegwaedi ma mumugadi ma'idi he'asisi, ta sahena tomota si'ahwa'ahwa galagalaedi, ma wete sahena waini sinumanuma hedade, ta 'ilobwainediya mumuga 'ausalana sihehe'ita wahiwahine hauhaudi 'oidiya, <sup>4</sup> ma 'ane mwanediyao ta natudiyao sihelau bwaibwainidi. <sup>5</sup> Ma 'ane ma'idi he'asisi, ma mumuga bwebwe'ana 'oidiyega 'idi hada si'itayahidi, ma wete mwanediyao sihelauwedi ta 'enadi sihematamatana, ma bewa 'oinega hali tomota Yehoba 'ina gwae sihe'asisiye, ta sahena si'ahwa'ahwa galagalaedi.

<sup>6</sup> Loheloheya hauhaudi 'uguguyadi ma mumugadi si'itayahidi.

<sup>7</sup> Ta 'owa mumugau mabwaiyana 'oidiyega tomota 'uhe'itadi ma taudi wete simumuga bwebwe'ana. Eeta gwae moisega 'uhe'ita, ma 'ane mumugau ta 'ino he'ita 'ilobwaine. <sup>8</sup> Ma 'ane 'ino he'itao sahena tomota si'ahwa'ahwa 'abo'abowe, ma 'ino gwae bwebwe'adi 'adi hesagoha 'oinega 'a 'alehao sideba mwadina, 'idi 'ahwayali besobeso 'oidiyega.

<sup>9</sup> Topaihowao wete 'uhegwaedi ma 'idi babadao 'idi lina sihe'asisiyedi, ta 'idi paihowega si'abihe yaliyayadi, ma sahena silogwahata, <sup>10</sup> ta sahena yagaha. Ma hesi ma'idi he'asisi moisa taudi 'ada to'abihetena Yehoba tetelina si'abilatuhe 'idi paihowa 'ausalanega.

<sup>11</sup> Yehoba 'ina helauina 'ilatu pwaima tomota 'ada 'abihetena weyahina, <sup>12</sup> ta 'ihe'itae-gita ma mumuga besobeso ma nuwatuha galadi talogwahatedi, ma hesi tamiya mumuga bwebwe'adi ma dumwaludi 'oidiya. <sup>13</sup> Bewa tuta ma'ida yaliyaya 'ada to'abihetena Yesu Keliso tahemisae, tauna 'ida Yehoba waiwaina ma ma'ina wasawasa, ta 'ina hapwesa weyahina tayamwayamwa. <sup>14</sup> Tauna 'itagwaleya weyahida, ta 'i'amasabi 'abihetegita 'ida pui mabwaiyana 'oidiyega, ta 'i'abihe 'ehaugita, ta 'iboi 'ina boda 'oina 'ilagugita, ta 'ane 'ina paihowa bwebwe'adi 'oidiya taguibiga. <sup>15</sup> He'ita bewa 'uhe'itadi tomota 'oidiya, ma lina dumwaluna 'oinega 'ulohatotodi ma simumuga bwaibwaina. Ma sahena 'eta taiya 'igwae sinaligo.

## 3

<sup>1</sup> Wete 'uhenuwa lagudi ma 'asa 'ana toloinao 'idi lina 'oidiya sitagwaledi, ma sihematamatana, ta paihowa bwebwe'adi sipaihowadi. <sup>2</sup> Ta sahena 'ahwayali ma he'ahwa panapanawa, ma hesi tomota 'oidiya simumuga wahinuhega ma'idi he'asisi.

<sup>3</sup> Moisa tauda mwalo yauyauleida ta tologwahata hedada, 'oinega henuhenuwa ma yaliyaya besobeso nuwada si'ewa'ewa ma 'eda bwebwe'ana ta'ebesineya. Ma wete nuwanuwada lo'aleha ma he'ipi'ipi, 'oinega tomota tupwadi silo'alehegita, ma wete tauda talo'alehediya.

<sup>4</sup> Ta muliyetega Yehoba tauna 'ada To'abihetena 'ina helau ma 'ina 'atemuyamuya 'i'abilatuheya, <sup>5</sup> ta 'i'abihetegita, geya 'ida paihowa dumwaludi weyahidi, ma hesi tauna 'ina 'atemuyemuyega, 'oinega 'ina Yaluyaluwa Tabuna 'oinega 'ida pui 'ibuyodiya, ta 'i'abihe 'ehaugita, ta yawasida 'ehauna 'i'ebwaegita.

<sup>6</sup> Ma 'ada To'abihetena Yesu Keliso tauna 'oinega Yaluyaluwa Tabuna Yehoba 'isiweya 'ateda. <sup>7</sup> Ma tauna 'ina helauwega 'i'ahwa dumwaluwegita, 'oinega tanuwatuha yahiya 'abehega yawasida miyamiya hatayana taloba.

<sup>8</sup> Gwae bewa mabwaiyana gwae moisa, 'oinega 'uhewaiwai 'adi lohatoto 'oidiya, ma 'ane taudi Yehoba 'ana tohemisao gwaeyedi sihemisedi ma simuliyedi, ma paihowa bwebwe'adi sipaihowadi, bewa ginaula bwebwe'ana ta tomota 'adi 'ebelema.

<sup>9</sup> Ma he'ahwa lasalasa besobeso lina weyahidi, nana hali yaso sanidi weyahidi, bewa nata geya si'abihetegita, 'oinega 'u'ebesinedi.

<sup>10</sup> Ceguma taiya nuwanuwana 'i'ahwa lasalasa tomota 'oidiya 'uhegwae ma'aigeda bo maluwa ma 'ilolagu. Ceguma geya 'ilolagu walogwahate. <sup>11</sup> Weyahina 'ina nuwatuhu geya sidumwalu, ta tauna 'iboi 'isanapu ginaulaedi 'ipaipaihowadi galadi tuwa.

*Gwae 'ana 'ebelosaloha*

<sup>12</sup> Cabwa Atimasi bo Tikiko yahesumaneyawa 'oiuwa, 'oinega 'eguma 'itautayawa 'ulomwayamwayauma, weyahina nuwanuwagu gogai 'ana tuta taugu 'asa Nikopoli 'oina yamiyamiya.

<sup>13</sup> Loina 'ana tosanapu tauna Senasi ma wete Apolosa 'u'abihetedi, ta manima 'abiyadi 'uhesumanedi 'idi 'adau 'oina, ma 'ane ma'idi yaliyaya.

<sup>14</sup> Ta 'idi bodao mabwaiyadi 'uhe'itadi ma siguibiga, ta sawasawahidi tomiyamwau si'abihetedi, ma sahena simiyamiya daidaita.

<sup>15</sup> Cebwa ma'igu bodao 'ima helau 'oiuwa, ma 'iyadao Bada 'ana tomuliyao ba'idamwao wamiyamiya taudi wete 'ima helau 'oidiya. Yehoba 'ina 'abihetena mabwaiyami 'oimiya. Taugu Paulo.



## PILIMONI

### Pilimoni 'ina leta Paulo 'ileleya

Pilimoni tauna Yesu 'ana tomuliya 'aigeda, ma 'ina hewali 'aigeda sanina Onesimo 'idena sineya, ta muliyetega Paulo mahetena sihellobaloba tupwa Loma 'oina. Paulo Onesimoina Yesu tetelina 'ihe'iteya ta 'ihemiseya. Coinega Paulo Pilimoni 'ina leta 'ileleya ta 'abehega Onesimo 'itauye ma Pilimoni 'ihisili, ma Onesimo 'inuwasam, ta 'itohila 'ina hada.

#### *Loyauwedo*

<sup>1</sup> Yauwedo tasigu Pilimoni, 'owa Yesu Keliso 'ina topaihowa 'aigeda, gide taugu. Ma taugu Paulo deliya bo'i silagugauwa Yesu Keliso 'ina paihowa weyahina, ma bewa Timoti 'i'abihetega ta bewa 'ino leta 'aleleleyawa. <sup>2</sup> Ma 'ima helau mabwaiyami 'oimiya, 'owa ma nuhudai Apiya ma tasidai Alikipo, tauna ba'idada tahehetapewa Yesu Keliso 'ina paihowa weyahina, ma wete 'ima helau tohekalesiyao mabwaiyadi taudi 'ino hada silolotapwalolo 'oidiya. <sup>3</sup> Cida Bada Yesu Keliso ma Tamada Yehoba 'idi helauwega tuwa wamiya yaliyaya.

#### *Pilimoni mumugana bwebwe'ana*

<sup>4-5</sup> Wasau yahesagoha pwaiya beno 'ino helau ma 'ino hemisa 'ida Bada Yesu 'oina, ma 'ana tomuliyao mabwaiyadi wete 'oidiya, 'oinega tuta mabwaiyana 'igu 'ahwano 'oidiyega ma'igu loyauwedo, Yehoba 'oina weyahiu. <sup>6</sup> Nuwanuwagu ma 'ida he'iyaliyagu Keliso 'oinega 'ida 'abihewaiwaiyego ma wete ginaula mabwaiyadi bwebwe'adi Keliso 'oinega silatulutama 'uda sanapudi. <sup>7</sup> Tasigu, 'ino helauwega tohekalesiyao 'u'abihetediya ma 'adi lotohona 'i'abihe bwebwe'anya, ma 'ino helau ta wasau bwebwe'ana yahesagoheya, ta yayaliyaya madouna.

#### *Paulo nuwanuwana ma Pilimoni 'ida tagwale Onesimo 'oina*

<sup>8-9</sup> Nuwanuwagu ma helauwega ginaula 'aigeda 'upaihowa. Taugu Paulo, 'ino bada, ma deliya yamiyamiya Yesu Keliso weyahina, 'oinega sawasawahigu ma Keliso saninega yaloinego ma ginaulaina 'upaihowa, ma tuwa hesi, helauwega yahegwaego, <sup>10</sup> beno ya'ahwanoiyego natugu Onesimo weyahina, tauna 'ima miya deliya 'oinega ya'ahwa natuneya, 'ina hemisa Keliso 'oina weyahina.

<sup>11</sup> Mwalo loheyaina Onesimo 'ino paihowa 'oiuwa geya bwebwe'ana, ma bewa 'inuwabuiya ta 'ina paihowa 'oiguwa bwebwe'ana, ma wete yasanapuya mumugana weyahiu 'ibwebwe'ana pwaiya. <sup>12</sup> Coinega Onesimoina yahesumana hileyawa, ta ma'igu nuwagala, <sup>13</sup> weyahina nuwanuwagu yanuwahi ma tauna 'ihesuwahego ma 'i'abihetega 'igu miya deli 'oina. <sup>14</sup> Ma nata geya yanuwaniwahi, weyahina 'owa 'ana toloina. Ma wete nuwanuwagu 'ino tagwala 'oiguwa helauwega 'upaihowa ma sahena 'igu he'i'ima 'oinega.

<sup>15</sup> Nuwana bewa tauna huhuna ta Onesimo 'i'ebesinegowa tuta muhemuhena tuwa, ma 'eguma 'ihilawa nata ba'idau wamiya hataya. <sup>16</sup> Mwalo tauna 'ino topaihowa, ma sauga bewa geya 'abehega 'ihetopaihowamo, ma tauna wete ta'ahwa tasine Yesu Keliso 'oinega. Tauna bo'i ya'ahwa tasineya, ma 'owa 'ilobwainegowa ma 'u'ahwatasina moisa, weyahina tauna 'ino topaihowa ma wete tasiu 'ida Bada 'oinega.

<sup>17</sup> Pilimoni 'owa ma taugu ta'ahwa tasineya, 'oinega 'agu helau 'oiuwega, 'eguma yahapwesawa, gide wete Onesimo 'utoehila. <sup>18</sup> To'aha gide mwalo 'ina pui, nana 'ana haga 'ulagu, 'abwa taugu yahemaise. <sup>19</sup> Taugu Paulo bewa nimaguwega yalelelele 'abehega mabwaiyana yahemaise hegumwali. Ma hesi sahena 'a haga 'oiguwa weyahina yagwaegwae, beno mwalo taugu 'igu paihowega ta yaluyaluwau 'i'ehau pwaiya. <sup>20</sup> Cae tasigu, nuwanuwagu ma Keliso saninega Onesimo 'uhelauwe, ma 'ina pui 'unuwasam, beno 'abihetena madouna 'oiguwa, ma 'ane 'agu lotohona 'ibwebwe'ana mabwaiyana.

<sup>21</sup> Cigu nuwatuhu bewa yaleleyawa, ma'igu hemisa ma 'abehega 'igu gwaeyedi 'uhesago-hedi, ma 'umuliyedi, ma wete 'u'abihemadou.

<sup>22</sup> Ginaula 'aigeda wete nuwanuwagu, beno 'igu 'ebe'eno 'ino hada, 'u'atububu, weyahina yanuwatuhuya 'abehega 'ino 'ahwanoi Yehoba 'oina 'oinega ma muhemuhena ma deliyega silihasigau ta yatauyawa 'oiuwa.

<sup>23</sup> Epapila ba'idagu Yesu Keliso 'ina paihowa weyahina ta deliya silagumaiya, ma Epapilaina 'ina helau 'oiuwa. <sup>24</sup> Gide wete taudi ba'idagwao 'apaipaihowa: Maki ma Alisitako ma Dimasa ma Luke, 'idi helau wete 'oiuwa.

<sup>25</sup> Cida Bada Yesu Keliso tuwa yaluyaluwau 'ihehelauwe ma 'umiya bwebwe'ana. Taugu Paulo.

## IBELIU

### Melbeliu 'idi leta Yesu weyahina

Melbeliu, beno taudi meYudiya, taudi Yesu 'ana tohemisao, ma tupwadi sinuwahila lolina nugenugetaina 'oina. Cidi leta bewa Yesu 'ina lolina hauhauna weyahina, ta 'ihehe'ita 'abehega lolina 'ehauna lolina miyamiyaidi 'ihewaiwai sinediya, ta 'ilobwaineya ma meYudiya sitagwala moisa Yesu 'oina gide tubudiyao mwalo Yehoba sihemisaeya.

#### *Yehoba Natuna weyahina*

<sup>1</sup> Mwalohene hali tuta ma hali tuta 'oidiya, ta nuwatuhu baibaiwana 'oidiyega Yehoba 'ina gwae palopitao 'i'ebwaediya, ta taudi sihepwaileya tubudao 'oidiya. <sup>2</sup> Ma 'ebelosaloha tauda 'ida tuta 'ina gwaeyao 'ihepwailediya 'oida natuna 'oinega. Yehoba natunaina 'ihésinuweya, ma 'abehega ginaula mabwaiyadi 'oidiya 'ihetoloina, ta mwalohene natunaina ba'idana ginaula mabwaiyana sihemasalehediya. <sup>3</sup> Ma Yehoba natunaina tamana 'ina 'asilala 'i'asi'asilalae ta tauna Yehoba 'ana 'oleya gide. Ma 'ina gwae waiwaina 'oinega ginaula mabwaiyana galewa ma bale'uwa 'i'abi'abi yahidi. Ma 'ida puiyao 'oidiyega 'ibuyogita ma muliyetega 'imiyatoiya Yehoba Tomiyahane hedade 'ina 'ebeulanega. <sup>4</sup> Tauna aneloseyao 'imiyahane sinediya, ma saninaina Yehoba 'i'ebwaeya anelose sanidiyao 'imadou sinediya.

<sup>5</sup> Weyahina geya 'eta tuta Yehoba anelose 'eta 'oina 'ida gwae,  
“Cowa natugu, nige bo'i ya'ahwa natunegowa.”

Geya wete anelose 'eta weyahina 'ida gwae,

“Taugu 'oiguwa 'ida 'ahwatamana, ma tauna 'oina yada 'ahwanatuna.”

Gwaeyedi bewa natunamo weyahina 'igwaenediya. <sup>6</sup> Ma tutaina 'ina tautuwa 'ihésumaneyama bale'uwa, 'igwaeya,

“Aneloseyao galewa sawasawahidi ma tauna 'oina si'etuluha.”

<sup>7</sup> Ma hesi aneloseyao weyahidi 'ina gwae hagana, 'igwaeya,

“Yehoba 'ina aneloseyao 'ihemasalehediya, 'oinega 'idi tauya gide yaumai, ma 'ina topaihowaedi gide 'aiwe ninima.”

<sup>8</sup> Ma hesi natunaina weyahina 'igwaeya,

“Cowa Yehoba ma'ino lolina dumwaluna nata 'uloina hataya.

<sup>9</sup> Mumuga bwebwe'ana nuwau 'i'eweya ma galana 'a didiga. Coinega 'ino Yehoba bo'i 'ihéholoigowa yaliyaya moisa 'oinega, ta 'ino yaliyaya 'iyamwao 'idi yaliyaya 'imadou sinediya.”

<sup>10</sup> Ma 'aigeda wete 'ina gwae natunaina 'oina 'igwaeya,

“Bada yo, tuta nugeta 'oina bale'u 'uhemasaleheya ma nimauwega galewa 'upaihoweya.

<sup>11</sup> Ginaulaedi 'abwa silohesa hesawala ma 'owa 'umiyamiya, ma ginaula mabwaiyadi sihemiyamiya gide 'wama, <sup>12</sup> ma 'unupilidi gide 'ale'o, ta 'adi 'ita 'i'egibui, ma 'owa geya'abwa 'ugibugibuigo ta hesi 'umiya hataya.”

<sup>13</sup> Ma hesi, Yehoba geya 'aigeda wete anelose 'oina 'ida gwae,

“Cigu 'ebeulega 'umiyatoi ma 'ana siga 'a 'alehao yalagu dobihedi 'aeu gabulena.”

Ma bewa gwaeina natunamo 'oina 'igwaeneya.

<sup>14</sup> Ta anelose taudi yaluyaluwa tuwa ma tohalewasa, taudi Yehoba 'ilagudiya ta 'abehega si'abihetegita tauda taiyawedi 'eguma 'abihetena weyahina 'ihésinuwanegeta.

## 2

#### *Cabihetena Yehoba 'oinega*

<sup>1</sup> Coinega sawasawahida ma gwaeyedi tahesagohediya tanuwatuhu yahidi, ma sahena tanuwanuwa naidedi.

<sup>2</sup> Mwalo aneloseyao Yehoba 'ina gwaie sihepwaileya tomota 'oidiya, ma gwaieina gwaie moisa, 'eguma tomota geya sida muliyediya, beno 'idi pui, ta 'ana maisa silobeya. <sup>3</sup> Tauda wete 'eguma 'abihetenaina madounaina talogwahate, bwa'omatana taloba, ta geya sawasawahina tadenasine.

Gwaieina 'abihetenaina weyahina 'ida Bada Yesu 'ihepwaila nugeteya, eeta 'ina gwaeyao 'ana tohesagoha nugetao si'ebwaegita tauda.

<sup>4</sup> Ma Yehoba wete 'ihe'ita 'abehega gwaieina gwaie moisa, beno 'ila'ilala ma hedehedede ma paihowa waiwai 'oidiyega, ta wete Yaluyaluwa Tabuna 'ina heguyai 'oida 'oinega. Ma 'ina 'eheleyedi Yehoba 'ina nuwatuhi gide, ta Yaluyaluwa Tabuna ginaulaedi 'oida 'iheguyaiyediya.

#### *Cada To'abihetena 'ina muyamuya*

<sup>5</sup> Cahegwaie pwaigomiya tupwaina 'abwa taloba weyahina, ta Yehoba aneloseyao sahena 'idi lolina 'i'ebwa'ebwaedi tupwaina 'oina, <sup>6</sup> ma hesi tomota 'aigeda 'i'ebwaeya, weyahina Buki He'asisi 'oina 'ihepwaila 'igwaeya,

“Yehoba yo, to tomota tauna ta 'oinega weyahina 'unuwanuwatuhi? Ma taiya hede tomota natuna tauna 'u'ita'itayahi? <sup>7</sup> Coinega tuta to'uto'upanamo weyahina 'ulagu suluheya, aneloseyao gabulediya ma muliyetega 'ana 'amayaba ta 'ana hepwtu madouna 'u'ebwaeya. <sup>8</sup> Ma waiwai wete 'u'ebwaeya ma ginaula mabwaiyadi 'iloinedi.”

Ma 'ina 'ebeloina ginaula mabwaiyana 'oidiya 'iloina, ta hesi geya sauga bewa, 'abwa hesi 'ihetoloina ginaula mabwaiyana 'oidiya. <sup>9</sup> Ma hesi Yesu ta'ita pwaiya, beno tuta to'uto'upanamo 'oina 'imiyasuluwa aneloseyao gabulediya ta muliyetega 'ana 'amayaba ta 'ana hepwtu madouna 'ilobediya 'ina muyamuya ma 'ina 'amasa 'oidiyega. Beno Yehoba 'ina helau 'oida, weyahina Yesu 'amasa 'ana muya 'ilotohoya mabwaiyada weyahida.

<sup>10</sup> Yehoba ginaula mabwaiyadi 'ihemasalehediya tauna 'iboi weyahina, eeta nuwanuwana natunao baibaiwadi 'itoedima tauna 'ina tupwa wasawasa 'oina. Cilobwaineya ma Yehobaina 'ada To'abihetenaina 'i'abihe 'asilale. Bewa lamuna muya madouna 'ilotohoya, ma hesi tuwa 'i'alama'i'ita, ta 'oinega mumugana mabwaiyana dumwadumwaluna.

<sup>11</sup> Yesuina 'ada To'abihetena ma tauda 'i'abi 'ehaugita, ta tauna ma tauda Yehoba 'oinega tanaoma, 'oinega geya'abwa Yesu 'ihemwadimwadina weyahida, ta hesi 'i'ah-wa'ahwa tasinegita, <sup>12</sup> weyahina 'ina gwaie tamana 'oina, 'igwaeya, “Saniu nata yahepwaile tasigwao 'oidiya, ma 'eto'auta 'alona yahepwatuwego.”

<sup>13</sup> Ta wete 'igwaeya,

“Yehoba 'oina 'igu hemisa yalagu.”

Ta wete 'igwaeya,

“Gwagwamaedi Yehoba 'i'ebwaegauwa ba'idagwao 'ebwa 'amiyamiya.”

<sup>14</sup> Moisa tuwa, Yesu 'ina gwagwamao tauda tomota mahesiyoda ma mabweyahida, 'oinega Yesu wete 'iheloheya ta loheya wahina 'i'eweya ma 'i'amasa, ma 'abehega 'ina 'amasega Tomudulele 'ilohesawali, ma Tomuduleleina 'ina lolina 'amasa weyahina 'ilohesawaliya. <sup>15</sup> Ta wete 'amasa 'ana matauta 'ana pai waiwaina 'ida tuta mabwaiyana 'oidiyega 'i'abihetegita.

<sup>16</sup> Cabiheteina geya aneloseyao weyahidi ta hesi tauda Ebalahamo tubunao weyahida.

<sup>17</sup> Coinega Yesu 'iheloheya tauda tasinao gide, ta 'ihetopwaoli madouna ma'ina 'ate-muyamuya weyahida, ma Yehoba 'ina paihowa 'oina 'ihetapewa, ta 'ipwaoliyeya 'ida mumuga galadi weyahidi ta 'abehega Yehoba 'inuwasamudi.

<sup>18</sup> Ta wete Yesu bale'uwa miyamwau ta 'ebetohona baibaiwana 'ilobediya, 'oinega 'eguma Tomudulele 'itohogita Yesu 'ebetohowedi 'isanapu pwaidiya, ta sawasawahina 'oidiyega 'i'abihetegita.

## 3

*Yesu Mosese 'ilohane sineya*

<sup>1</sup> Ciyagwao, 'omi ma taugu Yehoba 'ihésinuwegita 'ina tupwa weyahina, 'ilobwaineya ma Yesu tanuwatuhuyahi, weyahina tauna 'ida tapwalolo 'ana tohepwaila ta wete 'ida topwaoli madouna, <sup>2</sup> ta 'ihetapeweya 'ina paihowaina Yehoba 'i'ebwaeya, gide mwalona Mosese 'ihehetapewa 'esa Yehoba 'ina hada 'oina.

<sup>3</sup> Coinega Yesu hepwatu madouna 'ilobeya, ta Mosese 'ana hepwatu tupwanamo tuwa, hesi gide tuwa hada bwebwe'ana, geya hene hepwatu madouna 'ida lobeya, ma hesi 'ana to'abi. Ta Moseseina gide hada, ta Yesu to'abi.

<sup>4</sup> Moisa, hada 'aigeda 'aigeda 'adi to'abi simiyamiya, ta ginaula mabwaiyadi 'adi topaihowa Yehoba.

<sup>5</sup> Moseseina Yehoba 'ina hada 'ihehetapewa, topaihowa gide, ta Yehoba 'ina gwaeyao ginaulaedi 'abwa silatu weyahidi 'ihewaila latuhediya. <sup>6</sup> Ma 'iyamo Keliso Yehoba 'ina hada 'ihetapewa, geya topaihowa gide, ta hesi tauna natuna moisa. Tauda taboi Yehoba 'ina hadaina tuwa, 'eguma tahemisa hataya ma'ida 'atepatu ta ma'ida yaliyaya.

*Yehoba 'ana bodao tahe'aiyawasi*

<sup>7</sup> Coinega Yaluyaluwa Tabuna 'ihégwaegita 'igwaeya, “Nata, 'eguma 'enana wahesagohe, <sup>8</sup> sahena wadebadeba pa'ala gide tubumiyao mwalo hene yoho 'awawa 'oina sitohogauwa ta 'igu loina silogwahatediya. <sup>9-10</sup> Weyahina bolime poti 'oidiya 'igu paihowa waiwaiidi baibaiwadi si'itediya, ta tubumiyaowedi 'idi lomugiyega sitohogauwa ta weyahidi ya'ala'i'iwasa, ta yagwaeya, ‘Tuta mabwaiyana taudi 'idi nuwatuhuwega sitautauya pui, weyahina 'igu 'eda geya sisanapu.’ <sup>11</sup> Coinega yagamwasowalediya ta yaloina pa'alediya, yagwaeya, ‘Sahena wete 'igu 'ebe 'aiyawasi 'oina siluhuluhu.’”

<sup>12</sup> Ciyagwao, wa'itayahigomi ma sahena wadebadeba pa'ala nuwana walolopui, 'amuge ta Yehoba mayawasina wamiyasine.

<sup>13</sup> Ma bewa tuwa waboimimo walemalema sabwelo 'aigeda 'aigeda 'oidiya, ta 'oinega sahena mumuga galana 'i'abowegomi ta Yehoba 'enana walogwahate.

<sup>14</sup> Tauda mwalo 'ida hemisa Keliso 'oina talaguya, ma 'eguma 'ida hemisaina ta'abiyahi bwaibwaini ma 'ana siga tuta 'ana 'ebelosaloha 'oina, Keliso ba'idadai tayaliyaya mahemahetena. <sup>15</sup> Gide Buki He'asisi 'ina gwae 'igwaeya, “Nata 'eguma Yehoba 'enana wahesagohedi, sahena wadebadeba pa'ala gide tubumiyao mwalahene 'igu loina silogwahateya.”

<sup>16</sup> Taiyawedi Yehoba 'ina gwae sihesagoheya ta silogwahateya? Taudi Mosese Itipita 'oinega 'ihanugetediya ta silatuma, 'awa?

<sup>17</sup> Taudi weteyage bolime poti 'oidiya 'idi mumuga galadi weyahidi Yehoba 'i'ala'i'iwasa, 'oinega togalaedi yoho 'awawa si'ama'amasa hegumwala.

<sup>18</sup> Weyahina taudi 'ina gwae geya simuliye, 'oinega 'adi gwae 'igwaeya, “Geya'abwa wete 'igu 'ebe'aiyawasi 'oina siluhuluhu.”

<sup>19</sup> Coinega tasanasanapu 'abehega taudi geya sida luhuwa, weyahina geya sihemisa.

## 4

<sup>1</sup> Cina gwae hemisaina 'abwa 'imiyamiya 'abehega 'ina 'ebe 'aiyawasi tauna 'oinega taloba, eeta 'ilobwainegita ma tamatauta 'amuge ta tupwami wabe'u ma sahena walobaloba.

<sup>2</sup> Moisa, wasaina 'i'ebwaegita, taudi wete mwalahene 'i'ebwaediya, ta wasaina geya 'ilemedi, weyahina sihesagoheya ta geya sihemise. <sup>3</sup> Ma tauda 'ana tohemisao talobeya, ma hesi taudi mwalahene geya sida lobeya, weyahina geya sihemise, ta Yehoba 'adi gwae 'igwaeya,

“Yagamwasowalediya 'oinega yagwae pa'alediya ta sahena 'ebe 'aiyawasi 'oiguwega silobaloba.”



Yehoba 'ina 'ebe 'aiyawasiina 'imiyamiya, weyahina tutaina bale'u mabwaiyana 'ihemasalehediya ta 'igumwala, ta 'oinega 'i'aiyawasiya. <sup>4</sup> Ta sabweloina 'i'aiyawasiya, weyahina Buki He'asisi 'oina 'ihewpaila pwaiya, 'igwaeya,

“Yehoba sabwelo hesebenina 'oina 'ina paihowa mabwaiyana 'oinega 'i'aiyawasiya.”

<sup>5</sup> Coinega tanuwanuwatuhu gwae bewa weyahina,

“Sahena 'ebe'aiyawasi 'oiguwega silobaloba.”

<sup>6</sup> Moisa, 'ebe 'aiyawasiina 'imiyamiya, ta tupwadimo 'abehega siloba, ma hesi taudi wasa sihesagohe nugeteya, ta loina sisinaliya, 'oinega sahena silobaloba. <sup>7</sup> Eeta Yehoba tuta hauhauna 'ilaguya ma 'oina tomota 'ebe 'aiyawasi siloba, ta 'oinega sanapu 'i'ebwaeya Debida 'oina ta Debidaina 'igwaeya,

“Nata hesi 'eguma Yehoba 'enana wahesagohe, sahena wadebadeba pa'ala.”

<sup>8</sup> Ta 'ebe 'aiyawasiina Yehoba 'igwaeneya geya Yosuwu ma 'ana bodao 'idi 'ebe 'aiyawasi, ta hesi hali 'ebe 'aiyawasi, beno tuta 'aigeda hauhauna 'ilaguya ma 'abehega tomota 'idi 'ebe 'aiyawasiina siloba. <sup>9</sup> Coinega Yehoba 'ina tomota tauda 'ida 'ebe 'aiyawasi 'imiyamiya, ta 'ebe 'aiyawasiina Sabati 'ana 'aiyawasi gide. <sup>10</sup> Eeta 'eguma taloba, tauda 'ida paihowega ta'aiyawasi, gide Yehoba mwalo 'ina paihowega 'i'aiyawasi 'esa.

<sup>11</sup> Ma 'ilobwainegita ma tatoho waiwai 'abehega 'ebe 'aiyawasiina taloba, ma sahena 'aigeda taiya 'ilologwahata, 'amuge ta 'ibe'u, taudi gide mwalo sibe'u 'esa.

<sup>12</sup> Moisa, Yehoba 'ina gwae mayawasina ta waiwaina gide 'elepa 'aleha 'ina matamatagi matupwa luwaluwana, ta sawasawahina 'ibadigita 'aloda moisa, beno nuwatuhu ta mumuga dahwanedi simiyamiya. <sup>13</sup> Weyahina Yehoba matana geya 'eta wete to'aha 'imiya dahwana, mabwaiyana silo'atamanediya, ta tauna 'oina 'abwa 'ida paihowa mabwaiyana tahepwaileidi.

#### *Cida Topwaoli Madouna tauna Yesu*

<sup>14</sup> Cida Topwaoli Madouna ma 'ausalana 'imiyamiya, tauna Yesu, Yehoba Natuna, weyahida 'ihane pwaiya galewa, 'oinega 'ida hemisa 'oina ta'abiyahi momosi. <sup>15</sup> Tupwadi topwaoliyao geya sida 'atemuyamuyaegita 'ida we'a weyahidi, ta hesi Yesu 'ida miyamwau 'inuwa sabwalenidiya ta 'i'atemuyemuyegita, weyahina mwalo bale'uwa Tomudulele 'ina 'ebetoho mabwaiyana 'ilobediya gide tauda talobaloba 'esedi, ta Yesu geya 'eta wete 'ina pui. <sup>16</sup> Coinega ma'ida 'atepatu tanao ma ta'ahwanoi 'ada toloinaina 'oina, ta 'oinega 'ida miyamwau 'oidiya 'i'atemuyemuyegita, ta wete 'i'abihetegita.

## 5

<sup>1</sup> Topwaoliyao madoudi Yehoba 'ihesinuwediyaya ta 'ilagudiya, ma tauna matana sipwaopwaoli tomota 'idi mumuga galadi weyahidi. <sup>2</sup> Topwaoliyedi 'idi mumuga nuhana tomata'u'upao ma topuiyao 'oidiya, weyahina topwaoliyedi tomota tuwa, ma'idi we'a. <sup>3</sup> Coinega taudi 'idi puiyao weyahidi ta wete tomota baibaiwadi 'idi puiyao weyahidi sipwaopwaoli Yehoba 'oina.

<sup>4</sup> Geya sawasawahina ma 'aigeda taiya tauna 'ina nuwatuhuwega 'ihetopwaoli, ta Yehoba hesi 'ina hesinuwega, gide mwalo Yehoba Eloni 'ihesinuweya ta 'ihetopwaoli.

<sup>5</sup> Wete gide Keliso geya taunamo 'ida 'abilagasiya ma 'ihetopwaoli, ta Yehoba 'ihesinuweya ta 'ihewgaeya, 'igwae,

“Cowa natugu. Nige bo'i ya'ahwa natunegowa.”

<sup>6</sup> Ta wete 'ina gwae heluwena, 'igwaeya,

“Cowa 'uhetopwaoli hataya gide Melikisedeki.”

<sup>7</sup> Mwalo Yesu bale'uwa 'imiyamiya ma'ina dou 'i'ahwa 'ahwanoyiya Tamana 'oina, ta nuwanuwana 'amasega 'i'abihete, 'oinega 'i'abiheteya weyahina Yesu Tamana 'ihe'asisiyeya. <sup>8</sup> Yesuina Yehoba Natuna, ta hesi tuwa muyamuya 'ilobeya ta 'ina 'alama'i'itega 'ihematamatana moisa, <sup>9</sup> ta 'oinega 'ina mumuga mabwaiyana dumwaluna. Tauda wete 'eguma tahematamatane 'abihetena hataya Yesuina 'oinega taloba, <sup>10</sup> weyahina Yehoba Yesu 'ihesinuweya ma 'ihetopwaoli hataya gide Melikisedeki.

*Sahena Yehoba talologwahate*

<sup>11</sup> Nuwatuhi bewa weyahina gwae baibaiwana simiyamiya, nuwanuwagu ma ya-hepwailedi 'oimiya, ta geya sawasawahina, weyahina tenami tuituidi. <sup>12</sup> Tuta bewa 'ilobwainegomiya ma hali tomota 'oidiya wahe'ita, ta geya sawasawahimi, weyahina Yehoba wasana huhuna geya wasanapu, 'oinega 'abwa 'ahehe'itegomi. Comi susumo 'ilobwainegomiya weyahina 'e'ahai pa'alina geya 'ilobwainegomi. <sup>13</sup> Coinega 'omi gide gwagwama, 'eda dumwadumwaluna geya nuwami 'isabwalena moisa, eeta 'ilobwainegomiya ma he'ita nuhana 'oinega 'ahe'aigomi nugeta.

<sup>14</sup> Ta 'eguma taiyawedi 'idi sanapu 'imatuwa, taudi gide 'e'ahai pa'alina 'ana to'aiyao, weyahina nuwadi 'isabwalena pwaiya, ta sawasawahidi sihesinuwa to'aha 'ausalana ma to'aha galana.

## 6

<sup>1</sup> He'ita nugenugeta Keliso weyahina wahesagoha pwaidiya ta wasanapudiya, 'oinega nuwanuwagu sanapu hauhaudi Keliso weyahina yahe'itegomi ta 'imi nuwatuhi 'oidiya waheloheya. He'itaedi tahesagoha pwaidiya ta tasanapudiya sahena talolo-hilahiladi. He'itaedi bewa: 'ida mumuga mwalo galadi 'adi logwahata, 'ida hemisa Yehoba 'oina, <sup>2</sup> babilitaiso 'ana he'ita, ta wete 'ada tohanugetao nimadi 'adi lagu debada, ma to'amasa 'idi toholo hila, ma gala 'ana maisa hesilae hataya. He'itaedi wasanapu pwaidiya.

<sup>3</sup> Ceguma Yehoba 'itagwala, sanapu nugenugeta wa'abiyahidi ta 'adi loheposeyana wete yahe'itegomi.

<sup>4</sup> Weyahina taiyawedi mwalo Yehoba weyahina nuwadi 'isabwalena, ta helauina galewega silotohoya, ta Yaluyaluwa Tabuna 'ina 'abihetena 'oidiya silotohoya, <sup>5</sup> ta wete Yehoba 'ina gwae silotohoya 'abehega 'ausalana, ta 'ina waiwai tuta 'inaonaoma weyahina wete silotohoya, <sup>6</sup> ma 'eguma muliyetega sibe'u, geya sawasawahina ma ta'abihe nuwabui hiladi, weyahina taudi 'idi mumugega Yehoba Natuna si'abihe kelose hileya ta sanina siheginula besobesoweya.

<sup>7</sup> Tanoha weyahina tanuwatuhi. Ceguma 'idohi hilahila, 'oinega bale'u 'i'abihegogai, ma hewana ma'ina yaliyaya 'ibwalabwala, beno tobegula 'ina 'ebeyaliyaya, ta 'ana sanapu 'abehega bale'uina Yehoba 'igwae helauweya. <sup>8</sup> Ta hesi 'eguma bale'uina 'oina 'awata ma talitali sibwala, bale'uina ma'ana heliya Yehoba 'oinega, ta tuinenamo 'ilobwaineya.

<sup>9</sup> Ma 'iyagwao 'igu gwae bewa henuwalagu tuwa, ta yanuwatuhi yahiya helauwega 'abehega 'omi Keliso 'ina 'abihetena 'ana to'ewao wahewaiwai moisa. <sup>10</sup> Yehoba 'ina lolina 'oimiya dumwaluna, 'oinega 'imi paihowao geya'abwa 'inainaidedi, beno 'imi helauwao ta 'imi lemao Yehoba saninega, tohekalesiyao 'oidiya, mwalo ta 'ana siga nige bewa. <sup>11</sup> Coinega nuwanuwagu ma 'omi 'aigeda 'aigeda wahetapewa ta 'abehega 'abwa muliyetega 'imi hemisa huwaina mabwaiyana waloba. <sup>12</sup> Sahena walologwahata, ma hesi tomotaedi wahe'au'aunawedi, taudi ma'idi 'alama'i'ita sihehemisa, ma 'oinega ginulaedi Yehoba 'igwae hemisaediya si'ewadi.

*Yehoba 'ina gwae hemisa*

<sup>13</sup> Mwalo hene Yehoba 'ina gwae hemisa Ebalahamo 'i'ebwaeya, ta Yehoba tauna saninega 'igwae hemisa, weyahina geya 'aigeda wete sani miyamiya hanena ma 'oinega 'igwae hemisa. <sup>14</sup> Ta 'ina gwae hemisaina bewa:

“Ya'abihetego tuta baibaiwana, ma tubumwao 'iyada.”

<sup>15</sup> Ma Ebalahamoina 'i'alama'i'ita tuta dudulena, eeta gwaeina huwaina 'ilobeya.

<sup>16</sup> Tauda tomota tagwaegwae hane bo ta'eta'wata'watalulu 'aigeda sani madouna 'oinega, ta 'abehega tomota si'ahwa moisegita. <sup>17</sup> Yehoba gide nuwanuwana madouna 'ina gwae moisa tauda 'ihe'itegita 'abehega to'aha 'igwae hemisaeya 'oida 'abwa taloba, 'oinega tauna saninega 'i'eta'wata'waluluwa. <sup>18</sup> Ginula waiwaidi 'eluwaedi miyamiya hatayadi, beno Yehoba 'ina gwae hemisa ma 'ina 'eta'wata'walulu. Coinega tasanapuya 'abehega Yehoba geya 'eta tuta 'i'abo. Weyahina tauda bo'i Yehoba 'oina tadena ta

'i'abihetegita, 'oinega ta'atepatu ma tanuwatuhuyahi 'abehega 'ina gwae hemisa 'oida geya'abwa 'i'ebe'ebesinegita.

<sup>19</sup> Cida nuwatuhu yahinaina gide 'ida loho waiwaina, ta 'oinega 'ale'o biliupa taluhubwale ma taluhu Yehoba 'ina 'ebemiya 'oina. <sup>20</sup> Nage 'oina Yesu 'iluhu nugeta pwaiya weyahida, ta 'ihetopwaoli madouna ma miyamiya hatayana weyahida, gide Melikisedeki mwalo hene.

## 7

### *Topwaoli Melikisedeki*

<sup>1</sup> Ma Melikisedekiina meSalema 'idi kini, ta Yehoba Tolohanena moisa 'ina topwaoli. Mwalo hene Melikisedekiina Ebalahamo 'ilobeya, tutaina lo'aleha 'oinega 'ihilama. Ta Ebalahamoina toloinao baibaiwadi ma 'adi bodao 'ipe'udiya, 'oinega Melikisedeki gwae hemisa bwebwe'ana 'i'ebwaeya Ebalahamo 'oina. <sup>2</sup> Coinega Ebalahamo 'ina tobwatobwa 'iwatahidiya he'une 'adi baibaiwa nima luwaluwa, ta he'une 'aigeda Melikisedeki 'i'ebwaeya ta Ebalahamo tauna naeni 'i'ewediya. Ta Melikisedeki sanina 'ana gibui “Toloina dumwaluna,” ta 'ina tupwa sanina Salema, 'ana bui “Daumwala,” 'oinega tasanasanapu 'abehega Melikisedeki tauna 'ina loina daumwalina.

<sup>3</sup> Melikisedekiina geya tamanamo ta geya sinanamo, ma wete geya 'ina susumo ta 'ina li'u ma 'ina 'amasa geya 'adi tosanapumo, ma hesi gide tuwa Yehoba natuna 'ihetopwaoli hataya Yehoba 'oina.

<sup>4</sup> Moisa, Melikisedekiina 'aigeda bada lohanena, ta Ebalahamo 'ilohane sineya, weyahina Ebalahamo 'ina tobwatobwa 'oinega tupwana 'i'ebwaeya Melikisedeki. <sup>5</sup> Ta topwaoli taudi Libai 'ina bodao si'ewa'ewa 'idi tobwatobwa tupwana tauda Ebalahamo tubunao 'oidega. Taudi ma tauda susu 'aigeda, ta hesi 'adi loina 'imiyamiya sowaswana tobwatobwa si'ewa'ewa 'idi tomota 'oidiyega.

<sup>6</sup> Melikisedeki hali susu, ta 'ina miya lohanenamo, 'oinega tobwatobwa tupwana 'i'eweya Ebalahamo 'oinega. Coinega wete Melikisedeki 'ina gwae hemisa Ebalahamo 'i'ebwaeya. Ebalahamoina loheya madouna, weyahina mwalo Yehoba 'ina gwae hemisa 'i'ebwaeya, <sup>7</sup> ta hesi Melikisedeki Ebalahamo 'ilohane sineya, weyahina taudi sanidi madouna 'idi gwae hemisa si'e'ehete tomota taudi sanidi 'i'iudi 'oidiya, 'oinega wanuwatuhuyahi 'abehega Melikisedeki 'ina gwae hemisa 'i'ebwaeya Ebalahamo 'oina.

<sup>8</sup> Bewa tuwa Libai 'ina bodao 'ida tobwatobwa tupwana si'ewa'ewa. Taudi tomota tuwa 'ama'amasidi, ta hesi Melikisedeki wasana 'abehega tauna miyamiya hatayana. <sup>9</sup> Bewa tuwa 'ida tobwatobwa tupwana ta'e'ehete Libai tubunao 'oidiya, ta mwalo 'ana 'ita gide Melikisedeki 'ina tobwatobwa tupwana 'i'eweya Libai 'oinega, <sup>10</sup> weyahina Libai 'abwa tubuna Ebalahamo 'alona, saugaina Ebalahamo Melikisedeki 'edai 'ilobeya, ta 'ina tobwatobwa tupwana 'i'ebwaeya.

<sup>11</sup> Libai tubunao taudi 'idi paihowa beno Yehoba 'ina loinao me'isileli tauda sihe'itegita, ta loina geya sawasawahina 'i'abihedumwalu bwaibwainigita, 'oinega nuwanuwada 'aigeda topwaoli hauhauna ma 'i'abihe dumwalugita, topwaoliina gide Melikisedeki, ma geya Eloni matubunao gide. <sup>12</sup> Eeta 'eguma topwaoli hagana talagu, loina wete hagana talagu.

<sup>13</sup> Tasanapuya 'abehega Keliso tauna 'ida topwaoli hauhauna, geya Libai 'ina susuwega 'inaoma, <sup>14</sup> ta hesi Yuda 'ina susuwega 'inaoma, taudi geya hesinuwa siloba Mosese 'oinega ma sihetopwaoli.

<sup>15</sup> Coinega 'ida topwaoli hauhauna gide Melikisedeki. <sup>16</sup> Geya Mosese 'ina loinega 'ihetopwaoli, ta hesi yawasina miyamiya hatayana ma waiwaina 'oinega. <sup>17</sup> Tauna Yesu, ma weyahina Buki He'asisi 'igwaeya, “Cowa 'uhetopwaoli hataya, gide Melikisedeki.”

<sup>18-19</sup> Moisa, Mosese 'ina loinao geya sawasawahidi ma 'aigeda to'aha si'abihe dumwalu bwaibwaini. Coinega loina nugenugeta ta'ebesineya, weyahina we'ana, ma 'oinega

hemisa hauhauna ta bwebwe'ana 'ilatuma, ta hemisaina 'oinega Yehoba 'oina talohoho.  
<sup>20</sup> Ta tauda 'ida hemisa Keliso 'oina 'imiyamiya.

Yehoba mwalo Kelisoina 'oina 'i'eta'wata'walulu, ta 'igwae hemisaeya, ma hesi topwaoliyao nugenugeta geya gwae hemisa Yehoba 'oina siloba. <sup>21</sup> Ta Yesumo weyahina 'igwaeya,

“Bada 'igwae hemisa pwaiya ta 'owa 'uhetopwaoli hataya, ma 'ina gwae hemisaina geya'abwa 'iligeligehi.”

<sup>22</sup> Coinega Yesu 'ina loina hauhauna tasanapu bwaibwainiya 'abehega loina miyamiyaina 'ibwebwe'ana sineya.

<sup>23</sup> Mwalo topwaoli nugenugetaidi baibaiwadi sipaipaihowa 'ana siga si'amasa ta muliyetega hauhaudi sihemiyalaenedi. <sup>24</sup> Ta hesi Yesu tauna 'ida topwaoli hataya, 'oinega geya 'ana miyalaenam. <sup>25</sup> Yesuina tuta mabwaiyana sawasawahina 'i'abihetegita 'eguma 'ana hemisega taluhu Yehoba matana, weyahina Yesu miyamiya hatayana, ta tuta baibaiwana weyahida 'i'ahwa'ahwanoi Yehoba 'oina.

<sup>26</sup> Moisa, Yesuina sawasawahina ma 'ihetopwaoli weyahida, weyahina tauna mumugana mabwaiyana 'ausalana tuwa, ta geya gide togala tauda, 'oinega Yehoba Yesuina 'i'abilagasiya ta galewa 'ana tomiyao 'ilohane sinediya.

<sup>27</sup> Ta topwaoliyao nugenugetaidi sabwelo 'aigeda 'aigeda Yehoba 'oina sipwaopwaoli, taudi 'idi puiyao, ma tomota wete 'idi puiyao weyahidi. Ta hesi Yesu ma'aigedamo wahina 'itagwaleya ta 'ipwaoliyeya Yehoba 'oina weyahida.

<sup>28</sup> Tuta nugenugetaidi 'oidiya Mosese 'ina loinega tomota we'awe'adi sihetopwaoli madouna, ta muliyetega Yehoba 'ina gwae hemisa 'oinega Natuna 'ihetopwaoli, ma tauna mumugana bwebwe'ana miyamiya hatayana.

## 8

### *Loina hauhauna 'ilatu pwaima*

<sup>1</sup> Cigu gwae mabwaiyana huhuna bewa 'abehega 'ida Topwaoli Madouna, bewa tuwa 'imiyamiya galewa Tolohaneina 'ina wagahata wasawasa 'ebeulanega. <sup>2</sup> Ma tauna 'ihetopaihowa Yehoba 'ina hada moisa 'oina. Hadaina tomota geya si'abi, ta hesi Badaina 'i'abiya.

<sup>3</sup> Bale'u 'ana topwaoliyao mabwaiyadi 'idi paihowa beno 'ehele ma pwaoli si'ebwa'ebwae Yehoba 'oina, 'oinega 'ida topwaoliina hauhaunaina 'ilobwaineya ma tauna wete 'aigeda 'ehele 'i'ebwae Yehoba 'oina. <sup>4</sup> Ma tauna 'eguma bale'uwa 'imiyamiya geya'abwa 'ihetopwaoli weyahina topwaoli baibaiwadi simiyamiya, ta tuta mabwaiyana sipwaopwaoli, gide Mosese 'ina loina 'igwae 'esa ta 'abehega 'ehele si'ebwae Yehoba 'oina.

<sup>5</sup> Ma 'idi 'ebe pwaoliina Hada He'asisi 'alona, Yelusalema 'oina. Ma Hada He'asisiina 'ebe'ita bo ma'ama'ayau tuwa, ta hesi Hada He'asisi moisanaga galewa 'imiyamiya. Weyahina mwalahene Mosese geya Hada He'asisi nugenugeta 'i'abiya ta muliyetega Yehoba 'ihenuwa laguweya 'igwaeya,

“Mosese, 'unuwatuhuyahi hadaina 'ana 'ita mabwaiyana yahe'ita pwaigowa 'oyai, mabwaiyana 'uhe'au'aunawe, ta 'igu Hada He'asisiina 'u'abi.”

<sup>6</sup> Ma bewa tuwa Keliso 'ina paihowa, paihowa miyamiyaina 'ibwebwe'ana sinediya, gide wete 'ina loina, loina nugenugetaidi 'ibwebwe'ana sineya, weyahina 'ina loina gwae hemisa hauhauna 'oinega 'ilatuma. Ta gwae hemisaina, gwae hemisa nugenugetaidi 'ibwebwe'ana sineya.

<sup>7</sup> Ceguma loina miyamiyaina tomota mabwaiyadi 'i'abihetediya, sahena tanuwanuwatuhu loina hauhauna weyahina. Ma geya 'ilemedi, 'oinega hauhauna nuwanuwada. <sup>8</sup> Mwalohene Yehoba 'isanapuya 'abehega me'sileli 'idi mumuga geya bwebwe'ana, 'oinega weyahidi 'igwaeya,

“Cabwa loina hauhauna yalagu me'sileli ma meYuda weyahidi.

<sup>9</sup> Geya gide loina yalaguya tubudiyao weyahidi, tutaina mwalo yahanugetaidi ta Itipita 'oinega silatuwa ta sitauya taudi 'idi tupwa. Weyahina loina yalaguya

siligehiya, 'oinega nimagu 'oidiyega yalisi'eweya! <sup>10</sup> Bada wete 'igwaeya, 'igwae, 'Cabwa 'igu laina hauhauna melsileli nuwadiya yalagudi ma 'atediya yaleledi, ta 'oinega taugu 'idi Yehoba ma taudi 'igu tomotaiyao. <sup>11</sup> Coinega geya sawasawahina ma tasidiyao sihe'itadi, nuwana sigwae, "Yehoba wada sanapu," weyahina mabwaiyadi sisanapu pwaigauwa, taudi sanidi madoudi ta wete taudi towewelohe. <sup>12</sup> Eeta ya'atemuyamuyaedi, ta 'idi mumuga galadi yanuwamudi ta yanuwanaidedi.'"

<sup>13</sup> Yehoba laina hauhauna 'ilaguya weyahina laina miyamiyana 'iwe'a pwaiya, ta nata 'ilohesahasawala.

## 9

### *Hada He'asisi weyahina*

<sup>1</sup> Laina nugenugeta 'alona laina baibaiwana simiyamiya tapwalolo weyahina, ma wete hada tapwalolo bale'uwa weyahina. <sup>2</sup> Ta hadaina hebai 'wapidiyega sipaihoweya, ta 'ale'o 'oinega sibiliupa luweya ta biliupa madouna sihesaniyeya Tupwa He'asisi\*, ma biliupa 'i'iuna beno 'alona moisa sihesaniyeya Tupwa He'asisi Hedade. Biliupaina madouna 'alona mayale 'adi 'ebelagu ma 'aigeda teibele, ma teibeina 'oina beledi silagulagu Yehoba matana.

<sup>3-4</sup> Ma Tupwa He'asisi Hedade 'alona 'ebegabu 'imiyamiya gado'a\* weyahina, beno goula 'oinega sipaihoweya, ta wete laina 'ana dedewaga 'imiyamiya, beno goula wete 'oinega sipaihoweya, ta dedewagina 'alona gaeba goula 'imiyamiya, ta gaebaina 'alona tubudao 'adi 'e'ahai sanina mana, tupwana 'imiyamiya. Ta wete dedewagina 'alona Eloni 'ina digona, beno mwalo 'ibwala, ta wete da'uleyedi Yehoba 'ina loinao 'oidiya 'ilelediya simiyamiya. <sup>5</sup> Ma dedewagina pwatana 'eluwa anelose namanamalidi sipaihowediya ta dedewagina siheloguloguya, beno Yehoba 'ina 'ebemiya tomota 'idi puiyao 'adi nuwasam weyahidi. Ta hesi sahena tanuwanuwatuhu hedade tobwatobwaedi weyahidi.

<sup>6</sup> Ceguma tobwatobwa mabwaiyadi si'atububudi, 'oinega topwaoliyao siluhuluu Hada He'asisi 'alona ta 'idi paihowa sipaipaihowa; <sup>7</sup> ma hesi Tupwa He'asisi Hedadeina Topwaoli Madounamo 'oina 'iluhu, ma bolime 'aigeda 'oina ma'aigedamo. Ta tutaina 'iluhuluu bweyaha 'i'ewa ta bweyahina 'ilosehusehule, gide 'ipwaopwaoli Yehoba 'oina 'ina mumuga galadi weyahidi, ta wete tomota mabwaiyadi 'idi puiyao weyahidi.

<sup>8-9</sup> Bewa 'ebe'ita tomota hauhauda 'oida, Yaluyaluwa Tabuna 'oinega, ta 'oinega tasanapu 'abehega 'eguma paihowaina miyamiyaina 'abwa tapaipaihowa, geya sawasawahina ma taluhu Tupwa He'asisi Hedade 'alona. Eeta helauwao ma hebahebai laina miyamiyaina 'oinega sipwaopwaoliyedi Yehoba 'oina, ta hesi geya sawasawahidi ma tomotaedi 'atedi si'abihe'ehau, ta wahidimo si'abihe'ehau, <sup>10</sup> 'eguma loinaowedi tomota simulimuliyedi 'e'ahai ma 'adi we'aha ma hali buyo ma hali buyo weyahidi. Weyahina mwalo loinaina miyamiyaina Yehoba 'ilaguya ta 'imiyamiya 'ana siga Keliso 'ilatuma ta laina 'ibuiya. <sup>11</sup> Weyahina 'iboi 'ina pwaoliyega miya bwebwe'ana hedade 'i'ebwaegita, ta hali Hada He'asisi 'oina 'iluhuwa, ta hadaina madouna ta bwebwe'ana, beno tomota geya si'abi bale'u 'oina. <sup>12</sup> Coinega Yesu Tupwa He'asisi Hedade 'oina 'iluhuwa ma'aigeda, ta bweyaha 'oinega 'ipwaoli, ma bweyahina geya hebai goti bweyahidi bo bulumakau 'i'iudi bweyahidi, ta hesi tauna bweyahina, ta 'oinega 'ada 'abihe'ehau hataya talobeya.

<sup>13</sup> Ceguma ginaula bi'ibi'ina ta'abitoho ma wahida ta'abihebi'i ma goti bweyahina nuwana bulumakau bweyahina 'oidiyega talosehuligita, nuwana bulumakau mewahinena tagabu ma 'oinega tapwaoli Yehoba 'oina, beno 'ebe 'abihe'ehau wahida weyahina. <sup>14</sup> Ta hesi Keliso bweyahina 'ebe 'abihe'ehau bwebwe'ana hedade, weyahina 'ateda 'i'abihe'ehaudi ma 'oinega paihowa besobeso talogwahatedi, ta Yehobaina mayawasina 'ina paihowao tapaihowadi. Weyahina Yaluyaluwa Tabuna miyamiya hatayana Keliso 'i'abihe waiwaiya, ta tauna ma'ina mumuga mabwaiyana dumwaluna ta geya 'aigeda wete galana 'oina, 'oinega tauna 'ipwaoliyeya Yehoba 'oina, beno 'i'amasatauda 'ada



'ehau weyahina. <sup>15</sup> Eeta Kelisoina loina hauhauna 'i'eweyama ta 'oinega tanaoma Yehoba ba'idadai tahe'iyayiyagu, weyahina 'eguma 'ihesuwegita nata yawasida hataya 'igwae hemisaeya 'iebwaegita. Weyahina tauda loina nugenugeta taligehiya, 'oinega 'ilobwaineya ma ta'amasa, ta hesi Keliso weyahida 'i'amasa pwaiya sabi 'abihetegita.

<sup>16</sup> Wasanapuya 'eguma taiya to'waiha loina mwalo 'ilaguya nuwana 'ileleya, 'ina tobwatobwa mabwaiyana 'adi heguyai weyahidi, ma muliyetega 'i'amasa, ta loina 'ina susuwao sida muliye. <sup>17</sup> Ta 'eguma 'abwa mayawasina, geya'abwa loina simulimuliye. Beno namo 'eguma 'i'amasa, loina 'ihewaiwai ma simuliye.

<sup>18</sup> Gide wete loina nugenugeta Mosese 'oinega, nugeta tupwadi hebai silohe'amasidiya, ta bweyahidiyega buki ma tomota mabwaiyadi Mosese 'ilosehu sehulidiya, ta 'oinega muliyetega loina 'ihewaiwai.

<sup>19</sup> Weyahina loina mabwaiyadi 'ihewaiwai tomota 'oidiya, ta 'oinega bulumakau 'i'udi bweyahidi ma goti bweyahidi we'aha ba'idana 'ihewaiwai, ta 'i'eweya, ta sipi hunuhunuwana belabelalana 'i'eweya, ma 'aiwe sanina hisopa matana 'ibadiyeya, ta bweyaha ma we'aha 'alona 'ihewaiwai, ta 'oinega buki ma tomota 'ilosehu sehulidiya, <sup>20</sup> ma Mosese 'igwaeya,

“Loinaina Yehoba 'ilaguya weyahimi, 'ana 'ila'ilala bweyaha bewa.”

<sup>21</sup> Gide wete Hada Tapwalolo ma gaebaedi Hada Tapwaloloina 'oina bweyaha 'ilosehu sehulidiya. <sup>22</sup> Weyahina Mosese 'ina loina 'oidiya 'abehega ginawala mabwaiyadi bweyaha si'ehau. Ta mumuga galana 'ana nuwasam wete bweyaha 'oinega, ma 'eguma geya bweyaha 'idau gesowana nuwasam taloba.

<sup>23</sup> Hada He'asisi 'ana tobwatobwao galewa simiyamiya, ta 'adi ma'ama'ayau tuwa bale'uwa Mosese 'ipaihowediya, ta 'ilobwaineya ma bweyaha 'ana paihowega 'ipwaopwaoli Yehoba 'oina ma 'i'abihe'ehaudi, ma hesi ginawala galewa 'adi 'abihe'ehau pwaoli bwebwe'ana hedade 'oinega, beno Keliso bweyahinega. <sup>24</sup> Ta Keliso geya 'iluhu Hada He'asisi 'abi'abina 'oina, beno Hada moisa 'ana ma'ama'ayau tuwa, ta hesi galewa 'iluhuwa ta Yehoba matana 'imiyamiya ma 'ilemalema weyahida.

<sup>25</sup> Kelisoina sahena sauga baibaiwana tauna wahina 'i'e'ehelwe nuwana 'ipwaopwaoli Yehoba 'oina, gide bolime 'aigeda 'aigeda Tupwa He'asisi Hedadana 'alona Topwaoli Madouna 'iluhulu ma bweyaha 'ipwaopwaoli, ta bweyahina geya tauna bweyahina. <sup>26</sup> Moisa, 'eguma Keliso 'ina paihowa taudi topwaoli madoudi gide, 'ida 'amasa hilahila bale'u 'ana gihehemasalahi 'oinega ta tuta nige. Ta hesi ma'aigedamo tuwa, tuta 'ana 'ebelosaloha bewa 'oina, wahina tauna 'ipwaoliyeya, mumuga galadi 'adi nuwasam weyahina.

<sup>27</sup> Tomota tauda 'ada loina 'imiyamiya 'abehega ma'aigeda ta'amasa ta muliyetega bwa'omatana. <sup>28</sup> Wete gide Keliso 'ina 'amasega tauna 'ipwaoliyeya ma'aigedamo tuwa, ma baibaiwada mumugada galadi 'i'ewa yahulediya, ma 'abwa 'ihilama, ma geya 'abehega mumuga galadi 'i'ewayahule hiladi, ta hesi sabi 'abihetegita, 'eguma ma'ida nuwa'ewa tayamwayamwa.

## 10

<sup>1</sup> Cabwa 'ebe yaliyaya moisa 'oida 'ilatuma, ma hesi Mosese 'ina loina gide ma'ama'ayau tuwa, ta geya 'ebe yaliyaya moisa. Mosese 'ina loina 'abehega bolime ma bolime hebai sihunuhunudi ta Yehoba 'oina sipwaoliyedi, ta paihowaedi geya sawasawahina ma 'i'abihe'ehaudi. <sup>2</sup> Weyahina 'eguma paihowaina sawasawahina ma 'i'abihe'ehaudi, ma'aigedamo sida paihowa ma 'adi lotohona 'ida bwebwe'ana hataya, ta 'oinega sahena bolime 'aigeda 'aigeda sipaipaihowa hilahila, 'awa? <sup>3</sup> Geya! Ta hesi pwaoliyedi bolime 'aigeda 'aigeda 'ebe nuwahilamo tuwa, mumugadi galadi weyahidi, 'oinega 'adi lotohona geya'abwa 'ibwebwe'ana. <sup>4</sup> Weyahina bulumakau ma goti bweyahidi geya sawasawahina ma pui 'ideuli yahuledi.

<sup>5</sup> Coinega tutaina Keliso bale'uwa 'idobima, Kelisoina Yehoba 'oina 'igwaeya,

“Pwaoliyao ma 'ehele geya nuwau, 'oinega wahigu 'u'ebwaegauwa 'ino paihowa weyahina. <sup>6</sup> Wete geya nuwau hebai gabugabudi, 'eguma tomota sipwaoliyedi mumugadi galana weyahidi. <sup>7</sup> Coinega yatagwalegauwa 'owa Yehoba 'oiuwa, ta yatauyama ma 'ane 'ino nuwatuhi yapaihowa, gide mwalo weyahigu Buki nupinupilina 'oina sileleya.”

<sup>8</sup> Cina gwaaina wanuwatuhuyahi, 'igwaeya,

“Geya nuwau pwaoliyao bo 'ehele, bo hebaiyedi sigabugabudi, bo nuwana to'aha sipwaopwaoliye mumugadi weyahidi, ma geya'abwa 'uyaliyaliyaya paihowaedi weyahidi. Pwaoliyedi taudi Mosese weyahidi 'iloina.”

<sup>9</sup> Coinega wete 'igwaeya,

“Yatagwala pwaiyegauwa 'oiuwa ma 'ane 'ino nuwatuhi yapaihowa.”

Cina gwaewa bewa 'abehega loina nugenugeta 'i'ewayahuleya ta hauhauna 'ilaguya. <sup>10</sup> Ta Yehoba 'ina nuwatuhiina ma Yesu Keliso tauna wahina 'ipwaoliye sabi 'abihe'ehaugita 'ina 'amasa ma'aigedamo 'oinega. <sup>11</sup> Ta topwaoliyao mabwaiyadi Hada He'asisi 'oina sitotoholo, ma sabwelo 'aigeda 'aigeda 'idi pwaoliyedi si'e'ehele Yehoba 'oina, ma hesi pwaoliyedi geya sawasawahina ma mumuga galadi si'ewayahuledi.

<sup>12</sup> Ta Keliso hesi ma'aigeda 'ipwaoliya mumuga galana weyahina, ta 'ina pwaoliina tuta mabwaiyana sawasawahina, ta 'ina pwaoliina mulina Yehoba 'ebeulanega 'imiyatoiya, <sup>13</sup> ma 'iyamwayamwa ta to tuta 'ana 'alehao Yehoba 'ida lagu suluhedi 'aena gabulena.

<sup>14</sup> Weyahina 'ina pwaoli 'aigedamo, ta sawasawahina tuta mabwaiyana 'oidiya 'i'abihe 'ehaugita ma 'i'abihe bwebwe'anegita. <sup>15</sup> Cabihe'ehau bewa weyahina Yaluyaluwa Tabuna ta wete Buki He'asisi 'oina 'ihe'itegita Bada 'ina gwaewa beno mwalohene weyahida 'ihewaila, <sup>16</sup> 'igwaeya,

“Cabwa loina hauhauna ya'ebwaedi ma 'igu loinao nuwadiya yalagudi ma 'atediya yaleledi.”

<sup>17</sup> Ta wete 'igwaeya,

“Cidi galao ma 'idi puiyao yanuwanaidedi.”

<sup>18</sup> Beno weyahina geya'abwa tapwaopwaoli mumugada galadi weyahidi, weyahina Yehoba 'inuwasam pwaidiya.

### *Tauda tada lemelemegita*

<sup>19</sup> Ciyagwao Yesu bweyahina 'idau pwaiya weyahida, 'oinega ma'ida 'atepatu taluhu Yehoba 'ina Tupwa He'asisi Hedade 'oina, <sup>20</sup> bewa 'eda hauhauna yawasida weyahina. Mwalohene Yehoba 'ina Tupwa He'asisi 'ale'o 'oinega sibiliupeya ta Yesu 'iso'eya tauna wahina 'ina 'amasa 'oinega sawasawahina ma taluhu Yehoba 'oina. <sup>21</sup> Ma wete 'ida topwaoliina lohane hedade, ta Yehoba 'ina hada weyahina 'ipaipaihowa.

<sup>22</sup> Coinega Yehoba tahahoho ma'ida 'atetagwala ta ma'ida hemisa moisa, ma 'oinega wahida ta'abihe'ehaudi we'aha 'ausalana 'oinega, ma wete 'ida nuwatuhi si'ehau, weyahina Yesu 'ina losehusehula 'oinega 'ida nuwatuhi galadi 'i'abihe 'ehaudiya. <sup>23</sup> Coinega tatoholo pa'ala ma 'ida hemisa Yesu 'oina ta'abi'abiyahi, ma tahepwaila latuwe tomota 'oidiya, weyahina Togwaewa hemisaina geya 'i'abo, ta hesi 'ina gwaeyedi gide 'ipaipaihowa 'esedi.

<sup>24</sup> Cilobwainegita wete ma tauda tada he'abi'abihetena, ma 'ane tahe'iyaiyagu moisa, ma wete paihowa 'ausaladi tapaihowadi. <sup>25</sup> Tupwadi 'iyadao tapwalolo 'ana 'eto'autao sinuwanaideya, ta sahena gide 'omi, ma hesi tuta mabwaiyana wa'abihe pa'aligomi, ma 'eguma to tuta wasanapuya 'abehega Yesu 'ina tuta hilama 'ihahoho nata wahe'abi 'abihetena hilegomi moisa. <sup>26</sup> Ma 'eguma tanuwa sabwaleni to'aha Yehoba 'ana wasa moisa, ma muliyetega tatagwalegita mumuga galana 'oina, geya 'eta wete pwaoli 'imiyamiya sabi 'abihe'ehau hilegita, <sup>27</sup> ma hesi bwa'omatana taloba, beno 'aiwe ninima 'igabu hegumwaligita. Bewa Yehoba 'ipaipaihoweya 'ana 'alehao weyahidi.

<sup>28</sup> Mwalohene 'eguma 'eta taiya Mosese 'ina loinao 'iligehidi, ma tohepwaila 'elua nuwana 'etoi mumugana sihepwaila latuhe, geya'abwa si'ate'ate muyamuya ma hesi

siloh'e'amasiyamo tuwa. <sup>29</sup> Coinega 'eguma taiya Yehoba Natuna 'ilohesohesoie, ma bweyahina 'i'abihe'ehauya 'i'ahwa galagalae, ma wete 'i'abihe gamwasowali 'ada to'abi-hetena Yaluyaluwa Tabuna, nata 'ana maisa muya madou hedade 'iloba Yehoba 'oinega.

<sup>30</sup> Ma tasanapu pwaiya taiya 'ada Toloina madouna tauna 'ihewaegita, 'igwaeya, "Taugu Toloinaigu, togala yahemaisadi muya 'oinega."

Ma wete 'igwaeya,

"Taugu 'imi Bada, ma 'omi 'igu tomotaiyao nata yaloinogomi."

<sup>31</sup> Sowasowana Yehobaina mayawasina tamataute 'amuge 'iloinaegita.

<sup>32</sup> Ciyagwao, mwalo 'asilala 'ina latu nugenugeta 'oimiya, wanuwatuhuyahi 'imi miyamwau 'oidiyega wa'alama'i'ita, <sup>33</sup> tutaina tupwana tomota si'abihedeba mwadinegomiya ma si'abihe muyamuyagomiya ta tuta tupwana mwalo 'iyamiyao ba'idamiyao wamuyamuya mahemahetena. <sup>34</sup> Ta wete tupwadi deliya silagudiya weyahidi wa'ate-muyamuya, ta wa'abihetediya. Ta wete tutaina mwalo tomota 'imi tobwatobwao siyagahidiya wayaliyaya moisa, weyahina wasanapuya 'abehega galewa 'imi tobwatobwao 'ausala hedadedi ma miyamiya hatayadi simiyamiya.

<sup>35</sup> Coinega 'imi hemisaina wa'abiyahi momosi ma sahena walologwahate, weyahina 'abwa 'imi hemisaina 'ana maisa 'ausala hedade waloba. <sup>36</sup> Ma 'ilobwainegomiya watoholo pa'ala ma Yehoba 'ina nuwatuhu wapaihowa, ma to'aha 'igwae hemisaeya wa'ewa.

<sup>37</sup> Weyahina tuta 'i'iunamo tauna Totauyamaina 'ilatuma, geya'abwa wete 'iheheboi.

<sup>38</sup> Coinega taiyawedi todumwalu 'idi hemisega yawasidi 'ausalana siloba, ta 'eguma 'idi 'ateyohowega silohihila, Yehoba geya nuwana tomotaedi. <sup>39</sup> Ma tauda sahena talolohihila, weyahina beno 'ebe hesilae. Ma tuwa ma'ida hemisa ma 'oinega yaluyaluwada simiya bwebwe'ana.

## 11

### *Hemisa weyahina*

<sup>1</sup> Ceguma to'aha tanuwatuhuyahi 'abehega 'abwa taloba, ma hesi bewa tuwa geya'abwa ta'ita'ita, beno hemisa moisa. <sup>2</sup> Tubudao mwalohene tanuwatuhu yahidi taudi 'idi hemisa weyahina Yehoba 'i'ahwa bwebwe'enediya. <sup>3</sup> Tauda wete 'ida hemisa 'oinega tasanapuya 'abehega Yehoba tauna 'ina gwae 'oinega bale'u mabwaiyana 'ihemasalahediya, beno ginaulaedi geya tada 'itediya 'oidiyega ginaulaedi ta'ita'itadi 'ihemasalahediya.

<sup>4</sup> Coinega Ebeli wete ma'ina hemisa 'ipwaoli Yehoba 'oina, 'oinega 'ina pwaoliina Keni 'ina pwaoli 'ibwebwe'ana sineya, ta Yehoba 'iyaliyaya Ebeli 'ina pwaoli weyahina ta 'i'ahwa dumwaluweya. Ebeliina bale'u 'i'ebesine pwaiya, ma hesi 'ina hemisega 'oida 'ihehe'ita.

<sup>5</sup> Inoke wete 'ina hemisega geya 'i'amasa ma hesi wahina mayawasina Yehoba 'i'eweya galewa, weyahina Yehoba 'ihewaila nugeteya 'abehega "Inokeina tauna weyahina yayaliyaliyaya."

<sup>6</sup> Moisa, 'eguma sahena tahehemisa Yehoba 'oina, geya'abwa weyahida 'iyaliyaliyaya. Ceguma nuwanuwada ma Yehoba 'oina tatauya, tahemisa nugeta 'abehega Yehobaina 'imiyamiya, ta 'ana to'ebesao 'adi tohelau tauna, ma muliyetega tatauya 'oina.

<sup>7</sup> Nowa wete Yehoba 'ihe'iteya 'abehega to'aha 'abwa 'ilatu 'oidiya, 'oinega Nowaina 'imatauta ma 'ina hemisega 'ina waga sanina 'aki 'igoheya, 'itagiya, ta tauna ma'ina susuwao 'i'abihetediya. Nage 'oina 'ihe'itaeya 'abehega tomota mabwaiyadi togala, ma tauna loheya dumwaluna 'ina hemisa weyahina.

<sup>8</sup> Ebalahamo wete 'ina hemisega Yehoba 'ina bwau 'imuliyeya ta 'abehega 'ina 'asa 'i'ebesine ma 'ina 'asa 'ehauna hali tupwa 'iloba, 'oinega 'itoholowa ta 'itauya, ta geya 'isanapu to tupwa 'oina 'itautauya. <sup>9</sup> Ta wete 'ina hemisega tupwa gwahemisaina 'oina ma'ina susuwao Aisake ma Yakobo simiyamiya, gide taumanao, ma 'idi hada hebai 'wapidi 'oidiyega si'abidiya, 'asaina Yehoba 'igwae hemisaeya 'abehega Ebalahamo 'oina

'ilo'asa, ma muliyetega tubunao wete 'idi 'asa. <sup>10</sup> Ma hesi Ebalahamo 'inuwatuhu yahiya 'abehega 'asaina 'ana wahuwahu pa'alina 'oina 'iluhu, beno Yehoba tauna 'ina nuwatuhu gide ma 'i'abiya.

<sup>11</sup> Sela wete 'ihe'ai'aihaleya tuwa ma 'ina hemisega wahina 'ihewaiwaiya ta 'igamwa, weyahina Yehoba 'ina gwae hemisaina 'ihemiseya.

<sup>12</sup> Moisa, Ebalahamoina 'ihetautubada hedadeya, ta 'i'iunamo ma 'i'amasa, ta hesi boda madouna 'idabalala 'oinega, ta 'adi baibaiwa tuwa gide galewa 'ipwalao, ma wete nenegwala holai 'adi baibaiwa gide.

<sup>13</sup> Tomota nugenugediyedi ma'idi hemisa, ma hesi si'amasa ta gwae hemisaedi huwaidi geya sida lobeya, ta hesi tuwa bwagebwagega si'iteya ta siloyauwedowa weyahina, ma wete taudimo si'ahwa taumanaediya gide taumana tuwa tupwa bewa bale'u 'oina.

<sup>14</sup> Moisa, 'eguma ta'ahwa taumanaegita, beno gide tahepwaila latuwe 'abehega 'ida 'asa moisa ta'ebe'ebese.

<sup>15</sup> Ma babada nugenugetaidi 'idi 'asa si'ebesineya, ma 'eguma nuwanuwadi sihila, nata 'eda si'ebese ma sihila, <sup>16</sup> ma hesi geya sihila, weyahina nuwanuwadi 'asa bwebwe'ana hedade, beno galewa. Coinega geya'abwa Yehoba 'imwadi mwadinedi, ta hesi 'abehega tauna 'idi Yehoba, ta 'idi 'asa 'ihemasaleheya.

<sup>17-18</sup> Ebalahamo wete ma'ina hemisa tutaina 'ebetohona 'ilobeya Yehoba 'oinega, 'abehega natuna moisa Aisake 'ipwaoiye Yehoba 'oina. Mwalo Yehoba 'ina gwae hemisao 'i'ebwaeya Ebalahamoina 'oina, ta wete 'igwaeya, "Cabwa Aisake 'oinega 'ino boda 'ilatu,"

'oinega Ebalahamo natunaina 'itagwaleya ma 'ilohe'amasi, <sup>19</sup> weyahina Ebalahamo 'isanapuya 'abehega Yehoba sawasawahina ma to'amasao 'i'abihe toholodi, 'oinega 'ana 'ita gide natunaina 'amasega 'ihilama.

<sup>20</sup> Aisake wete 'ina hemisega natunao Yakobo ma Iso 'igwae hemisaediya 'idi 'ebe yaliyaya tuta 'inaonaoma weyahina.

<sup>21</sup> Yakobo wete tutaina nata 'i'amasa ma 'ina digona 'i'abiheteya ta 'itoholowa ma Yehoba 'oina 'i'etuluha, ta 'ina hemisega Yosepa natunao 'aigeda 'aigeda 'idi 'ebe yaliyaya 'abwa weyahina 'ihewaiwaiya.

<sup>22</sup> Yosepa wete 'ana bolime 'ebelosaloha 'oina 'ina hemisega meIsileli 'idi latu nata Itipitega 'ihewaiwaiya nugeteya, ta lona 'ilaguya 'ana lagu galiha weyahina.

<sup>23</sup> Mosese tutaina 'ili'uwa, tamana ma sinana 'idi hemisega silagu dahweya wai'ena 'etoi 'oidiya, weyahina 'ana 'ita gwama gumabwaina, ma wete kini Pelo 'ina lona pa'alina geya simataute.

<sup>24</sup> Mosese wete tutaina 'ihepada, 'ina hemisega geya nuwana ma tomota sigwae, "Moseseina Pelo tubuna," weyahina 'ina tuta gwama 'oina Pelo natuna wahinena Mosese 'i'eweya, 'i'itayahiya ta 'i'ahwa natuneya. <sup>25</sup> Eeta Moseseina geya nuwana tuta to'uto'upana 'oina 'iyaliyaya mumuga galana weyahina, ma hesi nuwanuwana Yehoba 'ina tomotao ba'idanao sida miyamwau. <sup>26</sup> Weyahina geya nuwana wasawasa bale'uwedi Itipita 'alona, ma hesi muyamuya Keliso weyahina 'ihesinuweya, weyahina 'isanapuya 'abehega 'abwa maisa bwebwe'ana 'iloba. <sup>27</sup> Coinega 'ina hemisega Itipita 'i'ebesineya, ta geya kini Peloina 'ina gamwasowala 'imataute, ma hesi 'i'atepatuwa 'abehega Yehoba 'i'iteya matana 'imiyamiya. <sup>28</sup> Ta wete 'ina hemisega Hataona Guyaina 'ipaihoweya ta bweyahega 'idi hadao 'ilohelohediya, 'abehega tautuwao 'adi tolohe'amasa sahena 'iluhuluhu 'ihunuhunudi.

<sup>29</sup> Bodaedi 'idi hemisega Hola Bwehabwehalina sihabaleya gide bale'u lohulohuna 'oinega sitautauya, ma meItipita simuliyama 'abehega sihabala wete ta geya sawasawahidi, ta mabwaiyadi sidamana.

<sup>30</sup> Ma wete tutaina taudi 'asa Yeliko sisakowasiyeya mabwaiyadi sabwelo sebeni 'oidiya, 'idi hemisa weyahina 'asaina 'ana 'ali madouna 'ibe'uwa, <sup>31</sup> ta siluhuwa ma toni'asa sihunudiya, weyahina taudi tologwahatao. Ma toganawala sanina Leyabi geya

sihunu, weyahina wahineina ma'ina hemisa, weyahina tutaina mwalo Yosua 'ina tolo'alehao 'eluwa 'asaina 'oina siluhuwa Leyabiina 'ilemediya.

<sup>32</sup> Tohemisao baibaiwadi wete gide Gidiyoni ma Belaki, Samisoni, Yepita, Debida, Samuwela ma palopitao wete, geya sawasawahina ma tahe'ote'otetela hegumwalidi.

<sup>33</sup> Taudi 'idi hemisega sihewaiwaiya 'adi 'alehao 'oidiyega, ma wete 'idi tomotao siloina dumwaluwediya, ma wete Yehoba 'ina gwae hemisa huwaina silobediya, ma wete laiyni lolosasaidi si'abi hedaumwalidiya, ta wete <sup>34</sup> 'aiwe ganinisa madoudi sigibodiya, ta wete 'aleha 'oinega si'abihetediya, weyahina 'idi tuta siwe'a 'oina ma tuwa sihewaiwaiya, ma wete 'aleha 'oina sihewaiwai hedadeya, ta 'adi 'alehao baibaiwa hedade sipa'ipa'i lelewanedi.

<sup>35</sup> Tupwadi wahiwahine wete 'idi to'waihao 'amasega sitoholo hila. Ta wete tupwadi tohemisao 'adi 'alehao 'oidiyega muya silobeya, weyahina sitohodiya 'abehega si'ewa hiledima, ma hemisa silolagu, ma 'iyamo sitoho 'asaediya, weyahina 'idi hemisa pa'alina 'abehega 'abwa 'amasega sitoholo hilama, ma yawasidi 'ausalana si'ewa.

<sup>36</sup> Tupwadi wete 'adi 'alehao silotuyannediya, ma gulahega sihunuhunudi, ma wete deliya silagu luhuwediya ta sipaidiya. <sup>37</sup> Tupwadi wete dimwa madoudi 'oidiyega siloda'ulediya, ma tupwadi si'e'upwa luwediya, ma tupwadi 'elepa 'aleha 'oidiyega silohe'amasidiya, ma tupwadi sipi ma goti 'wapidi 'oidiyega si'wama'wama ta ma'idi nuwagala gide wewelohe, weyahina tomota si'abihe galediya.

<sup>38</sup> Ma hesi tohemisaowedi mebale'u sibwebwe'ana sinediya, 'oinega yoho 'awawa ma 'oya 'oidiya siyawayawala dadana, ta wete gaula ma duluha 'oidiya si'eno'eno dadana.

<sup>39</sup> Ta tohemisaowedi wasadi bwebwe'ana tahesagoha pwaiya, ma hesi Yehoba 'ina gwae hemisa huwaina moisa geya siloba, tuta nage 'oina, <sup>40</sup> ma 'iyamo 'ebe yaliyaya tauda weyahida Yehoba 'ihewpaila nugeteya, 'abehega taudi ba'idadao 'abwa tamiya bwebwe'ana.

## 12

### *Toholo pa'ala weyahina*

<sup>1</sup> Ma tohemisao baibaiwadi galewega si'e'ebubugita, ta sawasawahida ginaula mwaudi 'oidiyega ta'aisinedi, ma 'oinega tapili waiwai 'ebepiliina 'ana 'eda 'oinega, ta wete mumuga galadiyedi sipaipaigita ta'aisinedi. <sup>2</sup> Ma wete Yesu 'oina talolo'italaga, weyahina Yesuina 'ida hemisa 'ana 'ebehegaina ta 'ana 'ebelosaloha. Tutaina Yesu bale'uwa 'imiyamiya 'isanapuya 'abehega 'abwa 'ebeyaliyaya madouna 'iloba, 'oinega kelose 'ina muyamuya 'i'alama'i'itaneya, mwadina wete geya weyahina 'inuwatuhu, ta 'ebelosaloha 'oina 'ihaneya galewa ta Yehoba 'ina 'ebeulega 'imiyatoiya.

<sup>3</sup> Yesuina wanuwatuhuyahi 'abehega 'i'alama'i'ita madouna togala 'idi lo'aleha 'oinega, ta 'oinega 'omi wete gide 'abehega sahena wahesabulolo nuwana wawe'awe'a. <sup>4</sup> Ma 'omi tutaina mumuga galana walo'aleheya 'imi miyamwau 'i'iuna tuwa, ta geya sida lohe'amasigomiya Yesu gide. <sup>5</sup> Nuwana guguya wanuwanaideya, guguyaina 'oina 'i'ahwa natunegomiya 'igwaeya,

“Natugu, 'eguma tutaina Bada 'ihemata sabuwego sabi 'abihe dumwalugo, bewa weyahina 'unuwanuwatuhu ma sahena wete 'uwe'awe'a. <sup>6</sup> Weyahina 'eguma taiya Yehoba 'i'ahwa natune ta 'ihelauwe, sawasawahina ma sapi 'iloba 'ina puiyao weyahidi, ma 'oinega 'ida bwebwe'ana hila.”

<sup>7</sup> Ta 'eguma sapi waloba Yehoba 'oinega, tuwa wa'alama'i'ita, weyahina tama mabwaiyadi natudiyao sisapisapidi sabi 'abihedumwaludi. <sup>8</sup> Coinega Yehoba wete mabwaiyada 'isapigita, ma 'eguma taiya 'owa Yehoba geya 'isapigo, beno weyahina 'owa geya natuna moisa, ta 'abehega 'owa 'aigeda tamabudabuda.

<sup>9</sup> Wanuwatuhuyahi 'eguma tamadao bale'uwa sisapigita ma 'oinega tahe'asisiyanedi, wete 'ilobwainegita ma yaluyaluwada Tamadiu galewa tahe'asisiyane, ma 'oinega yawasida 'ausalana 'i'ebwaegita. <sup>10</sup> Weyahina tamadao bale'uwa taudimo 'idi nuwatuhu 'oidiyega sisapisapigita ma si'abi'abi hedumwalugita tuta to'uto'upanamo weyahina, ma



hesi Yehoba 'isapisapigita 'ada lema weyahina ma 'abehega 'i'abihe 'ehaugita ma tada mumuga 'ausalana, tauna 'ina mumuga gide.

<sup>11</sup> Moisa, tutaina 'eguma bada 'aigeda 'isapigita tamuyamuya madouna ta geya'abwa tayaliyaliyaya, ma hesi 'eguma 'i'abihe dumwalugita 'abwa huwaina 'ausalana taloba, beno mumuga bwebwe'ana ma miya daumwala.

<sup>12</sup> Coinega 'imi we'a wa'ebesine ma wahewaiwai, <sup>13</sup> ta 'imi 'eda wa'abihe dumwaludi, ma 'eguma toha'au'au sitautauya, sahena sibe'ube'u, ma hesi 'idi ha'au'auwedi sibwebwe'ana, ta taudi wete sihewaiwai.

<sup>14</sup> Watoho waiwai ma wamiya daumwala tomota ba'idamiyao, ta wete watoho ma 'imi mumuga 'ibwebwe'ana mabwaiyana, weyahina 'eguma taiya geya 'ina mumuga bwebwe'ana geya'abwa Bada 'i'ita'ita.

<sup>15</sup> Wa'itayahigomi 'amuge nata 'oimiyega taiya Yehoba 'ina helau geya'abwa 'ilobaloba. Ma sahena 'aigeda taiya 'oimiyega 'ihagaina ma 'imumuga galana, 'amuge ta baibaiwadi simuliye.

<sup>16</sup> Sahena wanuwanuwa 'ubuna, ta wete sahena Yehoba 'ina helau walologwahate, gide Iso mwalo Yehoba 'ina gwaehemisa tauna weyahina ma 'ipeleya tasina 'oina, 'ana maisa 'e'ahai 'aigeda tuwamo. <sup>17</sup> Ma wanuwatuhuyahi 'abehega tuta muliyetega Iso gwae hemisaina 'inuweya, ta weyahina 'idouwa, ta geya sawasawahina 'i'ewahila, weyahina tasina 'i'ewa pwaiya.

<sup>18</sup> Bewa tuwa wanaoma Yehoba 'ina tupwa, geya gide mwalo Mosese ma meIsileli ba'idanao sitauya ta silotohoya 'oya Sainai 'oina, weyahina 'aiwe ganinisa ma guguyou madouna ma hogahoga ta duba madouna, <sup>19</sup> ma yoguli 'enana ma wete loheya 'enana 'oyaina 'oina, 'oinega meIsileli simatauta madouna, ta si'ahwa'ahwanoi ta 'abehega sahena 'enanaina sihehesagotha hila, <sup>20</sup> weyahina loina sihesagoheya 'i'abihe matautediya 'abehega,

“Sahena 'aigeda to'aha 'oya bewa 'i'abi'abitoho, ma 'abehega 'eguma 'aigeda hebai 'inaoma 'oyaina 'oina, dimwega siloda'ule ma 'i'amasa.”

<sup>21</sup> Moisa, 'oyaina 'ebe matauta madouna, ta Mosese tauna wete 'imatauta, ta 'ihepwaila 'igwaeya,

“Cigu matautega yadedela.”

<sup>22</sup> Ta 'omi hesiyage wanao pwaima Saiyoni 'oyana 'oina, beno Yehoba tauna mayawasina 'ina 'asa, Yelusalemaina galewa 'oina, aneloseyao baibaiwa hedade simiyamiya ta siyaliyaliyaya gide guyai 'oina, <sup>23</sup> ma wete wanaoma tomotaedi Yehoba 'i'ahwa natunediya, ta sanidiyao galewa 'ilelediya 'oidiya, ma wete tauna tauda ta ginaula mabwaiyana 'ada Toloina, beno Yehoba 'oina, ma wete taudi yaluyaluwadi Yehoba 'i'abihe dumwaludiya 'oidiya, <sup>24</sup> ta wete Yesu 'oina, tauna loina hauhauna 'ana to'ehelina, ta bweyahina 'ana losehusehula 'oinega 'i'abihetegita, ma geya gide Ebeli bweyahina, weyahina beno 'ebehesilae.

<sup>25</sup> Coinega wa'ita yahigomi ma tauna galewega 'igwaegwae 'oida sahena 'enana walologwahate. Weyahina mwalo tomota tupwadi bale'uwa Mosese 'ina lohatoto 'oidiya silogwahateya, ta mwau silobeya. Ma bewa sauga Yehoba galewega 'ilologuguya 'oida, ta 'eguma 'enana talogwahate mwau madou hedade taloba.

<sup>26</sup> Weyahina 'enanaina mwalo bale'u 'i'abi nihuweya, ta bewa tuwa 'igwae hemisa pwaiya 'abehega,

“Cabwa bale'u ma galewa wete ya'abi nihuwedi ma'aigeda tuwa.”

<sup>27</sup> Bewa gide 'igwae 'esa weyahina ginaula hehemasalahadi 'ida 'abinihuwedi, ma 'oinega ginaulaedi geya sipa'ala sida be'u, ma ginaula pa'alidi sitoholo hataya.

<sup>28</sup> Bewa 'ida tupwa hauhauna 'oina taluhuluhu, waiwaina ma miyamiya hatayana, 'oinega sowasowana Yehoba 'oina taloyauwedo, ma talotapwalolo to'aha 'ina nuwatuhu 'ana lobwaina gide, ta wete tada he'asisiyane ma'ida matauta, <sup>29</sup> weyahina 'ida Yehobaina 'aiwe ganinisa gide.

## 13

*Mumuga bwebwe'ana*

<sup>1</sup> Coinega wahelau hilegomi taumimo 'oimiya. <sup>2</sup> Ta wete taumanao wabwauwedi 'oimiya, gide mwalohene tupwana tomota taumanao si'ita'ita yahidiya, ma hesi taumanaedi taudi aneloseyao, ta geya si'inatedi. <sup>3</sup> Wete 'iyamiyao wanuwatuhu yahidi taudi deliya simiyamiya, ma wa'abihetedi gide tuwa 'omi ba'idamiyao deliya wamiyamiya. Ma wete 'iyamiyao taudi simiya mwauwa wanuwatuhu yahidi ma wa'abihetedi, weyahina 'omi tomota tuwa, gide taudi!

<sup>4</sup> Mabwaiyami hai 'ana loina wahe'asisiye ma sahena wanuwauwa 'ubuna, weyahina tolopuiyao ta tologwaliyao 'abwa Yehoba 'iloinedi. <sup>5</sup> Sahena wasawasa bale'uwa nuwami 'i'ewa'ewa, ta hesi wayaliyaya to'aha waloba pwaidiya weyahidi, ma sahena hali ginaula ma hali ginaula weyahidi wahehetapewa, weyahina Yehoba 'igwaeya, “Geya'abwa yanuwauwa naidego. Geya'abwa ya'ebe'ebesinego. Geya!”

<sup>6</sup> Coinega ma'ida 'atepatu moisa tagwae,

“Bada tauna 'agu To'abihetenaina, 'oinega sahena yamatamatauta to'aha gide tomota 'idi loina galana 'oiguwa.”

<sup>7</sup> Cami tohanugetao wanuwatuhu yahidi, weyahina mwalo Yehoba 'ina gwae si'ebwae-gomiya, ta wete wanuwatuhuyahi 'idi hemisa huwaina 'abehega bwebwe'ana silobeya, eeta wahe'au'aunawedi.

<sup>8</sup> Yesu Keliso 'ina mumuga mwalohene ta nige, ta tuta 'inaonaoma 'oidiya, geya 'ida 'abihedumedumeya. <sup>9</sup> Coinega sahena loina hauhau di ma hagahagadi wahehesagohedi, weyahina 'ateda 'ihewaiwai Yehoba 'ina helaumo 'oinega, ma geya 'e'ahai 'oidiyega. Loinaedi 'e'ahai weyahina gesowana si'abihetegita. <sup>10</sup> Ma tauda ma'ida 'ebepwaoli, ma hesi Hada He'asisi bale'uwa 'ana topwaoliyao geya sawasawahina ma si'ai 'ida 'ebe pwaoliina 'oina. <sup>11</sup> Moisa, 'idi Topwaoli Madouna hebai bweyahidi 'i'ewe'ewedima Tupwa He'asisi Hedade 'alona, ta mumuga galana weyahina 'ipwaopwaoli Yehoba 'oina, ta 'oinega muliyetega hebaiyedi 'wapidi sigabu yahuledi 'asa tuluhana 'oina. <sup>12</sup> Coinega Yesu wete 'asa 'ana 'ahwa'eda tuluhana muyamuya 'ilobeya, ma 'ane bweyahinega 'i'abihe 'ehaugita.

<sup>13</sup> Tauda wete sowasowana tatauya 'asa tuluhana Yesu 'oina, ma 'ebe mwadina taloba tauna gide.

<sup>14</sup> Weyahina 'ebwa bale'uwa geya 'aigeda 'ida 'asa miyamiya hatayana, 'oinega 'ilobwainegita ma 'asa miyamiya hatayana tuta 'inaonaoma weyahina ta'ebese.

<sup>15</sup> Eeta Yesu 'ina lema 'oinega tuta baibaiwana 'oidiya Yehoba tahepwatuwe. Bewa 'ida pwaoli nonohana, 'eguma tauna sanina ta'ahwa madouwe.

<sup>16</sup> Caigeda pwaoli wete Yehoba nuwanuwana madouna, beno helau tomota weyahidi ma'ida 'atemuyamuya.

<sup>17</sup> Cimi tohanugetao 'oidiya wahematamatana ma watagwalegomi 'idi loinao 'oidiya, weyahina yaluyaluwami si'ita'ita yahidi, ma 'oinega tuta 'inaonaoma 'oina 'imi mumuga weyahina sihepwaila Yehoba 'oina. Coinega 'ilobwainegomiya watoho ma wasami weyahina ma'idi yaliyaya Yehoba 'oina sihepwaillegomi, ma hesi sahena ma'idi mwadina, 'amuge ma loina mwauna waloba.

<sup>18</sup> Nuwanuwama wete tauma weyahima wa'ahwanoi Yehoba 'oina. Bewa tuwa 'anuwatuhuya 'abehega 'ima mumuga 'ausalana, ta nuwanuwama mumuga 'ausalanaina 'oina 'atoholo hataya. <sup>19</sup> Ta 'ateguwega ya'ahwa'ahwanoi 'oimiya ma 'imi 'ahwanoiyega 'igu 'eda 'ibwebwe'ana ma 'oimiya yahila mwayamwayauwa.

*Lokaiyoni*

<sup>20</sup> Yehoba miya daumwala 'ana to'ehele, ma tauna wete 'ida Bada Yesu 'amasega 'i'abihetoholo hileya, ta Yesuina 'ina tohekalesiyao tauda 'ada To'itayahina moisa, ta tauna bweyahinega 'ada loina 'ausalana ta miyamiya hatayana 'i'ebwaegita.

<sup>21</sup> Ma Yehoba sowasowana ginaula baibaiwadi 'ausaladi 'i'ebwaegomi ma 'oidiyega 'ina nuwatuhu wamuliye moisa, ma 'oinega Yesu Keliso 'ina paihowega Yehoba 'i'abihe bwebwe'anigomi to'aha gide 'ina nuwatuhu, ma weyahimi 'iyaliyaya. Coinega Kelisoina tada hep watu hatae. Emeni.

<sup>22</sup> Ciyagwao, 'imi leta bewa to'uto'upana tuwa, ma ya'ahwanoi 'oimiya ta ma'imi 'alama'i'ita 'igu lohatoto bewa wada hesagohe.

<sup>23</sup> Nuwanuwagu wete 'iyadaina Timoti wasana wahesagohe, weyahina deliyega silihasa pwaiya, 'oinega 'eguma 'ilomwayamwayauma 'abwa ba'idagu 'atauyawa 'oimiya.

<sup>24</sup> Cima helau yahewaseyawa 'ami tohanugetao ma tohekalesiyao mabwaiyami 'oimiya. Ma meItali wete 'idi helau sihesumaneyawa 'oimiya.

<sup>25</sup> Yehoba 'ina helau mabwaiyami 'oimiya. Emeni.

## YEMESA Yemesa 'ina lele

Yemesa Yesu 'ana tohemisao 'idi leta bewa 'ileleya, 'ihe'itegita 'abehega tayaliyaya miyamwau ma 'ebe tohona 'oidiya. Sahena tahemisamo Yesu 'oina, ta hesi tamuliya ma wete tagwae bwebwe'ana, ma sahena tamumuga mebale'u gidemusa. Wewelohe ta'abihetedi, ma sahena towasawasao nuwada si'ewa'ewa, weyahina 'abwa wasawasao mumugadi galana weyahina Yehoba loina mwauna 'i'ebwaedi. Cilobwaineya ma miyamwau 'oidiya tahe'alama'i'ita, ma ta'ahwanoi Yehoba 'oina ma 'i'abihetegita.

### *Gwae Helau*

<sup>1</sup> Yauwedo 'omi Yehoba 'ina tomotaiyao susu tuwelo 'oidiyega wamiya lelewana 'asa baibaiwadi 'oidiya. Bewa 'imi leta yaleleyawa, taugu Yehoba ma Bada Yesu Keliso 'idi topaihowa, sanigu Yemesa.

### *Hemisa ma sinasinapu*

<sup>2</sup> Tasigwao, tuta sinaonaoma 'oidiya 'eguma 'ebe tohona baibaiwadi ma wete mwaudi walobadi, weyahidi wayaliyaya, <sup>3</sup> ma wasanapu 'abehega 'ebe tohonaedi 'imi hemisa weyahina eema 'oidiyega watoholo pa'ala. <sup>4</sup> Coinega wa'ita yahigomi ma watoholo pa'ala moisa eema 'oinega 'imi mumuga mabwaiyana 'ibwebwe'ana.

<sup>5</sup> Ta 'eguma taiyawedi 'omi Yehoba 'ana sanapu moisa geya 'oimiya, Yehoba 'oina wa'ahwanoi, ma 'oimiya 'i'ebwaya, weyahina tauna Totagwala ma To'ebwaya moisa. <sup>6</sup> Wa'ahwa'ahwanoi ma'imi hemisa moisa ma geya'abwa ma'imi henuwanaluwa, weyahina taudi ma'idi henuwanaluwa taudi gidemusa bagodu silasalasa ni'u 'awawa, 'eguma yaumai 'isihesiheyedi. <sup>7</sup> Taudi wete geya'abwa sinuwanuwatuhu 'abehega to'aha siloba Bada 'oinega, <sup>8</sup> weyahina ma'idi henuwanaluwa 'idi paihowa baibaiwadi 'oidiya.

### *Tohewasawasao ma toweweloheyao*

<sup>9</sup> Ta tohekalesiyao wewelohedi 'eguma Yehoba 'igihanehedi siyaliyaya madouna. <sup>10</sup> Ma wete tohekalesiyao tohewasawasao 'ilobwainediya ma siyaliyaya 'eguma Yehoba 'ilagu suluhedi, weyahina tohewasawasao 'abwa sigumwala gide pwatula dididiyao. <sup>11</sup> Weyahina 'eguma sinenuga 'ihala 'oidiya nata 'ina waiwaiyega didiyaowedi siwelai ma sigubala, wete 'adi 'ita bwebwe'ana sigumwala. Gide tuwa wasawasaowedi 'abwa sipaipaihowa ma 'idi 'amasa 'ilomwayamwayau.

### *Cebe tohonao*

<sup>12</sup> Ceguma taiya 'owa 'ebetohonao 'oidiyega 'utoholo pa'ala, 'uyaliyaya, weyahina 'a maisa bwebwe'ana Yehoba 'oinega 'abwa 'uloba, beno yawasi hataya. Bewa Yehoba 'ina gwahemisa mabwaiyada 'oida, 'eguma tahelauwe.

<sup>13</sup> Ma 'eguma taiya 'owa 'ebe tohonedu 'ulobadi, sahena 'unuwagala ma 'ugwae 'abehega, "Yehoba 'itohotohogau." Weyahina tomota geya sawasawahidi ma Yehoba sitoho ma 'abehega tauna nuwatuhu galadi 'ida paihowadi, ta Yehoba wete geya tomota 'ida tohodiya ma nuwatuhu galadi sida paihowediya, <sup>14</sup> ma hesi taboi 'ida pui dahwana 'oinega nuwatuhu galadi 'ilililisigita, <sup>15</sup> ta 'ida pui dahwanaedi 'oinega paihowa galana 'ihapwesa, 'oinega wete muliyetega 'amasa 'ilatu.

<sup>16</sup> Yauwedo tasigwao, sahena 'imi nuwatuhu walagulagu puidi. <sup>17</sup> Ma hesi wasanapu moisa helau 'ausaladi mabwaiyadi galewega silatuma Yehoba 'oinega, tauna 'asilala 'adi topaihowa, ma wete geya 'ida buiya, gidemusa logulogu sibuibuidi. <sup>18</sup> Hesi tauna 'ina nuwatuhuwega, ta wete 'ina gwae moisa 'oinega 'ipaihowa nugetegita ma 'abehega tauda 'ana paipaihowao 'oidiyega tahemadou sinediya.

### *Gwae 'ana hesagoha ta 'ana paihowa*

<sup>19</sup> Tasigwao, 'ilobwainegomiya ma gwae wahesagohe bwaibwaini, ma sahena gwaehila ma gamwasowala 'oidiyega wahehewaiwai. <sup>20</sup> Weyahina tomota 'idi gamwasowala Yehoba 'ina 'eda dumwadumwaluna geya 'ilobwaine. <sup>21</sup> Coinega 'imi mumuga bi'ibi'idi ta 'imi puiyao mabwaiyadi wa'ebesinedi, ma watagwalegomi Yehoba 'oina, ta wete gwaeina 'atemiya Yehoba 'ibeguliya wahemisae, ma wahematamatane, ta 'oinega 'i'abihetegomi.

<sup>22</sup> Geya'abwa wahesagohamo, beno tuwa wa'abo'abowegomi, ma wapaihowa wete. <sup>23</sup> Weyahina 'eguma taiya 'ihesagohamo ma geya 'ida paihowa, tauna gide loheya 'aigeda gelasi 'oina manina 'i'iteya, <sup>24</sup> ta muliyetega 'itauya, ta tuta 'i'iuna 'oina manina 'ana 'ita 'inuwanaideya. <sup>25</sup> Ma Yehoba 'ina loina dumwadumwaluna 'oinega 'ida puiyao 'oidiyega 'ilihasigita. Ta 'eguma taiya loina weyahina 'inuwanuwatuhu ma 'ipaipaihowa, ma geya 'ida nuwanaideya, tauna loheyaina 'ina paihowa mabwaiyana yaliyayamo.

<sup>26</sup> Ma 'eguma 'aigeda loheya 'inuwa hanehane ta 'abehega tauna totpwalolo moisa, ma geya 'ina gwae 'ida 'itayahiya, tauna tuwa 'iboimo 'i'aboweya, nata 'ina tapwaloloina ginaula besobeso. <sup>27</sup> Ma hesi tapwalolo 'asilalana ma dumwadumwaluna Yehoba Tamada matana bewa 'abehega taudi sinasinagehenidi ma hiwahiwapedi 'idi miyamwau 'oidiyega ta'abihetedi, ta wete geya'abwa mumuga bale'uwegu ta'abi'abi hebi'igita.

## 2

### *Sahena tomota 'adi 'ita weyahina tagwaegwae hesinuwa*

<sup>1</sup> Cae tasigwao, 'omi 'ida Bada Yesu Keliso 'ana tohemisao, tauna tobwebwe'ana 'iya, 'oinega sahena 'imi hesinuwa tohewasawasao 'oidiya walagulagu. <sup>2</sup> Ceguma tomota 'eluwa siluhuwa 'imi hada tapwalolo 'alona, ma 'aigeda tohewasawasa ma'ana 'ale'o bwebwe'ana ta wete 'ana pasapasa bwebwe'ana, ta heluwena towewelohe 'ana 'ale'o bi'ibi'ina, <sup>3</sup> 'oinega 'eguma siteluwaedi wa'itadi nata towasawasaina wa'amayabe ma 'oina wagwae, "Cebemiya bwebwe'ana bewa 'oina 'umiyatoi," ta toheweweloheina nata 'oina wagwae "Benobwa 'utoholo," nuwana "Cumiyaatoi sehala," <sup>4</sup> ta 'eguma 'imi hesinuwa bewa gidemusa, 'ana 'ita geya bwebwe'ana, weyahina nuwatuhuina geya dumwaluna.

<sup>5</sup> Tasigwao, 'igu gwae bewa wahesagohe, 'abehega Yehoba towewelohe bale'uwa 'ihesinuwediyi ma hemisa 'oinega sihewasawasa. Weyahina Yehoba 'ina 'ebeloina 'igwae hemisaeya ma 'oina silatu, 'eguma tauna sihelauweya. <sup>6</sup> Ta hesi towewelohe geya wada he'asisyanediya, ma hesi taudi tohewasawasao loina pa'alina si'ebwa 'ebwaegomi, ta wete siloloheso hesoiyegomi 'ebe yatala 'oidiya.

<sup>7</sup> Wanuwatuhuyahi wete 'abehega 'ida Bada sanina 'i'ebwaegita, ma tohewasawasaedi hesiyage saninaina si'ahwa'ahwa galagalae. <sup>8</sup> Ta 'ida Bada 'ina loina madouna Buki He'asisi 'oina 'igwaeya, "Ciyamwao 'uhelauwedi gidemusa 'owa 'uhehelauwego." Loina bewa 'eguma 'umuliya bwaibwaini, beno mumuga bwebwe'ana. <sup>9</sup> Ma 'eguma tupwadi tomota wahe'ah'e'asisyanedi ma tupwadi tomota geya, beno loina wadi'wadi'wai, ma waboimimo 'imi mumuga wa'abi'abi hegaladi.

<sup>10</sup> Ta 'eguma taiya loina 'aigedamo 'idi'wai, beno 'abehega loina mabwaiyadi wete 'idi'wa pwaidiya. <sup>11</sup> Weyahina loina mabwaiyadi 'adi To'ebwaya 'aigeda tuwa, tauna 'igwaeya 'abehega "Sahena logwali," ma wete 'igwaeya "Sahena lohe'amasa." Ta 'eguma geya walogwali ma hesi walohe'amasa, beno 'ina loina wadi'wa pwaiya.

<sup>12</sup> Coinega 'imi gwae ma 'imi paihowa wa'itayahidi, weyahina Yehoba 'abwa 'ihesinuwegita 'ina loinega, ta 'ina loina beno tomota 'ada lihasa weyahina. <sup>13</sup> Weyahina 'eguma taiya geya 'iyanao 'i'atemuyamuyaedi, Yehoba gidemusa gesowana loheyaina 'i'atemuyamuyae. Ta 'eguma taiya to'atemuyamuya geya'abwa Yehoba 'ina bwa'o-matana 'imatamataute.

### *Ceguma hemisa geya paihowa mahetena hemisaina ginaula besobeso*

<sup>14</sup> Tasigwao, to'aha 'ana bwebwe'ana 'eguma 'aigeda taiya 'igwae, "Taugu ma'igu hemisa," ta 'ina paihowa geya dumwaluna. Sawasawahina 'abihetena 'iloba 'ina hemisege? Geya, 'awa? <sup>15</sup> Ma 'eguma tanuwanuwa tasidao ma nuhudao weyahidi,



taudi geya 'adi 'ale'omo ta wete geya 'adi 'e'ahaimo, <sup>16</sup> ta 'oidiya tagwaehelau, tagwae, “Yauwedo, wamiya bwebwe'ana ma wa'ai bwaibwaina,” ma geya lema ta'ebwaedi, to'aha 'ida gwae 'ana bwebwe'ana?

<sup>17</sup> Bewa gidemusa 'eguma hemisamo, ta geya paihowa ba'idana hemisaina gide 'ama'amasina. <sup>18</sup> Ma 'eguma tupwadi tomota sigwae, “Cowa ma'ino hemisa ta taugu ma'igu paihowa,” ta hesiyage taugu 'igu gwaehila 'abehega, “Ceguma 'ino hemisaina geya paihowa ba'idana, togidega 'ana bwebwe'ana? Ta taugu bewa 'igu hemisa yahe'itego 'igu paihowega.”

<sup>19</sup> Cowa 'uhemisa 'abehega Yehoba 'iboi 'aigeda. Beno bwebwe'ana. Ta 'unuwatuhuyahi 'abehega Tomudulele ma 'iyanao taudi 'idi hemisa gidemusa, ta wete ma'idi matauta. <sup>20</sup> Cowa yauyauleiu. Bewa 'ebe'ita ya'ebwaego 'abehega 'eguma hemisamo, ta geya paihowa, beno ginaula bwagabwaga.

<sup>21</sup> Cebe'ita bewa 'aigeda: tubudai Ebalahamo 'ina paihowega Yehoba 'i'ahwa bwebwe'aneya. Cina paihowaina beno natuna Aisake 'itagwaleya ta 'abehega 'ipwaoliye Yehoba 'oina. <sup>22</sup> Bewa 'oinega nata 'usanapu 'abehega Ebalahamo 'ina hemisa ma 'ina paihowa sipaihowa mahemahetena, ta 'ina paihowega 'ina hemisa moisa 'i'abilatuheya.

<sup>23</sup> Coinega Buki He'asisi 'ina hepwalkaina 'ilatu moisa 'igwaeya, “Ebalahamo Yehoba 'ihemiseya, ta 'ina hemisaina weyahina Yehoba Ebalahamo 'i'ahwa bwebwe'aneya,” ma wete 'i'ahwa 'iyaguweya. <sup>24</sup> Coinega 'usanapu 'abehega Yehoba 'i'ahwa bwebwe'anegita 'ida paihowega ma geya 'ida hemisamo 'oinega.

<sup>25</sup> Cebe'ita heluwena bewa: tauna toganawala Leyabi 'ina paihowa bwebwe'ana 'oinega Yehoba 'i'ahwa bwebwe'aneya, weyahina Yosua 'ina tohepili wasawasao 'eluwa 'ilemediya, ta hali 'eda 'ihe'itediya, ta 'oinega 'i'abihetediya.

<sup>26</sup> Gidemusa tuwa 'eguma wahida geya yaluyaluwanamo, beno 'i'amasana pwayia, ta 'eguma hemisa geya paihowa mahetena, hemisaina 'ama'amasina.

### 3

#### *Cida gwae 'ana 'itayahi*

<sup>1</sup> Tasigwao, sahena watohotoho ma baibaiwami wahetohe'ita, ma wasanapu 'abehega 'eguma tahe'ita ma geya tapaihowa, 'abwa Yehoba 'ihetalaegita.

<sup>2</sup> Moisa tuwa mabwaiyada pui tapaipaihowa. Ta 'eguma taiya tauna geya gwae galana 'ahwanega 'ida hapwesa, tauna loheya 'ehauna ta dumwadumwaluna, weyahina sawasawahina ma wahinao mabwaiyana 'iloinaedi. <sup>3</sup> Gidemusa tuwa hebai hosi 'adi 'ebe 'eyaisa 'ahwadiya talagudi ma ta'abihe manasami, ta 'eguma nuwanuwada ta'eha sitauyegita, 'eyaisina 'ana gulaha ta'abiyahidi ma 'oinega sawasawahina hebaiina wahina mabwaiyana taloinae.

<sup>4</sup> Cebe'ita wete bewa 'aigeda, 'eguma tanuwanuwatuhu waga weyahidi. Bwagana waga madoudi ma yaumai madoudi 'ipilipilihedi, ta 'adi 'eyaisa 'i'iuna tuwa, to'eyaisina sawasawahina ma wagaina 'iloinae ma to'eha nuwanuwana ma 'itauya, nata 'itauya tuwa.

<sup>5</sup> Gidemusa tuwa 'ahwada ginaula muhemuhena, ma sawasawahina ginaula maudoidi 'iloinaedi. Bewa wete 'aigeda 'ebe'ita 'abehega 'eguma 'aiwe 'ala'alasina muhemuhena nedu 'oina tatui, sawasawahina ma 'aiweinaina 'oinega nedu 'i'ala hegumwali. <sup>6</sup> Ta 'ahwada gidemusa 'aiwe mumugana, weyahina ginaula mabwaiyana galadi 'idi 'ebe he'ale. Coinega wahida mabwaiyana ta'abihegaladi 'ahwaina muhemuhena 'oinega. Moisa tuwa, galana mabwaiyana 'inaonaoma Tomudulele tauna 'oinega, ma ginaula mabwaiyadi 'ahwadega 'i'abi'abi hegaladi.

<sup>7</sup> Tomota tauda sawasawahida ma hebai ta'abihe manasami, taudi gidemusa totopwatula ma kwasumowao ma hebai 'awa'awalidi ta wete silahanao. <sup>8</sup> Ta hesi geya sawasawahina ma 'ahwada ta'abihe manasami. Weyahina 'ahwada ginaula gala hedada ma bonewala simiyamiya, 'oinega 'ana 'abihemanasami mwau hedade.

<sup>9</sup> Weteyage 'ahwadega Tamada Yehoba tahehepwatuwe, ta wete 'ahwadega 'iyadao ta'ahwa galagalaedi, taudi Yehoba 'ipaihowediya tauna 'ana 'ita gidemusa, <sup>10</sup> eeta

tasigwao, 'abehega 'ahwa 'aigeda gwae bwebwe'adi ma gwae galadi 'oinega silatulutama, geya 'ana 'ita bwebwe'ana. <sup>11</sup> Ta tanuwatuhuyahi 'abehega bwasi 'ilupwalupwama 'ana lotohona geya 'ida gihedumedumeya ma 'abehega 'eta tuta 'ausalana ta 'eta tuta memaina, <sup>12</sup> weyahina hola 'oinega geya sawasawahina ma we'aha 'ausalana taloba.

Tasigwao, gidemusa tuwa 'aiweina damaya 'oina geya sawasawahina ma mwawa'i\* huwaina 'ilagu. Gidemusa wete geya sawasawahina ma piyoi 'oina damaya huwaina 'ilagu. Cebe 'itaedi bewa gidemusa tuwa 'ahwa 'ina paihowao.

#### *Sinasinapu Yehoba 'oinega*

<sup>13</sup> Ceguma taiya 'owa ma'ino sanapu, 'upaihowa bwebwe'ana ma'ino nuwadobi, ma tomota 'abwa si'ita ma sisanapu 'ino mumuga bwebwe'ana.

<sup>14</sup> Ma 'eguma wahe'ipi'ipi ma wagamwasowala hali tomota 'oidiya, ta wete waboi 'imi nuwatuwao 'igihe gagasigomi, nata he'ita dumwadumwaluna wagihegaladi. <sup>15</sup> Mumugami bewa bo 'imi sinasinapuvedi bewa geya galewega, ma hesi bale'u mumugaidi Tomudulele 'oinega. <sup>16</sup> Weyahina 'eguma tomota sihe'ipi'ipi ma taudimo weyahidi sinuwanuwatuhu, nage 'oina sideya, ma mumuga galadi wete 'oidiya silatu.

<sup>17</sup> Ta 'eguma taiya 'ina sinasinapu galewega 'itauyama, tauna 'ina mumuga nugeta 'ehauna, ta wete nuwadaumwala, ma mumuga nuhanuhana, ma he'iyayiyagu ma 'atemuyamuya, ta 'abehega wete huwaidi bwebwe'adi silatulatu, ta geya 'iyanao 'ida lososomanediya, nuwana 'ida 'abowediya.

<sup>18</sup> Ma wete taudi topaihowa siwaloha 'idi paihowega mumuga bwebwe'ana sigihegihe hapwese.

## 4

#### *Bale'u 'ana nuwa'ewa*

<sup>1</sup> To'aha weyahina 'aleha ma he'ahupanapanawa silatulatu 'oimiya? Nuwana waboi 'imi nuwa'ubuna 'oidiyega, weyahina tuta mabwaiyana hali mumuga ma hali mumuga 'alomiya sipaipaihowa.

<sup>2</sup> Ceta tuta nuwanuwami 'iyamiyao 'idi tobwatobwa wa'ewadi, ta geya sawasawahimi, 'oinega walohe'amasidi. Ta ginaulaedi wanuwatuhu dahwanedi geya sawasawahimi ma wa'ewadi, 'oinega 'iyamiyao 'oidiya wa'ala'ala 'ohe'ohe ma wahe'upwa. Ma ginaulaedi geya wada lobediya weyahina geya weyahidi wada 'ahwanoiya Yehoba 'oina. <sup>3</sup> Ma 'eguma weyahidi wa'ahwanoi, geya wada lobediya, beno weyahina 'imi 'ahwanoi geya dumwaludi, weyahina 'imi 'ahwanoiyedi waboimo 'imi yaliyaya weyahina.

<sup>4</sup> Comi tohemisa 'abo'abowao! Ceguma bale'u mumugaina wahelauweya, beno Yehoba walo'aleheya, weyahina 'eguma taiya bale'u mumugaina nuwanuwana, tauna Yehoba 'ana 'aleha.

<sup>5</sup> Coinega sahena Buki He'asisi 'ina hepwaile wa'ahwa'ahwa muhemuheye tutaina 'igwae,

“Yaluyaluwaina Yehoba 'ilaguya 'oida nuwanuwana madouna tauda.”

<sup>6</sup> Ma hesi Yehoba 'ina lema 'oida 'imadou hedade, weyahina Buki He'asisi 'oina 'ihepwaile 'igwaeya,

“Yehoba togagasa 'i'ausidi, ma hesi tonuwasulu 'oidiya 'itagwala ma 'ilemedi.”

<sup>7</sup> Coinega Yehoba 'oina watagwalegomi, ma Tomudulele walogwahate ma tauna 'i'ebesinegomi. <sup>8</sup> Ta wanao Yehoba deina ma 'oinega tauna wete 'inaowa deimiya. Ta 'omi galami ma to'abo 'ilobwaineya ma nimami wadeulidi ma 'atemi wagihe'ehaudi. <sup>9</sup> Ta wete 'imi mumuga galadi weyahidi wadou gwaegwae ma'imi nuwagala, eema 'imi hedagiyao wagibui ma wadou, ta wete 'imi yaliyaya wagibuidi ma wanuwagala, <sup>10</sup> ta wanuwasulu Bada matana, ma 'oinega tauna 'igilagasigomi.

#### *Cahwa galagala hali tomota weyahidi*

<sup>11</sup> Tasigwao, sahena tasimiyao wa'ahwa galaedi, weyahina 'eguma taiya tauna tasina 'i'ahwagalae, nuwana 'iloinae, tauna geya Yehoba 'ina lina 'imuliye, ta hesi lina

'i'ahwa galaeya. <sup>12</sup> Yehoba 'iboimo loina 'ana to'ebwaya, ma wete toloina, tauna sawa-sawahina 'i'abihete bo 'ilohe'amasa, 'oinega 'omi sahena 'iyamiyao wa'ahwa galagalaedi bo waloiloinaedi.

#### *Sahena gwaehane*

<sup>13</sup> Gwae bewa wahesagohe, 'eguma taiyawedi 'oimiyega wagwae gagasa ma wagwae, "Nata bo gona 'atautauya 'asa madouna 'oina, ta nobwa bolime 'aigeda 'amiyamiya ma tauma 'ima paihowa 'apaihowadi, ma 'ahewasawasa," <sup>14</sup> ma hesi geya wasanapu yawasimi 'ina tautauya gona weyahina, weyahina tauda tomota gidemusa hogahoga. Cihapwesa tuta 'i'iuna tuwa, ta wete 'ilohesawala hila.

<sup>15</sup> Ma hesi 'ilobwaineya ma wagwae, "Ceguma Bada 'itagwala, 'ada miyamiya ma ginaulaedi nuwanuwama 'ada paihowadi." <sup>16</sup> Nata bewa wagagasa ma wagwaehane, ma hesi gwae haneina galana.

<sup>17</sup> Coinega 'eguma taiya paihowa bwebwe'adi 'isanapudiya, ma geya 'ida paihowediya, beno 'ina pui.

## 5

#### *Tohewasawasa 'adi hemataluwa*

<sup>1</sup> Comi tohewasawasao, hepwaila bewa wahesagohe bwaibwainidi, ma 'imi tuta mwau nata weyahina wadou ma'imi dou gwaegwae. <sup>2</sup> Weyahina 'imi wasawasao simwahulu pwaiya, ta wete 'ami 'ale'owao ganagana si'ai pwaidiya.

<sup>3</sup> Ta wete 'imi maneyao wanuwahidiya, 'oimiya simiyamiya ma sigala, ta maneina bewa sihepwaila 'abehega mane madou hedade wanuwahidiya, ta tuta 'ebe losaloha 'oina 'i'alasigomi, gide 'aiwe.

<sup>4</sup> Ma 'imi tanoha 'adi topaihowao geya wahemaisa bwaibwainidi, 'oinega topaihowaedi 'idi lomugi ta 'idi dou Yehoba Tohewaiwai tauna 'ihesagoheya.

<sup>5</sup> Ma 'imi miya bale'uwa bwebwe'ana hedade, weyahina tuta mabwaiyana ma'imi yaliyaya, 'oinega ma'ami tole bwebwe'ana, lohe'amasa 'ilobwainegomiya, gidemusa tuwa guyai baweidi. <sup>6</sup> Weyahina taudi todumwalu wabwa'omatanedi, nuwana walolohesamasi, ta geya sawasawahina ma 'oimiya sihemaisa.

#### *Calama'i'ita weyahina*

<sup>7</sup> Coinega tasigwao, wa'alama'i'ita 'ana siga 'ida Bada 'ihilama. Gidemusa tuwa tanoha 'ana topaihowa ma'ina 'alama'i'ita 'iyamwayamwana dohi yaigalugalu 'ana tuta ma bolimana 'ana tuta ee 'ana siga 'eli'eli 'ana tuta 'oina ma hewana 'i'elidi. <sup>8</sup> Coinega 'omi wete gidemusa wa'alama'i'itana ma'imi 'atepatu weyahina 'i'iunamo 'ida Badaina 'ihilama.

<sup>9</sup> Tasigwao, sahena waboi walomugi hilegomi, nata gide 'ida Bada 'ibwa'omategomi, ma tauna Toloinaina 'i'iunamo ma 'ilatuma.

<sup>10</sup> Coinega tasigwao, wanuwatuhuyahi palopitaowedi, taudi 'ida Badaina weyahina sihepwaila. Bewa 'ebe'ita bwebwe'ana 'oimiya, weyahina palopitaowedi 'idi miya mwauwedi 'oidiyega sitoholo pa'ala. <sup>11</sup> Ta 'eguma taiyawedi taudi gidemusa tahesaniyedi toyaliyaya, weyahina mwauwedi 'oidiyega sitoholo pa'ala. Ma bewa wete 'aigeda 'ebe'ita Yobi 'ina 'alama'i'ita weyahina wasanapu pwaiya, 'abehega Yobiina 'ina miya mwau 'ana 'ebe losaloha 'oina 'ana 'abihetena 'ilobeya 'ida Bada 'oinega, weyahina tauna Badaina helau ta 'atemuyamuya lamuna.

<sup>12</sup> Ma tasigwao, 'aigeda wete ginaula madouna 'oida 'abehega sahena ta'e-ta'wata'walulu Tamada saninega, nuwana bale'u ginaulao 'oidiyega, bo nuwana to ginaula tuwa 'oidiyega, 'eguma 'imi gwaeupaupa 'oidiyega. Ta hesi tuwa wagwae, "Cehe," 'eguma 'imi nuwatuhi gidemusa, ta 'eguma geya, wagwae, "Geya." Weyahina 'eguma gwae madoudi wa'inanadi, muliyetega Yehoba 'iheyatalaegomi.

<sup>13</sup> Ta 'eguma taiya 'imiyamwau, 'ilobwaineya ma 'i'ahwanoi Yehoba 'oina. Ta 'eguma taiya ma'ina yaliyaya, nata waliyega Yehoba 'ihepwatuwe.

<sup>14</sup> Ta 'eguma 'aigeda 'oimiyega ma'ina lohala, hekalesiya 'ana tohanugetao 'ibwauwed-ima, ma si'ahwanoi weyahina, ma wete holowa 'oina silagu 'ida Bada saninega. <sup>15</sup> Ta 'eguma ma'idi hemisa si'ahwanoi, Yehoba 'ileme tolotalaina ma 'ibwebwe'ana, ta wete 'eguma ma'ina pui, Yehoba 'inuwasamudi.

<sup>16</sup> Coinega 'aigeda 'aigeda 'oimiya 'imi galaowedi wahepwaledi, ma weyahina wa'ahwanoi, ma 'oinega 'imi bwebwe'ana waloba. Moisa, tobwebwe'adi 'idi 'ahwanoi waiwai hedade.

<sup>17</sup> Bewa 'aigeda 'ebe'ita 'oida, beno Ilaitiya, tauna tomota tuwa tauda gidemusa, ta 'i'ahwanoi nuwana mabwaiyana 'oinega ma 'abehega sahena 'idohidohi bolime 'etoi ma tupwana 'oidiya, eema geya 'idohi. <sup>18</sup> Coinega wete 'i'ahwanoi hila ta galewega dohi 'isuluma, ta 'e'ahai mabwaiyadi sibwala hila.

<sup>19</sup> Ma tasigwao, 'eguma 'aigeda taiya 'oimiyega 'eda bwebwe'ana 'i'ebesine, ma 'eguma taiya 'owa 'iyauina 'u'ewa hila 'eda bwebwe'ana 'oina, <sup>20</sup> nata togalaina yaluyaluwana 'u'abiheteya 'amasega, weyahina 'ina galaina mabwaiyana sigumwala.

## 1 PITA Pita 'ina lele 'aigeda

Pita 'ina lele bewa 'oinega 'ihe'itegita 'abehega Yesu mumugana mabwaiyana bwebwe'ana, ta hesi 'imiyamwauwa tutaina 'ina tuta miya bale'uwa. Coinega tauda wete tamiyamiyamwau gide tauna. Ma hesi 'ilobwainegita ma 'ateda tayaliyaya ma 'ida hemisa moisa, ma muliyetega Yehoba 'i'abihetegita.

### *Loyauwedo*

<sup>1</sup> Taugu Pita, Yesu Keliso 'ana tohepwaila, bewa 'igu leta 'oimiya 'omi Yehoba 'ina tomotaiyao wahetautaumana ma wahe'asa hali tupwa 'oidiya, gide Ponitio ma Galetiya ma Kapadosiya ma Esiya, ma wete Bitiniya 'asaidiyao 'oidiya. <sup>2</sup> Comi mwalo Yehoba 'inuwatuhugomiya ma 'ane 'ihesinuwegomi 'ina tomotaiyao, eeta 'ina Yaluyaluwa Tabuna bo'i 'igihe'ehau hilegomiya, beno Natuna bweyahinega, ma 'abehega Yesu Keliso 'ina 'enana wahematamatane. Sowasowana helau ma nuwadaumwala simadou 'oimiya.

### *Hemisa Yesu Keliso 'oina weyahina*

<sup>3</sup> Yehoba tahepwatuwe, tauna 'ida Bada Yesu Keliso tamana, weyahina 'i'atemuyamuyae'gita madouna ta li'u hauhauna 'i'ebwaegita Yesu Keliso 'ina toholo hila 'amasega 'oinega. Bewa weyahina tuta mabwaiyana tanuwatuhu 'abehega 'ina helauwao galewa 'abwa talobadi. <sup>4</sup> Nage 'oina helauwedi 'ilagu bwaibwainidi weyahimi, ma geya'abwa silamilamida bo sigalagala bo sitalatala sawala.

<sup>5</sup> Ma 'omi helauwedi wada lobadi, 'eguma Yehoba wahemisa 'abehega 'ina waiwaiyega 'ida 'itayahigomi, ta tuta 'ana 'ebelosaloha 'oina 'abihetenaina 'igibubuya weyahimi 'i'ebwaegomi.

<sup>6</sup> Coinega wayaliyaya madouna, mane gide tuta to'uto'upana tuwa bewa 'oina tupwana 'ebetohonao mwaudi walobalobadi. <sup>7</sup> Bewa 'oidiyega 'imi hemisaedi Yesu weyahina Yehoba 'itohodi. Gidemusa tuwa goula 'aiwe ganiganinisega sitohotohodi. Ma hesi 'imi hemisaina goula 'imadou sineya, weyahina goula ginaula gumwagumwalina. Ma 'eguma 'imi hemisaina waiwaina, 'abwa Yesu Keliso 'ina hapwesama 'oina hep watu ma wasawasa ma he'asisi walobadi.

<sup>8</sup> Keliso 'ina tauna geya wa'ita ma tuwa wahelauweya, ma bewa tuwa wete geya wada 'iteya, ma tuwa 'oina wahemisa ma'imi yaliyaya 'oina geya'abwa tagwaegwae. <sup>9</sup> Weyahina 'imi hemisaina 'ana masi 'oina walatuwa, beno yaluyaluwami 'adi 'abihetena. <sup>10</sup> Bewa 'abihetenaina mwalo palopitao sihesilaleya ma sibeseya, eeta 'imi 'abihetenaina sigwae hemiseya ma 'abehega Yehoba 'i'ebwaegomi. <sup>11</sup> Ma Keliso Yaluyaluwana 'atediya 'ihe'ita nugetediya 'ina muyao ma 'ina wasawasa muliyetega weyahidi eeta palopitaowedi sanapu si'ebeseya to tuta 'oina ma togidega 'abihetenaina 'ida hapwesa 'esa.

<sup>12</sup> Ma Yehoba palopitaowedi 'ihe'itediya 'abehega gwae hemisaedi sihepwaila nugetediya geya taudi siboi weyahidi ma 'omi hesi weyahimi, ma nuwatuhuwedi mwalo weyahidi sigwae pwaiya bewa wahesagohediya wasa bwebwe'ana 'ana tohepwailao 'oidiyega, beno Yaluyaluwa Tabuna galewega 'ina waiwaiyega. Ma nuwatuhuwedi sihegwagomiya, aneloseyao galewa nuwanuwadi ma taudi wete sida sanapu, ma hesi geya si'ita.

### *Mumuga 'ehauna*

<sup>13</sup> Coinega ginaula bewa weyahina 'imi nuwatuhu mabwaiyana wagihepa'alidi, ma wete 'imi hemisa walagu bwaibwainidi 'abehega tutaina Yesu Keliso 'ihapwesama 'ebe yaliyaya waloba Yehoba 'oinega.



<sup>14</sup> Yehoba 'oina wahematamatana, ma geya'abwa 'imi nuwa'ubunao siloiloinaegomi gidemusa mwalo 'imi tuta hemwagemwage 'oina. <sup>15</sup> Ma hesi 'imi paihowa mabwaiyadi 'oidiya wamumuga dumwalu, gidemusa tauna 'ibwauwegomiya 'ina mumuga dumwadumwaluna.

<sup>16</sup> Weyahina Buki He'asisi 'oina 'igwaeya,  
“Wagihe'ehaugomi, gidemusa taugu 'ehaugu.”

<sup>17</sup> Cabwa Yehoba 'ina loina 'aigeda dumwadumwaluna 'oinega tomota mabwaiyadi 'iloinaedi, gide 'ida paihowa, bwebwe'ana, bo nuwana galana. Tauna Yehobaina wahesaniyeya Tamamiu 'imi 'ahwanoi 'oidiya, sowasowana wahe'asisiyane tuta mabwaiyana bale'u bewa 'oina wamiyamiya.

<sup>18</sup> Mwalo 'imi mumuga tubumiyao 'oidiyega geya bwebwe'ana, 'oinega Yehoba 'ami he'isa 'ipaihoweya sabi 'abihetegomi. Ma he'isaina wasanapuya 'abehega geya ginaula gumwagumwalidi gidemusa siliba bo goula, <sup>19</sup> ma hesi he'isaina Yehoba 'ina lami bweyahina bwebwe'ana hedada 'oinega 'i'abihetegomiya, tauna Kelisoina bwebwe'ana hedada, geya 'eta to'aha galana 'oina.

<sup>20</sup> Yehoba Kelisoina 'ihesinuwa nugeteya 'ina paihowa bewa weyahina, ee muliyetega bale'u 'ipaihoweya, ma tutaina 'ebe gumwala bewa 'oina Kelisoina 'ihapwesama, tauda weyahida. <sup>21</sup> Eeta tauna Kelisoina 'oinega Yehoba wahemisaeya 'abehega tauna 'amasega 'igihetoholo hileya eeta 'ebemiya wasawasa 'oina 'ilaguya, 'oinega 'imi hemisa ma 'imi nuwatuhu walagu bwaibwainidi Yehoba 'oina. <sup>22</sup> Coinega 'eda dumwadumwaluna wamuliya bwaibwainiya, beno 'oinega 'imi 'ehauhila walobeya, ma wete taudi 'iyamiyao wahelauwedi 'atemi mabwaiyana 'oinega, eeta sowasowana 'omi wete wahelau hilegomi 'aigeda 'aigeda, helau moisa 'oinega.

<sup>23</sup> Comi bo'i wali'u hila pwaiya, geya tamamiyao 'ama'amasidi 'oidiyega, ma hesi Tamamiu mayawasina ma miyamiya hatayana 'ina gwae 'oinega. <sup>24</sup> Gidemusa tuwa Buki He'asisi 'ina hepwaile 'igwaeya,  
“Tomota mabwaiyadi gide modumodu ma 'idi wasawasao gide modumoduwedi hoyadiyao. Weyahina modumoduwedi muhemuhena ma si'amasa, 'oinega hoyadiyao wete siwelai.

<sup>25</sup> Ma hesi Bada 'ina gwae miyamiya hatayana.”

Gwaeina bewa 'oida 'imiyamiya, beno wasaina bwebwe'anaina wahesagoha pwaiya.

## 2

### *Logidiina mayawasina*

<sup>1</sup> Eeta 'imi galao ma 'imi 'e'abo'abowao gwaeyega bo paihowega ma 'imi he'ip'ipiyao ma 'imi 'ahwa galagalao waguipaledi, <sup>2</sup> ma hesi yaluyaluwami 'ana susu bwebwe'ana wa'ebese, gidemusa taudi gwagwama hauhaudi susu nuwanuwadi, eeta susuina yaluyaluwami 'adi 'abihetena weyahina.

<sup>3</sup> Comi 'ida Badaina 'ina 'atemuyamuya walotoho pwaiya, <sup>4</sup> 'oinega wanaoma 'oina, tauna logidi mayawasina, mebale'u silosomaneya, ma hesi Yehoba nuwanuwana eeta 'ihesinuweya.

<sup>5</sup> Coinega 'omi wete gide yowayowana mayawasina, yaluyaluwami watagwaledi, ma 'oimiyege Yehoba 'ina Hada 'ida 'abi, ma nage 'oina wahetopwaoli 'ehaumi, ma Yesu Keliso 'ilemegomi ma yaluyaluwamiyege wahetopwaoli bwebwe'ana Yehoba 'oina. <sup>6</sup> Gidemusa wete Buki He'asisi 'oina 'igwaeya,

“Wa'ita logidi bewa bwebwe'ana ma hesihesinuwaina yalagulagu nugete hada 'ana 'abi weyahina 'asa Saiyoni 'oina. Ceguma taiyawedi sihemisa tauna 'oina geya'abwa sideba mwadina.”

<sup>7</sup> Ma 'omi taiyawedi logidi bewa wahemisaeya, tauna 'oimiya 'abehega logidi bwebwe'ana hedade, ma hesi taudi geya 'oina sihemisae taudi weyahidi Buki He'asisi 'oina 'ihepwaileya, 'igwae,

“Logidiina mwalo to'abi hada silogwahateya, ma bewa tuwa sihetoholo pwaiya ma 'ihelogidi nugeta, ma logidi mabwaiyadi 'iloinaedi.”

<sup>8</sup> Ma wete 'igwae,

“Logidi bewa tomota 'idi 'ebetupa, 'abwa 'oina situpa ma sibe'u.”

Ma situpa 'oina weyahina gwae geya sihemisae. Bewa gide Yehobaina 'ina loina nugenugeta taudi weyahidi.

<sup>9</sup> Ma 'omi geya gide taudi, ma 'omi hesi Yehoba 'ina boda hesihesinuwaimi, 'omi Kiniina 'ina topwaoli ma 'ina tomotaiyao 'ehaumi, weyahina tupwa guguyou 'oinega 'ibwauwegomiya eeta 'ina 'asilala tobwebwe'ana hedada 'oina 'ilagugomiya, ma 'abehega 'ina paihowa bwebwe'anaina wahepwaile.

<sup>10</sup> Tuta mwalo 'oidiya 'omi geya waheboda 'aigeda, ma sauga bewa Yehoba 'oina waheboda 'aigeda pwaiya, ma mwalo wete Yehoba 'ina 'atemuyamuya geya 'oimiya 'imiyamiya, ma sauga bewa waloba pwaiya.

### *Yehoba 'ina topaihowao*

<sup>11</sup> Ciyagwao 'oimiya yahepwaila 'abehega tauda bale'u bewa 'oina tohetautau-mana, 'oinega 'imi nuwa'ubunaowedi 'atemiya simiyamiya walogwahatedi, weyahina yaluyaluwami silo'alehedi. <sup>12</sup> Ma wamumuga bwebwe'ana taudi geya meYudiya 'oidiya. Weyahina bewa tuwa 'abwa si'ahwa'ahwa galagalaegomi, ma tuta muliyetega 'imi paihowa bwebwe'ana si'ita, ma 'oinega tutaina Yehoba 'ilatuma Yehobaina sihepwatuwe.

<sup>13</sup> Comi Badaina 'ina boda, 'oinega 'ilobwainegomiya ma loina mabwaiyana bale'uwa wahe'asisiyanedi, gidemusa kini 'ina loina 'oina watagwalegomi, weyahina tauna toloina madouna, <sup>14</sup> ma wete gabemaniyao wahe'asisiyanedi, weyahina kiniina 'ihesinuwediya ma gabemaniyedi togala siloinaedi, ma tobwebwe'ana si'ahwa bwebwe'enedi. <sup>15</sup> Ma Yehoba 'ina nuwatuwu bewa ma 'eguma tomata'u'upao sigwae besobeso weyahimi, ma 'iyamo 'imi paihowa bwebwe'ana 'abwa si'ita ma gesowana to'aha weyahimi sigwaegwae.

<sup>16</sup> Ma 'omi hesi Yehoba 'ilihasi pwaigomiya ma 'abehega waboi waloinaegomi, ma hesi geya'abwa paihowa galadi 'oidiya watautauya, ma wapaihowa tuwa gidemusa 'omi Yehoba 'ina topaihowao. <sup>17</sup> Coinega tomota mabwaiyadi wahe'asisiyanedi, ma taudi Yesu 'ana tohemisao wahelauwedi. Yehoba 'oina wahe'asisi madouna, ma wete toloinaina kini wahe'asisiyane.

### *Keliso weyahida 'i'ehuyala*

<sup>18</sup> Ma 'omi topaihowao 'imi babadao wahe'asisiyanedi ma 'oidiya wahematamatana, ma geya 'abehega babadao bwebwe'adimo 'oidiya, ma wete taudi 'idi loina waiwai wete wahe'asisiyanedi. <sup>19</sup> Weyahina 'eguma geya 'aigeda 'imi paihowa galana, ma sigihemuya daisigomi ma Yehoba weyahina wanuwatuwu madouna eeta wa'alama'i'itana, beno mumuga bwebwe'ana Yehoba matana. <sup>20</sup> Ma wanuwatuhuyahi 'abehega 'eguma 'ida paihowa galana 'oinega sigihemuyegita ma ta'alama'i'ita, beno geya ginaula madouna. Ma hesi 'eguma 'ida paihowa bwebwe'ana 'oinega sigihemuyegita, ma ta'alama'i'itana, Yehoba weyahida 'iyaliyaya.

<sup>21</sup> Ma 'eda bewa weyahina Yehoba 'ibwau pwaigita, weyahina Keliso tauna weyahida 'i'emuyamuya eeta 'ebe'ita 'ilaguya 'oida ma 'abehega leleyana tamuliyedi. <sup>22</sup> Weyahina tauna geya 'ina galamo ma wete geya 'eta 'abo 'ahwanega 'ida latuwa. <sup>23</sup> Ma tutaina si'ahwa galagalaeya geya wete 'oidiya 'ihe'isa, ma wete si'ehemuyeya, geya wete 'igamwasowaledi, ma hesi Yehoba 'ihemiseya moisa, weyahina tauna Toloina dumwad-umwaluna.

<sup>24</sup> Ma weteyage Keliso tauna wahinega 'ida galao 'i'ahalidiya kelose 'oina, ma nage 'oinega 'ida mumuga galadi sigumwala, ma mumuga dumwaluna 'oinega tatauya. Tauna 'ana badi 'oinega 'imi bwebwe'ana walobeya. <sup>25</sup> Moisa, 'omi gide sipi hehebe'uina, eeta sipi 'adi to'itayahina 'itoe hilegomima 'oina, tauna yaluyaluwami 'ana to'itayahina.

## 3

*Haihaiyedi 'adi loina*

<sup>1-2</sup> Gidemusa 'omi wete tohai mewahinemi mwanemiyao wahe'asisiyanedi, eeta 'eguma taudi geya Yehoba 'ina gwae sihemisae, 'omi 'imi paihowa bwebwe'ana he'asisiyega wahe'itadi, ma 'oinega taudi wete sihemisa. <sup>3</sup> Ma geya'abwa wahe'au-pasegomi 'ahupasa hapwehapwesadi 'oidiyega, gidemusa debami wapaihowa bwaib-wainidi, nuwana ginaula goula 'oidiyega wahepasegomi, nuwana 'ami 'wamao 'ausaladi wa'otedi, <sup>4</sup> ma hesi 'atemi wahepasadi pasaedi miyamiya hatayadi 'oidiyega, taudi gidemusa mumuga nuhana ma nuwadobi 'oidiyega, Wanuwatuhuyahi mumugaedi 'abehega ginaula madouna Yehoba matana.

<sup>5</sup> Gidemusa mwalo taudi wahiwahine totapwalolo Yehoba sihemisaeya eeta 'atedi sihe'ahupaseya mumuga nuhana ma nuwadobi 'oidiyega eeta mwanediyao sihe'asisiyanediya. <sup>6</sup> Gidemusa wete Sela mwanena Ebalahamo 'enana 'ihematamataneya eeta 'lahwa badaeya. Ma 'eguma 'omi wamumuga bwebwe'ana ma geya 'eta to'aha wamatamataute, 'omi Sela natunao.

<sup>7</sup> Ma 'omi wete tohai meloheyami mamwanemiyao wamiyamiya, wanuwatuhuyahi 'abehega taudi we'awe'adi, 'oinega wahe'asisiyanedi ma wa'itayahidi, weyahina 'omi mamwanemiyao mahetemiyao yawasimi Yehoba 'i'ebwaegomiya. Bewa gidemusa wamumuga 'esa ma 'oinega geya'abwa to'aha galana 'imi 'ahwanoiyao 'i'abihewe'adi.

*Paihowa bwebwe'ana muya 'oina 'imiyamiya*

<sup>8</sup> Bewa 'igu gwae 'ana 'ebelosaloha 'oimiya 'abehega 'imi nuwatuhuwega ma 'ami lotohonega wahe'aigeda ma wahelau hilegomi, ma ma'imi nuwadobi wa'atemuya muyaegomi.

<sup>9</sup> Ma 'eguma tupwadi 'oimiya sipaihowa galana, geya'abwa 'oidiya wahehemaisa, ma 'eguma wete siheliyegomi geya'abwa waheheliyedi. Ma hesi wahemaisedi gwae bwebwe'ana 'oidiyega, weyahina Yehoba 'igwae hemisa pwaiya 'abehega 'ihelauwegomi, 'eguma 'omi gwae bwebwe'anega 'oidiya wahemaisa. <sup>10</sup> Gidemusa Buki He'asisi 'oina 'ihepwaila, 'igwaeya,

“Ceguma taiya tauna nuwanuwana ma 'iyaliyaya sabwelo mabwaiyana 'oidiya, 'ilob-waineya ma gwae besobeso ta 'abo 'ilolagu.

<sup>11</sup> Wete paihowa galadi 'ilogwahatedi ma 'ipaihowa bwebwe'ana hali tomota 'oidiya, ma wete 'ihetapewa waiwai nuwadaumwala weyahina.

<sup>12</sup> Weyahina 'ida Bada tuta mabwaiyana tobwebwe'anao 'ilomatayahidi, ma wete 'idi 'ahwanoiyao 'ihesagoha bwaibwainidi, ma taudi togala 'ilogwahatedi.”

<sup>13</sup> Moisa tuwa, geya sawasawahina 'eta taiya 'i'ehemuyegomi, 'eguma ginaula bwebwe'ana nuwami 'i'ewa'ewa, ma tuta mabwaiyana 'oina wapaipaihowa.

<sup>14</sup> Ma geya'abwa tomota wamatamatautedi bo nuwana wanuwawuwa mwau 'oidiya, ma hesi wayaliyaya, 'eguma ginaula bwebwe'ana wapaipaihowa ma si'ehe'ehe muyegomi, <sup>15</sup> ma hesi 'atemiyega 'ida Bada Keliso wahe'asisiyane. Ma 'eguma taiya 'ihesi-lalegomi ma 'igwae, “To'aha weyahina 'uhemihemisa?” nata 'omi wagwaehila ma'imi hepwe'ala bwebwe'ana 'oidiya, ma ma'imi mumuga nuhana 'oinega wahegwaedi.

<sup>16</sup> Ma to'aha wanuwatuhuya bwebwe'ana, tuta mabwaiyana gidemusa wapaipaihowa 'esa, 'oinega 'eguma taiyawedi si'ahwa galaegomi weyahina 'abehega 'omi Keliso 'ana tomuliyao, 'abwa sideba mwadina, 'eguma 'imi mumuga bwebwe'ana wahe'itedi.

<sup>17</sup> Ceguma Yehoba 'inuwatuhuya 'abehega muya taloba, 'ilobwainegita ta'emuyamuya 'ida paihowa bwebwe'ana weyahina, ma hesi geya 'ana 'ita bwebwe'ana 'eguma paihowa galana weyahina ta'emuyamuya.

<sup>18</sup> Gidemusa tuwa, Keliso ma'aigeda 'i'amasu 'ida galao weyahidi, ma tauna loheya bwebwe'ana, ma tauda galagalaida ma weyahida 'i'amasu, ta 'oinega 'itoegita Yehoba 'oina. Ma Keliso wahinamo silohe'amasiya, ma yaluyaluwana geya.

<sup>19</sup> Coinega yaluyaluwana 'ilatuwa ta 'itauya yaluyaluwa paipainidi 'oidiya 'ilohato-towa. <sup>20</sup> Yaluyaluwaedi tomota yaluyaluwadi, taudi mwalohene Nowa 'ina tuta Yehoba weyahidi 'ihe'alama'i'itana ma 'abehega 'oina sihemisa, ta geya. Coinega mabwaiyadi yagewa 'oinega sidamana, ma tupwadimo bwasiyega 'i'abihetediya, beno nima 'aigeda ma 'etoi, 'i'abihetedi wagaina Nowa 'i'abiya 'oinega.

<sup>21</sup> Bwasiina 'ihe'ita moisa 'oida 'abehega bewa tuwa bwasi 'ebe babitaiso 'i'abihetegita. Ma babitaisoina geya 'abehega wahida 'ana deulamo, ma hesi 'ida 'ahwanoiyega Yehoba 'ateda 'igihe 'ehaudi, Yesu Keliso 'ina toholo hila 'oinega, <sup>22</sup> tauna 'ihane pwaiya galewa, eeta bewa tuwa Yehoba 'ina 'ebeulega 'imiyamiya, ma aneloseyao ma toloinao mabwaiyadi galewa 'oina 'iloloinaedi.

## 4

### *Cida mumuga tabuidi*

<sup>1</sup> Wanuwatuhuyahi 'abehega tutaina Yesu 'ihetomotai muya 'ilobeya, ma 'imi nuwatuwu walagu Yesu gidemusa, ma 'oinega waboimo wagihepa'aligomi, weyahina 'eguma taiyawedi taudi wahidiyega muya silobediya, 'idi mumuga galana 'igumwala pwaiya.

<sup>2</sup> Coinega 'ida tuta mabwaiyana bale'uwa tamiyamiya tatagwalegita Yehoba 'oina ma tauna 'iloinaegita ma hesi 'ida nuwa'ubuna geya'abwa 'iloloinaegita.

<sup>3</sup> Mwalo 'imi mumuga galana gidemusa taudi tomiya ganamuli, ma mumugaedi bewa walogwahatedi, gidemusa sogala ma nuwa'ubuna ma bwasi waiwaidi 'adi numa yauyaule, ma he'iyai'yagu paihowa galadi weyahidi, ma wete hemisa 'abo'abodi hali ginaulao 'oidiya. <sup>4</sup> Ma tomiya ganamuliyedi sinuwa henainaida 'eguma 'omi geya mahetemiya ginaulaedi galadi wapaipaihowadi, 'oinega si'ahwa galagalaegomi. <sup>5</sup> Ma hesi Yehoba tomota mayawasidi ma 'ama'amasidi 'abwa 'ibwa'omatadi, ma wete taudi tomiya ganamuli 'abwa siyatala matana. <sup>6</sup> Bewa huhuna 'oinega wasa bwebwe'ana 'iguguyaeya to'amasao 'oidiya, ma tuta mayawasidiya 'adi lina mwauna silobeya, ma 'ane yaluyaluwadiyega yawasidi si'ewa Yehoba 'oinega.

<sup>7</sup> Muhemuhena ginaula mabwaiyana sigumwala. Coinega wa'itayahigomi ma 'imi nuwatuwu wagihepa'alidi, ma tuta baibaiwana wa'ahwa'ahwanoi Yehoba 'oina.

<sup>8</sup> Coinega wahelau hilegomi moisa 'aigeda 'aigeda 'oimiya, weyahina helau sawasawahina ma galana baibaiwadi 'igibodi. <sup>9</sup> Coinega 'iyamiyao wabwauwedi 'imi hada, nuwa bwebwe'anega, ma geya'abwa walolomugiyedi.

<sup>10</sup> Ma 'aigeda 'aigeda Yehoba heguheguyai hagana ma hagana 'i'ebwae pwaigomiya, 'oinega heguheguyaiyedi 'oidiyega wapaihowa ma 'iyamiyao walemedi, ma 'oinega 'omi Yehoba 'ina topaihowa bwebwe'ami. <sup>11</sup> Ceguma taiyawedi 'omi wahetohewpaila, wahetohewpaila tuwa gidemusa Yehoba 'ina gwae wahepwaileya, ma 'eguma taiyawedi 'omi walemalema, walema tuwa 'imi waiwai mabwaiyanega, gidemusa waiwaiina 'i'eb-waegomiya, ma 'oinega paihowa mabwaiyadi 'oidiyega tomota Yesu Keliso sisanapu ma Yehoba sihepwatuwe, weyahina tauna wasawasa moisa ma tohewaiwai moisa, tuta mabwaiyana 'oidiya. Emeni.

### *Yesu 'ina tomotaiyao si'emuyamuya*

<sup>12</sup> Ma tasigwao, geya'abwa ma'imi henainaida 'eguma tutaina 'ebe tohona mwaudi walobadi. Geya'abwa wanuwatuhuyahi 'abehega silatulatu daita, <sup>13</sup> ma hesi wayaliyaya, ma wete wanuwatuhuyahi 'abehega Yesu Keliso muya 'ilobeya, eeta 'omi gidemusa tuwa waloba 'ese, ma muliyetega tutaina 'ina wasawasa 'ihapwesama wayaliyaya madou hedada.

<sup>14</sup> Ma 'eguma tomota si'ahwa galagalaegomi 'imi hemisa Keliso 'oina weyahina, wayaliyaya tuwa, weyahina Yehoba yaluyaluwana 'asi'asilalaina 'oimiya 'imiyamiya. <sup>15</sup> Ma hesi geya ginaula bwebwe'adi weyahimi 'eguma walohe'amaso bo wayagaha bo wapui bo wapaihowa besobeso ma weyahidi muya waloba. <sup>16</sup> Ma ginaula bwebwe'ana

hesi 'eguma 'omi Keliso 'ina bodao ma muya waloba. Beno geya 'ebe debamwadina, ma hesi Yehoba wahepwatuwe, weyahina 'omi Keliso 'ina bodao moisa.

<sup>17</sup> Ma tuta 'ilatu pwaima ma 'ane bwa'omatana 'ihegaina, ma 'oinega Yehoba 'ina tomotaiyao 'ida bwa'omatana nugetedi, eema muliyetega taudi wasana bwebwe'ana geya sihemihemise, 'idi galao 'ana maisa mwau hedada siloba. <sup>18</sup> Ma Buki He'asisi 'oina 'ihewaila pwaiya, 'igwae,

“Yehoba 'oina mwauna ma 'abehega tobwebwe'adi 'i'abihetedi, ma hesi togidega togala, taudi Yehoba 'ana tologwahatao? Taudi beno 'adi 'abihetena mwau hedada.”

<sup>19</sup> Coinega 'eguma 'omi Yehoba 'ina nuwatuhi 'oinega muya walobalobadi, yawasimi watagwaledi tauna 'oina, ma 'ane 'i'itayahigomi, weyahina tauna 'ada Topaihowa bwebwe'ana moisa, ma 'omi wete gidemusa wamumuga bwebwe'ana.

## 5

### *Yehoba 'ina tomotaiyao 'adi 'itayahina*

<sup>1</sup> Tohekalesiyao 'adi babadao 'omi, 'abehega yagihenuwa yahigomi 'imi paihowa weyahina. Weyahina taugu 'aigeda wete tohekalesiyao 'idi bada, eema taugu mataguwega Keliso 'ina muya ya'iteya, ma 'abwa 'ina wasawasa 'asi'asilalana 'oina yamiyamiya to tuta 'eguma 'ina wasawasaina 'igihe hapwese.

<sup>2</sup> Coinega wete yahenuwa lagugomi 'abehega 'imi bodaowedi wa'itayahidi, taudi beno Yehoba 'ina tomotaiyao. Ma wa'itayahidi 'imi 'atetagwalega tuwa gidemusa Yehoba 'ina nuwatuhi, ma geya'abwa ma'imi logwahata. Ma 'imi paihowa wapaihowadi, geya 'ami maisa madouna weyahina, ma hesi 'ate tagwalega wapaihowa.

<sup>3</sup> Ma geya'abwa watoho ma wahetoloina 'oidiya, ma hesi mumuga bwebwe'ana wahe'itae 'oidiya, ma simuliyegomi. <sup>4</sup> Ma 'oinega tutaina To'itayahina madouna 'ilatuma, tauna 'oinega 'ami maisa bwebwe'ana ma miyamiya hatayana waloba.

<sup>5</sup> Coinega wete 'omi tubu hanehaneyao sowasowana babadao wahe'asisiyanedi, ma mabwaiyami wanuwadobi ma 'aigeda 'aigeda 'oimiya wahelemalema hilegomi. Gidemusa tuwa Buki He'asisi 'ina gwae gide, 'igwaeya,

“Yehoba tonuwahane 'i'ausidi, ma hesi tonuwadobi 'ihelauwedi.”

<sup>6</sup> Coinega wanuwadobi ma watagwalegomi Yehoba Tohewaiwai moisa nimana, ma 'oinega muliyetega tauna 'ina tuta bwebwe'ana 'oina 'igihanehegomi.

<sup>7</sup> Ceguma wanuwagala, beno 'ami mwayuao mabwaiyadi Yehoba 'oina wa'ebwae ma 'i'ewayahuledi, weyahina Yehobaina 'i'atemuyamuyaegomiya.

<sup>8</sup> Coinega walomata yahigomi bwaibwaini 'ami 'aleha Tomudulele 'oinega. Weyahina Tomudulele tauna gidemusa totopwatula, tuta mabwaiyana 'isakosakowasi ma 'i'e-be'ebesa 'abehega 'ana tai 'iloba, ma 'i'ai. <sup>9</sup> Ma geya'abwa wamatamatauta, ma hesi 'imi hemisa 'oina watoholo pa'ala, weyahina wasanapuya 'abehega 'iyadao taudi Yesu 'ana tohemisao mwauwedi silobalobadi tupwa mabwaiyana 'oidiya.

<sup>10</sup> Yehoba tauna 'atemuyamuya huhuna ma 'ibwau pwaigita ma 'abehega 'ina wasawasa miyamiya hatayana 'oina tamiyamiya Keliso mahetedai. Ma 'imi muya tuta 'i'i-unamo ma sigumwala, ma muliyetega Yehoba 'igihe 'ehaugomi ma 'igihepa'aligomi ma 'igihe waiwaiyegomi ma 'abehega wamiya bwebwe'ana. <sup>11</sup> Weyahina tauna Tohewaiwai miyamiya hatayana. Emeni.

### *Gwae helau*

<sup>12</sup> Cimi leta 'i'iuna bewa Sailasa 'ilemegauwa eeta yaleleya weyahimi. Tauna Sailasaina tahesaniyeya 'abehega tauna 'aigeda tasidai ma'ina hemisa. Coinega 'imi leta bewa 'oina nuwanuwagu ma Yehoba 'ina helau moisa yahepwaiwe 'oimiya, ma 'oina watoholo pa'ala.

<sup>13</sup> Ma wete tohekalesiyao tupwa bewa Babiloni 'oina 'idi helau 'oimiya. Taudi Yehoba 'ihesinuwediyi gidemusa tuwa 'omi 'ihesinuwegomiya, 'idi gwae helau 'oimiya. Ma wete natugu Maki 'ina gwae helau 'oimiya.



<sup>14</sup> Coinega wahelau hilegomi 'aigeda 'aigeda 'oina, ma wa'atusapwali hilegomi helau moisege. Ma 'omi Keliso 'ina tomotaiyao wamiya yaliyaya.  
Taugu Pita.

## 2 PITA

### Pita 'ina lele heluwena

Leta bewa 'alona Pita 'ihe'ote'otetela sanapu moisa Yehoba 'oinega weyahina, ta wete tohe'itao galadi 'idi he'ita 'abo'abo weyahina, ma wete 'ihe'ote'otetela Yesu 'ina hilama bale'uwa weyahina.

#### *Loyauwedo*

<sup>1</sup> Taugu Saimoni Pita ta Yesu Keliso 'ina topaihowa 'aigeda, nuwana 'ana tohepwaila, 'imi leta yaleleyawa. Comi ma taugu 'ida hemisa mahemahetena, ma weyahina tayaliyaya. Hemisaina talobeya 'ida Yehoba ma 'ada To'abihetena Yesu Keliso 'idi loina bwebwe'ana 'oinega. <sup>2</sup> Yehobaina ma 'ida Badaina Yesu 'adi sanapu 'oinega, helau moisa ma yaliyaya 'oimiya sihasiwa.

<sup>3</sup> Yehobaina 'ina waiwaiyega 'ilemegita, eema 'i'ebwaegita ginaulaedi baibaiwadi yawasida weyahina ta 'ida mumuga 'ehauna weyahina. Weyahina tauna tasanapuya 'abehega 'ihésinuwegita ma 'ane 'ina wasawasa ta 'ina mumuga bwebwe'ana 'i'ebwaegita. <sup>4</sup> Ma wete 'ina gwaé hemisa bwebwe'adi ma waiwai 'oidiyega mumuga bale'u 'ana nuwa'ubunao galadi wahasinedi, eema Yehoba 'ina mumuga bwebwe'ana waloba.

<sup>5</sup> Coinega watoho waiwai ma 'imi hemisa waloheposeyanedi bewa ginaulaedi 'oidiyega, nugeta mumuga bwebwe'ana, heluwena sanapu, <sup>6</sup> hetoina 'alama'itana, 'ehatana toholopa'ala, nima 'aigeda mumuga 'ehauna, <sup>7</sup> hesikisina 'ahwa'iyaiyana, ma 'ebelosaloha helau. <sup>8</sup> Ceguma ginaulaedi 'oimiya simadomadou moisa, 'ida Bada Yesu Keliso 'ana sanapu 'oina wahewaiwai, ma geya'abwa 'imi paihowa simudamudali. <sup>9</sup> Ma 'eguma ginaulaedi geya 'oimiya simiyamiya, 'ana 'ita gide mata gibugibuimi, weyahina 'ami gihe'ehau 'imi puiyao mwalo 'oidiyega wanuwanaide pwaiya.

<sup>10</sup> Coinega 'iyagwao, watoho waiwai ma geya'abwa Yehoba 'ana hesihésinuwao bodaedi 'oidiyega wamiyamiya latu. Ma 'eguma 'igu gwaé bewa wahematamatani geya'abwa wabe'ube'u, <sup>11</sup> ma 'oinega muliyetega ma'imi yaliyaya waluhu 'ida Bada ma 'ada To'abihetena Yesu Keliso 'ina 'ebeloina 'oina ma nobwa wamiya hataya.

<sup>12</sup> Coinega nuwanuwagu ma yalohatogomi ma nuwatuhu bewa wanuwatuhu yahidi, weyahina wasanapu pwaidiya eema sanapu moisa 'oimiya 'imiyamiya. <sup>13</sup> Ma tuta bewa mayawasiguwa yamiyamiya, 'ilobwainegauwa ma yahenuwa lagugomi ma 'omi wahetapewa mumuga bwebwe'ana weyahina. <sup>14</sup> Weyahina 'ida Bada Yesu Keliso 'ihe'ita pwaigauwa 'abehega 'i'iuna ma ya'ebesinegomi, <sup>15</sup> 'oinega yatohotoho waiwai ma 'abehega 'abwa 'igu 'waiha mulina he'itaedi geya'abwa wanuwanuwa sinedi.

#### *Keliso 'ina 'asilala si'iteya*

<sup>16</sup> Mwalo 'ida Bada Yesu Keliso 'ina waiwai ma 'ina tauyama 'ahepwailediya 'oimiya, ma 'ima hepwailaina geya tosonosonogao 'idi 'ote'otetelao 'oidiyega, ma hesi matamega tauna 'ina wasawasa 'a'iteya. <sup>17-18</sup> Ma tutaina mwalo mahetema 'oyai 'amiyamiya Yehoba 'enana galewega 'ahésagoheya, 'igwaeya, "Bewa Natugu moisa, tauna weyahina yayaliyaya madouna." Ma 'enanaina Tamana 'ina tupwa 'ehauna galewega 'itauyama eeta 'oyaina debana Yehoba hep watu ta wasawasa 'asi'asilalaina Natuna 'i'ebwaeya.

<sup>19</sup> Ma palopitao mwalo 'idi gwaé 'oidiyega Keliso sihepwaila nugeteya, ta tauma wete 'a'iteya, 'oinega 'omi 'ilobwainegomiya ma gwaeyedi wanuwatuhu yahidi, weyahina gwaeyedi gide wodam tupwa guguyou 'oina 'i'asi'asilala ma 'ana siga gona 'i'asale ma 'ubwana 'atemiya 'isaehane.

<sup>20</sup> Ma ginaula bewa wanuwabwaleni 'abehega palopitao 'idi gwaé Buki He'asisi 'alona geya sawasawahina taboimo 'adi gibui tasanapu, <sup>21</sup> weyahina palopitaowedi geya siboidimo 'idi nuwatuhuwega sigwaegwaenedi, ma hesi Yehoba 'oinega, ma Yaluyaluwa Tabuna palopitao 'ihenuwa lagudiya eeta gwaeyedi sigwaenediya.

## 2

*Tohe'ita 'abo'abodi weyahidi*

<sup>1</sup> Ma hesi mwalo hene tupwana palopita 'abo'abodi tomota gamwagamwanidiya silatuwa. Gidemusa 'abwa tohe'ita 'abo'abowao 'omi gamwagamwanimiya silatulatu, ma 'idi he'ita 'abo'abo 'oinega tomota sigihe galadi 'idi he'ita galana 'oinega. Badaina tauna 'ihegimwaneyegita bweyahinega, ma taudi siuhaleya, 'oinega maisa galana nata siloba.

<sup>2</sup> Ma tomota baibaiwa hedade 'idi paihowa galana gidemusa pui 'ebe debamwadina sihe'au'aunaowedi, beno Yesu 'ina 'eda moisa 'ana 'ebe 'ahwa galagala.

<sup>3</sup> Ma togalaedi tobwatobwa nuwadi 'i'eweya, 'oinega 'idi gwae hotohotowega 'abwa si'abowegomi ma 'imi tobwatobwa si'ewadi. Mwalo hene 'adi maisa Yehoba 'ilaguya eema 'iyamwayamwa namo, ma geya 'ida buiya.

<sup>4</sup> Weyahina Yehoba aneloseyao galadi geya 'ida 'atemuyemuyaediya, ma hesi gaula guguyou 'oina 'iula suluhediya, eema simiyamiya 'ana siga bwa'omatana 'ana tuta.

<sup>5</sup> Ma wete mwalo hene mebale'u mabwaiyadi geya 'ida 'atemuyamuyaediya, ma hesi yagewega togalaedi 'imutudiya. Ma Nowamo ma 'ina bodao site sebeni 'i'abihetediya, weyahina Nowa tauna mumuga bwebwe'ana 'ana tologuguya.

<sup>6</sup> Ma wete 'asaedi galadi Sodoma ma Gomola 'igabudiya eeta sihegawala, ma 'oinega 'abehega mabwaiyada tada sanapu ma geya'abwa tamumuga galana gidemusa taudi.

<sup>7</sup> Ma Lota taunamo 'asaedi 'oidiyega 'ina mumuga bwebwe'ana, 'oinega Yehoba 'i'abiheteya. Moisa Lotaina 'inu wagala togalaedi 'idi mumuga sogala weyahina. <sup>8</sup> Weyahina Lota togalaedi gamwagamwanidiya 'imiyamiya eeta 'idi mumuga galana 'i'ita'ita ma 'ihehesagohe eeta 'inu wagala madouna.

<sup>9</sup> Coinega tasanapuya Yehoba sowaswana tobwebwe'adi 'ebe tohowao 'oidiyega 'i'abihetedi, ma togalaedi 'iloinaedi ee 'ana siga sabwelo bwa'omatana 'oina.

<sup>10</sup> Moisa, 'eguma togalaedi Yehoba 'ina lina silogwahate, ma 'idi nuwa'ubunao bi'ibi'idi simulimuliyedi, beno 'adi maisa gala hedadena nata 'i'ebwaedi. Togalaedi wete gagasa huhudi, ma geya 'idi he'asisimo megalewa 'asi'asilalaidi 'oidiya, ma hesi si'ahwa'ahwa galaedi. <sup>11</sup> Ma aneloseyedi ma'idi waiwai madouna 'idi 'ebemiya Yehoba matana, ma geya 'ilobwainedi ma si'ahwa galagala tohe'ita 'abo'abowedi 'oidiya.

<sup>12</sup> Moisa togalaedi gide hebai. Hebai 'adi lotohonamo simulimuliyedi, ma geya sida nuwanuwa bwebwe'ana, 'oinega tomota hebaiyedi si'abiyahidi ma sihunudi. Togalaedi wete sanapu moisa geya sisanapu ma hesi si'ahwa galae, 'oinega taudi wete sihesilae, hebai gidemusa, <sup>13</sup> ma 'adi maisa 'idi pui weyahina 'igala moisa. Nuwanuwadi sabwelo 'aigeda 'aigeda siyaliyaya besobeso. Ma 'eguma mahetemiya wa'ai, 'idi mumuga galana 'oidiyega 'ami 'e'ahaina sigihebaili. <sup>14</sup> Ma 'idi pui 'ebedeba mwadina 'oinega sihemata ganawala, ma 'idi pui hilahila weyahina geya tani'odi 'ida towa. Ma towe'a sihanuhanugetedi 'eda galana 'oina, ma tobwatobwa 'ana nuwa'ewa 'oidiya 'imadou hedada. Ma Yehoba 'abwa 'ihemaisa 'idi mumuga galana weyahina.

<sup>15</sup> Ceda dumwadumwaluna si'ebesine pwaiya eeta sitauya puiya, 'oinega Bioli natuna sanina Balami 'ina mumuga galana mwalo hene taudi bewa tuwa simuliyeya, weyahina tauna nuwanuwana ma 'ina paihowa galana 'oinega 'ida hewasawasa, <sup>16</sup> ma hebai 'aigeda 'ase Balamiina 'ina mumuga galana 'igihe lolaguya, ma hebaiina tomota 'enadiyega 'igwaeya Balami 'oina eeta 'ina paihowa yauyauleina 'i'etobodeya.

<sup>17</sup> Ma tohe'ita 'abo'abowedi 'idi mumuga gide bwasi gaula geya bwasi dimo, ma taudi wete gidemusa yaloha, geya sida miya hohobiga, 'oinega Yehoba nata 'ilagu dobihedi gaula guguyou 'oina ma nobwa simiya hataya.

<sup>18</sup> Tohe'itaowedi 'idi mumuga galadi ma'idi gwae gagasa sihe'ote'oteli, ma wete nuwa'ubuna galadi 'oidiyega tonuwabui hauhau silisidi ma sihila 'idi mumuga nugenugeta 'oina. <sup>19</sup> Cadi tomuliyao 'oidiya sigwae, "Ceda bewa 'oina wanaoma, 'eda bwebwe'ana, ma geya 'eta wete 'etoboda 'imiyamiya." Ma geya, taudi 'idi mumuga galana 'oinega siboimo sipai hilediya.

<sup>20</sup> Taudi mwalo 'idi Bada ma 'adi To'abihetena Yesu Keliso 'ote'otetelina sihemisaeya eeta mumuga bale'u si'ebesineya, ma 'eguma silohihila mumuga miyamiyaidi 'oidiya nata sibe'u, ma 'oinega taudi sigala moisa.

<sup>21</sup> Taudi geya sisanapu mumuga bwebwe'ana 'ana 'eda, ma hesi he'ita 'abo'abodi simulimuliyedi, ee nata galana siloba. Ma hesi taudi mumuga bwebwe'anaina ma Yehoba 'ina loina 'ehauna 'ana tomuliyao, 'eguma si'ebesine sigala moisa. <sup>22</sup> Ta 'idi mumugaina gidemusa tuwa gwae hegehegedi 'aigeda 'igwaeya, “Cedewa tauna maiwaina 'i'ai hila.” Ma wete, “Bawe 'wapina tadeuli tagihe 'ehau ma muliyetega 'ihila ma 'iedobadoba'a hila.”

### 3

#### *Bada 'ina sabwelo madouna weyahina*

<sup>1</sup> Ciyagwao, bewa 'igu leta heluwena 'oimiya, ma 'igu letaedi 'eluwa 'oidiyega yatohotoho ma yahenuwa laguwegomi ma wanuwatuhu bwaibwaini, <sup>2</sup> ma Yehoba 'ina palopitao 'idi gwae nugenugetaidi wanuwatuhu yahidi, ma wete 'ida Bada beno 'ada To'abihetena, 'ina loina 'ana tohepwayilao loinaedi si'ebwaegomiya wete wanuwatuhu yahidi.

<sup>3</sup> Ma nuwatuhu 'aigeda sowasowana wada sanapu nugeta 'abehega tuta 'ana 'ebe losaloha 'oina tupwadi tolotuyeya silatu, ma Bada 'ina 'eda weyahina sigwaegwae besobeso, ma taudi 'idi nuwatuhu galadi simuliyedi, <sup>4</sup> ma sigwae, “To sauga 'imi badaina 'ihilama? Geya'abwa, bo? Mwalohene bale'u 'ana paihowa hauhauna 'oinega 'ana siga nige geya 'eta wete ginaula 'ida buiya. Mwalo tubudao 'ama'amasidi 'idi saugega 'ilagama, ginaula mabwaiyana 'adi 'itaedi tuwa. Geya sida buiya.”

<sup>5</sup> Taudi genuwadi sinuwatuhuyahi 'abehega mwalo hene Yehoba 'ina gwaeyega galewa 'ilatuwa, ma bwasi 'alonega bale'u 'ipaihoweya bwasiyega, <sup>6</sup> eeta muliyetega bwasiyega bale'u mabwaiyana 'igihegaleya. <sup>7</sup> Ma Yehoba 'ina gwaeyega galewa ma bale'u siyamwayamwa ma loina 'ana sabwelo 'oina nata 'igabu yahuledi ma togala 'ilohesawalidi.

<sup>8</sup> Ciyagwao, 'aigeda wete ginaula wanuwatuhuyahi, 'abehega bolime tausani gide sabwelo 'aigeda 'ida Badaina 'oina, ma wete bolime tausani tauna 'oina gide sabwelo 'aigeda mahemahetena.

<sup>9</sup> Tupwana tomota 'idi nuwatuhu 'abehega Yehoba geya'abwa 'ipaipaihowadi ginaulaedi mwalo 'igwae hemisaedi. Ma 'omi geya'abwa wanuwatuhuyahi 'eguma Yehoba 'ina paihowa 'oina gide 'iheheboi, ma hesi tauna ma'ina 'alama'i'ita 'iyamweyamwegomi ma mabwaiyami wanuwabui, ma genuwana 'aigeda taiya 'ihehe'waihi mahemahetena.

<sup>10</sup> Ma Bada 'ina bwa'omatana 'ana sabwelo 'abwama 'ina tauyama gide toyagaha ma 'ilohesalutuigitamo, ma galewa sisawala ma'ina 'alapwasi madouna, ma ginaula mabwaiyadi galewa 'aiwe 'ala'alasina 'oinega 'i'ala hesawalidi, ma wete bale'u ta ginaula mabwaiyadi 'oina 'i'ala hesawalidi.

<sup>11</sup> Ceguma ginaulaedi mabwaiyana 'abwa sisawala, 'ilobwaineya ma'imi mumuga 'ehauna ma ma'imi he'asisi Yehoba 'oina wapaihowa. <sup>12</sup> Ma wayamwayamwa ma'imi nuwatuhuyahina Badaina 'ina sabwelo hilama weyahina, ma tutaina 'oina Yehoba galewa nugenugetaidi ta bale'u nugenugetaidi 'ilohesawalidi 'aiwe 'ala'alasina 'oinega, <sup>13</sup> ma tauda tayamwayamwa ma galewa ta bale'u hauhaudi ta'itadi, gidemusa Yehoba mwalo 'igwae hemisa pwaiya, ta tupwainaina 'oina mumuga bwebwe'anamo 'imiyamiya.

<sup>14</sup> Ciyagwao, 'imi yamwana 'ana tuta watoho waiwai eeta 'eguma 'itauyama 'ilobwainegomiya ma 'imi mumuga bwebwe'ana mabwaiyana, ma nuwadaumwalega wamiyamiya.

<sup>15</sup> Ma wanuwatuhuyahi 'abehega 'ida Bada 'ina he'alama'i'ita huhuna 'abehega nuwanuwana ma 'ada 'abihetena taloba. Paulo 'iyadaina moisa, ma nuwatuhu bewa weyahina Pauloina 'oimiya 'ilele pwaiya ma'ina sanapu Yehoba 'oinega 'ilobeya.

<sup>16</sup> Eeta nuwatuhuina weyahina 'ihewaila 'ina lele nugenugeta mabwaiyadi 'oidiya. Ma tupwana nuwatuhuwao 'ina letao 'alodiya 'adi sanapu mwauna, 'oinega tohenainaidao ma towe'ao nuwatuhuwedi sigibuidiya, ta Buki He'asisi 'ina leleyao wete sigibuidiya ma si'abo, 'oinega siboidimo sigihe galediya.

<sup>17</sup> Ciyagwao, nuwatuhuwedi 'omi wasanapu pwaidiya, 'oinega wa'itayahigomi watoholo pa'ala ma geya'abwa togala si'abowegomi, 'amuge ta sihanugeta puigomi ma wabe'u. <sup>18</sup> Ma hesi 'ida Bada, tauna 'ada To'abihetena Yesu Keliso, 'ana sanapu ma 'ina helau 'oimiya 'imadomadou, ma tauna tahepwatu sauga bewa ta sauga baibaiwana sinaonaoma 'oidiya. Emeni.

Taugu Saimoni Pita.



## 1 YONI

### Yoni 'ina lelele 'aigeda

Yoni 'ina leta bewa 'alona 'ihe'ote'otetela helau ma 'asilala ta yawasi hataya Yesu 'oinega weyahidi.

#### *Gwaeina yawasida weyahina*

<sup>1-2</sup> Mwalo gwaeina yawasida weyahina Tamana ba'idana simiyamiya, 'oinega tauma wete tenamega 'ahesagoheya, ma wete nimamega loheyaina 'a'abitoheya, weyahina 'ihapwesa pwaima ta matamega 'a'iteya, ma tauna weyahina 'ahehepwaila 'oimiya, beno tauna yawasida miyamiya hatayaina huhuna, ma mwalo tauna tamana ba'idana simiyamiya ma 'oima 'ihapwesama.

<sup>3</sup> Tauna 'a'iteya ma 'ahesagoheya ma 'oimiya 'ahepwaila, 'oinega 'omi mahetemaotah'e'ia'yagu mahemahetena, ta wete Tamada ma Natuna Yesu Keliso mahetedao ta'ahwa 'iya'yagu mahemahetena. <sup>4</sup> Coinega 'imi leta bewa 'aleleyawa, 'itauyawa ma 'ane wahasili, ma tayaliyaya moisa, 'omi ma tauma.

#### *Yehoba 'asilala huhuna*

<sup>5</sup> Coinega wasa bewa sihegwaemaiya, ta 'ahepwaileya 'oimiya 'abehega Yehoba 'asilala huhuna, ma geya 'eta guguyou Yehoba 'oina 'imiyamiya. <sup>6</sup> Coinega 'eguma tupwa guguyou 'oina tamiyamiya, geya'abwa ta'e'abo'abo ma tagwae 'abehega, "Yehoba mahetedai ta'ahwa 'iya'yagu." Beno geya mumuga bwebwe'ana moisa. <sup>7</sup> Ma hesi 'eguma tupwa 'asilala 'oina tamiyamiya, gidemusa Yehoba 'ina tupwa 'asilala 'oina 'imiyamiya, beno ta'ahwa 'iya'yagu moisa, weyahina Natuna Yesu bweyahinega 'igihe'ehaugita 'ida puiyao mabwaiyadi 'oidiyega.

<sup>8</sup> Moisa, mabwaiyada topui tuwa, ma geya'abwa ta'e'abo'abowegita, ma tagwae "Taugu bwebwe'agu, ma geya 'igu puimo." <sup>9</sup> Ma hesi 'eguma tahepwaila moisa ma tagwae "Yapui pwaiya." beno Yehoba 'ida pui 'inuwasamudi ma 'igihe 'ehau hilegita, weyahina Yehoba mumugana dumwaluna ma ma'ana hemisa.

<sup>10</sup> Ceguma tagwae, "Geya wete 'aigeda tuta yapui," beno Yehoba ta'abo'abowe, weyahina 'ina gwae geya tahemihemiseae.

## 2

#### *Keliso tauna 'ada tolema*

<sup>1</sup> Cae natugwao, 'imi leta bewa yaleleyawa ma 'oinega geya sowana pui wapaipaihowa. Ma 'eguma tapui, Yesu Keliso tauna todumwadumwalu 'i'ahwanoi weyahida, Tamada 'oina, <sup>2</sup> ma 'ida puiyao 'inuwasamudi, weyahina Yesu tauna wahina 'ipwaoliyeya 'ida puiyao weyahidi, ma wete mebale'u mabwaiyadi weyahidi.

<sup>3</sup> Yehobaina tasanapuya 'abehega 'iyadai moisa, 'eguma 'ina loinao tahematamatanedi. <sup>4</sup> Ta 'eguma taiya 'igwaegwae ma 'igwae, "Taugu Yehoba 'iyagu." ma Yehoba 'ina loinao geya 'ihematamatanedi, beno 'i'abowa weyahina 'eda dumwaluna 'i'ebesineya. <sup>5</sup> Ma 'eguma Yehoba 'ina gwae tamulimuliye 'ina helau 'oinega 'ilohemahegita ma tasanapanu 'abehega 'iyadaina mahetedai tamiyamiya. <sup>6</sup> Eeta 'eguma taiya 'owa 'ugwae, "Taugu Yehoba 'iyagu ma mahetegu 'amiyamiya," 'ilobwainegowa ma 'umumuga gidemusa Yesu 'ina mumuga.

#### *Loina hauhauna*

<sup>7</sup> Ciyagwao, geya'abwa loina hauhauna yaleleleyawa, ma hesi loina miyamiyanaina wahesagoheya nugeteya, ta wasanapu pwaiya, bewa yalolohileyawa.

<sup>8</sup> Ma hesi loina bewa yalele hileya gide loina hauhauna helau weyahina, weyahina helauina Keliso 'ana lobwaina, ma 'omi 'ami lobwaina wete. Beno 'oinega guguyou 'igumwagumwala, ta 'asilala moisa 'isaehane pwaima.

<sup>9</sup> Ceguma taiya tasina 'ilo'alehe ma 'igwaegwae 'abehega tauna 'asilala 'oina 'imiyamiya, beno 'i'abo'abo, weyahina tauna 'abwa tuwa guguyou 'oina 'imiyamiya. <sup>10</sup> Ma wete 'eguma taiya 'owa 'iyamwao 'uhehelauwedi, 'owa 'asilala 'oina 'umiyamiya, 'oinega geya'abwa 'ube'ube'u. <sup>11</sup> Ma hesi 'eguma tasiu 'ulo'alehe, lamuna bewa weyahina 'owa 'abwa guguyou 'ina tupwa 'oina 'umiyamiya, ma wete guguyou 'oina 'utautauya, ma 'eda geya'abwa 'u'ita'ita, weyahina matau guguyou 'iumabodeya.

<sup>12</sup> Gwagwama yo, gwae bewa yaleleyawa weyahina 'imi puiyao Yehoba 'in-uwasamudiya, Yesu saninega.

<sup>13</sup> Babadao yo, gwae bewa yaleleyawa weyahina 'omi tauna mwalohene ta bewa tuwa 'imiyamiya wasanapu pwaiya.

Hewahewaliyao yo, gwae bewa yaleleyawa, weyahina tauna topuiina wahewaiwai sineya.

<sup>14</sup> Ma 'omi gwagwama madoumi, gwae bewa yaleleyawa weyahina Tamada wasanapu pwaiya.

Babadao yo, gwae bewa yaleleyawa weyahina 'omi tauna mwalohene ta bewa tuwa 'imiyamiya wasanapu pwaiya.

Hewahewaliyao yo, gwae bewa yaleleyawa, weyahina 'omi tohewaiwai ta Yehoba 'ina gwae 'imiyamiya 'oimiya, 'oinega tauna topuiina wahewaiwai sineya.

<sup>15</sup> Ciyagwao, geya'abwa bale'u bewa nuwami 'i'ewa'ewa, weyahina 'eguma bale'u tobwatobwanao nuwami 'i'ewa, bewa 'oinega Tamadai wanuwanaide, ma geya wada helauweya.

<sup>16</sup> Moisa, bale'u ginaulinao mabwaiyana, beno nuwa'ubuna ma tobwatobwa 'ana hamwa ma nuwahane, ginaulaedi bewa geya Tamadai 'oinega sitauyama, ma hesi bale'u 'oinega. <sup>17</sup> Ma bale'u bewa 'i'iunamo 'isawala, ma nuwatuhu bale'u tobwatobwanao weyahidi 'ilolagu, ma taudi hesi 'eguma Yehoba 'ina nuwatuhu sipaipaihowa simiya hataya.

#### *Keliso 'ana 'alehaina*

<sup>18</sup> Natugwao, tuta 'ana 'ebelosaloha 'itauya pwaima, ma mwalo wahesagoheya 'abehega Keliso 'ana 'alehaina 'i'iuna 'ihapwesama, sowasowana wanuwatuhuyahi Keliso 'ana 'alehao baibaiwadi bale'uwa simiyamiya, 'oinega tasanapuya tuta 'ana 'ebelosaloha bewa, <sup>19</sup> ma Keliso 'ana 'alehaowedi 'adi 'ita gide Keliso 'ana tohemisao, ma geya. Weyahina taudi 'eguma 'ida boda moisa, 'abwa mahetedao tamiyamiya. Ma hesi geya! Tuwa si'ebesine pwaigita.

<sup>20</sup> Ma 'omi taudi geya gidemusa, weyahina Yaluyaluwa Tabuna 'igihesanapu pwaigomiya, ma 'oinega sanapu baibaiwana wasanapuya, <sup>21</sup> ma geya 'abehega ma'imi henainaida 'imi leta bewa wahasihasi, weyahina he'ita dumwadumwaluna wasanapu pwaiya, ma wete wasanapuya 'abehega geya 'eta wete 'abo 'oinega 'ihapwesa.

<sup>22</sup> Ma taudi to'abowedi Yesu simwehihiyeya, ma sigwae, "Yesu tauna geya To'abihetena." Ceguma taiyawedi sigwaegwae gidemusa, taudi Keliso 'ana 'alehao, weyahina Keliso ma Tamana silogwahatediya.

<sup>23</sup> Ceguma taiya 'owa Yehoba Natuna 'ulogwahateya geya Yehoba maheteu wamiyamiya. Ma hesi 'eguma 'utagwalego Natuna 'oina, tauna ma Tamana mahetemwao wamiyamiya.

<sup>24</sup> Comi mwalo wasadi wahesagoheya, 'oinega 'eguma wasaina 'oimiya 'imiyamiya beno tauna ma Tamana mahetemiyao wamiyamiya. <sup>25</sup> Ma yawasidaina 'igwae hemiseya 'ida 'ebwaegomi, beno yawasida miyamiya hatayaina.

<sup>26</sup> Bewa mabwaiyana yalele pwaiyawa ma 'abehega wasanapu taudi 'ami to'abowao weyahidi. <sup>27</sup> Ma sanapuina wasanapu pwaiya, weyahina Yehoba Yaluyaluwana 'i'ebwae pwaigomiya, ta mahetemi wamiyamiya, ma 'ihe'itegomi. Coinega geya 'aigeda wete loheya sawasawahina ma 'ihe'itegomi, ma hesi Yehoba 'ina 'ebwaya 'oinega sanapu baibaiwana wasanapuya, beno sanapu moisa, weyahina Yehoba Yaluyaluwana geya

'i'abowegita. Coinega 'ina he'itao wamuliyedi, ma Keliso mahetemi wamiyamiya, ma geya'abwa wa'ebe'ebesine.

*Yehoba natunao weyahidi*

<sup>28</sup> Coinega natugwao, sowaswana ma Keliso 'oina wamiya hataya, 'oinega 'eguma tutaina 'ihapwesama, geya'abwa ma'imi matauta, nuwana ma'imi deba mwadina, ma hesi 'ina tauyama weyahina wayaliyaya. <sup>29</sup> Tauna mumugana wasanapuya mabwaiyana bwebwe'ana, eeta wasanapuya 'abehega tomota tobwebwe'ana, taudi wete Yehoba 'oinega sili'uma.

3

<sup>1</sup> Tauda 'eguma Yehoba 'oinega tali'u, tauna 'ida 'ahwa natunegita. Bewa 'ina helau madou hedadena weyahida. Ma hesi mebale'u Yehoba geya sisanapu, 'oinega mebale'uwedi geya'abwa si'ina'inanegita, 'abehega tauda Yehoba natunao. <sup>2</sup> Ciyagwao, bewa tuwa Yehoba 'i'ahwa natunegita ma muliyega to'aha 'ihapwesa 'oida? Beno tuwa tasanapu 'abehega 'ina hilama 'oina 'abwa 'ana 'ita tauna ta'ita, ma tauda 'ada 'ita 'ilagu buidi ma tauna gidemusa.

<sup>3</sup> Cida hemisa nuwatuha bewa weyahina, 'oinega mumugada tagihe'ehaudi, gidemusa Keliso.

<sup>4</sup> Ma hesi topui mabwaiyadi Yehoba 'ina lina siligeligehi, beno mumuga galana. <sup>5</sup> Ma wete tasanapuya, 'abehega Keliso 'itauyama 'ida mumuga galaedi sabi 'ewayahuledi, ma tauna geya 'eta wete 'ina puimo. <sup>6</sup> Eeta 'eguma tauda Keliso mahetenao tamiyamiya geya'abwa tapuipui, ma hesi taudi topuiyedi geya Keliso sida 'iteya, ma geya wete sida sanapuya.

<sup>7</sup> Natugwao, geya'abwa he'ita 'abo'abodi wamulimuliye, ma hesi nuwami 'ida sabwalena, 'abehega 'eguma taiyawedi taudi 'idi mumuga 'ausalana, taudi beno tobwebwe'ana, gidemusa Keliso. <sup>8</sup> Ta topui beno taudi Tomudulele 'ina bodao, weyahina tuta mwalo 'oinega ta nige, Tomudulele tauna topui. Coinega Yehoba Natuna 'ihenatuneya bale'uwa, 'itauyama Tomudulele 'ina paihowao sabi 'ahusepaledi. <sup>9</sup> Coinega wete 'eguma Yehoba 'oinega tali'uma gesowana tapui, weyahina mumuga hauhauna 'ateda 'ilagu pwaiya, 'oinega tauda Yehoba natunao geya sawasawahina ma pui wete tapaihowa.

<sup>10</sup> Coinega taudi ta'inanadi 'abehega taiyawedi Yehoba natunao, ma taiyawedi Tomudulele natunao, weyahina taudi Tomudulele 'ina boda geya'abwa sipaipaihowa dumwalu, weyahina geya sili'u Yehoba 'oinega, ma wete geya'abwa sihelau matasidiyao.

*Helau 'iyadao 'oidiya*

<sup>11</sup> Mwalo hemataluwa madouna bewa 'agwae nugeta pwaiya 'oimiya 'abehega 'iyadao mabwaiyadi tahelauwedi. <sup>12</sup> Ma geya'abwa Keni gidemusa, weyahina Keniina Tomudulele 'ina boda, ta tasina 'ihunuya. Ma 'ina lohe'amasaina huhuna tuwa he'ipi'ipi, weyahina tasina 'ina paihowa bwebwe'ana ma Keniina 'ina paihowa galana. <sup>13</sup> Tasigwao, geya'abwa wahenenainaida 'eguma mebale'u silo'alehegita. <sup>14</sup> Ma tasanapuya 'abehega 'amasa 'ina tupwa ta'ebesine pwaiya, weyahina 'atedega 'iyadao tahelauwedi, ta yawasida miyamiya hatayana taloba pwaiya, ma 'eguma taiyawedi taudi geya helau 'atediyega, taudi tuwa 'abwa 'amasa 'ina tupwa 'oina simiyamiya. <sup>15</sup> Moisa, 'eguma taiya tasina 'ilo'alehe, tauna tolohe'amasina tuwa, ma wasanapuya 'abehega geya'abwa taudi tolohe'amasaeidi yawasidi miyamiya hatayana silobaloba. <sup>16</sup> Ma wete helau tasanapuya, beno 'abehega Keliso yawasina 'itagwaleya ta weyahida 'i'amasina, 'oinega 'ilobwainegita wete ma yawasida tatagwale tasidao weyahidi.

<sup>17</sup> Ma hesi 'eguma taiya towasawasa 'imiyamiya, ma 'iyana 'aigeda 'imiya mwau, ma 'eguma geya 'aigeda lema 'i'ebwae, togidega Yehoba 'ina helau 'atena? Geya.

<sup>18</sup> Natugwao, geya'abwa 'ida helau gwaenamo 'oinega, ma hesi 'ida paihowega ma tada helau moisa.

*Geya'abwa tamatamatauta Yehoba matana*

<sup>19</sup> Ceguma 'ida paihowega tahelau, bewa 'oina tasanapuya 'abehega he'ita moisa 'oina tamiyamiya, ma geya sowana tamatauta Yehoba matana. <sup>20</sup> Ma 'eguma ma'ida matauta 'abehega tauda galada, beno Yehoba matautaedi 'igibodi, weyahina paihowa baibaiwana sawasawahina, ma wete sanapu mabwaiyana 'isanapuya.

<sup>21</sup> Ciyagwao, 'eguma geya 'ida 'ebe matautamamo, sawasawahina ma ta'atepatu Yehoba matana, <sup>22</sup> ma 'eguma to'aha ta'ahwanoie 'oina 'i'ebwaegita weyahina tauna 'ina loinao tahematamatediya, ma 'ida paihowao weyahidi 'iyaliyaya. <sup>23</sup> Ma 'ina loina 'eluwaedi 'abehega Natuna Yesu Keliso tahemise, ma 'iyadao tahelauwedi, gidemusa Keliso 'ada loina 'i'ebwaegita.

<sup>24</sup> Ta 'eguma 'ina loinao tamulimuliyedi, tauda 'oina tamiyamiya, ma tauna 'oida 'imiyamiya. Ma togidega 'ina miya 'oida tasanapu 'ese? Weyahina yaluyaluwana 'i'ebwaegita, ta 'oida 'imiyamiya.

#### 4

##### *Keliso 'ana 'alehao yaluyaluwadi galadi*

<sup>1</sup> Ciyagwao, sahena yaluyaluwa mabwaiyadi wahemihemisaedi, ma hesi watohodi, bwebwe'adi bo nuwana galadi. Ceguma taudi bwebwe'adi tasanapuya 'abehega Yehoba 'oinega sitauyama, ma taudi galadi hali tupwega sitauyama, weyahina bewa tuta palopita 'abo'abowao sihapwehapwesa mayaluyaluwadi geya Yehoba 'oinega. <sup>2</sup> Ma hesi Yehoba Yaluyaluwana wada sanapu weyahina 'eguma Yesu Keliso ta'ahwa moisa 'abehega 'iheloheya bale'uwa, 'ida gwaeyedi beno Yehoba Yaluyaluwana 'oinega. <sup>3</sup> Ma hesi yaluyaluwaedi 'eguma Yesu simwehihiye, taudi geya Yehoba 'oinega, ma hesi Keliso 'ana 'aleha yaluyaluwana 'oinega, ma Yesu 'ana 'alehaina mwalo wahesagoheya 'abehega 'itauyama. Ta moisa, bewa tuwa bale'uwa 'imiyamiya.

<sup>4</sup> Natugwao, 'omi Yehoba 'oinega wali'uma, 'oinega hali yaluyaluwaedi wahewaiwai sinediya, weyahina Yaluyaluwaina 'oida 'imiyamiya Tohewaiwai moisa, ma hesi yaluyaluwaina me bale'u 'oidiya 'imiyamiya, 'ina waiwai geya madouna.

<sup>5</sup> Ma taudi me bale'u, ta mumuga bale'u weyahina sihehegwaegwae, 'oinega me bale'u baibaiwadi 'enadi sihesagoheya.

<sup>6</sup> Ma tauda hesi Yehoba 'oinega tali'uma, 'oinega 'eguma taiyawedi Yehoba 'ana tosanapuwo, 'enada sihesagoheya, ma taudi geya Yehoba 'ana tosanapuwo, 'enada geya'abwa sihehesagohe. Coinega tasanapu 'abehega yaluyaluwa 'abo'abo 'oidiya 'imiyamiya, weyahina 'eguma Yaluyaluwa moisa 'oidiya beno 'enada sihesagohe.

##### *Yehoba helau huhuna*

<sup>7</sup> Ciyagwao, sowasowana mabwaiyada tahelau hilegita, weyahina Yehoba helau huhuna, 'oinega tohelauwao taudi Yehoba 'ihenatunediya, ma taudi Yehoba 'ana tosanapuwo. <sup>8</sup> Ma hesi taudi geya tohelau, taudi geya Yehoba 'ana tosanapuwo, weyahina Yehoba helau huhuna, <sup>9</sup> ta 'ina helau 'igihe hapweseya 'oida Natuna 'oinega, weyahina Natunaina 'iboimo 'ihetuneyama, ta bale'uwa 'itauyama, ma 'abehega yawasida moisa 'i'ebwaegita.

<sup>10</sup> Bewa helau moisa, geya 'abehega tauda Yehoba 'ana tohelauwao, Yehoba hesi 'ada tohelau, ta Natuna 'itagwaleya ma 'iboi 'ipwaoliyeya tauna, 'ida puiyao weyahidi. <sup>11</sup> Bewa 'oinega Yehoba 'ina helau 'imadou hedadeya. Ciyagwao, 'ilobwainegita ma tauda wete tada helau hilegita.

<sup>12</sup> Geya 'eta tuta me bale'u Yehoba sida 'iteya, ma tauda hesi 'eguma tahelau hilegita beno Yehoba mahetedai, ma 'ina helau moisa 'ateda 'imiyamiya. <sup>13</sup> Ta wete tasanapuya 'abehega tauda 'oina ma tauna 'oida, weyahina yaluyaluwana 'i'ebwae pwaigita.

<sup>14</sup> Ma tauma matamega Yehoba Natuna 'a'iteya, ta weyahina 'ahehepwaila 'abehega Tamana 'ihetuneyama bale'uwa 'abehega 'ada To'abihetena.

<sup>15</sup> Ceguma taiya 'owa 'u'ahwa moisa 'abehega Yesu tauna Yehoba Natuna, Yehoba 'oiuwa 'imiyamiya ma 'owa tauna 'oina 'umiyamiya.

<sup>16</sup> Coinega Yehoba 'ina helau 'oida tasanapu pwaiya, ta ta'ahwa moisaeya. Yehoba helau huhuna, 'oinega 'eguma taiya helau 'ina tupwa 'oina 'imiyamiya, tauna Yehoba 'oina 'imiyamiya ma Yehoba wete tauna 'oina 'imiyamiya.

<sup>17</sup> Bewa 'oinega tahelau hilegita moisa, ma bwa'omatana 'ana sabwelo 'oina geya'abwa tamatamatauta, ma hesi tada 'atepatu, weyahina tuta bewa bale'uwa tamiyamiya tauda Keliso gidemusa. <sup>18</sup> Eeta 'ida helauina 'oinega geya'abwa tamatamatauta, weyahina helau moisa matauta 'i'ewayahuleya. Ma hesi loina 'oina tamatauta, 'eguma helau moisa geya 'oida.

<sup>19</sup> Ta 'ida helauina huhuna bewa, weyahina Yehoba 'ihelau nugetegita.

<sup>20</sup> Ceguma taiya 'igwae, “Yehoba yahelauweya,” ma 'eguma loheyaina tasina 'ilo'alehe, tauna to'abo, weyahina tasidai ta'ita'ita, ma 'eguma tasidai geya tahelauwe, geya sawasawahida ma Yehoba tahelauwe, tauna geya tada 'iteya.

<sup>21</sup> Ma 'ada loina Yehoba 'oinega 'abehega tauna tahelauwe, ta wete tasidao tahe-lauwedi.

## 5

### *Yesu 'ana hemisa mumuga bale'u 'ihewaiwai sinena*

<sup>1</sup> Ceguma mabwaiyada Yesu tahemise 'abehega tauna To'abihetena, tauda Yehoba natunao. Ma wete 'eguma Tamana tahelauwe, natuna gidemusa tahelauwe. <sup>2</sup> Ceguma Yehoba tahelauwe, ma 'eguma 'ina loinao tahematamatedi, beno tasanapu 'abehega Yehoba natunao wete tahelauwedi. <sup>3</sup> Weyahina Yehoba 'ana helau ma 'ina loina 'ana hematamatana mahemahetena, ma 'ina loinaedi geya mwaudi, ma hesi meyameyahadi. <sup>4</sup> Coinega 'eguma Yehoba 'ihenatunegita mumuga bale'u tahewaiwaisine, ma 'ida 'ebe hewaiwaiina sanina hemisa. <sup>5</sup> Weyahina 'eguma Yesu Keliso tahemisa'e 'abehega Yehoba Natuna, bewa 'oinega mumuga bale'u tahewaiwai sinedi.

### *Yehoba Natuna 'ana hepwaita weyahina*

<sup>6</sup> Natunaina 'ina tauyama 'oida beno bwasiyega ma wete bweyahega, tauna Yesu Keliso, geya kwasimo 'oinega, ma hesi kwasi ma bweyaha wete 'oidiyega. Bewa weyahina Yehoba Yaluyaluwana 'ihewaita moisa, weyahina Yaluyaluwana mumugana dumwad-umwaluna. <sup>7</sup> Weyahina Yesu 'ana tohepwailao 'etoi simiyamiya, <sup>8</sup> beno Yaluyaluwa ma kwasi ma bweyaha, ta 'idi he'ita mahemahetena.

<sup>9</sup> Ceguma tomota 'idi hepwaita tahemisaedi, sawasawahina ma Yehobaina 'ina hepwaita tahemise, weyahina Yehoba tauna Tohewaiwai, ta Natuna weyahina 'ihewaita pwaiya 'oida. <sup>10</sup> Ceguma tauna tahemisa'e 'ateda talotoho 'abehega tauna Yehoba Natuna, ma hesi 'eguma geya tahemihemisa'e, bewa 'oinega ta'ahwa 'abo'abowe, weyahina 'ina hepwaita Natuna weyahina geya tahemise. <sup>11</sup> Ma 'ina hepwaitaina 'abehega Natuna 'oinega yawasida miyamiya hatayana 'i'ebwaegita. <sup>12</sup> Ceguma taiya Yehoba Natuna 'oina 'imiyamiya, loheyaina yawasina bwebwe'ana 'iloba pwaiya, ma 'eguma taiya geya Yehoba Natuna 'oina, tauna geya.

### *Yawasi miya hataya weyahina*

<sup>13</sup> Cimi leta bewa yalele pwaiyawa ma 'ane wasanasanapu 'abehega 'eguma Yehoba Natuna saninega wahemihemisa'e, yawasimi miyamiya hatayana waloba, <sup>14</sup> ma wete matana tayaliyaya weyahina 'ida 'ahwanoi 'ihesagohediya ma 'i'ebwaegita to'aha ma to'aha weyahidi ta'ahwa'ahwanoi, 'eguma tauna 'ina nuwatuhu wete gidemusa. <sup>15</sup> Moisa tuwa, 'ida 'ahwanoiyao mabwaiyadi 'ihesagohediya, 'oinega tasanapuya 'abehega 'ida 'ahwanoiyedi nata 'ihemaisedi.

<sup>16</sup> Tupwana pui 'adi maisa 'amasa ma tupwadi geya, 'oinega 'eguma taiya 'owa tasiu 'u'iteya 'ipuiya, ma puiina 'i'iuna geya 'ana maisa 'amasa, 'oinega 'eguma topuiina weyahina 'u'ahwanoi Yehoba 'oina, Yehoba 'ino 'ahwanoi nata 'ihesagohe, ma tasiu yawasina 'itagwale. Ma hesi puiyedi 'adi maisa 'amasa geya'abwa weyahidi wa'ahwa'ahwanoi Yehoba 'oina. <sup>17</sup> Pui mabwaiyadi galadi, ma tupwadi 'adi maisa geya 'amasa.



<sup>18</sup> Ma hesi tasanapuya 'abehega 'eguma Yehoba 'ihenatunegita geya'abwa tapuipui, weyahina tauna Yehoba 'ihenatuna nugeteya 'i'ita'ita yahigita, ma geya'abwa topuiina 'i'abi'abi tohogita.

<sup>19</sup> Ma wete tauda tasanapuya 'abehega Yehoba 'ihenatunegita, ma bale'u mumugaina 'ana topaihowao mabwaiyadi topuiina 'ina bodao.

<sup>20</sup> Ma wete tasanapuya 'abehega Yehoba Natuna 'itauya pwaima, ta 'igihenuwa sabwalenigita ma Yehoba tasanapu 'abehega tauna Todumwalu, ta 'oina tamiyamiya, weyahina tauda Yehoba Natuna Yesu Keliso mahetena. Yesuina Yehoba moisa, ma yawasida miyamiya hatayana huhuna tauna.

<sup>21</sup> Natugwao, wa'ita yahigomi hali 'ebe hemisao 'oidiyega, ma wadena sinedi.

## 2 YONI

### Yoni 'ina lele heluwena

Yoni 'ina leta bewa 'alona 'ihe'ote'otetela helau ma he'ita dumwaluna weyahidi.

#### *Loyauwedo*

<sup>1</sup> Taugu 'imi bada, ma 'owa wahine Yehoba 'ihésinuwegowa manatumwao 'imi leta bewa yaleleyawa. Moisa tuwa 'ateguwega yahelauwegomi. Taudi wete gide 'eda moisa 'ana tomuliyao sihelauwegomiya, <sup>2</sup> weyahina sanapu moisa 'ateda 'imiyamiya ma 'oida 'imiyahataya. <sup>3</sup> Coinega Tamada Yehoba ma Natuna Yesu Keliso 'idi helau ma 'idi 'atemuyamuya 'oidiyega nata tamiya daumwala, ma'ida gwae moisa, eema wete ma'ida helau.

#### *Keliso 'ote'otetelina wa'abiyahi*

<sup>4</sup> Mwalo natumwao tupwadi ya'itediya 'eda dumwadumwaluna simuliyeya, gide 'ada loina Tamada 'oinega, 'oinega yayaliyaya madouna.

<sup>5</sup> Nuhugu yo, yahegwaego wete bewa geya 'abehega loina hauhauna ya'ebwaego, ma hesi loina miyamiyanaina wahesagohe nugeteya, 'abehega mabwaiyada tahelau hilegita. <sup>6</sup> Weyahina 'eguma tahelau hilegita, beno Yehoba 'ina loinao tamulimuliyedi, ma loinaina mwalo wahesagoheya 'abehega helau 'ana 'eda 'oinega tatauya.

<sup>7</sup> Ma to'abowao baibaiwadi sihapwesa pwaiya bale'uwa ma siuhauhala sigwae, "Yesu Keliso geya 'iheloheya." Ceguma taiya gide 'i'abo 'esa, tauna Keliso 'ana 'aleha. <sup>8</sup> Coinega to'abowedi 'oidiyega wa'itayahigomi, ma 'imi paihowa 'ana maisa geya'abwa wauleule, ma hesi mabwaiyana wa'ewa. <sup>9</sup> Ma 'eguma watauya pui ma Keliso 'ina he'ita wa'ebesine, 'omi Yehoba wa'ebe'ebesine, ma hesi 'eguma Keliso 'ina he'itao wa'abiyahi momosidi, Tamadai ma wete Natuna 'oimiya simiyamiya.

<sup>10</sup> Ceguma taiya 'oimiya 'inaowa ma 'ina he'ita hagana, geya'abwa wabwaubwauwe 'imi hada, ma geya'abwa waloloyauwedowe, <sup>11</sup> nata gide 'ina paihowa galana waleme.

#### *Gwae 'ana 'ebe losaloha*

<sup>12</sup> Nuwatuhu baibaiwana simiyamiya eema nuwanuwagu weyahidi yaleleyawa, ma tuwa, weyahina yanuwatuhu yahiya 'abehega 'abwa yatauyawa 'omi mahetegwao tahegwaegwae, eema tayaliyaya moisa.

<sup>13</sup> Tasiu tauna wete hesihésinuwana Yehoba 'oinega, tauna natunao 'idi helau 'oiuwa.

### 3 YONI Yoni 'ina lele hetoina

Yoni 'ina leta bewa 'alona 'ihe'ote'otetela mumuga bwebwe'ana weyahina.

#### *Loyauwedo*

<sup>1</sup> Taugu 'imi bada, leta bewa yaleleyawa 'owa 'iyagu Geyo 'oiuwa. Moisa, 'ateguwega yahelauwegowa.

<sup>2</sup> Ciyagu, 'igu 'ahwanoi Yehoba 'oina wahu 'ina miya bwebwe'ana weyahina, yasana-puya weyahina yaluyaluwau 'ina miya bwebwe'ana, eema ma'ina yaliyaya. <sup>3</sup> Mwalo tupwadi tasidao sitauyama 'ebwa, ta 'ino mumuga dumwaluna tetelina 'oinega sigihe yaliyayaegauwa, weyahina 'eda dumwaluna 'oinega 'utautauya.

<sup>4</sup> Bewa 'igu 'ebe yaliyaya madouna 'eguma natugwao wasadi yahesagohe 'abehega 'eda dumwadumwaluna 'oinega sitautauya.

#### *Cada tolemao ma 'ada 'alehao weyahidi*

<sup>5</sup> Ciyagu, 'ino lema eema 'ino paihowa tasidao ma taumanao 'oidiya, tutaina 'eguma 'ino 'asa sihapwesawa, weyahina yayaliyaya. <sup>6</sup> Ma tasidaowedi 'eguma sihilama 'ino helau 'oidiya weyahina sihehepwaila tohekalesiyao 'oima. Moisa tuwa, taudi Yehoba 'ina topaihowao, 'oinega 'ilobwaineya 'eguma si'ebe'ebesinegomi nima'abiyadi wete wa'ebwaedi. <sup>7</sup> Taudi Keliso 'ina paihowa weyahina sisakosakowasi, ma lema geya sida lobeya taudi geya Yehoba 'ana tohemisao 'oidiyega. <sup>8</sup> Coinega 'ilobwainegita ma tauda talededi, eema taudi mahetedao tahetopaihowa mahemahetena 'eda dumwadumwaluna weyahina.

<sup>9</sup> Cami hemataluwa ya'etoladi pwaiyawa, 'omi tohekalesiyao, ma loheyaina sanina Diotilipi nuwanuwana ma taunamo 'ida loina, 'oinega taugu 'igu loina 'i'ausiya, <sup>10</sup> ma 'igwae hesihesinuwegauwa, ma wete 'iyadao 'ilososomanediya, ma 'eguma tupwadi 'oimiyega nuwanuwadi ma silemedi 'i'ausidi, ma tohekalesiyaowedi 'ipa'ipa'idi. Coinega 'eguma 'abwa yalatuwa beno 'ina mumugaedi yahegwaegwae weyahidi.

<sup>11</sup> Ciyagu, geya'abwa mumuga galana 'umulimuliye, ma mumuga 'ausalana hesi. Tobwebwe'anao taudi Yehoba 'ina bodao, ma topuiyao geya Yehoba sida sanapuya.

<sup>12</sup> Ma Dimitilo tauna loheya bwebwe'ana. Tomota mabwaiyadi 'idi hepwwaila gidemusa, weyahina taudi he'ita moisa 'ana tomuliyao sihehepwaila 'abehega Dimitilo loheya bwebwe'ana, ma taugu wete 'igu hepwwaila gidemusa, ma 'igu hepwwaila wasanapuya 'abehega gwae moisa.

#### *Gwae 'ana 'ebelosaloha*

<sup>13</sup> Nuwatuhu baibaiwadi simiyamiya ma nuwanuwagu yaleleyawa weyahidi, <sup>14</sup> ma tuwa, weyahina yanuwatuhu yahiya 'abehega 'abwa yatauyawa ma 'owa mahetegu tahegwaegwae.

<sup>15</sup> Yauwedo 'owa. Ciyadao 'ebwa 'idi helau 'oiuwa. Ma 'iyadao nobwa sanidi 'aigeda 'aigeda wete 'oidiya 'igu helau 'uhepwwaile.

## YUDE Yude 'ina lele

Yude 'ina leta bewa 'ileleya 'abehega tohe'ita 'abo'abo tasanapudi ma taguipaledi.

### *Yauwedo*

<sup>1</sup> Taugu Yude, Yesu Keliso 'ina topaihowa, Yemesa tauna tasigu. Bewa 'imi leta yaleleyawa, 'omi Tamadai Yehoba 'ana hesihesinuwao, weyahina 'ihelauwegomiya ma Yesu Keliso 'i'ita'ita yahigomi. <sup>2</sup> Yehobaina 'ina 'atemuyamuya ta 'ina yaliyaya ta 'ina helau 'oimiya 'ihemadou.

### *Tohe'ita 'abo'abowao*

<sup>3</sup> Ciyagwao, nuwanuwagu ma 'ada 'abihetenaina weyahina yaleleyawa, ma hesi geya sawasawahina, weyahina 'aigeda mwau 'ihapwesa pwaiya 'oimiya, 'oinega 'ilobwaineya ma leta bewa 'oinega yalohatotogomi ma 'abehega geya'abwa 'ida tapwalolo dumwad-umwaluna walologwahate, ma hesi wahetapewa weyahina.

Weyahina 'ida tapwaloloina tauda Yehoba 'ana tohemisao 'i'ebwae pwaigita.

<sup>4</sup> Mwauina 'ihapwesa pwaiya 'oimiya, beno tupwadi togala si'abowegomiya ma 'imi boda 'oina siluguwa, 'oinega Yehoba 'ina helau 'oida taudi 'idi he'itega sibuiya ma ganawala, ma wete 'ida Yehoba ma Bada Yesu Keliso silogwahatediya. Taudi 'idi galao weyahidi 'adi loina mwauna mwalohene Yehoba 'ina buki 'oina silele pwaiya.

<sup>5</sup> Sanapu 'aigeda yahegwae hilegomi, weyahina mwalo wanuwa sabwalena, 'oinega wada nuwatuhuyahi, beno mwalohene Yehoba 'ina bodao 'i'abihetediya eeta sihapwesa tupwa Itipita 'oinega, ma muliyetega Yehobaina tupwadi 'ihunudiya, taudi geya sihemi-hemisa.

<sup>6</sup> Aneloseyao wete nuwatuhuhu yahidi, weyahina mwalo tupwadi taudimo si'abi hanehediya, ma 'idi 'ebemiya si'ebesinediya, 'oinega Yehoba 'ipai momosidiya eeta tupwa guguyou ni'uwa 'oina 'ilagudiya, ma nobwa 'abwa simiyamiya 'ana siga bwa'omatana 'ana sabwelo 'ihapwesa.

<sup>7</sup> Taudi 'idi mumuga gidemusa tupwadi 'asa mwalohene, beno Sodoma ma Gomola ma tupwadi 'asa deidiya, weyahina pui 'ana nuwa'ewa madouna 'oinega sipaipaihowa besobeso ma 'idi 'eheloheloheyao mahetediyao sipuipui, 'oinega Yehoba 'igabudi 'aiwe 'ala'alata hatayana 'oina. Ta he'itaina bewa mabwaiyada weyahida.

<sup>8</sup> Ma togalaedi silugu pwaiya 'oimiya, 'idi mumuga mahemahetena, weyahina taudi 'idi nihiyao 'oidiyega siloina galana, eeta 'idi galao 'etoi sipaipaihowadi, 'aigeda wahidi sigihe bailidi, heluwena toloinao bwebwe'adi silogwahatediya, ma hetoina tomiya galewa bwebwe'adi si'ahwa galagalaedi. <sup>9</sup> Ma aneloseyao 'idi tohanugeta Maikeli mwalohene 'ihe'ahupanapanawa Seitani 'oina, Mosese wahina weyahina, ma Maikeliina geya Seitani 'i'asone, ma hesi tuwa 'igwaeya, "Bada 'i'ausigo."

<sup>10</sup> Ma togalaedi, 'eguma to'aha geya sisanapu, ma tuwa si'ahwa galagalaedi, weyahina taudi gide hebahebai totopwatula, ta 'adi lotohona siloiloinaedi, ma 'oinega siboidimo si'abi'abi hegalaedi. <sup>11</sup> Nuwa'ole'olediyehina Keni 'ina 'eda galana 'oinega sitautauya, ma 'oinega 'idi wasawasa weyahina simumuga galana, gidemusa wete Balami mwalo mumugana. Coinega sihesilae, weyahina loina bwebwe'ana silogwahateya, mwalo gidemusa Kola tauna loina 'ilogwahateya.

<sup>12</sup> Ceguma tapwalolo 'oina helau 'e'ahaina wapaipaihowa ma 'eguma togalaedi siluguwa, 'e'ahaiina si'abihegala, weyahina si'ai hedahedada ma geya sida deba mwadina. Nuwanuwadi taudimo siyaliyaya, 'adi 'ita gide yaloha dubana yaumai 'ipeineya ma geya dohi. Wete 'adi 'ita gide 'aiwe, 'ina sauga huwa ma geya huwainamo, 'oinega sigoha yahule ma 'i'amas moisa. <sup>13</sup> Ma wete 'adi 'ita gide bagodu madoudi ma gwalobusobusodi 'idi paihowao 'ebe deba mwadina. Wete 'adi 'ita gide 'ipwalao siyawala besobeso galewa, 'oinega guguyou 'ina tupwa simiya hataya.

<sup>14</sup> Mwalohene Inoke togalaedi weyahidi 'iloguguya, ma Inokeina 'eguma yasoyao tahasilidi Adama 'oinega ma 'itauya yaso sikisi sigumwala, ma yaso hesebenina beno Inoke 'ina yaso. Eeta Inokeina 'ina loguguya 'oina 'igwaeya,  
 “Wa'ita! Bada 'ina aneloseyao 'asi'asilalaidi ma mabwaiyadi mahetenao sinaonaoma,  
<sup>15</sup> ma 'abehega tomota mabwaiyadi 'iloinaedi ma 'ibwa'omatadi, 'idi mumuga baibaiwadi ma galadi weyahidi, ma wete 'idi 'ahwa galao mabwaiyana 'oina weyahina.”

<sup>16</sup> Tomotaedi tolomugi ma tosinala, ma taudi 'adi lotohona 'oinega sitautauya. Wete togwaehanehane, ma 'eguma 'iyadiyao 'oidiya sigwae helau, beno tobwatobwa weyahina.

### *Wa'ita yahigomi*

<sup>17-18</sup> Ciyagwao, 'ida Bada Yesu Keliso 'ana tohepwailao 'idi gwae hemisa wanuwatuhuyahi tutaina mwalo sigwaeya, sigwae,  
 “Tuta 'ana 'ebelosaloha 'oina tupwadi tomota nata mumuga dumwadumwaluna silo-tuyane, weyahina taudi 'adi lotohona galana 'iloiloinedi.”

<sup>19</sup> Togalaedi mumuga bale'u simulimuliye, 'oinega tohekalesiyao 'adi towatahao, weyahina Yaluyaluwa Tabuna geya 'oidiya.

<sup>20</sup> Ciyagwao, 'ilobwainegomiya ma tapwalolo dumwaluna wa'abiyahi momosi ma 'oinega wagihe pa'aligomi, ma wete Yaluyaluwa Tabuna 'ina waiwaiyega wa'ahwanoi Yehoba 'oina, <sup>21</sup> ma wete helauina Yehoba 'oinega wa'abiyahi, ma wayamwayamwana tolahisa 'abwa 'ida Bada Yesu Keliso 'ina 'atemuyemuyega yawasimi miyamiya hatayana 'i'ebwaegomi.

<sup>22</sup> Ma tupwadi 'iyadao geya sihemihemisa moisa, watoho ma waghenuwa sabwalenidi.  
<sup>23</sup> Tupwadi wete 'asa 'ala'alata deina simiyamiya, watoho ma wa'abihetedi. Tupwadi wete togalagala wa'atemuyamuyaedi ma walemedi, ma 'idi mumuga wamataute, eema mumuga bale'u 'ana tobwatobwao walogwahatedi.

### *Gwae helau*

<sup>24</sup> Yehobaina sawasawahina 'ilomata yahigomi ma geya'abwa wabe'ube'u ee 'ana siga tutaina tauna matana 'inaolegomi 'ina 'asa 'asi'asilalaina 'oina, ma'imi mumuga bwebwe'ana, ma wete ma'imi yaliyaya madouna. <sup>25</sup> Yehoba taunamo 'ada To'abihetena. Cabihetenaina 'ipaihoweya 'ida Bada Yesu Keliso 'ina paihowega. Coinega tahepwatuwe 'ina loina dumwadumwaluna ma waiwaina mwalohene ta nige ma tuta sinaonaoma 'oidiya. Emeni.

Taugu Yude.



## HE'ITA'ITA

### Yoni 'ina he'ita'ita Yesu 'oinega

Yoni tauna Yesu tetelina weyahina 'ipaipaihowa, 'oinega 'ana 'alehao sitoeya ta bwanabwana sanina Patimo 'oina silaguya, ta nobwa Sabatiya 'i'ahwa'ahwanoi Yaluyaluwa Tabuna 'ina waiwaiyega, ta Yesu sanapu Yehoba 'oinega 'ihe'iteya ginaulaedi 'abwa silatuma bale'uwa weyahidi. Coinega Yesu 'ihe'ita 'ina anelose 'oina ma tauna 'itetela baleya Yoni 'oina, ta Yoni 'ilelediya buki bewa 'alona.

#### *Cebe he'ale*

<sup>1</sup> Buki bewa 'oina Yesu Keliso 'ina he'ita tetelina. Yehoba 'i'ebwaeya ma 'abehega Yesu 'ihe'itae 'ina topaihowao 'oidiya, ma sisanapu to'aha nata 'ilatu.

He'itaina bewa Yesu Keliso 'ina anelose 'ihetuneya, ma 'abehega Yoni 'oina 'ihewaila. <sup>2</sup> Yoniina Yesu 'ina 'ali'e 'aigeda, ma ginaulaedi 'i'ita pwaidiya mabwaiyana, 'oinega 'ilagu latuweya, beno Yehoba 'ina gwae, ma wete Yesu Keliso 'ina tetela.

<sup>3</sup> Wayaliyaya 'owa tohasilanaina ma 'omi tohesagohe, 'eguma gwae bewa wahesagohe ma wamuliye, weyahina ginaulaedi 'ihewailediya 'abwa nata silatu.

<sup>4</sup> Taugu Yoni 'imi leta yaleleyawa 'omi boda hekalesiya tupwa sebeni Esiya 'alona. Helau ma nuwadaumwala 'oimiya Yehoba 'oinega, wete yaluyaluwa sebeni 'oidiyega, wete Yesu Keliso 'oinega. Tauna Yehoba mwalo hene, ta tuta bewa, eema tuta 'inaonaoma 'oidiya 'imiyamiya, ma yaluyaluwaedi sebeni taudi Yehoba 'ina wagahata wasawasaina matana simiyamiya.

<sup>5</sup> Yesu Keliso tauna tohepwaila moisa, ma wete tauna 'amasega 'itoholo nugeta, ta bale'u 'ana toloinao 'idi kini. Yesu tauna 'i'atemuyamuyaegita, 'ida puiyao bweyahinega 'ideulidiya. <sup>6</sup> Coinega 'ihogonegita ma 'abehega tahetoloina ma tapwaoli Tamana Yehoba 'oina. Yesuina tauna 'ina wasawasa ta 'ina waiwai miyamiya hatayadi. Emeni.

<sup>7</sup> Ma wa'ita 'abwa tauna galewega 'isuluma yaloha 'oinega, ma tomota mabwaiyadi eema taudi mwalo 'ana tobadiyao 'abwa si'ita, ma tomiya bale'u mabwaiyadi 'abwa sinuwagala, ma matana sidou. Gide. Emeni.

<sup>8</sup> Cida Bada 'igwae, "Taugu 'ebe hegaina ma 'ebe losaloha." Tauna Yehobaina tohewaiwai moisa, mwalo hene, ta tuta bewa, eema tuta sinaonaoma 'oidiya 'imiyamiya.

#### *Keliso 'ana 'ita.*

<sup>9</sup> Taugu tasimiu Yoni. Taheboda 'aigeda pwaiya Yesu ba'idada, ta 'ina 'ebeloina 'alona 'omi ma taugu tahe'alama'i'itanegita, muyamuya ma mwau 'oidiya. Taugu mwalo sipaigauwa ma silagugauwa bwanabwana Patimo 'oina, weyahina yaguguya Yehoba 'ina gwae ma Yesu 'ina tetela. <sup>10</sup> Bewa 'oina 'ida Badaina 'ina sabwelo 'oina Yaluyaluwa Tabuna yalotohoya 'oiguwa, ma 'oinega 'enana 'aigeda madouna gide yoguli yahesagoheya, 'igwaegwae gwahuguwa, 'ilolohatoto, <sup>11</sup> 'igwaeya, "Ginauledi 'abwa 'u'itadi weyahidi 'uleledi buki 'oina, ma bukiina 'uhetune boda hekalesiya sebeni 'oidiya, beno Epeso, ma Simulina, ma Peligamo, ma Tayataila, ma Salidisa, ma Piladelipiya, ma wete Leodisiya 'oina."

<sup>12</sup> Eeta yatoholo lohihila ma 'abehega ya'ita tauna taiya 'oiguwa 'igwaegwae. Nage 'oina mayale sebeni ya'itediya, goula 'oinega sipaihowediya. <sup>13</sup> Ma gamwagamwanidiya 'aigeda ya'iteya, 'ana 'ita gide tuwa loheya, 'ana 'ale'o 'ahalanega ma 'idobi 'ahena, ta lumalumana 'ana gadiwana goula. <sup>14</sup> Ma debana wa'ewa'e'e hedada, gide 'ahole 'ehauna, ma matana gide 'aiwe 'ininininima. <sup>15</sup> Ma 'ahena gide tuwa pwawati 'ehauna sigabudiya sinamanamala, ma 'enana 'ana hesagohe gide tuwa we'aha madoudi sidaudau, <sup>16</sup> ma wete 'ipwala sebeni 'ina 'ebeulega 'i'abi hanehediya, ma wete 'ahwanega 'elepa 'aleha mamata tupwa luwaluwaina 'ilatulatu, ma manina gide tuwa sinala 'ina ganinisa 'asudiladila.

<sup>17</sup> Ya'iteya ma 'ahena yabe'uwa gide tuwa ya'amasa. Coinega nima 'ebeulanega 'oiguwa 'i'abiya ma 'igwaeya, “Sahena 'umatamatauta, weyahina taugu 'ebe hegaina ma 'ebe losaloha. <sup>18</sup> Mayawasigu yamiyamiya. Mwalo ya'amasa, ma 'u'ita taugu yamiyamiya ta geya'abwa yagumwagumwala. Eeta nimaguwa 'amasa ma Bwebweso 'adi kihi ma sowasowahigu yaso'edi. <sup>19</sup> Causala. Ginaulaedi bewa 'u'itediya 'uleledi. Cebe'ita beno tuta bewa weyahina, ma wete tuta 'inaonaoma weyahidi. <sup>20</sup> Bewa 'ipwala sebeniyedi nimagu 'ebeulega, wete mayale sebeniyedi 'adi nuwasabwalena dahwadahwanidi 'oiuwa, 'oinega ya'abi he'asilala. Cipwala sebeniyedi, beno anelose sebeni, taudi hekalesiyao sebeniyedi weyahidi, wete mayale sebeniyedi beno taudi boda hekalesiya sebeni.”

## 2

### *MeEpeso 'idi leta.*

<sup>1</sup> Aneloseina totapwalolowedi Epeso 'oina 'i'ita'itayahidi 'ina leta 'ulele meEpesowedi weyahidi, ma 'ugwae: Tetela bewa 'itauyama tauna 'ipwalaedi sebeni nima 'ebeulanega 'i'abi yahidiya, ma mayale sebeni gamwagamwanidiya 'itautauya. Tauna bewa 'ina hepwailla 'oimiya, 'igwaeya,

<sup>2</sup> “Yasanapu pwaiya 'abehega 'imi paihowa madounega, ma 'imi 'alama'i'ita 'oidiyega wahewaiwaiya, ta togala geya nuwami, 'oinega 'agu tohepwailla 'abo'abowedi wato-hodiya ta 'idi 'abowedi walobediya ta wa'abi latuhediya. <sup>3</sup> Ma wete 'alama'i'ita sanigu weyahina wasanapuya, eeta paihowa mwaudi ta madoudi 'oidiyega geya wada we'a.

<sup>4</sup> “Ma hesi ginaula 'aigeda 'oimiya ya'iteya geya bwebwe'ana, beno mwalo 'imi helau bwebwe'ana 'oiguwa walolaguwa. <sup>5</sup> Mwalo bwebwe'ami, ma wanuwatuhu ta'eha 'oinega wabe'uwa, 'oinega wanuwabui hila ma wapaihowa bwebwe'ana, gide mwalo. Ma 'eguma 'abwa geya wanuwabui, nata yatauyawa 'oimiya ma 'imi mayale 'oimiyega ya'ewa yahule.

<sup>6</sup> “Ma yasanapuya 'abehega ginaula 'aigeda bwebwe'ana 'oimiya, beno Nikoleitanio mumugadi walogwahateya, taugu wete gide.

<sup>7</sup> “Ceguma taiya 'oimiyega matenana, 'ihesagohe Yaluyaluwa Tabuna 'ina gwae tohekalesiyao 'oidiya. Ma 'eguma taiya 'oimiyega 'ihewaiwai, 'oina yatagwala ma yawasida 'ana 'aiwe huwaina 'i'ai, 'aiweina Yehoba 'ina tanoha 'itotoholo.”

### *MeSimulina 'idi leta.*

<sup>8</sup> Aneloseina totapwalolowedi Simulina 'oina 'i'ita'itayahidi 'ina leta 'ulele meSimulina weyahidi ma 'ugwae: Tetela bewa 'itauyama tauna 'ebe hegaina ta 'ebe losaloha 'oinega, tauna 'i'amasa pwaiya ta 'itoholo hila ta mayawasina 'imiyamiya. Tauna bewa 'ina hepwailla 'oimiya 'igwaeya,

<sup>9</sup> “Yasanapuya 'atemuyamuyaimi beno 'omi towewelohe, ma hesi wanuwatuhuyahi 'abehega 'omi ma'imi wasawasa ma wete yasanapu pwaiya 'abehega tupwadi Seitani 'ina bodao si'ahwa'ahwa galagalaegomi, ma sigwae 'abehega taudi meYudiya; ma geya. Taudi hesi tuwa Seitani 'ina bodao.

<sup>10</sup> “Ta geya'abwa wamatamatauta 'eguma to ginaula 'oina muya waloba. Wanuwatuhuyahi 'abehega 'abwa Seitani 'itohogomi, ma tupwami sipaigomi, ma deliya silagugami, ma hesi 'ami mwauwedi sabwelo nima luwaluwa weyahidi.

“Ma watoholo pa'ala 'ana siga 'amasa, ma 'oinega yawasimi miyamiya hatayaina ya'ebwaegomi.

<sup>11</sup> “Ceguma taiya 'oimiyega matenana Yaluyaluwa Tabuna 'ina gwae tohekalesiyao 'oidiya 'ihesagohe. Ma wete 'omi taiyawedi 'eguma Seitani wahewaiwai sineya, geya'abwa 'amasa heluwena 'igihegihe galegomi.”

### *MePeligamo 'idi leta.*

<sup>12</sup> Aneloseina totapwalolowedi Peligamo 'oina 'i'ita'itayahidi 'ina leta 'ulele mePeligamowedi weyahidi, ma 'ugwae: Tetela bewa 'itauyama tauna ma'ina 'elepa 'aleha mamata tupwa luwaluwaina 'oinega. Tauna bewa 'ina hepwailla 'oimiya 'igwaeya,

<sup>13</sup> “Tupwaina 'oina wamiyamiya beno yasanapuya, beno Seitani 'ina 'ebeloina. Ma hesi wahemisa bwaibwainigau, weyahina geya wada uhalegauwa. Mwalo Seitani 'ina tupwaina 'oina 'aigeda 'agu tohepwaila moisa silohe'amasiya, sanina Anitipasa, ma tuwa wa'abiyahigauwa pa'alina.

<sup>14</sup> “Eema mumugami tupwana weyahina geya yayaliyaya, weyahina tupwami Balami 'ina he'itao wamulimuliyedi. Ta 'ina he'itaowedi mwalo Balaki 'imuliyediya, ta meIsileli mumuga galana 'ihe'itediya, beno dimwa sihemisaeya, ta 'ana si'ebwaeya, ta to'eheleyedi 'e'ahaiina si'aiya, ta wete silogwaliya.

<sup>15</sup> “Ma wete 'aigeda ginaula geya bwebwe'ana, beno tupwami Nikoleitanio 'idi he'ita wamulimuliyedi. <sup>16</sup> Coinega tuta bewa mumuga galadiyedi 'oidiyega wanuwabui. Ma 'eguma geya, tuta 'i'iuna 'oina ma yatauyawa, yalo'alehegomi 'elepa 'alehaina 'ahwaguwega 'ilatulatu 'oinega.

<sup>17</sup> “Ceguma taiya 'oimiyega matenana, Yaluyaluwa Tabuna 'ina gwae 'ihesagohe. Ma 'eguma 'omi taiyawedi Seitani wahewaiwai sineya 'e'ahai dahwadahwaina ya'ebwaegomi. Ta wete 'aigeda 'aigeda 'oina yaheguyai da'uule wa'ewa'e'edi, ta da'uuleyedi 'oidiya sanimiyedi simiyamiya 'ehaudi, beno geya 'eta taiya sawasawahina ma 'isanapudi, beno namo tauna to'ewaina 'isanasanapu.”

*MeTayataila 'idi leta.*

<sup>18</sup> Aneloseina totapwalolowedi Tayataila 'oina 'i'ita'itayahidi 'ina leta 'ulele meTayataila weyahidi, ma 'ugwae: Tetela bewa 'itauyama Yehoba Natuna 'oinega, tauna matana 'adi 'ita gide tuwa 'aiwe 'inininima, ma wete 'ahena namanamalidi gide pwawati hauhauna sigabuya. <sup>19</sup> Tauna bewa 'ina hepwaila 'oimiya 'igwaeya,

“Cimi paihowao yasanapu pwaidiya, 'imi helau ta 'imi hemisa ta 'imi paihowa ta 'imi 'alama'i'ita, ma yasanapanapugomi tuta bewa 'imi paihowa bwebwe'ana hedade, ma mwalo tupwana.

<sup>20</sup> “Ma hesi bewa 'oina ginaula 'aigeda weyahina geya yayaliyaya, weyahina Yesibeli 'oina watagwala, tauna wahineina 'ihesaniyeya 'abehega tauna 'aigeda Yehoba 'ana tohepwaila; ma geya. Ma hesi wahineina 'igu topaihowao 'ilisidiya logwali ma da'uule 'oidiyega, weyahina da'uuleina sihemiseya, ta 'ana si'ebwaeya, ta to'eheleyedi si'aiya.

<sup>21</sup> Ma wahineina 'ina tuta ya'ebwae pwaiya ma 'abehega 'ina puiyedi 'oidiyega 'ida nuwabui, ma hesi genuwana ma 'ina logwali 'ilogwahate.

<sup>22</sup> “Coinega 'abwa lohala ya'ebwae, ma 'eguma taiyawedi ma'iyanao silologwali, mwalo madouna siloba, 'eguma 'idi paihowa galadiyedi geya 'oidiyega sinuwabui. <sup>23</sup> Ma wete natunao yalohe'amasidi, ma 'oinega boda hekalesiyao mabwaiyadi sisanapu 'abehega taugu tomota mabwaiyadi 'idi nuwatuhu 'atediya mabwaiyana 'ana tosanapu, ma wete mabwaiyami 'oimiya yahemaisa to'aha gide 'imi paihowao, nuwana bwebwe'adi, bo galadi.

<sup>24</sup> “Ma 'omi meTayataila, 'eguma mumuga galana bewa geya wamuliyedi, ma Seitani 'ina nuwatuhu solasola geya wasanapudi, geya'abwa wete 'aha'ahala mwauna ya'ebwaegomi. <sup>25</sup> Tuwa ma'imi hemisa watoholopa'ala 'ana siga yahilama.

<sup>26-27</sup> “Ma wete 'eguma taiyawedi 'omi Seitani wahewaiwai sineya, ta 'igu paihowaina tuwa wapaipaihowa ta 'ana siga 'ebelosaloha 'oina, loina ya'ebwaegomi ma tupwa mabwaiyadi waloinaedi, gidemusa Tamagu loina 'i'ebwaegauwa. Ma 'imi loina waiwaina 'oinega 'abwa waloina tomota 'oidiya, tuwa gide pwawatiyega walata ta'ahu'ahu pisolidi.

<sup>28</sup> Ma wete 'ipwala tomodaba ya'ebwaegomi.

<sup>29</sup> “Ceguma taiya 'oimiyega matenana, Yaluyaluwa Tabuna 'ina gwae hekalesiyao 'oidiya 'ihesagohe.”

<sup>1</sup> Aneloseina totapwalolowedi Salidisa 'oina 'i'ita'itayahidi, 'ina leta 'ulele meSalidisa weyahidi, ma 'ugwae: Wasa bewa 'itauyama loheyaina 'oinega, tauna loheyaina Yehoba Yaluyaluwana sebeni ma wete 'ipwala sebeni 'oina simiyamiya. Tauna bewa 'ina hepzilla 'oimiya 'igwaeya,

“Cimi paihowao yasanapu pwaidiya, ta tetelimi yahesagoheya 'abehega mayawasimi wamiyamiya, ma geya, weyahina yaluyaluwami bo'i si'amasa.

<sup>2</sup> “Coinega 'eno'enowega watoholo ma to'aha 'i'iuna 'oimiya 'imiyamiya wagihe-madou, ma sahena mabwaiyana si'ama'amasa. Yasanapuya 'imi paihowao Yehoba matana tupwana geya dumwaludi. <sup>3</sup> Ma mwalo he'itaina sihe'itegomiya ta wahesagoheya, sowaswana wanuwatuhuyahi ma wanuwahila eema wamuliya bwaibwaini. Ma 'eguma geya 'enowega wada toholowa, 'abwa 'oimiya yatauyawa ma yalohe'ate yohogomi gidemusa toyagaha, ta geya wasanapu tolahisa yalatuwa.

<sup>4</sup> “Ma tupwami meSalidisa 'ami 'ale'o geya wabailidi, 'abwa 'omi ba'idagwao tatauya mahemahetena ma'ada 'ale'o wa'ewa'e'ena, weyahina 'omi 'ilobwainegomiya.

<sup>5</sup> “Gidemusa tuwa 'omi taiyawedi wahewaiwai, 'omi wete 'ami 'ale'o wa'ewa'e'edi wa'otedi, ma geya'abwa sanimi yawasi bukina 'oinega yale'wale'wa yahule, ma hesi sanimiyedi 'abwa ya'inanadi Tamagu ta 'ina aneloseyao 'oidiya, 'abehega 'omi 'igu boda.

<sup>6</sup> “Ceguma taiya 'oimiyega matenana, Yaluyaluwa Tabuna 'ina gwae boda hekalesiyao 'oidiya 'ihesagohe.”

#### *MePiladelipiya 'idi leta.*

<sup>7</sup> Aneloseina totapwalolowedi Piladelipiya 'oina 'i'ita'itayahidi 'ina leta 'ulele mePiladelipiya weyahidi ma 'ugwae: Tetela bewa 'itauyama tauna bwebwe'ana ma dumwaluna 'oinega, ma wete tauna nimana kiihina mwalo Debida 'ina 'ebesoe'ina 'i'abi'abiyahi, ma 'eguma 'ahwa'eda 'iso'e, geya 'eta taiya sawasawahina ma 'igudu, ma wete 'eguma 'igudu, geya 'eta taiya sawasawahina ma 'iso'e.

<sup>8</sup> Tauna bewa 'ihepzilla 'oimiya, 'igwaeya, “Cimi paihowao yasanapu pwaidiya, ma wete yasanapanu 'imi waiwai tupwana 'imiyamiya, weyahina 'igu he'itao wamuliyediya, ma wete sanigu geya wauhale. Coinega 'ahwa'eda yaso'e pwaiya weyahimi, ta geya 'aigeda taiya sawasawahina ma 'igudu.

<sup>9</sup> “Moisa taudi Tomudulele 'ina bodoa si'abowa ta sigwae 'abehega taudi meYudiya, ma geya. Cabwa yaloinaedi ma sinaoma matamiya ma si'etuluha, ma 'ane mabwaiyadi sisanapu 'abehega 'omi ya'atemuya muyaegomiya.

<sup>10</sup> “Ma 'abwa tuta mwau 'ilatu bale'uwa, ma tomota mabwaiyadi 'itohodi, ma hesi 'omi mwauina 'oina ya'itayahigemi, weyahina 'igu gwae wahematamataneya, ma weyahigu wa'alama'i'ita.

<sup>11</sup> “Cabwa yatauyawa, ma to'aha gide 'oimiya 'imiyamiya, wa'abiyahi momosidi ma geya'abwa taiya maisaina 'oimiyega 'i'ewa'ewa yahule. <sup>12</sup> Ma 'eguma 'oimiyega taiya 'ihewaiwai, yaloinae ma 'ihelogidi Yehoba 'ina Hada He'asisi weyahina, ma geya'abwa wete 'i'ebe'ebesine, ma 'oimiya Yehoba sanina 'abwa yalele, ma wete Yehoba 'ina 'asa sanina yalele, beno Yelusalema hauhaunaina, 'abwa galewega 'isuluma 'igu Yehoba 'oinega. Ma wete 'oimiya sanigu hauhauna yalele.

<sup>13</sup> “Ceguma 'oimiyega taiya matenana Yaluyaluwa Tabuna 'ina gwae boda hekalesiyao 'oidiya 'ihesagohe.”

#### *MeLeodisiya 'idi leta.*

<sup>14</sup> Aneloseina totapwalolowedi Leodisiya 'oina 'i'ita'itayahidi, 'ina leta 'ulele meLeodisiya weyahidi, ma 'ugwae: Tetela bewa 'itauyama Todumwalu 'oinega, tauna Tohepzilla moisa, ma wete tauna Yehoba 'ina paihowao lamuna 'ina hepzilla 'oimiya 'igwaeya,

<sup>15</sup> “Cimi paihowao yasanapudiya 'abehega geya yahiyahi nuwana gogai. Nuwanuwagu tupwa 'aigeda 'oina wamiya, <sup>16</sup> ma hesi 'omi tuwa gamwagamwana, geya yahiyahi nuwana gogai 'idi tupwa wamiyamiya, ma 'ane 'ahwaguwega ya'esoha latuwegomi.

<sup>17</sup> “Ma 'omi wagwae, ‘Taugu tohewasawasa ta ginaula mabwaiyadi sawasawahigu,’ ma geya wasanapu 'abehega 'omi tuwa towewelohe, ma hesi nuwagalagalaimi, ma wete matagibugibuimi ma bugebugewami. <sup>18</sup> Eeta yahenuwa laguwegomi ma 'oiguwega goula moisa wagimwane ma 'ane wahewasawasa, ma wete 'ale'o wa'ewa'e'edi wagimwanedi, ma wa'otedi. Geya'abwa mabubugewami watautauya. Wete mulamula wagimwane ma matamiya walagu, ma matami 'ilotayahala.

<sup>19</sup> “Ma wanuwatuhuyahi 'abehega taiyawedi 'omi ya'atemuya muyaegomi, gwae pa'alinega ma loinega yagihe dumwaluwegomi. Coinega wahewaiwai ma 'imi puiyega wanuwabui.

<sup>20</sup> “Ma wa'ita, taugu 'imi 'ahwa'eda 'oina yatotoholo ma yaulaula'e'e. Ma 'eguma taiya 'owa 'enagu 'uhesagohe ma 'ahwa 'uso'e, 'ino hada yaluhu ma 'owa ma taugu tahe'iyai'yagu, ma 'owa ba'idagu ta'ai mahemahetena.

<sup>21</sup> “Ma 'eguma 'oimiyega taiya 'ihewaiwai, 'abwa yatagwala 'oina ma ba'idagu 'amiyatoi 'igu wagahata wasawasa 'oina, gide tuwa taugu yahewaiwaiya, ta Tamagu 'ina wagahata wasawasaina 'oina ba'idagu 'amiya toiya.

<sup>22</sup> “Ceguma taiya 'oimiyega matenana Yaluyaluwa Tabuna 'ina gwae boda hekalesiyao 'oidiya 'ihesagohe.”

#### 4

##### *Megalewa Yehoba 'oina si'e'etuluha.*

<sup>1</sup> Ginaulaedi bewa sigumwala pwaiya ma ya'e'ebubuna, 'oinega 'aigeda 'ahwa'eda ya'iteya galewega 'i'eso'eya. Ma wete 'aigeda 'enana gide yoguli, tauna tuwa mwalo yahesagoheya, 'oiguwa 'ilolohatoto 'igwaeya, “Cuhanema ma yahe'itago to'aha 'abwa 'ilatu.”

<sup>2</sup> Nage 'oina Yaluyaluwa Tabuna 'ina waiwai yalotohoya, 'oinega galewa 'aigeda toloina ya'iteya 'ina wagahata wasawasa 'oina 'imiyatoiya. <sup>3</sup> Ma manina ya'iteya 'inamala hedadeya. Ma wagahata wasawasaina hulele 'ala'alawana 'itoholo sakowasiyeya. <sup>4</sup> Ma wagahata wasawasa wete 'adi baibaiwa tuweniti powa simiya sakowasiyeya, ma wagahataedi 'oidiya taubadao site tuweniti powa simiyatoiya ma'adi 'ale'o wa'ewa'e'edi, ma wete debadi 'adi pasa wasawasa goula debadiya.

<sup>5</sup> Ma wagahata wasawasaina gamwagamwanidiya 'oinega tupwana ginaula sihapwehapwesama, namala ma wete tupwana 'enana, ma wete gugula. Ma wete wagahata wasawasaina matana mayale sebeni sininininima, taudi beno Yehoba Yaluyaluwanao sebeni. <sup>6</sup> Ma wagahata wasawasaina matana 'aigeda ginaula 'inamanamala gide daumwala 'asilalana hola debana, 'ana 'ita gide tuwa gelasi. Ma wete 'ebemiya wasawasaina deina hebai 'ehata sitoholo sakowasiyeya, ma 'wapidi mabwaiyadi 'oidiya matadi simiyamiya.

<sup>7</sup> Hebaiina 'aigeda 'ana 'ita gide tuwa laiyni, ma heluwena gide tuwa bulumakau, ma hetoina manina 'ana 'ita gide tuwa loheya, ma 'ehatana 'ana 'ita gide magisubu 'itahetaheya. <sup>8</sup> Ma 'aigeda 'aigeda pepediyao 'adi baibaiwa sikisi, ma pepediyawedi mabwaiyadi matadi 'ebe 'ebubuna baibaiwadi 'atamanega ma 'alonga. Ma tuta mabwaiyana, sabwelo ma nihuwana 'oidiya, siwaliwali, sigwaegwae,

“Casilala, 'asilala, 'asilala,

Bada Yehoba Tohewaiwai.

Tauna tuta mwalo ta bewa

ta tuta 'inaonaoma 'oidiya 'imiyamiya.”

<sup>9</sup> Tomiya hatayaina 'ina wagahata wasawasa 'oina 'imiyatoi, ma tuta baibaiwana hebaiyedi bewa siwaliwali hep watu, ma si'ahwa'ahwa wasawasa, ma wete siloloyauwedo 'oina. <sup>10</sup> Ma tuta baibaiwana, 'eguma hebaiyedi bewa siwaliwali, babadao site tuweniti powaedi sibe'u talutalubu'i tauna miyamiya hatayana 'ina wagahata wasawasaina matana, ma si'etuluha 'oina. Ma debadi 'adi pasa goula wagahata wasawasaina matana silagu suluhediya, sigwaegwae,



<sup>11</sup> “Cowa 'ima Bada ta 'ima Yehoba, 'ilobwainemaiya ma 'ahepwatuwego ma 'ahe'asisiyego, weyahina 'ino waiwaiyega ginaula mabwaiyana 'u'abi hemasalehediya. Cuboi 'ino nuwatuhwega 'upaihowediya, ta nige mayawasidi.”

## 5

*Buki 'ana 'ita gide pepa sinupiliya.*

<sup>1</sup> Ma ya'iteya tauna wagahata wasawasaina 'oina 'imiyatoiya, ma 'ina 'ebeulega pepa sinupiliya gide buki nugenugeta 'i'abiyahiya, ma leleleleina 'alonge ma gwahunega, ma wete pepaina 'ana losipwa 'ana baibaiwa sebeni. <sup>2</sup> Ma wete 'aigeda anelose ya'iteya waiwaina, ma 'enana madounega 'ibwaubwau, 'igwae, “Taiya sawasawahina ma 'ebe losipwaina 'ilihasidi ma pepa 'iyahali?”

<sup>3</sup> Moisa tuwa, geya 'eta taiya 'ilobaloba galewa nuwana bale'uwa nuwana bale'u dudunina, 'abehega tauna sawasawahina ma losipwaedi 'ilihasidi, ma bukiina 'alona 'i'ita. <sup>4</sup> Ta yanuwagala moisa ta yadouwa, weyahina geya 'eta taiya sawasawahina ma bukiina 'iloyahali ma 'alona 'i'ita.

<sup>5</sup> Coinega babadaowedi 'oidiyega 'aigeda 'oiguwa 'igwaeya, “Sahena 'udoudou, weyahina laiyoniina Yudiya 'oinega, tauna Debida 'ina susu 'ihewaiwai pwaiya, ta tauna sawasawahina ma losipwa sebeniyedi 'ilihasidi ma pepaina 'iyahali.”

<sup>6</sup> Ma wete wagahata wasawasaina deina 'aigeda lami ya'iteya hebahebai 'ehataedi gamwagamwanidiya 'itotoholo, ma babadao wete gamwagamwanidiya, ma lamiina 'ana 'ita gide tuwa tomota silohe'amasiya, donanao sebeni ma matanao sebeni wete, taudi matanaowedi Yehoba Yaluyaluwana, beno taudi 'ihetunediya bale'u mabwaiyana 'oidiya.

<sup>7</sup> Ta lamiina 'inaowa ta pepaina 'i'eweya tauna wagahata wasawasaina 'oina 'imiyamiya 'ina 'ebeulega. <sup>8</sup> Pepaina 'i'eweya ta hebahebaiyedi ma wete babadaowedi lamiina 'oina sibe'u talutalubu'iyi, 'oina si'e'etuluha, ta 'aigeda 'aigeda ma'idi 'ebe gihedohedou sihunuhunu, ma wete ma'idi gaeba goula bwebwe'adi, ma ginaula 'aigeda 'alodiya 'igabugabu mahaina 'ausalana, ta 'ana nuwasabwalena beno Yehoba 'ina tomotaiyao 'idi 'ahwanoi 'ihanehane 'oina.

<sup>9</sup> Ma wali 'ehauna siwaliyeya sigwae, “Moisa, 'owa sawasawahi ma buki beno 'u'ewa, ma wete 'ana losipwa sawasawahi ma 'ulihasi, weyahina silohe'amasigowa ta bweyahiuwega tomota 'uhemaisediya Yehoba weyahina, taudi bodaedi, 'enanaedi, susuwedi ma 'ebeloinaedi mabwaiyadi 'oidiyega. <sup>10</sup> Weyahina 'owa 'uhesinuwediya ma 'abehega 'ino 'ebeloina 'alona sihetopwaoli Yehoba weyahina, ma wete bale'uwa sihetoloina.”

<sup>11</sup> Ma wete aneloseyao ya'itediya baibaiwa hedada, geya 'aihasila, wagahata wasawasaina ma hebaiyedi ma wete babadaedi sitoholo sakowasiyediya, <sup>12</sup> ma wete 'enadi madouna yahesagoheya sigwaegwae, sigwaeya, “Tauna lamiina silohe'amasiya, sawasawahina ma loina ma wasawasa ma sanapu ma he'asisi ma hepwtu ma 'ahwa bwebwe'ana 'ilobadi.”

<sup>13</sup> Ma wete Yehoba 'ana paipaihowao 'aigeda 'aigeda galewa ma bale'uwa ta bale'u dudunina ma holai, taudi Yehoba 'ana paipaihowao tupwa mabwaiyadi 'oidiyega, yahesagohediya siwaliwali sigwaegwae, “Tauna wagahata wasawasa 'oina 'imiyatoiya, ma lamiina ba'idana tahepwatuwedi, ma tahe'asisiyedi, ma ta'ahwa wasawasaedi, ma wete ta'ahwa tohewaiwaiyedi tuta mabwaiyana 'oidiya.”

<sup>14</sup> Coinega hebaiyedi site hata sigwaeya, “Moisa,” ma wete babadaedi sibe'u talutalubu'iyi ma si'e'etuluha.

## 6

*Losipwaedi sebeni.*

<sup>1</sup> Eeta lamiina ya'iteya losipwa 'aigeda 'ilihasiya, ma hebaiyedi 'oidiyega 'enana 'aigeda gide gugula yahesagoheya 'igwae, “Cunaoma.” <sup>2</sup> Coinega ya'e'ebubuna, ta 'aigeda hosi wa'ewa'e'ena 'ilatuma, ma 'ana togeluwina ma'ina tupu 'aleha eema 'aliliya, ma wete debana 'ana pasa wasawasa si'ebwaeya. Eeta 'itauya 'i'aleha ta 'ihewaiwaiya.

<sup>3</sup> Ma lamiina losipwa heluwena 'ilihasiya, ma wete hebai heluwena 'enana yahesagoheya, 'igwae, “Cunaoma.” <sup>4</sup> Coinega 'aigeda hosi bwehabwehalina 'ilatuma, ta 'ana togeluwina waiwai si'ebwaeya ma 'aleha 'i'eweyama gogo gabulena, ma 'oinega tomota mabwaiyadi siboidimo sihe'upwa hiledi ta si'ehunuwa hiledi, ma wete 'elepa madouna si'ebwaeya.

<sup>5</sup> Ta lamiina wete losipwa hetoina 'ilihasiya, ma wete hebai hetoina 'enana yahesagoheya 'igwae, “Cunaoma.” Coinega ya'e'ebubuna, ma 'aigeda hosi dubadubana 'ilatuma, ta 'ana togeluwina ma'ina 'ebe lihe 'e'ahai weyahina. <sup>6</sup> Ma 'aigeda gide tuwa 'enana hebaiyedi 'ehata gamwagamwanidiyega yahesagoheya, 'igwae, “Witi 'ana lihe 'aigeda 'ana maisa 'aigeda kina, ma wete ba'ali\* 'ana lihe 'etoi 'ana maisa 'aigeda kina, ma hesi olibe holowina ta waini geya'abwa wa'abi'abitohodi.”

<sup>7</sup> Coinega lamiina wete losipwa 'ehatana 'ilihasiya, ta hebai 'ehatana 'enana yahesagoheya, 'igwae, “Cunaoma.”

<sup>8</sup> Coinega ya'e'ebubuna ma 'aigeda hosi 'ana 'ita tupwana tuwa wa'ewa'e'ena 'ilatuma. Ta 'ana togeluwina sanina Camasa, ma wete Bwebweso 'imuliyeya, ma lolina silobeya Yehoba 'oinega, ta 'abehega tomota mabwaiyadi simutudi 'alehega ma gomaleyega ma lohalega ma wete totopwatula 'oidiyega, ta geya 'abehega tomota mabwaiyadi, ma tuwa 'eguma bale'u mabwaiyana 'oina boda tawatahidi 'adi baibaiwa 'ehata, ma 'aigeda boda 'oidiyega mabwaiyadi simutudi, ta boda 'etoimo situpwa.

<sup>9</sup> Ma wete lamiina losipwa henimana 'ilihasiya, ta Yehoba 'ina 'ebepwaoli gabulena 'ana tohepwailao yaluyaluwadi ya'itediya, taudi mwalo bale'uwa Yehoba 'ina gwae 'ana tohepwailao bwebwe'adi, bewa tauna weyahina tomota silo'alehediya ta silohe'amasidiya. <sup>10</sup> Ma yaluyaluwaedi 'enadi madounega sibwaubwau, sigwaeya, “Bada tohewaiwai hedade, 'owa 'ausalau ma todumwalu, to tuta 'oina eema 'ama tolohe'amasao bale'uwa 'uloinaedi 'idi puiyao weyahidi?”

<sup>11</sup> Coinega yaluyaluwaedi 'adi 'ale'o wa'ewa'e'edi 'i'ebwaediya, ta 'ihegwaediya ma tuta 'i'iuamo si'aiyawasi, 'ana siga tupwadi wete 'iyadiyao mebale'u silohe'amasidi, gide tuwa mwalo taudi silohe'amasidiya Yehoba 'ina paihowa weyahina, ma 'eguma 'adi hasihasila sawasawahina, 'oinega Yehoba mebale'u tolohe'amasaeidi 'iloinaedi.

<sup>12</sup> Ma wete lamiina losipwa hesikisina 'ilihasiya ta mwani'ini'i madouna 'ipilipili, ta sinala 'iguguyou, 'ana 'ita gide tuwa walata siyana, ta wete wai'ena 'ana 'ita mabwaiyana bwehabwehalina, bweyaha gide. <sup>13</sup> Ma 'ipwala sibe'uma galewega, gide 'ane 'aiwe 'ihuwa ta yaumai waiwaina 'itowama ta huwanaedi sigubagubala.

<sup>14</sup> Ma galewa ya'iteya gide tuwa pepa 'inupiliya ma 'isawala, 'oinega 'oya 'aigeda 'aigeda ta bwanabwanao simiyabala hali tupwa 'oidiya.

<sup>15</sup> Ma bale'u 'ana babadao, ma toloinao, ma 'aleha 'adi babadao, ma wasawasao, ma tohewaiwaiyao, ma wete tohanugetao 'idi topaihowao, mabwaiyadi sideni 'oyai, ta duluha ma dimwa 'oidiya si'edahwana. <sup>16</sup> Coinega siwuiwui dimwa ma 'oya 'oidiya, sigwaeya, “Wabe'uma debama, ma 'ane tauna wagahata wasawasaina 'oina 'imiyamiyatoi geya'abwa 'i'ite'itemai, ma wete lamiina geya'abwa 'i'ite'itemai. <sup>17</sup> Weyahina lamiina 'ina gamwasowala 'ana sabwelo madouna 'ilatu pwaima, ma geya 'eta taiya sawasawahina ma 'ihewaiwaisine.”

## 7

*MeIsileli debadiya Yehoba 'ana 'ila'ilala si'abi hepa'ineya*

<sup>1</sup> Ginaula bewa mulina aneloseyao 'ehata ya'itediya sitotoholo bale'u tupwanao 'adi baibaiwa 'ehata 'oidiya. Aneloseyedi yaumai 'adi baibaiwa 'ehata si'abi yahidiya ma 'abehega geya'abwa bale'uwa, nuwana holai, nuwana 'aiwe 'oidiya sitowatowa,

<sup>2</sup> weyahina Yehoba 'ina tagwala ma 'abehega yaumaiyedi bale'u ta hola sisuba hegaladi. Coinega anelose wete 'aigeda ya'iteya sinala 'ina 'ebe saehaneyega 'inaonaoma, ma ma'ina 'ebe lagu 'ila'ilala, gide basilili, ma 'abehega Yehoba miyamiya hatayaina 'ana 'ila'ilalaina 'ilagu tomota debadiya. Aneloseina 'ibwau anelose 'ehataedi 'oidiya, <sup>3</sup> 'igwaeya, “Geya'abwa bale'u bo hola bo 'aiwe wasubasuba hegaladi ee 'ana siga 'ida Yehoba 'ina topaihowao 'adi 'ila'ilala 'alagu debadiya.” <sup>4</sup> Coinega 'ila'ilalaina silaguya tupwana melsileli debadiya, ma muliyega meIsileliyedi 'adi baibaiwa yahesagohediya, beno 144 tausani mabwaiyana, boda Isileliyedi 'oidiyega.

<sup>5</sup> Susu Yuda 'oidiyega 'ila'ilalaina tomota tuwelo tausani debadiya silaguya, ma Lubeni tuwelo tausani, ma Gada tuwelo tausani, <sup>6</sup> wete Aseli tuwelo tausani, ma Napitalai tuwelo tausani, ma Manasa tuwelo tausani, <sup>7</sup> wete Simioni tuwelo tausani, ma Libai tuwelo tausani, ma Isaka tuwelo tausani, <sup>8</sup> wete Sebuloni tuwelo tausani, ma Yosepa tuwelo tausani, ma wete Beniyamina tuwelo tausani.

#### *Boda madou hedada*

<sup>9</sup> Muliyetega ya'e'ebubuna ta boda madou hedade ya'itediya, geya 'aihasila. Bodaedi 'ebeloina 'aigeda 'aigeda 'oidiyega, ta susu 'aigeda 'aigeda 'oidiyega, ta boda 'aigeda 'aigeda 'oidiyega, ta 'enana 'aigeda 'aigeda 'oidiyega, mabwaiyadi wagahata wasawasa matana, ma wete Lami matana sitotoholo, ta 'adi 'ale'o wa'ewa'e'edi, ma sadasada nabaina si'abi'abi yahidi, <sup>10</sup> ta 'enadi madounega sibwaubwau sigwaeya, “Cada lema 'ida Yehoba 'oinega, tauna wagahata wasawasa 'oina 'imiyatoiya, ma wete lamiina 'oinega.”

<sup>11</sup> Ma aneloseyedi wagahata wasawasaina ma wete babadaowedi ma hebaiyedi 'ehata sitoholo sakowasiyediya, ma mabwaiyadi sibe'u talutalubu'iyaya, ta Yehoba 'oina si'e'e-tuluha, <sup>12</sup> sigwaegwae, “Moisa, 'ida Yehoba 'oina tahepwatu ma ta'ahwa wasawasae ma sanapu ta loyauwedo ta he'asisi ta waiwai simiya hataya 'oina.”

<sup>13</sup> Eeta babadaowedi 'oidiyega 'aigeda 'ihesilala 'oiguwa, 'igwaeya, “Taiyawedi bewa ma'adi 'ale'o wa'ewa'e'edi? Ma to'ehega sinaoma?”

<sup>14</sup> Ma 'oina yagwaeya, “Bada 'owa 'usanasanapudi. Taugu geya.”

Ta 'ihewgaegauwa, 'igwae, “Bewa bodaedi bale'u 'ana muyamuyao 'oidiyega situpwa, ma 'adi 'ale'owedi Lamiina bweyahinega 'ideulidiya ta siwa'e'eya. <sup>15</sup> Beno huhuna 'oinega Yehoba 'ina wagahata wasawasa matana simiyamiya, ma sabwelo ma nihowana 'oidiya 'ina paihowao sipaipaihowadi 'ina Hada He'asisi 'alona. Yehobaina 'ina wagahata wasawasaina 'imiyatoiya 'oina, tauna nata 'i'itayahidi, <sup>16</sup> ma geya'abwa wete sigomagomale nuwana tani'odi 'iyahayahala, ma geya'abwa wete hala nuwana to'aha hulahlaina 'oinega 'ihulahlaidi. <sup>17</sup> Weyahina Lamiina, tauna wagahata wasawasa 'alona 'imiyamiya, tauna 'adi to'itayahina, ma 'oinega 'ihanugetedi we'aha bwebwe'adi 'oidiya, yawasidi weyahina, ma Yehoba tauna mataneudi 'ilo'i'ilidi.”

## 8

#### *Losipwa hesebenina weyahina*

<sup>1</sup> Coinega lamiina losipwa hesebenina 'ilihasiya, ma geya 'eta wete galewega gwae bo 'ahwahanahena sinaonaoma tuta to'uto'upana 'oina.

<sup>2</sup> Ma ya'itanaowa aneloseyedi sebeni Yehoba matana sitotoholo, ma Yehoba 'idi yoguli 'aigeda 'aigeda 'i'ebwaediya. <sup>3</sup> Ma wete 'aigeda anelose ma'ina gaeba goula 'inaoma ta 'ebe pwaoli deina 'itoholowa. Ma 'ebe pwaoliina beno Yehoba 'ina wagahata wasawasaina deina. Coinega Yehoba gaeba goulaina 'ilohemaheya ginaula mahamahaina 'oinega, ma aneloseina 'i'ebwaeya, eeta aneloseina 'ebe pwaoli 'oina 'ilaguya ma 'igabu. Cigabuya ta 'asuna ma mahaina bwebwe'ana ma wete Yehoba 'ina tomotai 'idi 'ahwanoiyao mahetenao sihaneya galewa.

<sup>4</sup> Coinega gaeba ma ginaula mahamahaina 'ilaguya Yehoba matana, ma 'ahwanoi ta ginaulaina 'asuna ba'idana sihanehane. Sihanehanya eeta 'i'ala hegumwaliya.

<sup>5</sup> Coinega aneloseina gaebaina hagalinamo 'i'eweya, ma 'ebe pwaoliina 'oinega 'aiwe

'ala'alasina 'i'eweya, eema gaebaina 'ilohemaheya, ma 'iula suluheya bale'uwa, ta nage 'oina namala ma gugula ma tupwadi 'enana ma wete mwani'ini'i silatuwa.

### *Yoguliyedi simu'ediya*

<sup>6</sup> Eeta aneloseyedi sebeni 'idi yoguliyedi si'abi yahidiya sabi mu'adi. <sup>7</sup> Ma 'aigeda 'ina yoguli 'imu'eya, ta dohi 'ana 'ita hagana 'isuluwa, 'ana 'ita 'aisi pwa'upwa'uwana gide, ta wete 'aiwe 'ala'alasina ma bweyaha ba'idana sigubagubalama bale'uwa, ta 'i'alasiya. Ceguma bale'u mabwaiyana 'ana wataha 'etoi, 'aigeda tupwa 'i'alasi ta 'eluwa tupwa geya. Ma tupwaina 'i'alasiya 'oina, 'aiwe ma 'awata mabwaiyadi 'i'ala hegumwalidiya.

<sup>8</sup> Ma anelose heluwena 'ina yoguli 'imu'eya, ma 'aigeda ginaula 'ana 'ita tuwa gide 'oya madouna 'inininima ta holai siuleya, 'oinega hola 'ihebweyaha. Ceguma hola mabwaiyana 'ana wataha 'etoi, ma 'aigeda tupwa 'oidiyega 'ihebweyaha, ta 'eluwa tupwaidi bwebwe'adi. <sup>9</sup> Ma holaina 'ihebweyaha pwaiya, eeta silahana mabwaiyana si'amasaeya, ma waga mabwaiyadi si'elo talitaligeha.

<sup>10</sup> Ma anelose hetoina 'ina yoguli 'imu'eya, ma 'ipwala madouna 'i'ala'alata 'ana 'ita tuwa gide wodam galewega 'ibe'uma, ta bale'uina 'ana wataha 'etoi ta 'aigeda watahaina 'oina 'ipwala 'ibe'uwa ta we'aha mabwaiyadi simemaia. <sup>11</sup> Cipwalaina sanina Memai, ma tomota 'eguma taiyewedi we'ahaina memainaina 'oinega sinuma nata si'amasa.

<sup>12</sup> Ma anelose 'ehatana 'ina yoguli 'imu'eya ta sinala tupwa 'aigeda 'iguguyou ma tupwa 'eluwa bwebwe'adi, ta wete wai'ena tupwa 'aigeda 'iguguyou ma tupwa 'eluwa bwebwe'adi, ta wete 'ipwala 'eguma tawatahidi tupwa 'etoi 'oidiya, tupwa 'aigeda 'ana 'ipwalao siguguyou, ma tupwa 'eluwa si'asi'asilala. Coinega sabwelo mabwaiyana 'ana watahao 'etoi, 'aigeda tuta guguyou, ma 'eluwa tuta bwebwe'adi. Gide wete nihuwana, 'aigeda tuta guguyou, ma 'eluwa tuta bwebwe'adi.

<sup>13</sup> Ma ya'e'ebubuna ta ya'iteya magisubu madouna 'itahetaheya galewa, ma 'enana madouna yahesagoheya, 'igwae, "Caioi, nuwagalagalaimi 'omi gogo gabulena 'ana tomiyao, nata 'ane aneloseyao yoguli 'etoi simu'adi, ma mwau madouna 'ilatu 'oimiya."

## 9

<sup>1</sup> Ma anelose henimana 'ina yoguli 'imu'eya, ma ya'iteya 'ipwala 'aigeda galewega 'ibe'uma gogo gabulena, ma 'ipwalaina gaula madouna 'ana 'ebesoe'ekihi 'i'eweya, <sup>2</sup> ma gaulaina 'iso'eya, ma 'alongega 'asu 'ilatulatuma, tuwa gide duba madouna, ma sinala 'iguguyouwa ma wete gogo gabulena mabwaiyana 'iguguyouwa gaulaina 'asuna 'oinega. <sup>3</sup> Ma 'asuina 'alongega mwai'e sisulusuluma gogo gabulena, ma 'idi waiwai silobeya gide ganihana 'idi waiwai. <sup>4</sup> Ma wete Yehoba 'i'etoboda ta geya'abwa 'awata si'abi'abi hegaladi, nuwana 'aiwe, nuwana tanoha, ma hesi tomotaedi taudi geya Yehoba 'ana 'ila'ilala gide basilili debadiya, taudi si'abi hegaladi.

<sup>5</sup> Ta mwai'eyedi geya 'adi tagwala tomota silohe'amasidi, ma hesi tuwa si'abi'abi hemuyamuyadimo wai'ena nima 'oidiya. Ta muyaedi madoudi, gide tuwa ganihana 'ina 'enali. <sup>6</sup> Ta wai'enaedi 'oidiya tomuyamuyaedi 'amasa silohenuhenule, ma hesi geya'abwa si'ama'amasa, weyahina 'amasa si'ebesa 'asaeya. <sup>7</sup> Ta mwai'eyedi 'adi 'ita gide hosi si'atububu pwaidiya 'aleha weyahina, ma debadiya 'adi pasa wasawasa silagudiya, ma 'adi 'ita gide tomotai, <sup>8</sup> Ta wete debadi gide wahiwahine, ma salad gide laiyoni salad. <sup>9</sup> Ta lumalumadi si'ahubodediya 'ana 'ita gide pwawati 'oidiyega. Ma papedi 'idi dagugu gide waga lisilisi hosi sipilipilihedi 'aleha 'oina.

<sup>10</sup> Ta wete masubwedi, gide ganihana subwedi, weyahina subwediyege sawasawahina ma tomota sibadidi, ma wai'ena nima 'oidiya simuyamuya.

<sup>11</sup> Ta wete ma'idi toloina, tauna aneloseina gaulaina 'ana to'itayahina, sanina Ibeliu 'enadiyega sigwae, "Abadoni," ma 'ena Gilisi sigwae "Apaloni," ma 'adi nuwasabwalena beno "Tolohe'amasa." <sup>12</sup> Mwau 'aigeda 'igumwala pwaiya ta mwau 'eluwa 'abwa sinaonaoma.

<sup>13</sup> Ma anelose hesikisina 'ina yoguli 'imu'eya, ta 'aigeda 'enana yahesagoheya 'inaoma 'ebe pwaoli donanao 'ehata 'oidiyega, 'ebe pwaoli goulaina Yehoba matana 'itotoholo.

<sup>14</sup> Ma 'enanaina 'igwaeya anelose hesikisina ma'ina yoguli 'oina 'igwae, “Aneloseyedi site 'ehata paipaidi we'aha madouna sanina Yupeletisi 'oina 'ulihāsidi, ma sitauya.”

<sup>15</sup> Ma aneloseyedi 'ehata 'ilihasidiya ta sitauya, weyahina tutaina 'ana sabwelo, ta 'ana wai'ena ta bolimenaina weyahina si'atububuya, ma 'abehega tomota baibaiwa hedada silohe'amasidi. Beno 'eguma tomota mabwaiyana gogo gabulena tawatahidi boda 'etoi, ma 'aigeda boda silohe'amasidi, ta 'eluwa boda situpwa.

<sup>16</sup> Ma tolo'alehaedi 'idi boda 'adi hasihasila yahesagoha pwaiya, 'abehega 'eluwa handeledi miliyoni mabwaiyadi hosi 'oidiyega sipilipili. <sup>17</sup> Ta bewa gide nihiguina 'oina hosiyedi ya'itediya, ma 'adi togeluwedi ma'adi 'ahusu'wasu'wana lumalumadiya silagudiya, tupwadi bwehabwehalidi ta tupwadi 'ala'alawadi ta tupwadi yogeyogedi. Ta hosiyedi mwagudi gide laiyoni mwaguna, ma 'aiwe ninima ta 'asu ta dimwa yahiyahidi 'ahwadiyega silatulatu. <sup>18</sup> Boda 'etoyedi gogo gabulena 'oidiyega, boda 'aigeda silohe'amasidi, bewa ginaula 'etoyedi 'oidiyega, beno 'aiwe ninima ta 'asu ta dimwa yahiyahidi, ma hesi boda 'eluwa simiyamiya. <sup>19</sup> Weyahina hosiyedi 'idi waiwai 'ahwadiya ma subwediya simiyamiya, ta subwediya gide mwata ma'ahwadi, ma 'oidiyega tomota si'abi hemuyamuyadi.

<sup>20</sup> Ta tomotaedi mabwaiyadi, taudi geya sida 'amasa ginaulaedi galadi 'oidiyega, geya sinuwabui ma 'abehega 'idi 'ebe hemisa 'abo'abowedi siguipaledi. Ma hesi si'abiyahi pa'alidi ta si'e'etuluha 'oidiya. Ginaulaedi gide Tomudulele ma welabanao, ma wete ginaulaedi siboimo nimadiyega sipaihowediya, gide dimwa leleleleina beno goula ta siliba ta kopa ta dimwa ta 'aiwe. Dimwa leleleidiyedi beno geya sawasawahidi ma si'ebubuna, bo nuwana sihesagoha, nuwana siyawala dadana.

<sup>21</sup> Ma wete tomotaedi geya sida nuwanuwabuiya lohe'amasa ma 'oba ma logwali ma yagaha 'oidiyega. Tuwa debadi 'ipa'ala.

## 10

### *Anelose 'aigeda ma'ina pepa*

<sup>1</sup> Ta wete ya'iteya anelose waiwaina 'aigeda galewega 'isuluma, ma yalohega 'i'wama, ma hulele debana 'itoholo sakowasiyeya, ma manina 'ana 'ita gide sinala, ta wete 'ahena sinamanamala tuwa gide 'aiwe 'inininima. <sup>2</sup> Aneloseina nimana pepa gide buki nugenugeta eema muhemuhena 'i'abi'abiyahi, ma loloyahalina, 'oinega 'isuluma ma 'ahe 'ebeulanega holai 'ibasaeya, ta 'ahe 'adigeyageyaina bale'uwa.

<sup>3</sup> Eeta 'enana madounega 'ibwauwa 'ana hesagoha gide laiyoni 'ibwauwau. Cibwau pwaiya, ta gugula 'adi baibaiwa sebeni 'ina gwaeina sihemaiseya. <sup>4</sup> Gugulaedi 'enadi yahesagohediya ta 'abehega yalele, ma galewega 'enana yahesagoheya, 'oiguwa 'igwaeya, “Gugula 'enadi site sebeni 'uhesagohediya 'udahwadi, ma geya'abwa 'uleleleledi.”

<sup>5</sup> Cane aneloseina tauna ya'iteya hola ma bale'u 'oidiya 'itotoholo, nima 'ebeulana 'i'abihaneheya galewa, <sup>6</sup> ta 'ibwau haneya, Yehoba sanina 'i'inaneya, tauna miyamiya hatayana, ta ginaula mabwaiyadi 'adi togihemasaleha, beno galewa ma ginaula mabwaiyadi 'alona, ma wete gogo gabulena ta ginaula mabwaiyana 'alona, ma hola wete ta ginaula mabwaiyadi 'alona. Ma aneloseina 'igwaeya, “Tuta 'ilatu pwaima. <sup>7</sup> Weyahina 'eguma anelose hesebenina 'ina yoguli 'imu'a, Yehoba 'ina nuwatuhu dahwadahwaidi mabwaiyadi 'ilosalohidi, to'aha gide 'ina topaihowao taudi palopitao mwalo 'oidiya 'ihewaiya.”

<sup>8</sup> Ta 'enanaina galewega yahesagohe nugeteya wete 'oiguwa 'ilolohatoto, 'igwaeya, “Cutauya ma pepaina yahayahalina aneloseina holai ma bale'uwa 'itotoholo nimanega 'u'ewa.” <sup>9</sup> Coinega yatauya ma aneloseina 'oina pepaina ya'ahwanoyeya. Eeta pepaina 'i'ebwaegauwa ma 'ihewagauwa, 'igwae, “Causala, 'u'ewa ma 'u'ai. Ma 'eguma 'utone, 'abwa 'ana memai gamwauwa 'ulotoho, ma hesi 'ahwauwa 'ana lotohona gide mwagagau.”

<sup>10</sup> Coinega pepaina ya'eweya ta ya'aiya, ma 'ahwaguwa yalotohoya hotona tuwa gide mwagagau, ma yatoneya ta gamwaguwa yalotohoya memai hedada. <sup>11</sup> Ma 'igwaeya



'oiguwa, “Cilobwaineya ma 'owa Yehoba 'ina gwaeyedi boda, ma 'ebeloinao, ma 'enanao, ma kiniyao weyahidi 'uhepwaila hiledi.”

## 11

### *Yehoba 'ana tohepwailao 'eluwa*

<sup>1</sup> Muliyetega 'ai'aiwe 'aigeda 'i'ebwaegauwa tuwa gide 'ebelihe, ma 'ihegwaegauwa 'igwae, “Cutoholo ma Yehoba 'ina Hada He'asisi ma 'ebepwaoli wete 'ulihedi, ta wete to'etuluhaedi 'alona 'ulihedi. <sup>2</sup> Ma hesi Hada He'asisi papalina geya'abwa 'ulihelihe, weyahina mulimuli beno tomiya ganamuli weyahidi, taudi beno geya meYudiya, ta 'ahedyega Yehoba 'ina 'asaina si'abihebi'iya, wai'ena potitu (42) 'alodiya. <sup>3</sup> Ma tohepwaila 'eluwa 'abwa yahewasaedi, ma 'adi 'ale'o gide hiwahiwape 'adi 'ale'o, ta palopitaedi Yehoba 'ina gwa'e 'abwa sihepwaile sabwelo wan tausani tuhandeledi sikistiyedi (1260) 'alodiya.”

<sup>4</sup> Tohepwaila 'eluwaedi gide 'aiwe olibe 'eluwa, ma wete gide mayale 'eluwaedi sitotoholo bale'u 'ana Bada matana. <sup>5</sup> Ma 'eguma taiya 'itoho ma 'ilo'aleha tohepwailedi 'oidiya, nata 'aiwe ninima 'ahwadiyega 'ilatuma ma 'adi 'alehaina 'isubahegala, ma bewa 'oinega 'adi 'alehao silohe'amasidi.

<sup>6</sup> Siteluwaedi ma'adi loina, ma tutaedi Yehoba 'ina gwa'e sihepwaile, dohi galewega si'etobodedi. Wete ma'idi loina bidala 'oidiya, ma sihebweyaha. Wete ma'idi loina mwau ta mua weyahidi, ma 'eguma to tuta 'oina nuwanuwadi ma mwauwedi silatu, tuwa sida latu.

<sup>7</sup> Coinega tohepwaila 'eluwaedi 'idi hepwaila tomota 'oidiya 'igumwala, ma hebai 'aigeda gaulaina madouna 'oinega 'ihapwesama, ma 'abehega tohepwailaedi 'oidiya 'ilo'aleha ee 'ihewaiwai, ta 'ilohe'amasidi. <sup>8</sup> Ma wahidi 'ane si'eno besobeso 'asa madouna 'alona. Casaina mwalo 'ida Bada 'oina sigihe keloseyeya, ma 'asaina 'ana 'unuwadawada sihesaniyeya 'abehega Sodoma, nuwana Itipita.

<sup>9</sup> Tomota baibaiwadi 'abwa sinaoma bodao ma susuwao ma 'enanao ma 'ebeloinao 'oidiyega, ta wahidiyedi si'ita'itadi sabwelo 'etoi ma tupwana 'oidiya. Ma wahidiyedi 'adi lagugaliha si'etobode. <sup>10</sup> Ta tomiya bale'u siyaliyaya tohepwaila 'eluwaedi 'idi 'amasa weyahina, ta sihebwabwale, eema helau si'ehele 'aigeda 'aigeda 'oina, weyahina palopita 'eluwaedi mua madouna si'eweyama mebale'u 'oidiya.

<sup>11</sup> Ma sabwelo 'etoi ma tupwana sigumwala, eeta Yehoba yawasina 'oidiya 'ilaguhileya ta sitoholowa, eema tomota mabwaiyadi si'itediya ta simatauta madouna. <sup>12</sup> Ma palopita 'eluwaedi 'enana galewega sihesagoheya, 'ilolohatoto 'oidiya 'igwae, “Wahanema 'ebwa.” Coinega yalohega sihanehane, ta 'adi 'alehaedi si'e'ebubudi.

<sup>13</sup> Tutaina beno 'oina mwani'ini'i madouna 'ilatuwa, ma 'asaina madouna 'ana wataha nima luwaluwa 'oidiyega 'aigeda tupwa 'iligehiya, ma tomota 'adi baibaiwa sebeni tausani si'amasa mwani'ini'iina 'oinega. Ta tomota taudi situpwa simatauta moisa, 'oinega Yehobaina galewa sihepwatuweya 'ina waiwai weyahina.

<sup>14</sup> Mua heluwena 'igumwala pwaiya, ta hetoina nata 'ilatu.

### *Yoguli hesebenina simu'eya*

<sup>15</sup> Ma anelose hesebenina 'ina yoguli 'imu'eya, ta galewega 'enadi madounega sigwaegwae, “To'abihetena ta Tamana Yehoba sihetoloina pwaiya bale'u 'ina 'ebeloina mabwaiyana 'oidiya, ma geya'abwa 'idi loina 'igumwagumwala.”

<sup>16</sup> Babadaedi site tuweniti powa Yehoba matana simiyatoiya 'idi wagahata wasawasa 'oidiya, taudi sibe'u talutalubu'iya ma 'oina sihepwaile, sigwaegwae,

<sup>17</sup> “Cima Bada Yehoba Tohewaiwai hedade, 'owa tuta bewa, ma tuta mwalo 'oidiya 'umiyamiya, 'aloyauwedo 'oiuwa, weyahina 'ino waiwai madouna 'u'abi helatuweya, 'oinega 'uhagaina ma 'uloina. <sup>18</sup> Taudi tomiya ganamuli sigamwasowala moisa, ma hesi 'ino yatala 'ana tuta 'ilatuma ta to'amasa sitoholo ma 'uloinedi, ma 'ino palopitao 'adi maisa 'u'ebwaedi, ma 'ino tomotaedi mabwaiyadi

'adi maisa 'u'ebwaedi, taudi madoudi ta muhemuhedi 'oidiya, weyahina taudi beno 'a tohe'asisiyao. Ma hesi bale'u 'ana to'abihegalao 'owa 'u'abihegaladi.”

<sup>19</sup> Eeta Yehoba 'ina Hada He'asisi galewa 'iso'eya, ta ya'iteya dedewaga he'asisi, Hada He'asisi 'alona, ma dedewagaina 'alona 'ina gwaehemisa 'ana buki 'imiyamiya. Coinega namala, ma 'enanao, ma gugula 'ina dagugu, ma mwani'ini'i, ma dohi gide 'aisi patupatudi ta pa'alidi silatuma.

## 12

*Hebai mwagunao sebeni eema wahine*

<sup>1</sup> Ma galewa 'ebe henainaida madouna 'ilatuwa, beno wahine 'aigeda, 'ana 'ale'o sinala gide, ma wai'ena 'oina 'itotoholo, ma debana 'ana pasa 'ipwala tuwelo. <sup>2</sup> Ta wahineina gamwagamwaina 'oinega gamwana 'imuyamuya, ma 'ibwaubwau weyahina gamwana 'ilohinowa.

<sup>3</sup> Wete 'aigeda 'ebe henainaida galewega 'ilatuma, beno hebai bwehabwehalina ma madouna, ta mwagunao 'adi baibaiwa sebeni ma donana 'adi baibaiwa nima luwaluwa, ta mwagunao 'oidiya pasa wasawasa simiyamiya. <sup>4</sup> Ma subwenega 'ipwala baibaiwadi 'i'ahusapidiya ta 'iulediya bale'uwa. Ceguma 'ipwalaedi mabwaiyadi tawatahidi 'etoi tupwa 'oidiya, 'aigeda tupwa 'oina 'ihunu hegumwalidiya, ta 'eluwa situpwa. Ta hebaiina bwehabwehalina wahineina matana 'itoholowa, ma 'eguma 'ihenatune, nata gwamaina 'i'ai.

<sup>5</sup> Eeta wahineina 'ihenatuna ta gwama loheyana, tauna 'abehega tupwa mabwaiyana 'adi toloina waiwaina, ta gwamaina Yehoba 'itoeya tauna 'ina wagahata wasawasa 'oina. <sup>6</sup> Ma wahineina 'idena tupwa yoho 'awawa. Nage 'oina wahineina 'ina tupwa Yehoba 'i'atububuya, ma 'oina 'i'itayahi sabwelo 'adi baibaiwa gide wan tausani tuhandeledi sikisti (1260).

<sup>7</sup> Coinega galewa 'aleha 'ilatuwa. Calehaina anelose madouna Maikeli ma'ina aneloseyao ma hebaiina bwehabwehalina ma'ina aneloseyao ma'iyadiyao silolo'aleha. <sup>8</sup> Ma hebai ma'ina bodao geya sawasawahina ma sihewaiwai Maikeli ma'ina bodao 'oidiya, ma 'oinega hebaiina ma'ina aneloseyao sipa'idiya ta siula suluhediya bale'uwa. <sup>9</sup> Hebaiina bwehabwehalina ma madouna, tauna mwata nugenugetaina sanina Seitani, gide Tomodulele, tauna bale'u 'ana to'abo. Tauna ma'ina aneloseyao mabwaiyadi bale'uwa siula suluhediya.

<sup>10</sup> Muliyetega galewega 'enana madouna yahesagoheya, 'igwaeya, “Bewa tuwa Yehoba 'ina waiwaiyega 'iloinegita, ma 'i'abihetegita. Ta wete 'ada To'abihetenaina 'ihetoloina 'oida. Weyahina tasidao 'adi tohe'ewa, tauna mwalo nihuwana ma sabwelowa Yehoba matana 'itotoholo ta 'ihehe'ewediya, tauna galewega siula latuheya.

<sup>11</sup> “Ma tasidaowedi hesi tuwa yawasidi sitagwaleya ma Keliso weyahina si'amasa, 'oinega Tomoduleleina ma'iyadiu silo'aleha ta taudi sihewaiwaiya. Ma 'idi hewaiwai Lami bweyahinega, ma wete 'idi hepwailega Lami weyahina. <sup>12</sup> Ee 'oinega tomiya galewa mabwaiyami wayaliyaya, ma hesi 'omi bale'u ma hola 'ana tomiyao mwau madouna 'oimiya, weyahina Seitani 'isulu pwaiya 'oimiya ta ma'ina gamwasowala, weyahina 'isanasanapu 'abehega 'ina tuta to'uto'upana tuwa 'imiyamiya.”

<sup>13</sup> Nage 'oina hebaiina bwehabwehalina 'inuwasabwalena 'abehega bale'uwa siula suluheya, 'oinega 'ipa'iyaya wahineina, tauna gwama loheyana 'ihenatuneya. <sup>14</sup> Ma wahineina magisubu madouna papenao Yehoba 'i'ebwaeya ma 'oinega 'itaheya 'ina tupwa yoho 'awawa, ma beno 'oina Yehoba 'i'ita'itayahi bolime 'etoi ma tupwana 'oidiya, ma geya'abwa mwataina 'i'abi'abiyahi.

<sup>15</sup> Eeta mwataina 'ahwanega we'aha 'isiwa latuweya gide yagewa wahineina mulinega, ma 'abehega wahineina 'idoe. <sup>16</sup> Ma bale'u wahine 'ilemeya, beno bale'uina 'i'eso'eya ta we'aha mabwaiyana 'itoneya. <sup>17-18</sup> Coinega hebaiina 'igamwasowala hedadeya wahineina 'oina, ta 'inaowa wahineina 'ina susuwao 'ilo'alehediya, taudi beno Yehoba

'ina gwae 'ana toguibigao ma Yesu 'ana tohepwailao. Eeta hebaiina bwehabwehalinaina nenegwala holai 'itoholo baula.

## 13

### *Hebai heluwena*

<sup>1</sup> Citotoholo ta ya'e'ebubuna, ta 'aigeda wete hebaiina tauna holega 'ihanema, donanao 'adi baibaiwa nima 'eluwa, ma mwagunao 'adi baibaiwa sebeni, ma donanaedi mabwaiyadi ma'adi pasa wasawasa, ta wete mwagunaedi 'oidiya sani galadi silelediya. <sup>2</sup> Ta hebaiina ya'iteya 'ana 'ita gide simai, ma hesi madouna ta waiwaina, ma 'ahenao 'adi 'ita gide beya 'ahedi, ma 'ahwana gide laiyoni 'ahwadi. Ma hebai nugenugetanaina bwehabwehalina 'ina waiwai hebaiina holega 'i'ebwaeya, ma wete 'ina wagahata wasawasa ta 'ina loina madouna 'i'ebwaeya. <sup>3</sup> Ma hebaiina holega mwaguna 'aigeda 'ana 'ita gide hehesilahena, ma 'amasega 'ibwebwe'ana pwaiya. Ta nage 'oina tomota mabwaiyadi nuwadi 'ihenainaida moisa, ta hebaiina holega simuliyeya. <sup>4</sup> Ma wete hebai nugenugeta 'oina si'e'etuluha, weyahina loina 'i'ebwae pwaiya hebaiina holega 'oina. Ma wete hebaiina holega 'oina si'e'etuluha, ma sigwae, “Geya 'eta taiya 'ina waiwai hebai bewa gide ma 'oinega 'oina 'ida lo'aleha.”

<sup>5</sup> Ma hebaiina tagwala 'iloba pwaiya ma ginaula gala hedade 'i'inatedi, ta wete ma'ina loina wai'ena potitu (42) 'alodiya. <sup>6</sup> Ma hebaiina Yehoba 'i'ahwa galegaleya, sanina ma 'ina 'asa ma wete galewa 'ana tomiyanao 'i'ahwa galegalediya. <sup>7</sup> Ta wete tagwala 'ilobeya ma 'abehega Yehoba 'ina tomotaedi 'ilo'alehadi ma 'ihewaiwai, ma wete ma'ina loina bodao mabwaiyadi 'oidiya, ma susuwao ma 'enanao mabwaiyadi 'oidiya, ta wete 'ebeloina mabwaiyadi 'oidiya.

<sup>8</sup> Ma mebale'u mabwaiyadi 'abwa 'oina si'e'etuluha, beno taudi 'eguma geya sanidi simiyamiya yawasi bukiina 'alona, bukina lamiina silohe'amasiya 'ina buki. Buki bewa 'alona taudi sanidi mwalo hene 'ilele nugetediya, eema muliyetega bale'u 'ihemasaleheya.

<sup>9</sup> Ceguma taiya matenana, gwae bewa 'ihesagohe. <sup>10</sup> Weyahina “Ceguma taiya si'abiyahi, sida 'abiyahi tuwa, ma wete taiya 'eguma 'elepaleha 'oinega silohe'amasi, sida lohe'amasi tuwa.” Gwae bewa 'oinega Yehoba 'ina tomotaedi ma'idi hemisa sitoholo pa'ala.

<sup>11</sup> Ta wete 'aigeda hebai hetoina ya'iteya bale'uwega 'ilatuma, ma donanao 'eluwa gide lami donanao, ma 'enana gide hebai nugenugetaina bwehabwehalina 'enana.

<sup>12</sup> Ma hebai holega 'ina waiwai mabwaiyana hebai hauhauna 'i'ebwaeya ma 'abehega tauna 'iloina, ta hebai holega 'i'ebubunamo. Coinega hebaiina hauhauna mebale'u mabwaiyadi 'iloiloinedi ma hebai holega 'oina si'e'etuluha, tauna mwalo 'ihesilaheya ma 'ibwebwe'ana hila. <sup>13</sup> Ta wete hebai hauhaunaina 'ana 'aniyana 'ipaihowediya, gide 'aiwe ninima 'ibe'uma galewega gogo gabulena tomota matadiya. <sup>14</sup> Ma tagwala 'iloba pwaiya ta 'oinega hebaiina holega matana 'aniyanaedi 'ipaihowediya, ma nage 'oina mebale'u mabwaiyadi 'i'abowediya. Ma 'ina 'abowedi 'oidiya 'igwae, “Da'ule 'aigeda watagi eema wapaihowa 'ana 'ita gide hebaiina 'elepaleha 'ihesilaheya ta 'ibwebwe'ana hila.”

<sup>15</sup> Eeta sipaihoweya, ta hebaiina hauhauna ma'ina loina, 'oinega da'ule tagitagina yawasina 'i'ebwaeya, ta sawasawahina 'igwae, 'oinega 'iloina 'abehega 'eguma taiyewedi geya 'oina si'e'etuluha nata 'amasa siloba. <sup>16</sup> Ma wete mabwaiyadi 'iloinediya, 'i'iudi ma madoudi, towasawasao ma toweweloheyao, ma wete babadao ma topaihowao, ta 'abehega nima 'ebeuladiyega ma debadiya 'ana 'ila'ilala gide basilili silagudi. <sup>17</sup> Ma 'oidiya loina pa'alina 'ilaguya, ma taudi 'eguma 'ila'ilalaina geya 'oidiya, geya'abwa wete sihegimwane, bo sigimwagimwane, 'ana siga hebaiina 'ana 'ila'ilala si'ewa he'i, beno sanina, nuwana saninaina 'ana namba.

<sup>18</sup> Ma bewa 'ana nuwasabwalena. Ceguma taiya ma'ina nuwasabwalena hebaiina 'ina namba 'ida hasili, beno 'aigeda loheya 'ina namba, sikisi handeledi ma sikisti sikisi (666).

## 14

*To'abihetena 'ina tomotaiyao*

<sup>1</sup> Ma ya'e'ebubuna, ta lami ya'iteya 'oya Saiyoni debana 'itotoholo, ma wete tomota 144 tausani ma'iyanao simiyamiya, taudi beno sanina ma wete Tamana sanina debadiya silelediya. <sup>2</sup> Coinega galewega 'enana 'aigeda yahesagoheya gide we'aha 'idaudau, ma wete gide gugula 'enana. Ma 'enanaina yahesagoheya gide 'ebe gihedohedou sidoudou 'adi hesagoha 'ausala. <sup>3</sup> Ma tomotaedi wagahata wasawasa matana sitoholowa, ma wete hebai 'ehataedi ma babadaowedi matadiya sitoholowa, ma wali 'ehauna siwaliyeya. Ta waliina geya 'eta taiya sawasawahina ma 'isanapu, beno namo taudi bodaedi 144 tausani sawasawahidi, taudi mebale'u, ma Yehoba 'igimwanediya ta 'i'abihetediya.

<sup>4</sup> Ma taudi loheloheyaedi geya sipui wahiwahine mahetediyao 'idi tuta sedasedega ma 'itautauya, ma hesi lami simuliya bwaibwaini 'eguma ta'eha 'itauya. Taudi Yehoba 'igimwane nugetediya tomota 'oidiyega, beno Yehoba ma lami 'idi 'etahi nugenugetana.

<sup>5</sup> Taudi geya 'eta 'abo 'oidiya, ta geya wete 'idi puimo.

*Anelose 'etoi 'idi tetela*

<sup>6</sup> Coinega wete 'aigeda anelose ya'iteya tabwanega 'itahetaheya, ma tetela bweb-we'ana ta miyamiya hatayana 'i'eweyama, ma 'abehega 'ihepwaila mebale'u mabwaiyadi 'oidiya, beno 'ebeloinao ma susu ma 'enana ma boda 'aigeda 'aigeda 'oidiya.

<sup>7</sup> Ta aneloseina 'enana madounega 'igwaeya,  
“Yehoba 'oina wahe'asisi, wahepwatu, weyahina 'ina tuta yatala 'ilatua pwaima, 'oinega tauna galewa ma bale'u ma hola ma wete we'aha daudaudi 'adi tohemasalahaina matana wa'etuluha.”

<sup>8</sup> Ma anelose heluwena 'imuliyeya ta 'ibwauwa, 'igwae,  
“Casa madouna Babiloni 'ibe'u pwaiya. Casaina 'ina mumugega boda mabwaiyadi 'ihenumediya, mumugaina beno wahi 'ana henuhenuwa mumuga galana weyahina.”

<sup>9</sup> Anelose 'eluwaedi mulidiyega 'aigeda wete 'imulimuliyama, ta aneloseina tauna wete 'ibwauwa, 'igwae,

“Ceguma taiyawedi si'e'etuluha hebaiina ma 'ina dimwa tagitagina 'oidiya, ma 'adi 'ila'ilala manidiya bo nimadiya, <sup>10</sup> nata taudi Yehoba 'ina waini waiwaina 'oinega sinuma, ta wainiina beno Yehoba 'ina gamwasowala moisa 'isiweya gamwasowala biyona 'oina. Ma wete 'aiwe yahiyahina ma da'ule yahiyahidi tomotaedi wahidiya silotoho, Yehoba 'ina aneloseyao ta lami matadiya. <sup>11</sup> Ma 'aiweina 'asuna 'ihanehane hataya, ta geya 'ina 'ebe gumwalamo. Ma tomotaedi taudi hebaiina ma 'ina dimwa tagitagina 'adi to'etuluhao, ma sanina lelelelena 'ana to'ewao, taudi 'idi muyamuya geya 'ida gumwala sabwelo ta nihuwana 'oidiya.”

<sup>12</sup> Gwae bewa 'oinega Yehoba 'ina tomotaiyao 'abwa si'alama'i'ita, taudi 'ina lolina 'ana tohematamatanao ta Yesu 'ana tohemisao. <sup>13</sup> Eeta galewega 'enana yahesagoheya 'igwaeya, “Bewa 'ulele 'abehega taiyawedi 'ida Bada 'ana tohemisao, 'eguma 'abwa si'amasa, sida yaliyaya tuwa.” Ma Yaluyaluwa Tabuna wete 'igwaeya, “Moisa tuwa siyaliyaya, weyahina 'abwa si'aiyawasi 'idi paihowa madouna 'oinega, ma 'ana maisa siloba.”

*Bale'u 'eli'elinaina*

<sup>14</sup> Ma ya'e'ebubuna ta ya'iteya yaloha wa'ewa'e'ena, ma yalohaina 'oina gide tuwa loheya 'imiyatoiya, ma debana 'ana pasa wasawasa goula, ma nimana 'ina naipi matana 'ai'ainina ma yohuyohuna.

<sup>15</sup> Ta 'aigeda wete anelose Hada He'asisiyega 'ilatuma, ma wete 'ibwau haneya Badaina yaloha debana ma'ina naipi 'oina, 'igwaeya, “Cino naipiyega 'u'eli, weyahina tuta 'eli'eli bale'uwa 'ilatua pwaima, ta 'e'ahai 'imatuha pwaiya.” <sup>16</sup> Ma 'oinega loheyaina yaloha debana 'ina naipi 'igohaeya, ta bale'uina 'i'eliya, ma 'e'ahaiina 'ihogonediya.

<sup>17</sup> Ma 'aigeda wete anelose Hada He'asisi galewa 'oinega 'ilatuma, tauna wete naipi matana 'ai'ainina nimana. <sup>18</sup> Eeta 'aigeda wete anelose 'ebe pwaoli 'oinega 'inaoma, tauna 'aiwe 'ala'alata 'ana toloina, ta 'enana madounega 'ibwauwa aneloseina ma'ina naipi 'oina 'igwaeya, “Cino naipiyega 'ugoha ma gileipa huwainao bale'uwa 'udomwadi, weyahina sibwehala pwaiya.”

<sup>19</sup> Coinega aneloseina 'ina naipiyega gileipa huwaidi bale'uwa 'i'upwediya ma gilepaedi 'ebe hida madouna 'alona 'iulediya. Cebe hidaina beno Yehoba 'ina gamwasowala. <sup>20</sup> Ma gilepaedi mabwaiyadi 'ihideya 'ebe hida madouna 'oina, beno 'asa madouna mulumulina, ma bweyaha 'idaudau 'ebe hidaina 'alonega, gide yagewa 'ana dudula teli handeledi kilomita gide, ta 'ana ni'u 'ina hane gide bale'uwegwa ma hosi 'itotoholo 'ani'ona 'oina.

## 15

### *Cila'ilala galadi*

<sup>1</sup> Ma 'aigeda wete 'ebe henainaida madouna galewa ya'iteya, beno anelose sebeni, ma'idi muyamuya galadi 'adi baibaiwa sebeni. Ta mwauwedi sebeni beno Yehoba 'ina gamwasowala 'ana 'ebe losaloha.

<sup>2</sup> Ma wete ya'iteya gide hola 'ina daumwala ma wete ninininimana, ta holaina papalina boda sitotoholo, taudi sihewaiwai pwaiya hebai galana ma'ina dimwa tagitagina ma wete sanina 'ana hasihasila 'oidiyega. Ma tomotaedi nimadiya 'ebe gihedohedou Yehoba 'oinega, <sup>3</sup> ta mabwaiyadi Mosese walina siwaliwaliye, tauna Yehoba 'ina topaihowa. Ma wete lami walina siwaliwaliye, sigwae,

“Bada Yehoba Tohewaiwai 'ino paihowao madoudi ma 'ebe henainaida, ta 'ino mumuga mabwaiyana 'ausaladi ma dumwaludi, ma 'ebeloina mabwaiyadi 'uloinaedi.

<sup>4</sup> “Bada yo, tomota mabwaiyadi 'abwa sihe'asisiyego ma si'ahwa wasawasaego, weyahina 'uboimo 'asi'asilalau, 'oinega mebale'u mabwaiyadi sinaoma ma matauwa si'etuluha, weyahina tomota mabwaiyadi 'ino loinao dumwaludi si'ita pwaidiya.”

<sup>5</sup> Coinega ya'e'ebubuna ta ya'iteya galewa Yehoba 'ina hada so'eso'ena, hadaina 'alona 'ina gwae hemisa lelelelena 'imiyamiya. <sup>6</sup> Ma Hada He'asisiina 'oinega anelose sebeni silatuma ta muyamuya sebeni nimadiya. Aneloseyedi 'adi 'ale'o wa'ewa'e'edi ta 'ausaladi, ma 'adi gadiwana goula lumalumadiya simiyamiya.

<sup>7</sup> Eeta hebaiyedi 'ehata 'oidiyega 'aigeda hebai biyo goula sebeni 'i'ewediya, ta anelose sebeniyedi 'i'ebwaediya, ta biyowedi 'alodiya Yehoba miyamiya hatayana 'ina gamwasowala 'oinega 'ilohemahediya.

<sup>8</sup> Nage 'oina Hada He'asisi 'alona 'imaha Yehoba Tohewaiwai hedade 'ina wasawasa 'oinega, 'ana 'ita gide 'asu ma geya 'eta taiya sawasawahina ma Hada He'asisi 'oina 'iluhu, 'ana siga aneloseyedi sebeni 'idi paihowa muyaedi sebeni silosalohidi.

## 16

### *Yehoba 'ina gamwasowala biyonaon sebeni*

<sup>1</sup> Ma Hada He'asisi 'alonega 'aigeda 'enana madouna yahesagoheya, 'igwaegwae aneloseyedi sebeni 'oidiya, 'igwaeya, “Wanao ma wasulu bale'uwa, ma Yehoba 'ina gamwasowala biyonaon wasiwadi.”

<sup>2</sup> Coinega anelose nugenugeta 'inaowa ta 'ina biyo bale'uwa 'isiweya, ta bwe'a galadi ta muyadi silatuwa taudi hebai 'ina dimwa tagitagina 'ana to'etuluha 'oidiya, taudi beno hebaiina 'ana 'ila'ilala 'oidiya 'imiyamiya. <sup>3</sup> Ma anelose heluwena wete 'ina biyo 'i'eweya ta holai 'isiweya, ta holaina mabwaiyana 'ihebweyaha, 'ana 'ita gide to'amasa 'aigeda bweyahina. Coinega ginaula mabwaiyadi mayawasidi ni'uwa si'amasa.

<sup>4</sup> Ma anelose hetoina wete 'ina biyo 'i'eweya ta we'aha daudauna ma bidala 'oidiya 'isiweya, ta wete sihebweyaha. <sup>5</sup> Coinega aneloseina tauna we'aha 'ana toloina 'enana yahesagoheya, 'igwaeya,



“Yehoba yo, 'owa tuta mwalo ta bewa 'oidiya 'umiyamiya, ma wete dumwaluu ma 'asi'asilalau. Cino loina bewa bwebwe'ana hedade, weyahina tomotaedi galadi, <sup>6</sup> ta Yehoba 'ina topaihowao ma wete 'ina palopitao sihunudiya, ta bweyahidi si'abi hedauya. Coinega 'adi maisa 'u'ebwae pwaidiya ma 'abehega bweyaha sinuma, ta maisaina beno 'ilobwainediya moisa.”

<sup>7</sup> Ma 'enana 'aigeda wete yahesagoheya 'ebe pwaoli 'oinega 'igwaeya, “Bada yo, 'owa Yehoba Tohewaiwai hedada 'ino loina bewa 'ausaladi ma dumwaludi.”

<sup>8</sup> Eema anelose 'ehatana 'ina biyo 'i'eweya ta sinala 'oina 'isiweya, ta sinala 'ina waiwai 'ilohepoiya, ta sawasawahina ma tomota 'i'alasidi. <sup>9</sup> Ma yahiyahiina madouna tomota 'i'ala'alasidi, 'oinega Yehoba siheliyeya, weyahina tauna 'ina loinega ma mwauwedi silatuma. Ma tuwa geya sida nuwabuiya ta 'abehega Yehoba sihepwatuwe.

<sup>10</sup> Eema anelose henimana wete 'ina biyo 'isiweya hebaiina bwehabwehalina 'ina wagahata wasawasa 'oina, ta 'ina 'ebeloina mabwaiyana 'iguguyouwa. Ta tomota muyaina 'oinega sihesala'i'ita. <sup>11</sup> Ma Yehoba galewa siheliyeya, bwe'aedi muyamuyadi weyahidi, ma hesi geya sida nuwabuiya 'idi paihowa puiyedi 'oidiyega.

<sup>12</sup> Eema anelose hesikisina 'ina biyo 'i'eweya ta we'aha sanina Yupeletisi 'oina 'isiweya ta we'ahina mabwaiyana 'iyapasa, ma kini tupwadi sihabalama tupwa bolibolimeyega. <sup>13</sup> Ma yaluyaluwa 'etoi galadi ya'itediya, 'adi 'ita gide 'we'we silatulatuma hebaiina bwehabwehalina 'ahwanega, ma wete hebaiina holega ma wete 'ina palopita 'abo'aboina 'ahwadiyega. <sup>14</sup> Yaluyaluwa 'etoiyedi beno Tomudulele 'ina 'ali'eyao taudi 'ebe henainaida sipaihowediya, ta sinaowa kiniyao bale'u mabwaiyana 'oina ta 'abehega 'idi bodao sihegogonedima ma taudimo silo'aleha hiladi, beno nata Yehoba Tohewaiwai hedada 'ina sabwelo madouna 'oina.

<sup>15</sup> “Wahesagoha, 'abwa 'igu hapwesama gide toyagaha 'idi hapwesama tuwa, ma 'eguma 'owa taiya 'ulomatayahi ma 'a 'ale'o 'u'otemomosi, 'uyaliyaya, 'ane geya'abwa 'umwadina 'ino bugewa weyahina.”

<sup>16</sup> Coinega yaluyaluwaedi kiniyao ma'idi bodao sihegogonedima tupwa 'aigeda, sanina 'ena Ibeliuwega sigwae “Amagedoni” 'oina.

<sup>17</sup> Ma anelose hesebenina 'ina biyo 'i'eweya ta galewa ma bale'u gamwagamwanidiya 'isiweya, ma wagahata wasawasa Hada He'asisi 'alonga 'aigeda 'enana madouna 'ilatuma, 'igwaeya, “Cigumwala pwaiya.”

<sup>18</sup> Ma nage 'oina namala ta dagugu ta gugula ta wete mwani'ini'i madoudi silatuwa. Mwalo hene ta nige, tomota 'idi tuta 'oina, geya 'eta mwani'ini'i 'ana madou nage gide 'ida latu'esa. Ma bewa moisa gala hedade. <sup>19</sup> Eeta 'asa madounaina 'i'ewatahiya, ta 'ana watahina 'etoi silatuwa. Ma tupwa mabwaiyana 'oidiya mwani'ini'iina 'idi 'asa 'igihegalediya, ma 'asa madouna sanina Babiloni 'ina pui Yehoba 'inuwatuhu yahiya ta 'ina biyo 'oinega waini 'ihenumeya, ma wainiina beno 'ina gamwasowala madouna wainiina. <sup>20</sup> Ma wete bwanabwanao ma 'oya mabwaiyadi sisawala, ta geya wete sawasawahina ma taloba hiladi. <sup>21</sup> Ma wete dohi madoudi ma patupatudi, gide da'ule madoudi, galewega sigubagubalama tomota 'oidiya. Coinega tomotaedi Yehoba siheliyeya dohiina gala hedadena weyahina.

## 17

### *Toganawala moisa wahineina*

<sup>1</sup> Eeta aneloseyedi sebeni ma'idi biyo sebeni Yehoba 'i'ebwaediya, 'aigeda 'oidiyega 'inaoma ma 'ihegwaegauwa, 'igwae, “Cunaoma ma yahe'itago Yehoba 'ina loina mwauna toganawala moisa wahineina 'oina, ma toganawalaina 'ana nuwasabwalena beno 'asa madouna si'abiya we'aha baibaiwadi papalidiya. <sup>2</sup> Ma bale'u 'ana kiniyao pui 'oina sihewaiwai toganawalaina ma'iyadiu, ma 'oinega mebale'u mabwaiyadi pui mumugana sinumeya ta sihebuwa.”

<sup>3</sup> Ma Yaluyaluwa Tabuna 'oinega yalotohogauwa gide aneloseina 'itoegauwa tupwa yoho 'awawa, ma wahine 'aigeda ya'iteya hebai bwehabwehalina 'igeluya, ma hebaiina

wahina mabwaiyana 'oina sani galadi silelediya, ma mwaguna 'adi baibaiwa sebeni, ma donanao 'adi baibaiwa nima 'eluwa. <sup>4</sup> Ma wahineina 'ana 'ale'oina 'ana bwehabwehala gide towasawasao 'adi 'ale'o, ma 'ana pasao goula ta da'ule 'ausaladi ma 'epo. Ta nimana biyo goula 'i'abi yahiya, mumuga galana 'oinega silohemaheya pui weyahina. <sup>5</sup> Ma manina sanina sileleya 'ana 'unuwadawada, 'igwae,

“Babiloni madouna, beno toganawalao ta topui gala hedada sinadiu.”

<sup>6</sup> Ma wahineina ya'iteya, Yehoba 'ina topaihowao ma Yesu 'ana tohepwailao 'idi 'amasega bweyahidi 'inumediya ma 'oinega 'ihebuwa, ta yahrenainaida wahineina 'ana 'ita weyahina.

<sup>7</sup> Eema aneloseina 'ihegwaegauwa, 'igwaeya, “Geya'abwa nuwau 'ihenenainaida. Yada gihemaedane 'oiuwa to'aha wahineina ma hebaiina 'oina 'igeluwa, tauna mwaguna sebeni ma donanao nima 'eluwa, 'adi nuwasabwalena. <sup>8</sup> Hebaiina 'u'iteya mwalo mayawasina ma 'i'amasu pwaiya, ma 'abwa 'ilatuma gaulaina madouna 'oinega ma 'itauya, ma 'oinega sigihigala bwaibwaini. Ta tomota mebale'u, taiyewedi taudi sanidi Yehoba geya 'ilele yawasi bukina 'alona, tutaina bale'u 'ana hemasalaha hauhau 'oina, taudi hebaiina 'abwa si'ita ma nuwadi 'ihenainaida, weyahina mwalo mayawasina, ta tuta bewa 'i'amasu pwaiya, ma 'abwa 'ilatu hilama.

<sup>9</sup> “Ceguma sonoga 'oiuwa, 'usanapu 'abehega mwaguwedi sebeni beno 'oya 'adi baibaiwa sebeni, 'oyaedi 'oidiya wahineina 'imiyatoiya, ma 'ana nuwasabwalena wete kinyao site sebeni, <sup>10</sup> ma nima 'oidiyega sibe'u pwaiya, ma 'aigeda 'abwa 'iloiloina, ma 'aigeda 'abwa 'ilatu, ta 'ina tuta to'uto'upanamo 'imiyamiya.

<sup>11</sup> “Ta kinyedi sebeni, 'aigeda wete kini ma'iyadiu, 'idi boda 'alona, tauna hebaiina mwalo mayawasina ta yawasina 'igumwala, ta 'abwa 'inaonao ma 'abehega sigihigala bwaibwaini.

<sup>12</sup> “Ma donaedi nima 'eluwa 'u'itediya, beno kini 'adi baibaiwa nima 'eluwa, taudi geya sihegaina ma siloina, ta 'abwa siloina tuta to'uto'upana 'oina, hebaiina ba'idadiu.

<sup>13</sup> “Taudi site nima 'eluwaedi 'idi nuwatuhu mahemahetena, nuwanuwadi ma 'idi waiwai ma 'idi loina sitagwaledi hebaiina 'oina. <sup>14</sup> Ma 'abwa Lami 'oina silo'aleha, ma Lamiina 'ihewaiwai sinedi, weyahina tauna babadaowedi 'idi Bada, ma kinyao 'idi Kini, ma wete taudi 'ina hesinuwega 'ibwauwedima, taudi 'ana tomuliyao moisa ba'idanao.”

<sup>15</sup> Coinega anelose 'oiguwa wete 'igwaeya, “We'ahedi 'u'ita pwaidiya, 'oidiya wahine toganawalina 'imiyatoiya, 'adi nuwasabwalena beno 'ebeloinao ma bodao ma susuwao ta 'enanao. <sup>16</sup> Ma dona nima 'eluwa ta hebaiina 'u'itediya, taudi 'abwa toganawala silo'alehe, ta 'ina tobwatobwao mabwaiyadi si'ewadi ma nimenimenamo 'imiyamiya, ma wete hesiyona si'ai, ta hilihiliyanao 'aiweyega sigabudi. <sup>17</sup> Weyahina Yehoba 'atediya 'ihenuwa laguweya ma 'ina nuwatuhu sipaihowa, beno 'idi paihowa mahemahetena, ma 'idi waiwai ta 'idi loina hebaiina 'abwa si'ebwae, ta tauna 'iloiloina 'ana siga Yehoba 'ina gwaeyedi 'ipaihowadi.

<sup>18</sup> “Ma wahineina 'u'iteya, beno tauna 'asa madouna, ma 'iloiloina bale'u 'ana kinyao mabwaiyadi 'oidiya.”

## 18

### *Casa Babiloni 'ina be'u*

<sup>1</sup> Ma wete 'aigeda anelose ya'iteya galewega 'idobidobima, tauna ma'ina loina madouna, ma wete 'ina 'asilalega bale'u 'i'asilala, <sup>2</sup> ma 'enana madounega 'ibwauwa, “Casa madounaina Babiloni 'ibe'u pwaiya, ma Tomudulele ma'ina bodao ta wete kwasumo galadi ma didigadi sihe'asaeya, <sup>3</sup> weyahina Babiloni 'ina wainiyega boda mabwaiyadi 'ihenumediya, wainiina beno pui galana. Tauna gide toganawala. Coinega bale'u 'ana kinyao ba'idadiu sipuiya, ma 'ina puiyedi 'oidiyega to'ahwa'uneyao 'idi wasawasa madouna silobaloba.”

<sup>4</sup> Ma galewega wete 'aigeda 'enana yahesagoheya, 'igwaeya, “Cigu tomotaiyao 'asa beno 'alonga walatuma, 'amuge 'ina puiina 'oimiya 'ihabala ma 'ana maisa muyamuya

waloba. <sup>5</sup> Weyahina 'ina pui 'ana madou gide tuwa galewa 'ina hane, ma 'ina mumuga galadiyedi weyahidi Yehoba 'inuwanuwatuhu ma 'abehega 'ihemaise.”

<sup>6</sup> Ta wete aneloseina 'igwaeya, “Casa nage 'uhemaise, gide tuwa to'aha 'ina paihowa, ma 'uhemaise maluwa. Ma wete tauna 'ina waini galana maluwa 'u'ebwae, ma tauna 'inuma. <sup>7</sup> Ta wete 'ina gwae gagasa ma 'ina hemataganawala 'adi maisa 'u'ebwae, muyamuya ma dou, weyahina 'iboinamo 'oina 'igwaeya, ‘Taugu Kuini, geya wete hiwape 'ina tupwa 'oina yada miya, ma wete geya'abwa dou yalobaloba.’ <sup>8</sup> Coinega sabwelo 'aigeda 'oina mwauwedi 'abwa silatu, beno lohala madouna ma gomale, ta wete 'aiwe ninima 'i'alasi. Weyahina Badaina, tauna Yehoba Tohewaiwai hedade, wahineina 'ana maisa 'i'ebwae.”

<sup>9</sup> Ma bale'u 'ana kiniyao, taudi wahineina ba'idadiu silogwaliya ta simiya hemataganawala, taudi wete 'asaina weyahina sidou ma sidougwaegwae, 'eguma 'asa 'i'ala'alasi, ma 'asuna si'ita. <sup>10</sup> Ta ma'idi matautaina muyamuya weyahina, 'oinega 'edasaliyana sitoholowa ma sigwae, “Caioi, 'aioi, 'asa madouna ma waiwaina Babiloni 'ana loina 'iloba mwamwayau.”

<sup>11</sup> Ma wete bale'uwa to'ahwa'uneyao ma'idi nuwagala ta 'asaina weyahina sidouwa, weyahina geya 'eta taiya 'idi tobwatobwaedi 'ida gimwaneyediya. <sup>12</sup> Cidi tobwatobwaedi beno gide goula ma siliba, ta dimwa wasawasa ta 'epo ta 'ale'o wa'ewa'e'edi, ma 'ale'o wasawasa hebwehewelidi, ma 'aiwe mahamahaidi, ma dona madoudi, ma 'aiwe bwebwe'adi gide gahi, ma kopa pwawati, ma dimwa wa'ewa'e'edi, <sup>13</sup> ma seyala, ma mwahadi, ma gado'a\*, ma holowa, ma ginaula mahamahaina, ma waini, ma holowa ganinibu, ma witi, ma bulumakau, ma sipi, ma hosi, ma waga lisilisi, ta wete tomota mayawasidi sihegimwaneyedi ma 'abehega 'idi topaihowao.

<sup>14</sup> Coinega to'uneyedi 'asaina 'oina sigwaeya, “Ginaulaedi mabwaiyadi nuwanuwau bo'i sigumwala, ta wete 'ino wasawasa ma 'a hep watu mabwaiyana 'igumwala, nata geya'abwa wete 'ulobaloba hiladi.”

<sup>15</sup> Ma to'ahwa'uneyedi, taudi 'idi wasawasa madoudi 'asaina 'oinega silobeya, sitotoholo 'edasaliyanega, weyahina 'asaina 'ina muyamuya si'iteya, ta simatauta, ta ma'idi 'atemuyamuya sidouwa, <sup>16</sup> sigwae, “Caioi, 'aioi, 'asa nage madouna mwalo 'ipasa 'ale'o wasawasa, ma 'ale'o wa'ewa'e'edi ma bwehabwehalidi, ma goula, ta dimwa wasawasa ta 'epo 'oidiyega, <sup>17</sup> 'ane tuta 'i'iunamo 'oina ma 'ina wasawasaedi sisawala.”

Ma wete taudi waga taniwagadi, ma'idi to'adau mabwaiyadi, ta ni'u 'ana topaihowao mabwaiyadi, 'edasaliyanega sitotoholo, <sup>18</sup> ma 'asaina 'asuna si'iteya ta sibwauwa, “Mwalo geya 'eta 'asa 'ana 'ita gide 'asa bewa madouna, ta bewa tutaina togidega?”

<sup>19</sup> Coinega taudi manidi sigibediya ma sidoudou madouna, sigwaeya, “Caioi, 'aioi, 'asa nage madouna 'oinega to'adau 'idi wasawasa silobediya, ma tuta 'i'iunamo 'oina wasawasaina mabwaiyana sisawala.”

<sup>20</sup> Wayaliyaya 'omi galewa Yehoba 'ina loheloheyao, ma wete palopitao, ma 'ana tohepwailao wayaliyaya, weyahina mwalo 'imi muyamuya 'asaina 'oinega walobeya, ma bewa tuwa Yehoba muya 'oinega 'ihemaisediya.

<sup>21</sup> Eeta 'aigeda anelose waiwaina dimwa madou hedade 'i'abi haneheya ta holai 'i'ula suluheya, 'igwaeya, “Casaina madouna Babiloni 'abwa 'ibe'u da'ule bewa gide, ma geya'abwa wete ta'ita'ita hila.

<sup>22</sup> “Coinega 'asaina 'ina yaliyaya 'igumwala, ma geya'abwa 'eta 'ebe gihedohedou 'ana hunuwa, nuwana yoguli 'ana mu'a 'ilatulatu.

“Ma wete paihowa 'adi tosanapuwo geya'abwa simiyamiya, ma wete yatu 'ana hesagohe 'igumwala. <sup>23</sup> Eeta mayale 'idi 'asilala 'oina geya'abwa silatulatu. Ma wete geya'abwa tohaiyedi 'enadi 'asaina 'oinega sihehesagohe.

“Moisa, bale'u mabwaiyana 'oina bewa 'asaina 'ana towasawasao sihane hedadeya, ta 'idi 'oba 'oidiyega hali tupwa tomotaidi si'abowediya.

<sup>24</sup> “Ma wete mwalo tomota baibaiwadi gide palopitao ta Yehoba 'ina topaihowao silohe'amasidiya 'asaina Babiloni 'oina, ma weyahina 'ana mwau 'ilobeya Yehoba 'oinega.”

## 19

<sup>1</sup> Ma muliyetega hedagadaga madouna yahesagoheya, gide boda madouna 'enadi sihehegwaegwae,

“Yehoba tahepwatuwe, tauna To'abihetena ma Towasawasa ma Tohewaiwai. <sup>2</sup> Ma 'ina loina mabwaiyana dumwaluna ma bwebwe'ana, weyahina tohemata ganawalina 'ina ganawalega bale'u mabwaiyana 'i'abihegaleya, ta 'ana maisa 'ilobeya. Ma wete 'asaina 'oina Yehoba 'ina tomota silohe'amasidiya, 'oinega 'i'abi hegaleya.”

<sup>3</sup> Ma sibwau, sigwaeya,

“Yehoba tahepwatuwe, weyahina 'asaina madouna 'i'ala'alasi, ma 'asuna tuta mabwaiyana 'ihanehane.”

<sup>4</sup> Coinega babadaowedi site tuweniti powa ma wete hebai site 'ehataedi sibe'u talu-talubu'iya tauna Yehoba 'ina wagahata wasawasa 'oina 'imiyatoiya matana, ta 'oina sigwaeya, “Gide, 'ahepwatuwego!”

### *Lami 'ina hai guyaina*

<sup>5</sup> Eeta wagahata wasawasaina 'oinega 'aigeda 'enana 'inaoma 'igwaeya, “Comi Yehoba 'ina topaihowao ma 'ana tohe'asisiyao 'i'iumi ma madoumi, wahepwatu 'oina.” <sup>6</sup> Ma wete yahesagoheya gide boda madouna 'enadi, ma wete gide we'aha daudauna 'enana, ma wete gide gugula 'enana sigwaegwae,

“Yehoba wahepwatuwe, weyahina tauna 'ida Bada Tohewaiwai hedade ta 'ihetoloina pwaiya. <sup>7</sup> Tayaliyaya madouna ma wete tahepwatuwe, Lami 'ina hai weyahina, ta mwanena 'ihepasa pwaiya 'idi hai weyahina, <sup>8</sup> ma wahineina 'ana 'ale'o bwebwe'ana wa'ewa'e'ena Yehoba 'i'ebwae pwaiya.”

Ta 'ale'oina 'ana nuwasabwalena beno Yehoba 'ina tomotaiyao mumugadi dumwaluna.

<sup>9</sup> Ma aneloseina 'oiguwa 'igwaeya, “Gwae bewa 'ulele 'abehega, ‘Taiyawedi 'omi Yehoba 'ibwauwegomiya Lamiina 'ina hai guyaina 'oina, wayaliyaya.’” Ma wete aneloseina 'igwae hila, ta 'igwaeya, “Bewa Yehoba 'ina gwae moisa.”

<sup>10</sup> Ma 'ahena yabe'u talutalubu'iya ta ya'e'etuluha 'oina, ma 'oinega 'igwaeya, “Geya'abwa gide. Taugu tuwa Yesu 'ina topaihowa 'owa gide, ma wete gide tasimwao taudi Yesu 'ana tohepwailao. Yehoba hesi 'oina 'u'etuluha.” Weyahina Yesu 'ana tohepwailao 'adi lotohona gide palopitao 'adi lotohona Yehoba yaluyaluwana 'oinega.

### *Hosi wa'ewa'e'ena 'ana togelu.*

<sup>11</sup> Ta ya'iteya galewa 'i'eso'eya, ma hosi wa'ewa'e'ena 'ihapwesa, ta 'ana togeluinu sihesaniyeya Toguibiga Dumwaluna. Ma 'ina loina dumwaluna 'oinega 'iyatala ta wete 'ilolo'aleha.

<sup>12</sup> Ta matana 'adi 'ita gide 'aiwe 'inininima, eema debana 'ana pasa wasawasaedi baibaiwadi. Ma wete sanina sileleya geya sawasawahina ma taiya 'eta 'isanapu. Ciboinamo 'isanapuya. <sup>13</sup> Ma 'ana 'ale'oina 'i'oteya bweyaha 'oinega 'ihebuteya, ta sanina silaguya, sigwae, “Yehoba 'ina gwae.”

<sup>14</sup> Ma galewa 'ana tolo'alehao 'idi hosi wa'ewa'e'edi sigeludiya, ta simuliyeya, 'adi 'ale'o wa'ewa'e'edi ma 'ausaladi. <sup>15</sup> Ta 'idi tohanugetaina 'ahwanega 'elepa 'aleha mamatana 'ilatulatu, tauna 'abwa 'elepaina 'oinega tupwa baibaiwadi 'ihewaiwai sinedi ma 'oidiya 'iloina pa'ala, ma wete waini 'ebe hida 'oina 'ihidadi, beno Yehoba Tohewaiwai hedade 'ina gamwasowala madouna. <sup>16</sup> Ta 'ana 'ale'o 'oina ma wete 'ahena sanina silelediya, sigwae, “Loheya bewa toloinao 'idi Toloina, ma wete babadao 'idi Bada.”

<sup>17</sup> Eeta 'aigeda anelose ya'iteya sinala 'oina 'itotoholo ta 'ibwauwau bwasmowedi galewa ma bale'u gamwagamwanina sitahetaheya 'oidiya, 'igwaeya, “Wasawalama

Yehoba 'ina guyai madouna 'oina, <sup>18</sup> ma wa'ai kiniyao hesiyodi, ma 'aleha 'ana tohanuge-tao hesiyodi, ta tolo'alehao hesiyodi, ma wete hosiya ta 'adi togeluwao hesiyodi, ta wete loheloheyao baibaiwadi hesiyodi, taudi babadao ma 'idi topaihowao wete, madoudi ta 'i'iudi."

<sup>19</sup> Ma ya'iteya hebaiina holega 'inaoma, ta bale'u 'ana babadao ma'idi tolo'alehao si'auta sabi lo'aleha hosi 'ana togeluwao ma'ina tolo'alehao 'oidiya. <sup>20</sup> Nage 'oina hebaiina ma'ina palopita 'abo'abo si'abi yahidiya, ta mayawasidi siulediya 'asa 'ala'alata 'alona, beno dimwa hulahlaidi 'oina. Palopita 'abo'aboina tauna mwalo 'ina paihowa waiwaina 'ipaihowediya hebaiina matana, ma 'oinega tomota 'i'abowediya, taudi hebaiina 'ana 'ila'ilala 'oidiya 'imiyamiya, ta 'ina dimwa tagitagina 'ana to'etuluhao.

<sup>21</sup> Ma 'elepaina hosiina 'ana togelu 'ahwanega 'ilatulatuma, 'oinega hebaiina ma'ina palopita 'abo'abo 'idi tolo'alehao 'ilohe'amasidiya. Eeta kwasumo baibaiwadi sinaoma ta to'amasaeidi wahidi si'aidiya, ta gamwadi 'i'otuwa.

## 20

### *Bolime tausani*

<sup>1</sup> Ma wete 'aigeda anelose ya'iteya galewega 'isulusuluma, ta gaulaina madouna 'ana 'ebesoe'ekihi ma balae madouna 'i'ewediya, ma 'inaoma, <sup>2</sup> ta hebai bwehabwehalina 'i'abiyahiya, tauna mwata nugenugeta na Tomoduleleina, beno Seitani, ta 'ipaiya ta 'ana siga bolime tausani sigumwala. <sup>3</sup> Coinega aneloseina hebaiina 'i'abi haneheya ta 'iuleya gaulaina madouna 'alona, ta nobwa 'igudubodeya, ma 'igihepa'aliya, ta geya'abwa bodao 'i'abo'abowedi 'ana siga tausani bolime sigumwala, ma muliyega 'ilihasi tuta 'i'iunamo weyahina.

<sup>4</sup> Ma wete tupwana wagahata wasawasa ya'itediya, ma 'oidiya taudi Yehoba lolina 'i'ebwaediya simiyatoiya. Ta wete tomotaedi tani'odi si'upwediya, weyahina taudi Yesu 'ana tohepwailao ma Yehoba 'ina gwae 'ana tohepwailao, yaluyaluwadi ya'itediya, taudi geya hebaiina ma'ina dimwa tagitagina 'oidiya sida 'etuluha, ta geya 'ana 'ila'ilala manidiya ma nimadiya silagudi. Taudi bewa 'amasega sitoholo pwaiya, ta Keliso ba'idadiu siloiloina bolime tausani 'oidiya. <sup>5</sup> Taudi totoholo nugenugetaidi, ma to'amasaeidi mabwaiyadi bolime tausani sigumwala 'abwa muliyetega taudi wete sitoholo hila.

<sup>6</sup> Ta taudi totoholo nugenugetaedi 'asi'asilaladi, 'oinega ma'idi yaliyaya, ma 'amasaeidi heluwena geya'abwa silobaloba, ta taudi hesi Yehoba ma Keliso 'idi topwaoliyao, ta Keliso ba'idadiu sihetoloina bolime tausani 'oidiya.

### *Seitani 'ina we'a*

<sup>7</sup> Coinega bolime tausani 'igumwala, 'abwa Seitani 'ebe paiyega silihasi, ma 'ilatuma, <sup>8</sup> ma 'itauya bale'u mabwaiyana 'oidiya sabi 'abowedi, tupwaina gide Gogi ma Magogi 'oidiya. Coinega Seitani taudi mabwaiyadi tolo'aleha 'ihe'autediya sabi 'aleha, tahasila 'asae, gide namonamo holai.

<sup>9</sup> Eema bale'u mabwaiyana 'oinega sitauyama ta Yehoba 'ina 'asaina madouna 'oina silatuwa, ma 'asaina Yehoba 'ina tohemisaowedi 'oina siha'wabu'wabudiya, ta 'aiwe ninima galewega 'isuluma ta 'i'ala hegumwalidiya. <sup>10</sup> Coinega 'adi to'abo Seitaniina si'eweya, 'asa 'ala'alata 'alona siuleya. Yahiya'ina 'alona mwahene hebaiina ma palopita 'abo'aboina siula pwaiya, ma tupwaina 'oina sitetoiyedi simuyamuya sabwelo ma nihuwana 'oidiya, ta geya'abwa 'igumwagumwala.

### *Yatala 'ana 'ebe losaloha*

<sup>11</sup> Ma ya'iteya wagahata wasawasa wa'ewa'e'ena ma madouna, ma wagahataina 'ana tomiyaina matanega galewa ta bale'u sisawala, ma geya sawasawahina ta'ita hila. <sup>12</sup> Ma to'amasaeidi mabwaiyadi ya'itediya, madoudi ta 'i'iudi, 'ebemiya wasawasaina matana sitotoholo, ta buki 'iyahalidiya, ma 'aigeda wete buki 'iloyahaliya, tauna yawasida 'ana buki, ta to'amasaeidi 'iloinediya, to'aha gide mumugadi lelelelena bukiyedi 'oidiya 'imiyamiya.



<sup>13</sup> Taudi ni'u 'adi to'enowao ma Bwebweso 'ana tomiyao ta bale'u 'ana to'amasao mabwaiyadi sitauyama, ta 'aigeda 'aigeda 'iloinediya, to'aha mumugadi gide. <sup>14</sup> Ma 'amasa ta Bwebweso 'iula dobihediya 'asa 'ala'alata 'alona, ta yahiyahiina beno 'amasa heluwena.

<sup>15</sup> Ma 'eguma taiyewedi geya sanidi 'ilobaloba yawasida bukina 'oina 'iuledi 'asa 'ala'alata 'oina.

## 21

### *Galewa hauhauna ma bale'u hauhauna*

<sup>1</sup> Coinega galewa ma bale'u hauhaudi ya'itediya silatuwa, ta geya hola, ma hesi galewa nugenugetaina ma bale'u nugenugetaina si'waiha.

<sup>2</sup> Ma 'asa 'asi'asilalana ya'iteya tauna Yelusalema hauhauna galewega 'isulusuluma Yehoba 'oinega, 'ihepaseya gide tohai mewahinena 'ipasa ma mwanena ba'idana sihelobaloba.

<sup>3</sup> Ma wagahata wasawasa 'oinega 'enana madouna yahesagoheya, 'igwaeya, "Cu'ita, Yehoba ma'ina tomotaiyao ba'idanao 'abwa simiyamiya, weyahina tauna ba'idadiu, ma taudi 'ina tomota. Moisa Yehoba tauna ba'idadiu, <sup>4</sup> Yehobaina mataneudi 'ilo'i'lidi, weyahina geya'abwa wete 'amasa, nuwana muyamuya, bo dou 'oidiya 'ilatulatu. Weyahina tupwa miyamiyana 'igumwala pwaiya."

<sup>5</sup> Eeta wagahata wasawasa 'ana tomiyaina 'igwaeya, "Ginaula mabwaiyana yagihe'ehaudi," ma wete 'igwaeya, "Gwae bewa 'uleledi, weyahina gwae moisa ma dumwaluna."

<sup>6</sup> Ta wete 'ihewagauwa, 'igwaeya, "Cigumwala pwaiya. Taugu tuwa 'ebe hegaina ma 'ebe losaloha, ma 'eguma taiyewedi taudi tani'odi 'iyahala, nata we'aha bidalega ya'ebwae tuwa, yawasidi weyahina. <sup>7</sup> Ma 'eguma taiya 'ihewaiwai Seitani 'oinega, nata yaliyaya yatagwala 'oina ma 'i'ahwa tamanegau, ma tauna ya'ahwa natune. <sup>8</sup> Ma hesi taudi 'atewe'awe'adi, ma taudi geya sihemisa, ma tohemata ganawalao, ma tolohe'amasao, ma tologwaliyao, ma Tomudulele ma'iyanao, ma dimwa 'adi tohemisao, ma to'e'abo'abowao, taudi bewa 'idi tupwa 'asa 'ala'alataina, beno 'amasa heluwena."

### *Yelusalema hauhauna*

<sup>9</sup> Coinega aneloseyedi sebeni, mwalo muya biyodi sebeni 'adi to'ahalao, 'aigeda 'oidiyega 'inaoma, ma 'ihewagauwa, 'igwaeya, "Cunaoma ma Lami mwanena yahe'itago."

<sup>10</sup> Ta Yaluyaluwa Tabuna 'itoegauwa 'oya saliyana tabwanina, ma 'asa 'ausalana 'ihe'itegauwa, sanina Yelusalema, galewega 'isulusuluma Yehoba 'oinega. <sup>11</sup> Ma Yehoba 'ina wasawasa 'asilalana 'asaina 'oina 'isaesaehane, ta 'asaina 'i'asilala, gide tuwa dimwa wasawasa, ta 'inamanamala gide gelasi.

<sup>12</sup> Ma 'asaina 'ana 'ali madouna ma saliyana, ma 'ana 'ahwa'eda 'adi baibaiwa tuwelo, ta 'ahwa'edaedi 'adi to'itayahinao anelose tuwelo, ta wete 'ahwa'edaedi 'oidiya susu tuwelowedi Isileli 'oinega sanidiyao silelediya. <sup>13</sup> Caliina 'ana tupwaedi 'ehata. Caigeda tupwa bolimana 'oinega, 'ana 'ahwa'edao 'etoi, tupwa bomatu 'oinega 'ahwa'eda 'etoi, tupwa yalasiyega 'ahwa'eda 'etoi, ma tupwa bwauli 'oinega 'ahwa'eda 'etoi.

<sup>14</sup> Casaina madouna si'abiya wahuwahu 'aigeda bwebwe'ana 'oina, beno dimwa tuwelo pa'alidi tabwadiya, ma dimwaedi 'oidiya Lami 'ana tohepwaila tuwelowedi sanidiyao silelediya. <sup>15</sup> Ma aneloseina ba'idagu 'agwaegwae, nimana 'ebelihe goula, ta 'abehega 'oinega 'asaina namanamalina ma 'ana 'ahwa'edao ma 'ana 'ali wete 'ilihedi.

<sup>16</sup> Casaina 'ana saliya ta 'ana tabataba tupwa 'ehataedi mahemahetena. Eeta aneloseina 'ina 'ebelihe 'oinega 'asaina 'iliheya, ta 'ana saliya ma 'ana tabataba ma 'ana hane mabwaiyana mahemahetena, gide tu tausani powa handeledi (2400) kilomita. <sup>17</sup> Ma 'ali 'ana bado nimanega 'iliheya, ta 'ilobeya teti sikisi (36) lihe, beno handeledi poti powa (144) kiubiti. Aneloseina nimana gide loheya nimana 'ana saliya gide.

<sup>18</sup> Casaina 'ana 'ali dimwa wasawasa ma namanamalidi 'oidiyega si'abiya, ta 'asa 'alona goula 'oinega si'abiya, ta 'inamanamala gide tuwa gelasi. <sup>19</sup> Casaina 'ana wahuwahu

dimwano, dimwa wasawasao ma namanamalidi 'oidiyega sihepaseya. <sup>20</sup> Wahuwahu 'aigeda 'ana pasa dimwa wasawasa wa'ewa'e'ena, heluwena 'ana pasa dimwa 'ana 'ita ni'u dubadubana gide, hetoina hebwehebwehina, 'ehatana 'ala'alawana, henimana hebwehebwehina, wa'ewa'e'ena ma dubadubana, hesikisina bwehabwehalina, hesebenina yogeyogena, ma he'etitina 'ala'alawana, henaenina wete yogeyogena, nima luwaluwaina 'ala'alawana, helebenina wete ni'u dubadubana gide, ma hetuwelona dubadubana, nabu'a gide.

<sup>21</sup> Ta 'asaina 'ana 'ahwa'edao tuwelowedi giniuba tuwelo madoudi tuwelo 'oidiyega sipaihowediya, ma 'ahwa'eda 'aigeda giniuba 'aigeda 'oinega sipaihoweya. Ta 'asaina 'ana 'eda mabwaiyana gouda daisinamo, 'inamanamala gide gelasi.

<sup>22</sup> Casaina 'oina geya Hada He'asisi ya'ita, weyahina Bada Yehoba Tohewaiwai hedada ma Lami, taudi tuwa Hada He'asisiyedi. <sup>23</sup> Sinala ma wai'ena geya sida saehaneya 'asaina 'oina, weyahina Yehoba 'ina wasawasega 'i'atuhe 'asilaleya mabwaiyana, ma wete Lami 'ihemayaleya 'asaina 'oina.

<sup>24</sup> Ta 'asilalaina 'oinega mebale'u 'abwa siyawala dadana, ma bale'u 'ana kiniyao 'adi hep watu si'eweyama 'asaina 'oina. <sup>25</sup> Ta 'asaina 'ana 'ahwa'edao sabwelowa geya sida gududiya, ma wete geya guguyou, ma geya nihuwana.

<sup>26</sup> Ma 'ebeloinao mabwaiyana 'idi he'asisi ma 'idi hep watu si'ewedima 'asaina 'alona. <sup>27</sup> Ta geya'abwa ginaula bi'ibi'idi 'asaina 'oina siluhulu, nuwana topaihowa galadi bo to'e'abo'abowao. Beno tuwa taudi sanidi silele pwaiya Lamiina 'ina bukiya, beno yawasida bukina 'oina.

## 22

<sup>1</sup> Eeta aneloseina yawasida we'ahina 'ihe'itegauwa, we'ahinaina matana maemaedanina moisa, Yehoba ma Lami 'idi wagahata wasawasaina 'oinega 'idaudauma. <sup>2</sup> Ma 'asaina gamwagamwaninega 'idaudaudobi. Ta we'ahinaina papalidiya yawasida 'aiwenao sito-toholo. Caiwedyedi huwaidi wai'ena 'aigeda 'aigeda hagadi ma hagadi, 'oinega bolime 'aigeda 'alona matuwelo sihuwahuwa, ma nabainao boda mabwaiyadi bale'uwa 'idi mulamula.

<sup>3</sup> Ta hesi ginaula gala hedadedi 'abwa sisawala 'asaina 'oinega, ma Yehoba ta Lamiina 'idi wagahata wasawasa 'oina simiyamiya, ma Lamiina 'ina topaihowao 'oina sipaihowa.

<sup>4</sup> Ma wete manina si'ita, tauna sanina manidiya. <sup>5</sup> Geya'abwa wete 'ida guguyou, ma geya nuwadi sinala ma mayale 'asilaladi, weyahina Bada Yehoba tauna tuwa 'idi 'asilalaina, ma siloina hataya.

### *Yesu 'ina naoma*

<sup>6</sup> Ta aneloseina 'ihewaegauga, 'igwaeya, "Gwae bewa moisa ma dumwaluna. Bada Yehoba tauna tuwa yaluyaluwa 'ana to'ebwaya palopitao 'oidiya, ma 'ina anelose 'ihetuneyama topaihowao 'oidiya 'ihe'ita to'aha nata 'ilatuma."

<sup>7</sup> Ma Yesu 'igwaeya, "Wa'ita! Bewa ma yanaowa, ma taudi gwae hemisa buki bewa 'oina 'adi tohematamatanao siyaliyaya."

<sup>8</sup> Taugu Yoni ginaula bewa mabwaiyadi yahesagohediya ta ya'itediya. Ma ginaula bewa sigumwala, ma aneloseina 'ahena yabe'u talutalubu'iya, tauna ginauledi 'ana tohe'ita 'oiguwa, ta 'oina ya'etuluha. <sup>9</sup> Coinega tauna 'ihewaegauga, 'igwaeya, "Geya'abwa gide, weyahina taugu topaihowa tuwa gide 'owa, ma tasidao taudi palopitao, ta wete taudi buki bewa 'ana tohematamatanao. Ma hesi Yehoba 'iboi namo 'oina 'u'etuluha."

<sup>10</sup> Ma wete 'ihewaegauga, 'igwaeya, "Geya'abwa gwae nugetaedi buki bewa 'alona 'udahwadahwadi, weyahina tuta deina tuwa. <sup>11</sup> Ma 'oinega taudi togala, tuwa galana 'oidiya 'imiya hataya, ta 'eguma taudi mumugadi bi'ibi'ina, tuwa bi'i 'oidiya 'imiya hataya, ta 'eguma taudi mumugadi bwebwe'adi, mumugadi 'ibwebwe'ana hataya, ma taudi 'asi'asilaladi, 'asilalaina 'oina simiya hataya."

<sup>12</sup> Coinega Yesu 'igwaeya, “Nata yanaowa ma 'ami maisa ya'ewediwa, ma yaheguyai 'oimiya, gide 'imi paihowa 'adi madou. <sup>13</sup> Weyahina taugu 'ebenugeta ma 'ebemuliya, nuwana 'ebehegaina ma 'ebelosaloha.”

<sup>14</sup> Ta wayaliyaya 'eguma taiyawedi 'omi 'ami 'ale'o wadeulidiya, weyahina 'aiweina huwaina yawasida weyahina wa'ai, ta wete 'asaina 'ana 'ahwa'edao 'oidiyega waluhu. <sup>15</sup> Ma hesi 'asa 'atamanina 'adi tomiyanao, beno 'edewao, ma Tomudulele ma'iyanao, ma tologwaliyao, ma tolohe'amasao, ma dimwa 'adi tohemisao, ta wete to'e'abo'abowao.

<sup>16</sup> “Taugu Yesu, ta 'igu anelose yahetune pwaiyawa 'oimiya, ta 'abehega ginaulaedi bewa 'ihewailedi tohekalesiyao 'oimiya. Taugu Debida 'ina susu 'aigeda, ma taugu wete tomodaba 'asilalana.”

<sup>17</sup> Yaluyaluwa Tabuna ma tohai mewahinena sigwaeya, “Wanaoma”. Ma taiyawedi 'omi gwae bewa wahesagoheya, 'omi wete wagwae, “Wanaoma.” Ma taudi tani'odi 'iyahala sinaoma, ma taiyawedi taudi nuwanuwadi, nata yawasi we'ahina si'ewa, ma sinuma. Geya 'ana maisamo.

#### *Cebelosaloha*

<sup>18</sup> Comi buki bewa 'ina gwae hemisa 'ana tohesagohao bewa 'ami henuwalagu, 'abehega geya'abwa 'imi gwaeyega waloloheposeyane, 'amuge muyamuyaowedi buki bewa 'alona 'ihewailediya Yehoba 'iloheposeyane 'oimiya. <sup>19</sup> Ta wete geya'abwa 'aigeda gwae buki bewa 'oinega wa'ewa'ewa yahule, 'amuge Yehoba wete 'ami heguheguyai yawasi 'aiwena 'oinega 'i'ewa yahule, ma wete 'imi 'ebemiya 'asaina 'asi'asilalana 'alona, ta ginaula baibaiwadi bwebwe'adi buki bewa 'oina 'ihewailediya, 'oimiyega 'i'ewa yahuledi.

<sup>20</sup> Gwae bewa 'ana tohepwaila 'igwaeya, “Moisa! Bewa ma yanaowa.” Gide Bada, 'unaoma, 'owa Yesu.

<sup>21</sup> Cida Badaina Yesu 'ina 'atemuyamuya ta 'ina helau baibaiwami 'ana tohemisao 'oimiya.

## Read the New Testament daily

### *January*

date	Scripture
1	Madiu 1:1-2:12
2	Madiu 2:13-3:6
3	Madiu 3:7-4:11
4	Madiu 4:12-25
5	Madiu 5:1-26
6	Madiu 5:27-48
7	Madiu 6:1-24
8	Madiu 6:25-7:14
9	Madiu 7:15-29
10	Madiu 8:1-17
11	Madiu 8:18-34
12	Madiu 9:1-17
13	Madiu 9:18-38
14	Madiu 10:1-23
15	Madiu 10:24-11:6
16	Madiu 11:7-30
17	Madiu 12:1-21
18	Madiu 12:22-45
19	Madiu 12:46-13:23
20	Madiu 13:24-46
21	Madiu 13:47-14:12
22	Madiu 14:13-36
23	Madiu 15:1-28
24	Madiu 15:29-16:12
25	Madiu 16:13-17:9
26	Madiu 17:10-27
27	Madiu 18:1-22
28	Madiu 18:23-19:12
29	Madiu 19:13-30
30	Madiu 20:1-28
31	Madiu 20:29-21:22

### *February*

date	Scripture
1	Madiu 21:23-46
2	Madiu 22:1-33
3	Madiu 22:34-23:12
4	Madiu 23:13-39
5	Madiu 24:1-28
6	Madiu 24:29-51
7	Madiu 25:1-30
8	Madiu 25:31-26:13
9	Madiu 26:14-46
10	Madiu 26:47-68
11	Madiu 26:69-27:14
12	Madiu 27:15-31
13	Madiu 27:32-66
14	Madiu 28:1-20
15	Maki 1:1-28
16	Maki 1:29-2:12
17	Maki 2:13-3:6
18	Maki 3:7-30
19	Maki 3:31-4:25
20	Maki 4:26-5:20
21	Maki 5:21-43
22	Maki 6:1-29
23	Maki 6:30-56
24	Maki 7:1-23
25	Maki 7:24-8:10
26	Maki 8:11-9:1
27	Maki 9:2-29
28	Maki 9:30-10:12



date	Scripture
1	Maki 10:13-31
2	Maki 10:32-52
3	Maki 11:1-26
4	Maki 11:27-12:17
5	Maki 12:18-37
6	Maki 12:38-13:13
7	Maki 13:14-37
8	Maki 14:1-21
9	Maki 14:22-52
10	Maki 14:53-72
11	Maki 15:1-47
12	Maki 16:1-20
13	Luke 1:1-25
14	Luke 1:26-56
15	Luke 1:57-80
16	Luke 2:1-35
17	Luke 2:36-52
18	Luke 3:1-22
19	Luke 3:23-38
20	Luke 4:1-30
21	Luke 4:31-5:11
22	Luke 5:12-28
23	Luke 5:29-6:11
24	Luke 6:12-38
25	Luke 6:39-7:10
26	Luke 7:11-35
27	Luke 7:36-8:3
28	Luke 8:4-21
29	Luke 8:22-39
30	Luke 8:40-9:6
31	Luke 9:7-27

date	Scripture
1	Luke 9:28-50
2	Luke 9:51-10:12
3	Luke 10:13-37
4	Luke 10:38-11:13
5	Luke 11:14-36
6	Luke 11:37-12:7
7	Luke 12:8-34
8	Luke 12:35-59
9	Luke 13:1-21
10	Luke 13:22-14:6
11	Luke 14:7-35
12	Luke 15:1-32
13	Luke 16:1-18
14	Luke 16:19-17:10
15	Luke 17:11-37
16	Luke 18:1-17
17	Luke 18:18-43
18	Luke 19:1-27
19	Luke 19:28-48
20	Luke 20:1-26
21	Luke 20:27-47
22	Luke 21:1-28
23	Luke 21:29-22:13
24	Luke 22:14-34
25	Luke 22:35-53
26	Luke 22:54-23:12
27	Luke 23:13-43
28	Luke 23:44-24:12
29	Luke 24:13-53
30	Yoni 1:1-28

date	Scripture
1	Yoni 1:29-51
2	Yoni 2:1-25
3	Yoni 3:1-21
4	Yoni 3:22-4:3
5	Yoni 4:4-42
6	Yoni 4:43-54
7	Yoni 5:1-23
8	Yoni 5:24-47
9	Yoni 6:1-21
10	Yoni 6:22-40
11	Yoni 6:41-71
12	Yoni 7:1-29
13	Yoni 7:30-52
14	Yoni 7:53-8:20
15	Yoni 8:21-30
16	Yoni 8:31-59
17	Yoni 9:1-41
18	Yoni 10:1-21
19	Yoni 10:22-42
20	Yoni 11:1-53
21	Yoni 11:54-12:19
22	Yoni 12:20-50
23	Yoni 13:1-30
24	Yoni 13:31-14:14
25	Yoni 14:15-31
26	Yoni 15:1-27
27	Yoni 16:1-33
28	Yoni 17:1-26
29	Yoni 18:1-24
30	Yoni 18:25-19:22
31	Yoni 19:23-42

date	Scripture
1	Yoni 20:1-31
2	Yoni 21:1-25
3	Paihowa 1:1-26
4	Paihowa 2:1-47
5	Paihowa 3:1-26
6	Paihowa 4:1-37
7	Paihowa 5:1-42
8	Paihowa 6:1-15
9	Paihowa 7:1-29
10	Paihowa 7:30-50
11	Paihowa 7:51-8:13
12	Paihowa 8:14-40
13	Paihowa 9:1-25
14	Paihowa 9:26-43
15	Paihowa 10:1-33
16	Paihowa 10:34-48
17	Paihowa 11:1-30
18	Paihowa 12:1-23
19	Paihowa 12:24-13:12
20	Paihowa 13:13-41
21	Paihowa 13:42-14:7
22	Paihowa 14:8-28
23	Paihowa 15:1-35
24	Paihowa 15:36-16:15
25	Paihowa 16:16-40
26	Paihowa 17:1-34
27	Paihowa 18:1-21
28	Paihowa 18:22-19:12
29	Paihowa 19:13-41
30	Paihowa 20:1-38

date	Scripture
1	Paihowa 21:1-16
2	Paihowa 21:17-36
3	Paihowa 21:37-22:16
4	Paihowa 22:17-23:10
5	Paihowa 23:11-35
6	Paihowa 24:1-27
7	Paihowa 25:1-27
8	Paihowa 26:1-32
9	Paihowa 27:1-20
10	Paihowa 27:21-44
11	Paihowa 28:1-31
12	Loma 1:1-17
13	Loma 1:18-32
14	Loma 2:1-24
15	Loma 2:25-3:8
16	Loma 3:9-31
17	Loma 4:1-12
18	Loma 4:13-5:5
19	Loma 5:6-21
20	Loma 6:1-23
21	Loma 7:1-14
22	Loma 7:15-8:6
23	Loma 8:7-21
24	Loma 8:22-39
25	Loma 9:1-21
26	Loma 9:22-10:13
27	Loma 10:14-11:12
28	Loma 11:13-36
29	Loma 12:1-21
30	Loma 13:1-14
31	Loma 14:1-23

date	Scripture
1	Loma 15:1-21
2	Loma 15:22-16:7
3	Loma 16:8-27
4	1 Kolinita 1:1-17
5	1 Kolinita 1:18-2:5
6	1 Kolinita 2:6-3:4
7	1 Kolinita 3:5-23
8	1 Kolinita 4:1-21
9	1 Kolinita 5:1-13
10	1 Kolinita 6:1-20
11	1 Kolinita 7:1-24
12	1 Kolinita 7:25-40
13	1 Kolinita 8:1-13
14	1 Kolinita 9:1-18
15	1 Kolinita 9:19-10:13
16	1 Kolinita 10:14-11:1
17	1 Kolinita 11:2-16
18	1 Kolinita 11:17-34
19	1 Kolinita 12:1-26
20	1 Kolinita 12:27-13:13
21	1 Kolinita 14:1-17
22	1 Kolinita 14:18-40
23	1 Kolinita 15:1-28
24	1 Kolinita 15:29-58
25	1 Kolinita 16:1-24
26	2 Kolinita 1:1-11
27	2 Kolinita 1:12-2:11
28	2 Kolinita 2:12-17
29	2 Kolinita 3:1-18
30	2 Kolinita 4:1-12
31	2 Kolinita 4:13-5:10



date	Scripture
1	2 Kolinita 5:11-21
2	2 Kolinita 6:1-13
3	2 Kolinita 6:14-7:7
4	2 Kolinita 7:8-16
5	2 Kolinita 8:1-15
6	2 Kolinita 8:16-24
7	2 Kolinita 9:1-15
8	2 Kolinita 10:1-18
9	2 Kolinita 11:1-15
10	2 Kolinita 11:16-33
11	2 Kolinita 12:1-10
12	2 Kolinita 12:11-21
13	2 Kolinita 13:1-14
14	Galetiya 1:1-24
15	Galetiya 2:1-16
16	Galetiya 2:17-3:9
17	Galetiya 3:10-22
18	Galetiya 3:23-4:20
19	Galetiya 4:21-5:12
20	Galetiya 5:13-26
21	Galetiya 6:1-18
22	Epeso 1:1-23
23	Epeso 2:1-22
24	Epeso 3:1-21
25	Epeso 4:1-16
26	Epeso 4:17-5:2
27	Epeso 5:3-33
28	Epeso 6:1-24
29	Pilipai 1:1-26
30	Pilipai 1:27-2:18

date	Scripture
1	Pilipai 2:19-3:6
2	Pilipai 3:7-4:1
3	Pilipai 4:2-23
4	Kolose 1:1-20
5	Kolose 1:21-2:7
6	Kolose 2:8-23
7	Kolose 3:1-17
8	Kolose 3:18-4:18
9	1 Tesalonaika 1:1-2:9
10	1 Tesalonaika 2:10-3:13
11	1 Tesalonaika 4:1-5:3
12	1 Tesalonaika 5:4-28
13	2 Tesalonaika 1:1-12
14	2 Tesalonaika 2:1-17
15	2 Tesalonaika 3:1-18
16	1 Timoti 1:1-20
17	1 Timoti 2:1-15
18	1 Timoti 3:1-16
19	1 Timoti 4:1-16
20	1 Timoti 5:1-25
21	1 Timoti 6:1-21
22	2 Timoti 1:1-18
23	2 Timoti 2:1-21
24	2 Timoti 2:22-3:17
25	2 Timoti 4:1-22
26	Taito 1:1-16
27	Taito 2:1-14
28	Taito 2:15-3:15
29	Pilimoni 1:1-25
30	Ibeliu 1:1-14
31	Ibeliu 2:1-18

date	Scripture
1	Ibeliu 3:1-19
2	Ibeliu 4:1-13
3	Ibeliu 4:14-5:14
4	Ibeliu 6:1-20
5	Ibeliu 7:1-19
6	Ibeliu 7:20-28
7	Ibeliu 8:1-13
8	Ibeliu 9:1-10
9	Ibeliu 9:11-28
10	Ibeliu 10:1-18
11	Ibeliu 10:19-39
12	Ibeliu 11:1-16
13	Ibeliu 11:17-31
14	Ibeliu 11:32-12:13
15	Ibeliu 12:14-29
16	Ibeliu 13:1-25
17	Yemesa 1:1-18
18	Yemesa 1:19-2:17
19	Yemesa 2:18-3:18
20	Yemesa 4:1-17
21	Yemesa 5:1-20
22	1 Pita 1:1-12
23	1 Pita 1:13-2:10
24	1 Pita 2:11-3:7
25	1 Pita 3:8-4:6
26	1 Pita 4:7-5:14
27	2 Pita 1:1-21
28	2 Pita 2:1-22
29	2 Pita 3:1-18
30	1 Yoni 1:1-10

date	Scripture
1	1 Yoni 2:1-17
2	1 Yoni 2:18-3:2
3	1 Yoni 3:3-24
4	1 Yoni 4:1-21
5	1 Yoni 5:1-21
6	2 Yoni 1:1-13
7	3 Yoni 1:1-14
8	Yude 1:1-25
9	He'ita'ita 1:1-20
10	He'ita'ita 2:1-17
11	He'ita'ita 2:18-3:6
12	He'ita'ita 3:7-22
13	He'ita'ita 4:1-11
14	He'ita'ita 5:1-14
15	He'ita'ita 6:1-17
16	He'ita'ita 7:1-17
17	He'ita'ita 8:1-13
18	He'ita'ita 9:1-21
19	He'ita'ita 10:1-11
20	He'ita'ita 11:1-19
21	He'ita'ita 12:1-18
22	He'ita'ita 13:1-18
23	He'ita'ita 14:1-20
24	He'ita'ita 15:1-8
25	He'ita'ita 16:1-21
26	He'ita'ita 17:1-18
27	He'ita'ita 18:1-24
28	He'ita'ita 19:1-21
29	He'ita'ita 20:1-15
30	He'ita'ita 21:1-27
31	He'ita'ita 22:1-21

## Gwaeyao Tupwadi 'adi Lihasio

- Caisi - Ceguma we'aha 'igogai hededa beno nata 'ipa'ala, sanina 'aisi.
- Caki - Nowa 'ina waga madouna 'ipaihoweya.
- Cale'o biliupa - Yehoba 'ina Hada He'asisi solana Tupwa He'asisi Hedade sibiliupeya 'ale'o madouna 'oinega, eeta gesowana tomota siluhuluhu Yehoba matana, ma hesi Topwaoli Madouna sawasawahina 'iluhu bolime ma 'aigeda 'oidiya.
- Casa 'ala'alatana - Tupwaina 'oina togala 'abwa miya mwau hataya 'oina siloba, Seitani ba'idanao. Yehoba geya nuwana ma tomota siluhuluhu 'oina, 'oinega Natuna 'itagwaleyama 'i'amasakelose 'oina ma 'abehega 'ida puiyao 'inuwasamudi, 'eguma tanuwabui ma tahemisa.
- Case - Hebai gide hosi sanina 'ase bo "donkey."
- Cebe 'abihesesaha - Pwalawa 'ana 'abihesesaha sasina "Yeast". Ceguma geya 'ana 'abihesesahamo pwalawa 'ana 'ai geya bwebwe'ana, weyahina 'ipa'ala.
- Cebegesoha - Me Yudiya 'idi tanoha 'ana 'ebegesoha taudi hebai bulumakau bo 'ase ' eluwa 'aigeda 'aiwe tagitagina silisilisi, ma 'ana to'itayahina 'iloiloina ma sigesogesoha, sanina "plow."
- Cinisenisi - Caiwe 'aigeda masina, 'ana maisa madouna, 'eguma 'ipatu ma pa'alina, oinega sigabu ma mahaina 'ausalana.
- Cwapi 'ebesiwama - Me Yudiya 'idi 'ebesiwama gide botolo 'oinega 'adi we'aha sigoigoi, ma hesi hebai 'wapidi 'oidiyega sipaihoweya.
- Cwapi'upwama - Yehoba 'ina lolina Ebalahamo 'oina, beno buki Nugeta 17:9-14 'oina 'abehega tauna ma natunao ta tubunao meloheyadi mabwaiyadi 'idi 'ebeselolo 'wapidi matana sida 'upwadi, beno 'ila 'ilala nuwana 'ebe 'inana sida paihowa, ta 'ana sanapu beno taudi Yehoba 'ina tomotaiyao hesihesinuwadi.
- Aisake - Ebalahamo natuna sanina Aisake.
- Aliyopego - Caigeda 'oya 'asa Ateni deina, meAteni 'idi 'ebe 'eto'auta.
- Alowesi - Caiwe masina gide holowa, to'amasao me Yudiya siheholoidi, gide 'adi mulamula 'oinega to'amasawawanidi siheheloidi.
- Anelose - Taudi yaluyaluwama bwebwe'adi, Yehoba 'ina topaihowao. Taudi Yehoba 'ana tohemisao silemelemegita. Sauga baibaiwana geya tada 'itediya, ma hesi sauga tupwadi 'oidiya ta'itadi.
- Ba'ala - MeKenani 'idi yaubada galena, gide 'idi Tomodulele.
- Ba'ali - Ce'ahai 'ana 'ita gide laisi bo witi, ta 'oinega sipaihowadi pwalawa ma beledi.
- Balabala 'awawama - Tupwaina 'oina geya tomota ma geya hada simiyamiya, ma wete tupwama Yudiya 'oina geya 'aiwe madoudi.
- Balami - Yehoba 'ina palopita 'aigeda, ma hesi 'ihetopaihowama meIsileli 'adi 'alehao weyahidi, 'oinega Yehoba 'i'ausiya.
- Banika - Mane 'ana lagu hada madouna 'oina, ma 'imiya bwebwe'ana.
- Beyama - Hebai 'aigeda 'ana 'ita gide 'edewama, ma hesi madouna.
- Botoloma - Cebe siwama we'aha bo holowama weyahina.
- Butu - Cahedama 'ana 'ebe lagu su'wana.
- Buyubuyuwama - Caiwe 'i'iuna pa'alina ta wete galana.
- Bwebwesoma - To'amasayaluyaluwadi 'idi 'asa ma 'oina siyamwayamwana bwa'omatana 'ana tuta weyahina. MeYudiya sibwauweyama Edesi, ta meDuwau sibwauweyama Bwebwesoma.
- Damayama - MeYudiya 'idi 'aiwe mahuwainama, 'ana 'ita gide damayama huwainama, ma hesi madouna ta hotohotona, sanina "fig."
- Debida - Tauna meIsileli 'idi kini 'aigeda ta sanina 'ihane hedada, ta wali Same tupwana baibaiwadi 'ibuidiyama. Debidainama 'ina susu 'oinega To'abihetena Keliso 'itauyama.

- Ebalahamo - Mwalo hene Ebalahamo Yehoba 'ina bwau 'imuliyeya ta 'abehega 'ina 'asa 'i'ebesine Ebalahamo natuna Aisake.
- Ebeli - Tauna Adama natuna, ta Keni tasina.
- Eloni - Tauna Mosese tasina, Libai 'ina susu 'oinega, ta Topwaoli Madouna nugenuge-taina.
- Epikulo - MeGilisi 'idi tupwa taudi Epikulo wete gide taudi Sitoike loheloheya sansanpuidi, ta sauga baibaiwana sihehegwaegwae sanapu weyahina.
- Gado'a - Caiwe masina 'ipa'ala ma 'oinega sigabudi ma mahaina bwebwe'ana, meYudiya 'idi 'inisenisi gidemusa.
- Ganamuli - Tomiya ganamuli, taudi geya meYudiya, 'oinega Yehoba 'ina loinao geya sisanapu ta geya sida muliyeya. Taudi 'idi 'asao Gilisi ma Loma ma 'asa bwaga baibaiwadi 'oidiya. MeYudiya 'idi nuwatuhi 'abehega taudimo Yehoba 'ina tomota hesihesinuwadi, 'oinega tomiya ganamuli mabwaiyadi sisinasinalidi.
- Gileipa - MeYudiya 'idi 'aiwe huwaina hotohotona sanina gileipa, ma huwaina sibibi ma masina 'oinega 'adi we'aha sinumanuma, sanina waini.
- Gilisi - Tomiya ganamuli 'idi tupwa 'aigeda sanina Gilisi. Tupwaina 'asa madouna sanina Ateni, wete 'aigeda 'asa sanina Kolinita. Taudi 'enadi 'ena Gilisi 'enana madouna 'asa baibaiwadi 'oidiya, gide Dobu Milne Bay Mabwaiyana 'oina. Loina Tabu Hauhauna 'ana toleleyao 'ena Gilisi 'oinega sileleya, beno Madiu ma Maki ma Paulo ma bodaidi, weyahina meYudiya ma wete tomiya ganamuli baibaiwadi 'ena Gilisi sisanapuya. Ta hesi meYudiya meGilisi sihesaniyediya tomiya ganamuli.
- Gomola - Casa sodoma ma Gomola 'asa galadi, 'oinega Yehoba 'igabu hegumwalidiya, ma hesi Lota ma natunao 'i'abihetediya.
- Goti - Hebai 'aigeda 'ana sinabwa gide 'edewa madouna.
- Goula - Goula tuwa pwawati, ma maisana madou hedadena.
- Hada He'asisi - Yehoba 'ina hada madouna Yelusalema 'oina tomota sipwaopwaoli.
- Hada Tapwalolo - Casa 'aigeda 'aigeda 'oidiya meYudiya 'idi Hada Tapwalolo simiyamiya, ta 'oidiya Sabati 'aigeda 'aigeda 'oina Buki He'asisi sihasihasili, ma sihehe'ita, ma wete si'ahwa'ahwanoi Yehoba 'oina.
- Hataona Guyaina - Mwalo meYudiya 'asa Itipita 'oina simiya mwauwa, ma Yehoba 'ina anelose 'ihesumaneya ma tautuwa 'ilohe 'amasi hada 'aigeda 'oidiya. Ma hesi meoidiya. Ma hesi meYudiya lami sihunudi ma bweyahidi 'oidiyega 'idi 'ahwa'eda 'aigeda 'aigeda sisaudi. Ceguma aneloseina bweyahaina 'i'ita beno 'ihataone hali tupwa, ma hadaina 'alona ma'idi bwebwe'ana. Ma hesi mettipita 'idi hada mabwaiyana 'oina 'iluhu tautuwa mabwaiyadi 'ilohe'amasidi.
- Coinega bolime 'aigeda meYudiya 'ebe nuwatuhyahina sipaipaihowa sanina Hataona Guyaina ma 'oina 'adi beledi geya 'ana 'abi hesesehamo si'ai'ai'.
- Helodi - Taudi toloinao tupwa Yudiya 'oina 'idi mumuga gala hedadena.
- Caigeda Helodi saugaina Yesu 'ili'uwa nuwanuwana ma 'ilohe'amasi.
- Helodi heluwena Yoni to'abihebabitaiso 'ilohe'amasiya, ma wete Yesu 'iloinaeya ta sisapiya ma 'ihesumaneya Pailato 'oina.
- Helodi hetoina Yoni tasina Yemesa 'ilohe'amasiya.
- Helodi hepowana Paulo'iloinaeya ma 'ihesumaneya 'itauya Loma 'oina sabi heyatala kini Sisa matana.
- Hi'ahi'a - Yaluyaluwa galadi, 'eguma siluhu tomota 'oidiya si'abihe yauyauledi bo mumugadi si'abihegaladi bo nuwana si'abihe lohaladi.
- Hisopa - Caiwe 'aigeda maYudiya sihepaihowa 'idi pwaoli weyahidi.
- Hosi - Hebai madouna, sowasowana 'oina tagelu ma 'itauyegita.
- Hudi - Tapwalolo weyahina 'ana he'asisi beno geya sowana si'ai ma sinuma. Tuwa sihudihudi ma si'ahwa'ahwanoi Yehoba 'oina.
- Ibeliu - Beno meYudiya, nuwana meIsileli taudi 'enadi sanina wete Ibeliu.
- Ilaisa - Tauna palopita Ilaitiya 'ina 'ali'e ma wete 'ana miyalaena.



- Ilaitiya - Mwalo tauna Yehoba 'ina palopita waiwaina. Geya 'i'amasa, ma hesi mabwebwe'ana Yehoba 'itoeya.
- Isileli - Aisake natuna Yakobo, sanina heluwena Yehoba 'ihesaniyeya Isileli. Tauna natunao meloheyadi site tuwelo ma tubudiyao beno meIsileli, wete 'idi 'asa sanina Isileli, beno meYudiya 'idi 'asa.
- Iso - Tauna Aisake natuna tautuwa, ma hesi 'e'ahai weyahina 'ina 'ebeloina 'i-hegimwaneyeya tasina Yakobo 'oina.
- Kameli - Hebai madouna gide hosi, tobwatobwa 'ana to'ahala. Wete tomota 'ilemedi ma 'oinega sigelu.
- Keliso - Keliso 'ana sanapu beno To'abihetena tauna Yehoba 'ihesinuweya. Cena Ibeliu 'oinega sigwae Mesaiya, ta 'ena Gilisi beno Keliso.
- Kenani - Casa Kenani Yehoba 'igwae hemisaeya Ebalahamo 'oina. Sauga bewa sihesaniyeya Isileli. Wete gide sihesaniyeya Palestine.
- Keni - Adama natuna, ta tasina Ebeli 'ana tolohe'amasa.
- Kihi - Dedewaga bo 'ahwa'eda 'ana 'ebe so'e sanina kihi bo 'ihi.
- Kola - Tauna 'ina tohanugetao Mosese ma Eloni 'ilo'alehediya, 'oinega bale'u 'i'eso'eya ta 'itoneya.
- Laiyoni - Hebai madouna ma 'ilolosasa, tomota 'ilolohe'amasidi ta 'i'ai'aidi.
- Lami - Lami hebai sipi natuna 'i'iuna. MeYudiya sihunuhunudi 'abehega 'idi pwaoli Yehoba 'oina.
- Libai - Libai tauna Yakobo natuna 'aigeda. Tauna tubunao topwaoliyao ma topaihowao Yehoba 'ina Hada He'asisi 'oina. Caigeda 'oidiyega Topwaoli Madouna nugenuge-taina sanina Eloni, tauna Mosese tasina.
- Loheyaiguina - Ceguma Yesu 'ihehe'ita 'abehega tauna To'abihetena Mesaiya, tauna 'ibwauweya "The Son of Man," ta 'ana sanapu "Tomota moisa," Yehoba 'oinega 'itauyama, ta 'ana bui 'ena Bunama 'oinega beno Loheyaiguina.
- Loina 'ana tohe'itao - Taudi Buki He'asisi 'ana sanapu sihe'ita tomota 'oidiya, ma wete 'ana gwae silebaleledi, beno buki hauhauna 'ana paihowa weyahina.
- Lota - Lota tauna Ebalahamo tasina natuna ta Ebalahamo 'i'wayabuya sitauya Kenani 'oina, ma nobwa Lota Ebalahamo 'i'ebesineya 'itauya 'asa Sodoma ma Gomola 'oidiya.
- Mana - Mwalo meIsileli sitautauya yoho 'awawa ma Yehoba 'e'ahai sanina mana 'i'ebwaediya ma si'ai'ai. Ceguma gonegonega sitoholo mana 'imiyamiya bale'uwa.
- Mane - MeYudiya 'idi 'ebe gimwane ma 'oinega 'idi tobwatobwa sigimwagimwane, ta goula ma siliba 'oidiyega sipaihowediya 'idi maneyedi.
- Melikisedeki - Mwalo tauna kini 'asa Salema 'oina, nuwana Yelusalema 'oina, ta 'ina gwae helau 'i'ebwaeya Ebalahamo 'oina, saugaina Ebalahamoina 'ihilama lo'aleha 'oinega eema Ebalahamo Melikisedekiina 'ina tobwatobwa tupwana 'i'ebwaeya.
- Mesaiya - Tauna to'abihetena, 'ena Ibeliu Mesaiya, ta 'ena Gilisi beno Keliso.
- Mosese - Mwalo hene meIsileli tupwa Itipita 'oina simiyamwauwa, ma Yehoba 'ina palopita sanina Mosese 'ihanugetedi ma sihapwesa sitauya 'idi 'asa Kenani weyahina.
- Mulo - Caiwe masina 'aigeda 'ana maisa madouna, ta mahaina 'ausalana, meYudiya 'adi mulamula, ta wete to'amasa wawanidi 'oidiya siheholoidi.
- Mwali ma bagi - Madiu 13:46 'oina Yesu 'ihehe'ita wasawasa Yehoba 'oina weyahina, ta 'igwae hegehegedi tohewasawasa bale'u weyahina. Tauna wasawasa madouna 'ilobeya ma nuwana 'i'eweya, gide Yehoba 'ina helau ta 'ina loina 'oida.
- Mwawa'i - Caiwe huwaina 'ebe'ita tuwa gide meYudiya 'idi olibe.
- Nidili - Cale'o 'ana 'ebe sahila sanina nidili.
- Olibe - MeYudiya 'idi 'aiwe ma huwaina 'oinega sipaihowadi 'idi holowa ta 'idi mulamula, ma wete 'adi 'ana 'ebe'e'ule.
- Palisi - MeYudiya 'idi tapwalolo 'adi tosanapuwao 'aigeda boda sibwauwediya Palisi. Yehoba'ina loinao sihe'asisiyane bwaibwaininidi.

- Palopisai - Beno palopitao sigwae nugeta 'abwa to'aha 'ilatu, beno nuwatuhi gide Yehoba 'i'ebwaediya.
- Palopita - Yehoba 'ina togwaeyao, sigwae nugeta to'aha 'abwa 'ilatu, beno nuwatuhi gide Yehoba 'i'ebwaediya.
- Pelo - Kini madoudi mwalo tupwa Itipita 'oina sibwauwedi Pelo.  
Hataona Guyaina 'eguma 'igumwala, ma pipiti sabwelo mulina beno Penitikosi, ma witi 'ana 'etahi sihegaina, ta siguyai, sauga bewa tanuwatuhi yahiya Yaluyaluwa Tabuna 'ina suluma Penitikosi 'ana tuta 'oina.
- Piyoi - Caiwe huwaina 'ebe'ita tuwa gide meYudiya 'idi gileipa.
- Pwaoli - Mumuga galana 'ana 'abihelolagu eema 'oinega tomota simiya bwebwe'ana, nuwana hebai sihunudi bo tobwatobwa 'oinega sihelau 'adi 'alehao 'oidiya, ma 'oinega 'aleha mabwaiyana 'igumwala. Mwalo tomota 'idi pwaoli Yehoba 'oina gidemusa hebai bo 'e'ahai bo 'ebe numa.
- Sabati - MeYudiya 'idi sabwelo 'aiyawasi beno Saturday, ta Yesu 'ina toholohila 'amasega Sunday, 'oinega sauga bewa Sunday 'ebe tapwalolo gide Sabati.
- Sadusi - MeYudiya 'idi tapwalolo 'adi tohanugetao, beno topwaoli madoudi sibwauwediya Sadusi. Taudi towasawasa madoudi. Cidi hemisa 'abehega 'amasa hataya, geya wete toholohila.
- Saido - Cebe'ita tuwa, weyahina meYudiya 'idi 'aiwe "fig" huwaina gide damaya ma hesi nabaina sigubagubala gide saido.
- Saiyoni - Saiyoni 'oyana, ta 'oina 'asa Yelusalema si'abiya.
- Sameliya - Yelusalema ma Galili gamwagamwanidiya beno tupwa Sameliya. MeSameliya tubudiyao mwalo meYudiya ma hesi hali tupwa wahiwahinedi sihaihaidi, ma wete mumugadi sihebweiyeya, 'oinega taudi gide meYudiya moisa silogwahatediya.
- Seitani - Tauna mwalo anelose 'idi tohanugeta gide Maikeli ma Gebeliyela, ma hesi 'inuwa hane, 'oinega Yehoba 'i' ahusepaleya 'idobiya bale'uwa ta 'ihe Tomudulele. Ta 'ina 'ali'eyao taudi yaluyaluwa galadi gide hi'ahi'a, welabana, balahu, to'wato'wai ma tupwadi wete. Seitani saninao baibaiwadi gide Diyabolo, Lusipa, Apoliyoni, ta Mwata Nugenugetana.
- Seyala - Caiwe 'aigeda, ta patuna 'i'iudi, gide meYudiya 'idi "mustard."
- Sikamole - Caiwe 'aigeda sanina sikamole 'itotoholo tupwa Yudiya 'oina.
- Siliya - Yudiya 'oinega tupwa bomatu 'oina tupwa sanina Siliya 'imiyamiya.
- Sipi - Sipi hebai tuwa, ta hunuhunuwadi 'oinega 'wama sipaihowadi.
- Sisa - MeLoma 'idi toloina madouna.
- Sitoike - MeGilisi 'idi tupwa taudi Sitoike gide sanasanapuidi, ta sauga baibaiwana sihehegwaegwae sanapu weyahina.
- Sodoma - Mwalo 'asa Sodoma ma Gomola 'oidiya Lota 'imiyamiya. Lota loheya bwebwe'ana ma hesi meSodoma ma meGomola 'idi mumuga gala hedadena, 'oinega Yehoba 'igabu hegumwalidiya.
- Takesi - Gabemani mane si'ewa'ewa tomota 'oidiyega sanina takesi.
- Tawelo - Tawelo 'ebe tala'i'ila tuwa.
- Tomodaba - Cipwala madouna 'isae nugeta ma muliyetega 'i'asale.
- Tomudulele - Yaluyaluwa galadi 'idi bada madouna, mwalo meIsileli sihesaniyeya Bielisibubi bo Seitani.
- Topwaoli - Libai tubunao taudi topwaoliyao, ta sipwaopwaoli Yehoba 'oina tomota weyahidi, beno tomota 'idi hebahebai sihunuhunudi ta sigabudi Hada He'asisi 'oina, ma 'oinega Yehoba 'idi puiyao 'oidiyega 'inuwasamudi.
- Tupwa He'asisi - Hada Heasisi 'alona beno 'aigeda 'aliupa, ma 'oina topwaoliyao siluhuluhu sipwaopwaoli Yehoba 'oina. Geya hali tomota sida luhuwa.
- Tupwa He'asisi Hedade - Tupwa He'asisi 'alona beno 'aliupa 'i'iuna, 'ale'o 'oinega si'aliupeya, ma hesi Topwaoli Madouna 'iboima 'iluhuluhu bolime ma 'aigeda

'oidiya, ta 'ipwaoli Yehoba matana tauna 'ina puiyao ma tomota 'idi puiyao weyahidi.

Waga lisilisi - Cebe gelu gide talaka, ma hesi hebai hosi silisilisi ma 'ipilipilihe.

Wagahata - Cebemiya ma 'oinega toloina 'imiyatoi ma 'iloiloina, gide seya (chair).

Waini - Gileipa huwaina 'eguma tomota sibibi beno masina 'oinega 'adi we'aha sinumanuma, sanina waini. Ceguma waini 'imiya tuta saliyana 'ihewaiwai ma 'eguma tomota sinuma hedada nata siheyauyaule.

Witi - Witi gide laisi sibegubeguli, ma huwaina 'oinega pwalawa sipaihowa.

Yakobo - Aisake natuna Yakobo, sanina heluwena Yehoba 'ihesaniyeya Isileli. Tauna natunao meloheyadi site tuwelo ma tubudiyao beno meIsileli, wete 'idi 'asa sanina Isileli, beno meYudiya 'idi 'asa.

Yaso - Tomota 'adi sinabwa mahemahetena.

Yese - Yese tauna kini Debida tamana.

Yoheyohe Guyaina - MeYudiya 'idi 'ebe yaliyaya saugaina 'idi 'etahi 'igumwala, ta 'oina sinuwatuhuyahi tubudiyao 'idi latu Itipita 'oinega ma 'idi tauya yoho 'awawa bolime poti 'oidiya, ta yoheyohe 'oidiya si'eno'eno ma 'ana siga sihapwesa 'idi 'asa Kenani 'oina.

Yoho 'awawa - Tupwaina 'oina geya tomota ma geya hada simiyamiya, ma wete tupwa Yudiya 'oina geya 'aiwe madoudi.

Yona - Yona mwalo Yehoba 'ina palopita 'aigeda ta genuwana 'iloguguya meNininbe 'oidiya ma 'idena ta 'igeluwa wagai, ma yaumai madouna silobeya, 'oinega Yona siula suluheya holai, ta silahana madouna 'itoneya. Muliyetega silahana Yona 'imaiweya dabala, ma 'itoholowa ta 'itauya Ninibe, 'iloguguya.

Yosepa - Yosepa tauna Yakobo natuna ta tasinao sihe'ipi'ipiyeya ta 'oinega si-hegimwaneyeya meMidiyani 'oidiya, ta sitauyeya Itipita, ta nobwa 'iheloheya madouwa, ma 'ina susuwao 'ilemediya sauga gomale 'oina.

Yosuwa - Tauna Mosese 'ana miyalae ma meIsileli 'ihanugetedi ma siluhu 'idi 'asa Kenani 'oina.

Yudiya - Yuda tauna Yakobo natuna, ta tubunao taudi susu Yuda, ta 'idi tupwa sanina Yudiya, ta 'ina 'asa madouna Yelusalema. Debida ma tubuna Yesu 'idi susu Yuda. Sauga bewa meIsileli mabwaiyadi tabwauwedi meYudiya, beno "Jews", bo meDiu, weyahina 'idi tupwa sanina Yudiya.